


Sempaisi Ne Kaiwo
Mirarebanai



New Testament in Ambai

Sempaisi Ne Kaiwo Mirarebanai

New Testament in Ambai

copyright © 2010 Wycliffe Bible Translators, Inc.

Language: Ambai

Translation by: Wycliffe Bible Translators

Contributor: Wycliffe Bible Translators, Inc.

Copyright Information

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Ambai

© 2010, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-03-17

PDF generated using Haiola and XeLaTeX on 13 Jun 2025 from source files dated 29 Jan 2022

a4b461f1-cd72-5074-9be0-b39efea15ceb

Contents

Matiusi	1
Markusi	90
Lukasi	145
Yohanesi	234
Rasuli	298
Roma	378
1 Korintusi	419
2 Korintusi	460
Galatia	485
Efesusi	501
Filipi	515
Kolose	525
1 Tesalonika	534
2 Tesalonika	543
1 Timotiusi	548
2 Timotiusi	560
Titusi	569
Filemoni	574
Iberani	577
Yakobusi	607
1 Petrusi	617
2 Petrusi	628
1 Yohanesi	635
2 Yohanesi	645
3 Yohanesi	647
Yudasi	649
Wahyu	653

we deisaha kariri Kaiwo Musai soi fo weneung toa fo.

Yesusi ne aunaufo Matiusi deto kutuai we rabuang ring, amani:

1. Kaiwo kariri Yesusi kiorang na wiwoifoi fo, amani kariri todoni ohong toa fo, fianai aino taweinontarai Kristen fo tanari fo, fio ambori tasobua fo, tuti kariri taminohi weinontarai Kristen fo (robongno 5-7).
2. Kaiwo kariri fiainawiaio Yesusi dohonai we ne inontarai ewesuraya mandu fosa we etohong kariria fo (robong 10).
3. Kaiwo kariri fi netaweaio Yesusi medurai kariri todoni ambori Allai weMananufo (robong 13).
4. Kaiwo kariri Yesusi deunau kariri todoni tarariati fo (robong 18).
5. Kaiwo kariri Yesusi deunau kariri rahida kife nunei fo tuti kariri todoni Kaisung Inontarai foi daraberahi aha ma fo (robong 24-25).

Kaiwone deto kutuai tonina:

- 1:1-4 Kaiwo reantenang.
- 1:5-2:23 Yesusi saubaungfo.
- 3:1-17 Fianai aino Yohanesi mano webaptisi kaiwasa foi niari fo.
- 4:1-4:13 Yesusi webaptisifo tuti Saminseni yurai we sofa wawerahi fo.
- 4:14-9:37 Yesusi fi niari rahang kaiwasa na nu Galilea foi fo.
- 9:38-19:27 Na Galilea Yesusi da to Yerusalemifo.

Kaiwo Mahikai Na Matiusi

Kaiwo dedung we Kaiwo Mahikai na Matiusi

Bukuo Matiusi soi nini, deikaririai we tata Kaiwo Mahikai kariri Yesusi we I mani Mananu Mampario Allai dereri foi dine. Na Yesusi nini, Allai do-hong kariri fianai aino dererai kawuru na Kaiwo Areraio Mamo fo we ne inontaraifosara fo. Yesusi nini saubaunung weinontarai Yahudi tuti minohifo weinontarai Yahudi, wape Kaiwo Mahikaio deiriria fo wiyo we inontarai Yahudi fosa tera kaha, mae we nunei sentenang.

Kaiwo Matiusi soi ninai sania mesi tonanai, amani reantenangfo kariri Yesusi ne saubaunungfo, mayeai kariri webaptisifo tuti kariri todoni Saminseni yurai we sofa wawerahi fo. Kontai soi kariri fianai Yesusi niari na nu Galilea foi fo, amani kiorang Kaiwo Mararebana fo na nanai, deunauai tuti niari inontarai emaninang fosa ebeng aha. Mayeai soi kontai kariri todoni Yesusi da na Galilea to Yerusalem aha fo, tuti fianai aino Yesusi sodairai na minggu bo wefuiai pari na niayai na nunei fo, amani werea na mireha tuti suwi na mararehafoi aha fo.

Fio fubao Matiusi soi kaririai kontai fa mani, soi we Yesusi mani Mantaunau fiabai dine, andino deunau we Allai mani weMananu. Yesusi kontai ne mambiriu

19:28-23:39 Yesusi fi niari na Yerusalem tuti katai kefang na nana foi na minggu bo wefuiai pari foi.

24:1-51 Yesusi mireha suwi aha, deinawi ne taraifoi, tuti dautai to rorafaisi aha fo.

Yesusi ne ririafoi

(Lukasi 3:23-38)

¹ Yesus Kristusi mani weriria na ne werengno Mananu Dauti tuti na ne werengno Abrahami ma. Ne ririafoi mani sonina:

² Abrahami dawingno Isaki, Isaki dawingno Yakupi, Yakupi dawingno Yehudai, tuti kaisung suraya manisiari fosa kontai.

³ Yehudai dawingno Peresi tuti Serahi.

Uinami dino Tamari. Peresi dawingno Hesroni, Hesroni dawingno Rami,

⁴ Rami dawingno Ami nadapi,

Aminadapi dawingno Nahasoni,

Nahasoni dawingno Salmoni,

⁵ Salmoni dawingno Boasi, tuti Boasi nini inang dino Rahapi.

Boasi dawingno Obeti, tuti Obeti inang dino Ruti.

Obeti dawingno Isai,

⁶ Isai dawingno Mananu Dauti.

Dauti dawingno Salomoi, tuti Salomoi nini inang dino Betsebai, Uriai ne wiwingfoi.

⁷ Salomoi dawingno Rahabiami, Rahabiami dawingno Abiai,

Abiai dawingno Asai,

⁸ Asai dawingno Yosafati, Yosafati dawingno Yorami, Yorami dawingno Usiai,

⁹ Usiai dawingno Yotami, Yotami dawingno Ahasi,

Ahasi dawingno Hiskiai, ¹⁰ Hiskiai dawingno Menaseri,

Menaseri dawingno Amoni, Amoni dawingno Yosiai.

¹¹ Yosiai dawingno Yakoniasi tuti kaisung maneiru kontai, na rabuang bo Mananu Babeli kia kaiwasa Israeli foi to warang rong fo.

¹² Tuti ne riria na rabuang bo enai na nu Babeli foi mani, toninai:

Yakoniasi dawingno Sealtili, Sealtili dawingno Zerubabeli,

¹³ Zerubabeli dawingno Abihuti,

Abihuti dawingno Eliakimi,

Eliakimi dawingno Asori,

¹⁴ Asori dawingno Zadoki, Zadoki dawingno Akimi,

Akimi dawingno Elihuti, ¹⁵ Elihuti dawingno

Elieseri, Elieseri dawingno Matani, Matani dawingno Yakupi,

¹⁶ Yakupi dawingno Yusupi.

Yusupi nini mani Mariai ne mang dine.

Tuti Mariai nini dino dawingno Yesusi mano ahui we Kris-tusifoi* ne.

¹⁷ Ampafe na Abrahami paria sobu Dauti mani, ne ririafoi suraya boa. Na Dauti paria sobu kaiwasa Israeli foi sawai to nu Babeli foi mani ne ririafoi kontai suraya boa toyari ne. Na rabuang bo Mananu Babeli kia kaiwasa Israeli foi to warang rorong fo paria sobu Kristusi Mananu Mampariri foi saubaunungfo kontaio ne ririafoi da suraya boa.

Jesus Kristusi saubaunungfo
(Lukasi 2:1-7)

¹⁸ Yesusi saubaunungfo mani tonina. Rabuang bo inangno Mariai da we Yusupi fo, wiro une munu rorong siai kaharai mae, Mariai wearikang weia. Weo Nuaninu Mirarebana foi dino wedayari wearikang tonana fo.

¹⁹ Yusupi nini mani inontaraio enerorong mesi dine, ampare deyo deiaya wiwing-foi na mamunggasai, ambori Mariaio wiro mimaya na kaiwasa bitoya foi euremireafo fanai.

²⁰ Wape Yusupi enetituai we deyo niari tonanai mae, dirua mani demiai. Na ne amiai rorong foi deti Sempaisi ne wewai[†] manei medu wei deyo, "Yusupe, Dauti ne

ririante waune, dohonao mutai we ka Mariai we nemu wi-wing fanai. Weo arikangno doa wei wani mani, Nuaninu Mirarebana faini andino wedaya tonana fe ne.

²¹ Ampafe i ambori minohi tuti kaisung manei, tuti kaisung nani bohoni wonong fino Yesusi, weo i ambori feriri ne kaiwasanei weru ene sasarinei ki."

²² Ne nanai kai kawariai tonanai ambori mai kariri finai aino Sempaisi medurai na ne nabifosara fo, amani,

²³ "Kadawing sowaworua manei,
ambori wearikang tuti minohi tuti kaisung manei.
Kaisung nani esahui weo

*Imanueli."**
(Imanueli mani kaiwo Iberani fine, dotu tono, "Allai weriria tata.")

²⁴ Yusupi denawa doara mani dohong kariri kaiwo Sempaisi ne wewaifoi medura fo ampare kia Mariai we ne wiwing.

²⁵ Wape wiro dena riati kahai paria Mariai minohi tuti kaisungfoi. Tuti Yusupi dohong wonong fino Yesusi.

2

Inontarai esawai etato awahafo (Majusi) era na do wanang murang foi ma

¹ Yesusi saubaunung na bendari Betlehem na nu Yudea foi, na rabuang bo Herodesi wemananu fo. Na rabuang bonani, inontarai

* **1:16** Wonongno Kristusi, nana mani, Mananu Mampariri dine. † **1:20** Wewai-Inontarai Allai demisa eha ne kaiwo na rorafaisi meu. Ea mani wiro inontarai batang saine kaha. * **1:23** Yesayai 7:14

esawai etato we awaha fosa, era na do wanang murang foi to bendari Yerusalem ma.

² Na nanai etutang mai kaiwasafosa we arikangfoi, eteyo, "Arikangno arahi saubaunung we ambori wemananu we Yahudinesa fi didoni? Weo amewati ne awaha bei na do wanang murang foi, deinawiai we amea, dohona mani amerma we amesomi wei."

³ Herodesi tarao kaiwofo nanai soiri we kaiwofo tuti enerorongfoi disani, tuti kaiwasa na Yerusalem foi sentenang kontai.

⁴ Mayeai demi imami baba fosa tuti mantaunau Hukumi Musai soi fosa, efanduhisa ma ainanaya dutansa deyo, "Na katai bodoni dino Mananu Mampariri Allai dereri foi saubaunung nai ne?"

⁵ Eroa eteyo, "Na bendari Betlehem, na nu Yudea foi, weo nabi manei soi kaririai deyo,

⁶ 'Betleheme wau na nu Yudea wai,
wiro kotui na bendari baba na nu Yudea foi kaha.

Weo na wau ambori inontarai fuba manei dariai ki,
andino fiebai we yu nehu inontarai Israeli fesa ne.*"

⁷ Ainanaya Mananu Herodesi sahu inontaraifosa ma, dutang berasa na mamunggasai we na rahida fiani ewati awahafoi ne. [Weo enerorong we miung Mananu weworu nani.]*

⁸ Ampafe demisa era to Betlehem deyo, "Mera wa metutang sauurai we arikangwai na mai. Masino mesobui mani, mera aha ma, metei kaririai we yau, ambori yau kontai ira wa isomi wei."

⁹⁻¹⁰ Etarami kaiwofo kaia era wa. Era wa mani, ewati nari awaha raminde ewatiao na do wanang murang foi aha, ampafe emararising paria, tuti era ria awahafoi paria fiotourai tete katai arikangfoi wiatai nai foi.

¹¹ Esuai to munufoi afui, ewati arikangfoi tuti inang Mariai. Ainanaya etisangkapa eawemibukafo tuti esomi wei. Tutti etaio fianggeng eha we etohonai wei fo, amani emasi, tuti fianggeng mirarebaniao niunsai mampori, ahui we kemenyani tuti muri fo.

¹² Mayeai Sempaisi denawai na amiai rorong wesa, we wiro era wa we eteisaharai we Herodesi ahang fanai. Ampafe ehidori na rang siai rowei to ene nufoi aha.

Yusupi itowawu itone tarai to nu Mesiri foi

¹³ Ainanaya inontaraifosa era wa, mayeai Sempaisi ne wewai manei medu we Yusupi na amiai rorong fo, deyo, "Herodesi enerorong we sera we arikangwai we miuni. Ampafe boabari wau, ka arikangwai tuti inana, muntowawu to Mesiri. Muntonayai na wanai paria imadu we wau aha."

* ^{2:6} Mikha 5:2 * ^{2:7} [...] deinawiai weo kaiwo ming tuara fine.

¹⁴ Yusupi doabariri, diru nani kontaio kia arikangfoi tuti inanai itowawu to Mesiria.

¹⁵ Itonayai na wanai pariao Herodesi mireha. Ampafe fianai aino Sempaisi meduraria ne nabifi kawariai kariria, deyo,

"Isahu nehu Kaisungnei da to boriae weru nu Mesiri foi."*

Herodesi miungno arikangfosa

¹⁶ Rabuang bo Herodesi deitawanai we inontarai esawai etato awaha fosa etofari nanai, kesoua dang wawerahi. Ainanaya demine rai mamuna fosa na tapapa deyo, "Arikang mangno ene defuina boru to kofa na Betlehemi tantenang tuti munue wa ruramai na nana fosa mani, memunsa weruai." Herodesi dohong kaiwo tonanai, weo titua kariri kaiwo mano esawai etato awaha fosa emadurai kariri rahida bo awahafoi kawaria fo.

¹⁷ Finanai kawariai kariri fianai aino nabi Yeremias meduraia fo, amani dotu tonina:

¹⁸ "Na bendari Rama taramio esaia etaidu paria.

Raheli sai ne arikangfosa, miaya we waworiri kaha, weo emarareha ampa."*

Yusupi itorarabera itoru na Mesiri to Israeli aha

¹⁹ Mayeai Herodesi mirehara, ainanaya Sempaisi ne wewai manei medu we

Yusupi na ne amiai rorong foi, na nu Mesiri foi.

²⁰ Medu deyo, "Inontaraio eteyo emungno arikangwai nanisa emarareha ampa. Ampafe boa ka arikangwai tuti inanai, munotorarabera muntoru to nu Israeli foi aha."

²¹ Ampafe Yusupifo doabariri, kia arikangfoi tuti inanai itora to nu Israeli foi.

²² Wape mayeai taraoai we Herodesi antungno Arke lausi dautai aha yiwang tamanaifa we wemananu na nu Yudea foi, ampafe mitai we da to wanaia. Manamo Sempaisi dohong kaiwo wei na amiai rorong aha, ampafe da to nu Galilea foia.

²³ Na wanai niyai na bendari wonong fino Nazareti. Ampafe na tonanane kaiwo nabifosa emadu kariri Mananu Mampariri foi kawariai na mai, amani,

"I ambori ahui we inontarai Nazareti dine."

3

Yohanesi mano webaptisi kaiwasa foi wiuwu kaiwoariri
(Markusi 1:1-8; Lukasi 3:9, 15-17; Yohanesi 1:19-28)

¹ Na rabuang bonani na katai wekamamiei minano foi na nu Yudea foi, Yohanesi mano webaptisi kaiwasa foi da wiuwu kaiwofo deyo,

² "Metarabera mea weru mene sasariwa, weo Seng da ma we wemananu fe kikeu ampa."

³ Yohanesi nini dino nabi Yesayai medu kariri deyo,

* **2:15** Hosea 11:1 * **2:18** Yeremias 31:15

“Inontarai manei sahu pampang na katai wekamamiei minano foi deyo,

‘Memainenang rang beng feai we Sempaisi, tuti menaria mi moya wei.’”*

⁴ Yohanesi mani ansung sensuna fo mani beng kaha mae na fiahung unta nuwawuru toyari nabi nafafongfa fosa ene ansung etatara fo. Ne aikapurufoi na andowa rerawa. Ne fidangfo mani manggofuni tuti aniwa ne maing terai.

⁵ Kaiwasa bitoya paria era wei ma, manea na bendari Yerusalem, manea kontai na nu Yudea foi sentenang tuti manea na katai watai kefang na waya Yardeni foi.

⁶ Era ma eteiai ene sasarifo tuti webaptisia na waya Yardeni.

⁷ Inontarai eweFarisi tuti Saduki bitoya kontai era weia ambori webaptisia. Wape Yohanesi detisa nanafo, medu wesa deyo, “E, inontarai mewarami aipaya di mea, mene tarai toyari tawai memuna, dohona menemitiuai we mera ma iwebaptisi mea terai tonanai ambori mekaharai weru Seng Allai ne aiboi katu ma da ma fo fe?

⁸ Mae toyari aio webong beng, mea kontai meteinawiai na metohong toa wa we metarabera mea weru mene sasariwa ampa.

* **3:3** Yesayai 40:3 * **3:9** Raminde nani mani, Yahudifosa enemitiuai esobu mai ki weo eweriria na Abrahami, mano Allai dohong ne arerafo wei fo. † **3:11** Tarahai, ‘na adia’ ne maksuti siai, amani dohong aiboi we mano etaraberasa weru ene sasarifo kaha fosa.

⁹ Dohonao meteyo mea mani mene wereng di Abrahami ampare ambari mekaharai weru Allai ne aiboi fe.* Mearomioai we Seng Allai mani mawa arora wei we niari riria Abrahami na kamamieinei kontai.

¹⁰ Tamangfoi meinanang na ai newafoi we robani. Ampafe ai bodoni dino webong kaha mani, robani tuti kabioi to adia rorong fo.

¹¹ Iwebaptisi mea na mereha we flainawiai we metarabera mea weru mene sasarifi ampa, wape mano da tua yau ma foi fiebai sewa yau tuti we irehu ne wai sapatu fo terai ki, wiro imai we inari finana kaha. Andino ambari webaptisi mea na Nuaninu Mirarebanai foi tuti na adia, amani niari mea memararebanai tarai.†

¹² Ne sosirufi meinanang na warangfo ampa tuti kifa pafoi ambari mirarebanai ki. Pa taraifoi fianduhi afui wiatai na munu rorongfo, mae nukahaifoi ambari kebioia dansoi na adia wiro fefe naea kaha.”

*Yohanesi webaptisi Yesusi
(Markusi 1:9-11; Lukasi 3:21-22; Yohanesi 1:32-34)*

¹³ Na rabuang bonani Yesusi da na nu Galilea foi to waya Yardeni we Yohanesia, tuti dutani we webaptisi i nai.

¹⁴ Manamo Yohanesi deo deiaya fi deyo fo ampare medu wei deyo, “Wau fino webaptisi yau fe. Wape

todoni ro ma we iwebaptisi wau nina?"

¹⁵ Manamo Yesusi yoa wei deyo, "Towea kaha, weo na rang toninai turohong kariri fianai aino Allai dawi wea fo na mai." Ainanaya webaptisi Yesusia.

¹⁶ Webaptisi ia kai nanai, Yesusi dautai weru mereha rorong fo ayai. Na kutu siari nanai kontai rorafaisi tifai, tuti deti Allai Nuaninufoi ne tarai we muntung manei sea meu minohi sauwi.

¹⁷ Mayeai tarao Allai raofuifoi medu na rorafaisi meu deyo, "Nehu Kaisung enehuwawuti fi dinani, kia enehurorongnei."

4

*Saminseni weanggari
Yesusi we sawa
(Markusi 1:12-13; Lukasi 4:1-13)*

¹ Mayeai Allai Nuaninufoi wiwiaing Yesusi to katai wekamamiei minano feai, we ambori Saminseni weanggariri.

² Yesusi niayai na nanai rahida piarua, wepuasa, wiro dampi kahai, ampare wewisi paria.

³ Na nanai mano Weanggari foi da ma weanggariri, medu wei deyo, "Taraie, Allai ne Kaisung di wau mani, bemi kamamieiwu wefiang we bang."

⁴ Manamo Yesusi yoa wei aha deyo, "Na Sempaisi ne Kaiwofo dotu tonina:

'Inontarai eminohi etarang fo, na fiangfo titou kaha,
mae na ohong kariri Seng Allai ne Kaiwo kiai ne kontai.'*

⁵ Mayeai Saminseni kia Yesusi to bendari mi rarebanaio Yerusalemia, na wanai dohoni minohi na Sempaisi ne Munufoi kuruinafo.

⁶ Mayeai medu wei deyo, "Taraie Seng Allai ne Kaisung di wau mani, tawing wau tawai na ninai aweu, ambori wewaifosa esoru wau wori, tau aweu, mureha kaha. Weo Sempaisi ne Kaiwone rabuang bei dotu kariri wau tonina:

'Allai ambori demi ne we waifosa etamang we wau,'

tuti,
'Etamang we wau na ewaramifo,
ampafe tau kofafea kaha.'*

⁷ Wape Yesusi yoa wei aha deyo, "Na Sengnei ne Kaiwone medurai kontai tonina:
'Wiro meweanggari mene Mananu Seng Allai fanai.'"

⁸ Mayeai Saminseni kia Yesusi to uai dedai bei nu wowongfo aha, tuti na nanai deinawi katai mananufo ewemananu naya fo kiai na nunei sentenang tuti ne mahikai fuba niai nai foi sentenang wei.

⁹ Tuti medu wei deyo, "Tuang aweu womi we yaua mani, katai fuba botioi tuti

* 4:4 Ulangan 8:3 * 4:6 Masmuri 91:11-12 * 4:7 Ulangan 6:16

ne fianggeng finanai kiai,
yohoni kiai we wau.”

¹⁰ Yesusi yoa wei aha deyo,
“Saminseni, ro weru yau.
Weo na Sempaisi ne Kaiwone
dotu tonina:
‘Mesomi terai we Allai mene
Sengfoi
tuti metohong kariri ne
Kaiwofo terai.”*

¹¹ Ainanaya Saminsenifo
pisuhirai weru Yesusi tuti
wewai rabuangfoi da ma
fiatari na fi dohong wea fo
toyari fi we dang fo tonanai.

*Na nu Galilea foi Yesusi
yufi reantenang nai*
(Markusi 1:14-15; Lukasi
4:14-15)

¹² Rabuang bo Yesusi
taraoai we Yohanesi mano
webaptisi kaiwasa foi, etafu-
ria wiatai na munu aitamu
rorong fo nanai, daraberahi
to nu Galilea foia.

¹³ Da weru ne munue
Nazareti, awa niayai na
bendari Kapernaumi na
ruru Galilea foi dereungfo,
amani na kataio weriria na
Zebuloni tuti Naftali uru ma
foi.

¹⁴ Finanai kariri kaiwo
nabi Yesayai medura fo,
amani

¹⁵ deyo,

“Zebuloni ne kataifoi tuti
Naftali ne kataifoi,
na rang bia to rurufoi
arau fo,

na waya Yardeni dere-
ungfo na nu Galilea foi,
amani kataio Yahudi
kaha fosa bitoya
enai naya fo.

¹⁶ Kaiwasa enayai na ma-
mantiti rorong fo
ewati sambewarai fiebai
bei ampa,
mano mamantitifoi tebungsa
fosa,
Sambewarafoi dansaisa
ampa.”*

¹⁷ Na rahida nanaifa aino
Yesusi fioai borong medu
deyo, “Metarabera mea weru
mene sasariwa, weo Allai da
ma we weMananu fe kikeu
ampa.”

*Yesusi sahu manggaerang
mana erariati*
(Markusi 1:16-20; Markusi
5:1-11)

¹⁸ Rahida bo Yesusi da na
nafareng na ruru Galilea
foi nani, detio manggaerang
mandu, mambetahatui suru-
ine, amani Simoni mano ahui
kontai we Petrusi foi tuti ne
tahatuio Andareasi. Umung
erang na rurufoi.

¹⁹ Medu we suru deyo,
“Mura ma, muraria yau,
ambori mutafu diang ahang
kaha mae yeunau muru we
mutafu inontarai we yau.”

²⁰ Na tatofang kutu nanai
kontaio uwaramipa erangfo
watai mae urariati.

²¹ Yesusi da paria aha
mani, deti mambetahatui
mandu kontai aha, amani
Zebediusi ne arikang suru-
ine, uwonomi fino Yakobusi
tutu Yohanesi. Ukontai une
wawafoi itoria itone erangfoi
na itone wafoi.

²² Yesusi sahu suru, tuti
uru kontaio urutang riwanai
ahang kaha mae, utubapa

* **4:10** Ulangan 6:13 * **4:16** Yesayai 9:1-2

utamamifoitutiwa itomungfi nai foi, uraria Yesusi.

Yesusi deunau tuti niari kaiwasa emaninang bitoya ebeng

(Lukasi 6:17-19)

²³ Yesusi da wari nu Galilea foi tuti deunau na munu agama Yahudi fo. Deiriri Kaiwo Mahikai fo kariri todoni Allai ambori weMananu ki. Kontai niari kaiwasa emaninang fosa ebeng weru maninang bodoni konta foi.

²⁴ Kaiwo kariri Yesusi fo dafai wariai na nu Siria foi sentenang, ampare kaiwasa bitoya era ruhiae ma, eha inontarai fuba emaninang fosa tuti mano maninangfo wedaya esodai dadira fosa we Yesusi ma. Kaiwasa nuaninu karira dohonsa fosa, mano euremi marareha arora fosa, mano efaya fosa, kaiwasa fuba nani kiai Yesusi niarisa ebeng.

²⁵ Kaiwasa bitoya paria era ria Yesusi na rabuang bonani. Manea era na Galilea ma, maneana Dekapolisi, maneana na Yerusalem, maneana na Yudea tuti maneakontai na waya Yardeni dereung do murang foi.

Yesusi kiorang na wiwoi nuwowongfo (5:1-7:27)

5

Seng Allai mioangno inontarai nemirorong mesi fosa paria

(Lukasi 6:20-23)

¹ Rabuang bo Yesusi deti kaiwasa bitoya foi nanai,

dautai to wiwoi nuwowongfo ayai minohi nayai, mayeai ne inontarai erariati fosa era wei ma,

² ainanaya fioai borong medu deunausa deyo,

³ "Mano enumiruainso enefieai ahang kaha tuti enemitarawang te Allai fosa mani, esobu ne maifo ampa weo eaino eminohi we Seng Allai ne inontaraifosa na ne Mananu rorong fo ne.

⁴ Mano esaia etaidu fosa mani, esobu ne maifo weo Seng Allai ambori dufi euremikurufo ki.

⁵ Mano nemirorong tewawa fosa mani esobu ne maifo, weo Allai ambori dohong nunei wesa ki, kariri ne kaiwo arera fo.

⁶ Mano etohong weai paria we nemirorong mesi na Allai urengrea fosa mani, esobu ne maifo, weo Allai ambori dohong kariri fi etohong weai nanai wesa ki, amani dohonsa nemirorong mesi kaririai.

⁷ Mano earomio inontarai siai fo mani, esobu ne maifo, weo eaino ambori Allai arosa kontai ki.

⁸ Mano nemirorong mirebanai fosa, esobu ne maifo, weo ambori ewati Allai ki.

⁹ Mano eha manang we kaiwasao emamuna wáwerasa fosa fo mani, esobu ne maifo, weo Allai ambori yoa wesa we ne arikang ki.

¹⁰ Mano kaiwasa enari kangganisa weo nemirorong mesi kariri Allai ne Kaiwone fosa, ea kontai esobu ne maifo, weo Allai mioansa weo eaino eminohi we Seng

Allai ne inontaraifosa na ne weMananu rorong fo ne.

¹¹ Mano inontarai eteibera mea, etei kaggani mea funomai, tuti mesodai dadirafea weo meraria yau ne mea mani, mesobu ne maifo.

¹² Mefaraise tuti memararis-ing, weo mesobu fiembaita fuba paria na Waidani. Mefaraise tonanai weo wiro memeiri mea mesodai dadirafe tonana kaha, weo mene tarai kariri nabifafongfa fossa, weo mano enari kaggani mea ninisa ene werengfosafafongfa enari kaggani nabifosa kontai tonanai kawuru ampa, ampare finanai deinawiai we menari ne maifo, mai kariri nabifafongfosa enari ne maifo."

Ai tuti sambewarai

¹³ "Mea mani mene tarai toyari aio indawang fi nai we nunei. Masino aifo meuwai ahang kaha mani, ohoni todoni wori meuwai aha ki? Nana mani wefieai ahang kahaia finanai, mae kabioi terai tuti inontarai etatahari.

¹⁴ Mea kontai mene tarai toyario padamarangno we sambewa nunei. Bendario wiatai na wiwoi nuwowong-foi mani todoni kontaio wati pari rai.

¹⁵ Tuti manei wiro kiai padamarang beia, mayeai yuai babeu beia tebung weduari nai kaha. Mae yuai padamarangfoi ayai sawai parai, ambori sambewa inontarai enayai na munurorongfosa kiai.

¹⁶ Tonanai kontai we mea, na metohong toa wau ne tarai toyario padamarang

denggararu we sambewa kaiwasa, ambori inontarai siai ewati mene metohong toaio beng nana mani, etaparanding mene Dai na rorafaisi."

Yesusi dohong kaiwoariri kariri Hukumi Musai soi fo

¹⁷ "Dohonao meteyo ira ma weo yeiaya Hukumio Musai soi fo tuti Kaiwo nabifosa emadura fo fe. Bereri! Mae ira ma nina mani weo yeinawiaia kasau we waitawanai kariri fianai aino kaiwo nana dotu wea foa.

¹⁸ Tarai, imadurai we mea mau, we nunei tuti rorafaisi wiro wioru kaharai mae hupuri kutu ketui todoni bei kontai ki, na Kaiwo Musai soi fo, wiro niai kaha, pariao fi dotu wea fo mai kaririai.

¹⁹ Ampafe mandoni dino deiaya hukumi fo bei na Kaiwo Musai soi fo, masino hukumi nani ketui todoni ki, tuti deunau inontarai siai we ea kontai eteiaya hukumifoi kontai tonana mani, ambori atori we inontarai tewawa pari dine na Allai ne weMananu rorong fo. Mae mandoni dino yoa weai, dohong kaririai tuti deunau inontarai siai we etohong kaririai konta mani, ambori atori we inontarai fuba na ne weMananu rorong fo ki.

²⁰ Ampafe yeisaharai we mea, weo wiro menemiro-rong mesi sewa mantaunau Kaiwo Musai soi fosa tuti Farisifosa kaha mani, todoni kontaio mesuai to Allai ne

weMananu rorong fo kaha rai.*”

Yesusi deunau kariri kasisoufo

21 “Metaramioai ampa kariri fianai aino Allai medurai we tane werengfosara fo, amani deyo,

‘Memung inontarai funoma fanai,*

mandoni dino miung inontarai mani ambori sodai aiboifo ria Allai ki.’

22 Wape ninaia mani imadu mau yeo, mandoni dino kesisou ne inontarai doroi manei mani, ambori sodai aiboifo ria Allai ki. Tuti mandoni dino deibera ne doroi manei mani, ambori kari to Majelisi Agama fosa we ehutu kaiwo kariri ki. Tuti mandoni dino kesou deibera inontarai siai manei deyo, ‘Weinggowui’ mani, wenani waramipari to Sorohao Adia Rorong foi.

23 Ampafe masino manei na mea boyo bohong nemu korbani we Allai, wape aromuoai we nemu doroifoi enerorong pirahai we wau,

24 nana mani tawingno nemu korbani nani wiatai na mesbaohong korbani nai foi, mae ro wa weboyari ria nemu doroifoi akawuru wo, ambori barabera wau ma we bohong nemu korbanifoi we Allai ki.

25 Masino nemu aiteta manei deyo dapa wau to mangkutu kaiwo fosa mani,

wiro musobu mangkutu kaiwo nanisa kaharai mae na rang rabuang kontaio rurai we weboyari riati aha. Bereri mani, tarahai warapa wau to mangkutu kaiwo fosa rai. Tuti tarahai esoa wau to afai mamuna fosa tuti ea mani esoa wau to aitamu rorong fo.

26 Tuti aromuaifa: na aitamu rorong fo watai paria bai nemu fiwaifoi paria kiai fino ro to borieife.”†

Kaiwo kariri ohong we wiwing siaifo

27 “Metaramio kaiwo ninai kontai ampa, amani dotu tono:

‘Menayai ria wiwing siai fanai.*’

28 Wape ninaia mani imadu we mea mau yeo, mandoni dino deti wiwing siai manei tuti enerorongfoi dohong we niai riati, nana mani dohong sarawai, amani niai riati kawuru na enerorongfoi ampa.

29 Masino uremu domoya wai wedaya nari sasari mani, ketafatini kobioi weru wau. Weo nemu taraiwai ne doni aino wedaya nari sasari nani kobioi mani beng sewa weru borarati wape ambori nemu taraiwai sentenang saukaha Soroha rorong foi ne.

30 Tuti masino waramu rufi nai wai wedaya nari sasari mani, ferang kutui tuti kobioia. Weo nanai aino beng sewa borara nemu taraiwai ne doni aino wedaya sasari

* 5:20 Enerorong mesi foi tonana mani, manei sobu te na yoaso Kristusi. * 5:21 Keluaran 20:13 † 5:26 Ne maksuti mani toninai: Wiro Sempaisi dohong aiboi we wau kaharai mae, barabera wau weru sasariwa ahera. * 5:27 Keluaran 20:14

wai, wape ambori nemu taraiwai sentenang saukaha Soroha rorong foi fo."

Aunau kariri mang dira wiwingfoi

³¹ "Aunaufo weai kontai dotu toninai:
'Mandoni dino dira ne wiwingfoi mani

todoni kontaio niari surati bei kariri dirarifo

tuti dohoni we wiwingfoi.'*

³² Wape ninaifa mani imadu mau yeo, mandoni dino dira ne wiwingfoi, wape wiro wiwingfoi dohong sarawai ria mang siai kaha, mayeai wiwingfoi ambori rirau siai aha mani, ne mang dirari foi wedayari dohong sara Sengnei ne Kaiwone masih kariri sasario maneи niai ria wiwing siai fo. Tuti mandoni dino dau wiwing nani aha mani dohong sara Sengnei ne Kaiwo tonana fo kontai."

Kaiwo kariri fafora funoma fo

³³ "Metaramioai kontai ampa, kariri kaiwo raminde Allai medurai we tane werengfosara fo, deyo,
'Wiro mefafora funoma fanai.

Mefafora na Sempaisi arong greafo we menari fiea mani,

finanai todoni kontai metohong kaririai.*

³⁴ Wape ninaia mani imadu we mea mau yeo, wiro mefafora fanai. Wiro mefafora na rorafaisi fanai,

weo rorafaisi mani katai Allai minohi naya fine.

³⁵ Tuti dohonao mefafora kontai na nunei fanai, weo nunei mani katai awengfo doa naya fine. Ete mefafora na Yerusalem fe, weo Yerusalem mani, Mananu Fuba foi ne bendari dine.

³⁶ Tuti dohonao mefafora na menumiwa fe, weo mano menari tonana ne mea, mene mambiriufea kahai we menari menumi-randaungwa kutu boyari kontaio biua ete niumentang.

³⁷ Ampafe fi meteyoai nani antu mani, memadu terai meteyo, 'Yo,' mae antu kaha mani, memadu meteyo, 'Bireri.' Mae mefafora fanai weo nana mani, Saminseni dino wedaya metohong sasari na tonana ne."

Manei memuna we mea mani wiro memamuna wei ahangfanai

³⁸ "Metaramio kaiwo dotu tonina ne ampa:

'Ureng yiwang ureng,
tuti dereng yiwang dereng.*'

³⁹ Wape ninaia mani imadu we mea mau yeo, masino inontarai kerira manei memuna we mane wau mani, dohonao bapai ahang fe. Tuti manei bioipa taramurei domoya wai mani, bohong taramurei dowej wai kontaia bioipari.

⁴⁰ Tuti manei dapa wau to mangkutu kaiwo fosa we kia nemu ansung borai wai

* **5:31** Ulangan 24:1 * **5:33** Imamat 19:12; Bilangan 30:2; Ulangan 23:21

* **5:38** Keluaran 21:24; Imamat 24:20; Ulangan 19:21

mani, bohong nemu ansung siai wai wei kontai.

⁴¹ Masino manei dawi wau we wodua fieai ro riati kiro bei mani, ro paria ahaao kiro boru.

⁴² Manei dedo wau we nemu fiea mani, bohong kariria. Tuti dohonao boiaya mano deyo kia fieai ria wau akawuru wori yiwang ahang foi fanai."

*Menemiwawu mene
aitetafosa*
(Lukasi 6:27, 32)

⁴³ "Metarami kaiwo ninai kontai ampa, amani:

'Menemiwawu mene
doroifosa mae men-
emirireu mene
aitetafosa.*'

⁴⁴ Wape ninaia mani imadu mau yevo, menemiwawu mene aitetafosa, mewenadi tuti mano enari kanggani mea fosa.

⁴⁵ [Weo na menari tonana ne mani, metohong kariri fio mai we Allai ne arikangne mea metohong kariria fo.] Weo Dai nani dino enewawu mandoni kontai, doni dohong wofoi sambewa inontarai eharira fosa tuti mano ebeng fosa; tuti dohong metangfoi ming we inontarai enemirorong mesi fosa tuti mano enemirorong mesi kaha fosa kontai.

⁴⁶ Weo masino menemiwawu te mano enemiwawu mea fosa kontai tera mani, fiembaitai fianai aino mesobua ne? Weo mano efanduhi pajaki we Kaisari fosa ahusa we inontarai eharira saine, wape ea kontaio enemiwawu kontai

tonana. Ampafe todoni kontaio menemiwawufo fuba sewasa.

⁴⁷ Tuti masino metohong mahikai we mene doroifosa tera mani, fibeng fianai aino menariao sewa kaiwasa bitoya foi ene enarifone? Weo kaiwasa na nu siaio etaroanso Allai kaha fosa kontaio enari tonana. Ampafe mea mani, todoni kontaio metohong beng we mene aitetafosa.

⁴⁸ Tonana mani, todoni kontai memasi, mai kariri mene Dai na rorafaisi mesi paria fo."

6

*Aunau kariri ohong fi we
fata inontarai ene pari fi fosa
fo*

¹ Yesusi medu aha deyo, "Metanansiau, menari karirio ne bengfo ete ne wetaraifo mani, dohonao menari parai na kaiwasa bitoya foi euremireafo, we ambori ewati fi menari nanai we efiai mea fanai. Weo menari tonana mani wirosbu fiembaitafo ria mene Dai na rorafaisi kaha.

² Ampafe metohong fieai we mefata inontarai ene pari fi fosa mani, dohonao menari kariri inontarai enari fayafayarai fosa we enari finani na kaiwasa bitoya euremirea fo fanai, weo ea mani esahu tuti fibeng enari fo ambori kaiwasafou ewatisa. Weo inontarai nanisa efaraise enari tonanai na munu agama Yahudi fo tuti na rangfo ete na katai kaiwasa bitoya era naya

* **5:43** Imamati 19:18

fo, ambori kaiwasafosa etaparandinsa. Mearomioaifa we inontarai tonana nesa esobu ene fiembaitafo na fi enari tonana fo ampa, amani na kaiwasa efiaisa tonana fo.

³ Wape mea mani masino metohong fieai we mefata inontarai ene pari fi fosa mani, metohong worawai, dohonao mewarami dowej wai deitawang fi mewarami domoya wai dohona fo fanai.

⁴ Todoni kontaio fi metohonai we mefata inontarai ene pari fi fosa naya fo, metohong worawai, ambori mene Dai mano deti fio dadiwa fo biai fi menari tonana fo ki.”

Yesusi deunau kariri tattung Sempaisi ne

(Lukasi 11:2-4)

⁵ “Masino metutanai we Sempaisi mani, dohonao metutang kariri inontarai enari fayafayarai fosa fanai. Inontarai nanisa etutang Sempaisi mani, enemirorong piraise we era wa etoari na munu agama Yahudi fo tuti na rang borirufo, ambori kaiwasa ewatisa. Mearomioaifa we inontarai nanisa esobu ene fiembaitafo na fi enari tonana fo ampa, amani na kaiwasa efiaisa tonana fo.

⁶ Wape meteo metutang Sempaisi mani, mesuai to mene munu rorong fo afui, mehafe mene rahutufo tuti metutang mene Dai wiro ati pari kahai nani. Ambori mene Dai mano deti fi menari worawai nani dohong fiembaitafo we mea.

⁷ Kontai metutang Sempaisi mani dohonao metutawawera kaiwo memadura fo pampang kariri inontarai etaroanso Sempaisi kaha fosa fanai. Weo ea mani enemituitaitai eteyo emadu kaiwo bitoya mani, wedaya Sempaisi taraoai sewa tuti yoa we fi etutang wea fo ki.

⁸ Dohonao mene tarai karirisa fanai, weo fianai aino metutang weai nanai, metutangna kaharai mae Dai deitawanai kawuru ampa.

⁹ Ampafe metutang tonina, ‘Amene Dai Wau na Waidani, Kadono wonomuwai atori we mirarebanai,

¹⁰ Kadono nemu weM-ananuwa da ma, tuti nemu awiaio etohong kaririai na Waidani wa, ametohong kaririai na nunei kontai.

¹¹ Bohong fiang demoyerai we amea na rahida bonini.

¹² Boiai amene sasari ametohoni nei, kariri amea kontaio ameteiai inontarai ene sarawaio etohonai we amea fo.

¹³ Dohonao tua amea ametohong kariri fi so-fao weanggari amea we amenari sasarifo fanai,

tuti tawing amea ambori amekaharai weru mano Kerira foi.

[Weo Wauno Mananu we-mambiri paria, mano ametato Wau we fitawafa.

* **6:13** Na kaiwo asli pari fo mani, wiro obu kaiwo rabuang bonini kaha.

Antu.]*

¹⁴ Weo meteiai mano enari sarawai we mea wasa mani, mene Dai na rorafaisi ambori deiai mene sasariwai kontai ki.

¹⁵ Wape wiro meteiai inontarai siai ene sarawai kaha mani, mene Dai kontaio wiro deiai mene sasariwai kaha.”

Aunau kariri wepuasafo

¹⁶ “Meteo mewepuasa mani, dohonao mene tarai kariri inontaraio enari fayafayarai fosa we meuremi to ung fanai. Ea mani etua euremifo tonanai ambori etainawiai we kaiwasafafo we inontarai ewepuasa disa. Mearomioaifa we fi enari we inontarai ewatisa tonana fo, finanai wefiembaitai wesa ampa, amani na kaiwasa efaisa tonana fo.

¹⁷ Wape mea mewepuasa mani meruai meuremiwa tuti merari menumiwa,

¹⁸ ambori manei wiro deitawang mea we mewepuasa wa fanai. Mae mene Dai na rorafaisi mano wiro ati pari kahai foi andi deitawanafo. Tuti Daio deitawang fio dadiwa fo nani ambori dohong fiembaitafo we mea ki.”

Ra na Waidani

¹⁹ “Wiro mefanduhi ra na nunei karerai we mea fanai, weo ra nani ambori wohere dani, raima soi, tuti mananapi era ma etotafi ambori ehamananai.

²⁰ Mae mefanduhi te ra na Waidani, weo na Waidani wohere dani kahai, raima soi kahai, tuti mananapi era wa

etotafi ambori ehamananai kaha.

²¹ Weo na doni mene rafoi wiatai naya mani, na nanai kontai menemirorongwai ni-ayai nai.”

Padamarang we tane tarai (Lukasi 11:34-36)

²² “Tauremine mani wepadamarang we tane tarainei.[†] Ampafe masino meuremiwa mamarampoti mani, mene taraiwai sentenang dansairai.

²³ Mae meuremiwa fayou mani, mene taraiwai memantiti sentenang kontai. Ampafe masino sambewaraio nayai na mea wa mamantitia mani, memamantitia tuti ne mamantitifo sewa aha.

²⁴ Wiro inontarai manei wewoming we mananu mandu kaha. Weo nana mani ambori enewawu manei mae enerireu mano wei foi ki. Ete niari kariri manei ne kaiwofo mae kiobu tarang we mano wei foi nengfo ki. Tonanai kontaifa we mea, wiro mewewoming we Seng Allai tuti mewewomong we doi ruhia kaha.”

Mearomikuayai kariri fio ambori da aha ma fo fanai

(Lukasi 12:22-31)

²⁵ “Ampafe yeikaririai we mea yeyo, dohonao mearomikuayai we meminohi toa wa fe, amani kariri fianai aino metang fo tuti metunung fo fanai. Tuti wiro mearomikuayai we mene taraiwai fanai kariri

[†] **6:22** Tauremine mani kaiwo netawaei weo tanumianinune, tuti Kristusi andi dohoni sambewarai.

fiani aino mesansungna wa fe. Weo mene ansengwai mani dedai sewa fiang tuti mene taraiwai dedai sewa ansungno mesansungna fo.

²⁶ Mewati kariri romufosa. Wiro etanang fi kahai, eteting fi kahai, tuti efanduhi fi ang na munu etainunung fi naya fea kaha. Tonanai ki wape mene Dai na rorafaisi meinengang ene fiangfo wesa. Mea mani metadai sewa romufosa.

²⁷ Na mea kiai mandoni dino na ne arohuayai we minohi toa fo, wemambiriu we yabi ne ansengfoia deuroi kuteai aha ne?

²⁸ Tuti we fiani mearomikuaya! we fi mesansungna fo wei ne? Mewati kariri kunumifoi we ne weainarifo. Ainari nani wiro dohong fi kaha, tuti sungfi kaha, wape Seng Allai niariri mahikai.

²⁹ Wape yeisaharai we mea mau, Mananu Salomoi kontaio ne ra bitoya tonanai, wape ansung sensungna fo kontaio wiro wea mehikai kariri ainarifo nani kaha.

³⁰ Ninoio weainaria denteng nani, rahida nini sifu wape aha mani ferami aha we nunumi. Tonanai wape Allai miani mehikai paria. Nana mani, mano meroasoai turura kaha ne mea, ambori Allai sensung mea kontai ki.

³¹ Ampafe dohonao mearomikuaya! tuti memadu meteyo, ‘Fianai aino ambori ametang ne?’ ete ‘Fianai aino ambori ametunung ne?’ Tuti, ‘Fianai aino ambori amesansungna ne?’

³² Weo, fi tonana ne, inon-

tarai mano etaroanso Sempaisi kaha fo ansaino erurai esera wea ne. Wape mea mani, mene Dai na rorafaisi deitawananai ampa we fi tonana ne metohong weai paria.

³³ Wape mesera fafong we Allai ne weMananufo tuti we menemirorong mesi toyari ne dawiafo. Nanaia mani fi metohong weai nanai ambori Allai dohonai kontai ki.

³⁴ Ampafe wiro mearomikuaya! we fianai aino ambori mesobuai na rahida sua ahang foi fanai. Weo dadirao rahida bonini demoyarai we rahida bonini, wiro aromikuaya! we rahida sua ahang foi fanai.”

7

Metinggai inontarai funoma fanai

(Lukasi 6:37-42)

¹ “Wiro metinggai funong inontarai fanai ambori Seng Allai kontai wiro kiutu kaiwo kariri mea kaha.

² Weo fianai aino metinggairai we inontarai siai fo, ambori Allai kiutu kaiwo kariri mea nai kontai ki. Tuti mene metitua inontarai siai na metinggaisa nana fo, Allai yu we titua mea nayai kontai ki.

³ We fiane ai nukahai niyai na mene doroifoi urengfo mewati pari, mae airape niyai na meuremiwai mewatioi kahai nina?

⁴ Todoni fino metei we mene doroifosa meteyo, ‘Doroie, ro ma ikabi ai nukahai niyai na uremuwai wo,’ wape airape niyai

pampang na meuremuwa
wiro mewatiao we mehabioi
kaha.

⁵ Inontarai menari faya-faya-
yai ne meai ne, mehabio
airape niayai na meuremiwa
akawuru wo, ambori
mewatipa ai nukahai niayai
na mene doroifoi urengfo we
mehabioai werui fe."

*Metohong Sempaisi ne fi
mararebaniaio dohonai we
meara fo funomai we inon-
tarai eharirao eteikaherawa
fosa fanai*

⁶ "Wiro metohongno fio
mararebana fo we fia-
werafosa fanai, weo nana
mani etaraberasa eharari
mea aha. Tuti wiro mehabi
mene mutiarafu we fiaifosa
fanai, weo nana mani ambori
etaraberasa etaha titawanai
aha."

*Tatutang we Allai, tasera
wei, tuti taboi ne rahutufo
pampang*

(Lukasi 11:9-13)

⁷ "Metutang weai ambori
ohonai ki; mesera weai
ambori mesobuai ki; meboi
rahutufo ambori fai we mea
ki.

⁸ Weo mano etutangna
fosa ambori ohonai wesa ki;
mano esera wea fosa ambori
esobuai ki; tuti mano eboi
rahutu fosa ambori fai wesa
ki.

⁹ Na mea kiai, mandoni
dino ne arikangfoi dutang we
roti mani dohong kamiei wei
ne?

¹⁰ Ete dutang we diang
mani dohong tawai wei ne?

¹¹ Ampafe mea mewarami
aipaya tonanai ki, wape
mewaitawang metohong ne
bengfo we mene arikangfosa.
Nana mani mene Dai na
Waidani ne dohonafo sewa
weru mea aha. I ambori
dohongno ne beng sewa fo
we mano etutani fosa ki.

¹² Na fifiani kontaio,
menari sua inontarai siai
fosa, mai kariri metawi weai
we ea kontai enari we mea fo.
Weo Hukumi Musai soi fo tuti
aunau nabifosa etaunauwa
fo, weneung naya finanai."

Rahutu wetaraifo

¹³ "Mesera we mesuai to
Allai ne Mananu rorong fo
mani, merurai we mesuai na
rahutu dadira fo. Weo rahutu
tuti rang to ne karirafu mani
tirera tuti fiabai, tuti kaiwasa
bitoya esuai nai.

¹⁴ Mae rahutu tuti rang
to numainufo mani ketui
tuti dedira, tuti inontarai
maneiru teai ansaino esobua
ne."

Anansiau we nabi tarai kahafosa

¹⁵ "Metanansiau we nabi
tarai kahaio era we mea
ma fosa. Ea mani, enari
we inontarai eroaso yau
tuti enemirorong denteng
toyari domba, wape tarai
we ea mani ene tarai to-
yari serigalao* memuna.

¹⁶ Ampafe metaroansosa
terai na fianai aino enari
fo. Ne tarai kariri aibongfo,
amani wai sirarami nei wiro
webong angguri kahai tuti

* **7:15** Serigalanei mani andowa ahumi kaha. Ne tarai toyari fiafura, wape fiabai
tuti memuna sewa. Era esera we etang andowa siai, tuti etang inontarai Yahudi
fosa ene fiahung domba kontai. Yahudifosa ematai serigala fosa paria.

boburainei wiro webong
andori kaha.

¹⁷ Tonanai kontai we ai koi
denteng foi mani, ne bongfoi
denteng, mae ai koi kerira foi
mani ne bongfoi kerira.

¹⁸ Todoni kontaio, ai koi
denteng foi wiro ne bongfoi
kerira kaha, ete ai koi kerira
foi mani wiro ne bongfoi den-
teng kaha.

¹⁹ Mae ai koio ne bongfo
denteng kaha foi, todoni kon-
taio robani tuti kabioi to adi-
afdoi.

²⁰ Ne tarai kariri aifoi
we aroansoi na ne bongfoi,
tonanai kontai we nabi
tarai kahai nanisa ambori
metaroansosa na fianai aino
enari fo.

²¹ Wiro mano sahu we Yau
deyo, 'Sengwa Wau, Sengwa
Wau!' andino ambori suai
to Allai ne weMananufo na
Waidani ne kaha, manta
mano dohong kariri Dai na
Waidani ne awiafo tera foi.

²² Na rahida Allai kiutu
kaiwo nai foi kaiwasa bitoya
ambori emadu we yau
eteoyo, 'Sengne Waune! Ra-
minde nanai na wonomune
ametairiri Allai ne Kaiwone
toyari nabifafong fosa
etairiria fo, na wonomune
ametata inggira bitoya nai,
tuti na wonomune amenari
fitantuma bitoya kontai nai
mae?'

²³ Wape rahida bonani
ambori imadu parai wesa
aha yevo, 'Wiro yeroang mea
na ea kaha, inontarai mano
menari fi karira ne mea,
mera weru arohureane.'"

*Fiyiwansoai kariri inon-
tarai mandu unari munu
(Lukasi 6:47-49)*

²⁴ "Ampafe mano tarao
nehu kaiwofe ninai kiai
tuti dohong kaririai na mai
foi mani, ne tarai toyari
inontaraio sewai niari ne
munu doa na kamamieia
mutu.

²⁵ Ampafe rahida bo
metangfoi miung, foafoi
dautai tuti dedukafoi bia fo
mani, wiro munufoi tibari
kaha, weo sau tawang diri
neungfoi na kamamieia
mutu fefe.

²⁶ Mae mano tarao nehu
kaiwone, wape dohong
kariria kaha foi mani,
ne tarai toyari inontaraio
webonggoi foi, i biaung
ne munufoi dohoni wiatai
sauwai arora na ninuaing
nuwowongfo.

²⁷ Ampafe rahida bo
metangfoi miung, foafoi
dautai tuti dedukafoi bia
tete munufoi mani, ambori
sobariri. Tuti ne aikahiafoi
kerirawa kiai aha."

²⁸ Yesusi medua kai nana
fo, kaiwasa bitoya etoari na
nana fosa epapuhung paria
we deunau toa fo.

²⁹ Weo Yesusi deunau
kariri mano wemambiri paria
we deunau tonana,
wiro deunau toyari kaiwo
batangno ene mantau-
nau Kaiwo Musai soi fosa
emadura fo kaha.

8

*Yesusi niari inontarai
meninang kusta manei den-
teng*

*(Markusi 1:40-44; Lukasi
5:12-16)*

¹ Yesusi biari na wiwoifoi
meufo, kaiwasa bitoya paria
era riati.

² Na nanai inontarai meninang kusta manei da wei ma,* tuti disangkapao awebukafo na awerengfo mae medu wei deyo, “Daie, wau wemambiriu ne, maya mani, nari yau yenteng weru nehu maninangnei.”

³ Ainanaya Yesusi suba warangfoa wa sauwi tuti medu wei deyo, “Yo, imaya. Bonteng to!” Tatofang kutu nanai kontaio maninang kusta foi niai werui tuti dentengna.

⁴ Ainanaya Yesusi medu wei aha deyo, “Aromuoifa! Wiro boiriri fi inari ninai weo inontarai siai manei fanai, mae ro to imamifoia tuti butani we deti kariri nemu taraiwai we bontengna wa. Mayeai bohong korbanifeai we Allai we nemu bontengna wa kariri fianai aino Musai soia fo. Nana mani deinawiai we kaiwasa bitoya foi we bonteng ampa.”

Inontarai fuba yu rai mamuna fosa manei ne yoasoafu fuba

(Lukasi 7:1-10; Yohanesi 4:46-53)

⁵ Rahida bo Yesusi da wa suai to bendari Kapernaumi fo, inontarai Yahudi kaha manei, i mani inontarai fuba yu rai mamuna Roma fosa manei dine, da wei ma, dutani deyo,

⁶ “Daie, fata yau wo, nehu womingfoi meninangnao fiaya, wiatai na nehu munufi fo tuti sodai dadira paria.”

⁷ Yesusi yoa wei deyo, “Yo ambori ira wa inariri denteng ki.”

⁸ Manamo inontaraifoi yoa wei deyo, “Daie roa fanai, weo imai we yemang we wau na nehu munufoi kaha. Ampafe modu kaiwofeai na waroi teraia, nana mani nehu womingfoi ambori denteng kaririai ki.

⁹ Weo yau kontai nehu fuba isomi wei manei, tuti iru afai mamuna fea kontai. Ampafe imadu we manei yeyo, ‘Ro,’ nana mani da kaririai, tuti imadu we manei aha yeyo, ‘Ro ma,’ nana mani da kaririai ma. Ete we nehu mangfatafoi yeyo, ‘Nari fininai,’ nana mani niari kaririai. Yeitawanai we Dai Wau tonanai kontai. Fiani aino boyoa mani, kariria rai.”

¹⁰ Yesusi tarao rai mamuna fuba foi medu tonanafo pepuhung paria. Ainanaya medu we mano erariati fosa deyo, “Kei! Inontarai nini andiarana ne. Na inontarai Israeli nesa kiai wiro iwati manei yoaso yau ne fuba kariri tonina kaharai.

¹¹ Yeisaharai we mea yeyo, kaiwasa bitoya ambori era na katai doni kontai na rea diru foi tuti rea aha foi ma, efanduhisa ria Abrahami, Isaki tuti Yakupi we etohong muniara na Allai ne weM-ananufo ki.

* ^{8:2} Fimaninang kusta nei mani kerira paria tuti mawa soiri we inontarai siai. Nanai wedaya mano meninang foi ketai waroi weru kaiwasafai tuti da funoma kaha. † ^{8:12} Nana mani, mano paria nanai Allai sahusa we ne inontarai disa fosa, amani inontarai Yahudi fosa.

¹² Wape inontarai mano katai wemananu nani eneni fosa[†], ambori Allai sosa to boriei weru ne weMananufo to katai memantiti foi. Na wanai ambori esodai ne karirafo tuti esaia etamirai paria.”

¹³ Ainanaya Yesusi medu we rai mamuna foi deyo, “Barabera waua, we fianai aino roasoai nanai karirai ampa.” Na tatofang kutu nanai kontai ne womingfoi dentengna.

Yesusi niari inontarai emaninang bitoya ebeng
(Markusi 1:29-34; Lukasi 4:38-41)

¹⁴ Yesusi da wa sobu Petrusi ne munufoi fo, detio Petrusi niong wiwini we meninang rirora wiatai na ne fatafoi.

¹⁵ Ampafe Yesusi warawa yu na warangfo, na tato-fang kutu nanai kontaio maninangfoi niai weruria. Mayeai wiwingfoi doari ayai wesarawiri we Yesusi.

¹⁶ Wofoi sawaia de weayewia nanai, kaiwasa eha ene inontarai inggira dohonsa bitoya we Yesusi ma. Tuti na kaiwo rabuang boyari kawuru mae Yesusi data inggirafoi kiai tuti niari kaiwasa emaninang wei fosa kiai ebeng.

¹⁷ Fianai aino Yesusi niari nanai, mai kariri fio nabi Yesayai meduraia fo deyo, “Andino sodua tane tafana-hangfe ne,
tuti sodua tane mani-nangfi ne.”*

*Todoni ira ria Yesusi fo
(Lukasi 9:57-62)*

¹⁸ Yesusi deti kaiwasa bitoya paria era ma etoawariri, ampafe medu we ne inontarai ewesuraya mandu fosa demisa we etafai to ruru eneung dowej fo.

¹⁹ Mayeai mantaunau Kaiwo Musai soi fo manei da wei ma, medu wei deyo, “Dai Mantaunaune waune, yeo ira ria wau to katai bodoni kontaio dino ro oa fo.”

²⁰ Ampafe Yesusi medu wei deyo, “Wintumang kamirei rorong nei ne kamirei we wiatai nai, tuti romunei kiai kontaio ne aisangging. Wape Kaisung Inontarai nei ne pari katai we wiatai nayai.”

²¹ Ainanaya Yesusi ne inontarai da riati manei kontai deyo, “Daie, boiai yau ira wa kio dai mireha isarai akawuru wo.”

²² Manamo Yesusi deyo, “Ro ria yau, mae tua mano eroaso yau kaha fosa we esarai mano emarareha fosa ki.”

Yesusi deikutu dedukafoi mering
(Markusi 4:35-41; Lukasi 8:22-25)

²³ Mayeai Yesusi dautai tuti ne inontarai ewesuraya mandu fosa to wafoi, ainanaya etafai to ruru eneung bo dowej foia.

²⁴ Etafaia mairabuang mayeai dedukafoi bia tantuma na rurufoi, andeisafoi dipuo wafoi tuti dutuwia adareti etaisui. Wape Yesusi wiata dena na wa rorongfo.

* ^{8:17} Yesayai 53:4

²⁵ Ampafe ne inontaraifosa era wafui ebauni eteyo, "Daie, boari miai fata tata wo, tanai rai."

²⁶ Ainanaya Yesusi yoa wesa deyo, "We fianie mematai nina? Todonie meroasoa kahai nina?" Mayeai Yesusi doari ayai deikutu wanangfoi tuti andeisafoi, ainanaya rurufoi mering na tantumara.

²⁷ Yesusi ne inontarai ewesuraya mandu fosa epapuhung paria we fitantuma nanai. Ampafe emadu wawerasa eteyo, "Inontarai nini mani mandoni dine, donio sua wanangnei tuti andeisanei mani mering kaririai nina?"

Yesusi niari inontarai manduo inggira dohong suru fo suru ubeng

(Markusi 5:1-20; Lukasi 8:26-39)

²⁸ Etafaia sobu ruru eneung dowej foi na Gadara nanai, inontarai inggira dohong suru mandu ura na fafofo we Yesusi ma. Inontaraifo suru umamuna paria, ampafe manei wiro wemambiriu we da kefang suru kaha.

²⁹ Ura mae usahu ureyo, "Allai ne Kaisungne waune boyo nari auru tofino? Wiro rahidane mai kaharai mae, boyo ro ma we ru aiboio auru mung kanggani auru finina e?"

³⁰ Waroi weru katai nani kahai mae, fiai rabuang bei enaya esung na nanai.

³¹ Ampafe inggirafosa etutang Yesusi paria eteyo, "Boyo bata amea to boriei

mani, bemi amea amesuai to fino fiai rabuangfoia."

³² Ainanaya Yesusi demisa, deyo, "Mera weruaia!" Ampafe inggirafosa era to boriei tuti esuai na fiai rabuangfoi. Ainanaya fiaifosa emitō be-yaria esea na katai kenataterafoi to rurufoi aweu tuti emarareha naya.

³³ Mano ewaitawang wedua fiai fosa emitō to bendarifoia, eteisaharai kariri fianai aino ewatioai kai nanai we kaiwasafoi tuti kariri fianai aino inontarai mandu inggira dohong suru fo suru usodaira fo.

³⁴ Ampafe kaiwasa fuba na bendari fosa emitō we Yesusia. Ewatioi mani etanggoari paria we da weru ene kataifoi.

9

Yesusi niari inontaraifiaya manei denteng

(Markusi 2:1-12; Lukasi 5:17-26)

¹ Mayeai Yesusi dautai to wa etafai nai foi ayai, ainanaya etaraberasa etafai to ruru eneung dowej foi aha, amani to ne bendarifoi ahawaru.

² Na wanai inontarai manea eha inontarai fiaya wiatai na andaung wowongfo we Yesusi ma. Yesusi detio enari tonanafo deitawanai we eroasoaf fuba paria, ampafe medu we inontarai fiaya foi deyo, "Kaisungne waune, tawang enemurorongwaia mitu. Yeiai nemu sasarifi ampa."

³ Ampafe mantaunau Kaiwo Musai soi fo maneiru

teao enayai na nanai fosa esaimumung wawerasa eteyo, "Inontarai nini deibera Seng Allai."

⁴ Wape Yesusi deitawang enemirorongfoi, ampare medu wesa deyo, "We fianie menemitituai fi karira na menemirorongwai nina?

⁵ Doni aino mawa ne: imadu yeyo, 'Yeiai nemu sasarifi ampa,' ete yeyo, 'Boabari wau, ka nemu andaungwai, tuti roa?'

⁶ Wape yeinawiai we mea, na yohong inontarainei denteng tonina ne, ambori mewaitawanai weo na nunei ninai, Kaisung Inontarai nei andino ne mambiriw we deiai sasari fine." Ainanaya Yesusi medu we inontarai fiaya foi deyo, "Boabari wau, ruai nemu andaungwai, ro to nemu munufoia."

⁷ Ainanaya inontaraifoi doabariri tuti daraberahi to ne munufoia.

⁸ Kaiwasa bitoya foi ewati fi kawariai nana fo ematai paria tuti etaparanding Al-lai eteyo, "Allai ne mambiru-ufu fuba paria! Tuti dohong ne mambiriw nanai we inontarainesa kawuru ampa."

*Yesusi sahu Matiusi we dariati
(Markusi 2:13-17; Lukasi 5:27-32)*

⁹ Mayeai Yesusi da weru katai nani. Da wa mani detio inontarai fianduhi doi pajaki we parenta Kaisari fo manei wonong fino Matiusi, minohi na munu pajaki foi. Yesusi medu weia deyo, "Ro ria yau." Anseung ahang

kahai mae Matiusi doabariri tuti da ria Yesusi.

¹⁰ Yesusi da wa minohi dampi na Matiusi ne munufoi nanai, inontarai efanduhi pajaki we parenta Kaisari fo efau tuti inontaraio kaiwasa bitoya foi esahusa we inontarai ewesasari fosa, era wa ewatai etampi ria Yesusi tuti ne inontarai ewesuraya mandu fosa.

¹¹ Inontarai eweFarisi maneiru ewati finanafo, etutang bera Yesusi ne inontarai dirisa fosa eteyo, "We fianie mene mantaunafoi dampi ruhiai ria inontarai efanduhi pajaki we parenta Kaisari foi tuti inontarai ewesasari fosa ninai?"

¹² Yesusi tarao etutang tonanafo, yoa wesa deyo, "Inontarai etanteng nesa mani etohong we manggarawangnei kaha, mae mano emaninang fosa.

¹³ Ampafe mera wa menemitituai sauarai kariri kaiwo rabuang dotu na Kaiwofoi tonina ne:

'Wiro yawi we inontarai etohong korbani fiahung we yau kaha,
mae fi yawi pari wea fo mani, earomio inontarai siai.*'

Weo wiro ira ma we isahu inontarai emararebana fosa kaha, mae ira we isahu inontarai sasari fosa."

*Yesusi ne aunau waworu
foi tuti koangno Yahudi ene*

* **9:13** Hosea 6:6

agamafo wiro adoang ruhia fanai

(*Markusi 2:18-22; Lukasi 5:33-39*)

¹⁴ Mayeai Yohanesi mano webaptisi kaiwasa foi ne inontarai erariati fosa, era ma emadu we Yesusi eteyo, “Todoni fino, amea tuti inontarai eweFarisi nesa amewepuasa, wape nemu inontarai eraria wau nesa bireri nina?”

¹⁵ Yesusi yoa wesa deyo, “Tofino! Ne tarai kariri mandirau mang foi tuti ne inontarai wenotisa to ne muniara mandirau foi. Na rahida mandirau mang foi minohi riasa nanai enemirorongfoi fituaya rai e? Wape rahida we mandiraufoi niayai na nanai riasa ahang kaha foi ambori da ma ki, rabuang bonani dino ambori ewepuasa ki. [Tonanai kontai, nina mani inayai riasa ampafe ewepuasa kaha, wape rahidao ambori ira werusa foi da ma ki, rahida nanai aino ewepuasa ki.]

¹⁶ Manei ne ansung mamo feai tai mani wiro dawa kobuai na ireu aburung waworu fea kaha, weo nana mani ireu aburung waworu fo yabi we ansungfo ambori ansung mamo fo mayabu fo fuba aha.

¹⁷ Tonanai kontai we angguri waworu nei mani, wiro ariri to aderi sapi rerawa memo bei kaha, weo angguri weworu foi ambori

wiwua wedaya aderi sapi rerawa memo foi tei. Nana mani anggurifo tibatara, aderi sapi rerawa foi kerirawa. Wape angguri weworu foi ariri tono aderi sapi rerawa weworu bei kontai, ambori aderi sapi rerawa foi tuti anggurifoi ubeng ruhiai.”*

Yesusi niari Yairusi ne kamitungfoi denteng, tuti wiwingno denteng aha na warang disangso Yesusi

(*Markusi 5:21-43; Lukasi 8:40-56*)

¹⁸ Yesusi doa medu we Yohanesi ne inontarai erariati fosa tonana rai mae, inontarai wenunggamieie we munu agama Yahudi na kataifoi da wei ma.* Disangkapa awebuka na awerengfo, tuti medu deyo, “Nehu kamitungfoi arahio mireha. Wape yutang we wau roa ruai waramuwara wa sauwi ambori suwi aha.”

¹⁹ Ainanaya Yesusi doabariri da riati, tuti ne inontarai ewesuraya mandu fosa era kontai.

²⁰ Na rang rabuang, wiwing manei da ria Yesusi na kurufuifo, wiwing nani meninangno rika defairi tuti maninangfoi sodairi defuina suraya boru ampa. Da kefang Yesusia warangfoi disangso ne ansung awerengfo.

²¹ Weo enetituitai deyo, “Warahunei disangso ne ansungfo terai ki, ambori yenteng ki.”

* **9:17** Yesusi deiriri fiywansoai toninai weo deunau weo ne kaiwo aunau waworu fo wiro mai kariri Yahudi ene koang agama fo kaha. * **9:18** Markus 5:22; Lukasi 8:41

²² Na kutu warangfo disangso Yesusi ne ansungfo nanai, kiaberahi deti we wiwingfoi tuti medu wei deyo, "Kamitungne waune, tawang enemurorongwaia mitu, weo nemu roaso yau wa wedaya bonteng ampa." Na kutu nanai kontaio wiwingfoi denteng.

²³ Mayeai Yesusi da wa sobu mano wenunggamie we munu agama foi ne munufoia, na nanai deti inontarai ebui suling fosa tuti kaiwasa esai rayai fosa.

²⁴ Medu wesa deyo, "Mera to boriaia mehai, weo kamitungnei wiro mireha kaha, manta dena." Ampafe emarari Yesusi paria.

²⁵ Data kaiwasa bitoya foi era to boriaia, mayeai Yesusi suai to rorong arikangfoi wiatai nai foi afui tuti yu na warangfo, na kutu nanai kontai kamitungfoi suwi aha.

²⁶ Kaiwo kariri fitantuma Yesusi niari nanai defai wari nufoi sentenang.

Yesusi niari inontarai manduo uremifafa fo suru uwati

²⁷ Ainanaya Yesusi da weru munu nani fai. Da wa rang rabuang mani, inontarai uremifafa mandu ura riati mae usahu ureyo, "Dauti ne Kaisungwa wau, aromuo auru!"[†]

²⁸ Yesusi suai to munu rongfo ampafe ura wei awafui, ainanaya dutang suru deyo, "Muroasoai we inari

muru mani muranteng rai e?" Ampafe uroa ureyo, "Yo, Daie, auroasoai."

²⁹ Ainanaya Yesusi waratawang uremifo tuti medu deyo, "Kariri muroasoawa finanai kawariai kaririaia."

³⁰ Mayea mani uremifo tabau uwati nayai. Ainanaya Yesusi deretawang suru na tapapa we ambori urairiri finanai we manei fanai.

³¹ Wape ura wa mani uwuwu Yesusi na katai nani sentenang.

Yesusi niari wetarang pararo manei tarang saha

³² Ainanaya inontaraifo suru ura wa mae inontarai manea eha weborotamu inggira dohoni manei we Yesusia.

³³ Ainanaya Yesusi data inggirafoi weruri. Na tato-fang kutu nanai kontai medu nari aha. Ampefe kaiwasa bitoya fosa epapuhing paria, tuti emadu eteyo, "Wiro fitantuma nina tawatioai na nu Israeli nei kaharai."

³⁴ Wape Farisifosa emadu wawerasa eteyo, "Na mambiriu sobuai ria inggirafosa ene mano wenunggamiae foi data inggirafosa nina."

Yesusi aro kaiwasafoi tuti medu kariri mano erufi we Sempaisi fosa we wiro efau etamoyara kaha

³⁵ Ainanaya Yesusi da wariai deunau na munu agama Yahudi na bendari tuti munue nanaia kai. Deiriri Kaiwo Mahikai fo

[†] **9:27** Dauti Ne Kaisung mani, wangno fiabai we Mananu Mamparirio Allai dererai na ne Kaiwo fafong fo.

kariri Seng Allai da weM-ananu ma fo. Kontai niari kaiwasa esodai maninang bodoni konta fosa ebeng aha.

³⁶ Yesusi deti kaiwasa bitoya foi nanai arosa paria, weo enemirorong fituayai tuti emararosung, ene tarai toyario domba ene pari mantahung.

³⁷ Ainanaya medu we ne inontarai ewesuraya mandu fosa deyo, "Aibong etini foi bitoya, wape mano etetini fosa efau kaha,‡

³⁸ ampefe metutanai we mano wenunggamiai we fi etini foi ambori denatu mangfata efau we eteting aibongfo."

10

*Yesusi diri inontarai suraya mandu erariati
(Markusi 3:13-19; Lukasi 6:12-16)*

¹ Rahida bei Yesusi sahu ne inontarai ewesuraya mandu fosa efanduhisa. Ainanaya dohong mambiriu wesa, we etata nuaninu kerira tuti enari mano emaninang fosa ebeng weru maninang esodairi foi tuti weru efanhango.

² Yesusi ne inontarai ewesuraya mandu dirisa we rasuli* fosa mani ewonomi finina:

reantenang mani Simoni (mano sahui we Petrusi foi),

Andareasi (Simoni ne tahatuifoi),

Yakobusi (Zebedeus ne kaisungfoi),
Yohanesi (Yakobusi ne tahatuifoi),

³ Filipusi,
Bartolomasi,
Tomasi,
Matiusi (mano fianduhi pajaki foi),

Yakobusi (mano Alfiusi ne kaisungfoi),
Tadeusi,

⁴ Simoni (mano biriu we inontarai Israeli fosa etoa siai weru Romafosa),
Yudas Iskariotio (mano ambori dewayang Yesusi foi).

*Yesusi demi ne inontarai suraya mandu fosa era ewuwu ne Kaiwo Mahikai fo
(Markusi 6:7-13; Lukasi 9:1-6)*

⁵ Yesusi demi ne inontarai suraya mandu fosa tuti deretawansa deyo, "Mera to katai inontarai Yahudi kaha fosa eminohi naya wa fanai, tuti wiwo mesuai to bendari inontarai Samaria fosa fanai.

⁶ Wape mera we domba enai fosa, nana mani inontarai Israelisa.

⁷ Meteisaharai wesa weo Allai ne weMananufe kefang ampa.

⁸ Menari inontarai emaninang etanteng, metuwi inontarai emarareha fosa esuwi aha, menari inontarai esobu fimaninang kusta fosa ebeng, tuti metata nuaninu kerira fo. Mambiriuo mesobuai tonana fo yohonai arora we mea, ampare mea kontai menari tonanai arora we inontarai siai kontai.

‡ **9:37** Ne maksuti mani, inontarai mano ete etarami Kaiwo Mahikai ne efau paria, manamo mano etairiri kaiwofo wesa etamoyara kaha. * **10:2** Amani Inong Anatu na Sempaisi saine.

⁹ Mera mani, dohona meha doi emasi, doi peraki, ete doi tambaga fea fe.

¹⁰ Dohonao meha rotangfearia mea na mene rang rorong wa fanai, meha ansung beru fanai, sapatu, tuti aitatohi fanai, weo mano erufi nesa mani, todoni kontaio esobu fio etohong wea fo ria mano erufi wesa fosa.

¹¹ Ampefe mera sobu bendari ete munuefea mani, mesera we inontarai mei we demang we mea tonanafo maneи, ambori meminohi riati paria sobu mera nariai aha.

¹² Mera wa mesuai to munu nani mani, meteyo, 'Kadeo Sengnei mioang mea.'

¹³ Inontarai mano ne munufoi nani demang we mea mani, mahikai moanai metohonai nanai nayai worusa. Wape efaraise we etamang we mea kaha mani, mene mahikai moanaio metohonai tonana fo tawera we mea nariai aha ma.

¹⁴ Tuti na munue ete na bendarifo manea etamang we mea kaha ete emaya we etaramio mene kaiwofo kaha mani, mera werusa tuti mehafa titai kangganangfo weru meawemiwa.

¹⁵ Mearomioaifa, weo rahida Seng Allai kiutu kaiwo kariri nunei fo, inontarai na bendari Sodomi tuti Gomora fosa, aiboi dohonai wesa fo sayayai sewa aiboi dohonai we mano wiro etamang we mea kahai nani sa fo."

Yesusi deretawang ne in-

*ontarai suraya mandu fosa
kariri dadira ambori esodaira
fo we etairiri wonongfe fo*

¹⁶ "Metarami fininai; yemi mea mera we mewuwu wonohunei fo, mene tarai toyari domba enayai rahang serigala rabuang; ampefe mesawai toyari tawai tuti menemirorong mesi toyari muntung.

¹⁷ Tuti metanansiau weduarai, weo ambori inontarai etafu mea tuti eha mea to Majelisi Agama fosara ambori eruba mea na wai na ene munu agama Yahudi fo ki.[†]

¹⁸ Tuti ambori eha mea tono mano ewewafonia fosa tuti mananufosa eu-remireafo, weo mea mani inontarai meraria yau di mea fefe. Nanaifa mani, metairiri Kaiwo Mahikai kariri yau fo we ea tuti weo inontarai etaroang Allai kaha fosa.

¹⁹ Wape eha mea we etutang bera mea mani dohona mearomikuai we fiani aino memadura wa fe, etetodoni memadufo fe. Weo kaiwo fianai aino ambori memadurai na rabuang bonani fo Allai dohonai we mea we memadurai ki.

²⁰ Weo na tonanafo wiro meaino memadu fo kaha, mae Dai Allai Nuaninufoi andino medu na mea ne.

²¹⁻²² Rahidafo da ma mani, inontarainesa kiai ambori enimirireu mea weo mea mani inontarai meraria yau di mea fefe. Ambori inontarai etawayang ene doroi tera fosa we mano emunsa fosa ki, weo eraria yau fefe. Tuti wawa manei

[†] **10:17** Majelisi Agama fosa tuti Yahudi enefonia fosa wiro eroaso Yesusi we Mananu Mampariri fo kaha tuti etapa mano ewuwui tonana fosa.

dewayang ne arikangfoi ki weo arikangfoi daria yau, kontai arikangfosa manea ambori etapa etamami einami fosa tuti etawayansa we ene aitetafosa ambori emungsa ki. Wape mandoni dino kikatawanai paria sobu werea naya fo mani, ambori kiaharai weru ne dadirafo ki.

²³ Ampefe inontarai enari kanggani mea na bendarifea mani mera to bendari siai feai aha. Yeisaharai we mea, wiro mera maino bendari na nu Israeli foa kai kaharai mae Kaisung Inontarai nei da kawuru ma ne.

²⁴ Inontarai sobu aunau nei wiro fiabai sewa ne mantaunauei kaha. Tuti mangfatanei wiro fiabai sewa ne mananunei kaha.

²⁵ Mano sobu aunau foi ne tarai kariri ne mantaunaufoi mani demoyara to, tuti womingfoi ne tarai kariri ne mano yufi wei foia mani demoyara to. Mea mani mene Seng di Yau. Ampafe masino esahu Yau we iweBarsebuli[‡] nana mani eteikanggani mea sewa aha.”

*Mematai Seng Allai, wiro mematai inontarai fanai
(Lukasi 12:2-7)*

²⁶ “Dohona mematai inontarai tonana nesa fanai. Weo fio adiwara ne kiai ambori atioai ki, tuti fio ohonai we kaiwo werorong fo kiai kontai ambori tarami parai ki.

²⁷ Kaiwo imadurai we mea na dirufo, kaiwo nanai memadurai na rahidafo aha, tuti ne isaimumunai to metaramiwa, kaiwo nanai

mesahututirai na kaiwasa bitoya foi aha.

²⁸ Tuti dohona mematai inontaraife weo emung tane tarainei, wape ene pari mambiriu we emung tanumianinunei. Mae memataiti dino Allai, weo I mani wemambiriu we miung tane tarainei tuti tanumianinunei na Soroha rorong foi ne.

²⁹ Romu sinsumiri mandu mani awayang suru we doi seni bei, wape manei wiro sau funomai to kahofa nuwowongfo meu na boriei weru Dai ne dawiafo kaha.

³⁰ Menumirandaungwai kiai kontai detori sentenang.

³¹ Ampefe mematai fanai, weo mea mani metadai sewa romu sinsumirinesa.”

*Meroa tuti Kristusi na kaiwasa bitoya euremireafo
(Lukasi 12:8-10)*

³² “Inontarai mandoni dino yoa na kaiwasa bitoya euremireafo we daria yau mani, yau kontai iroa wei na Dai Allai na rorafaisi urengreaflo.

³³ Wape mandoni dino gefora na kaiwasa bitoya euremireafoa we daria yau kaha, nana mani yau kontai ifaforai we Dai Allai na rorafaisi urengreaflo.”

*Yesusi ne da ma fo wedaya
manea erariati mae manea
siai etapai na tapapa*

³⁴ “Dohona meteitarahio ira ma ninai ika mai we nunei fe, weo wiro ika mai kaha mae ika mamunafo.

³⁵ Weo ira ma ninai iwe-daya wori:

[‡] **10:25** Barsebuli mani, Saminseni wowong siai feai aine.

'Kaisung manei dapa
tamanai ki,
kamitung manei dapa
inanai ki,
tuti urawing manei
dapa niong wi-
wini ki.

³⁶ Tuti mano eweaiteta fuba
sewa fosa mani,
inontaraio na munuro-
rong bonani fo man-
taunsa.*

³⁷ Inontarai mandoni dino
enewawu tamana ete inanai
sewa yau mani wiro mei we
daria yau kaha. Tonanai kont-
ai we mano enewawu ne
kaisungfoi ete ne kamitung-
foi sewa yau foi, wiro mesi
kontai we daria yau kaha.

³⁸ Tuti inontarai mandoni
dino miaya we sodua ne
aitabafotutidaria yau kaha,
amani wiro meinengang we
eteiberahi, enari kanggani,
tutu emuni toyari yau kaha
mani, wiro mei we daria yau
kaha.

³⁹ Mandoni dino derara
mantauni ne ansengfoi sewa
weru daria yau fo mani
ambori ne ansengfoi wioru
ki, mae mandoni dino na nufi
ninai enewawu yau awao
wonohune wedaya tarahi
mireha kontai ki, i ambori
sobu numainufo ki."

*Allai dohong fiembaitai we
mano etamang we ne mang-
fatafosa*

⁴⁰ "Mandoni dino demang
we mea mani, i kontai de-
mang we yau, tuti mandoni
dino demang we yau mani,
ambori demang we Dai,
mano demi yau nei ki.

⁴¹ Mandoni demang we
nabi manei, weo i deitawanai
we inontarai nani nabi dine,
ambori sobu fiembaitafo mai
kariri nabifo enengfo. Kon-
taio mandoni dino demang
we inontarai enerorong mesi
mani weo deitawanai we
inontarai nani enerorong
mesi dine ambori sobu
fiembaitafo mai kariri inon-
tarai enemirorong mesi fo
enengfo.

⁴² Tuti mandoni dino
dohong mereha danunanang
kuteai ki we nehu inontarai
katui nei we daria yau fo
mani, tarai, imadurai we
mea mau yeo, ne fiem-
baitafo wiro nai weruri kahai
ki."

11

*Yesusi tuti Yohanesi mano
webaptisi kaiwasa foi
(Lukasi 7:18-35)*

¹ Yesusi dohong kaiwo
we ne inontarai ewesuraya
mandu fosa tonanaia fo, da
weru katai nani we deunau
tuti wiuwu Kaiwofo na
bendari bitoya wa na nana
fo.

² Rabuang bonani
Yohanesi mano webaptisi
kaiwasa foi njai na aitamu
rorong fo tuti tarao kariri
fianai aino Kristusi niari fo,
ampafe demi ne inontarai
maneiru teai itora wa itoru-
tag bera Yesusi.

³ Itorutani itoreyo, "Wau
mani Mananu Mamparirio
ambori ro ma foi* di wau e,
ete ametamang we inontarai
siai manei e?"

* 10:36 Mikha 7:6 * 11:3 Yesayai 9:5-6

⁴ Yesusi yoa we sitoru deyo, “Muntorarabera muntoru we Yohanesia muntoraikarirai wei kariri fianai aino muntotaramioa wa tuti muntowatiao wa.

⁵ Mano euremifafa ewati, mano efaya etoa era, mano emaninang kusta ebeng, mano etarami pararo fosa etaramiofi, mano emarareha esuwi aha, tuti mano ene pari fi fosa iwuwu Kaiwo Mahikai fo wesa.

⁶ Tuti mano wirosenemironong soriru we yau kaha fosa, esobu ne maifo.”

⁷ Yohanesi ne inontaraifo sitoru itora wa, ainanaya Yesusi medu kariri Yohanesi we kaiwasa bitoya foi deyo, “Raminde nanai mera to katai wekamamie minano foi we mewati fiani nai, mewati ninoi wanamba sowawerahi foi e? Bireri, we i mani, inontaraio yu kaiwo mutu dine!

⁸ Ampafe mera wa we mewati fiani, mano sensuni na ansung kaiwewa denteng foi e? Bireri, weo inontarai esansunsa na ansung tonana fo mani enayai na munu mananu fo terai.

⁹ Ampafe mandoni dino mera we mewatiao ne? Nabi manei e? Tarai, wape yeikaririaifa we mea yeyo mano mera we mewatiao nani mani fiabai sewa nabinesa kiai.

¹⁰ Weo i mani andino Allai medu kaririai na ne Kaiwofo dotu tono:

‘Mewati ma! Yemi nehu inontaraio kia nehu kaiwone manei, da foni Wau.

I ambori meineng nemu rangfoi we Wau.’*

¹¹ Tarai, imadurai we mea mau yeyo, na inontarai fuba saubaunung na nunei nini, manei wirosenemironong maneo fiabai sewa weru Yohanesi mano webaptisi nini kaha. Wape na ninai to fongna mani, inontarai mano ehatui sewa na Allai ne mananu rorong fo ansaino efabai sewa Yohanesi fo.

¹² Na siario Yohanesi dariai we wiuwu Kaiwo Mahikai kariri Allai ne weMananufo paria sobu ninaifa ne, inontarai ewemambiri na Sengnei etairiri Allai ne weMananufo na wemambiri paria, tuti kaiwasa efau etapai mae, efau kontai eroasoai tuti era riatai, amani inontaraio raminde eharira tuti emamuna fosa.

¹³ Weo Yohanesi daria kaharai mae, na Hukumi Musai fo tuti Kaiwo nabifosa emadura fo, dotu kariri kawuru ampa we fi tonana ne ambori kawariai ki.

¹⁴ Tutu memaya we metaramioai mani, yeikaririai we mea we Yohanesi mano webaptisi kaiwasa nini mani, Eliai dine, andino na Kaiwo Mararebana fo dotu kariri we ambori kiai aha ma fo.

¹⁵ Mandoni dino wetarang mani, tarao kaiwo ninai.”

¹⁶ Yesusi medu aha deyo, “Fiani andino iriwanso kariri inontarai rabuang bonini sa ne? Ea ene tarai toyari arikang eminohi na kondirora mae esahu wawerasa eteyo,

¹⁷ ‘Amerohi rarung mirising

* 11:10 Maliaki 3:1

fo we mea,
manamo memahai kaha,
ameba kayowa
wape wiro mesai kaha.'

¹⁸ Weo Yohanesi nini da ma mani, wepuasa tuti dunung angguri kaha, manamo meteyo, 'I mani Saminseni niai nai.'

¹⁹ Ainanaya Kaisung Inontarai nei da ma mani dampi, dunung, tuti memadu meteyo, 'Mewati inontaraifoi denanggoing, meyeru biriu, tuti firaō mano efanduhi pajaki we parenta Roma foi tuti inontarai sasari.' Wape Seng Allai sewai sewa. Mano esomi wei fosa etainawi ne awaifo nanai na fimai etohong toa fo."

Yesusi deikanggani benderi Israeli beiru teao ne inontaraifosa eroasoa kaha fo

(Lukasi 10:13-15)

²⁰ Yesusi niari fitantuma bitoya paria na bendari beiru teai, tonanai ki wape inontaraifosa wiro etaraberasa weru ene sasarifo kaha, wedaya deikanganisa deyo,

²¹ "Inontarai Korasimi mesobu ne karirafo rai! Tuti inontarai Betsaida ne mea kontai, mesobu ne karirafo konta rai. Weo fitantuma bitoyao inariri rahang mea tonina ne, masino inari na bendario borai weru Israelinei, toyari Tirusi tuti Sidoni mani, inontarai na wana fosa etarabesa kawuru weru ene sasarifo tuti esansung ansung koya fo, eruai kangganangfoa watai na enumikamieifo ampa.

²² Wape imadurai we mea mau yevo, rahida bo Allai kiutu kaiwo kariri nunei nai foi, mesobu aiboi maraba sewa inontarai Tirusi tuti Sidoni fosa.

²³ Tuti mea na bendari Kapernaumi, menemituai we metadai sewa paria sobu rorafaisi kontai ki, wape Allai ambori su mea beyari paria sobu katai Soroha rorong foi. Weo masino na Sodomi esobu fitantumafeai kariri ne inari rahang mea tonina fea mani, bendari nani wiro wioru kahai mae doari paria sobu ninai.

²⁴ Wape imadurai we mea mau yevo, rahida bo Allai kiutu kaiwo kariri nunei nai foi, mesobu aiboi maraba sewa inontarai Sodomi fosa."

Yesusi sahu we obu ne maifo riati

(Lukasi 10:21-22)

²⁵ Rabuang bonani Yesusi wenadi deyo, "Dai, Seng mano ru rorawai tuti nunei Wau, yohong mahikai we Dai Wau, weo finani kiaio bodiwarai weru mano esawai tuti ewaitawang fi bitoya fosa, mae boinawiaia kasau we mano ene tarai kariri arikangnesa.

²⁶ Yo, tonanai, weo ne tonanane aino Dai enemuoa ne."

²⁷ Ainanaya Yesusi medu deyo, "Fi kiai na rorafaisi tuti na nunei, Dai dohonai we yau ampa. Kaisungnei mani, mane i wiro deroani na mai kaha, manta Dai mantauni terai, tuti Dai kontai mane i wiro deroani na mai kaha, manta ne Kaisungnei mantauni terai tuti inontarai

mano Kaisungnei dirisa we deinawi Dai nani wesa fosa.

²⁸ Mano meawemi mewarami tafa tuti mesodua maraba [na merurai paria we metohong kariri Hukumifoi] wa mea, mera we Yau ma, Yau ambori iwedaya mea meweandeisei ki.

²⁹ Metohong kariri nehu kaiwone tuti mesobu aunau ria yau. Weo yau mani imanang tuti enehurorong tewawa, ambori mesobu mai na menumianinuwai tuti menemirorongwai weandesei ki.

³⁰ Weo nehu kaiwone miawa we metohong kaririai tuti fi yohonai we mesoduata ne sayaiyai."

12

Farisifosa etinggai Yesusi we niari fi na rahida Sabati fo (Markusi 2:23-28; Lukasi 6:1-5)

¹ Na rabuang bonani, na rahida Sabati bei, amani rahida Yahudi fosa erufi nai kaha foi, teterai we Yesusi da riria romi potang fo. Ne inontarai erariati fosa ewati potangfoi nanai eteting bongfoi we etani, weo ewawisi fefe.

² Farisifosa ewati finana fo, emadu we Yesusi eteyo, "Botia, nemu inontarai eraria wau wasa etohong roaing kaiwo dotu wedua tarufi na rahida Sabati foi wanai."

³ Manamo Yesusi yoa wesa deyo, "Finana mani ne tarai toyari fi mananu Dauti niari na fafongfa na rahida bo i tuti

ne mano erariati fosa ewawisi fo. Metato kariri kaiwo nana kaha e?

⁴ Amani suai to Sempaisi ne Munufoi afui dangno roti etutang tutirai we Allaia fo tuti dohonai we ne mano erariati fosa etang kontai. Wape finanai, kariri hukum agama foi mani, imami erufi na Sempaisi ne Munufoi saino etang tera ne.

⁵ Kontai, mewaitawanai we na rahida Sabati fo, imamifosa erufi na Sempaisi ne Munufoi mani, wedaya ea kontai etohong roaing Sabatifo finana. Wape metatorai na hukum agama foi mani, wiro enari sarawa kaha.

⁶ Imadurai we mea mau yeo, na ninai manei fiabai sewa Munu Seng foi.

⁷ Kaiwofea dotu toninai: 'Wiro yawi we inontarai etohong korbani fiahung we yau kaha, mae fi yawi pari wea fo mani, earomio inontarai siai.*

Ampafe masino metafu Sempasi ne Kaiwofo nanai na mai mani, wiro metinggai mano enari sarawa kaha nesa kaha.

⁸ Weo Kaisung Inontarai nei weSeng we rahida Sabati nei kontai, [ampafe wemambiriu weo deiriri kariri fianai aino na rahida Sabati nei mani inontarainesa enari fo, tuti fianai aino enari kaha fo]."

Narahida Sabati bei Yesusi niari inontarai warang bei

* 12:7 Hosea 6:6

*mireha foi denteng
(Markusi 3:1-6; Lukasi 6:6-11)*

⁹ Ainanaya Yesusi da weru katai nani mae da wa suai to ene munu agama Yahudi bei.

¹⁰ Na nanai deti inontarai manei warang bei mireha. Inontarai eweFarisi manea na nanai eteyo etinggai Yesusi we niari roaing Hukumi Musai soi fo, ampare etutani eteyo, "Kariri Hukumi Musai soi fo mani, tanari inontarai etanteng na rahida Sabati ne konta ne?"

¹¹ Yesusi yoa wesa deyo, "Masino na mea, manei ne domba manei da wa saukaha kamirei berorong bei na rahida Sabati foi, nana mani fianai aino niari ne? Nana mani, wiro yurai we yuaisi weru kamirei rorong foi kaha e? Todoni kontaio yurai we yuaisi rai.

¹² Tonanaifa mani, dombanei dino dedai sewa inontarai fine ne? Bereri. Ampare kariri Hukumifo, nari ne bengfo na rahida Sabati foi mani, nana mani fi beng fine."

¹³ Ainanaya Yesusi medu we inontarai warang bei mireha foi deyo, "Wi waramuwai ma." Ainanaya inontaraifoi si warangfoi kaririaia, na tatofang kutu nanai kontai warangfoi denteng kariri bo dowej foi aha.

¹⁴ Farisifosa ewati finanafo wiro eparaise kaha, mae era to boriei weru munu agama foi tuti emadu ruhi kaiwo we ambori emung Yesusi.

*Yesusi, Mano Allai demi ma dine
(Markusi 3:7-12)*

¹⁵ Yesusi deitawang ene enemituuitafo, ampare da weru katai nani. Kaiwasā bitoya paria era riati tuti inontarai emaninang fosa bitoya paria niarisara etanteng aha.

¹⁶ Deretawang kaiwasa bitoya foi suasa na tapapa paria we wiro etaiririai we inontarai siai kariri I we mandoni dine fo fanai.

¹⁷ Ambori na tonanane mai kariri fianai aino Allai medurai na nabi Yesayai deyo,

¹⁸ "Nehu mangfata yiriri dinini,
Mano enehuwawuti tuti andino kia enehuropongnei.

Ambori yohong Nuhuanin-unei wei we isansoninai,

Tuti nehu ikutu kaiwo na masi ne,
deirirai we kaiwasanei kiai na nu bodoni konta foi.

¹⁹ I wiro sawa funomai tuti kiobu funoma kaha,
Tonanai kontai wiro tarami raofuifoi na rang bendari fo kaha.

²⁰ Toyari wiro fio kiutu ninoi robong adareti tikai sawai foi kaha,
tuti wiro fefe padamarrang denggararu de minong foi kaha,

I wiro tiapa inontaraio ewemambiri kaha,
tuti manang we mano efanahang fosa,

Pariao ne weMananu tarai fo kiraikobu Saminseni ne wemananu mamantiti fo.

21 Tuti na mantauni wonongfo, kaiwasa na nunei sentenang enemitanwanai ki.”*

Farisifosa eteibera Yesusi, eteyo sobu ne mambiriufu na Saminseni

(Markusi 3:20-30; Lukasi 11:14-23, 6:43-45)

22 Mayeai manea eha inontaraio nuaninu karira dohoni manei we Yesusi ma. Inontarai nani inggira wedayaria ureng fafa tuti borotamu. Ainanaya Yesusi niari weinggira dohoni nania denteng aha, ampare medu tuti deti aha.

23 Kaiwasa bitoya fosa epapuhing paria we fitantuma nanai tuti emadu eteyo, “Inontarai nini, dohonao Mano esahui we Dauti ne Kaisungfoi dinini fe?”

24 Wape Farisifosa etaramioaifa nanai emadu eteyo, “Na inggirafosa ene mananu Barsebuli wonongfo terai aino inontarai nini data inggirafosa.”

25 Yesusi deitawang Farisifosa enemituaitafo, ampare medu wesa deyo, “Negara bei wiro weboyari kaha mae ebabausa tuti eweaiteta wawerasa, nana mani negara nani wiro da waroi ahang kaha, mae ambori wioru ki. Tonanai kontai we bendari bei ete munu rorong bei eweaiteta wawerasa

mani, bendari ete munu rorong nani wiro doa pampang kahai ki.

26 Tonanai kontai we Saminseni, masino Saminseni data Saminseni mantauni aha mani, deinawiai we Saminseni dapa bera mantauni tuti tiabau finanai. Nana mani ambori ne mananufo nayai mutu kaha mae wioru ki.

27 Memadu meteyo na Barsebuli ne mambiriufu aino yata nuaninu karira fosa nai ne. Tonana mani na mandoni ne mambiriufu mene inontarai eraria mea fosa etata nuaninu karira fosa nai ne? Na fianai aino enari nanai deinawiai we fio metinggai yau wea ne tarai kaha.

28 Wape yau mani yata nuaninu karira na Allai ne mambiriune, nana mani yeinawiai weo na yau mani, Seng Allai da ma we weMananu rahang mea ampa.

29 Nuaninu karira fosa ene tarai kariri we-wemambiriun manei minohi na ne munufoi. Tuti manei wiro suai to ne munufoi afui we wewu ne rafoi kaharai, mae wenani tefu mambiriufopia wiorahi akawuru wo, ambori wewu ne rafoi ki. Ampafe na yata nuaninu karira to borai yeinawiai we ikaraikobu Saminsenia.

30 Manei sau we yau kaha mani, weaiteta we yau, tuti manei doa tuwa yau na ifanduhi inontarai fo kaha mani, wenani niari kanggani nehu fi inari ne weo kiataterai.

31 Ampafe imadurai we mea mau yeyo, sasari fuba

* 12:21 Yesayai 42:1-4

inontaraine enariri nei kiai kontai eteibera Allai fo, sasari tonana nei Allai deiairi ki, wape sasario eteibera Nuaninu Mirarebana foi mani, todoni kontaio Allai deiairi kaha.

³² Tuti inontarai mano eteibera Kaisung Inontarai ne yau, ene sasari tonana foi Allai deiairi ki, wape eteibera Nuaninu Mirarebana foi mani, na todoni feai kontaio Allai deiai ene sasari tonana foi kaha, na nu bonini tuti nu weworu da aha ma foi kontai.

³³ Ai koi denteng foi mani bongfoi denteng, mae ai koi kerira foi mani bongfo kerira, ampare aifoi denteng ete kerira, waitawani na ne bongfoi ki.

³⁴ Farisine meaine, inontarai mesaipaya di mea! Todonie, merurai we memadu kaiwo beng fo na meboromine, mae menemirorongfuisi kerira seipaya ninai? Weo fianai aino madurai na taboromi ne mani, finanai dariai na taenemirorongfuisi mandie.

³⁵ Inontarai mano denteng foi niarifo beng, we enerorongfoi denteng fefe. Wape inontarai mano kerira foi niarifo karira, weo enerorongfoi kerira.

³⁶ Wape imadurai we mea mau yeyo, na rabuang bo Al-lai da ma we kiutu kaiwo weo kaiwasa nunei sentenang foi, inontarai mansiari-mansiari deiai kariri kaiwoariri medu funomi foi we Allai fo ki.

³⁷ Weo Allai kiutu kaiwo kariri mea fo titua na kaiwo memadura fo, we metohong sarawai ete bereri, ambori

mesobu aiboi ete mehasau e.”

*Farisifosa etutang Yesusi we niari fitantumafea
(Markusi 8:11-12; Lukasi 11:29-32)*

³⁸ Ainanaya mantaunau Kaiwo Musai soi fo maneiru teai tuti Farisifosa etutang Yesusi eteyo, “Dai Mantau-naune waune, amefaraise we amewati nari fitantuma bei.”

³⁹ Wape Yesusi yoa wesa deyo, “Kaiwasa fuinini mesaipaya paria tuti mehuru-mitare mene Sengfoi, ne tarai toyari mang manei kurutare ne wiwingfoi tuti dohong we wiwing siai. Metutang we inari fitantumafeai we fiainawiai we mea kariri yau. Wape wiro inari fitantuma siai fea we mea kaha, mae fiainawiaio mewaitawanai na nabi Yunusia fo.

⁴⁰ Toyari nabi Yunusi we niayai na diang fiabai foi enengfoi rahida botoru diru botoru fo, tonanai kontai Kaisung Inontarai nei ambori niayai na kahofa rorong fo rahida botoru diru botoru kontai ki.

⁴¹ Na rahida Allai kiutu kaiwo kariri nunei fo, inontarai Niniwe fosa ambori esuwi ria mea, mano na rabuang bonini ne mea, tuti etinggai mea kontai ki. Weo fafongfa nabi Yunusi medu wesa fo etaramioi, ampare efotou enari sasarifo tuti etaraberasa weru ene sasarifo ampa. Wape na ninai, na katai nini manei fiabai sewa nabi Yunusi ne, manamo wiro metaramioi kaha.

⁴² Tonanai kontai we wiwing Mananuo na do wanangsai foi,* i ambori suwi kontai ria inontarai mano na rabuang bonini ne mea we dinggai mea kontai ki. Weo wiwing Mananu nini da pari na nunei rea naya fo ma we sobu aunau mai na Mananu Salomoi mano sewai foi. Tuti na ninai, na katai nini manei fiabai sewa Mananu Salomoi ne, manamo wiro metaramioi kaha.

⁴³ Awao nuaninu kerira manei da to borai weru inontarai manei mani, da wariai funomai to katai karira sarahiae weo sera we katai niai nayai, wape sobua kaha.

⁴⁴ Nana mani enetituai deyo, 'Yarabera yau to nehu munu arahi ira werui foi aha.' Tuti rahida bo daraberahia foi mani, sobuai we inontaraifoi ne tarai toyari munuo wiatai arora, fantamia mesi mirarebanai.

⁴⁵ Ainanaya daraberahi aha kia eweituo eharira sewa mantauni. Mayeai esuai to inontaraifoi awafui enayai nai. Ampafe wedaya inontaraifoi ne minohi toa fo kerira sewa reantenangfo aha. Kaiwasa na fuininai mesaipaya ne mea, mesobu ne karira sewa fo tonana kontai ki."

Yesusi inanai tuti ne tahatuifosa

(Markusi 3:31-35; Lukasi 8:19-21)

⁴⁶ Yesusi medu ria kaiwasa bitoya foi tonana rai mae, inanai tuti ne tahatuifosa era

ma etoari na borieifo tuti eteyo emadu riati.

⁴⁷ Ampafe inontarai manei medu wei deyo, "Daie, inamuai tuti nemu tahatuifosa etamang na borieife fo eteyo emadu ria wau."

⁴⁸ Manamo Yesusi yo we inontarai kia kaiwofo nani, deyo, "Mandoni dino isahui we nehu ai tuti mandoni saino isahusa we nehu tahatui ne?"

⁴⁹ Ainanaya Yesusi si warang deinawi ne inontarai erariati fosa deyo, "Botia, nehu ai tuti nehu tahatui sai nina.

⁵⁰ Weo inontarai mandoni niari kariri nehu Dai Allai na rorafaesi ne dawiafo mani, andino isahui we nehu tahatui mang ne, nehu tahatui wing ne tuti nehu ai ne."

13

Fiyiwansoai kariri mangkafa aibong
(Markusi 4:1-9; Lukasi 8:4-8)

¹ Rahida bonani kontai Yesusi da weru munufoi, mae da wa minohi na ruru Galilea foi dereungfo.

² Kaiwasa bitoya era wei ma efanduhisa wariri, amparefe dautai to wafeai awa dewohi nayai, mae kaiwasa bitoya foi minohi na reifo.

³ Ainanaya Yesusi deunausa fi bitoya na fiywansoai deyo,

"Weniari romi manei kia aibongfei da wa we sanami.

⁴ Da wa kifa aibongfoi nana mani, eai sawai na rangfoi,

* **12:42** I mani Mananu Seba dine. Ato kaririai na 1 Mananufosa 10:1-13 tuti na 1 Tawarikhi 9:1-12.

ampafe romufosa esifo ma etania kiaia.

⁵⁻⁶ Eai kontai sawai na kahofa wekamamiei wowongfo. Aibongfoi sikera sa rerorifoi tonanai meai, wape kameaia wofoi piara nanai siamorang aha, weo kahofafo demoyarai we newafo so aweu kaha fefe.

⁷ Fai aha mani sawai na katai weninoi ababo foi, ampare ninoi ababo foi sifu tamui tuti kehepania memasara.

⁸ Wape aibongfeai aha mani sawai na kahofa beng fea, ampare sifu biriayai paria dohona mani webong bitoya paria, wei wepiaring (100), wei kontai wepiatoru (60), wei aha mani wepiareiasura (30)."

⁹ Medu tuarai aha deyo, "Mewemetarami mani metaramioai."

We fiani Yesusi deunau na fiywansoai

(Markusi 4:10-12; Lukasi 8:9-10)

¹⁰ Ainanaya Yesusi ne inontarai erariati fosa era kefani etutani eteyo, "We fiane bounau kaiwasa bitoya foi mani bounau na fiywansoai nina?"

¹¹ Ampafe yoa wesa deyo, "Mea mani Allai dohong awai we mea, we mewaitawang kariri ne weMananu rorong fo tuti fi dediwara fo ampa, wape ea mani bireri.

¹² Weo mandoni dino sobu awaifo ria Allai kawurua fo, ambori sobuafo fuba aha. Wape mano sobua kaha foi,

ne kutu nayai nai fo kontai kia weruri ki.

¹³ Kaiwo ninai dohona mani yeunausa na fiywansoai, ambori, Ewatioai tonanai ki, wape ene tarai toyari euremifafa.

Etaramioai, wape ene tarai toyari wetarami kobi, tuti etafura kaha.

¹⁴ Ampafe na kaiwasa nani fosa, mai kariri fianai aino raminde nabi Yesayai medurai deyo,*

'Metaramioaia metarami wawurai, wape mewaitawana na ea kaha,

Mewatioaia mewati wawurai, wape metafurai na ea kaha.

¹⁵ Weo kaiwasa nini enemittuitafo rehabu ampa, ehobu etaramifo ampa, tuti etabung wedua euremifo ampa.

Weo tonana kaha mani, tarahio euremifo ewati, etaramifo etaramioai, tuti enumikamieifo enemittuitaifa, ambori etaraberasa weru ene sasarifoi we Yau aha ma, tuti inarisa ebeng aha.' "

¹⁶ Ainanaya Yesusi medu we ne inontarai erariati fosa aha deyo, "Wape mea mani mesobu ne maifo we meuremiwa tabau we mewati tuti metaramiwa saha we metaramioai na mai.

¹⁷ Weo tarai, imadu we mea mau yeyo, na fafongfa

* **13:14** Yesayai 6:9-10

nabi bitoya tuti inontarai enemirorong mesi fosa efau enemirorong dohong paria we ewati fiani aino mewatioai na kutu nina ne, wape wiro ewatioa kaha. Tuti we etarami fianai aino metaramioa ne, wape wiro etaramioa kaha.”

Yesusi medu bau kaiwo kariri fiywanso mangkafa aibong foi

(Markusi 4:13-20; Lukasi 8:11-15)

¹⁸ “Metarami kariri fiywansoai kariri mangkafa aibong nei ne kaiwo tarai ne ma.

¹⁹ Aibong sawai na rangfoi mani, yiwanso inontaraio etarami Sempaisi ne Kaiwofo kariri todoni weMananufo, wape wiro etafu kaiwofo na mai kaha. Ampafe Saminseni, amani mano kerira foi, da ma dewa Kaiwo kafarai tonana fo weru enemirorongfoa.

²⁰ Mae aibong sawai na kahofa wekamamiee wowongfo mani, yiwangso mano etaramio Kaiwofo tuti na kutu nanai kontaio esobuai na enemirorong mirising.

²¹ Wape Kaiwofo wiro wenewa na enemirorongfoi kaha, ampafe etawansa tourai mae esodai dadirafeai kariri ene eroasoai tonana foa mani, wiro etoaria mutu ahang kaha, mae esu to fuia.

²² Aibongno sawai na katai weninoi ababo foi mani, yiwanso mano etaramio Kaiwofo, wape earomikuayai karerai we fi nunei tuti ra nunei sofa enemirorongfoi

awao sau weai, ampafe finani kepang Kaiwofo paria wiro webong na sa ahang kaha.

²³ Wape aibong sawai na kahofa beng fo mani, yiwanso mano etarami Kaiwofo, etafurai tuti etonai afui naya mutu na enemirorongfoi. Na inontarai tonana fosa mani Kaiwofo webong paria na ea, ne tarai toyari aibongfoi we wetarai bitoya fo, wei awao we piaring (100), wei awa wepiatoru (60), tuti wei kontai awa we piareiasura (30). ”

Fiyiwansoai kariri ninoi sifu tamu potang

²⁴ Yesusi deiriri fiywansoai bei we kaiwasa bitoya foi aha mani, deyo, “Allai ne Mananu rorong fo ne tarai toyari finini; Weniari romi manei kifa potang bongfoi na ne romifoi.

²⁵ Wape denawa diru rabuangna mani ne aitetafoi dediwara kifa rambongfoi na romifoi ria potang bongfoi, ainanaya da wa.

²⁶ Na rahidao potangfoi sifua rerai we wetarai nanai, rambongfoi sifu riataia dedai kontaia.

²⁷ Ainanaya weniari romi foi ne womingfosa emadu wei eteyo, ‘Daie, aibong kufari foi mani denteng mae, todoni rambongfoi sifu tamui wana?’

²⁸ Ainanaya wene romifoi yoa deyo, ‘Inontarai weaiteta we yau manei andino niari tonana ne.’ Ampafe ne womingfosa etutani aha

eteyo, ‘Tonana mani amera wa amefating rambongfoi weruaia ne?’

²⁹ Manamo yoa deyo, ‘Nana fanai, weo mefating rambongfoi mani, ambori mefating tuti potangfoi konta rai.

³⁰ Ampafe metawini sifuria potangfoi kio rahida eting potangfoi nai foi wo. Na rahida bonani dino ambori imadu we mano etetini fosa yeyo, reantenangne mani mefanduhi rambongwai tuti meworahi we menunumi, mae potangwai mefanduhi we mehari to nehu munu fanduhi fi nai foi afui we wiatai nai.’

Fiyiwansoai kariri Allai ne Mananufo we ambori fiabai sewa aha tuti ne inontaraifosa we ambori bitoya aha

(Markusi 4:30-32; Lukasi 13:18-21)

³¹ Yesusi deiriri fiywansoai bei kontai we kaiwasa bitoya foi aha mani medu deyo, “Allai ne Mananu rorong foi mani ne tarai toyari fiywansoai nini; Sawi bong bei, manei kiaria sanami na ne romifo.

³² Tawaitawanai we sawi bongnei mani, ketui sewa raung ete fitantanang tatanami na romifoi ne bongfoi kiai. Wape sifua mani, andino fiabai sewa ne, weo werobong tuti wearirawang, ampafe romufosa wea mani esifo ma enari aisangging na arirawangfo.”

³³ Yesusi deiriri fiywansoai bei aha mani deyo, “Seng

Allai ne Mananu rorong foi kontai ne tarai toyari fi dohong tepung dautai, amani ragi. Wiwing manei sariri aweu fiah tamu tepung bitoya, wedaya tepungfoi dautai paria ketu loyang wiatai nai foi dereungfo.”

³⁴ Yesusi deunau kaiwasa bitoya foi mani deunau na fiywansoai terai, tuti siai weru fiywansoaf mani wiru medu fieai wesa kaha.

³⁵ Ambori finanai mai kariri fianai aino nabifo manei meduraifa deyo,

“Ifobai borohu imadu wesa na fiywansoaf ki, Iwuwu fi dadiwao na siari Allai niari nunei paria sobu ninai manei deitawana kaharai fo.”*

Yesusi medu bau kaiwo kariri fiywanso rambong sifu tamu potangfoi fo

³⁶ Mayeai Yesusi da weru kaiwasa bitoya foi tuti suai to munu bei, ampafe ne inontarai ewesuraya mandu fosa eraoia etutani eteyo, “Daie, boisaharai we amea kariri fiywanso rambongno sifu tamu potangnei.”

³⁷ Yesusi yoa deyo, “Inontarai kifa aibong denteng foi mani Kaisung Inontarai nei.

³⁸ Romifoi mani nunei dine, aibong denteng foi mani inontarai mano Allai sahusa we ne arikangno eminohi na ne weMananufoi fo saine, mae rambongfoi mani Saminseni ne arikangfo saine.

* 13:35 Masmuri 78:2

³⁹ Mano weaiteta da sanang rambong bongfoi mani, Saminseni mantauni dine. Rahida eting potangfoi naya fo mani, rahida nunei werea naya fo dine, tuti mano etetingfi fosa mani wewaifo saine.

⁴⁰ Toyari rambongfoi fanduhi tuti nunumi na adia rorong foi, tonanai kontai na rahida nunei werea naya fo.

⁴¹ Kaisung Inontarai nei ambori demi ne wewaifosa efanduhi mano eharira fosa tuti mano ewedaya inontarai enari sasari fosa, ehara weru ne Mananu rorong fo.

⁴² Erusa esosa to adia rorong denggararu foi, na wanai esodai ne karirafotutti esaia etamirai paria.

⁴³ Rahida bonani dino inontarai enemirorong mesi fosa esobu mai paria, toyari ene taraifoi keiwewa kariri wofaisi na ene Dai Allai ne Mananu rorong fo ki. Mandoni dino wetarang mani taraoai."

*Fiyiwansoai kariri fi dadai
sewa fo, amani tarurai we
todoni Allai sahu tata we ne
inontarai na ne Mananu rorong fo*

⁴⁴ "Allai ne Mananu rorong fo mani, ne tarai toyari ra dentengno dadiwa na kahofa rorong fo na romi bei. Inontarai manei sobu ra denteng nani, tuti sirayai na kahofa rorong fo nariai aha. Ainanaya piraise karerai we ra sobui nani, ampare daraberahia dewayang ne ra minohi tutira foi kiaia mae wiori kahofa dediwa ra denteng foi nai nani aha.

⁴⁵ Kontai, Allai ne Mananu rorong fo mani ne tarai toyari inontarai dewayangfi manei sera we mutiarao, amani mutiarao ne harga dedai fo.

⁴⁶ Serawa sobu mutiara ne harga dedai sewa beia, da wa dewayang nefi minohi tutira foa kai, tuti wiori mutiarafoia.

*Fiyiwanso erang tuti au-
nau waworu tuti ne mamo fo*

⁴⁷ Tonanai kontai Allai ne Mananu rorong fo ne tarai toyari erang kabioi na rawanangfo tuti miko mai diang bong foi.

⁴⁸ Erangfoi mikoa sefangna mani, mano ehabioi fosa erabiti to rei arei. Ainanaya eminohi mae etiri diangfoi, diangno ebeng fosa esonisa to nawang rorong fo, mae ne eharira fosa ehabisa.

⁴⁹ Tonanai kontai na rahida nunei werea naya fo. We-waifosa era ma etiri inontarai eharira fosa weru inontarai mano enemirorong mesi fosa.

⁵⁰ Ainanaya eso inontarai eharira fosa to adia rorong denggararu foi, na wana esodai ne karirafotutti esaia etamirai paria."

⁵¹ Ainanaya Yesusi dutang ne inontarai ewesuraya mandu fosa deyo, "Metafu finana kiai to ne?" Eroa eteyo, "Daie, ametafuraimampa."

⁵² Ampafe medu wesa aha deyo, "Tonana mani, mantaunau Kaiwo Musai soi fosa, mano etafu aunau kariri todoni Allai weMananu fo nana mani, etaunau kaiwo

beng na Hukumi fafong foi
tuti Kaiwo Mahikai waworu
kariri nehu rang waworu
nei, ne tarai toyari inontarai
manei ne munu bei, we kia
ra waworu fo tuti mamo fo to
boriei weru katai watai nai
fo."

*Kaiwasa na munue
Nazareti eteiaya Yesusi*

(Markusi 6:1-6; Lukasi 4:16-30)

⁵³ Yesusi deiriri kariri fiyi-
wansoaifoa kaia nanai, da
weru katai nania.

⁵⁴ Amani daraberahi to ne
munuefo aha. Na nanai deu-
nau na munu agama Yahudi
fo, ampare kaiwasa bitoya
fosa epapuhing paria, emadu
eteyo, "Inontarai nini sobu
awai tuti mambiriutonina ne
na doni e, we deunau toninai
tutu niari fitantuma ninai?"

⁵⁵ I mani Yusupi mano
sewai na niari fi na aifoi ne
arikang dine mae? Inana
mani wonong fino Maria
mae? Tuti tawaitawanai we
ne tahatui saino Yakobusi,
Yusupi, Simoni tuti Yudasi
mae?

⁵⁶ Tuti rorowingfo sitoru it-
ominohi kontai na munuefe
ninai mae? Ampafe sobu
awai tuti mambiriutonina
kai na doni?"

⁵⁷ Ampafe emaya wei kahai
mae eteiayaria.

Wape Yesusi medu wesa
deyo, "Nabinesa na doni kon-
tai inontarai etatosa paria,
mantao na ene munuefo tuti
ene arurarafoса teraio an-
saino wirosatosa kaha ne."

⁵⁸ Ampafe Yesusi wirosatosa
fitantuma bitoya kahai na

nanai, weo eroasoa kaha
fefe.

14

*Kaiwo kariri Yohanesi
mano webaptisi kaiwasa foi
mireha toafo*

(Markusi 6:14-29; Lukasi 9:7-9)

¹ Na kutu Herodesi mano
wemananu na Galilea foi
tarao kaiwo kariri Yesusi we
wewonong tonanaifa fo,

² medu we ne inon-
tarai erufi wei fosa deyo,
"Yohanesi mano webaptisi
kaiwasa foi andino suwi na
marareha rorong fe aha ma
nina, doni wemambiriutonina
niari fitantumafe nina."

³ Herodesi enetituai to-
nanai, weo we beiru teaia
fo demi ne inontarai etafu
Yohanesi tuti eworahi eto-
honu afui wiatai na munu
aitamu rorong foi, weo
Yohanesi suari na rahida kia
ne tafuai* Pilipusi binengno
Herodiasi we ne wiwingfo.

⁴ Weo Yohanesi suari pam-
pang deyo, "Rau nemu tafuai
binengfoi tonana mani, nari
roaing hukumifo paria tuti
bohong sarawai paria."

⁵ Ampafe Herodesi deo mi-
ung Yohanesi manamo mitai
kaiwasa bitoya foi, we eteyo
Yohanesi mani nabi dine fefe.

⁶ Wape rahida bo do-
honsua ne rahida saubau-
nungkamie naya foi, Herodiasi
ne kamitungfoi mikai
na kaiwasa bitoya eminohi
na muniarafotutu nani sa
earomireafotutu mikai beng
paria, dohonaia Herodesi
piraise paria.

* 14:3 Ete ne tahatui.

⁷ Ampafe Herodesi dererai na gefora deyo, "Fianai aino butang weai we wobua fo mani ambori yohong kaririai ki."

⁸ Ainanaya inang deu-nauwi ampafe da wa medu deyo, "Bohong Yohanesi mano webaptisi kaiwasa foi nunggamieifo we yau, biaini na rewangguai timba bei."

⁹ Herodesi tarao kaiwofe nanai enerorongfoi fitu-ayai paria, manamo gefora kawuru na mano wenotisa fosa euremireafoa. Ampafe demi ne inontaraifosa enari kariri fianai aino kamitung-foi dawi wea fo.

¹⁰ Ainanaya demi ne inon-taraifosa era wa eferangkutu Yohanesi rahanangfoi na aitamu rorong fo.

¹¹ Ebiaing nunggamieifo na rewangguai timba bei, ehari ma etohoni we kamitungfoi, ainanaya kiaria dohoni we inanai.

¹² Mayeai Yohanesi ne inontarai erariati fosa era wa eha Yohanesi nehofoa esarayai, ainanaya era wa eteisaha finanai we Yesusi.

Yesusi dohong inontarai ewepiaura wering wering (5.000) etampi

(Markusi 6:33-40; Lukasi 9:10-17; Yohanesi 6:1-13)

¹³ Yesusi tarao finanafo i tuti ne inontarai ewesuraya mandu fosa epusuhiaw weru kaiwasa bitoya foi era wa eta wafeaia, etafai to katai minano bei. Wape kaiwasa bitoya foi etaramioai tonanafo, ea kontai era weru

ene bendarifo era na rei ria Yesusi.

¹⁴ Etafaia sobu nafarengfo Yesusi biari arei mani, deti kaiwasa bitoya foi we era kawuru ma enayai na nanai, detisa tonanafo arosa paria ampafe niari mano emaninang fosara etanteng.

¹⁵ Ramindenara mani ne inontaraifosa eraoia etutani eteyo, "Ramindena ampa, katainei minano, ampafe mahikai mani Dai bemi inontarai ninisa etaraberasta to, ambori ewawori fiangfeai na munue wa kahefang na ninai weai we etang."

¹⁶ Manamo Yesusi yoa wesa deyo, "Wiro era kaha, mae todoni kontaio meaino metohong fiang we etang."

¹⁷ Ainanaya eroa we Yesusia eteyo, "Amene roti ring tuti diang mandu kawuru."

¹⁸ Ampafe Yesusi medu deyo, "Meha rotiwa tuti diangwa suru we yau ma."

¹⁹ Ainanaya demi kaiwasa bitoya fosa eminohi na ninoi wowong fo, mae kia roti ring fo tuti diang mandu fo, fioai ureng deti to rorafaisi tuti dutang tuti fiangfo we Al-lai. Mayeai fiobabau rotifo na warangfo dohong roti tuti diangfo we ne inontaraifosa ambori etatorai we kaiwasa bitoya foi.

²⁰ Tutu kaiwasafoi dampiao memosi beyari. Mayeai Yesusi ne inontaraifosa efanduhi fiang seari foi aha mani, dangno bayai suraya boru sefang.

²¹ Kaiwasa fuba Yesusi dohoni dampi nani mani,

ewepiaura wering wering (5.000) nana mani titou mangfosa tera finana, wiro ato tamu wiwing tuti arikang fosa kaha.

*Yesusi da na mereha wowongfo na rurufoi
(Markusi 6:45-56; Yohanesi 6:14-21)*

²² Mayeaia mani Yesusi demi ne inontarai ewesuraya mandu fosa etau wafo etafaifafong to ruru eneung dowej foi ahawaru, mae arahio demi kaiwasa bitoya foi daraberahi aha.

²³ Kaiwasa bitoya foi era wa nanai, Yesusi meiri dautai to wiwoi bei na nanai ayai we wenadi nayai. Dirua mae Yesusi meiri na nana wo.

²⁴ Mae ne inontaraifosa etafaia sobu rurufoi rabuangna mani, andeisafoi miung wafoi paria, weo etapa kare wanang fiabai foi fefe.

²⁵ Dirufoi waroia rerai we aha rorong, tarahio araha ureng botoru, Yesusi bia da na mereha wowongfo wesara.

²⁶ Na kutu ewatiaoai we da na mereha wowongfo wesa ma nanai, ematai paria tuti ebibe eteyo, "Wori di wani!"

²⁷ Wape Yesusi sikahera medu wesa deyo, "Mematai fanai! Menemitawanai, we Yau ne!"

²⁸ Ainanaya Petrusi medu deyo, "Sengne wau! Tarai wau aranane mani, bemi yau ira na mereha wowongne we wau mau."

²⁹ Yesusi yoa deyo, "Ro ma." Ainanaya Petrusi bia

weru wafoi, da na mereha wowongfo we Yesusia.

³⁰ Wape Petrusi detioai we wanangfoi siayai weandeisa karerai nanai niuruainso wanangfoi we fibai karerai amparef mitai, wedaya deisui aweu, tuti bibe deyo, "Sengne wau, fata yau!"

³¹ Na kutu nanai Yesusi si warangfoa yuti mae medu wei deyo, "Petruse, inontarai roasoai turura kaha di wau. We fianie enemurorongwai soriru we yau nina?"

³² Ainanaya urautai ruhiae to wafoi ayai, tuti wanangfoi meringna.

³³ Ampafe ne inontaraifosa esomi aweu ewatai, mae emadu eteyo, "Tarai we wau mani, Allai ne Kaisung di wau."

³⁴ Ewoa sobu ruru eneung dowej foia mani, etarafui na nafareng Genesareti.

³⁵ Kaiwasa bitoya fosa ewatiaoai we Yesusi dine, amparef etanatu kaiwo to munue wa rurang bendarifo tantenang tuti eha inontarai emaninang fosa we Yesusia.

³⁶ Tuti etutang Yesusi we kadono yoa wesa we ewaramifo disangso te ne ansung awerengfo ki, tuti inontarai emaninangno enari tonana fosa ebengna ehiaia.

15

*Koang Farisifosa esobuai na werengfosa foi wedaya kaiwasa niari roang Allai ne Hukumifoi
(Markusi 7:1-23)*

¹ Mayeai inontarai ewe-Farisi meneiru teai tuti mantaunau Kaiwo Musai soi fosa, era na bendari Yerusalem we Yesusi ma etutani eteyo,

² "We fiani e nemu inontarai eraria wau nesa etohong sara tane koangno weriria na tane werengfosa ma foi nina? Amani wiro eruai ewaramiwa kariri tane koangfoi kahai mae, etampi tuti ewarami werarika nanaifa nina?"

³ Manamo Yesusi yoa wesa aha deyo, "We fiani e mea kontai metohong sara Allai ne Kaiwo demi mea we metohong kariria fo kontai nina, ambori metohong kariri koangno weriria na mene werengfosa ma foi nina?

⁴ Weo Allai medu deyo,
'Mesomi we mene dai tuti ai,'*

tuti,
'Mandoni dino deikang-gani ne dai ete ne ai mani sodai aiboi marareha fo.'

⁵ Wape mea mani metaunau fi siaio na mene koangfo, amani meteyo, 'Mandoni dino medu we ne dai ete ne ai deyo, "Fianai aino nehu ne, amani fi we yerara dai tuti ai muru naya ne, yohonai kawuru we Allai ampa,"

⁶ inontarai tonana nei kesau weru somi we ne wawafo suru na ne niari tonana fo.' Na metaunau tonana ne, menemitatura Allai ne Kaiwone mae metohong

kariri koangno mantaung mea menariri foi.

⁷ Mea mani inontarai menari fayafayarai di mea, fianai aino Allai medurai ria nabi Yesayai kariri mea fo wetarai ampa,

⁸ amani medu deyo,
'Inontarai ninisa esomi we Yau na eboromirawa arora,
wape na enemirorong-foi niyai waroi weru Yaua.

⁹ Ene esomi we Yau fo wiro wifiea kaha,
aunau etaunau we kaiwasa etohong kariria fo mani,
inontarai nuneisa
ene aunau fine terai,
wiro nehu aunau fine kaha.'**

¹⁰ Ainanaya Yesusi sahu kaiwasa bitoya foi ma medu wesa deyo, "Metarami nari kaiwone tuti metafurai na mai.

¹¹ Fiango taukaharai na fino taboromine to taenemifuisi afui ne mani, wiro kia rarika we tata ambori tamasi kahai na Allai arongreafo kaha, mae ne kawariai na taborominei mandie fo aino kia rarika ne tuti wedaya tamasi kahai na arongreafo ne."

¹² Ainanaya Yesusi ne inontarai erariati fosa era weia tuti emadu wei eteyo, "Daie, boitawana kahai we kaiwo modura wa disang Farisifosa paria?"

¹³ Yesusi yoa aha deyo, "Fitantanang kiaio Dai na rorafaisi sanang kaha fo

* ^{15:4} Keluaran 20:12; Ulangan 5:16

* ^{15:9} Yesayai 29:13

* ^{15:4} Keluaran 21:17; Imamat 20:9

mani, todoni kontaio fiatting
tuti newafoi kiai rai, wiro
kutea naya kaha.

¹⁴ Wiro menemtitou we
Farisifosa fanai, weo ea
mani inontarai euremifafao
ewiwiaing kaiwasa saine.
Masino inontarai urengafa
foi bingno weurengafa
manei mani, ambori utau
ruhiae tono kamirei bei ki.”

¹⁵ Ainanaya Petrusi medu
aha deyo, “Daie, boikariri
bau fiywansoai nini we
amea.”

¹⁶ Yesusi medu deyo, “Mea
kontaio metafu fiywansoai
nini konta kaharai e?”

¹⁷ Wiro mewaitawana kahai
we fianai aino taukaharai
na taborominei biari to taen-
emifuisi mani ambori takaherai
sayarai aha ne ne? Finanai
wiro kia rarika na Allai
urengreafo we tata kaha.

¹⁸ Wape fianai aino
kawariai na taboromine,
amani kaiwoariri fuba
tamaduri nei, finanai
kawariai na taenemirong-
fuisi mandiei. Tuti finanai
aino kia rarika we tata ne.

¹⁹ Weo na taenemirong-
fuisi, taenemittuui ne kari-
rafo, tatohong we tamung in-
ontarai, tanai ria wiwing ete
mang siai, tamaninawa funo-
mai, tahamananapi, tapam-
pamu, tuti tatairiri inontarai
siae.

²⁰ Fi tonana ne aino kia
rarika we tata ne, wedaya
tamasi kahai na Allai aron-
greafo ne, mae tatampi tuti
tawarami taruaisi kaharai fo
wiro kia rarika we tata kaha.”

*Wiwing Kanaani wiro
Yahudi kahaio yoasoai na mai
(Markusi 7:24-30)*

²¹ Mayeai Yesusi da weru
katai nani to katai na bendari
Tirusi tuti Sidoni.

²² Na nanai wiwing
Kanaani manei da we Yesusi
ma, tuti medu wei sahu deyo,
“Sengne waune, Dauti ne
Kaisungne waune, aromuo
yau! Weo nehu kamitungfoi
nuaninu karira dohoni tuti
dohonifo maraba paria.”

²³ Wiwingfoi sahu tonanai
ki wape Yesusi fiobai borong
kuteai wei kaha. Ainanaya
ne inontarai ewesuraya
mandu fosa era kefania
etutani eteyo, “Daie bemi
wiwingfoi da weru tatara.
Weo i da ria tata mae kehobu
paria fefe.”

²⁴ Ampafe Yesusi yoa we
wiwingfoi deyo, “Allai demi
yau terai we inontarai Israeli
fosa, weo ene tarai toyario
domba niai weru ne bitoy-
afoi.”

²⁵ Manamo wiwingfoi da
kefang Yesusia tuti disang
kapa awebuka mae medu
deyo, “Sengne waune, fata
yau!”

²⁶ Ainanaya Yesusi yoa wei
deyo, “Beng kahai we ka rotio
mainenamai we arikangnesa
we etangfo, ka aha kabioai
we fiawerafosa aha fo.”

²⁷ Manamo wiwingfoi yoa
aha deyo, “Sengne waune,
tarai, wape fiaweranesa
kontaio etang roti nukahaio
tarirawai na mejafoi aweufo
kontai.”

²⁸ Ampafe Yesusi medu
wei aha deyo, “Wiwingwa
wau, nemu roaso yau we
Mananu Mampariri wa fuba
paria. Ampafe fianai aino

butang wea wa wobuai kaririai ampa." Tuti na tatofang kutu nanai kontaio ne kamitungfoi denteng.

Yesusi niari kaiwasa emaninang bitoya ebeng
(Markusi 7:31-37)

²⁹ Yesusi da weru katai nanifo, da wa werurang na nafareng na ruru Galilea foi. Tuti da wa dautai to wiwoi bei ayai minohi nai.

³⁰ Ainanaya kaiwasa bitoya paria era wei ma, eha inontarai emaninang bitoya, amani inontarai era esoberaha fosa, mano euremifafa fosa, mano efaya fosa, mano eboromitamu fosa tuti mano emaninang siai wei fosa kontai. Kaiwasa fuba nani kiai ehasara eminohi na Yesusi awerengreafu tuti niarisa ebeng.

³¹ Ampafe kaiwasa fuba era ma nanisa epapuhung paria we ewati terai na euremireafu we inontarai anta eboromitamu fosa emadu aha, mano era esoberaha fosa era mimoya aha, mano efaya fosa etoa era, tuti mano euremifafa fosa ewati aha. Ampafe etaparanding Allaio inontarai Israeli fosa esomi wei foi.

Yesusi dohong fiang we inontarai ewepiaura wering webea (4.000) fosa etampi
(Markusi 8:1-10)

³² Mayeai Yesusi sahu ne inontarai ewesuraya mandu fosara, medu wesa deyo, "Arohuo kaiwasa bitoya nini paria, weo we rahida botorua fininai enayai na ninaipampang ria yau, tuti ene

pari fiang we etang ampa. Ampafe imaya we yemisa etaraberasa na enemirorong kehabi to ene munu rorong fo aha kaha, weo nana mani ambori maneua etawai na rang rabuang ki."

³³ Ainanaya Yesusi ne inontarai ewesuraya mandu fosa emadu wei aha eteyo, "Daie, na katai wewui tonina nei wori, tasobu fiangfeai fuba we demoya kaiwasa fuba nini rai e?"

³⁴ Yesusi dutansa aha deyo, "Meha roti beiru wa?" Eroa wei eteyo, "Itu tuti diang katui kutu maneiru teai kontai."

³⁵ Ainanaya Yesusi demi kaiwasa bitoya foi eminohi na kahofa nuwowongfo.

³⁶ Mayeai kia roti itufo tuti diangfo sitoru, dohong mahikai we Allai. Ainanaya fioabau rotifo tuti diangfo, mayeai dohonaio ne inontarai ewesuraya mandu fosa, tuti etatorai we kaiwasa bitoya foi we etang.

³⁷ Kaiwasa bitoya foi etampi paria emamosi, mayeai ne inontarai ewesuraya mandu fosa efanduhi fiang sea foi aha mani dang nawang fiabai itu sefang aha.

³⁸ Kaiwasa fuba dampi nani mani, ewepiaura wering webea (4.000) nana mani titou mangfosa tera finana, wiro ato tamu wiwing tuti arikang fosa kaha.

³⁹ Mayeai Yesusi demi kaiwasa bitoya foi etaraberasa to ene munufo aha, mae I tuti ne inontarai suraya mandu

fosa etautai to wafeai tuti etafai to katai watai kefang we bendari Magadania.

16

Farisifosa tuti Sadukifosa etanggoa Yesusi we niari fiainawiai bei kariri mantauni
(Markusi 8:11-13)

¹ Mayeai Farisi tuti Saduki manea era we Yesusi ma, we eweanggariri. Ampafe etutani we niari fiainawiai na rorafaisi bei wesa, ambori ewaitawanai we i mani da na Allai ma.

² Wape Yesusi yo wesa deyo, "Wofoi sawa mani mewati kafafe na rorafaisi berika, nana mani metaroanai meteyo kameai mani wo pia rai.

³ Tuti na kameaifo, wofoi dautai mewati rorafaisi berika tuti wekafafe paria, nana mani meteyo rahida nini weroharira rai. Mesawai paria we metaroang fi na rorafaisi tonanai, wape fi kawariai na rabuang bonini fo wiro mewaitawang metaroangna kaha.

⁴ Kaiwasa fuinini mesai-paya paria tuti mehuru-mitare mene Sengfoi, ne tarai toyari mang manei kurutare ne wiwingfoi tuti dohong we wiwing siai. Metutang we inari fitantumafeai we fiainawiai we mea kariri yau. Wape wiro inari fitantuma siai fea kaha, mae fianai aino mewaitawana na nabi Yunusia fo terai." Yesusi medua kai nanai da weru sara.

Yesusi deunau ne inontaraifosa we etanansiau

wedua Farisi tuti Sadukifosa ene aunaufo
(Markusi 8:14-21)

⁵ Na kutu etafaia sobu ruru eneung dowej fo nanai, Yesusi ne inontaraifosa arahio earomioai we eha pari roti.

⁶ Na siari nanai kontaio Yesusi medu wesa deyo, "Mewaitawang weduarai tuti metanansiau we ragio na Farisifosa tuti Sadukifosa foi."

⁷ Yesusi ne inontaraifosa etarami medu tonanafo, emadu wawerasa eteyo, "Tarahio deitawanai we taha pari rotine ampare medu tonanai nina."

⁸ Wape Yesusi deitawang kariri fianai aino emadura fo, ampare medu wesa aha deyo, "Inontarai meroasoai turura kaha di mea. We fianie memadu wawera mea kariri meha pari rotife nina?

⁹ Metaroana kaharai e? Mearomiporo fitantuma raminde inari na roti ring fo we kaiwasa ewepiaura wering wering fosa (5.000) etangfo ampa ne? Tuti seafoi dang bayai beiru?

¹⁰ Tuti na roti itu fo we kaiwasa ewepiaura wering webea fosa (4.000) etangfo ne? Tuti ne seafoi dang nawang fuba beiru?

¹¹ Todoni fino metafu nehu kaiwone na mai kahai nina? Wiro rotifo aino imadu kariria ne kaha, mae fi imadu kariria fo mani yeyo, metanansiau we ragio na Farisifosa tuti Sadukifosa foi."

¹² Yesusi medu tonanai wesar fo, arahio ewaitawanai

we fi deretawansa wea fo mani, wiro we ragio nari roti naya foi kaha, mae we Farisi tuti Saduki fosa ene au-naufo. [Weo etaunau we I mani wiro Allai demi we we-Mananu kaha fefe.]

Petrusi meduairai kariri Yesusi mani, Mananu Mam-pariri dine

(*Markusi 8:27-30; Lukasi 9:18-21*)

¹³ Mayeai Yesusi da weru katai nani to katai kefang we bendari Kaisarea Filipi foi. Na nanai dutang bera ne inontarai erariati fosa deyo, “Kaiwasa bitoya foi emadu eteyo Kaisung Inontarai nei mani, mandoni dine?”

¹⁴ Ampafe eroa wei eteyo, “Manea eteyo Yohanesi mano webaptisi kaiwasa foi di wau, manea kontai eteyo nabio Eliai di wau, tuti manea kontai aha mani eteyo nabi Yeremiai di wau ete nabi siai fo manei di wau.”

¹⁵ Ainanaya Yesusi dutang barisa deyo, “Wape na mantaung mea mani meteyo mandoni di yau?”

¹⁶ Ampafe Simon Petrusi yoa wei aha deyo, “Daie! Wau mani Mananu Mam-pariri fi di wau, Allai mano darang we fitawafa foi ne Kaisung di wau.”

¹⁷ Ainanaya Yesusi medu we Simoni aha deyo, “Simoni, Yonai antungne wau ne, wobu ne maine paria. Weo fianai aino modurai ninai, wiro inontarai batang manei dino deisaha kaiwo nanai we waune kaha, mae Dai na rorafaisi andino deisahara ne.

¹⁸ Ampafe imadurai we wau yevo, wau mani wonomu fino Petrusi, nana mani neta we kamiei mitubaru. Ampafe kariri kamiei inontaraifosa enariri we ebaung ene munufo sauwi fo ambori munufoi mitubaru, yau kontaio ibaung nehu jematinen na kamiei bonani [amani na kaiwo tarai modura wa nanai]. Ampafe mararehafoi ne mambiriuo kontai ki wape wedayari sawa kaha.

¹⁹ Wauno ambori yohong rahutu to Allai ne Mananu rorong fo ne aisupo we wau ne. Ampafe fiani aino boiayarai na nunei mani, Allai na rorafaisi kontai deiayarai, tuti fianai aino roa weai na nunei mani, Allai na rorafaisi kontai yoa weai.”

²⁰ Ainanaya Yesusi deretawansa we dohonao ewuwuai we kaiwasa siai foi kariri i we we-Mananu Mampariri fo fe.

Reantenang pari Yesusi medu kariri ambori sodai dadirafo tuti mirehafo

(*Markusi 8:31-9:1; Lukasi 9:22-27*)

²¹ Na rahida bonani to fongna fo, Yesusi meduraia kasau we ne inontarai erariati fosa weo todoni kontaio ambori da to Yerusalem tuti sodai dadira bitoya ria mano ewewafonia fosa, imami baba fosa, tuti mantaunau Kaiwo Musai soi fosa. Tuti ambori emunia mireha, wape werahida botoru aha mani, suwi na marareha rorong foi aha ki.

²² Manamo Petrusi yabi berahi to fui tuti suari deyo,

“Sengne waune, kadono Allai warasaya ne tonanafo weru wau, ambori finanai wodaira fanai.”

²³ Ampafe Yesusi deti berahai we Petrusi tuti suari deyo, “Ro weruai, wiro we Saminseni fanai. Weo nari toyari Saminsenie, rurai we weang-gari yau ambori itawai tuti inari kariri Allai ne dawiane kaha fefe. Fianai aino enemutituaita ne, enemutituaitai kariri wau na weinontarai batang, wiro kariri finanai aino Allai enetituaita fo kaha.”

²⁴ Ainanaya Yesusi medu we ne inontarai erariati fossa deyo, “Mandoni dino deyo daria yau mani, deiaya mantauni fi dohong weai na nunei fo, tuti sodua ne aitabafoi, amani meinenaang we sodai dadira kariri yau, tuti daria yau pampang.

²⁵ Weo mandoni dino de derara mantauni ne ansengfoi sewa weru daria yau mani ambori ne ansengfoi wioru ki, mae mandoni dino na nufi ninai enewawu yau awao wonohune wedaya tarahi mireha kontai ki, i ambori sobu numainufo ki.

²⁶ Weo manei yurai we sobu nunei sentenang, wape ambori nuainufoi wioru tuti sobu numainufo kaha mani, we fianie yurai karerai nina? Tuti fianai aino dohonai we yiwang nuainufoi nai aha fo?

²⁷ Weo Kaisung Inontarai nei ambori daraberahi to nunei aha ma na Dai Allai ne sambewaraio dedai fo tuti ne wewai rabuangfoi ma ki. Rabuang bonani

ambori dohong fiembaitafo we mansiari-mansiari kariri fi niari fo, beng ete karira.

²⁸ Tarai, imadu we mea mau yeyo, na mano metoari na nina ne mea, manea wiro emarareha kahai paria ewati Kaisung Inontarai nei daraberahi we Mananu na ne Mananu rorong fo ma.”

17

*Sempaisi deparanding
Yesusi na uai wowongfo
(Markusi 9:2-13; Lukasi 9:28-36)*

¹ Werahida wonang aha mani, Yesusi kia Petrusi, Yakobusi tuti ne tahatui Yohanesi suru, itorautai to uai dedai bei nuwowongfo ayai. Na nanai itomeiri sitoru kawurua.

² Ainanaya na tantuma Yesusi ne taraifoi yiwani siai aha na itouremireafo. Urengfo sambewarai toyari wo tuti ne ansung satara fo bua karofaria kaiwewa.

³ Mayeai na tantuma itowati Musai tuti Eliae uroa umadu riati.

⁴ Ainanaya Petrusi medu funomai we Yesusi deyo, “Sengne waune, mahikai paria we tanayai na katai nini. Ampafe maya mani, inari warumai botoru we muntoru, amani bei we Dai wau, bei we Musai, tuti bei we Eliae.”

⁵ Petrusi doa medu tonanai mae, na tantuma kafafe biua karofari bei sea ma sorusa. Na kafafe rorong fo rawafui bei medu deyo, “Nehu Kaisungno enehuwawuti

fi dinini, andino kia enehurorong fine. Metaramidi-dauwi."

⁶ Yesusi ne inontarai kia sitorufo sitoru itotaramio rawafuifoi nanai itotau aweu itorisang itorewomifo na kahofafo we itomatai paria fefe.

⁷ Ampafe Yesusi da we sitorua tuti suba warake-hafoia disang sitoru mae medu deyo, "Muntoroa bari muntoru, muntomatai fanai."

⁸ Mayeai itofoai itouremi itowatia mani, itowati manei ahang kaha, mae Yesusi meiri terai.

⁹ Itobiari na uai nu-wowongfo aweufo nanai, Yesusi deretawang sitoru deyo, "Fianai aino anta muntowatioai nanai, dohonao muntoraisaharai we manei fe, mae nayai kio Kaisung Inontarai nei suwi na marareha rorong foi aha ma akawuru wo."

¹⁰ Yesusi ne inontarai kia sitoru fo itorutang berahi aha itoreyo, "Tonana mani we fiani e mantaunau Kaiwo Musai soi fosa eteyo, todoni kontaio Eliai da fafong ma akawuru wo?"

¹¹ Ampafe Yesusi yoa we sitoru aha deyo, "Tarai, Eliai ambori da ma we meineng maino fifiani kontai ki.

¹² Wape imadu mau yeyo, Eliai da kawuru ma ne, wape inontaraine etaroansoi kaha tuti enari kanggan kariri ene etawiafo. Kaisung Inontarai nei kontai ambori sodai dadira tonanai na ewarami rorong fo kontai ki."

¹³ Yesusi medu tonanaia fo, arahio ne inontarai kia sitoru fo itowaitawanai we fianai aino medura fo, medu kariri Yohanesi mano webaptisi kaiwasa foi.

Yesusi niari arikang nuaninu karira dohoni manei denteng

(Markusi 9:14-29; Lukasi 9:37-43)

¹⁴ Yesusi tuti ne inontarai kia sitoru fo itorarabera sitoru to kaiwasa bitoya foia nanai, inontarai manei da we Yesusia tuti disangkapa awebukafo na arongreafao.

¹⁵ Tuti medu wei deyo, "Sengne waune, aromuo nehu kaisungfoi wo, i sodai maninangno kerira paria. Maninang ureng marareha arora foi dohoni wana mani, ne taraifoi tiapa beyari tuti kawauuai tipu na borongfo. Wedaya ea mani saukaha adia rorong fo tuti to mereha rorong fo.

¹⁶ Ikari kawuru to nemu inontarai eraria wau nesa ampa, wape wiro ewemambiriu we enariri denteng kaha."

¹⁷ Ampafe Yesusi medu we ne inontaraifosa deyo, "Meai arana ne? Kaiwasa fuinini mea, tarai Weinontarai meroasoa di mea kaha tuti mera sarawai. Inai rahang mea tuti itawang yau we mea pari kidoni wori meroasoai ki? Meha arikangwai ma."

¹⁸ Na tapapa Yesusi sua nuaninu karira foi ambori da to boriei weru arikangfoi, tuti na kutu siari nanai kontaio denteng.

¹⁹ Mayeai Yesusi ne inontarai erariati fosa titousa era weia, etutang bera Yesusi aha eteyo, “Daie, todonie amebiriu we ametata nuaninu karira foi kahai ninai?”

²⁰ Yesusi yoa wesa deyo, “Fio wedaya mebiriu we metata nuaninu karira nani kaha ne mani, wiro meroasoai turura kahai. Weo tarai, imadu we mea mau yeyo, sawi bongnei mani ketui paria, wape masino meroasoawa fuba kariri sawi bong bei mani, memadu we uai bei we tifatingna doari na katai siai bei mani, nana mani kaririai ki. Tuti fitantuma todoni feai kontaio menari ki. [

²¹ Wape nuaninu karira ne tarai tonina nei mani, metatari na mewenadi tuti mewepuasa terai.”]*

Yesusi deikariri kariri mirehafo aha

(Markusi 9:30-32; Lukasi 9:43-45)

²² Na rahida bo Yesusi tuti ne inontarai erariati fosa efanduhisa na Galileafo, medu wesa deyo, “Kaisung Inontarai nei ambori etawayani to mano eharira fo ewarami rorong fo ki.

²³ Tuti emuni mireha, wape rahida botoru foi ambori suwi aha ki.” Ampafe ne inontarai erariati fosa enemirorong fituayai paria.

Yesusi biai doi pajaki we Sempaisi ne Munufoi

²⁴ Na rahida bo Yesusi tutu ne inontarai erariati fosa era wa sobu bendari

Kapernaumi fo, na siari nanai mano efanduhi pajaki we Sempaisi ne Munufoi manea, era we Petrusia etutang berahi eteyo, “Nemu Mantaunafoi biai pajaki we Sempaisi ne Munufoi ete bireri e?”

²⁵ Ainanaya Petrusi yoa wesa deyo, “Yo, biai kontai.”

Ampafe na kutu Petrusi daraberahi to munu Yesusi minohi nai foia fo, Yesusi dinteuwi deyo, “Simone, enemutiuai tofino? Mandoni dino biai pajaki ete barasteng we mananu nunei sa ne? Mananufo ene inontarai ene katai na nana fosa ete inontarai aiseio enayai na nana fosa re?”

²⁶ Petrusi yoa deyo, “Inontarai aisei nesa.”

Ampafe Yesusi yoa deyo, “Tonana mani mananufo ene inontarai bitoya fosa wiro ebai kaha.

²⁷ Wape ambori enemirorong pirahai we tata kaha mani, ro to ruru rausia we tukai nai. Ro arau mani diang mano foti reantenang wai mani, doi nayai na borongfe wa. Ampafe fobai borongwai tuti ka doi nanai ma we bai pajakio etutang wea fo nayai. Doi nanai demoyarai we bai pajaki we wau tuti yau nayai.”

18

Mandoni dino fiabai na Waidani ne

(Markusi 9:33-48; Lukasi 9:46-48, 17:1-2)

* ^{17:21} Na reraung beiru teaio esoi riwanai kariri buku Matiusi fo obu arawangno 21 nini ne, wape tarahi na ne asli pari fo arawang bonini wiro obui kaha.

¹ Na rabuang bonani Yesusi ne inontarai dirisa fosa era wei ma, etutani eteyo, "Daie, mandoni dino fiabai sewa na nemu weMananu rorong fai ne?"

² Ainanaya Yesusi sahu arikang katui manei ma tuti dohonia doari na earomireafo.

³ Medu wesa deyo, "Tarai, imadu we mea mau yeyo, mandoni dino wiro yiwang enerorongfoia ne tarai kariri arikang katui nini kaha mani, wiro suai to Allai ne Mananu rorong fo kaha.

⁴ Tonana mani, mandoni dino yiwang enerorongfoi tewawa kariri arikang katui nini mani, andino fiabai sewa na nehu Mananu rorong fai ne.

⁵ Mandoni dino demang we arikang tonina nesa na mai na wonohune mani, wenanai demang we yau kontai.

⁶ Wape mandoni kontai, andino wedaya inontarai toyari arikang fininisa, amani mano eroaso yau nesa manei, niari sasari, nana mani ne mahikai sewa we wenani mani, kase kamiei fuba bei na rahanganfo tuti kabioi deisui na rawanang rausi.

⁷ Karira pari we inontarai na nuneisa weo fi wedaya enari sasari fo bitoya paria. Tarai, we finanai kawariai na nunei, wape mano wedaya inontarai eroaso yau ahang kaha mani, sodai ne karirafu paria.

⁸ Masino waramuwa ete awemuwa wedaya sasari we wau mani, ferangkutuai tuti kobioi weru wau. Weo ne beng sewa we wau fo mani, wobu numainufo na waramu ete awemu kaburufo, weru waramu tuti awemu fo nayai masi wape taukah Adia danggararu we fitawafa foi fo.

⁹ Tuti masino uremuwa wedaya sasari we wau mani, ketafatini kobioi weruai, weo ne beng sewa we wau mani wobu numainufo na uremu boyari fo weru uremufo unayai ruhiae wape ambori taukah Sorohao Adia rorong foi fo."

Fiyiwansoai kariri domba niai
(Lukasi 15:3-7)

¹⁰ "Metanansiau we dohonao mesahutawang inontarai katui ninisa manei fe, weo wewaio ewaitawang weduasa fosa enayaia mutu na Dai Allai urengreafu pampang. [

¹¹ Weo Kaisung Inontarai nei da ma we feriri inontarai era saiworua fosa.]"

¹² Menemitituai tofino? Manei ne domba ewepiaring, manamo manei da sarawai ampafe niai, nana mani dohong todoni rai? I wiro niyai deitawang ne domba ewemansiri konta reti piaring fosa ahang kaha, mae todoni kontaio sawing ne efaufosa enayai na wiwoifoi mae da sera we mansiario niai foi.

* **18:11** Na kaiwo asli pari fo mani, wiro obu kaiwo rabuang bonini kaha.

¹³ Tuti tarai, imadu we mea mau yeyo, masino sobui aha mani, piraisefo fuba sewa aha weru piraise we ne efau enai kaha fosa.

¹⁴ Dai na rorafaisi kontai ne tarai tonana. Miaya we inontarai katui toyari arikangfesa ninisa manei niai werui kaha.”

Tane doroi dohong sarawai we tata mani, tato-hong fiani wei aha e?

¹⁵ “Mane nemu doroi manei niari sarawai we wau mani, ro wei tuti na titou muru teraio wuari boinawi we fi sarawaio niari nanai. Masino tarao wau mani, wobui we nemu doroi dine nariai aha.

¹⁶ Wape tarao wau kaha mani, ka nari inontarai itowemandu ete mantoru teai aha we ambori itomaduairai kariri ne kaiwo mumadura wa kontai am-pafe na fifiani kontaio wiro enemiwawera weai ahang kahai, mae tarai dohong sarawai.

¹⁷ Mae masino tarao sitoru konta kaha mani, ka kaiwofo aha modurai na jemati earomireafo aha. Tuti masino taraosa konta kaha mani, wahui we i inontaraio deroanso Allai kaha dine, ete toyari wefianduhi pajaki we parenta Roma foi dine.

¹⁸ Tarai, imadu we mea mau yeyo, fianai aino na nunei meteyo enari fanai, Allai kontai yoa weai tonanai na rorafaisi. Tuti fianai aino meroa we enari na nunei,

finanai Allai yoa weai kontai na rorafaisi.

¹⁹ Tuti meroasoai kontaifa weo, na nufi ninai uwemandu na mea uenemiro-rong boyari we fieai tuti uwenadi urutang tutirai we Dai na rorafaisi, nana mani todoni kontaio Dai yoa we une nadi nani ki tuti dohong kaririai ki.

²⁰ Weo na doni kontai uwemandu ete mantoru itofanduhi itoru na wonohune mani, na nanai inayai rahansa kontai.”

Fiyiwansoai kariri oiai in-ontarai siai ne sasarifo

²¹ Mayeai Petrusi da we Yesusi ma tuti dutani deyo, “Sengne waune, masino nehu doroi manei niari sarafieai pampang we yau, nana mani paria webeliru yeiai ne sarawai nana ne? Paria sobu we beitu e?”

²² Yesusi yoa wei deyo, “Bireri. Imadurai mau yeyo, wiro webelit u tera kaha, mae wepiatorua sura webelit aha tuti sewa nanai aha.

²³ Weo Allai ne weM-ananufo mani, ne tarai kariri mananu manei deto kariri ne doio ne mangfata baba fosa eha fo.

²⁴ Rahida bo deto kariri ne doifo nanai, ne mangfata erufi wei fosa eha mangfata mano kia ne doi foi ma doari na arongreafo. Wenani kia doi bitoya paria (10.000 talenta[†]) wape wiro biaita karhai.

[†] **18:24** Doi nanai wonong fino talenta, bei mani ne harga dedai paria kariri aderi bei sefang na emasi.

²⁵ Wemambiriu we yiwang ahang kaha ampare mananufoi dohong kaiwo we ehari tuti ne wiwing, ne arikang, tuti ne ra minohi tutiri foi kiai we etawayanai, ambori doifo we yiwang ne doi kia fo nai aha.

²⁶ Ainanaya mangfatafoi disangkapa awebuka na mananufoi arongreafo, mae dutanai paria deyo, ‘Daie, kadeo bohong rahida we yau wo ambori iriwang nemu doine ki.’

²⁷ Mananufoi aroi ampare deiairi we wiro yiwang ne doi kia fo ahang kaha tuti sawini da wa.

²⁸ Mangfatafoi da to boriei weru munu mananu foia nanai, tate ne maniwowirio wemangfata kontai manei. Mangfata mano siai nani kia ne doi fuba turura kaha, amani doi dinari[‡] piaring (100 dinar) mae biaita kaharai. Ampafe yutawang mangfata kia ne doi dinari piaring nani tuti yukota rahanang mae medu wei deyo, ‘Bai kahai nehu doiwa.’

²⁹ Ainanaya mangfata mano mandu foi disangkapa awebuka aweu wiatai na arongreafo mae medu deyo, ‘Maniwowire, bomang kuteai ambori iriwang nemu doiwa ki.’

³⁰ Manamo mangfata mano ne doifoi nani medu wei deyo, ‘Ye yemang aha kaha.’ Ampafe demi ne inontarai eharia esoari to aitamu rorong foa wiatai nai paria yiwang ne doifoa kai.

³¹ Fianai aino mangfatafoi niari tonanai we ne doroifoi nanai, mangfata siaio erufi kontai we mananufoi manea ewatioai, ampare enemtituai weai paria dohona mani era wa eteisaharai we mananufoi kariri fianai aino ene doroi mangfatafoi niari nanai.

³² Ainanaya mananufoi sahu ne mangfata niari tonana foi ma medu wei deyo, ‘Wau mangfata woipaya di wau! Nehu doi bitoya paria ka fo yeiairai we wiro baitai ahang kaha, weo ro ma womi na arohureane we yohong rahida we waupo.

³³ Todonie arohu wau tonanai, wape wiro aromu nemu doroifoi kariria kahai nina?’

³⁴ Mananufoi kesou paria ampare demi ne mangfatafosa eha inontaraifoia etohoni to mano eru aiboi fosa ewarami rorong foa, pariao biai bera ne doi anta kiai kiai fo.’

³⁵ Yesusi medua kai mani deituarai deyo, “Kariri fianai aino mananufoi niari we mangfata seipaya foi nanai, mea kontai masino meteiai mene doroifosa na mene-mirorong mesi kahai tonana mani, Dai Allai na rorafaisi kontai ambori niari tonanai we mea kiai ki.”

19

Yesusi deunau kariri mang dira binengfoi

(Markusi 10:1-12)

¹ Yesusi medu deunau kariri fi fuba nani kiaia nanai, da weru Galilea to nu

[‡] **18:28** Doi dinari mani, doi mai we ne fiembaitai rahida bei.

Yudea foi na waya Yardeni dereung dowej fo awaru.

² Kaiwasa bitoya era riati, tuti na wana niari mano emaninang fosa ebeng aha.

³ Ainanaya Farisifosa era kefang Yesusia we eweanggariri, amani etutani ambori deiai Hukumi Musai soi fo. Ampafe etutani eteyo, "Kariri tane hukumi agama nei mani, mangfoi dira binengfoi funomai tonana rai e?"

⁴ Yesusi yoa wesa deyo, "Metatorai na Sempaisi ne Kaiwofo kawuru ampa we na reantenang Allai niari inontaraine tata fo, niari manei wemang tuti manei wewiwing fo ampa.*

⁵ Tuti Allai kontai medu deyo,

'Nanai wedaya mangfoi ambori sawing inang tamang suru tuti weboyari ria ne wiwingfoi,
ambori ne tarai toyari une tarai boyari.*'

⁶ Doni wiro uweboru ahang kahai mae uweboyari. Ampafe fianai aino Allai fanduhiae weboyaria fo, wiro inontarai manei kia taterifa fanai."

⁷ Ainanaya Farisifosa etutang bera Yesusi aha eteyo, "Tonana mani we fianie Musai dohongno hukumi deyo, mang manei dira binengfoi mani dohong te surati dirari foi we binengfoi tuti demi da werui nina?"

⁸ Yesusi yoa wesa deyo, "Musai dohong kaiwofo tonanafo mani, weo deitawanaai we menu-mikamiei mitubaru tuti dadira paria we metaramididau kaiwo aunau fo, ai wedaya mani Musai soi kaiwo kariri metira mene wiwingfosa tonanafo nina. Wape na reantenang Allai niari inontaraine tata fo, wiro tonana kaha.

⁹ Wape imadurai mau yeyo, mandoni dino dira binengfoi mae binengfoi wiro dena ria mang siai kaha, ainanaya dau wiwing manei siai aha mani, wenani niari sasari, amani sasario dena ria wiwing siai fo."

¹⁰ Ampafe Yesusi ne inontarai suraya mandu fosa emadu wei eteyo, "Masino mang tuti binengfoi mani une tarai tonana mani, denteng sewa mani tarirau fanai."

¹¹ Yesusi yoa deyo, "Wiro inontarainesa kiai eroa we kaiwo memaduarai nana kaha, manta mano Allai dirisa tonanai tera fosa ansaino enari kariria ne."

¹² Weo inontarainesa, manea wiro erirau kaha, weo etaubau enumi ma fo ene tarai tonanai, wape manea aha mani, erirau kahai weo fieai ete inontarai siai manea enarikanggani eawemi rorong fo ambori wiro ewemambiriw we erirau kahai tonanai. Tuti manea aha mani erirau kahai we mantaungsa ehutuai tonanaifa we wiro erirau kaha, ambori ehasau we

* 19:4 Kejadian 1:27 * 19:5 Kejadian 2:24

erurai erufi we Sempaisi na ne Mananu rorong fo terai. Mandoni dino wemambiriu we tefu kaiwo nina mani, tefuraia."

*Yesusi mioang arikang
(Markusi 10:13-16; Lukasi 18:15-17)*

¹³ Ainanya, inontarai mane aha ene arikang mane ma, weo eteyo Yesusi yuai warangfoa wasausa tuti wenadi mioansa. Wape Yesusi ne inontaraifosa esuasa.

¹⁴ Ampafe Yesusi medu we ne inontaraifosa deyo, "Metawing arikangwasa era we yau ma, dohonao metei-weduasa fe, weo inontarai toyari arikangfesa nini saino esuai to Allai ne Mananu rorong fo ne."

¹⁵ Ainanya yuai warangfo wasausa tuti mioansa. Mayeai da to katai bei siaia.

Yesusi deunau kariri inontarai ne ra bitoya tuti Allai ne Mananu rorong fo

(Markusi 10:17-31; Lukasi 18:18-30)

¹⁶ Rahida bei inontarai manei da we Yesusia tuti dutani deyo, "Dai Mantau-naune waune, fi beng fianai aino inari we ambori isobu numainufo ne?"

¹⁷ Yesusi yoa deyo, "We fianie butang yau we fianai aino bengfo ninai? Mansiari kawuru andino denteng ne. Wape boyo wobu numainufo mani, bohong kariri te Allai ne Kaiwo dohonai we tato-hong kariria fo."

¹⁸ Inontaraifoi dutang Yesusi aha deyo, "Kaiwo bo dotu todoni fo?"

Yesusi yoa wei aha deyo,
"Wiro mung inontarai fanai,
wiro bena ria wiwing siai fanai,

wiro komananapi fanai,
wiro binggai inontarai na kaiwo wetarai kaha fo fanai.

¹⁹ Womi we nemu dai tuti nemu ai,"*

tuti,

'Enemuwawu inontarai siai kariri enemuwawu bera wau wa.'*

²⁰ Bariboaifoi yoa deyo, "Kaiwoariri fuba nani yohong kaririai kawurua kai ampa, ne doni aino inari tara ne?"

²¹ Yesusi medu wei aha deyo, "Ampafe boyo mosi na munohi toa fo we wobu numainufo mani, ro wa bowayang nemu ra munohi tutira wara kai tuti doiwa bohonai we inontarai ene pari fi fosa, nanaia mani wobu ra na Waidania finanai. Tuti nari tonanaia mani ro ma ro ria yau."

²² Inontaraifoi tarao kaiwo Yesusi medurai wei tonana fo, wiro doari ahang kahai mae da weru katai nani na enerorongfoi fituayai paria, we ne rafoi bitoya paria fefe.

²³ Ainanya Yesusi medu we ne inontarai erariati fosa deyo, "Yeisaharai we mea weo mawa kahai we inontarai ne ra bitoya manei suai to Allai ne Mananu rorong fo ki.

* 19:19 Keluaran 20:12-16; Ulangan 5:16-20 * 19:19 Imamat 19:18

²⁴ Kontai yeisaharai we mea, weo mawa sewa we unta manei suai kaha aniai kamirei bei weru inontarai ne ra bitoya manei suai to Allai ne Mananu Rorongfe fo."

²⁵ Yesusi ne inontarai ewesuraya mandu fosa etaramio kaiwofo nanai epapuhing paria, tuti emadu we Yesusi eteyo, "Tonana mani, mandoni dino mesi we sobu faririfo ne?"

²⁶ Ainanaya Yesusi seitesa mae medu wesa deyo, "We inontarainesa, erurai na mantaungsa kontai mae esobua kahai arora wa, wape we Allai mani, fifiani kontao mawa arora wei."

²⁷ Ainanaya Petrusi medu deyo, "Daie, boti fifiani kontao ametawinaifa tuti ameraria wau, ampefe fiani aino amesobuai ria wau ne?"

²⁸ Yesusi medu wesa deyo, "Tarai, imadurai we mea mau yeyo, na rahida bo nu weworu Allai niariri aha foi da ma mani, Kaisung Inontarai nei ambori minohi na ne kadera mananuo sambewara dedai foi ki. Tuti mea kontai, nehu inontarai mewesuraya manduo meraria yau nini mea, ambori meminohi na kadera suraya boru fo kontai ria Kaisung Inontarai nei, tuti mehutu kaiwo kariri riria Israelio suraya boru fo ki.

²⁹ Tuti inontarai mandoni da weru ne munufoi ete ne

doroi mang foi ete doroi wing foi ete tamana ete inana ete ne arikangfosa ete ne kahofafo, weo daria yau fo, ambori sobu fi sobuai ria Allai fo fuba webepiaring sewa aha weru ne sobuai na nuneifo ki, tuti sobu numainufo.

³⁰ Wape kaiwasa bitoyao na nunei ninai ewefonia fosa ambori enai to kurumifui ki, mae mano na nunei ninai enai to kurumifui fosa ambori ewefoniai ki.*"

20

Yesusi medu yiwansoai kariri weenari romi angguri

¹ Yesusi medu aha deyo, "Allai ne Mananu rorong fo mani ne tarai toyari fiywansoai nini. Inontarai manei ne romi angguri bei. Kameai kutung doari da kameai sera we inontarai we erufi nai.

² Sobu inontaraifo meara, tuti medua futuari riasa we biai we mansiari rahida bei mani, doi dinari bei, nana mani doi mai we ne fiembaitai rahida bei. Ainanaya demisa era wa enari ne romi angguri foia.

³ Mayeai araha ureng indeatara mani, inontarai ne romi angguri foi da nariai aha tuti deti inontarai manea enai funomai na kondirorafdoi.

⁴ Ampefe medu wesa deyo, 'Mea kontai mera wa menari nehu romi angguri foi, tuti ibai mea fianai aino mai kariri fi meru fo ki.'

* **19:30** Ne arti mani toninai: Inontarai reantenang etarami Sengnei ne Kaiwo fosa, amani inontarai Yahudi, wape wirosa kaha, esuai Allai ne Mananu rorong foi kaha ki. Wape inontarai etaramioai wefuiai, amani inontarai Yahudi kaha fosa, wape eroasoai, ansaino esuai to Allai ne Mananu rorong fo ki.

⁵ Ampafe era wa. Mayeai araha ureng suraya boru tuti araha ureng botoru aha, inontarai ne romifoi da sera we inontarai nariai aha.

⁶ Ramindena araha ureng ring mani da nariai aha to kondirorafoi tuti deti inontarai siai manea enai nai wape enari fiea kaha, ampefe medu wesa deyo, ‘We fiani meru fiea kahai, mae meminohi funomai na kondiroranei rahida bei sentenang nina?’

⁷ Emadu wei eteyo, ‘Wiro manei dohong fieai we ameru kaha.’ Ainanaya medu wesa deyo, ‘Tonana mani mea kontai mera wa merufi na nehu romi angguri foi.’

⁸ Ramindenara mani mano ne romi angguri foi medu we ne mandorifoi deyo, ‘Wahu inontarai erufi we yau wasa ambori baisa, amani na mano erufi wefua wasa paria sobu mano erufi na kameai wasa.’

⁹ Ampefe mandorifoi biai doi dinari bosiarawai we inontarai erufi na ramindenara araha ureng ring fosa.

¹⁰ Ainanaya inontarai erufi na kameai fosa, ewaitarahio esobu doi fuba sewa mano erufi na ramindenara fosa, manamo ea kontai esobu doi dinari bosiarawai.

¹¹ Esobu ene doifo mani, ehasou tuti ehutu mano demisa erufi wei foi na enemirorongfo.

¹² Eteyo, ‘Eh! Todoni fino amerufi maraba paria we rahida bei sentenang, tuti wonei sina amea na kameaifa paria sobu ramin-

dena, wape bai amea mai kariri mano era wefuimai ma erufi we araha ureng boyari kawuru fosa ninai?’

¹³ Manamo mano ne romi foi medu we inontarai nanisa manei deyo, ‘Maniwowire! Wiro inari fisarawafeai we wau kaha. Weo tumadu ruhiai kawuru ampa we rufi we yau ne, ambori ibai wau rahida bei mani doi dinari bei.

¹⁴ Ka nemu dojwa tuti ro wa. Weo yeyo ibai mano yufi wefui pari nini doi dinari bei kariri ibai wau ninai kontai.

¹⁵ Weo fianai aino nehu ne, nehu mambiriu we yeyo yohonai todoni, kariri nehu awiafo. Ete enemurorong pirahai we warahu takahetuai funomai tonanafo ne?’”

¹⁶ Ainanaya Yesusi medu tuarai aha, deyo, “Tonanai kontai inontarai ewefonia fosa ambori enai to kurumifui ki, mae mano enai to kurumifui fosa ambori ewefoniai ki.”

*Webetoru Yesusi medu kariri ne mararehafo
(Markusi 10:32-34; Lukasi 18:31-34)*

¹⁷ Rahida Yesusi tuti ne inontarai ewesuraya mandu fosa era to bendari Yerusalem ayai fo, era wa mairabuang mani, fanduhisa mae medu wesa deyo,

¹⁸ “Metarami ma. Nina mani, tara to Yerusalem ayai finina. Na wanai Kaisung Inontarai nei ambori manei dewayani we imami baba fosa tuti mantaunau Hukumi Musai soi fosa ki. Tuti ambori etohong aiboi marareha fo wei ki.

¹⁹ Kontai etohoni to inontaraio etaroangno Allai kaha fosa we ambori eteiberahi, erarubati na wai, tuti epahui na aitabafoi. Wape rahida bo botoru foi, ambori suwi aha ki.”

*Yakobusi tuti Yohanesi uinami dutang Yesusi we fieai
(Markusi 10:35-45)*

²⁰ Mayeai Zebedeus bi-nengfoi tuti ne kaisungfo suru, amani Yakobusi tuti Yohanesi, itora we Yesusia. Disangkapa awebukafo na Yesusi arongreafo tuti dutani we fieai.

²¹ Yesusi dutang wiwingfoi deyo, “Aie, fianai butang wea ne?” Wiwingfoi medu we Yesusi deyo, “Moduraia futuai we yau, we rahida ru wang Mananufo mani, bohong kataio mai fo we nehu kaisungne suru, amani manei minohi na waramu domoya wai tuti manei na waramu dowej wai.”

²² Yesusi yoa we suru deyo, “Muwaitawang fianai aino murutang weai nina kaha. Weo mubiriu we murunung nano fi dadirao yunung nai nei e? Mubiriu we musodai dadira ambori isodairi foi konta rai e?” Uroa ureyo, “Aubiriu wea rai.”

²³ Yesusi medu we suru deyo, “Nehu dadira nani murunung nai kontai. Nehu dadira nanai musodairi rai. Wape kariri mandoni dino ambori minohi na enehung domoya nei tuti na enehung dowej nei mani, yau wiro ikutu kaiwo kariri nana kaha. Katai nani Allai meinamini we inontarai kawuru

ampa, amani mano diri suru kawuru we uminohi na nanaia fo.”

²⁴ Yesusi ne inontarai ewesura mano wei fosa etarami finanai ampefe ehasou mambetahatuifo suru paria.

²⁵ Mae Yesusi sahu kipasa ma, medu wesa deyo, “Mewaitawanaifa weo na kaiwasa etaroang Allai kaha fosa, amani Yahudi kaha fosa, mano ewenunggamieie we ene parentanei enari kanggani ene kaiwasafrai. Tuti mano ewewafonai fosa etanggewa ene kaiwasafrai na tapapa.

²⁶ Wiro mene tarai tonana kaha, mae mandoni dino deyo fiebai sewa na mea fo mani, todoni kontaio wemangfata we mea.

²⁷ Tuti mano deyo wefonai na mea fo mani, todoni kontaio wewoming we mea akawuru wo.

²⁸ Toyari Kaisung Inontarai nei kontaio wiro da ma we mefatari kaha, mae we fiata mea tuti we dohong ne taraifoi we feriri kaiwasa bitoya foi.”

*Yesusi niari inontarai uremifafa mandu uwati
(Markusi 10:46-52; Lukasi 18:35-43)*

²⁹ Rabuang bo Yesusi tuti ne inontarai ewesuraya mandu fosa era weru bendari Yerihfo fo mani kaiwasa bitoya era ria Yesusi.

³⁰ Tete inontarai uremifafa mandu uminohi na rang dereungfo na katai nani. Utaramioai we Yesusi da na nanafo usahu ureyo,

“Sengno Dauti ne Kaisungne wau, aromuo auru!”

³¹ Kaiwasa bitoya fosa esua suru we unemboru, manamo wiro utantumasa kaha, mae usahu mambiriu aha ureyo, “Sengno Dauti ne Kaisungwa waune, aromuo auru!”

³² Ainanaya Yesusi doa ukai tuti sahu suru ura weia tuti medu we suru deyo, “Fianai aino mureyo inari we muru ne?”

³³ Inontaraifo suru uroa we Yesusi ureyo, “Daie, aureyo awati.”

³⁴ Yesusi aro suru paria ampefe yuai warangfo waratawang uuremifo, na kutu nanai kontai uremifo tabau uwati. Ainanaya uraria Yesusia.

21

*Yesusi suai to bendari Yerusalem
(Markusi 11:1-10; Lukasi 19:28-38; Yohanesi 12:12-15)*

¹ Era wa kefang we Yerusalem mani, esobu munue Betfage na wiwoi Saituni eneungfo. Na nanai Yesusi demi ne inontarai dirisa fosa uwemandu urafafong.

² Medu we suru deyo, “Mura to munue watai na taaromife wanai, mura waroi afui kahai mae muwati manei tebuhi ne keledai manei doari na nanai tuti antungfoi. Murehuwi ambori muka suru we yau ma.

³ Inontarai manei medu fieai we muru kariri fio munari nina mani, mumadu wei mureyo, ‘Sengnei dino

demi auru auka suru weia ne,’ tuti yoa we muka suru ki.”

⁴ Finanai kawariai ambori Sengnei ne Kaiwo nabifoi meduraia fo wetarai, amani,

⁵ “Boiririaifa we Kadawing Sioni foi,”

‘Mewati! Mene Mananufi da we mea mane,

I enerorong tewawa tuti dautai na keledai manei, amani keledai antung dine.’ ”*

⁶ Ainanaya Yesusi ne inontaraifo suru ura wa tuti unari kariri Yesusi ne kaiwo dererai we surua fo.

⁷ Uka keledaifoi tuti antungfoi we Yesusia mayeai ne inontaraifosa etohongno ene ansung boriai feai awiai ebuaisai na keledai kuruinafo suru, tuti Yesusi dautai ayai minohi sau keledai antungfoi.

⁸ Kaiwasa bitoya paria eha ene ansungfoa ehafarai na rangfoi, manea kontai eharai ai totua fo tuti ehafarai kontai na rangfoi, ambori emaranding rangno Yesusi da nai foi.

⁹ Kaiwasa bitoyao era na Yesusi arongfo tuti kurung fosa esahu eteyo,

“Hosana! Fiai fuba we Dauti ne Kaisungnei.

Moanafeai we Mano da na Sempaisi wonong ne!

Hosana! Fiaifeai we Allai na katai dedai!”*

* 21:5 Kadawing Sioni foi mani kaiwo neta weai we ‘kaiwasa na bendari Yerusalem fo.’ * 21:5 Zakariai 9:9 * 21:9 Masmuri 118:26

¹⁰ Yesusi suai to bendari Yerusalem afui nanai, bendarifoi niukuayai paria na kaiwasafoi, etutang wawerasa we Yesusifo eteyo, "Inontarai mandoni dinini?"

¹¹ Kaiwasa bitoya foi eroa eteyo, "I mani, Yesusi, nabio na bendari Nazareti na nu Galilea foi dine."

Yesusi suai to Sempaisi ne Munufoi

(Markusi 11:15-17; Lukasi 19:45-46; Yohanesi 2:13-16)

¹² Ainanaya Yesusi suai to Allai ne Munufoi rofongfo tuti data kaiwasa mano etawayangfi tuti mano ewaworifi na nana fosa. Bebari ene mejao eriwang doi naya fo tuti kaderao mano etawayang muntung we korbani fosa eminohi naya fo.

¹³ Tuti medu wesa deyo, "Na Allai ne Kaiwofo medu fieai, amani dotu tonina:

'Nehu Mununei ahui we munuo wenadi nai,*
wape menariri wemunu mananapia.'

¹⁴ Inontarai euremifafa tuti esoberahai fosa era wei to Sempaisi ne Munufoia, tuti niarisara ebeng.

¹⁵ Wape imami baba fosa tuti mantaunau Kaiwo Musai soi fosa ewati kahai fitantuma Yesusi niari fo, kontai etaramio arikangfosa esahu na Sempaisi ne Munufoi eteyo, "Hosana! Fiaifeai we Dauti ne Kaisungne wau!" ampefe enimirorongfoi kerira Yesusi paria.

¹⁶ Ainanaya emadu wei eteyo, "Taramuo arikangnesa kaiwo emadurai ninane?"

Yesusi yoa wesa deyo, "Yo, tarahuoa to! Wape mea mani, metatorai na Sengnei ne Kaiwofo kaharai e? Kaiwo dotu tono:

'Na arikang eawemifang bararika fosa tuti arikang baba fosa,
Wau moinenang fiaifo na eboromifo kawuru ampa.*'

¹⁷ Ainanaya Yesusi da werusa, da to munue Betania tuti dena na wanai.

Yesusi deikanggani ai urungfoi

(Markusi 11:12-14, 20-26)

¹⁸ Kamiai kutungfo Yesusi daraberahi to Yerusalem aha, tuti na rang rorong fo wewisi.

¹⁹ Kefang we rangfoi nanai deti ai urung rowei, ampefe da wa detioi, manamo aifoi webong kaha mae wereraung terai. Ampafe deikanggani aifoi deyo, "Aine wau, wiwo webong ahang kahai we fitawafa." Na tatofang kutu nanai kontaio aifoi reraung siamorang tuti memasara.

²⁰ Yesusi ne inontaraifosa epapuhing paria we ewati fi Yesusi niari nana fefe. Etutang wawerasa eteyo, "Todoni ai reraung siamorang tuti memasa sikerawa nanai?"

²¹ Yesusi yoa wesa deyo, "Tarai, imadurai we mea mau yeo, meroasoai tarai

* 21:13 Yesayai 56:7; Yeremiai 7:11

* 21:16 Masmuri 8:2

tuti menemirorong soriru kaha mani, fianai aino inari we ai urung fininai ambori menari kontai ki, tuti wiro nanai tera kaha, mae memadu we uai nini meteyo, ‘Tuwera weru katai nini tuti taukaha rawanang rausi!’ nana mani finanai kaririai.

²² Meroasoa mani, fianai aino metutang weai na mewenadi we Allai fo, mesobuai ki.”

Mano ewefoniai we Yahudi fosa etutang bera Yesusi kariri ne mambiriu we niarifi fo

(Markusi 11:27-33; Lukasi 20:1-8)

²³ Ainanaya Yesusi daraberahai to Allai ne Munufoi, amani suai awafui deunau na munu rofongfo. I doa deunau mae imami baba fosa tuti inontarai ewefoniai we Yahudi fosa era wei ma tuti etutani eteyo, “Na mandoni wonongne tuti ne mambiriune nari fi bitoya tonina fenina? Tutti mandoni dino yuai wau we nari fininaifa ne?”

²⁴ Yesusi yoawesa deyo, “Yau kontai yutang bera mea we fieai, tuti finana meteisaharai we yau mani, ambori yeisaharai kontai we mea kariri na mandoni dino yuai yau we inari fininaifa ne ki.

²⁵ Meteisaharai we yau, weo Yohanesi mano webaptisi kaiwasa foi mani, mandoni dino yuaisi we webaptisi kaiwasa tonana ne? Allai ete inontarai nunei mane e?”

Imami baba fosa tuti mano ewefoniai we Yahudi fosa

emadu kaririai waweresa eteyo, “Masino tateyo, ‘Allai dino yuaisi we niari finana ne,’ nana mani ambori dei we tata aha ma deyo, ‘Tonana mani, we fianie wiro meroaso Yohanesi kahai nina?’

²⁶ Wape tateyo, ‘Inontarai batang manei andino yuaisi ne,’ nana mani tamatai kaiwasa bitoya foi we emamuna we tata ki, weo eroasoai we Yohanesi mani nabi manei dine fefe.”

²⁷ Ampefe eroa we Yesusi eteyo, “Ameserawawerahai.” Ainanaya Yesusi medu wesa deyo, “Tonana mani yau kontai wiro yeikaririai we mea kaha weo mantei dino yuai yau we inari fi bitoya nini faini.”

Fiyiwansoai kariri kaisung mandu

²⁸ Yesusi medu deyo, “Menemitituai tofino: inontarai manei ne kaisung mandu. I da wa deisaharai we ne kaisung fuba foi deyo, ‘Kaisungne waune, rahida nini roa rufi na tone romi angguri foi.’

²⁹ Arikangfoi yoawesa deyo, ‘Bereri, imarira,’ wape mayeai detua berahi paria we kaiwo medu we tamanai tonana fo tuti da wa yufi na romifoia.

³⁰ Ainanaya wawafoi da we ne arikang fui foi aha medu wei deyo, ‘Kaisungne waune, rahida nini roa rufi na tone romi angguri foi.’ Arikang fui foi yoawesa we tamanai deyo, ‘Yo, Daie ira ki,’ wape wiro da kaha.

³¹ Na arikangfo suru mantei dino dohong kariri tamang ne kaiwofo ne?"

Eroa we Yesusi eteyo, "Mano fuba foi."

Ampefe Yesusi medu wesa deyo, "Tarai, imadurai we me mau yeyo, inontarai efanduhi pajaki we Kaisari tuti wiwing diru nesa ansaino esuaifafong to Allai ne Mananu rorong fo, mae mea mani bireri rai.

³² Weo Yohanesi da ma we deinawiai we mea kariri rang mesi foi, tuti meroaso ne kaiwofo kaha. Wape mano efanduhi pajaki we Kaisari fossa tuti wiwing diru fossa eroasoi. Mewati tonanai ampa wape wiro metarabera mea weru mene sasariwai tuti meroasoi kaha."

Yesusi medu fiywansoai kariri weenari romi angguri

(Markusi 12:1-12; Lukasi 20:9-19)

³³ Yesusi medu paria aha soirio fiywansoai bei siai aha, amani medu deyo, "Metaramio fiywansoai siai nini kontai. Wene kahofa manei, niari romi angguri bei, sanamia kiaia tuti yu worefoi wari romifoi sentennang. Kontai sirai kamirei we katai ehua anggurifoi nai tuti biaungno katai ne tarai toyari yawa dedai bei we ewaitawang wedua romi angguri foi nai. Mayeai sawing romifoi tono inontarai manea ewarami rorong fo, ambori anggurifoi wetarai mani, etato taraifoi maisa. Ainanaya mano ne romifoi dontai to nu siaia.

³⁴ Tete rabuang bo romifoi wetarai fo, mano ne romifoi demi ne mangfata manea etontaia weo eha atorafo ria mano ewaitawang ne romi fosa.

³⁵ Manamo mano eru romifoi sa etafusa, eboi manei, emung manei, tuti esotati manei na kamiai.

³⁶ Mayeai mano ne romifoi demi nari ne mangfata manea aha, ea efau sewa mano fafong fosa, manamo mangfata nanisa kontaio eboisarao tafai kiasa, enari kangganisa toyarine.

³⁷ Ainanaya mano ne romi foi demi ne kaisungfoi wesa, weo enetituai deyo, 'Nehu kaisungnei mani, esomi wei rai.'

³⁸ Manamo we eru romifoi sa ewati ne kaisungfoi we da ma fo nanai, emadu wawerasa eteyo, 'Ne kaisung ambori sobu tamang fi minohi tutira fe andinini, ampare tamunia mireha weruaia, ambori fianai aino tamang minohi tutira fo taha we tata.'

³⁹ Etafuria tuti efafari to borai weru romifoi awariai emuni nayai."

⁴⁰ Ainanaya Yesusi bera imami baba fosa tuti inontarai ewefoniai we Yahudi fosa aha deyo, "Tofino mano ne romi foi daraberahi ma mani fifiani aino dohonai we mano eru romifoi sa fo?"

⁴¹ Eroa wei eteyo, "Iambori da ma tuti mingno inontaraio esaipaya nanisa weruai mae dohong romifoi we inontarai siai we eruti, amani mano tete rahida eteting angguri

foi mani ambori etohong ne atorafo na mai weia fosa."

⁴² Yesusi medu wesa aha deyo, "Metato Sengnei ne Kaiwo arawang bo dotu tonina nei kaha rai e? Amani: 'Kamieio mano enari munu nesa ehabioi fi,
andi wekamiei reantenang we etang kamieifoi doa sauwi ampa.

Sengnei andino niari finina,
tuti fi mehikai paria na tauremine."*

⁴³ Yesusi medu nari aha deyo, "Ampafe yeisaharai we mea, weo Allai kia ne Mananufo weru mea tuti dohonai we kaiwasa siai esomi wei tuti etohong kariri ne dawiafo sa ki.

⁴⁴ Inontarai etawai na kamiei nani mani, eworu ki, tuti mantei dino kamiei nani sau kangguni mani ambori yoyaria wenukahai ki."†

⁴⁵ Imami baba fosa tuti Farisifosa etaramioai, ewaitawanai we Yesusi ne fiyiwansoao medura fo reng wesa kariri todoni eteiayari we Mananu Mampariri foi fo.

⁴⁶ Ampefe erurai we etafuri, manamo ematai we enari tonanai, weo ewaitawanai we kaiwasa bitoya foi eroasoai we Yesusi mani nabi dine.

22

*Fiyiwansoai we muniara mandirau
(Lukasi 14:15-24)*

* **21:42** Masmuri 118:22-23 † **21:44** Kamieifoi mani yiwanso Yesusi, tuti mano esobu karira na kamieifoi mani yiwanso mano eteiaya Yesusi we Mananu Mampariri Allai demi ma foi, toyari inontarai Yahudi fosa.

¹ Yesusi medu we kaiwasa bitoya foi aha na fiywansoai bei, medu deyo,

² "Allai ne Mananu rorong fo mani ne tarai toyari fiywansoai nini; Mananu manei niari muniara bei we dohonsua ne kaisungfoi weriraupo.

³ Rahida bo muniarafoi ne diru neungfo we niariri fo, demi ne mangfatafosa era we mano wenotisara fosa we era to muniarafoia, manamo mano wenotisa fosa eteiaya mangfatafosa, we wiro era wa kaha.

⁴ Ainanaya mananufoi demi nari mangfata siai manea aha, tuti deyo 'Meteisaharai we mano iwenotisa fosa weo, "Imainenang fiang we muniarafoi ampa, amani sapi tuti sapi antung ebiriayai fesa imunsa ampa. Tuti fi siai imainenang mai ampa. Ampafe mera to muniara mandirau ne matto."

⁵ Wape mano wenotisa fosa wiro etantuma mangfatafo ene kaiwofo kaha, mae era we mansiawarai to ene fi eru foa, amani manei da to ne romifoi, manei siai aha da wa yufi siai.

⁶ Tutu mano wei fosa etafu mangfatafosa enari kangganisa tuti emunsa.

⁷ Mananufoi tarao finanane kesoua dang wawerahai paria ampefe denatu ne afai mamuna fosa we emung inontarai nanisa tuti enunung ene bendarifo.

⁸ Ainanaya sahu ne mang-

fatafosa, medu wesa deyo, 'Muniarafi imainenami ampa, wape mano iwenotisa fosa emai we era to muniaranei ma kaha.

⁹ Ampafe mera kahairaia to rang fuba foi, weo mewenoti kaiwasa mandoni saino mesobusa na nana fosa ambori era to muniaranei ma.'

¹⁰ Ampafe mangfatafosa era to rangfoia, eha inontarai esobusa na nana fosa to muniarafolia, amani inontarai eharira fosa tuti inontarai ebeng fosa. Ampefe munuo enari muniara nai foi sefang na kaiwasa wenotisa ma nanisa.

¹¹ Mayeai mananufoi da wafui we deti kaiwasafol tuti deti inontarai manei sensung ansung mai we muniarafolia kaha.

¹² Ainanaya dutang berahi deyo, 'Maniwowire, todoni wonsung na ansung mai feai kaha, wape wuai to muniara mandiraufi mampui nina?' Inontarai nani medu fiea kaha, nemboru terai.

¹³ Mayeai mananufoi medu we ne mangfatafosa deyo, 'Mewora inontarai nini aweng tuti warang, ambori mehabioi to boriae to katai mamantiti fo. Na wanai inontaraifosa ambori esobu ne karirafo tuti esaia etamirai paria.'

¹⁴ Yesusi kife ne kaiwo kariri fiywansoafol deyo, "Inontarai wenotisa fosa efau, wape mano irisa fo

mani efau turura kaha, tonanai kontai kaiwasa Allai wenotisa fosa bitoya, wape mano dirisa fosa bitoya kaha."

Yesusi medu kariri bai pajaki we mananu Kaisari
(Markusi 12:13-17; Lukasi 20:20-26)

¹⁵ Mayeai inontarai ewe-Farisi fosa emadu ruhiae we todoni eweanggari Yesusi ambori medu sara kaiwofea.

¹⁶ Ainanaya etemi ene inontarai erariasa fosa manea tuti Herodesi ne inontarai manea era wa emadu we Yesusi eteyo, "Dai Mantaunaune waune, amewaitawanai we wau mani inontarai enemuro-rong mesi di wau tuti bounau ne wetaraifo kariri Seng Allai ne rangfo. Wiro tau funomai we kaiwo inontarai emadura fo kaha weo wiro womi we mano ewewonomi fosa kaha fefe.

¹⁷ Ampefe boisaharai we amea, kariri tane hukumifoi, mesi we tabai pajaki weo Mananu Kaisari ete bireri e?"*

¹⁸ Manamo Yesusi deitawang ene anggarifoi, ampefe medu deyo, "Inontarai menari fayafayarai di mea! We fianie meweanggari yau we metafu yau na nehu kaiwone nina?

¹⁹ Yo, tonana mani meteinawiai we yau doi mebai pajaki nai wai." Ainanaya etohong doi dinari bei wei,

* **22:17** Etutani tonanai ambori ewedayari sawai na fi medura fo. Weo deyo mai we ebai pajaki we parenta Roma foi mani, Farisifosa ehasouwi tuti etinggairi na Majelisi Agama foi, mae deyo mai kaha mani, nana mani inontarai era ria Herodesi ehasouwi tuti etinggairi na parenta Roma foi.

20 tuti dutang berasa deyo, "Mandoni dino yabani na doi finina, tuti mandoni dino wonongfe watai nai ne?"

21 Eroa wei eteyo, "Mananu Kaisari." Yesusi medu wesa aha deyo, "Tonana mani metohonai we Mananu Kaisari fifiani aino Kaisari neng fo, tuti we Allai fifiani aino Allai neng fo."

22 Etarami Yesusi medu fennai, epapuhing paria dohona mani era werui anina.

Yesusi deunau kariri inontarai esuwi na marareha rongfo

(Markusi 12:18-27; Lukasi 20:27-40)

23 Rahida nani kontai, inontarai maneiru teai na inontarai eweSaduki fosa era we Yesusia. Ea mani inontarai Yahudi saine, wape eroasoai we inontarai emarareha nesa wiro esuwi ahang kaha. Era wa weo etutang berahi,

24 eteyo, "Dai Mantau-naune waune, nabi Musai soi kaiwo ninai deyo, 'Mang manei rirau wape sobu arikang kaharai mae mireha, nana mani ne tahatuifoi dau ne wiwingfoi aha, ambori dohong arikang we mano mireha nani ne ririafoi aha.'*

25 Ametaterai weo mambetahatui eweituu, mano fuba foi riraua, wape wiro une arikang kaharai mae mangfoi mireha weru wiwingfoia, ampafe mano suari foi dau ne wiwingfoi aha.

26 Ne tonanane, we ne tahatui mano suari foi, paria sobu mano fui pari foi kontai.

27 Ne fuiai pari fo wiwing-foi kontai mirehara.

28 Ampefe na rahida mansuwi-suwi foi mani, na mambetahatui eweituu nanisa, mantei dino wiwing-foi sahui we ne mang ne? Weo mambetahatui eweituu fosa erau wiwingfoi fefe."

29 Yesusi yoa wesa deyo, "Menemitiuai sarawai paria, weo wiro metafu Sengnei ne Kaiwofo tuti meroaso ne mambiriufo kaha.

30 Rahida bo mansuwi-suwi aha foi mani, kaiwasa wiro rirau ahang kaha, mae eminohi toyari wewai na Waidani.

31 Wape kariri inontarai emarareha ne esuwi ahang fo mani, metato kaiwo Allai medura fo kahai e? Weo Allai deyo,

32 'Yau mani Allaio mene werengno Abrahami, Isaki tuti Yakupi esomi wei foi di Yau.*

Seng Allai nani mani wiro Seng we inontarai emarareha kaha, mae i mani Seng we inontarai etarang, tuti wiro inontarai emarareha fo saino esomi wei fo kaha, mae mano etarang fosa, ansaino esomi wei ne. Nanai deinawiai we Abrahami sitoru etarang aha na Waidani ampa."

33 Kaiwasa bitoya foi pepuhing paria we etaramio Yesusi ne kaiwo aunau fo fefe.

* 22:24 Ulangan 25:5-6 * 22:32 Keluaran 3:6

Yesusi medu kariri kaiwo wereantenang na Hukumi Musai soifo

(Markusi 12:28-34; Lukasi 10:25-28)

³⁴ Farisifosa etaramioai we Yesusi ne kaiwofo wemambiri paria dohona mani Sadukifosa emadu fiea ahang kaha, ampefe efanduhisa.

³⁵ Manei na ea, i mani mantaunau Kaiwo Musai soi fo manei dine, da wa dutang bera Yesusi, weo deo weanggariri fefe,

³⁶ deyo, “Dai Mantaunaune waune, na Sempaisi ne Hukumine, kaiwo doni aino fuba sewa ne?”

³⁷ Yesusi yoa wei deyo,

“ ‘Enemuwawu Sempaisi, nemu Allai, na enemurorongwai sentenang, na numuaninuwai sentenang, tuti na enemutituaitawa sentenang.’*

³⁸ Kaiwo nana mani, kaiwo fuba na Hukumifo tuti kaiwo reantenang foi dinani.

³⁹ Tuti hukumi boru foi mesi kariri nanai amani:

‘Enemuwawu inontarai siai kariri enemuwawu bera mantaung wau wa.’*

⁴⁰ Kaiwo fuba Musai soi fo tuti nabifosa esoi fo, weneung na hukumi boru ninai.”

Kaiwo kariri Yesusi, Mananu Mampariri dine fo

(Markusi 12:35-37; Lukasi 20:41-44)

⁴¹ Inontarai eweFarisi fosa efanduhisa na nanai ampefe Yesusi dutang berasa deyo,

⁴² “Menemituai fiani kariri Mananu Mampariri foi ne? Na mea mani, i weriria na mandoni?” Eroa eteyo, “I mani Dauti ne Kaisung dine.”

⁴³ Yesusi deyo, “Tonana mani, todoni Dauti mantauni, rahida bo Allai sensoni na Nuaninu Mirarebana foi, sahui we ne Seng nina? Weo deyo,

⁴⁴ ‘Seng Allai nei medu we nehu Sengnei deyo,
“Munohi na warahu domoya nei,
pariao iwedaya
nemu aitetanesa
taha tawangsa
kiai na awe-
muwai.”*

⁴⁵ Ampafe Dauti mantauni sahu Mananu Mampariri foi we ne Sengfoi tonana mani, todonie i mani weriria terai na Dauti ma nina? Mae nanai deinawiai we Sengno Mamparirifo dedai sewa Mananu Dauti tuti ne riria fo terai.”

⁴⁶ Wiro manei wemambiri we yoa wei ahang kahai. Tuti nano rahida nani kontai inontarai ewearira we etutang Yesusi we fieai ahang kaha.

23

Yesusi deunau kariri Farisi fosa tuti mantaunau Kaiwo Musai soi fosa tuti deibera we ene enari fayafayara fo
(Markusi 12:38-40; Lukasi 11:37-54, 20:45-47)

¹ Ainanaya Yesusi medu we kaiwasa bitoya foi tuti we ne inontarai ewesuraya mandu fosa deyo,

* 22:37 Ulangan 6:5

* 22:39 Imamati 19:18

* 22:44 Masmuri 110:1

² "Mantaunau Kaiwo Musai soi fossa tuti Farisifosa esobu mambiriu we eteisaha Kaiwo Musai soi fo.

³ Ampafe kaiwo etaunauwai kariri Kaiwo Musai soi fo nanai, metaramioai tuti metohong kaririai na mai, wape wiro metohong kariri ene etohong toa fo fanai. Weo etaunau kariri kaiwofo, wape mantaunsa wiro etohong kariria kaha.

⁴ Kaiwo dadira tuti maraba fo etohonai we inontarai siai, eteyo nari wani, nari nini fanai, etemisa we esoduatai ete we etohong kaririai, wape mantaunsa wiro ewaramiae inontarai nanisa kuteai we etohong kariria kaha.

⁵ Fi kiai enari fo, enari we ambori inontarai siai ewatisa terai we ea mani inontarai eroasoai disa. Ehase kotakio soi Kaiwo Sengfo na erekwomifo tuti na ewarami raongfo, kontai enari ireu abirarung fo tiawai na ansung boriei etatara fo, we deinawiai we ea mani inontarai efabai disa.

⁶ Ea kontai eparaise we na muniara bei mani, era wa eminohi na kadera we mano wenotisa to muniarafoi na fong pari fo, tuti na munu agama Yahudi fo mani esera we eminohi pari na kadera watai na fong pari fe fo.

⁷ Eparaise paria we na kaiwasa bitoya foi, toyari na kondirorafoi, kaiwasa esomi wesa nayai tuti esahusa we 'Rabi' ete Mantaunau'.

⁸ Wape mea mani dohonao merurai we inontarai esomi

we mea tuti esahu mea we 'Mantaunau' fanai. Weo mene Mantaunau mansiari kawuru tuti mea kiai mesahu mea we doroi.

⁹ Tuti wiro mesahu inontarai mandoni kontai na nuneisa na wang 'Dai' fanai, weo mansiari terai andino we mene Dai ne, amani Dai na rorafaisi.

¹⁰ Tuti wiro inontarai manea esahu mea we meweNunggamiei fe, weo inontarai mansiari andino wenunggamiei we mea ne, amani Mananu Mampariri nei.

¹¹ Inontarai mandoni dino fiabai we mea mani todoni kontai wemangfata we mea wa.

¹² Mandoni dino yuai ne taraifoia weinontarai dedai mani, Allai ambori niariria tewawa ki, tuti mandoni dino niariria enerorong tewawa mani, ambori Allai yuasisia dedai ki.

¹³ Mantaunau Hukumi Musai soi wa mea tuti Farisiwa mea, mesodai ne karira pari fo rai. Mea kiai mani inontarai menari fayafayara di mea, weo mekafe rahutu Allai ne Mananu Rorong foi ambori inontarai esuai nai fanai. Mantaung mea wiro mesuai afui kaha, mae metaba wedua inontaraio ete esuayai to Sempaisi ne Mananu rorong fo afui fosa kontai.

[
¹⁴ Mantaunau Hukumi Musai soi wa mea tuti Farisiwa mea, mesodai ne karira pari fo rai. Mea kiai mani inontarai menari fayafayara di mea, weo

* ^{23:7} Kaiwo Rabi fo mani neta we Mantaunau.

mepampamu wiwinafosa meha ene ra eminohi tutira fo. Tuti mewenadi mani mene nadifoi dewariroi, mesera we ambori kaiwasa bitoya fossa etato mea. Ampefe todoni kontaio mesodai aiboi maraba sewa fo rai.[†]]

¹⁵ Mantaunau Hukumi Musai soi wa mea tuti Farisiwa mea, mesodai ne karira pari fo rai. Mea kiai mani inontarai menari fayafayara di mea, weo metafai wari rawanang rausi, tuti mera na rei, to katai bodoni kontai, we menari inontarai mansiari kawuru somi we Allai kariri mene metawiawa. Wape inontarai nani, metaunauwi we da ria mea na mai, pariao niari karirafo pari sewa mene menariwa, ambori sodai ne karirafo fuba sewa weru mea aha na Soroha rorong foi.

¹⁶ Mano meuremifafao mewiwiang inontarai siai wa mea, mesodai ne karira pari fo rai. Weo metaunau meteyo, 'Masino manei fefora na Sempaisi ne Munufoi mani, ne fefora nanai wiro wefiea kaha, wape fefora na fio emasio na Sempaisi ne Munufoi mani, ne feforafo todoni kontaio weworahi rai.'

¹⁷ Mano mewebonggoi tuti meuremifafa ne meaine! Fiani dino dedai sewa ne, emasifo ete Sempaisi ne Munuo wedaya emasi nani mirarebana foi e?

¹⁸ Tuti metaunau inontarai kontai meteyo, 'Manei fefora na Mesbao nunung korbani

nai foi mani, wiro ne fefora nani wefiea kaha, wape fefora na korbanio ohonai we Sempaisi fo mani, ne fefora nani todoni kontaio we-worahi.'

¹⁹ Inontarai meuremifafa wa meaine, finai aino dadai sewa ne, korbanifo ete mesbao wedaya korbanifo mi-rarebana foi e?

²⁰ Ampefe mandoni dino fefora na mesbafoi mani, i fefora na mesbafoi tuti fianai aino watai nai fo.

²¹ Tuti mandoni dino fefora na Munu Seng foi mani, i fefora we Munu Seng foi tuti Mano niai nai foi.

²² Kontai mandoni fefora na rorafaisi, nana mani fefora na Allai ne kadera mananu minohi nai foi tuti na Mano minohi nai nani, amani Allai mantauni wonongfo.

²³ Mantaunau Hukumi Musai soi wa mea tuti Farisiwa mea, mesodai ne karira pari fo rai. Mea kiai mani inontarai menari fayafayara di mea, weo metohong kariri fi katui fo, wape fi fuba fo wiro metohong kariria kaha. Toyari finunsai burayang fo tuti fi we indawang fi naya fo,[‡] metohonai we Sempaisi ne perpuluhanfo, mai kariri mene koangfoi. Wape fi fuba fo kiai memarira we metohong kaririai tonana, amani wiro mehutu kaiwo na mesi kaha, mearomio inontarai kaha, tuti metohong kariri fi memadura fo pampang kaha. Ne beng pari fo mani, metohong kariri fi fuba ninai

[†] 23:14 Na kaiwo asli pari fo mani, wiro obu kaiwo rabuang bonini kaha.

[‡] 23:23 Toyari kaung, kemiri, tuti fi bemining.

mae merurai we menari ne katuifo kontai.

²⁴ Mano meuremifafao mewiwiaing inontarai siai wa mea, na merurai we metohong kariri fi katui mae memarira we menari ne mai sewa fo mani, ne tarai kariri mewati borarafui manei na mene merehawa ambori mehabioi, wape unta fiabai manei metoni funomai. Nana mani merurai we metohong kariri fi katui na Sempaisi ne Hukumifo, wape ne fubao todoni kontaio ohong kariria fo wiro metohong kariria kaha.

²⁵ Mantaunau Hukumi Musai soi wa mea tuti Farisiwa mea, mesodai ne karira pari fo rai. Mea kiai mani inontarai menari fayafayara di mea, weo mene nofi metunung naya wa tuti rewangguai metampi naya wa, meruai borieiwara mararebanai, wape ne rorongfo mani sefang na fi mai kaha fo, amani meuremi fiabai we ra paria tuti metenanggoing funomai.

²⁶ Farisi meuremifafa ne mea! Reantanang mani meruai rurang nofi rorong wa tuti rewangguai rorongwa akawuru wo, ambori ne boriaiwa mararebanai kontai ki!

²⁷ Mantaunau Hukumi Musai soi wa mea tuti Farisiwa mea, mesodai ne karira pari fo rai. Mea kiai mani inontarai menari fayafayara di mea, weo mene tarai toyari fafo keri na ke bua ampefe boriaiwa bua karofaria mahikai wape ne rorongwausi sefang na

inontarai eneina tuti ne piraro bitoya nai.

²⁸ Na tonanane kontai na mene tarai boriei wai mani, wati mea weinontarai menari ne wetaraifo di mea, wape na menemirorongwai mani, inontarai menari fayafayara tuti meharira paria di mea.

²⁹ Mantaunau Hukumi Musai soi wa mea tuti Farisiwa mea, mesodai ne karira pari fo rai. Mea kiai mani inontarai menari fayafayara di mea, weo menari nabio nafafongfa emunsa fosa tuti inontarai enemirorong masih wei fosa kontai ene fafofo, menaria mahikai,

³⁰ tuti memadu meteyo, 'Masino, rabuang bonanai ameaino, toyari amene werengfosa, nana mani wiro amemung nabifosa kaha rai.'

³¹ Mae fi menari wa deinawiai we mea mani meweriria na inontarai emung nabi fafong fasa. Ampafe na kaiwo memadurai tonanafo meteinawiaia kasau ampa, weo mea kontai meweriria na mene werengno emung nabi tonana fosa, amani mea kontai mehontai na memung nabi fafongfa sa, weo meweriria na mene wereng nanisa ma fefe.

³² Tonana mani, sasari ne seao mene werengfosao enari kaha fo, metohong kaririai to, pariao mai kaririaia.

³³ Inontaraio mewarami aipaya di mea, mene tarai toyari tawai memuna! Inontarai meharira toyari fefo. Todoni meteyo mekaharai

weru aiboi ambori mesodairi na Soroha rorong foi ki?

³⁴ Yau ambori yemi nehu nabifo manea, inontarai esawai na Sempaisi ne Kaiwofo sa, tuti mantaunau Kaiwo Mahikai fosa we mea ma rai. Tutinontarai nanisa, ambori manea memunsa tuti mepahusa na aitabafo, manea kontai merarubasa na munu agama Yahudi fo na wai weababo fo, tuti menumaisa na bendari bei to bei we menari kangganisa.

³⁵ Na tonanafo ambori mesuang inontarai emasio etohong sarawa kaha fosa ene rika fuba tibata nano nunei tibaurai ma fo, wereantenang na Habel inontarai enerorong mesi foi, paria sobu Zakariai, Berekyai ne kaisungfoi, mano memuni na Sempaisi ne Munufoi, amani na Rorong Mirarebana foi tuti mesbafoi ne katai ruhi fo.[§] Mano enemirong mesio emarareha na mewaramiwa tuti na mene werengfosa ewaramifo fosa kiai, na reantenangfo pariao ninaifa ne mani, ene rikafo tau we mea.

³⁶ Tarai, imadurai we mea mau yeyo, finana kai inontarai fuinini mea mesoduati kiai rai."

Yesusi enerorong fituayai weo inontarai Yerusalem fosa weo wirowemaya weikaha (Lukasi 13:34-35)

³⁷ "Yerusaleme! Yerusalem wo! Nabifosa kiai memunsa! Inontarai Sempaisi demisa

^{§ 23:35} Na Kaiwo Mamo foi, Habeli mani mano reantenang pari mireha weo niari kariri ne yoaso Allai fo, tuti Berekyai mani mano fui pari foi dine. Ato kaririai na bukuo 2 Tawarikhi 24:20-22.

era we mea ma fosa, meru kamieio sara emarareha. Webeiru teai mauwa yohong weai paria we ikaruhi mea kiai we yewawu mea, toyari manggohei inangfoi we tebung wedua ne arikangfosa na warapemafo suru, manamo memaya kaha tuti meteiaya yau.

³⁸ Mewati! Mene Munu Seng nei wiatai wewui ki, Allai wiroweriria mea ahang kaha.

³⁹ Weo yeisaharai we mea mau, na kutu ninai wirowemati yau ahang kaha pariao memadu meteyo, 'Moanafeai we mano ro na Sengnei wonongne wau.' "

24

Yesusi medu kariri Sempaisi ne Munufoi we ambori mirufo

(Markusi 13:1-2; Lukasi 21:5-6)

¹ Yesusi da weru Sempaisi ne Munufoi mae ne inontarai erariati fosa era weia tuti emadu riati kariri Munu Seng foi ne mehikaifo.

² Manamo Yesusi medu wesa deyo, "Mewati Munufoi we mehikai paria ne ne? Tarai, imadurai we mea mau yeyo; Munu Sengno menemikandori wani ambori inontarai manea emeiria misuhi kiai, kamiei boyari kontaio wirowdoa na ne katai doa nai foi ahang kahai ki."

*Yesusi medu kariri rahida
nunei werea naya fo*

(Markusi 13:5-13; Lukasi 21:7-19)

³ Ainanaya da to wiwoi Saituni, da wa suki aweu minohi nanai, ne inontarai erariati fosa titousa eraoia emadu riati na mantaunsa eteyo, “Boikaririafa we amea, kidoni worifi antanafa modurai nanai kawariai ki, tuti fiainawiai fianai aino kawariai we amewaitawanai kariri rahida barabera wau nai aha ma foi tuti rahida nunei werea naya fo ne?”

⁴ Yesusi yoa wesa deyo, “Metanansiau weduarai ambori dohona inontarai etatofa mea fe.

⁵ Weo inontarai bitoya ambori era ma eteyo emadu we mea na wonohune tuti eteyo, ‘Mananu Mampariri metamang wei nei di yau.’ Tutu na kaiwo emadurai tonanane etatofa kaiwasa bitoya kontai.

⁶ Kontai ambori metarami mamunafei, tuti kaiwasa emamuna wawerasa, wape dohonao mematai fanai. Ne tonanane todoni kontaio kawaria akawuru wo. Wape nanai wiru deinawiai we nunei werea naya finana kaha.

⁷ Tonanai kontai parentafei ambori memuna we parentafei ki, tuti mananu manei ambori memuna we mananu siai manei ki. Na doni kontai ambori mundiei beba foi fio nai ki, tuti kaharifoi miung ki.

⁸ Ne nani kiai arahio fi re-antenang finanai, ne tarai toyario wiwinsanaio amaina pirahai tantuma we dawing.

⁹ Na rabuang bonani, inontarai eharira fosa etafu mea etohong mea tono inontarai ewarami rorong fo ambori enari kanggani mea tuti emung mea, tuti kaiwasa na nunei sentenang enimirireu mea weo mea mani inontarai meraria yau di mea fefe.

¹⁰ Rabuang bo sonana nei mani inontarai bitoya eroaso yau ahang kaha mae ehurumitare yau tuti inontarai etawayang wawerasa, kontaio enimirireu wawerasa.

¹¹ Nabi tarai kaha bitoya ambori ehawariai ki, tuti etatofa kaiwasa bitoya.

¹² Inontarai enari ne karirof bitoya sewa aha, wedaya kaiwasa bitoya wiru enimiwawusa ahang kaha.

¹³ Wape mandoni dino doaria mutu paria sobu werea naya fo mani ambori sobu faririfo ki.

¹⁴ Tutu Kaiwo Mahikai kariri Allai ne weMananufo, todoni kontaio wuwuai wari nunei sentenang, ambori kaiwasa na doni konta foi taraoai. Nanaia mani, nunei da wa sobu werea naya foa finanai.”

Fi dadira fuba tuti mam-pariri tarai kaha fosa

(Markusi 13:14-23; Lukasi 21:20-24)

¹⁵ “Ampafe rahida bo mewati mano kerira pari tuti wedaya ne karira pari fo foi, amani manofafongfa nabi Danieli medufafong kariria fo, mewatiao doa na Rorong Mirarebana pari foi na Munu Seng foi mani, amani kataio mesi we doa nai kaha foi,

(kaiwo nani todoni kontai mano metatorai nini wa mea metafurai),*

¹⁶ rabuang bonanai mani, inontarai enayai na Yudea fosa todoni kontaio ewawu ahera, emitoto katai weuai fo we etadiwa nayai.

¹⁷ Mano tete rabuang bonani niayai na ne munu refongfo wiro da wafui we kia fieai na munu rorongfo fanai.

¹⁸ Mano niayai na romifo, dohonao daraberahi to ne munufoi we kia fieai kontai fe.

¹⁹ Rahida nana fo, rahida karira paria we wiwinspace sanaifosa tuti wiwingno etinsui ui, weo nana mani ewawu ahera kaha.

²⁰ Mewenadi we dohonao mewawu tete danunang rorong fo ete rahida Sabati fanai.

²¹ Weo na rabuang bonani, dadirao ming kaiwasafoi nani, ne dadira fuba pari fine wiro kawariai na wea kaharai, na rahida reantenang nunei tibaura fo paria sobu ninai, tuti wiro kawariai na eai ahang kaha.

²² Masino rahida nanai Allai fioukiraia tanang kaha mani, mansiari kontaio wiro kiahrai weru karira nana kaha. Wape Allai enetituai we ne inontarai dirisa fosa, wedaya fiouki rahida nanaia tanang.

²³ Rabuang bonani manei medu we mea deyo, 'Mewati! Mananu Mampariri fi andinini!' ete 'Mewatia-

andiwani!' dohonao meroaso fe.

²⁴ Weo mampariri tarai kaha fosa tuti nabi tarai kaha fosa ambori ehawariai ki. Ea ambori enari fi fuba bitoya paria tuti fitantuma bitoya we enari we etatofa mano Allai dirisa fosa kontai, masino ebiriw we enarisa tonanai.

²⁵ Ampefe mearomioaifa, finanai kai wiro kawaria kaharai mae, yeikaririai kawuru we mea kai ampa, ambori metawa fanai.

²⁶ Ampefe inontaraifosa emadu mani eteyo, 'Mewatia da ma niayai na katai minano tuti wekamamiaife fo,' nana mani mera wa fanai, ete emadu eteyo, 'Mewatioi na mununei, i niayai na rorong bo rorong pari fuisi,' wiro meroasoa fanai.

²⁷ Weo Kaisung Inontarai nei ne da ma fo mani ne tarai toyari kaiwewa keiwewa na rorafaisi, ne sambewarafoi sambewarai na do wanang murang foi mani paria sobu do wanangfui foi.

²⁸ Fi mireha piro fei wiatai na doni mani, atio korowei esifo etari katai nani. [Toyari nanai kontai, rahida ira nai aha ma foi mani, ati pari ki, wiro yediwa yau kaha.]

*Rahida Kaisung Inontarai
nei daraberahi aha ma fo
(Markusi 13:24-27; Lukasi
21:25-28)*

²⁹ "Rabuang bo dadira fuba pari fo kiai mani, na tatofang kutu nanai kontai,

* ^{24:15} Toyari Yesusi medu fafong na kaiwo ninai, inontarai manei wonong fino Titusi, dewa Yerusalem tuti sota Sempaisi ne Munufoi na fuina 70 AD.

'Wofaisi ambori memantiti ki,
tuti embaifaisi sambewarai ahang kahai ki,
awahafaisi ambori tiafating na rorafaisi tuti sawai ki,
tuti fi wemambiriu na rorafaisi ambori dari babiaini ki.*

³⁰ Ainanaya fiainawiai kariri Kaisung Inontarai fo dariai na rorafaisi. Kaiwasa na nunei sentenang ematai esai etaidu, we Kaisung Inontarai nei ambori watioi we da na kafafefo na rorafaisi meu, ne tapapafo fuba paria tuti ne sambewaraio dadai fo fiabai.

³¹ Tuti songgeri fuba foi dotu, ambori Kaisung Inontarai foi demi ne wewaifosa we efanduhi ne kaiwasa diriri foi na do wanang murang foi paria sobu do wanangfui foi, tuti na do wanangsai foi paria sobu do wanamba foi, kontai na rorafaisi reafea pari sobu reafeai."

Yesusi deinawi fiainawiai na ai urung

(Markusi 13:28-31; Lukasi 21:29-33)

³² "Mesobu aunau na ai urung nei neo fiyiwan-soanei, wati to aifoi we wedahamia kai, rerorifoi kiawariai aha mani, nana mani waitawanai we katu wori wemunudang ki.

³³ Tonanai kontai we mewatio finani kiai kawariai mani, mewaitawanai kontai we rahidafo kefang ampa.

³⁴ Tarai, imadurai we mea mau yeyo, inontarai

na rabuang boninisa wiro emarareharao ehai kaharai mae finanai kawariai kawrua.

³⁵ Rorafaisi tuti nunei niai rai, wape nehu Kaiwone watai wenumainu."

Tatanansiau tuti tata-mang na mai weo taserawaw-era rahida Kaisung Inontarai foi da nai ma fo

(Lukasi 17:26-30, 34-36)

³⁶ "Tonanai ki, wape kariri rahida tuti araha ureng beiru Kaisung Inontarai nei da nai ma fo, mandoni kontai deitawana kaha. Wewai na rorafaisa kontai ewaitawana kaha, Kaisung Inontarai nei kontai deitawana kaha, mae Dai mesiri andino deitawana ne.

³⁷ Rahida bo Kaisung Inontarai nei da nai ma foi mani ne tarai toyari na rabuang bo Noaki nafafong nanai.

³⁸ Weo rabuang bonani foafoi dautai kaharai mae kaiwasafosa etampi tuti etunung tuti erirau, tonanai paria sobu rahida bo Noaki suai to ne wa fiabai rorong fo,

³⁹ tuti ewaitawang fianai aino ambori kawariafo kaha, paria foa fiabai foi dautai su foisa fo. Tonanai kontai we na rahida Kaisung Inontarai nei da nai ma fo.

⁴⁰ Na rahida da nai ma foi nani mani, mang mandu unaya urohong romi mani kia manei tuti manei niayai.

⁴¹ Wiwing mandu utara ruhiae na anawahi bei, kia manei mae manei bereri.

* ^{24:29} Yesayai 13:10, 34:4

⁴² Ampefe metanansiau, weo wiro mewaitawang rahida bo mene Sengnei da nai ma fo kaha rai.

⁴³ Mearomi finina, masino mano ne munufoi deitawanai we diru araha ureng beiru mani mananapifo da ma we kiamanana ne fi minohi tutira fo mani, todoni kontai wiro dena kaha mae detawang weduara rai, wiro sua mananapifoi suai to ne munufoi rorongfo kaha.

⁴⁴ Tonanaifa, mea kontai memainenang metamang pampang, we Kaisung Inontarai nei da tantuma na rahida bo mewaitawana kaha foi ma ki."

Mangfata mano mesi tuti mangfata mano mesi kaha

(Lukasi 12:41-48)

⁴⁵ "Mandoni dino wemangfata mesi tuti sewai ne? Mandoni dino wemangfataao dohong kariri ne mambaisengfoi ne kaiwofo na mai, na rahida yuaisi wenunggamiai we mangfata mano wei fosa, ambori dohong fiang wesa na rahida neungfo ne?"

⁴⁶ Denteng paria we mangfataao niari kariri ne mambaisengfoi ne kaiwofo na mai, ambori rahida mambaisengfoi daraberahi ma mani, sobu ne mangfatafoi we dohong kariri kaiwo demi wea fo.

⁴⁷ Tarai, imadurai we mea mau yeyo, mambaisengfoi ambori yuaisi wenungkamiai we ne fianggeng minohi tutira fo kai ki.

⁴⁸ Wape tarahai mangfatafoi kerira tuti enetituaitai na enerorongfoi deyo, 'Nehu

mambaisengfoi niaya waroi paria wiro daraberahi ahera ma kaha rai,'

⁴⁹ ainanaya bioi mangfata mano siai fosa tuti dampi tuti dunung ria inontarai emayeru fosa.

⁵⁰ Mayeai mambaisengfoi daraberahi na rahida tuti araha ureng bo mananaioi foi, amani mangfatafoi wiro deitawana kaha foi.

⁵¹ Ampefe mambaisengfoi ambori miuni amani ferangkahutu mangfata kerira nani tuti soari tono katai inontarai enari fayafayara fosa ewatai nai fo. Na wanai ambori esodai ne karirafo tuti esaia etamirai paria ki."

25

Yesusi medu fiyiwansoai kariri kadawing ewesura fo

¹ "Kaisung Inontarai nei rahida bo yarabera yau we iweMananu nai ma foi mani ne tarai toyari fiyiwansoai nini ki: kadawing ewesura emainenang ene oborifo, ambori era wa we etamang we mandiraufoi.

² Kadawing nanisa ewering ewebonggoi tuti ewering esawai.

³ Kadawing ewebonggoi fosa eha ene oborifo, wape eha pari maning siai.

⁴ Mae kadawing esawai fosa eha ene oborifo tuti emainenang ene maningfeai kontai.

⁵ Mandiraufoi da ahera ma kaha, ampefe kadawing ewesura fo euremimamong ainanaya etenawa.

6 Diru rabuangna mani inontarai manei sahu deyo, ‘Mandiraufi da ma to! Mera ma tatamang wei.’

7 Kadawing ewesura fosa etoa barisa, ehai ene oborifo.

8 Kadawing ewebonggoi fosa emadu we mano esawai fosa eteyo, ‘Metohong maningfeai we amea, weo amene oborine deo fafe fefe.’

9 Kadawing esawai fosa eteyo, ‘Bireri, weo amene maningne demoyarai we ametatorai we mea konta kaha, ampefe mera wa mewori na mano dewayang maning foi.’

10 Ainanaya kadawing ewebonggoi fosa era wa we ewori maningfo nanai, mandiraufoi sobu kataifoia. Kadawing emainenang fosa esuai ria mandiraufoi to katai muniara foi tuti ehafe rahutufoia.

11 Waroi ahang kaha mae kadawing wei fosa era ma esahu eteyo, ‘Daie, Daine waune, fai rahutunei we amea!’

12 Manamo mandiraufoi yoa wesa deyo, ‘Yeroanso mea kaha.’

13 Yesusi medu kariri fiywansoafdoi awa kiai mani deyo, “Tonanaifa ampefe metanansiau, weo wiro mewaitawang rahida bodoni ete araha ureng beiru fo kaha.”

*Yesusi deiriri fiywansoai
kariri mangfata mantoru
(Lukasi 19:12-27)*

14 “Kaisung Inontarai nei rahida bo yarabera yau we

iweMananu nai ma foi mani ne tarai toyari fiywansoai nini kontai. Amani mang manei de dontai to nu waroi. Donta kaharai mae sahu ruhi ne mangfatafosa, mayeai deto ne doi minohi tutira fo wesa we etawayang nayai we esera we ne faufea.

15 Inontaraifoi dohonai we ne mangfatafosa kariri ene mambiriuo. Dohonai we manei doi emasi aderi* ring sefang, manei aha mani dohongno doi emasi aderi boru sefang, tuti manei aha mani dohongno doi emasi aderi boyari sefang, ainanaya dontai to nu waroia.

16 Mangfata mano sobu doi emasi aderi ring fo kia doifoia dewayangna mani, sobu doi emasi aderi ring nari aha.

17 Tonanai kontai mangfata mano sobu doi emasi aderi boru fo dewayangna doifoia mani sobu doi emasi aderi boru kontai aha.

18 Wape mangfata mano sobu doi emasi aderi boyari foi da wa sirai kamirei bei, ambori dediwa doifoi nayai.

19 Waroi paria mayeai mambaisengfoi daraberahi aha ma, tuti dutang ne mangfatafo sitoru we ne doi yoaso sitoru we itorurai nai fo.

20 Mangfata mano sobu doi emasi aderi ring fo kia ne doi emasi aderi sura fo da wafui tuti medu we ne mambaisengfoi deyo, ‘Mambaisengne wau, doi emasi aderi ring roaso yau

* 25:15 Doi emasi nanai wonong fino talenta, bei mani ne harga dedai paria kariri aderi bei sefang na emasi.

yewayang naya fe ainina, boti ma, isobu doi emasi aderi ring aha.'

²¹ Mambaisengfoi medu wei deyo, 'Mahikai paria! Wau mani mangfata mosi di wau, weo bohong kariri nehu yawiane na mai. Anta iroaso wau na fi katui tuti nariri na mai, ampafe ninaia mani yohong fi fuba feai we wau we rufi nai aha ki. Ro mampui naya puraise ria nemu mambaisengne yau.'

²² Ainanaya mangfata mano sobu doi emasi aderi boru foi da naria aha fui tuti medu we mambaisengfoi deyo, 'Mambaisengne wau, doi emasi aderi boru roaso yau we yewayang naya fe ainina, boti ma, yewayanaia mani isobu boru aha.'

²³ Mambaisengfoi deyo, 'Mahikai paria! Wau mani mangfata mosi di wau, weo bohong kariri nehu yawiane na mai. Anta iroaso wau na fi katui tuti nariri na mai, ampafe ninaia mani yohong fi fuba feai we wau we rufi nai aha ki. Ro mampui naya puraise ria nemu mambaisengne yau.'

²⁴ Ainanaya mangfata mano sobu doi emasi aderi boyari foi da naria aha fui medu deyo, 'Mambaisengne wau, yeitawanai weo wau mani inontarai nemu kaiwo tapapa di wau, wau mani boting aibongfo mae tanami kaha, tuti ka fi na katai wiro rurai nai kaha.

²⁵ Nana mani, imatai, ampefe ira wa isarai kamirei ambori yediwa nemu doine

wa nayai. Ampafe boti ma, nemu doifi dinini.'

²⁶ Mambaisengfoi medu wei deyo, 'Wau mani mangfata korira tuti uremu marira we rufi di wau. Todoni e, boitawanai weo yau wiro yeting aibong mae itanang kaha tuti ika fi na katai wiro irurai naya fo kaha.

²⁷ Tonana mani todoni kontai ka doiwaia wia na bangki ambori dawing naya, ambori yarabera yau tonina mani ika tamu antungfo.'

²⁸ Mayeai mambaisengfoi medu we mangfata siai fosa aha deyo, 'Ka doifo werui tuti bohonai we mangfata mano ne doi emasi aderi sura foi.

²⁹ Weo mano sobuai kawrua foi ambori sobuai fuba aha ki, ampafe nengfo fuba aha, wape mano sobu kuteai manamo niari karirai kaha foi ne kutu nayai nai fo kontai ambori tafating werui ki.

³⁰ Tuti mangfata mano kerira tonananei mani, mehabioi to borai to katai memantiti foi. Na wanai ambori sodai ne karirafo tuti saia damirai paria.' "

Rahida bo Kaisung Inontarai foi, amani Yesusi, kiutu kaiwo we inontarai eharira tuti inontarai emasi nesa nai foi

³¹ "Rahida bo Kaisung Inontarai nei daraberahi na ne sambewaraio dadai fo ma we weMananu foi tuti ne we-waifoi kiai era tutiri ma fo, I ambori minohi na kadera mananu foi na sambewaraio dadai na rorafaisi ki.

³² Amani kaiwasa na nunei sentenang fianduhi na arongreafao, tuti ambori detosa we

rabuang boru, kariri inontarai dehung fiahung foi we deto dombafosa weru kambingfosa.

³³ Dohong dombafosa, amani inontarai emararebanai fosa, enai na uneung domoya foi, tuti kambingfosa, amani inontarai eharira fosa, na uneung dowej foi.

³⁴ Ainanaya Mananufoi medu we inontarai eminohi na uneung domoya fosa deyo, 'Mano nehu Dai mioang mea ne mea, mera ma, mesuai to Mananu rorong meineng we mea na nufi tibau nai foi ma foi.'

³⁵ Weo rahida bo iwawisi foi metohong fiang we yau, tuti arohutataha mani, metohong mereha yunung, ira weinontarai aisei mau mani metohong katai we yau na mene munu rorong wai,

³⁶ nehu pari ansung mani, mesansung yau, imaninang mani mefata yau, inai na aitamu rorong fo mani metuambawa yau.'

³⁷ Ainanaya inontarai enemirorong mesi fosa eroa eteyo, 'Sengne waune, rahida bodoni amewati wau wowisi tuti ametohong fiang we wau, ete aromutataha ampefe ametohong mereha we bunung ne?'

³⁸ Rahida bodoni amewati wau weinontarai aisei, ampefe ametamang we wau ametohong katai we wau ne? Rahida bodoni amewati wau nemu pari ansung tuti amesansung wau ne?

³⁹ Rahida bodoni amewati wau moninang ete wa na

aitamu rorong ampefe amefata wau tuti ametuambawa wau ne?'

⁴⁰ Mananufoi yoa wesa deyo, 'Tarai, imadurai we mea mau yeyo, fianai aino menari we nehu doroio ne fiea kahai arorawa foi mani, menari we yau kontai.'

⁴¹ Ainanaya Mananufoi medu we inontarai mano dowej fosa, deyo, 'Mera weru urehureane weo Allai gefora mea ampa, ampefe mea mesuai to Adia danggararu we fitawafa foi, amani katai Allai meinengami weo Samisenifoi tuti ne wewaifosa nai foi.'

⁴² Weo rahida bo iwawisi foi metohong fiang we yau kaha, tuti rahida bo arohutataha foi wiro metohong mereha we yunung kaha.

⁴³ Iweinontarai aisei mae metamang we yau kaha, nehu pari ansung mani wiro mesansung yau kaha. Imaninang tuti inai na aitamu rorong foi mani, wiro mefata yau kaha.'

⁴⁴ Ainanaya mani emadu eteyo, 'Sengne waune, rahida bodoni amewati wau wowisi, ete aromutataha, ete weinontarai aisei, ete tata ansung kaha, ete moninang tuti nai na aitamu rorong foi mani, wiro amefata wau kaha ne?'

⁴⁵ Mananufoi yoa wesa deyo, 'Tarai, imadurai we mea mau yeyo, fianai aino wiro menari we nehu doroio ne fiea kahai arorawa foi mani, wiro menari we yau kahai kontai.'

⁴⁶ Inontarai tonina nesa esuai to kataio odai ne karirofa naya fo we fitawafa, mae

mano enemirorong mesi fosa
mani esuai to numainufo."

26

Imamifosa eweboyari we emung Yesusi

(*Markusi 14:1-2; Lukasi 22:1-2; Yohanesi 11:45-53*)

¹ Yesusi deunau fi fuba nani kiaia mani, medu we ne inontarai erariati fosa deyo,

² "Mewaitawanai ampa, weo rahida boru aha mani tatohonsua rahida Paska foi. Tuti inontarai manei dewayang Kaisung Inontarai nei we ne aitetafosa ambori epahui na aitabafoi."

³ Ainanaya imami baba fosa tuti mano ewewafonjai we Yahudi fosa efanduhisa na imami fuba Kayafasi ne munu fiabai foi.

⁴ Emadu ruhiae we etafu Yesusi na mamunggasai we ambori emuni.

⁵ Manamo emadu wawerasa eteyo, "Wiro tanari finanai na rahida Paska foi fanai, weo nana mani kaiwasa bitoya foi ehuaya etohona rai."

Na Betania wiwing manei sara Yesusi na maning niunsai mampori

(*Markusi 14:3-9; Yohanesi 12:1-8*)

⁶ Na kutuo Yesusi niai na Betania na Simoni, mano raminde nanai meninang kusta foi, ne munufoi,

⁷ wiwing manei da wei ma. Wiwing nani kia maning niunsai mampori botori bei, maning nani ne harga dedai paria. Yesusi wiata dampi mae wiwingfoi sara

bau nungkamiai na maning niunsai mampori fo.

⁸ Yesusi ne inontarai erariati fosa ewati finana ampefe ehasou eteyo, "We fiane mei funong maning niunsai mampori foi wana?

⁹ Weo maning wani awayani mani ne harga dedai tuti doifo dohonai weo inontarai ene pari fi fosa."

¹⁰ Yesusi deitawang enumikamieifoi, ampefe deyo, "Metatawa wiwingnei we fiani? I niari fio mahikai fo we yau.

¹¹ Weo inontarai ene pari fi fosa mani, enayai rahang mea pampang na rahida neungne, wape yau mani yau wiro inayai rahang mea waroi ahang kahai ki.

¹² I sara maning niunsai mampori nei na nehu tarainei tonina ne we meine-nang nehu tarainei we ambori esarai fo.

¹³ Tarai, imadurai we mea mau yeyo, na nunei sentenang, na katai doni kontai nehu Kaiwo Mahikai fo ewuwuai naya mani, fi wiwingfi niari ninai kontaio etaiririai ki ambori earomio kariri i."

Yudasi yoa we dewayang Yesusi

(*Markusi 14:10-11; Lukasi 22:3-6*)

¹⁴ Ainanaya Yudas Iskarioti, manei na Yesusi ne inontarai ewesuraya mandu fosa, da we imami baba fosara.

¹⁵ Medu wesa deyo, "Metohong fiani we yau ambori yewayang Yesusi we mea

ne?" Ampefe ebaiti na doi peraki piareia sura.

¹⁶ Na rahida bonani to fongna fo Yudasi sera we rahida mai we dewayang Yesusi nayai.

Yesusi dang fiang Paskaria ne inontarai ewesuraya mandu fosa

(Markusi 14:12-26; Lukasi 22:7-23; Yohanesi 13:21-30)

¹⁷ Na rahida bo reantenang etohonsua muniara Roti Weragi Kaha foi, Yesusi ne inontarai ewesuraya mandu fosa eraoia etutani eteyo, "Daie, katai bodoni dino enemurorong niyai nai we amemainenang fiang Paska we wau nai ne?"

¹⁸ Yesusi medu wesa deyo, "Mera wa mesuai to bendari Yerusalem, we inontarai manei, tuti memadurai wei meteyo, 'Mantaunaufoi medu deyo; Nehu rahidafe de kikeu to, ampefe yau tuti nehu inontarai eraria yau nesa ametohonsua Paskanei ruhiae na nemu mununei;'"

¹⁹ Ampefe ne inontaraifosa enari kariri fiani aino demisa wea fo, era wa emainenang fiang we Paskafoi.

²⁰ Diru nanifai Yesusi tuti ne inontarai ewesuraya mandu fosa ewatai na me-jafoi etampi.

²¹ Ewatai etampi mae Yesusi medu wesa deyo, "Tarai, imadurai we mea mau yevo, manei na mea ambori dewayang yau ki."

²² Etarami kaiwo fenanai enemirorong fituayai paria, ainanaya mansiari-mansiari

dutang bari Yesusi aha deyo, "Daie, wiro yau kahai e?"

²³ Yesusi yoa wesa deyo, "Inontarai dewayang yau nei dino soang ne rotifo ria yau na rewangguai boyari ne.

²⁴ Tarai, Kaisung Inontarai nei ambori mireha kariri fi-anai ainofafongfa nabifosa esoi na Sempasi ne Kaiwofoa fo. Wape we mano dewayang Kaisung Inontarai neia mani, ambori sobu ne karirafo ki! Ne mahikai sewa we wenanifaini mani, wiro saubaunung to nunei ma fanai."

²⁵ Yudasi, mano ambori dewayang Yesusi foi medu wei deyo, "Dai, Rabie, wiro yau kahai to?" Yesusi yoa deyo, "Yo, toyari wau boisaha bera mantaung wau aha ne."

²⁶ Rabuang bo etampi foi, Yesusi kia rotifeai dutang Sempaisi dohong mahikai wei. Ainanya fioabau rotifoi na warangfo tuti dohonai we ne inontaraifosa. Yu rotifo dohonai wesa tonanai mae medu wesa deyo, "Mehari mau tuti metani, weo nehu taraifi dinini."

²⁷ Mayeai kianofi soni angguri nai foi, dutang Sempaisi dohong mahikai wei. Ainanya dohong anggurifoi na nofifoi aha wesa tuti medu deyo, "Metunung kiai na nofifini."

²⁸ Angguri nini mani nehu rika dine, rikao na Kaiwo Ar-eraio Allai dohonai we inontarainesara, rikao tiwowu we kaiwasa bitoya foi ambori Allai feriri ene sasarifo.

²⁹ Yeisaharaifa weo angguri nini wiro yunumi ahang kahai, paria yunung

angguri weworu ria mea na Dai Allai ne Mananu rorong foi.”

³⁰ Ainanaya erohi rarung rowei we efiai Sempaisi, mayeai era to wiwoi Saitunia.

Yesusi medurai we ambori Petrusi feforai ki

(Markusi 14:27-31; Lukasi 22:31-34; Yohanesi 13:36-38)

³¹ Ainanaya Yesusi medu wesa deyo, “Diru bonini kontaio, mea kiai ambori mewawu taterai weru yau ki. Weo na Allai ne Kaiwofo dotu tono:

‘Imung ne mantahungfoi, tuti dombafosa ambori ewawu taterai ki.’*

³² Wape rahida bo isuwi aha foi mani, ambori ira foni meara isobu mea na nu Galilea foi ki.”

³³ Petrusi yoa deyo, “Bereri kontai. Tarahio mano wei nesa, mae yau mani todoni kontaio iwawu weru wau kaha rai.”

³⁴ Yesusi medu wei deyo, “Tarai, imaduarai we wau mau yeyo, diru nini wiro manggohei bibe kaharai mae, fofora yau webetoru kawurua, amani boyo wiro boroanso yau kaha.”

³⁵ Petrusi yoa deyo, “Todoni kontai ki, paria imereha kontai ria wauo, ifafora wau na wea kaha rai!” Tuti ne inontarai mano wei fosao, emadu tonana kontai.

Yesusi wenadi na Getsemani

(Markusi 14:32-42; Lukasi 22:39-46)

³⁶ Ainanaya Yesusi tuti ne inontaraifosa era to katai

bei wonong fino Getsemani. Na katai nani medu wesa deyo, “Meminohi na nina mae itaha tourai to wanaia iwenadi nai.”

³⁷ Ainanaya kia Petrusi tuti Zebedeus ne arikangfo suru, amani Yakobusi tuti Yohanesi, itora ruhiae riati, na siari nanafo niuruainso enerorongfoi fituayai tuti weansarai finanaya.

³⁸ Ainanaya medu we sitoru deyo, “Enehuro-rongnei fituayai paria nehu tarai toyari yeyo imereha. Ampafe muntonayai na ninai tuti muntorena fanai mae muntowaitawang weduarai ria yau.”

³⁹ Yesusi saha tourai waroi kuteai weru sitoru, ainanaya suki aweu kioha boha arong tuti wenadi we Sempaisi, deyo, “Daie, wobu rangfeai mani, kadeo ruai fi miraba fuba isodairi nini weru yau, wape wiro kariri nehu yawiane fanai, mae kariri nemu bawiawa terai.”

⁴⁰ Mayeai daraberahi we ne inontarai kia sitoru fo itoru aha, wape da wa mani sobu sitoru we itorenawa itowaitawang mai kaha. Ampafe medu we Petrusi deyo, “Wiro muntowemambiriu we muntowaitawang weduarai araha ureng boyari ria yau kaha e?”

⁴¹ Muntowaitawang weduarai tuti muntorutang Sempaisi, ambori Saminseni weanggari muntoru fanai. Tarai we muntonumianinuwu biriu we dohong kariri

* **26:31** Zakariai 13:7

ne bengfo, mae muntonne taraiwa wemambiriukaha."

⁴² Yesusi da weberu wenadi tuti deyo, "Daie, masino dadira nini tiwera weru yau kaha, mae todoni kontai isodairi mani, yo, kariri nemu bawiawa terai."

⁴³ Ainanaya daraberahi we ne inontaraifo sitoru aha. Wape da wa mani sobu sitoru we itorenawa, weo itouremi mamong paria fefe.

⁴⁴ Ainanaya da weru itoru nari aha, nana mani webetoru we wenadi finana, amani wenadi dafu kaiwo iari fo.

⁴⁵ Ainanaya daraberahi aha tuti medu we ne inontaraifo sitoru deyo, "Muntowatai muntorena nendai e? Muntowati! Rahidafe kikeu ampa we Kaisung Inontarai nei, mano dewayani foi soari to inontarai sasari fo ewaramiroongfo ampa.

⁴⁶ Muntoroabari muntoru ambori tora. Weo muntowati, mano dewayang yau fi da kawuru ma nina."

Etafu Yesusi tuti ne inontarai erariati fosa ewawu taterai

(Markusi 14:43-50; Lukasi 22:47-53; Yohanesi 18:1-11)

⁴⁷ Yesusi doa medu tonanai we sitoru mae, Yudasi da wei ma. Yudasi nini mani Yesusi ne inontaraio ewesuraya mandu fo manei dine. Kaiwasa bitoya era riati ma, eha sondu tuti aiboi. Kaiwasa nanisa mani, mano imami baba fosa tuti mano

ewewafoniai we Yahudi fosa, ansaino etemisa ne.

⁴⁸ Na antanafa, Yudasi mano dewayani foi medu wesara deyo, "Inontarai mandoni dino inunahi fo mani, inontarai dinani, metafuri."

⁴⁹ Ainanaya Yudasi da bau Yesusia tuti medu deyo, "Bengfeai we Dai Rabio Mantaunaune wau." Mae suana niuna Yesusi.

⁵⁰ Yesusi yoa wei deyo, "Maniwowire, fi ro weai we yau ma ne, nari kariria to.*" Mayeai inontarai fau fosa etaha afong, eru tawani tuti etafuria.

⁵¹ Na kutu nanai inontarai daria Yesusi fo manei fiatting ne sondufoi tuti ferang kutu imami fuba Kayafasi ne womingfoi tarandaungfoia fituayai.

⁵² Yesusi medu wei deyo, "Tata nemu sonduwai nari aha fui, weo inontarai mandoni dino memuna na sondu mani ambori sobu mai kahai, mae mireha na ne tonana ne kontai ki.

⁵³ Dohonao boitarahi yutang Dai Allai mani fiata yau kaha rai e? Imaya mani yutani denatu wewai rabuang sewa weru rabuang suraya boru we fiata yau.

⁵⁴ Wape, Allai niari tonana mani, fianai aino medurai na ne Kaiwofo we fininai ambori kawariafo, wiro kawariai kariria kahai ki."

⁵⁵ Na kutu nanai medu we kaiwasa bitoya foi deyo, "Mewaitarahio yau mani inontaraio mamuna di yau e†,

* **26:50** Ete, tarahai dotu tofino: We fiani e ro to ninai ma ne? † **26:55** Ete mananapi.

donio meha sondu tuti aiboi mera ma we metafu yau nai nina e? Rahida neungne inayai yeunau pampang ria mea na Sempaisi ne Munufoi rofongfo, mae wiro metafu yau kaha.

⁵⁶ Wape fi fuba nini kiai kawariai ambori fianai aino nabifosa etoia fo, mai kaririai." Ainanaya ne inontarai erariati fosa kiai ewawu taterai werui anina.

Yesusi doa na Majelisi Agama fo euremireafo

(Markusi 14:53-65; Lukasi 22:54-55, 63-71; Yohanesi 18:12-14, 19-24)

⁵⁷ Mano etafu Yesusi fosa ehari to imami fuba Kayafasi ne munufoi, na nanai mantaunau Kaiwo Musai soi fosa tuti mano ewewafoniai we Yahudi fosa efanduhisa kawuru na nanaia, amani mano esahusa we Majelisi Agama.

⁵⁸ Petrusifo da ria Yesusi na waroi paria suai kontai to imami fuba Kayafasi ne munu dereungfo afui, tuti minohi ria inontarai ewaitawang munufoi sa, weo deti kariri fi enari we Yesusia werea naya fo.

⁵⁹ Imami baba fosa tuti Majelisi Agama fosa tan-taneng erurai paria we esobu inontaraio epampamu etinggai Yesusi we dohong sarawai ambori etohong aiboi marareha fo wei.

⁶⁰ Kaiwasa bitoya era ma we etinggai funong Yesusi, manamo wiro esobu kaiwo sarawa feai demoyarai we etohong aiboi marareha fo

wei kaha. Ainanaya inontarai mandu ura afong uroa na euremireafo,

⁶¹ tuti ureyo, "Inontarai nini mani medu deyo, 'Ibiriu we itota Sempaisi ne Munufoia kiai tuti ibauni na rahida botoru aha doa.' "

⁶² Ainanaya imami fuba foi doa tuti medu we Yesusi deyo, "Todonie boromu tibau we kaiwo fuba etinggai wau weai nini kahai wei ne?"

⁶³ Wape Yesusi fioai borong kutuea kahaia. Ainanaya imami fuba foi medu wei deyo, "Na Allai Mano Darang foi wonongne, boisaharai we amea we wau mani Mananu Mampariri foi, amani Allai ne Kaisungfoi di wau e?"

⁶⁴ Yesusi yoa wei deyo, "Tonanai kariri modurawa, wape yeisaharai we mea weo na rahida bowani mani mea kiai ambori mewati Kaisung Inontarai nei we minohi na Allai Mano weMambiriu foi warang domoya fo tuti da na kafafefo na rorafaisi meu."

⁶⁵ Ainanaya imami fuba foi kesou paria tuti fiosiabu ne ansungfo tuti medu deyo, "Ee! Inontarai nini deibera Allai! Kasau we tata ampa. Mandoni dino tatutani we medu kariri ne sarawafo aha ne? Weo metaramioai terai na metaramine we deibera Allaifo ampa, weo deyo I mani Seng Allai ne Kaisung dine.

⁶⁶ Ampafe menemituai tofino?" Eroa eteyo, "Inontarainei mesi we sobu aiboi marareha to!"

⁶⁷ Ainanaya ehandio urengfo tuti eboi. Manea kontai eboipa tararei,

⁶⁸ tuti emadu eteyo, “Mananu Mampariri ne wau, boroanai toyari nabi, boisaharai we amea mandoni dino bioi wau nei.”

*Petrusi fefora we wiro deroanso Yesusi kaha
(Markusi 14:66-72; Lukasi 22:56-62; Yohanesi 18:15-18, 25-27)*

⁶⁹ Petrusi minohi na munu dereung boriei fo mayeai mangfata wiwing manei da ma tuti medu wei deyo, “Yesusi inontarai Galilea foi ne inontarai erariati fe manei di wau to!”

⁷⁰ Wape Petrusi fefora na euremireafo deyo, “Yeitawang fi modura wa kaha.”

⁷¹ Ainanaya da to rahutu borongno esuai nai we munufoi afuifo nanai, mangfata wiwing siai manei detioi tuti medu we inontarai etoari na nana nesa deyo, “Inontarai nini kontai anta doari ria Yesusi inontarai Nazareti foi.”

⁷² Manamo Petrusifo fefora beyari nariai aha deyo, “Tarai, inontarai wani wiro yeroansoi kaha!”

⁷³ Waroi ahang kaha mae inontarai etoari na nana nesa era we Petrusi tuti etutani eteyo, “Wiro bereri ahang kaha, mae wau mani inontarai ro ria Yesusife manei di wau, weo modune modu kariri ea fefe.”

⁷⁴ Petrusi feforawa mutu beyari deyo, “Kaiwo metinggai yau weai ninai, iserawa iru na wa amangwau, yau yeroanso inontarai wani na ea kaha.” Na tatofang siari

nanai kontaio manggohei bibe finana.

⁷⁵ Ainanaya Petrusi aro fianai aino Yesusi medurai weia fo, deyo, “Wiro manggohei bibe kaharai mae, fofora yau webetoru kawurua.” Ampafe da to boriai weru katai nani tuti saia wiro denteng ahang kaha.

27

Inontarai ewenunggamiai we Yahudi fosa eha Yesusi we Pilatusia

(Markusi 15:1; Lukasi 22:66, 23:1; Yohanesi 18:28)

¹ Kameai kutung mae imami baba fosa kiai tuti mano ewewafoniai we Yahudi fosa efanduhisa emadu ehutu kaiwo weo emung Yesusi.

² Ainanaya era wa ewora Yesusi warangfo suru, eharia etohoni we Pilatusi gubernuri parenta Roma foi.

*Yudasi mireha toa fo
(Rasuli 1:18-19)*

³ Yudasi mano dewayang Yesusi foi detioai we etohong aiboi marareha fo we Yesusifo nanai, enerorong fituai paria, dohona mani kia doi peraki piareia surao imami baba fosa tuti mano ewewafoniai we Yahudi fosa ebaiti naya fo da wa dohong ene nari aha.

⁴ Medu wesa deyo, “Inari sasari paria, weo yewayang inontaraio dohong sarawa kaha foi.” Manamo eroa weia eteyo, “Finana mani wiro fi we amea kaha, fi mantaung wau woduata fine.”

⁵ Yudasi tarao emadu tonanafo, so doi nani awafui watai na Munu Seng foia, tuti da wa soro kota rahanangfoi mireha anina.

⁶ Imami baba fosa eruru doi Yudasi soai afui fo, tuti emadu eteyo, "Doi nina mani doi sobuai we mung inontarai naya fine, ahuai we doi werika fine, ampefe kariri Hukumifo mani wiro ohonai afui watai we Sempaisi ne Munufoi fanai."

⁷ Ampefe emadu ruhiae we doifoa mani, etohonai we ewori kahofa aino wonong fino *Kahofa Inontarai Niari Fi Na Kahofa Ura*. Kahofa nanai etohonai we inontarai aisei enai nana fosa manea emarareha mani esaraisa nayai.

⁸ Nanai wedaya paria sobu rahida bonini inontarai esahuai we *Kahofa Rika*.

⁹ Ne tonanane kawariai ambori nabi Yeremiai ne kaiwo medura fo wetarai amani,

"Esobu doi peraki piareia sura,

amani harga na nu Israeli fosa ehutuai we ebaiti naya fo.

¹⁰ Tuti doi nanai etohonai we ewori kahofa inontarai niari fi na kahofa ura foi nayai,

nanai aino Sengnei deinawiai we yaune ambori enari kaririai."*

Pilatusi gubernuri we parenta Roma foi dutang bera

* **27:10** Zakariai 11:12-13; Yeremiai 19:1-13, 32:6-9

Yesusi

(Markusi 15:2-5; Lukasi 23:2-5; Yohanesi 18:29-38)

¹¹ Yesusi doa na Pilatusi, gubernuri we parenta Roma foi arongreafo mani, dutang berahi deyo, "Taraie, wau we Mananu we inontarai Yahudi fesa ne ne?" Yesusi yoa deyo, "Yo, tonanai kariri modurawa."

¹² Wape imami baba fosa tuti mano ewewafonai we Yahudi fosa emadu ehikatawanai we etinggai Yesusi pampang, manamo medu sobu kaiwofea kahaia.

¹³ Dohona mani Pilatusi medu wei deyo, "Etinggai wau we nari fikarira bitoya tonina ne, wiro taramuoia kaha e?"

¹⁴ Wape Yesusi wiro fioai borong kutea kahaia, wiro yoa kariri fi etinggairi naya fo bei kontai kahaia, wedaya Pilatusi pepuhung paria.

Yesusisobu aiboi marareha
(Markusi 15:6-15; Lukasi 23:18-25; Yohanesi 18:39-40, 19:16)

¹⁵ Na rahida fuba Paska foi neungfo mani, gubernuri-foi ne koang we deiai inontarai niai na aitamu rorong fo manei da to boriae, kariri kaiwasa bitoya fo ene etawiafo.

¹⁶ Rahida bonani, inontarai wewonong na warang saipaya manei wiatai na aitamu rorong fo, wonong fino Yesus Barabasi.

¹⁷ Kaiwasa bitoya fianduhi na wanai, ampefe Pilatusi dutang berasa deyo, "Mandoni dino itawini we mea ne: Barabasi, ete Yesusi mano

ahui we Mananu Mampariri nei ne?”

¹⁸ Pilatusi medu tonanaifa we deitawanai weo imamifosa tuti mano ewewafoniai we Yahudi fosa enemirorong pirahai we Yesusi, donio ehari ma nina.

¹⁹ Arahio Pilatusi da wa minohi na kadera kutu kaiwo nai foi we deo kiutu kaiwo mae binengfoi denatu kaiwoariri wei ma deyo, “Bonansiau, wiro bohong aiboifeai funomai we inontarai dohong sarawa kaha nani fanai. Weo inontarai manani dohonaia diruafa yemiae karira paria fefe.”

²⁰ Wape imami baba fosa tuti mano ewewafoniai we Yahudi fosa ewawori kaiwasa bitoya foi, dohona mani etutang we Pilatusi we ambori sawing Barabasi mae dohong aiboi marareha we Yesusi.

²¹ Ainanya Pilatusi dutang bera kaiwasa bitoya foi aha deyo, “Na inontarai nini suru mandoni dino itawini we mea ne?” Manamo kaiwasa bitoya foi sahu deyo, “Barabasi.”

²² Pilatusi deyo, “Tonanaifa mani fiani aino inari we Yesusi, mano ahui we Mananu Mampariri nei ne?” Esahu ruhiae kai eteyo, “Pahui na aitabafoi.”

²³ Ampafe dei aha deyo, “Wape fisarawaio todoni fino niari ne?” Manamo esahu mambiriua nariai aha eteyo, “Pahui na aitabafoi!”

²⁴ Arahio Pilatusi urengfo tabau we yurai todoni kontaio wiro dapa kaiwasa bitoya foi aha kaha, kontai mimeatai we kaiwasa bitoya

foi dohonao ehuaia etohona fe. Ampefe kia merehafeai ma yuai warangfo suru nai na kaiwasa bitoya foi euremireafo tuti medu deyo, “Yohong sarafieai kahai we inontarai nini ne rikane, mantaung mea mesoduata ne.”

²⁵ Ampefe eroa wei eteyo, “Yo, inontarai nini ne rikanei tau we amea tuti amene arikangnesa ki!”

²⁶ Ainanya Pilatusi sawing Barabasi we kaiwasa bitoya foi, wape demi ne afai mamuna fosa eruba Yesusi tuti dohoni eharia we epahui na aitabafoi.

Afai mamuna fosa emeikanggani Yesusi

(Markusi 15:16-20)

²⁷ Mayeai Gubernuri ne afai mamuna fo manea eha Yesusi to ene munu fiabai eminohi nai foi afui, ainanya esahu ne afai mamuna fosa kiai we efanduhisa na nanai wari Yesusi.

²⁸ Etisu Yesusi ne ansungfo tuti etohong ansung barikao ne hargai dedai feaia satarai, nana mani, ansung boriei to-yari ansungno mano ewemananu fosa esansunsa nai fo.

²⁹ Etaya sapewi mananu weababo bei na ai arirawang weababo fo, etohoni satarai na nungkamiaifoi, mayeai etohong aireafea yu weaitatohi mananu na warang domoya foi. Ainanya etuang aweu etisangkapa eawemibukafo tuti eteiberahi eteyo, “Inontarai Yahudi ne ene mananune waune, amefiae wau!”

³⁰ Ehandioi tuti eha aireafo werui aha, eboi bau nungkamiai nayai pampang.

³¹ Emei kanggania kaia fo, etisu ansungfo werui mae etohong mantauni ne ansungfo nari aha satarai, ambori ehari era we epahui na aitabafoi.

*Yesusi epahui na aitabafoi
(Markusi 15:21-32; Lukasi 23:26-43; Yohanesi 19:17-24)*

³² Ainanaya Yesusifo eharia. Na rang rabuang ehanggungno inontarai manei arahio de suai to bendarifo, wonong fino Simoni, inontarai Kirene dine, erutawani etemi sodua Yesusi ne aitabafoi.

³³ Mayeai era sobu katai bei wonong na kaiwo Iberani mani Golgota, nana mani wonong fino katai *Wyoming Nungkamiei*.

³⁴ Na nanai etohoni dunung angguri enaririao pirandima, wape bororuuaing anggurifoi nanai mani deia-yari.

³⁵ Mayeai epahu Yesusi na aitabafoi, eruaisi ayai sawai, mayeai efating aikarai we etato ne ansungfoi maisa.

³⁶ Etato ansungfo mai eara, eminohi ewaitawang Yesusi na aitabafoi neungfo.

³⁷ Tuti na aitaba sau nai foi nungkamiaifoi esoi kaiwo etinggairi naya fo amani dotu tono, Yesusi, Mananu Inontarai Yahudi.

³⁸ Na katai nani kontai epahu inontarai mananapi mandu, manei na eneung

dowei, manei na eneung domoya.

³⁹ Kaiwasa fuba da na nana foi ehimi enumi tuti eteibera-ahi eteyo,

⁴⁰ “E, inontarai boyo tota Sempaisi ne Mununei tuti rahida botoru ruaisi aha ne waune, waramupa karira ninai weru wau. Allai ne Kaisung di wau mani, bia weru aitabawai.”

⁴¹ Tonanai kontai imami baba fosa tuti mantaunau kaiwo Musa soi fosa kontai mano ewewafoniai we Yahudi fosa eteibaberahi eteyo,

⁴² “I mani feriri inontarai siai, wape wemambiriu we feriri bera mantauni kaha. I mani Mananu Israeli dine! Ha, tonana mani bia weru aitabafoi to, nana mani taroasoi finana.

⁴³ Yoaso Allai tuti medu deyo Allai ne Kaisung dine. Yo, tonana mani Allai miaya mani, andino feriri na kutu nina fe.”

⁴⁴ Na tonanane kontai, inontarai mananapi mandu epahu suru na nana ne, ureiberahi kontai.

*Yesusi ne mireha toa fo
(Markusi 15:33-41; Lukasi 23:44-49; Yohanesi 19:28-30)*

⁴⁵ Tete rahida rabuang araha ureng suraya boru, na tantuma kataifoi memantiti sentenang paria sobu araha ureng botoru.

⁴⁶ Tuti tete ramindena ~~dai~~ ^{Dai} inuireng botoru foi, Yesusi bibe fuba deyo, “*Eli, Eli, lama sabaktani?*” nana mani deyo, “Dai Allai, Dai

Allai, todoni tawing yau nina?"*

⁴⁷ Inontarai maneiru teao etoa kefang na nana fosa etaramio Yesusi bibe fo tuti eteyo, "Sahu we nabi Elia."

⁴⁸ Inontarai manei na kaiwasa nanisa sikaherawa kia mandafeai, yorang na angguri sisasa feai, mayeai kia aifarang bei ma disanai nai, ainanaya subarai to Yesusi borongfo ayai.

⁴⁹ Wape inontarai mano wei fosa emadu eteyo, "Tawini! Tatamang tawatioai we Eliai da ma suki weru aitabafoi rai ete bireri e."

⁵⁰ Ainanaya Yesusi bibe fuba beyaria aha na rawafui tapapa, mayeai kiaharaia.

⁵¹ Na siari nanai kontaio ireu aburung sau wetaba na Sempaisi ne Munufoi rorongfo miabu weberu, na yaifo paria sobu kofafo,* tuti mundiei fiabai bei fio, wedaya kamirangfo tababau

⁵² tuti fafo tapapasa. Tuti inontarai emararebanaio emararehara fosa esuwi aha.

⁵³ Etariai na fafofo tonanai tuti inontarai nanisa kontai, rahida bo Yesusi suwi na marareha rorong fo aha fo, ea kontai era wa esuai to bendari Yerusalem, na nanai kaiwasa bitoya ewatisa nayai.

⁵⁴ Mano wenunggamieie we rai mamuna fosa tuti ne afai mamuna ewaitawang wedua Yesusi fosa, epapuhing tuti ematai paria we ewati

mundiai fio fo tuti fifuba nani kiai fefe, amani emadu eteyo, "Tarai, inontarai nini Allai ne Kaisung dine."

⁵⁵ Na nanai wiwing bitoya raminde era ria Yesusi na Galilea ma we efatari fosa, etoa ewati kariri fi fuba kawariai nanai na waroi.

⁵⁶ Na wiwing nanisa mani, Maria Makdalena, tuti Mariaio Yakobusi tuti Yusupi uinamifoi, tuti Zebedeus ne arikangfo uinamifoi, itohontaifa.

Esarai Yesusi na fafofo

(Markusi 15:42-47; Lukasi 23:50-56; Yohanesi 19:38-42)

⁵⁷ Dirua mani inontarai ne ra bitoya manei na bendari Arimatea dao Pilatusia. Inontarai nani wonong fino Yusupi tuti i kontai inontarai daria Yesusi manei dine.

⁵⁸ Dao Pilatusia tuti dutani we Yesusi ne taraifoi, ampare Pilatusi dohong kaiwoariri we afai mamuna fosa, ainanaya etohong Yesusi ne taraifoi weia.

⁵⁹ Mayeai Yusupi kia Yesusi ne taraifoi tuti sensani na ireu ne harga dedai, amani ireu lineni dine.

⁶⁰ Ainanaya dohong ne taraifoi wiatai na mantauni ne fafo waworu foi, fafo mantauni dahi na wiwoi wekamieie fo. Dedoi kamieie fiabai bei awa wia wedua fafo borongfoa akawuru wori da wa.

⁶¹ Maria Makdalena tuti Mariai mano siai foi uminohi na fafo borongfo.

* ^{27:51} Na ireu aburung sau wetaba na Sempaisi ne Munufoi rorongfo miabu weberu ambori wedua Rorong Mirarebanai Pari foi ahang kaha mani, deinawiai we Yesusi ne mirehafoi fiai rang we inontaraine tata ne we tara pari to Seng Allai.

*Rai mamuna ewaitawang
Yesusi ne fafofoi*

⁶² Kameai aha mani, rahida Sabati dine, imami baba fosa tuti Farisifosa era ruhiae we Pilatusia,

⁶³ tuti emadu wei eteyo, "Mambaisengne wau ne, amearomioai we na inontarai sofa biriu foi darangne, medurai deyo, 'Rahida bo botoru foi mani, isuwi aha ki.'

⁶⁴ Ampefe bemi inontarai ewaitawang wedua fafofoi paria rahida bo botoru foi. Dohona ne inontarai erariati fosa era wa ehamanana ne taraifoi fe, nana mani etaiririai eteyo, Yesusi suwi na marareha rorong fo ampa. Tatofa wefuiai nana mani, karira sewa ne fafong fo."[†]

⁶⁵ Pilatusi medu wesa deyo, "Meha nehu afai mamuna manea mera wa ambori ewaitawang fafofoi na mai."

⁶⁶ Ainanaya eha afai mamuna fosa era to Yesusi ne fafofoi, ewora tawang kamieifoi tuti etohong afai mamuna fosa etoa wari fafofoi.

28

*Yesusi suwi aha
(Markusi 16:1-7; Lukasi 24:1-12; Yohanesi 20:1-10)*

¹ Rahida Sabati foi kiaia, na rahida Minggu kameai kutung Maria Makdalena tuti Maria mano siai foi ura wa uwati fafofoi.

² Mayeai na tantuma mundiai fuba bei fio mam-biriu, weo Allai ne wewai manei biari na rorafaisi meu, da to fafofoi dedoi kamiei wia kobi fafo borongfo, tuti minohi saui.

³ Wewaifoi ne tarai dana-sairai toyari kaiwewa fenna, tuti ne ansungfo bua karofari tantenang.

⁴ Afai mamuna ewaitawang fafofoi emataia eriro-rara tuti euremimakaha etawai aweu.

⁵ Ainanaya wewaifoi medu we wiwingfo suru deyo, "Wiro mumatai fanai, yeitawanai musera we Yesusi, mano epahui na aitabafoi.

⁶ I wiro wia na ninai ahang kaha, weo suwi ampa kariri medurai we meara fo, mura ma muwati katai anta wia nai nei.

⁷ Tuti mura musaherawa muraiririai we ne inontarai erariati fosa, we i suwi ampa, tuti da fafongna demang ea na Galilea, ambori na wana ewatiao ki. Muaromio fi imadurai we muru ninai."

⁸ Wiwingfosuru umito weru fafofoi, umito na umatai wape kontai umirising, ampefe umito usaherawa weo uraiririai we Yesusi ne inontarai erariati fosa.

⁹ Mayeai na tantuma Yesusi dario wiwingfosuru tuti medu we suru deyo, "Mahikaifeai." Ainanaya ura kefania ufaung awengfo usomi wei.

¹⁰ Ainanaya Yesusi medu we suru deyo, "Mumatai

[†] **27:64** Kariri Farisifosa mani tatofa wereantenang fo mani Yesusi we Mananu Mamparirio Allai demi ma foi dine.

fanai, mura wa muraiririai we nehu doroifosa ambori era to Galilea, na wana ewati yau ki."

Afai mamuna etairiri kariri fifuba nani kiai

¹¹ Arahio wiwingfo suru ura mae, afai mamuna ewaitawang fafofoi manea etaraberasa to bendarifo tuti etaiririai we imami baba fosa kariri fifuba ewatioi nani kiai.

¹² Ainanaya imami baba fosa era wa efanduhisaria mano ewewafoniai we Yahudi fosa, emadua ehutu kaiwo ruhiai, ampefe etohong doi bitoya paria we ebai afai mamuna fosa nai.

¹³ Tuti emadu wesa eteyo, "Metaiririai mani meteyo Yesusi ne inontarai erariati fosa era diruai ma tuti ehamanana ne taraifi ampa, weo ametena fefe."

¹⁴ Tuti masino Gubernuri Pilatusi tarao kaiwo mewuwuai kariri metena fo mani, ambori amemadu wei ki, ambori wiro mesobu aiboifea kaha."

¹⁵ Ainanaya afai mamuna ewaitawang fafofoi eha doifoa tuti etohong kariri fifiani aino imami baba fosa etarerai wesa fo. Nanai wedaya kaiwo kairiri Yesusi we ne inontaraifosa era diruai ma ehamananai foi, kaiwo nanai dafai wariai na inontarai Yahudi fosa paria sobu rahida bonini.

Yesusi demisa we ewuuu ne Kaiwo Mahikai fo

¹⁶ Yesusi ne inontarai ewesuraya mansiri fosa era to wiwoi bei na Galilea, kariri ne kaiwo dererai wesara fo.

¹⁷ Na wanai ewati Yesusi ampafe esomi wei, wape kontai manea enemirorong soriru we Yesusi dine ete bereri e.

¹⁸ Yesusi da kefangsara tuti medu wesa deyo, "Dai Allai dohong mambiri doni konta fo we yau, amani mambiri kiai na rorafaisi tuti na nunei.

¹⁹ Ampefe mera wari nunei sentenang metaunau kaiwasa nunei kiai ambori eraria yau, tuti mewebaptisia na Dai Allai wonongne, Kaisung Yesusi wonongne, tuti Nuaninu Mirarebana nei wonongne.

²⁰ Metaunausa ambori etohong kariri fifiani aino yemiai we mea wa, tuti mearomioai we iweriria mea pampang paria sobu nunei kiai naya fo."

Kaiwo Mahikai Na Markusi

Kaiwo dedung we Kaiwo Mahikai na Markusi

Kaiwo Mahikai finina mani Seng Allai dohonai we manei wonong fino Markusi. Reantenang mani Markusi soio, "Kaiwo Mahikai kariri Yesus Kristusi Allai ne Kaisungfoi" finana. Na Kaiwo Mahikai nina mani deinawi kariri Yesusi we I mani inontarai yurai niari fi bitoya tuti wemambiriu. Ne mambiriufoi deinawiai na ne deunau toa wau tuti na ne mambiri data nuaninu kerira wauni, tuti na ne feriri sasari wau. Yesusi deinawi ne taraifoi we Kaisung Inontarai, I dohong ne taraifoi ambori inontarai ekaharai weru sasarinei.

Kaiwo kariri Yesusi na buku nini, soi kaririai na kasau tuti parai. Deisaha kariri fi bitoya Yesusi niari fo mae fi deyoa fo tuti deunau fo kutea terai. Reantenang mani, deisaha kutea kariri Yohanesi mano webaptisi kaiwasa foi, kariri Yesusi webaptisifo, tuti kariri Saminseni weanggarifo. Buku Markusi nini, kaiwoariri fuba ne, deiriri kariri Yesusi fi dohona fo, amani kariri niari inontarai ebeng tuti kariri ne fi deunauwai. Markusi robong rea mani, deisaha kariri fi fuba Yesusi sodairai na ne minggu wefuiai na nunei nei. Fi fiabai mani, kariri

sau na aitabafoi tuti suwi na marareha rorong fo aha ma fo.

Na arawang beiru na rea pari fo na buku nini mani finani kiai wiyo mano soi buku Markusi dino soi neng kaha mae, inontarai siai dino soi ne.

Kaiwo na suratinei deto kutuai toninai:

1:1-13 Kaiwo reantenang.

1:14-9:50 Yesusi da deunau tuti niari fi bitoya na inontarai Galilea fosa.

10:1-52 Yesusi da na Galilea to Yerusalem.

11:1-15:47 Rahida minggu wefuiai na Yerusalem tuti munue watai rurrama fo.

16:1-8 Yesusi suwi na marareha rorong foi aha fo.

16:9-20 Yesusi dariai we ne inontaraifosa tuti dautai to rorafaisi.

Yohanesi mano webaptisi kaiwasa foi meinanang rang weo Yesusi

(*Matiusi 3:1-11; Lukasi 3:3-16; Yohanesi 1:19-28*)

¹ Kaiwo Mahikai kariri Yesus Kristusi, Allai ne Kaisungfoi, ainina.

² Amani Allai medu we ne Kaisungfoi, tuti nabi Yesayai soi kaririaia, ampare dotu tonina:

"Yemi nehu inontaraio kia nehu kaiwone manei, da foni Wau.

I ambori meinanang nemu rangfoi we Wau."*

³ "Inontarai nani da sahu pampang na katai wekamamiei minano foi,

* **1:2** Maliaki 3:1

deyo 'Memainenang
rang beng feai we
Sempaisi,
tuti menaria mi-
moya wei.'*

⁴ Kariri kaiwo nanai fa,
Yohanesi mano webaptisi
kaiwasa foi kiawariaifa na
katai wekamamiei minano
foi tuti wiwu kaiwofo, deyo,
"Metarabera mea weru mene
sasariwa tuti mewebaptisi,
ambori Allai feriri mene
sasariwa."

⁵ Kaiwasafoi kiai na nu
Yudea foi tuti na bendari
Yerusalemi era we Yohane-
sia. Era ma eteiai ene
sasarifo tuti webaptisia na
waya Yardeni.

⁶ Yohanesi nini ne ansung
satara fo beng kaha, mae na
fiahung unta nuwawuru, tuti
ne aikapurufoi na andowa
rerawa, toyari nabi na
fafongfa fosa ene ansung
etatara fo. Ne fidangfo mani
manggofuni tuti aniwa ne
maing terai.

⁷ Neo kaiwo medura fini-
nai, "Katu wori manei da tua
yau ma. I fiebai sewa yau
tuti we irehu ne wai sapatu
fo terai ki, wiro imai we inari
finana kaha.

⁸ Iwebaptisi mea na
mereha wape i ambori
webaptisi mea na Nuaninu
Mirarebana foi ki."

*Yohanesi webaptisi Yesusi
(Matiusi 3:13-17; Lukasi
3:21-23; Yohanesi 1:32-34)*

⁹ Na rabuang bo Yohanesi
medu we kaiwasa bitoya foi
nani, Yesusi da na bendari
Nazareti na nu Galilea foi ma

tuti Yohanesi webaptisi i na
waya Yardeni foi.

¹⁰ Na tatofang kutu Yesusi
kiawariai na mereha ro-
rongfe meai nanai, deti ro-
rafaisi tifai tuti Allai Nuani-
nunei ne tarai wemuntung
manei sea na rorafaisi meu
minohi sauwi.

¹¹ Mayeai tarao Allai
raofuifoi medu na rorafaisi
meu deyo, "Wau mani nehu
Kaisung enehuwawuti fi di
Wau. Wau ka enehurorong
fine."

*Saminseni weanggari
Yesus we sawa
(Matiusi 4:1-11; Lukasi
4:1-13)*

¹² Na tatofang kutu nanai
kontaio Allai Nuaninufoi
demi Yesusi da to katai
wekamamiei minano foi.

¹³ Niayai na nanai rahida
piaru mae Saminseni weang-
gariri. Andowa fuba ahumi
kaha fosa enayai riati na
nanai tuti wewai fiatari na
fi dohong wea fo na nanai.

*Yesusi ne kaiwo reante-
nang
(Matiusi 4:12-17; Lukasi
4:14-15)*

¹⁴ Mayeai Yohanesi mano
webaptisi kaiwasa foi, etafu-
ria wiatai na aitamu rorong
fo. Amani, Yesusi da to nu
Galilea foi, tuti wiwu Al-
lai ne Kaiwo Mahikai fo na
nanai.

¹⁵ Yesusi medu deyo,
"Rahida metamang wea fe
mai ampa, rahidao Allai da
ma we weMananu fe kikeu
ampa. Metarabera mea weru
mene sasariwa tuti meroaso
Allai ne Kaiwo Mahikai ne."

* ^{1:3} Yesayah 40:3

*Yesusi sahu manggaerang
mana itorariati*
(*Matiusi 4:18-22; Lukasi 5:1-11*)

¹⁶ Rahida Yesusi da na nafarengfo na ruru Galilea foi nanai, detio manggaerang mandu, mambetahatui suruine, amani Simoni tuti Andareasi. Deti suru we umung erangfoi we utafu diang.

¹⁷ Ainanaya Yesusi medu we suru deyo, "Mura ma, muraria yau, ambori mutafu diang ahang kaha mae yeunau muru we mutafu inontarai we yau."

¹⁸ Na tatofang kutu nanai kontaio uwaramipa erangfo watai mae urariati.

¹⁹ Yesusi da paria aha mani, deti mambetahatui mandu aha, uminohi na une wafoi mae uria une erangfo. Mambetahatui nani suru mani uwonomi fino Yakobusi tuti Yohanesi, uru mani Zebedeus ne arikang suruine.

²⁰ Anseung ahang kahai mae Yesusi dutang suru kontai. Ampafe utubapa utamamifoitutimanoerufi wesitorufona wa emungfai fai, uraria Yesusi.

*Yesusi data nuaninu
karira manei weru inontarai
manei na munu agama rorong
fo*

(*Lukasi 4:31-37*)

²¹ Yesusi tuti ne inontarai diri sitoru fo itora wa sobu bendari Kapernaumi foi. Na rahida Sabati da aha ma foi Yesusi da to Yahudifosa ene munu agama foia deunau Al-lai ne Kaiwo Mahikai foi we kaiwasa bitoya foi.

²² Kaiwasa etarami ne aunaufe nanisa epapuhung paria we deunau toa fo. Weo Yesusi deunau kariri mano wemambiriu paria we deunau tonana, wiro deunau toyari kaiwo batangno ene mantaunau Kaiwo Musai soi fosa emadura fo kaha.

²³ Na siari nanai kontaio inontarai nuaninu karira dohoni manei suai to munu agama foi tuti bibe sahu deyo,

²⁴ "Yesuse, inontarai Nazareti wa waune, bo nari fiani we amea ne? Ro ma weo bohong amea ameworua ne? Amewaitawanai we mandoni di wau, wau mani Mano Murarebanai, na Seng Allai ma fi di wau."

²⁵ Manamo Yesusi somara nuaninu karira foi deyo, "Nemuboru, ro to woriai weru inontarai nini."

²⁶ Ainanaya nuaninu karira foi dotapa inontaraifoi aweu wiatai tuti bibe mambiriu beyari mayeai da to boriei weruria.

²⁷ Kaiwasa na nana foi kiai epapuhung paria we fi ewatiaoai nanai, ampafe etutang wawerasa eteyo, "Ke! Fianai ainina? Kaiwo aunaau waworu fine. Na mambiriufo demi nuaninu karira fosa era to boriei tuti nuaninu karira fosa etohong kaririai."

²⁸ Ampafe kaiwo kariri fianai aino Yesusi niari fo, anseung ahang kahai mae dafai wari nu Galilea foi sentenang.

*Yesusi niari inontarai
emaninang bitoya ebeng*
(*Matiusi 8:14-17; Lukasi 4:38-41*)

²⁹ Yesusi tuti ne inontarai diri sitoru fo itora weru munu agama Yahudi foi, itora to Simoni tuti Andareasi une munufoia. Yakobusi tuti Yohanesi ura kontai riatai.

³⁰ Na munufoi Simoni niong wiwini meninang rirora wiatai na ne fatafoi. Na siari Yesusi tuti ne inontaraifo sitoru itora wafui nanai, inontarai manei deikaririai we Yesusi kariri wiwingfoi we meninangfo.

³¹ Ampafe Yesusi da wa yu na wiwingfoi warangfo tuti fiatari doabariria. Na tatofang kutu nanai kontaio maninangfoi niai, tuti wiwingfoi doabariri da wa wesarawiri wesa.

³² Wofoi sawaia de weayewia nanai, kaiwasa eha inontarai maninang bitoya tuti mano inggira dohonsa fosa we Yesusi ma.

³³ Ampafe kaiwasa fuba na bendarifoi efanduhisa na munufoi refongfo.

³⁴ Ainanaya Yesusi niari kaiwasa fuba esodai mai maninang bong foi nanisara ebeng tuti data nuaninu karira bitoya weru kaiwasa nuaninu karira dohonsa fosa. Kontai Yesusi yoa we inggirafosa emadu kaha, we ewaitawang kariri i mani mandoni dine fefe.

*Yesusi kiorang mai bendarinu nu Galilea foi
(Lukasi 4:42-44)*

³⁵ Kameai nanai mamantiti siarifo mae, Yesusi fiononami weru munufoi, da to katai manano na bendaridereung do boriei fo awa wenadi nayai.

³⁶ Wape Simoni tuti ne maniwowirifosa etoari meai era esera riati.

³⁷ Eserawa esobui nanai, emadu wei eteyo, "Daie, kaiwasanei kiai esera we wau."

³⁸ Manamo Yesusi yoa deyo, "Mera ma tara to fong kariri tara weafo to bendari watai kefang na ninaifa ne, we ikorang nayai, weo finanai aino ira weai ma ne."

³⁹ Ampafe Yesusi da mai katitai na nu Galilea foi tuti kiorang na munu agama Yahudi fo, kontai data nuaninu karira bitoya weru inontarai nuaninu karira dohonsa fosa.

Yesusi niari inontarai meninang kusta manei denteng

(Matiusi 8:1-4; Lukasi 5:12-16)

⁴⁰ Ainanaya inontarai meninang kusta manei da we Yesusi ma, disangkapa awebuka na Yesusi arongreaf, mae dutani deyo, "Daie, wau wemambiri ne, maya mani, nari yau yenteng weru nehu maninangnei."

⁴¹ Yesusi aro inontaraifo paria ampafe suba warangfoa wa sauwi tuti medu wei deyo, "Yo, imaya. Bonteng to!"

⁴² Tatofang kutu nanai kontaio maninang kusta foi niai werui tuti dentengna.

⁴³ Ainanaya Yesusi demi da wa tuti deretawani deyo,

⁴⁴ "Aromuoifa! Wiro boiriri fi inari ninai weo inontarai siai manei fanai, mae ro to imamifoia tuti butani we deti kariri nemu taraiwai we bontengna wa. Mayeai bohong korbanifeai

we Allai we nemu bontengna wa kariri fianai aino Musai soia fo. Nana mani deinawiai we kaiwasa bitoya foi we bonteng ampa."

⁴⁵ Manamo inontaraifoi da wa deirirai we kaiwasafai kariri fianai aino sodairai nanai, paria wedaya kaiwasa bitoya era weia. Ampafe Yesusi da parai to bendarifoi ahang kaha, mae niai na bendari dereung do boriei fo. Tonanai wape kaiwasa bitoya na doni kontai era weia.

2

Yesusi niari inontarai fiaya mane denteng

(Matiusi 9:1-8; Lukasi 5:17-26)

¹ Rahida beiru teai aha mani Yesusi daraberahi to bendari Kapernaumi. Ampafe inontarai etaramioai we Yesusi da wa minohi na ne munu minohi nai fi fo.

² Ampafe kaiwasa bitoya era wa etira paraia wiro katai fea watai arora kaha. Rahutu borong fo kontai wiro weai watai arora kaha. Ainanaya Yesusi medu Allai ne Kaiwofo we deunausa nayai.

³ Yesusi doa medu tonanai mae, inontarai itowemana itoha wefiaya manei we Yesusia.

⁴ Manamo kaiwasa bitoya karerai ampafe wiro itora kefang Yesusi afui kaha. Ampafe itoha wefiayafoi itorautai tutiri na tehi to munu wowongfo ayai. Ainanaya itotota munu nu-wowongfo weai tete Yesusi doa naya fo, mayeai itotu

wefiayafoi tuti andaung wiatai nai foi aweu wiatai na Yesusi arongreafo.

⁵ Yesusi detio enari tonanafo deitawanai we eroasoafu paria, ampafe medu we inontarai fiaya foi deyo, "Kaisungne waune, yeiai nemu sasarifi ampa."

⁶ Mantaunau Kaiwo Musai soi fo maneiru teaio eminohi na nana fosa enemituaitai na enemirorong eteyo,

⁷ "We fiani inontarai nini medu tonana? I deibera Allai, weo mandoni dino biriu we deiai sasari fine? Seng Allai mantauni terai."

⁸ Na kutu siari nanai kontaio Yesusi deitawang enemirorongfoi ampafe medu wesa deyo, "Todonie menemituaitai tonanai na menemirorongwai nina?

⁹ Doni aino mawa ne: imadu yeyo, 'Yeiai nemu sasarifi ampa,' ete yeyo, 'Boabari wau, ka nemu andaungwai, tuti roa,' ne?

¹⁰ Wape yeinawiai we mea, na yohong inontarainei denteng tonina ne, ambori mewaitawanai weo na nunei ninai, Kaisung Inontarai nei andino ne mambiriu we deiai sasari fine."

Ainanaya Yesusi medu we inontarai fiaya foi deyo,

¹¹ "We wau mani, imadu mau yeyo, boabari wau, ruai nemu andaungwai, ro to nemu munufoia."

¹² Na kutu nanai kontaio inontaraifoi doabariri, yuai ne andaungfoi tuti da to boriei na kaiwasa bitoya foi euremireafo. Kaiwasa fuba ewati fitantumafe nanisa kiai epapuhung paria, ampafe

etaparanding Allai. Emadu eteyo, "Ke! Fianai kawaria nina? Ne toninane wiro tawatioai na wea kaha rai."

*Yesusi sahu Lewi we dariati
(Matiusi 9:9-13; Lukasi 5:27-32)*

¹³ Yesusi daraberahi to nafareng ruru Galilea foi aha. Na wanai kaiwasa bitoya era weia tuti deunausa.

¹⁴ Mayea Yesusi da nariai aha mani deti inontarai fianduhi doi pajaki we parenta Kaisari fo mane, minohi na munu pajaki foi, wonong fino Lewi. I mani Alfiusi ne kaisung dine. Yesusi medu weia deyo, "Ro ria yau." Anseung ahang kahai mae Lewi doabariri tuti daria Yesusi.

¹⁵ Yesusi da wa minohi dampi na Lewi ne munufoi nanai, mano efanduhi doi pajaki we parenta Kaisari fo efau paria tuti inontarai kaiwasa bitoya foi sahusa we inontarai ewesasari fosa, efanduhisa ria Yesusi kontai na nanai. Ewatai etampi ruhiae ria Yesusi tuti ne inontarai dirisa fosa weo kaiwasa efau paria era riati fefe.

¹⁶ Mantaunau Kaiwo Musai soi fo maneiru teai, na Farisi rabuangfoi, ewati Yesusi we minohi dampi ria inontarai nanisa fo, etutang bera Yesusi ne inontarai dirisa fosa eteyo, "We fianie mene mantaunafoi dampi ruhiae ria inontarai efanduhi pajaki we parenta Kaisari foi tuti inontarai ewesasari fosa ninai?"

¹⁷ Yesusi tarao etutang tonanafo, yoa wesa deyo, "Inontarai etanteng nesa mani etohong we manggarawangnei kaha, mae mano emaninang fosa. Wiro ira ma weo isahu inontarai emararebana fosa kaha, mae ira we isahu inontarai ewesasari nesa."

Yesusi ne aunau waworu foi tuti koangno Yahudi ene agamafo wiro adoang ruhia fanai

(Matiusi 9:14-17; Lukasi 5:33-39)

¹⁸ Rahida bei Yohanesi mano webaptisi kaiwasa foi ne inontarai mano erariati fosa, tuti inontarai ewepuasa. Ainanaya inontarai manea era ma etutang bera Yesusi eteyo, "We fianie Yohanesi mano webaptisi kaiwasa foi ne inontarai erariati fosa tuti Farisifosa ewepuasa, wape nemu inontarai eraria wau nesa bereri nina?"

¹⁹ Yesusi yoa wesa deyo, "Tofino! Ne tarai kariri mandirau mang foi tuti ne inontarai wenotisa to ne muniara mandirau foi. Na rahida mandirau mang foi minohi riasa nanai ewepuasa rai e?"

²⁰ Wape rahida we mandiraufoi niayai na nanai riasa ahang kaha foi ambori da ma ki, rabuang bonani dino ambori ewepuasa ki. [Tonanai kontai, nina mani inayai riasa ampare ewepuasa kaha, wape rahidao ambori ira werusa foi da ma ki, rahida nanai aino ewepuasa ki.]

²¹ Manei ne ansung mamo feai tai mani wiro dawa kobuai na ireu aburung waworu fea kaha, weo nana mani ireu aburung waworu fo yabi we ansungfo ambori ansung mamo fo mayabu fo fuba aha.

²² Tonanai kontai we angguri waworu nei mani, wiro ariri to aderi sapi rerawa memo bei kaha, weo angguri weworu foi ambori wiwua wedaya aderi sapi rerawa memo foi tei. Nana mani anggurifo tibatara, aderi sapi rerawa foi kerirawa. Wape angguri weworu foi ariri tono aderi sapi rerawa weworu bei kontai."

Farisifosa etinggai Yesusi we niarifi na rahida Sabati foi (Matiusi 12:1-8; Lukasi 6:1-5)

²³ Na rahida Sabati bei, amani rahida Yahudifosa erufi nai kaha dine, teterai we Yesusi era riria romi potang bei, ampafe ne inontarai erariati fosa etetingno potangfoi, etani.

²⁴ Ampafe Farisi manea emadu eteyo, "We fianie nemu inontarai eraria wau wasa enari fi tonana fo na rahida Sabati nei nina? Enari tonana mani etohong roaing kaiwo dotu weduara fo."

²⁵⁻²⁶ Ainanaya Yesusi yo wesa deyo, "Finana mani ne tarai toyari fi Mananu Dauti niari na fafongfa na rahida bo Abiatari weimami fuba foi. Metato kariri kaiwo nana kaha e? Amani i tuti ne mano erariati fosa ewawisi fo, ampafe suai to Sempaisi ne Munufoi afui dangno roti

etutang tutirai we Allaia fo tuti dohonai we ne mano erariati fosa etang kontai. Wape finanai, kariri hukum agama foi mani, imami eruvi na Sempaisi ne Munufoi saino etang tera ne."

²⁷ Ainanaya Yesusi medu aha deyo, "Rahida Sabati nei mani Allai niariri we fiata inontarainesa, wiro niari inontarainesa we etohong kariri rahida Sabati nei kaha.

²⁸ Ampafe Kaisung Inontarai nei weSeng we rahida Sabati nei kontai, [ampafe wemambiri woe deiriri kariri fianai aino na rahida Sabati nei mani inontarainesa enari fo, tuti fianai aino enari kaha fo]."

3

Narahida Sabati bei Yesusi niari inontarai warang bei mireha foi denteng

(Matiusi 12:9-14; Lukasi 6:6-11)

¹ Na rahida Sabati bei Yesusi daraberahi to munu agama Yahudi foi aha. Inontarai warang bei mireha manei niayai na nana.

² Tuti na nanai inontarai manea euremifo dingga Yesusi weo niari inontaraifoia denteng na rahida Sabati mani, ambori etinggairi, eteyo niari sarawai. Manamo Yesusi deitawang fi enemituata fo.

³ Ampafe medu we mano warang bei mireha nani deyo, "Ro ma boari na fongne."

⁴ Ainanaya dutang bera inontarai etoari na nana fosa deyo, "Kariri Hukumi

Musai soi fo mani, ne doni aino tanari na rahida Sabati fine, tanari ne bengfo ete ne karirafo ne? Tafata inontarai ambori etarang, ete tamunsa re?" Kaiwofo disang inontaraifosa, ampare mane deiobu kaiwofeai ahang kaha.

⁵ Yesusi kesou, deti maino kaiwasafai sentenang, wape enerorongfoi fituayai paria kontai we enumikamiei mitubaru fo. Ainanaya medu we mano meninang foi deyo, "Wi waramuwai ma." Inontaraifoi si warangfoi kaririaria, na tatofang kutu nanai kontai warangfoi dentengna.

⁶ Farisifosa ewati finanafo wiro eparaise kaha, mae era to boriei weru munu agama foi tuti emadu ruhiairia Mananu Herodesi ne inontarai erariati fosa we ambori emungno Yesusi.

Kaiwasa bitoya foi eraria Yesusi

⁷ Na nanai Yesusi tuti ne inontarai erariati fosa efusuhiai to ruru Galilea foia. Ampafe inontarai bitoya paria na Galilea era ria Yesusia. Wiro kaiwasa na nu Galilea foi tera kaha, mae na katai waroi fo kontai era ma, amani kaiwasa na nu Yudea foi,

⁸ tuti na bendari Yerusalem, na nu Idumea foi, tuti kaiwasa na Yardeni dereung domurang foi. Kontai kaiwasa na katai watai kahefang na bendari Sidoni tuti Tirusi fo. Kaiwasa nani kiai era we Yesusi ma, we etaramio fianai aino niaria fo fefe.

⁹ Kaiwasafai bitoya kererai, ampare Yesusi demi ne inontaraifosa emainenang wafeai wei, weo mimeatai we dohonao kaiwasa bitoya foi esawaria doa mimoya kaha fe.

¹⁰ Weo na nanai niari kaiwasa bitoya ebeng, ampare kaiwasa fuba meninang foi esawasa we ewarami disangso Yesusi ne taraifoi.

¹¹ Tuti inontarai nuaninu kerira dohonsa fosa, na doni kontaio ewati Yesusi mani, etawai aweu etisangkapa eawemibuka na arongreafo, ebibe esahu, "Wau mani Allai ne Kaisung di wau."

¹² Wape na tapapa Yesusi sua nuaninu karira fosa we esahu tutiri fanai.

*Yesusi diri inontarai ewesuraya mandu erariati
(Matiusi 10:1-4; Lukasi 6:12-16)*

¹³ Mayeai Yesusi dautai to wiwoi bei tuti sahu inontaraio enerorong dohong we dirisa fosa, tuti inontarai sahusa nanisa era weia.

¹⁴ Tuti diri ewesuraya mandu na sa we ewerasuli* fosa, dirisa we eweririati. Demisa era wa ewuwu Kaiwo Mahikai ne,

¹⁵ tuti dohong mambiriu wesa ambori etata nuaninu karira fosa.

¹⁶ Inontarai suraya mandu nanisa ewonomi fino, Simoni mano sahui we Petrusi foi,

¹⁷ Yakobusi tuti ne tahatui Yohanesi, uru mani Zebedeus ne kaisung surui ne. (Inontarai nini suruino sahu suru kontai we Boargenesi

* **3:14** Amani Inong Anatu na Sempaisi.

amani netawe Kaisung Kadidu.)

¹⁸ Andareasi, Pilipusi, Bartolomasi, Matiusi, Tomasi, Yakobusi (Alfiusi ne kaisung-foi), Tadeusi, Simoni (mano biriu we inontarai Israeli fosa etoa siai weru Romafosa foi).

¹⁹ Tuti Yudas Iskariotio mano ambori dewayang Yesusi foi.

Farisifosa etinggai Yesusi we sobu ne mambiriu ria Barsebuli

(Matiusi 12:24-32; Lukasi 11:14-23)

Mayeai Yesusi daraberahi to munu minohi nai foi aha.

²⁰ Na nanai kaiwasa bitoya era aha ma efanduhisa nayai. Kaiwasafa bitoya paria wedaya Yesusi tuti ne inontaraifosa esobu rahida we etampi kaha.

²¹ Yesusi ne terafosa etaramioai weo Yesus wiro dampi kaha, Ampafe eteo era we ehari. Eteyo, "Yesusi toyari we fiauwo ampa."

²² Mantaunau Hukumi Musai soi fosa, mano era na Yerusalemia fosa, emadu eteyo, "Yesusi mani, Barsebuli[†] amani inggirafosa ene mananufoi donti, ampafe dohong mambiriu wei doni data inggirafosa nina."

²³ Ampafe Yesusi sahu kaiwasa bitoya foi ma tuti deiriri fiywansoafeai wesa. Deyo, "Tofino, Saminseninei data mantauni ne nuaninu karira ne rai e?"

²⁴ Negara bei wiro weboyari kaha mae ebabausa tuti eweaiteta wawerasa,

nana mani negara nani doa pampang rai e?

²⁵ Tonanai kontai na munu rorong bei, wiro eweboyari kaha mae eweaiteta wesa pampang, nana mani ambori munu rorong bonani wiro doa pampang kahai ki.

²⁶ Tonanai kontai we Saminseni, masino Saminseni dapa bera mantauni aha mani, ne munu rorong foi tiabau finanai. Nana mani ambori ne mananufo nayai mutu kaha mae wioru ki.

²⁷ Nuaninu karira fosa ene tarai kariri we-wemambiriu manei minohi na ne munufoi. Tuti manei wiro suai to ne munufoi afui we wewu ne rafoi kaharai, mae wenani tefu mambiriufolia wiorahi akawuru wo, ambori wewu ne rafoi ki. Ampafe na yata nuaninu karira to borai ne yeinawiai we ikaraikobu Saminsenia.

²⁸ Tarai, imadurai we mea mau yeyo, sasari fuba inontaraine enariri nei kiai Allai deiairi ki, tuti eteibera Allai konta fo, mae sasari tonana nei Allai deiairi kontai.

²⁹ Wape eteibera Nuaninu Mirarebana foi mani, na todoni feai kontao Allai deiai ene sasari tonana foi kaha. Weo sasari bonani mani sasario feriri na wea kaha dine."

³⁰ Yesusi medu tonanai, we inontarai manea eteyo, "Nuaninu kerira foi sensoni i fefe."

Yesusi inanai tuti ne tahatufosa

(Matiusi 12:46-50; Lukasi 8:19-21)

[†] 3:22 Barsebuli mani, Saminseni wowong siai feai aine.

³¹ Mayeai Yesusi inanai tuni ne tahatuifosa era wei ma. Etoari na borieifo, mae etanatu kaiwo ariri we Yesusi afui, ambori da to boriei.

³² Na nanai kaiwasa bitoya paria eminohi wari Yesusi, tuni emadu wei eteyo, "Daie, inamuai tuni nemu tahatuifosa etamang na borieife fo eteyo emadu ria wau."

³³ Manamo Yesusi yoa wesa deyo, "Mandoni saino isahusa we nehu ai tuni nehu tahatui ne?"

³⁴ Ampafe seite kaiwasa eminohi wariri foi sentenang tuni medu wesa deyo, "Botia, nehu ai tuni nehu tahatui sai nina.

³⁵ Inontarai mandoni niari kariri nehu Dai Allai ne dawiafo mani, andino isahui we nehu tahatui mang ne, nehu tahatui wiwing ne, tuni nehu ai ne."

4

*Fiyiwansoai kariri
mangkafa aibong*
(Matiusi 13:1-9; Lukasi 8:4-8)

¹ Na rahida bei Yesusi da wa deunau na ruru Galilea foi aha. Na nanai kaiwasa katui ahang kaha era wa efanduhisa wariri, ampafe dautai to wafeai awa dewohi nayai, mae kaiwasa bitoya foi minohi na reifo.

² Ainanaya Yesusi deunausa na ne fiywansoai bitoya. Na ne aunaufu, medu wesa deyo,

³ "Metarami ma. Weniaromani manei kia aibongfei da wa we sanami.

⁴ Da wa kifa aibongfoi nana mani eai sawai na rangfoi,

ampafe romufosa esifo ma etania kiaia.

⁵⁻⁶ Eai kontai sawai na kahofa wekamamie i wowongfo. Aibongfoi sikera sa rerorifoi tonanai meai, wape kameaia wofoi piara nanai siamorang aha, weo kahofafo demoyarai we newafo so aweu kaha fefe.

⁷ Eai aha mani sawai na katai weninoi ababo foi, ampafe ninoi ababo foi sifu tamui tuni kehepania memasara ampafe wiro webong kaha.

⁸ Wape aibongfeai aha mani sawai na kahofa beng fea, ampafe sifu biriayai paria tuni webong beng, dohona mani webong bitoya paria, wei wepiareiasura (30), wei kontai wepiatoru (60), wei aha mani wepiaring (100)."

⁹ Yesusi deiriri fiywansoafioa kiaia nanai, deituarai aha deyo, "Mewemetarami mani metaramioai."

Yesusi ne mano erariati fosa efeari kariri fiywansoafioi

(Matiusi 13:10-15; Lukasi 8:9-10)

¹⁰ Kaiwasa bitoya foi era tateraia. Yesusi mesiri nanai, ne inontarai ewesuraya mandu fosa tuni mano erariati fosa, etutani we deikariri kariri fiywansoai nani mani medu kariri fiffiani?

¹¹ Ampafe Yesusi yoa wesa deyo, "Mea mani Allai dohong awai we mea, we mewaitawang kariri ne weMananu rorong fo tuni fi

dediwara fo ampa. Wape inontarai siai fosa yeunausa na fiywansoai terai,

¹² ambori, kariri kaiwo nabi Yesaiai soi fo, amani dotu tono:

'Ambori ewatioaia ewati wawurai,

wape etafura kaha.

Etaramioaia etarami wawurai,

wape ewaitawana kaha.

Kaiwone ne tarai tonanai, ambori wiro etaraberasa we Allai ma tuti feriri ene sassari-
foi fanai.*"

Yesusi medu bau kaiwo kariri fiywanso mangkafa aibong foi

(*Matiusi 13:18-23; Lukasi 8:11-15*)

¹³ Mayeai Yesusi medu wesa aha deyo, "Metafu fiywansoai nini kaha e? Tonana mani fiywansoa siai wei fo ambori metafurai todoni ki?

¹⁴ Metarami ma. Mano da kifa aibong foi mani, wedeiriri Allai ne Kaiwofoi dine.

¹⁵ Aibong sawai na rang-foi mani, yiwanso inontaraio etarami Sempaisi ne Kaiwofo kariri todoni weMananufo. Wape Saminseni da ma dewa Kaiwo etaramioa fo werusa.

¹⁶ Mae ne tarai tonanai kontai we aibong sawai na kahofa wekamamieie wowongfo, amani yiwanso mano etarami Kaiwofo, tuti enemirorongfoi mirising weai.

¹⁷ Wape Kaiwofo wiro wenewa na enemirorongfoi kaha, ampafe etawansa

tourai mae esodai dadirafeai kariri ene eroasoai tonana foa mani, wiro etoaria mutu ahang kaha, mae esu to fuia.

¹⁸ Mae aibongno sawai na katai weninoi ababo fo mani, yiwanso mano etarami Kaiwofo,

¹⁹ wape earomikuayai karerai we fi nunei tuti ra nunei sofa enemirorongfoi ao sau weai, tuti fianggeng bitoya enemitituai wei foi suai to enemirorongfoi afui, kepang Kaiwofo paria wiro webong na sa ahang kaha.

²⁰ Mae aibong sawai na kahofa beng fo mani, yiwanso mano etaramio Kaiwofo, etonai afui naya mutu na enemirorongfoi. Ne tarai to-yari aibongfoi wetarai bitoya fo, wei wepiareiasura (30), wepiatoru (60), tuti wepiaring (100)."

Padamarang tabung weduari na babeu

(*Lukasi 8:16-18*)

²¹ Yesusi medu aha soirio fiywansoai bei aha deyo, "Tofino mewatioai kawuru na weaifa we manei kiai padamarang bei tuti tebung weduari na babeu bei ampa ne, ete dediwari na fata arowawahifeai fa ampa ne? Ete padamarang nani yuaisi awiai sawai paraifa ne?

²² Weo fio adiwara ne kiai ambori atioai ki, tuti fio ohonai we kaiwo werorong fo kiai kontai ambori tarami parai ki.

²³ Ampafe mandoni dino wetarang mani taraoaifa."

* **4:12** Yesaya 6:9-10

²⁴ Ainanaya Yesusi medu aha deyo, "Ampafe menemitiuai saua weai paria kariri fianai aino metaramioai ninai.

Ampafe mene metitua we inontarai siai fo mani, Allai yu we titua mea nayai kontaki, tuti ambori ne dohonai we mea fo fuba sewa aha ki.

²⁵ Weo mandoni dino sobu awaifo ria Allai kawurua fo, ambori sobuafu fuba aha. Wape mano sobua kaha foi, ne kutu nayai nai fo kontaki weruri ki."

Fiyiwansoai kariri patibuosifu

²⁶ Yesusi medu pari aha deyo, "Allai ne weMananu rorong ne mani ne tarai toyario ninai: inontarai maneida wa sanang patibu na ne romifoi.

²⁷ Sanamia kiai, mayeai daraberahi to ne munufoia, diru rahida firandeng ne romifoi. Mae patibufoi sifu pampang paria wetarai. Ampafe wiro deitawang kariri todoni sifu fo tuti awa wetaraifo kaha.

²⁸ Kahofa sanami nai foi andino wedayari wetaraifo, reantenang mani sa nenggaingfoi ariei, mayeai nebufoi, tourai aha mani ne bongfoi aha.

²⁹ Tuti masino patibufoi miraia mani, inontaraifoi da wa detinia."

Fiyiwanso Allai ne Mananufo kariri sawi bong

(Matiusi 13:31-35; Lukasi 13:18-19)

³⁰ Yesusi dutang berahai aha deyo, "Allai ne Mananu

rorong foi mani ne tarai todoni e? Ete tariwansoai na fiyiwansoai todoni bei ne?

³¹ Ne tarai toyari fiyiwansoai nini. Sawi bong bei, manei kiariao sanami na ne romifoi. Tawaitawanai we sawi bongnei mani ketui sewa raung bong ninja kiai.

³² Wape sifua mani, andino fiabai sewa ne, weo werobong tuti wearirawang, ampafe romufosa wea mani esifo ma enari aisangging na arirawangfo."

³³ Yesusi deunau inontaraifosa mani, deunau na fiyiwansoai bitoya kariri fi ewaitawana fo.

³⁴ Na doni kontai Yesusi deunau inontarai siai fosa mani, deunau na fiyiwansoai. Wape medu we ne inontarai erariati fosa tera mani, deiriri bauraia kasau wesa.

Yesusi deikutu dedukafoi mering

(Matiusi 8:23-27; Lukasi 8:22-25)

³⁵ Na ramindena bonani kontaio, Yesusi medu we ne inontarai dirisa fosa deyo, "Tawo to ruru eneung dowaruai."

³⁶ Ainanaya ne inontarai ewesuraya mandu fosa eta ruhiae to wa Yesusi dewohi nai foi tuti ebari arawing, etafai weru kaiwasafai. Wa siai wei fo kontai etafai riatai.

³⁷ Waroi ahang kahai mae dedukafoi bia, andeisafoi dipuo wafoi tuti dutuwia adareti etaisui.

³⁸ Wape na wodo wafui foi Yesusi dena deirukang airukang bei. Ne inontarai erariati fosa esahu ebauni,

emadu wei eteyo “Dai Mantaunaune waune, tanai rai, mae enemutituai towea kaha e?”

³⁹ Yesusi doabariri somara wanangfoi, medu we rurufoi aweu deyo, “Nemuboru fotou biane to.” Ainanaya wanangfoi fiotou siafoa tuti rurufoi mering na tantumara.

⁴⁰ Ainanaya medu wesa deyo, “Todonie mematai nina? Tuti todonie meroaso yau kahai nina?”

⁴¹ Ampafe ematai paria tuti emadu waweresa eteyo, “Inontarai nini mani mandoni dine antu ne, donio sua wanangnei tuti andeisanei mani mering kaririai nina?”

5

*Yesusi niari inontarai inggira dohoni manei denteng
(Matiusi 8:28-34; Lukasi 8:26-39)*

¹ Mayeaia mani Yesusi tuti ne inontaraifosa etarafuio nafarengfo na ruru eneung dowej fo, na katai wonong fino Gerasa.

² Yesusi arahio soa awengfo to kataifoi aweu rai mae, mangno inggira dohonia wefiauwo manei kiawariai na fafo rorong fo da wei ma.

³ Inontaraifoi niayai na nanai, weo manei kontaio wiro wemambiriu we yu weduari kaha. Worahi na wai besi fo tuti na forafo kontai mae mirari finanai.

⁴ Weo kawurua ewora warang aweng na waia mutu tonanai, wape fi eworahi nai nanai fiokahutuai tuti fiokahirairai. Wemambiriu

paria ampafe mandoni kontaio yu weduari kaha.

⁵ Diru rahida niayai dari funomai na fafofo tuti na wiwoifo. Da mae sahu dohonai tuti tetuhing wawera ne taraifoi na kamamiei.

⁶ Niayai da tonanai, paria deti Yesusi na waroi nanai mitoa disangkapa awebuka na arongreafo.

⁷ Ainanaya bibe na mambiriu deyo, “Yesuse, Allai mano dedai sewa nei ne Kaisungne Waune, boyo bohong yau tofino? Na Allai wonongne yeyo mung kanggani yau fanai.”

⁸ (Inontaraifoi medu tonanai, weo Yesusi medu wei kawuru ampa, deyo inggirane waune ro kahairai weru inontarai nini.)

⁹ Ainanaya Yesusi dutang berahi deyo, “Wonomu fidoni?” Yoa wei deyo, “Wonohu fino Raifi, weo amefau paria fefe.”

¹⁰ Dutang Yesusi pampang deyo, wiro data inggirafosa era weru kataifoi fanai.

¹¹ Kefang na kataifoi, na wiwoi tarareifo mani, fiai rabuangnei enaya esung.

¹² Ampafe inggirafosa etutang Yesusi paria eteyo, “Bomi amea amesuai to fiai rabuangfoia.”

¹³ Yesusi yoa we fi eteyoa fo ampafe inggirafosa era to boriei, tuti esuai na fiai rabuangfoi. Wedaya fiai rabuangfoi, rerai we ewepiaura wesura (2.000), mito beyaria sea na katai kenataterafo to rurufoi aweu, mirarehara kiai anina.

¹⁴ Mano ewaitawang wedua fiai fosa ewati fitantumafe nanafo emitoa etaiririai na bendarifoi tuti na munue watai ruramai na nana fo we kaiwasafrai. Ainanaya kaiwasa na munue fosa era wa ewati kariri finanai.

¹⁵ Era mao Yesusia nanai ewati inontaraifoi we rai inggira foi da weruia, mae minohi sensunia tuti medu funomai aha kaha. Ampafe ematai.

¹⁶ Mano ewati te fitantuma Yesusi niari we inontarai inggira dohoni foi, tuti fianai aino fiaifesa esodairai nana fo, eteikaririai kariri fianai aino ewati terai nanai we kaiwasa era ma fosa.

¹⁷ Ainanaya kaiwasa na kataifoi, ematai paria amparefetutang Yesusi paria we dontai weru ene kataifoi.

¹⁸ Yesusi deyo dau to wafoi mani, inontarai rai inggira foi tifa weruia nani dutanai paria we dontai riati.

¹⁹ Manamo Yesusi deiayari deyo, "Barabera wau to nemu munufoi tuti to nemu terafosa mae boikaririaifa wesa kariri fianai aino Sempaisi niari we waua ninai, tuti kariri aroafu fuba funomai we waua wa."

²⁰ Ampafe inontaraifoi da wa, wiuwuo fianai aino sodaira fo tuti kariri fianai aino Yesusi niari wei fo na nu Dekapolisi foi sentenang. Tuti kaiwasafrai pepuhung paria we kaiwofo.

Yesusi niari Yairusi ne kamitungfoi denteng, tuti wiwingno denteng aha na

*warang disangso Yesusi
(Matiusi 9:18-26; Lukasi 8:40-56)*

²¹ Ampafe Yesusi daraberahi to rurufoi eneung dowej foi aha. Na nafarengfo kaiwasa bitoya era ma eminohi wariri na nanai.

²² Mayeaia mani inontarai wenunggamie i we munu agama Yahudi manei da we Yesusi ma, i wonong fino Yairusi. Deti Yesusi nanai disangkapa awebuka na arongreafu,

²³ tuti dutani na enetawani paria deyo, "Nehu kamitung mansiari foi meninangna adareti mireha. Wape yutang we wau roa ruai waramuwara wa sauwi ambori denteng aha tuti mireha fanai."

²⁴ Ampafe da riati. Tuti kaiwasa bitoya era riati, ewaramisiayasa pariao ene tarai sopapari kontai.

²⁵ Na kaiwasa bitoya nani, wiwing manei meninangno rika defairi. Sodai maninang nani defuina suraya boru ampa.

²⁶ Ne ra minohi tutira fo dohonaia kai we biai manggarawangfosa nayai, ambori enariri denteng. Sodai dadira bitoya na ewaramifo, wape enaria tafai kiasa mae ne maninangfoi miraba aha.

²⁷ Wiwingfoi tarao kaiwo bitoya kariri Yesusi ampa. Ampafe na kaiwasa bitoya foi nani, fiononami fantamai ria Yesusi na kurufuifo tuti warangfo disangso ne ansungfo.

²⁸ Weo enetituitaitai deyo, "Warahunei disangso ne ansungfo terai ki, ambori yenteng ki."

²⁹ Na kutu nanai kontaio rika defairi foi fiotouraia, tuti niuruainsoai we dentengna.

³⁰ Na kutu siari nanai kontai Yesusi niuruainsoai we mambiriufea kawariai nai to boriei. Ampafe deti wari kaiwasa bitoya foi tuti dutansa deyo, "Mandoni dino warang disangso nehu ansungfi ne?"

³¹ Ampafe ne inontarai erariati fossa eberahi aha eteyo, "Daie, botioai we kaiwasa bitoya nei esawasara adareti ro mimoya ahang kaha. Mae butanai we mandoni dino warang disangso wau fe nina e?"

³² Manamo Yesusi miaya we taraoa kaha mae deti wari kaiwasa bitoya foi we mandoni dino warangfe disangso ne ansungfe fo.

³³ Wiwingfoi deitawanaifa we fianai aino sodairai nanai, tuti mitaia rirora. Saha afong disangkapa awebuka na Yesusi arongreafu, mae deiai kariri fianai aino anta niari fo.

³⁴ Ainanaya Yesusi medu wei deyo, "Kamitungne waune, nemu roaso yau wa wedaya bonteng ampa. Ampafe ro na maia. Tuti maninangfi kiai weru wau ampa."

³⁵ Yesusi doa medu tonana rai mae, inontarai maneiru teaio etemisa era na Yairusi, mano wenunggamieie we munu agama Yahudi foi, ne munufoi ma fossa, emadu we Yairusi eteyo, "Daie, nemu

kamitungfi mireha ampa. Ampafe wiro ka anseung Dai Mantaunaunei ahang fanai."

³⁶ Yesusi kiobu tarang we ene kaiwofo, mae medu we Yairusi deyo, "Mutai fanai, mae roasoi terai."

³⁷ Ainanaya Yesusi da paria, wape wiro yoa we manei da riati kaha, mae kia te Petrusi, Yakobusi tuti ne tahatuio Yohanesi.

³⁸ Era wa sobu mano wenunggamieie we munu agama foi ne munufoia nanai, deti kaiwasa bitoya foi esaia etaidu paria.

³⁹ Ainanaya Yesusi suai afui suasa deyo, "Fianang dino mehobu tuti mesai wei ne? Arikangwai wiro mireha kaha, mae dena."

⁴⁰ Ampafe emarari Yesusi paria.

Mamano datassa kiai era to boriei, ainanaya kia mambewangfo suru tuti ne inontarai kia sitoru fo sitoru, esuai to rorong arikangfoi wiatai nai foi afui.

⁴¹ Yu na arikangfoi warangfo medu wei deyo, "*Talita kum,*" nana mani deyo "Kamitungne waune, boa to."

⁴² Na kutu nanai kontaio kamitungfoi doabariri tuti da (weo ne defuina suraya boru ampa). Mambewangfo suru tuti Yesusi ne inontaraifo sitoru itowati fitantuma nana ampafe itopapuhung paria.

⁴³ Wape na tapapa, Yesusi deipi sitoru we wiro itoraiririai we inontarai siai fanai. Ainanaya dei we suru deyo "Murohong arikangwai

dampi."

6

*Kaiwasa na munue
Nazareti eteiaya Yesusi
(Matiusi 13:53-58; Lukasi
4:16-30)*

¹ Na katai nanai Yesusi daraberahi tuti ne inontarai dirisa fosa to ne munuefo aha.

² Na rahida Sabati foi, da wafui deunau na munu agama Yahudi foi. Kaiwasa bitoya paria efanduhisa na nanai. Etarami Yesusi ne aunaufe nanai epapuhung paria. Emadu waweresa eteyo, "Inontarainei sobu auna ria mandoni weo deunau nina? Tuti awai todoni fino wedayari biriu ninai? Tuti todoni niari fitantuma fenina?

³ Waitarahio i mani mano deitawang niarifi na aifi dine mae? Tuti Mariai antungfi dine. I mani ne tahatui saino Yakobusi, Yosesi, Yudasi tuti Simoni ea mae? Tuti rorowingfo sitoru itominohi kontai na munuefe ninai mae?" Ampafe emaya wei kahai mae eteiayaria.

⁴ Ainanaya Yesusi medu wesa deyo, "Nabi manei na ne munuefo tuti na ne arurara fosa mani etatori kaha, wape na katai siai mani etatori."

⁵ Na katai nanai Yesusi niari fitantumafeai bitoya kaha, mae inontarai itomaninang maneiru teai aino niari sitoru itobengfo, amani na yuai warangfoa wasau sitoru tuti itobeng.

⁶ I pepuhung paria we todonie eroasoa kahai nina.

*Yesusi demi ne inontarai
suraya mandu fosa
(Matiusi 10:5-15; Lukasi
9:1-6)*

Mayeai Yesusi da wari munue watai na nana fo tuti deunau nayai.

⁷ Sahu ne inontarai ewesuraya mandu fosa ma, demisa wemandiru tuti dohong mambiriu wesa we etata nuaninu karira fosa nayai.

⁸ Deretawansa deyo, "Dohonao meha fieai ria mea na mene rang rorong ne fe, mae meha te mene aitato-hiwa terai. Fiang, rotang tuti doi, fi tonanane mani wiro meha fanai.

⁹ Metata te mene sapatuwa, wape wiro mesansung an-sung beru fanai."

¹⁰ Tuti medu tuarai aha deyo, "Na munuefeai manei dutang mea we meminohi riati na ne munufoi mani, meminohi na munu nani paria mera weru munue nanai.

¹¹ Wape mera wa munuefeai eteiaya mea tuti emaya we etarami mea kaha mani, mera weru munue nanai, tuti mehafatitai kangganang niayai na meawemiwa, we fianawiai wesa kariri Allai am-bori deiayasa fo."

¹² Ainanaya inontarai ewesuraya mandu fosa era wa. Era wa ewuwu Kaiwo Mahikai fo we kaiwasafosa, we todoni kontaio esahera etauberasa weru ene sasar-ifoi.

¹³ Na ene rang rorong fo nanai etata nuaninu karira bitoya, tuti esari maning

saituni na inontarai emaninanng enenumikamieifo tuti enarisa ebeng.

*Kaiwo kariri Yohanesi
mano webaptisi kaiwasa foi
mireha toa fo*

(*Matiusi 14:1-12; Lukasi 9:7-9*)

¹⁴ Kaiwo kariri fitantuma Yesusi tuti ne inontarai dirisa fosa enari fo dafai wariai pariao mananu Herodesi taraoai kontai, weo Yesusi wewonong paria fefe. Ampafe manea enemittiuai we Yesusi eteyo, "I mani Yohanesi mano webaptisi kaiwasa foi dine, andino suwi na marareha rorong fe aha ma nina. Ampafe doni wemambiriu we niari fitantumafe nina."

¹⁵ Wape manea siai emadu eteyo, "I mani nabio Eliae dine." Manea siai kontai eteyo, "I mani nabi kariri nabi fafong fasa manei dine."

¹⁶ Herodesi tarao kaiwofo nanai deyo, "Wiro manei siai ahang kahai mae, Yohanesi mano raminde yemi ehuta rahanangfi dine. Andino suwi aha ma nina."

¹⁷⁻¹⁹ Herodesi enetituitafo tonina: Rahida beiru teai ampa, kia ne tafuai* Pilipusi binengno Herodiasi ama dauti weruria fefe. Wedaya Yohanesi suari pampang deyo, "Rau nemu tafuai binengfoi tonana mani, nari roaing hukumifo paria tuti bohong sarawai paria." Ampafe kaiwo nanai wedaya bineng Herodiasi enerong pirahai weo miung Yohanesi.

Wape sobu rahida we niari tonana kaha, weo ne mangno Herodesi suari fefe. Herodesi dino demi etafu Yohanesi, eworahi wiatai na aitamu rorong foi weru Herodiasi.

²⁰ Weo Herodesi deitawanaifa we Yohanesi mani inontarai denteng dine, tuti Allai dino demi ma ne. Ampafe Herodesi mitai Yohanesi paria, dohona mani demi ne rai mamuna ewaitawang weduari na aitamu rorong fo. Tarao Yohanesi medu mani weansarai paria, wape pirate we ne kaiwofo kontai.

²¹ Tonanai ki wape binengno Herodiasi sobu rahida kontai we miuni, amani na rabuang bo Herodesi dohonsua ne rahida saubaunung nai foi fo. Rahida bonani Herodesi dohong muniara we ne inontarai mano eru wang dadai na katai fosa, afai mamuna baba fosa tuti mano ewewafoniai we kaiwasa na nu Galilea fosa.

²² Na muniarafoi Herodiasi antuwingfoi da wa mikai dari na euremireafo. Ne mikaiifo kia enemirorongfoi paria, ampafe Herodesi medu wei deyo, "Fianai aino butang weai ria yau ne mani, yohoni kiai ki."

²³ Ampafe, Herodesi fefora deyo, "Fianai aino butang weai we wobua fo mani ambori yohong kaririai ki, pariao yohong nu iruti nini dowej we wau kontaio yohong kaririai ki."

²⁴ Ainanaya kamitungfoi da wa dutang inana deyo,

* **6:17-19** Ete ne tahatui.

"Aie, fianai aino mai we yutang weai fa ne?" Inang yoa wei deyo, "Fi butang weai fa mani Yohanesi mano webaptisi kaiwasa foi nunggamieifoi."

²⁵ Tatofung kutu nanai kontai, kamitungfoi daraberahia medu we Herodesi deyo, "Yeyo na kutu ninai kontaio bohong Yohanesi mano webaptisi kaiwasafoi nunggamieifoi biaini na rewangguai timba bei we yau."

²⁶ Herodesi tarao kaiwofe nanai enerorongfoi fituayai paria. Manamo gefora kawuru na mano wenotisa fosa euremireafoa, ampafe wiro deiayari ahang kaha.

²⁷ Ampafe demi ne afai mamuna fo manei we kia Yohanesi nunggamieifoi ma. Ainanaya afai mamuna foi da to munu aitamu foia, ferang kutu Yohanesi rahanangfoi nayai.

²⁸ Mayeai biaini na rewangguai timba bei, kiari ma dohoni we kamitungfoi. Ainanaya kamitungfoi kiari aha dohoni we inana.

²⁹ Yohanesi ne inontarai erariati fosa etarami fianai aino sodairai nanafo, era wa eha nehofoa esarayaia.

Yesusi dohong inontarai ewepiaura wering wering (5.000) etampi

(*Matiusi 14:13-21; Lukasi 9:10-17; Yohanesi 6:1-13*)

³⁰ Mayeai Yesusi ne rasuli ewesuraya mandu fosa etarabera aha ma, tuti efanduhisa ria Yesusi aha.

Eteikaririaifa kariri fi fuba enari fo tuti etaunauwa fo.

³¹ Kaiwasa bitoya paria ne da ma foi da ma, ne daraberahifoi daraberahi, wedaya Yesusi tuti ne inontarai ewesuraya mandu fosa ewawisi wape esobu rahida we etampi kaha wo. Ampafe Yesusi medu we ne inontarai ewesuraya mandu fosa deyo "Mera ma tara to katai wewui bei, ambori tameiri tata mani metenasua mene taraiwa kuteai."

³² Ainanaya etautai to wafeai etafai to katai wewui beia.

³³ Wape etafai nanai, kaiwasa bitoya foi ewatisa we etafaifo, tuti ewaitawang katai etafai wei foi. Ampafe kaiwasa bitoya na bendari nana fo emitio ewerurang reifo, etamang na katai etafai wei foia.

³⁴ Etafaia sobu nafarengfo Yesusi biari arei mani, deti kaiwasa bitoya foi we era kawuru ma enayai na nanai, detisa tonanafo arose paria, weo ene tarai toyariao domba ene pari mantahung. Ampafe deunau fi bitoya wesa.

³⁵ Deunauwa raminde-nawa mani, ne inontaraifosa emadu wei eteyo, "Daie, katainei wewui tuti dirufi kefang ampa.

³⁶ Ampafe mahikai mani bemi kaiwasanei etarabera aha, ambori ewawori fiang na bendari tuti munue watai ruramai na nina ne we etang."

³⁷ Manamo yoa wesa deyo, "Todoni kontaio meaino metohong fiang we etang."

Ainanaya emadu wei eteyo, "Ampafe amera wa amewori rotio harga doi dinario[†] piaring weberu (200) ma we kaiwasa fuba nini etani e?"

³⁸ Ampafe Yesusi dutansa aha deyo, "Meha roti beirua? Mera wa mewatioai." Ainanaya, era wa ewatioaia, tuti emadu we Yesusi eteyo, "Roti tarai ring tuti diang mandu."

³⁹ Ainanaya Yesusi demi kaiwasafoi we eminohi weraibuang na ninoi wowongfo.

⁴⁰ Rabuang bei mani ewepiaring, mane aha mani ewepiarua sura, ampafe eminohifo weraibuang tonanai.

⁴¹ Mayeai Yesusi kia roti ring fo tuti diang mandu fo, fioai ureng deti to rorafaisi tuti dutang tuti fiangfo we Allai. Ainanaya fioabau rotifo na warangfo, ambori dohonai we ne inontaraifosa we etatorai we kaiwasa bitoya foi. Niari we diangfo suru tonanai kontai.

⁴² Tuti kaiwasafoi dampi ao memosi beyari.

⁴³ Mayeai ne inontaraifosa efanduhi fiang seari foi aha mani, dangno bayai suraya boru sefang.

⁴⁴ Wape kaiwasa fuba dampi foi mani, mangfosa terai ewepiaura wering wering (5.000).

Yesusi da na mereha ruru wowongfo

(Matiusi 14:22-33;
Yohanesi 6:16-21)

⁴⁵ Na kutu nanai kontai Yesusi demi ne inontarai ewesuraya mandu fosa eta wafo etafai fafong to ruru eneung dowej foi ahawaru, amani to katai wonong fino Betsaida foi. Mae mantauni niayaifa, demi kaiwasa bitoya foi daraberahi aha.

⁴⁶ Kaiwasa bitoya foi da wa kiaia, mayeai dautai to wiwoifoi ayai wenadi nayai.

⁴⁷ Dirua mani, ne inontaraifosa etafaia sobu ruru rabuangna. Wape mantauni niayai na reifo wo.

⁴⁸ Deti arau mani etohong rireusa beyari we etapa kare wanang fiabai foi fefe. Dirufoi waroia rerai we aha rorong, tarahio araha ureng botoru, Yesusi bia da na mereha wowongfo wesara. Da wa kefang wesa nanai, niari toyari deyo da to fong werusa.

⁴⁹ Na kutu ewatioai we da na mereha wowongfo nanai, ewaitarahio wori dine.

⁵⁰ Ampafe ematai ebibe. Weo ea kiai ewatiaoai tuti esoisa paria.

Wape Yesusi sikahera medu wesa deyo, "Mematai fanai! Menemitawanai, we Yau ne."

⁵¹ Ainanaya dautai to wa ewo nai foi ayai, tuti na kutu nanai kontaio wanangfo mering. Ampefe, epapuhung paria we fitantuma nanai.

⁵² Epapuhung tonanai weo wiro ewaitawang tururai we Yesusi ne mambiriw we dohong kaiwasa bitoya etang roti tarai ring tuti diang

[†] 6:37 Dinari bei mani mai kariri manei ne fiembatai yufi rahida bei.

mandu. Etafu finana kaha weo enumikamiei mitubaru fefe.

Yesusi niari inontarai emaninangna Genesaretifosa ebeng

(Matiusi 14:34-36)

⁵³ Ewoa sobu ruru eneung dowej foia mani, etarafui na nafareng Genesareti tuti etabuhi wafoi na nafareng-foi.

⁵⁴ Na kutu ebiari aweu nanafo, kaiwasa na nana fosa etaroang Yesusi.

⁵⁵ Ainanaya emitio maino munue na katai nana foi, etaiririai we kaiwasafoi we Yesusi dontaifa fo. Ampafe kaiwasafoi erufafiei inontarai emaninang fosa na andaung wowong ewatai naya fo, ehisa we Yesusia.

⁵⁶ Na katai doni kontai aino Yesusi daoa fo, na bendari ete na munuefo ne, na katai nanai kontaio eha inontarai emaninang fosa ewatai na katai kaiwasa fianduhi nai foi.

Tuti etutang Yesusi we kadono yoa wesa we ewaramifo disangso te ne ansung awerengfo ki, tuti inontarai emaninangno enari tonana fosa ebengna ehiaia.

7

Koang Farisifosa esobuai na werengfosa foi wedaya kaiwasa niari roaing Allai ne Hukumifoi

(Matiusi 15:1-9)

¹ Na rahida bei inontarai eweFarisi manea tuti mantaunau Hukumi Musai soi fo

manea ebiari na Yerusalem meu, efanduhisa ria Yesusi.

² Ewati Yesusi ne inontarai erariati fosa etampi, wape eruai ewaramifo kariri koang Yahudi foi kaha.

³ Weo Farisifosa tuti inontarai Yahudi wei fosa etohong kariri koang nani na mai paria. Ampafe eruai ewaramifo kariri koang Yahudi foi kaha mani, wiro eru fiangfo we etang kaha.

⁴ Tuti masino etaraberasa weru kondirorafoi mani wiro etampi funoma kaha, mae eruai ewaramifo kariri ene koangfoi akawuru wo. Tuti fi siai bitoya kontai na koangno weriria na ene werengfesa ma foi erutawania mitu kontai. Toyari, koang kariri ruai fi ampi naya tuti fi nunumpi naya, tuti fisiasi tonana fo.

⁵ Ampafe donio Farisifosa tuti mantaunau Hukumi Musai soi fosa etutangbera Yesusi eteyo, "We fanie nemu inontarai eraria wau wasa wiro eruai ewaramifo kariri tane koang Yahudi nei kaha, mae etampi tuti ewaramifo kariri tane koang weriria na tane werengfosa ma foi kahainina?"

⁶ Yesusi yoa wesa deyo, "Inontarai menari fayafayarai di mea, kaiwo fianai aino nabi Yesayai soi kariri mea ne wetarai ampa, amani, Allai medu deyo,

'Inontarai ninisa esomi we Yau na eboromirawa arora,

wape na enemirorong
foi niayai waroi weru
Yaua.

⁷ Ene esomi we Yau fo wiro
wefiea kaha,
aunau etaunau we kai-
wasa etohong kariria
fo mani,
inontarai nuneisa
ene aunau fine
terai,
wiro nehu aunau
fine kaha.*

⁸ Tonanai kontai, Allai
ne Kaiwo demi mea we
metohong kariria fo, meto-
hong kariria kaha, mae
mene koang weriria na
mene werengfosa aino
merutawanaia mutu ne."

⁹ Ainanaya Yesusi medu
aha deyo, "Mesawai paria we
meteiaya Allai ne Hukumifo,
ambori merutawang mene
koangfoi.

¹⁰ Weo Musai soi Kaiwofeai
dotu tonina:

'Mesomi we mene dai tuti
ai,*
tuti,

'Mandoni dino deikang-
gani ne dai ete ne
ai mani sodai aiboi
marareha fo.*'

¹¹ Wape mea mani metaunau
fi siaio na mene koangfo,
amani meteyo, 'Manei medu
we ne ne dai ete ne ai deyo,
"Fianai aino nehu ne, amani
fi we yerara dai tuti ai muru
naya ne, yohonai kawuru
wekorbani we Allai ampa",
¹² inontarai tonana nei nana
mani meteiairi we wiro fiata
ne wawafo suru ahang kaha
finana.

¹³ Ampafe na mene au-
nau metohonai tonanai we
mene inontaraifesa nanai,
deinawiai we meteiaya Allai
ne Hukumifo. Tuti fio ne
tarai tonana ne, wea bitoya
menari kontai."

*Fio kia sasari we inontarai
(Matiusi 15:10-20)*

¹⁴ Ainanaya Yesusi sahu
kaiwasa bitoya foi aha ma
medu wesa deyo, "Metarami
nari kaiwone kiai tuti meta-
furai na mai.

¹⁵ Fianai aino tatonai na
taborominei to taenemifuisi
afui fo, wiro kia rarika we
tata ambori tamasi kahai na
Allai arongreafo kaha, mae
ne kawariai na rorongfui to
boriei ne aino kia rarika ne
tuti wedaya tamasi kahai na
arongreafo ne.

¹⁶ Ampafe mewemetarami
mani metaramioai."

¹⁷ Mayeai Yesusi da weru
kaiwasa bitoya foi to munu
minohi nai foi, arahio suki
aweu minohi tonanai mae,
ne inontarai erariati fosa
eberahi we fiywansoai anta
deiriria fo aha.

¹⁸ Ainanaya Yesusi medu
wesa deyo, "Ampafe mea
kontai metafu fiywansoai
nini konta kaharai e?
Mewaitawana kahai we
fianai aino na boriei ne
taukaharai to taenemifuisi
mani wiro kia karira we tata
kahai ne ne?

¹⁹ Mewaitawanai we fianai
aino tatang ne mani taukaharai
to taenemiwairifuisi,
mayeai takaheri sayarai
aha. Tuti fiang nanai wiro
taukaharai to taenemirorong

* 7:7 Yesayai 29:13
21:17; Imamati 20:9

* 7:10 Keluaran 20:12; Ulangan 5:16

* 7:10 Keluaran

taenemituai nai foi kaha. (Na kaiwo medurai nanai deinawiai we fiang ani ne kiai mani wiro tane wori wea ahang kaha, mae tahasau we tatani kiai.)

²⁰ Ampafe fianai aino kawariai na manei enerorong enetituaitai nai foi to boriei ariei ne aino kia rarika wei ne.

²¹ Weo na enerorong-fuisi, enetituai ne karirafo, meninawa funomai, kiamananapi, miung inontarai, riraua mae niyai ria wiwing siai ete mang siai,

²² ureng fiabai we ra, enetituai we ne karira fo, pempamu, meninawa funomai na kaiwasa euremireafo, deimameatai, deiriri inontarai siai, bioi arong, tuti webonggoi.

²³ Fi fuba kerira nani, kiawariai na inontarai manei enerorongfuisi mani, andino dohonia werarika na Allai urengreafne."

*Wiwing Kanaani wiro
Yahudi kahaio yoasoai na mai
(Matiusi 15:21-28)*

²⁴ Mayeai Yesusi da weru katai nani, da to katai kefang we bendari Tirusi. Suai to munu bei na nana afui, tuti miaya we inontarai ewaitawani we niyai na nanafo kaha. Manamo mawa we dediwa ne taraifoi weru kaiwasafoi kaha.

²⁵ Ainanaya, wiwing manei ne arikangfoi nuaninu kerira dohoni, tarao Yesusi weda ma fo, ampare da wa disangkapa awebuka na arongreafne.

²⁶ Wiwingfoi mani, wiwing Yunani dine na nu Siro-Fenisia foi. I dutang Yesusi paria we data nuaninu kerira foi weru ne arikangfoi.

²⁷ Ainanaya Yesusi medu wei deyo, "Manamo arikangnesa emamoi akawuru wo, weo kaene fiangfo ohonai we fiawerafosa we etang mani, beng kaha."

²⁸ Manamo wiwingfoi yoa wei aha deyo, "Daie, tarai! Manamo fiawera ewatai na meja arowawahni nesa kontaio etang fiang nukahai tarirawai aweu fo."

²⁹ Ainanaya Yesusi yoa wei aha deyo, "Barabera waua, weo kaiwo modura wa deinawi nemu roasoawa fuba paria. Nuaninu kerira foi da to boriei weru nemu arikangfoi ampa."

³⁰ Wiwingfoi daraberahi to ne munufoia mani, deti ne arikangfoi we wiatai mamunggasai na fatafoi, tuti taraie nuaninu kerira foi da weruria.

*Yesusi niari wetarang
kiobu manei denteng*

³¹ Mayeai Yesusi da weru bendari Tirusi, da paria werurang Sidoni we nu Galilea foi aha. Da na rangno wewu rahang nu Dekapolisi foi.

³² Na nanai inontarai eha wetarang pararo manei we Yesusi ma, tarangfo wedayaria borongfo maraba kontai. Etutang Yesui we yuai warangfoa wasau wenani.

³³ Ainanaya Yesusi kia wemeninangfoi utabera weru kaiwasa bitoya foia,

mayeai suba warakeha
boru rarang tarahamireifo
suru, mayeai kendio
warangfo tuti sa warake-
hafoi rarang borongfo afui,
we waratawang taperengfoi.

³⁴ Ainanaya Yesusi fioai
ureng deti to rorafaisi,
mayeai fioanseng mambiriu
tuti medu we inontaraifoi
deyo, “Efata,” na ene kaiwo
mani, “Tifaia!”

³⁵ Ampafe wemeninangfoi
tarangfo suru utafai tuti na
kutu nanai kontaio tapereng-
foi finahang we medu na mai.

³⁶ Ainanaya Yesusi sua
kaiwasafrai we dohonao
ewuwuai funomai we manei
fe. Manamo Yesusi suasa
tonanai pampang wape eafo
ewuwuai pampang kontai
we kaiwasiai foi.

³⁷ Kaiwasa fuba etaramioai
nanisa epapuhung paria.
Emadu eteyo, “Ke, fi kiai
niari fo beng. Mano etarami
pararo fosa etarami saha,
mano eboromitamu fosa
emadu na mai.”

8

*Yesusi dohong fiang we in-
ontarai ewepiaura wering we-
bea (4.000) etampi
(Matiusi 15:32-39)*

¹ Na rabuang bonani kai-
wasa maranding paria era
ma etaramididau Yesusi ne
aunaufu. Enayai na nanai
awa ene pari fiangna, am-
pafe Yesusi sahu ne inontarai
ewesuraya mandu fosa ma
medu wesa deyo,

² “Arohuo kaiwasa bitoya
nei paria weo enayai na ni-
nai rahida botoru mau fin-
ina, tuti ene pari fiang ampa.

³ Yeyo yemisa etaraberapa
to ene munufo, wape ewaw-
isi. Dohona etawai na rang
rabuang fe. Weo manea era
na katai waroi fo ma fefe.”

⁴ Ampafe Yesusi ne inon-
tarai ewesuraya mandu fosa
eroa wei eteyo, “Na katai
manano tonina ne, ambori
amesobu fiangfeaifa na doni,
we demoya kaiwasa fuba
nini ne?”

⁵ Manamo Yesusi dutansa
aha deyo, “Meha roti beiru
wa?” Eroa wei eteyo, “Itu
kawuru.”

⁶ Ampafe Yesusi demi kai-
wasafoi minohi na kahofa
nuwowongfo, mayeai kia roti
itu fo ma, dohong mahikai we
Allai. Ainanaya fioabau roti-
fo na warangfo, dohonai we
ne inontarai dirisa fosa we
etatorai we inontarai bitoya
foi, ainanaya etohong kariri-
aia.

⁷ Tuti ene diang kutung
maneiru teai kontai, am-
pafe Yesusi mioanai kontai
mayeai demisa etatorai aha.

⁸ Ainanaya kaiwasafrai
etampia emamosia, mayeai
Yesusi ne inontaraifosa
efanduhi seafoi aha. Ne sea
efanduhi foi mani dang bayai
itu sefang aha.

⁹ Kaiwasa bitoya dampi
nani ewepiaura wering
webea (4.000). Mayeai Yesusi
demisa etaraberapa to ene
munu rorong fo aha.

¹⁰ Mayeai i tuti ne inontarai
ewesuraya mandu fosa eta-

tai to wafeai, etafai to Dalmanutara.

*Farisifosa etutang Yesusi we niari fiainawiai kariri I
(Matiusi 16:1-4)*

¹¹ Farisi maneiru teai era we Yesusi ma tuti esawari. Enari tonana weo eweanggariri ambori niari fiainawiai na rorafaisi bei wesa ambori ewaitawanai we i manida na Allai ma.

¹² Yesusi enetituitai paria na enerorongfoi kariri ene roasoa kaha fo, ainanaya yoa wesa deyo, "Kaiwasa fuinini mesaipaya paria tuti mehurumitare mene Sengfoi, ne tarai toyari mang manei kurutare ne wiwingfoi tuti dohong we wiwing siai. We fiani metutang we inari fitantumafeai we fiainawiai we mea kariri yau nina? Tarai, imadu we mea mau yevo, we kaiwasa fuinini mea mani, todoni kontaio wiro inari fintantuma siai fea we mea kaha."

¹³ Ampafe Yesusi da weru Farisifosara, dautai to wa foi tuti etafai to ruru eneung dowaruai.

*Fi kariri ragio Farisifosa
tuti Herodesi
(Matiusi 16:5-12)*

¹⁴ Yesusi ne inontaraifosa earomiporo eha rotio demoyarai riasa na wafoi. Eha roti tarai boyari kawuru.

¹⁵ Mayeai Yesusi deretawansa deyo, "Mewaitawang weduarai tuti metanansiau we ragio na Farisifosa tuti ne Herodesi foi."

¹⁶ Ampafe ne inontaraifosa emadu wawerasa eteyo,

"Dohonao medu tonanai weo tane pari rotine teai?"

¹⁷ Yesusi deitawang fianai aino emadu wea fo, ampafe feasa aha deyo, "We fianie memadu we meha pari rotife nina? Wiro metafurai tuti mewaitawana kaharai e? Menemirorongwa mitubaru paria ne?

¹⁸ Mewemeuremi wape todoni mewati kahai nina? Tuti mewemetarami wape todonie metaramioa kahai nina? Mearomiporohai ampa ne?

¹⁹ Mearomiporo roti tarai ringno raminde ifoabauraifa tuti yohonai we inontarai ewepiaura wering wering fosa (5.000) etang fea ampa ne? Tuti ne seafoi mefanduhi ma mani dang bayai beiru?" Eroa eteyo, "Bayai suraya boru."

²⁰ "Tuti we roti ituo ifoabaurai ambori yohonai we inontarai ewepiaura wering webea (4.000) fosa etangfo ampa ne? Tuti etampia kaifo mani, ne seafoi bayai beiru?" Eroa wei kontai aha eteyo, "Bayai itu sefang."

²¹ Ainanaya Yesusi medu wesa aha deyo, "Todonie paria ninai metafu kahai nina?"

*Yesusi niari weureng fafa
manei denteng na Betsaida*

²² Mayeai etafaia sobu Betsaidara, na nanai manea ebing weureng fafa manei we Yesusi ma. Tuti etutani paria we yuai warangfoa wa sauwi ambori denteng.

²³ Yesusi yu na warangfo, binti ura to bendari dereung boriei fo. Mayeai kendio urengfosuru tuti waratawang suru. Ainanaya dutani aha deyo, "Botio fieaifa ete bireri e?"

²⁴ Inontaraifoi fioai ureng detia, mayeai medu we Yesusi aha deyo, "Iwati inontarai manea era, wape iwatisa ene tarai toyari ai."

²⁵ Mayeai Yesusi waratawang urengfo aha, nanaya mani deti na maia tuti dentengna.

²⁶ Ainanaya Yesusi medu wei deyo, "Barabera wau to nemu munufoi, dohonao ro to bendarifoi afui fe."

Petrusi medua irai kariri Yesusi mani, Mananu Mampariri dine

(Matiusi 16:13-20; Lukasi 9:18-21)

²⁷ Mayeai Yesusi tuti ne inontarai erariati fosa era to munue watai na bendari Kaisarea Filipi foia. Na rang rabuang dutang berasa deyo, "Kaiwasanesa emadu eteyo mandoni di yau."

²⁸ Ampafe eroa wei eteyo, "Manea eteyo wau mani Yohanesi mano webaptisi kaiwasa fi di wau. Manea aha emadu eteyo nabio Eliai di wau. Manea aha mani eteyo nabi na fafongfa manei di wau."

²⁹ Ainanaya dutang berasa aha deyo, "Wape na mantaung mea mani meteyo mandoni di yau?" Petrusi yoa deyo, "Wau mani Mananu Mampariri fi di wau."

³⁰ Ampafe Yesusi deretawansanang we sodai dadira kariri yau, tuti daria yau pampang.

kaiwasa siai fo kariri i weMananu Mampariri fo fe.

Reantenang pari Yesusi medu kariri ambori sodai dadira fo tuti mirehafo

(Matiusi 16:21-28; Lukasi 9:22-27)

³¹ Mayeai Yesusi deunau ne inontarai ewesuraya mandu fosa deyo, "Todoni kontaio Kaisung Inontarai nei ambori sodai dadira bitoya ki. Mano ewewafonai we Yahudi fosa, imami baba fosa, tuti mantaunau Hukumi Musai soi fosa, ambori eteiyari ki. Tuti emunia mireha, wape rahida botoru aha mani suwi aha ki."

³² Yesusi meduraia kasau we ne inontarai ewesuraya mandu fosa tonanai, wape Petrusi yu bera Yesusi to fui tuti suari deyo "Modu tonana fanai!"

³³ Ampafe Yesusi kiaberahi deti we ne inontaraifosa, mayeai sua Petrusi na tapapa paria, deyo "Ro weruai, wiro weSaminseni fanai. Weo nemu kaiwo moduraifa ne mani, kariri Saminseni ne kaiwofo. Weo fi enemutituita wa, wiro kariri Allai ne enetituitafo kaha, wape kariri inontarai batang."

³⁴ Mayeai Yesusi sahu kaiwasa bitoya foi tuti ne inontarai ewesuraya mandu fosa, medu wesa deyo, "Mandoni dino deyo daria yau mani, deiaya mantauni fi dohong weai na nunei fo, tuti sodua ne aitabafoi, amani meine-

³⁵ Weo mandoni dino de derara mantauni ne ansengfoi sewa weru daria yau mani ambori ne ansengfoi wioru ki, mae mandoni dino na nufi ninai enewawu yau tuti nehu Kaiwo Mahikai ne, awao wonohune wedaya tarahi mireha kontai ki, i ambori sobu numainufo ki.

³⁶ Ampafe manei yurai we sobu nunei sentenang, wape ambori nuaninufoi wioru tuti sobu numainufo kaha mani, we fiane yurai karerai nina?

³⁷ Tuti fianai aino dohonai we yiwang nuaninufoi nai aha fo?

³⁸ Kaiwasa fui nini mani, eroaso yau aha kaha tuti enari sasari bitoya, toyari mano etohong we wiwing siai ete mang siai aha fo. Manamo mandoni mimaya we yoa tuti yau tuti nehu Kaiwone, nana mani Kaisung Inontarai nei kontai mimaya we yoa tutiri ki. Niari tonanai na rabuang bo daraberahi na Dai Allai ne sambewaraio dadai fo to nunei aha ma. Na rahida bonani, wewai rabuang emararehana fosa eweririatu ki.”

9

¹ Yesusi medu aha deyo, “Tarai, imadu we mea mau yevo, na mano metoari na nina ne mea, manea wiro emarareha kahai paria ewati te Allai ne weMananufo da na mambiriu ma fo.”

*Sempaisi deparanding
Yesusi na uai wowongfo
(Matiusi 17:1-13; Lukasi*

9:28-36)

² Werahida wonang aha mani Yesusi kia Petrusi, Yakobusi tuti Yohanesi, itora weru kaiwasa bitoya foi, itorautai to uai dedai bei ayai. Ainanaya na tantuma Yesusi ne taraifoi yiwanu siai aha na itouremireafo.

³ Ansung satara fo kontai bua karofaria kaiwewa tan-tenang. Inontarai manei fia fieaia na soda kontaio wiro bua tonana kaha.

⁴ Mayeai na tantuma itowati Eliai tuti Musai uroa umadu ria Yesusi na nanai.

⁵ Ainanaya Petrusi medu funomai we Yesusi deyo, “Dai Rabio* Mantaunaune waune, mahikai paria we tonayai na katai nini. Mahikai mani antonari warumai botoru, ambori bei we Dai wau, bei we Musai, tuti bei we Eliai.”

⁶ Petrusi medu tonanai we serawera kaiwo fiani aino medura fo, weo itomatai karea fefe.

⁷ Ainanaya kafafe biua karofari bei sea ma sorusa, mayeai na kafafe rorong fo rawafui bei medu deyo, “Nehu Kaisungno enehuwawuti fi dinini. Metaramididauwi.”

⁸ Rawafuifoi medua kaifo, itowati wawerahai na kataifoi tonanai amani, itowati manei ahang kaha, mae itowati te Yesusi meiri we doa ne.

⁹ Ainanaya, itobiari weru uaifoi aweufo, Yesusi deretawang sitoru deyo, dohonao itoraisaharai funongno fi anta itowatioa

* ^{9:5} Kaiwo Rabi fo mani neta we Mantaunau.

fo we inontarai siai manei fe. Kio Kaisung Inontarai nei suwi na marareha rorong foi akawuru wo.

¹⁰ Ampafe itorohong kariri fianai aino Yesusi derera fo. Wape mantaung sitoru itomadu kariri kaiwo Yesusi medurai kariri suwi na marareha rorong foi aha ma fo.

¹¹ Ainanaya itorutang bera Yesusi itoreyo, "We fianaie mantaunau Kaiwo Musai soi fosa emadu eteyo, todoni kontaio Eliai dino da fafong ma akawuru wori nina?"

¹² Yesusi yo deyo, "Tarai we Eliai da fafong ma akawuru wo, weo da we meinenang fiani kontai.[†] Wape we fiani soi na Allai ne Kaiwofo kariri Kaisung Inontarai nei,

'Ambori sodai dadira bitoya tuti kaiwasa enemirireuwi ki'?

¹³ Wape imadu mau yeyo, Eliai da kawuru ma ne, tuti kaiwasa emei kanggani kariri fianai aino enemituaita fo. Finanai kawariai karirio kaiwo dotu na Allai ne Kaiwofo wei fo."

Yesusi niari arikang nuaninu kerira dohoni manei denteng

(Matiusi 17:14-21; Lukasi 9:37-43)

¹⁴ Ainanaya Yesusi tuti ne inontarai mantoru fo sitoru itosobu mano fau fosara nanai, itowati kaiwasa bitoya etoawari inontarai indeata wei fosa. Mae mantaunau Hukumi Musai soi fo maneiru teai, esawasa we fieaifa.

¹⁵ Kaiwasa bitoya foi ewatio Yesusi nanai, epapuhung paria ainanaya emitoa eta-mang wei.

¹⁶ Yesusi dutang bera ne inontarai indeata wei fosa deyo, "Fiani dino mantaunau Hukumi Musai soi fosa era ma esawa mea wei ne?"

¹⁷ Manei na kaiwasa bitoya foi yo deyo, "Dai Mantaunaune waune, nehu arikangnei nuaninu kerira dohoni awa borotamu, am-pafe ikari we wau ma.

¹⁸ Nuaninufoi deyo dohoni mani, kifasayari aweu riroyari na kahofa nu-wowongfo, kawawuaifoi tipu na borongfo, mae samu dorengnao mutu tuti ne taraifoi tiapara apai aha kaha. Yutang nemu inontaraifosa we etata nuaninu kerira foi. Enari wei, wape ebiriu kaha."

¹⁹ Ainanaya Yesusi medu ne inontaraifosa deyo, "Meai arana ne? Kaiwasa fui nini mea, tarai we inontarai meroasoa di mea kaha. Inai rahang mea tuti itawang yau we mea pari kidoni wori meroasoai ki?" Mayeai medu wesa aha deyo, "Meha arikangwai ma."

²⁰ Ainanaya eha arikangfoi we Yesusia.

Wape nuaninufoi detia Yesusi nanai, fiokanggimi arikangfoi ne taraifoi beyari, wedaya sawai aweu riroyari na kahofa nu-wowongfo, tuti kawawuaifoi tipu na borongfo.

²¹ Ainanaya Yesusi dutang

[†] 9:12 Botio Matiusi 11:13-14 tuti Matiusi 17:10-13.

bera arikangfoi tamai deyo, "Nemu arikangnei sodai maninang nini waroi ampa ne?"

Wawafoi yoa deyo, "Maninang nini sodairi na siario ketuifa.

²² We beiru teai mauwa nuaninunei yurai we deyo miuni, ampafe kifa sayari to adia rorong fo ete to mereha rorong fo." Ampafe dutang Yesusi aha deyo, "Daie masino biri we fata auru mani, kadeo aromuo auru tuti fata auru."

²³ Yesusi medu wei aha deyo, "We fianie boyo masino ibiriu nina? Taramu ma, inontarai eroasoa nesa mani ebiriu we enari fifiani kontai."

²⁴ Na siari nanai kontaio mano ne arikangfi meninangfoi, sai deyo, "Sengne waune iroasoai, wape iroasoane fuba kaha, ampafe fata yau ambori iroasoia mutu."

²⁵ Yesusi deti kaiwasafoi we era riruhiae ma fo nanai, data nuaninu kerira foia, amani suari na tapapa deyo, "Nuaninu wedaya kaiwasa etarami pararo tuti eboromitamu ne waune, yemi wau we ro to boriei weru arikangnei tuti dohonao enemukahirai we wuai aha fui fe."

²⁶ Nuaninufoi bibe rireuwi tuti fiokanggimi arikangfoi ne taraifoi aha, mayeai da to boriei weru arikangfoia. Ainanaya arikangfoi miranding beyaria, ne tarai toyari mireha fenanai, ampafe kaiwasa bitoya fianduhi foi

eteyo, "Arikangfi mireha ampa."

²⁷ Wape Yesusi yuna warangfo tuti biauni doa. Ampafe arikangfoi doaria.

²⁸ Ainanaya Yesusi da to ne munu minohi nai foi afui, ne inontarai ewesuraya mandu fosa, titousa era wa etutani eteyo, "Todonie amebiriu we ametata nuaninu kerira foi kahai nina?"

²⁹ Yesusi yoa wesa deyo, "Nuaninuo ne tarai tonana nei, nari fifiani kontaio wiro atari naya kaha, mae utang we Sempaisi tera reto."

*Yesusi medu kariri ambori mireha toa fo aha
(Matiusi 17:22-23; Lukasi 9:43-45)*

³⁰ Ainanaya, era weru katai nanai tuti era paria era na nu Galilea foi. Yesusi miaya we kaiwasa bitoya foi ewaitawang kariri era toa fo fanai.

³¹ Weo deunau ne inontarai ewesuraya mandu fosa fefe. Medu wesa deyo, "Kaisung Inontarai nei ambori manei dewayani to inontarai ewarami rorong fo we emuni ki, wape rahida bo botoru foi mani suwi aha ki."

³² Ne inontaraifosa etafu finai aino medura fo kaha. Tonanai ki, wape ematai we etutang berahai aha.

Mandoni dino fiabai sewa fo
(Matiusi 18:1-5; Lukasi 9:46-48)

³³ Mayeai era wa sobu Kapernaumia. Esuai to munufoi afui, mayeai Yesusi dutang berasa deyo, "Finang dino anta na rang

rabuang mani mesawa mea
wei nanai?"

³⁴ Wiro maneи deiobu kaiwofeai we Yesusi ahang kaha, weo anta na rang rabuangfo mani, esawasa we mandoni dino fiebai sewa fo fefe.

³⁵ Yesusi suki aweu minohi, mayeai sahu ne inontarai ewesuraya mandu fosa, medu wesa deyo, "Mano deyo andino ne fonia fo mani, todoni kontaio ne fui ki tuti wemangfata we mandoni kontai."

³⁶ Mayeai Yesusi kia arikang katui maneи ma, tuti dohong arikangfoi doari na earomireafo. Ainanaya fiaung arikangfoi mae medu wesa deyo,

³⁷ "Mandoni dino demang we arikang tonina nesa na mai na wonohune mani, wenani demang we yau kontai. Tuti mandoni dino demang we yau mani, wiro demang we yau tera kaha, mae we mano demi yau foi kontai."

*Mandoni dino dapa tata
kaha mani sau we tata*
(Lukasi 9:49-50)

³⁸ Ainanaya Yohanesi medu we Yesusi deyo, "Dai Mantaunaune waune, amewati inontarai maneи data nuaninu kerira na wonomune. Ampafe amesuari, weo i mani inontarai na tata maneи dine kaha fefe."

³⁹ Manamo Yesusi deyo, "Wiro meteiwedua ri fanai, weo wiro maneи niari fitatumafeai na wonohune, na kutu nanai kontai deibera yau kaha.

⁴⁰ Weo mandoni dino dapa tata kaha mani, wenani sau we tata.

⁴¹ Weo tarai, imadurai we mea mau yeyo, mandoni dino dohong mereha we metunung fo, weo inontarai meraria Mananu Mamparirinei di mea fefe, ne fiembaitafo wiro nai weruri kahai ki."

*Yesusi ne kaiwoariri kariri
enari sasarifo*

(Matiusi 18:6-9; Lukasi 17:1-2)

⁴² "Mandoni kontai, andino wedaya inontarai toyari arikang fininisa, amani mano eroaso yau nesa maneи, niari sasari, nana mani ne mahikai sewa we wenani mani, kase kamie fuba bei na rahanangfo tuti kabioi deisui na rawanang rausi.

⁴³ Tuti masino waramuwai wedaya sasari we wau mani, ferang kutuia. Weo nanai aino beng sewa borara nemu taraiwai ne doni aino wedaya sasari wai, wape ambori nemu taraiwai sentenang saukaha tono Sorohao Adia rorong foi, amani Adia danggararu we fitawafa foi fo.

⁴⁴ Weo na Soroha rorong foi mani, adiafoi fefe na wea kaha tuti awatafoi mireha na wea kaha.

⁴⁵ Tuti masino nari sasari na awemuwa mani, ferangkutuai tuti kobioi weruai. Weo ne mahikai mani, awemu bei keburu mae wobu numainu. Mae dohonao awemu unai ruhiae wape wobu numainufo kaha,

wape wobu Soroha rorong
foi fe.

⁴⁶ Na wanai adiafoi fefe
na wea kaha tuti awatafoi
mireha na wea kaha.

⁴⁷ Masino nari sasari na
uremu bei mani, ketafatini
kobioi weruai. Weo ne
mahikai mani, uremu bei
kibe mae wobu Allai ne
Mananu rorong fo. Mae
dohonao uremuwa suru
ubeng ruhiae wape wuai to
Soroha rorong foi fe.

⁴⁸ Na wanai adiafoi fefe na
wea kaha, tuti awata mireha
na wea kaha.

⁴⁹ Weo Allai dohongno adi-
afoi weo mansiari mansiari,
toyari ai indawang fiang
nayai.

⁵⁰ Ainei mani denteng,
wape meuwai ahang kaha
mani, todoni wori ohoni
meuwai aha ki? Ampafe
todoni kontaio mene tarai
tonana, amani memeuwai,
tutu meminohi ruhiae na
mai."

10

*Yesusi deunau kariri
Kaiwo Musai soi kariri etira
wiwingfo*

(Matiusi 19:1-9)

¹ Mayeai era weru katai
nanai to waya Yardeni
eneung doweri foi, amani
nu Yudea foi. Na nanai
kaiwasa bitoya kontai era
aha eminohi wari Yesusi.
Ampafe kariri fianai aino
kaiwasa bitoya mani niari fo
amani deunausa.

² Tuti Farisi maneiru teai
era kefani we eweanggariri,
amani etutani ambori deiai

Hukumi Musai soi fo. Ampafe etutani eteyo, "Kariri tane hukumi agama nei mani, mangfoi dira binengfoi rai e?"

³ Yesusi yoa wesa deyo,
"Kaiwo fianai aino Musai deretawanai we mea fo?"

⁴ Eroa wei eteyo, "Musai yoa we mandoni dino dira ne wiwingfoi mani, soi surati bei kariri dirarifo tuti dohoni we wiwingfoi ambori dema da weruia."

⁵ Ainanaya Yesusi yoa wesa deyo, "Musai soi hukumi nini tonanai, weo deitawanai we menumikamiei mitubaru, metaramididau kaiwo aunau kaha fefe.

⁶ Wape na reantenangfo,
amani reantenang Allai niari
nunei mani, kaiwofo dotu
tofino:
'Allai niari inontarainesa
mang tuti wiwing.*'

⁷ 'Nanai wedaya mang-
foi ambori sawing
inang tamang suru
tutu weboyari ria ne
wiwingfoi,

⁸ ambori ne tarai toyari
une tarai boyari.*'

Ampafe wiro uweboru ahang
kahai mae uweboyer.

⁹ Ampafe fianai aino Allai
fianduhiae weboyaria fo,
wiro inontarai manei kia
tateraifa fanai."

¹⁰ Mayeai Yesusi ne in-
ontarai dirisa fosa esuai to
munu eminohi nai foi afui,
etutang berahi kariri fi anta
medura fo.

¹¹ Ainanaya Yesusi medu
wesa deyo, "Mandoni dino

* **10:6** Kejadian 1:27 * **10:8** Kejadian 2:24

dira binengfoi tuti dau wiwing manei siai aha mani, wenani niari sasari we ne wiwing mano fafong foi, amani sasario dena ria wiwing siai fo.

¹² Tonanai kontai we wiwing dira ne mangfoi, mae dau mang siai ahang foi, i kontai niari sasario dena ria mang siai fo."

*Yesusi mioang arikang
(Matiusi 19:13-15; Lukasi 18:15-17)*

¹³ Na nanai inontarai manea eha ene arikangfosa we Yesusi ma, we yuai warangfoa wasausa tuti mioansa. Manamo Yesusi ne inontaraifosa esuasa.

¹⁴ Yesusi deti ne inontaraifosa enari tonanafo, kesousa, tuti medu wesa deyo, "Metawing arikangwasa era we yau ma, dohonao metei-weduasa fe, weo inontarai toyari arikangfesa nini saino esuai to Allai ne Mananu rorong fo ne.

¹⁵ Tarai, imadu we mea mau yeyo, inontaraio wiro yoasoai tuti niari enerorongfoia tewawa kariri arikang kaha mani, wiro suai to Seng Allai ne Mananu rorong fo kaha ki."

¹⁶ Yesusi medu tonanaia kaifo fiaung arikangfosa, mayeai yuai warangfoa wasausa tuti mioansa.

Yesusi deunau kariri inontarai ne ra bitoya tuti Allai ne Mananu rorong fo

(Matiusi 19:16-30; Lukasi 18:18-30)

¹⁷ Rabuang bo Yesusi tuti inontarai fosa ete era fo, inontarai manei mito we Yesusi ma. Inontarai nani suki aweu disangkapa awebuka na arongreafo tuti medu deyo, "Mantaunau bontengne waune, fianai aino inari we ambori isobu numainufo ne?"

¹⁸ Yesusi yoa deyo, "We fianai e wahu yau we yenteng ninai? Wiro manei denteng kahai, mae Allai meiri kawuru.

¹⁹ Allai ne Hukumi dohonai we tatohong kariria fo boitawanai ampa, amani: 'Wiro mung inontarai fanai, bena ria wiwing siai fanai, wiro komananapi fanai, binggai inontarai na kaiwo wetarai kaha fo fanai, wiro totofa manei we ka ne fianggengfo fanai, womi we nemu dai tuti nemu ai.'*

²⁰ Inontaraifoi yoa wei deyo, "Dai Mantaunaune waune, kaiwoariri fuba nani yohong kariri kawuru na iwebariboaifa ampa."

²¹ Ainanaya Yesusi enewawu inontaraifoi seiteri tuti medu wei deyo, "Sea fi beyari bohong kariria kaharai, amani ro wa bowayang nemu ra munohi tutira wara kai, tuti doiwabohonai we inontarai ene pari fi fosa, nanaia mani wobu ra na Waidania finanai. Tuti nari tonanaia mani ro ma ro ria yau."

²² Inontaraifoi tarao kaiwofo nanai, arokuayai paria, weo ne ra bitoya karera fefe,

* **10:19** Keluaran 20:12-16; Ulangan 5:16-20

ampafe da weru kataifoi na enerorong fituayai.

²³ Yesusi seite ne inontarai erariati fosa, medu wesa deyo, "Mawa kahai we inontarai ene ra bitoya nesa esuai to Seng Allai ne Mananu rorong fo ki."

²⁴ Ne inontaraifosa epapuhung paria we kaiwo medurai tonana fo. Wape medu wesa aha deyo, "Arikangne meaine, tarai we mawa kahai we uai to Allai ne Mananu rorong fo.

²⁵ Weo mawa sewa we unta manei suai kaha aniae kamirei bei weru inontarai ne ra bitoya manei suai to Allai ne Mananu rorong fe fo."

²⁶ Kaiwo medura fo wedaya ea epapuhung paria, ampare etutang berahi eteyo, "Tonana mani, mandoni dino mesi we sobu faririfo ne?"

²⁷ Yesusi seitesa tuti medu wesa deyo, "We inontarainesa mani finanai wiro ene mambiruifea we enari kaha, wape we Seng Allai mani fifiani kontaio mawa arora."

²⁸ Ainanaya Petrusi medu wei deyo, "Daie, boti fifiani kontaio ametawinaifa tuti ameraria wau!"

²⁹ Yesusi medu wesa aha deyo, "Tarai, imadurai we mea mau yeyo, inontarai mandoni da weru ne munufoi ete ne doroi mang foi ete doroi wiwing foi, ete ne wawafo suru, ete ne arikangfosa ete ne romifo,

ambori daria yau tuti wiuwu nehu Kaiwo Maihikai ne,

³⁰ nana mani wenani ambori sobu fi bitoya na rabuang bonini ki, amani ne munu, ne terafosa, inanai, ne arikang tuti ne romifo. Tuti dadirafo sodairai kontai, mae rahida da ma wanai, ambori minohi we numainu.

³¹ Wape kaiwasa bitoyao na nunei ninai ewefonia fosa ambori enai to kurumifui ki, mae mano na nunei ninai enai to kurumifui fosa ambori ewefoniai ki.*

Webetoru Yesusi medu kariri ne mararehafo

(Matiusi 20:17-19; Lukasi 18:31-34)

³² Etautai era pari to bendari Yerusalem ayai. Yesusi sahara fituayaifafong werusa, ambori ne inontaraifosa era tuari aha ki. Ne inontaraifosa earomikuayai wei paria, tuti kaiwasa bitoya wei foi kontai mitai paria. Mayeai Yesusi sahu ne inontarai ewesuraya mandu fosa ma, deikaririai wesa kariri fianai aino ambori sodaira fo.

³³ Medu deyo, "Metarami ma. Nina mani, tara to Yerusalem ayai finina. Na wanai Kaisung Inontarai nei ambori manei dewayani we imami baba fosa tuti mantaunau Hukumi Musai soi fosa ki. Tuti ambori etohong aiboi marareha fo wei, mayeai etohoni pari to

* **10:31** Ne arti mani toninai: Inontarai reantenang etarami Sengnei ne Kaiwo fosa, amani inontarai Yahudi, wape wiro eroasoai kaha, esuai Allai ne Mananu rorong foi kaha ki. Wape inontarai etaramioai wefuiai, amani inontarai Yahudi kaha fosa, wape eroasoai, ansaino esuai to Allai ne Mananu rorong fo ki.

inontaraio etaroangno Allai kaha fosa ewarami rorong fo.

³⁴ Inontarai nanisa ambori eteiberahi, ehandioi, erarubati na wai, tuti emuni mireha. Wape rahida bo botoru foi ambori suwi aha ki."

Fio Yakobusi tuti Yohanesi urutang weai

(Matiusi 20:20-28)

³⁵ Ainanaya Yakobusi tuti Yohanesi, amani Zebedeus ne arikangfo suru, ura wa umadu we Yesusi ureyo, "Dai Mantaunaune waune, aureyo nari fieai we auru."

³⁶ Dutang suru aha deyo, "Fianai aino mureyo inari we muru ne?"

³⁷ Uroa wei aha ureyo, "Aureyo moduraia futuai we auru, we rahida ru wang Mananu fo na nemu sambewaraio dadai fo mani, bohong kataio mai fo we auru, amani manei minohi na waramu domoya wai tuti manei na waramu dowej wai."

³⁸ Wape Yesusi yo aha suru deyo, "Muwaitawang fianai aino murutang weai nina kaha. Mubiriu we murunung nano fi dadirao yunung nai nei tuti muwebaptisi kontai na dadirao isobu baptisi nai ne rai e? Mubiriu we musodai dadira ambori isodairi foi konta rai e?"

³⁹ Uroa wei ureyo, "Aubiriu wea rai." Ampafe Yesusi medu we suru deyo, "Nehu dadira nani murunung nai kontai, tuti muru kontai muwebaptisi na dadirao iwebaptisi nai nei. Nehu dadira nanai musodairi rai.

⁴⁰ Wape kariri mandoni dino ambori minohi na enehung domoya nei tuti na enehung dowej nei mani, yau wiro ikutu kaiwo kariri nana kaha. Katai nani Allai meinameni we inontarai kawuru ampa, amani mano diri suru kawuru we uminohi na nanaia fo."

⁴¹ Yesusi ne inontarai ewesura mano wei fosa etarami finanai ampefe ehasou Yakobusi tuti Yohanesi suru paria.

⁴² Ampafe Yesusi sahu kipasa ma, medu wesa deyo, "Mewaitawanaifa weo na kaiwasa etaroang Allai kaha fosa, amani Yahudi kaha fosa, mano ewenunggamie we ene parentanei, enari kanggani ene kaiwasafrai. Tuti mano ewewafoniai fosa etanggewa ene kaiwasafrai na tapapa.

⁴³ Wape wiro mene tarai tonana kaha, mae mandoni dino deyo fiebai sewa na mea fo mani, todoni kontaio we-mangfata we mea.

⁴⁴ Tuti mano deyo wefoniai na mea fo mani, todoni kontaio wewoming we mea akawuru wo.

⁴⁵ Weo Kaisung Inontarai nei kontaio wiro da ma we mefatari kaha, mae we fiata mea tuti we dohong ne taraifoi we feriri kaiwasa bitoya foi."

Yesusi niari Bartemeusi mano urengfafa foi deti

(Matiusi 20:29-34; Lukasi 18:35-43)

⁴⁶ Era wao sobu bendari Yeriho foi. Ainanaya Yesusi tuti ne inontarai erariati fosa tuti kaiwasa bitoya kontai,

era weru bendari Yerihou foia nanai, esobu inontarai urengfafa manei minohi na rang dereung fo mae dedo we fi. Inontaraifoi wonong fino Bartemeusi, amani Timeusi antung dine.

⁴⁷ Na kutu taraoai we mano da ma nani mani Yesusi inontarai Nazaretifi dine nana ne, sahu deyo, "Yesusio, Dauti ne Kaisungwa waune, aromuo yau!"

⁴⁸ Kaiwasa bitoya fosa esuari we nemboru, manamo tentumasa kaha, mae sahu mambiri aha deyo, "Dauti ne Kaisungwa waune, aromuo yau!"

⁴⁹ Ampafe Yesusi doa ukai, medu deyo, "Mesahui ma." Ainanaya esahu inontarai urengfafa foi, emadu wei eteyo, "Tawang enemurorongwai, boabari wau, weo Yesusi sahu wau."

⁵⁰ Weurengfafafoi tarao kaiwofe nanai, warapa ne ansung boriei foa watai, mae soiri tuti mito we Yesusia.

⁵¹ Da wa kefangna, Yesusi dutang berahi deyo, "Fianai aino boyo inari we wau ne?" Weurengfafafoi yoa wei deyo, "Dai Rabio Mantau-naune waune, yevo iwati."

⁵² Yesusi medu wei aha deyo, "Barabera wau to nemu munufoi. Nemu roaso yau wa wedaya bonteng ampa." Na tatofang kutu nanai kontaio urengfo tabau deti. Ainanaya da ria Yesusi na ne rang rorong foa.

11

Yesusi suai to bendari

Yerusalemi

(Matiusi 21:1-9; Lukasi 19:28-38; Yohanesi 12:12-15)

¹ Era wa kefang we Yerusalem mani, esobu munue Betfage tuti Betania na wiwoi Saituni eneungfo. Na nanai Yesusi demi ne inontarai dirisa fosa uwe-mandu ura fafong.

² Medu we suru deyo, "Mura to munue watai na taaromife wanai, mura waroi afui kahai mae muwati manei tebuhi ne keledai antung manei doari na nanai. Keledai nani manei wiro dau nai kaharai. Murehuwi mukari ma.

³ Tuti masino manei dutang bera muru deyo, 'Murehu keledaiwai we fiani,' nana mani muroa wei mureyo, 'Sengnei andino demi auru we aukari ne, wape ambori dohoni tibera ahera aha ma ki.'

⁴ Inontarai mandu fo suru ura kariri fianai aino Yesusi demi suru ura wea foa. Na wanai uwati keledai antung manei, wenengfoi tebuhi doari na ne munu refongfo, na rang dereungfo. Tuti urehu keledaifoia.

⁵ Inontarai etoari na nana fosa etutang bera suru eteyo, "Tofino! Murehu keledai antungwai we fiani?"

⁶ Uroa wesa kariri fianai aino Yesusi medurai we surua fo. Ampafe inontaraifosa eroa we ukaria.

⁷ Ukari ura wa sobu Yesusifo, etohongno ene ansung boriae feai awiai ebuaisai na keledai kuru-inafdoi. Ainanaya Yesusi dautai ayai minohi sauwi.

⁸ Kaiwasa bitoya paria eha ene ansungfoa ehafarai na rangfoi, manea kontai ebuai ai tutuba eha na romifo wa sau rangfoi, ambori emaranding rangno Yesusi da nai foi.

⁹ Kaiwasa era foni Yesusi fosa tuti mano era na kurufui fosa, esahu kiai eteyo,

“Hosana! Moanafeai we Mano da na Sempaisi wonong ne!

¹⁰ Moanafeai we tane werengno Dauti ne Mananu rorongno ambori da ma ne ki!
Hosana! Fiaifeai we Allai na katai dedai!”

¹¹ Yesusi suai to bendari Yerusalem afui nanai, suai to Sempaisi ne Munufoi afui. Deti kariri kataifoi tonanai, wape dirufoi kikeu, ampare i tuti ne inontarai ewesuraya mandu fosa etaraberasa to Betania aha.

Yesusi deikanggani ai urungfoi
(*Matiusi 21:18-19*)

¹² Kameaia, na rabuangno era weru Betaniafoi mani, Yesusi wewisi.

¹³ Na waroi detiao ai urung rowei, sifu biriayai tuti reraungfoi kehe paria. Ampafe da wa detioi we webong etebirerie? Wape da wa sobu neungfo mani, deti sobu bong kutu bei kahaia, mae reraungfoi terai. Weo rabuang bonani mani wiro ne diru neung we niaya kaharai.

¹⁴ Ainanaya Yesusi deikanggani aifoi deyo, “Na rahida bonini to fongna

mani, wiro webong aha we manei dang nemu bongnei kaha.” Yesusi ne inontarai dirisa fosa etarami te kaiwo medurai nanai.

Yesusi suai to Sempaisi ne Munufoi

(*Matiusi 21:12-13; Lukasi 19:45-48; Yohanesi 2:13-16*)

¹⁵ Mayea mani era wa sobu Yerusalemia. Na nanai Yesusi suai to Sempaisi ne Munufoi rofongfo, tuti data kaiwasa mano etawayangfi tuti mano ewaworifi na nana fosa. Bebari ene mejao eriwang doi naya fo tuti kaderao mano etawayang muntung we korbani fosa eminohi naya fo.

¹⁶ Tuti wiro yoa we manei kia fiawayanai da rurang munu dereungfo kaha.

¹⁷ Mayeai deunausa deyo, “Na Allai ne Kaiwofo medu fieai, amani dotu tonina:

‘Nehu Mununei ahui we munuo inontarai nunei kiai ewenadi nai dine,*
wape menariri wemunu mananapia.’

¹⁸ Imami baba fosa tuti mantaunau Kaiwo Musai soi fosa, etarami kaiwo Yesusi medura fo, ampare esera we rang we emuni. Wape emataiti we kaiwasa bitoya epapuhung weo ne kaiwo aunau fo.

¹⁹ Dirufoi de kikeu mani, Yesusi tuti ne inontarai suraya mandu fosa era weru bendarifoia.

Fiainawiai na ai urungfoi
(*Matiusi 21:20-22*)

* **11:17** Yesayai 56:7; Yeremiai 7:11

20 Kameaia mani Yesusi tuti ne inontaraifosa era wa era rurang ai urungfoi, wape ewatiao we memasa beyari na raindengfo paria sobu newafoi.

21 Ampafe Petrusi aroo fianai aino Yesusi medu we aifoi na ramindenafa tuti medu we Yesusi deyo, "Dai Mantaunaune waune, botia, ai urung ramindenafa boikanggani fi memasa ampa."

22 Yesusi yoa wesa deyo, "Meroaso Allai.

23 Tarai, imadurai we mea mau yeo, mandoni dino medu we uai nini deyo, 'Tuwera weru katai nini tuti taukahā rawanang rausi!' mae enerorong soriru kaha mae yoasoai na mutu, nana mani finanai kaririai wei.

24 Ampafe imadurai we mea mau yeo, metutang we fieai ria Allai mani, meroasoai we finanai mesobuai ampa, nana mani ambori mesobuai ki.

25 Tuti mewenadi metutang we Sempaisi, wape menemirorong pirahai we manei mani, meteiai wenani akawuru wo, nana mani ambori mene Dai na rorafaisi kontai feriri mene sasariwai.

26 Wape wiro meteiai inontarai siai ene sarawa kaha mani, mene Dai na rorafaisi kontao wiro deiai mene sasariwai kaha."

Mano ewefoniai we Yahudi fosa etutang bera Yesusi kariri ne mambiriwe niarifi fo

(Matiusi 21:23-27; Lukasi 20:1-8)

27 Mayeaia mani era wa sobu Yerusalemia. Na siario Yesusi da na Allai ne Munufoi rorongfo, na nanai imami baba fosa, mantaunau Hukumi Musai soi fosa, tuti mano ewefoniai we Yahudi fosa era we Yesusi ma.

28 Etutang berahi eteyo, "Na mandoni wonongne tuti ne mambiriune nari fi bitoya tonina fenina? Tuti mandoni dino yuai wau we nari fininaifa ne?"

29 Yesusi medu wesa deyo, "Yau kontai yutang bera mea we fieai, tuti finanai meteisaharai we yau mani, ambori yeisaharai kontai we mea kariri na mandoni dino yuai yau we inari fininaifa ne ki.

30 Meteisaharai we yau, weo Yohanesi mano webaptisi kaiwasa foi mani, mandoni dino yuaisi we webaptisi kaiwasa tonana ne? Allai ete inontarai nunei manei e?"

31 Imami baba fosa tuti mano ewefoniai we Yahudi fosa emadu kaririai wawerasa eteyo, "Masino tateyo, 'Allai dino yuaisi we niari finana ne,' nana mani ambori dei we tata aha ma deyo, 'Tonana mani, we fianie wiro meroaso Yohanesi kahai nina?'

32 Wape dadira kontai we tateyo inontarai nunei manei dino yuaisi ne," weo ematai kaiwasa bitoya foi, we eroasoai we Yohanesi mani nabi tarai dine.

33 Ampefe eroa we Yesusi eteyo, "Ameserawerahai." Ainanaya Yesusi medu wesa deyo, "Tonana mani

yau kontai wiro yeikaririai we mea kaha weo mantei dino yuai yau we inari fi bitoya nini faini."

12

Yesusi medu fiywansoai kariri weenari romi angguri (Matiusi 21:33-46; Lukasi 20:9-19)

¹ Mayeai deiriri fiywansoai bei wesa aha, amani deyo, "Inontarai manei sanang ne romi angguri bei, sanamia kiaia, ainanaya yu wore wariria. Kontai sirai kamirei we katai ehua anggurifoi nai tuti biaungno katai ne tarai toyari yawa dedai bei we ewaitawang wedua romi angguri foi nai. Ainanaya dohoni we inontarai manea we ewaitawang weduari, ambori romifoi wetarai mani etohong eai we mano ne romifoi tuti etato ei maisa. Ainanaya mano ne romifoi dontai to nu siaia.

² Niayaia tete rabuang bo romifoi wetarai fo, demi ne mangfata manei dontai we kia ne atorafo ria mano ewaitawang ne romifoi fosa.

³ Manamo mano eru romifoi sa etafu mangfatafoi, eboa denteng kaha tuti etatari daraberahi na warang arora aha.

⁴ Mayeai mano ne romifoi demi ne mangfata manei siai aha, manamo mangfata nani kontai eboisabu nunggamiei tuti eteikanggani ne woria denteng kaha, mayeai etatari daraberahi na warang arora aha.

⁵ Ainanaya mano ne romifoi demi nari mangfata mano mantoru foi aha, manamo mangfata nani kontaio etouri kahai mae emunia mirehara. Enari pampang tonanai we mangfata fuba, mano ne romifi demisa era wa nanisa. Manea eboisa, wape manea kontai emunsara emarareha.

⁶ Demi ne mangfatafosara ehaia, titou ne kaisung mansiari enewawuti foi terai, ampare dema mae da aha weo enetituaitai deyo, 'Nehu kaisungnei mani, esomi wei rai.'

⁷ Manamo we eru romifoi sa ewati ne kaisungfoi we da ma fo nanai, emadu wawerasa eteyo, 'Ne kaisung ambori sobu tamang fi minohi tutira fe andinini, ampare tamunia mireha weruaia, ambori fianai aino tamang minohi tutira fo taha we tata.'

⁸ Etafuria tuti emunia mayeai ehabioi ariei wiatai na romi dereungfo.'

⁹ Ainanaya Yesusi bera imami baba fosa tuti inontarai ewefoniai we Yahudi fosa aha deyo, "Tofino mano ne romifoi, fifiani aino ambori dohonai we mano eru romifoi sa fo? Todoni kontaio ambori daraberahi ma tuti miung mano yoasosa we eru ne romifoi sa ki, tuti dohong romifoi we inontarai siai manea aha we ewaitawani ki."

¹⁰ Ainanaya Yesusi medu aha deyo, "Metato Sengnei ne Kaiwo arawang bo dotu tonina nei kaha rai e? Amani: 'Kamieio mano enari munu nesa ehabioi fi,

andi wekamiei reantenang we etang kamieifoi doa sauwi ampa.

11 Sengnei andino niari finina,
tuti fi mehikai paria na tauremine.*^{**}

12 Ampafe mano ewefoniasi we Yahudi fosa, etarami fiywansoi nani fo, erurai we etafu Yesusi weo ewaitawanai we Yesusi ne kaiwo medura fo reng wesa kariri todoni eteiyari we Mananu Mampariri foi fo. Manamo ebiriu kaha, weo ematai kaiwasa bitoya foi fefe. Ampafe wiro etoari ahang kaha, mae efononansa weru Yesusia.

Yesusi medu kariri bai pajaki we Mananu Kaisari

(Matiusi 22:15-22; Lukasi 20:20-26)

13 Esera we rang we etafu Yesusi, ampafe rahida bei etemi Farisi maneiru teai tuti Herodesi ne inontarai erariati fosa maneiru teai, era wa we eweanggari Yesusi na fi etutang wea fo.

14 Ampafe era wa etutang berahi eteyo, "Dai Mantaunaune waune, amewaitawanai we wau mani inontarai enemurorong mesi di wau. Amewaitawanai kontai we bounau na mai kariri fianai aino Seng Allai medurai we inontarainesa fo, wiro tau funomai we kaiwo inontarai emadura fo kaha weo wiro womi we mano ewewonomi fosa kaha fefe. Ampafe kariri tane hukumifoi, mesi we tabai

pajaki weo Mananu Kaisari ete bireri e? Tatohonai ete bireri e?"

15 Manamo Yesusi deitawang enimirorong kerira foi, ampafe medu wesa deyo "We fiane meweanggari yau we metafu yau na nehu kaiwone nina? Meteinawiai we yau doi mebai pajaki nai wai ambori yeti kaririai."

16 Ampafe eteinawi doi dinari bei wei. Ainanaya Yesusi dutang berasa deyo, "Mandoni dino yabani na doi finina, tuti mandoni dino wonongfe watai nai ne?" Eroa eteyo, "Mananu Kaisari."

17 Ainanaya Yesusi medu wesa aha deyo, "Tonana mani metohonai we Mananu Kaisari fifiani aino Kaisari neng fo, tuti we Allai fifiani aino Allai neng fo." Mano eteyo eweanggari nanisa, epapuhung paria we ne kaiwofo.

Yesusi deunau kariri inontarai esuwi na marareha rong fo

(Matiusi 22:23-33; Lukasi 20:27-40)

18 Mayeai inontarai maneiru teai na inontarai eweSaduki fosa era we Yesusi ma. Ea mani inontarai Yahudi saine, wape eroasoai we inontarai emarareha nesa wiro esuwi ahang kaha. Era wa weo etutang berahi eteyo,

19 "Dai Mantaunaune waune, nabi Musai soi kaiwo ninai we tata, soi deyo, 'Mang manei rirau wape sobu

* 12:11 Masmuri 118:22-23

arikang kaharai mae mireha, nana mani ne tahatuifoi dau ne wiwingfoi aha, ambori dohong arikang we mano mireha nani ne ririafoi aha.*

²⁰ Ametaterai weo mambetahatui eweitu, mano fuba foi riraua, wape wiro une arikang kaharai mae mangfoi mireha weru wiwingfoia.

²¹ Mayeai ne tahatui mano suari foi dauo ne wiwingfoi aha, manamo i wiro ne arikang kaharai mae mireha kontai aha.

²² Ne tonanane we ne tahatui mano suari foi, paria sobu mano fui pari foi kontai. Ea kiai erau wiwingfoi wape ene arikang kaharai mae emararehara. Ne fuiai pari fo wiwingfoi kontai mirehara.

²³ Ampefe na rahida mansuwi-suwi foi mani, na mambetahatui eweitu nani fosa, mantei dino ne wiwingfoi ne? Weo mambetahatui itu fosa erau ruhi wiwingfoi fefe.”

²⁴ Yesusi yoa wesa deyo, “Menemitiuai sarawai paria, weo wiro metafu Sengnei ne Kaiwofo tuti meroaso ne mambiriupo kaha.

²⁵ Weo rahida bo mansuwi-suwi foi mani, wiro inontarainesa erirau ahang kaha mae eminohi toyari wewai na Waidani.

²⁶ Wape kariri inontarai emararehara ne esuwi ahang fo mani, metato Kaiwo Musai soi kariri ai yafui denggararu foi ete bireri e? Na kaiwo nanai, Allai medu we Musai deyo,

‘Yau mani Allaio mene werengno Abrahami, Isaki tuti Yakupi esomi wei foi di Yau.’*

²⁷ Seng Allai nani mani wiro Seng we inontarai emararehara kaha, mae i mani Seng we inontarai etarang, tuti wiro inontarai emararehara fo saino esomi wei fo kaha, mae mano etarang fosa, ansaino esomi wei ne. Nanai deinawiai we Abrahami sitoru etarang aha na Waidani ampa. Tarai, menemitiuai sarawai paria.”

Yesusi medu kariri kaiwo wereantenang na Hukumi Musai soifo

(Matiusi 22:34-40; Lukasi 10:25-28)

²⁸ Na nanai mantaunau Kaiwo Musai soi fo manei kontai da wa, doa mae taradidau Yesusi tuti Sadukifosa kaiwo emadura fo. Mantaunau Kaiwo Musai soi foi taraoai terai we Yesusi deisaha kariri fi etutang weai nanai na mai paria. Ampafe i kontai dutang fea Yesusi aha deyo, “Na Sempaisi ne Hukumine, kaiwo fianai aino ne reantenang pari ne?”

²⁹ Yesusi yo wei deyo, “Kaiwo reantenang ne mani dotu tono:

‘Inontarai Israeline meaine, metarami ma,
Allai mani tane Seng dine,
tuti manei siai ahang kahai, mae meiri terai.

* 12:19 Ulangan 25:5-6 * 12:26 Keluaran 3:6

30 Enemuwawu Sempaisi,
nemu Allai,
na enemurorongwai
sentenang,
na numuaninuwai sen-
tenang,
tuti na enemutituitawa
sentenang.”*

31 Hukumi sua aha mani,
‘Enemuwawu inontarai
siai kariri ene-
muwawu bera man-
taung wau wa.’*

Wiro kaiwofeai siai aha we
sewa hukumi boru nina
kaha.”

32 Ainanaya mantaunau
Kaiwo Musai soi foi yoa we
Yesusi deyo, “Dai Mantau-
naune waune, tarai paria.
Fianai aino modurai nanai
antu, weo Seng Allai mani,
meiri kawurua tuti wiro seng
manei siai ahang kaha.

33 Tuti todoni kontaio,
inontarainesa enemiwawu
Seng Allai na enemirorongfoi
sentenang, na ene mambir-
iufo tantenang tuti enemi-
tituitaifo. Tuti ea kontai
enemiwawu inontarai siai
kariri enemiwawu berasa
fo. Finanai aino beng sewa
korbanio nunumi foi tuti
korbani siai weo ohoni we
Allai foi ne.”

34 Yesusi taraoai we man-
taunau Hukumi Musai soi
foi ne kaiwofo sewai pariara
fo, ainanaya medu wei
deyo, “Ninaia mani, adareti
moinenang wuai to Seng
Allai ne Mananu rorong fo.”

Yesusi medu kaiwofoa kai
tonanafo, wiro manei we-
mang we dutani we fieai siai
ahang kaha.

*Kaiwo kariri Yesusi, Man-
anu Mampariri dine fo
(Matiusi 22:41-46; Lukasi
20:41-44)*

35 Yesusi doa mae deunau
na Allai ne Munufoi rorongfo
tonanai, mayeai dutang bera
kaiwasa etaramidauwi
fosa deyo, “Todonie mantau-
nau Hukumi Musai soi fosa
eteoyo Mananu Mampariri
nei Dauti ne Kaisung dine
nina?”

36 Weo Dauti mantauni, Al-
lai Nuaninunei sensoni mani
medu kariri deyo,
‘Seng Allai nei medu we nehu
Sengnei deyo,
“Munohi na warahu do-
moya nei,
pariao iwedaya nemu
aitetanesa taha
tawangsa kiai na
awemuwai.”*

37 Ampafe Dauti mantauni
sahu Mananu Mampariri foi
we ne Sengfoi tonana mani,
todonie i mani weriria terai
na Dauti ma nina? Mae
nanai deinawiai we Sengno
Mamparirifoi dedai sewa
Mananu Dauti tuti ne riria
tera fo.” Kaiwasa fianduhi na
Sempaisi ne Munufoi nanisa
eparaise paria we etarami
Yesusi deunaupo.

*Anansiau we mantaunau
Hukumi Musai soi fosa
(Matiusi 23:5-7; Lukasi
20:45-47)*

38 Medu wesa deyo,
“Metanansiau we mantaunau
Kaiwo Musai soi fosa.
Ea mani emirising we esan-
sung ansung dewariroi, era
tutirai na kaiwasa bitoya
foi earomireafo, toyari na

* 12:30 Ulangan 6:5

* 12:31 Imamati 19:18

* 12:36 Masmuri 110:1

kondirora, ambori kaiwasa bitoya nani esomi wesa.

³⁹ Emirising we etoa na katai mahikai na munu agama Yahudi fo rorongfo tutu na muniara bei mani, emirising we etiri katai mahikai na fong fo we eminohi nayai.

⁴⁰ Epampamu wiwinafosa we eha fi eminohi tutira fo, tuti ewenadi mani ene nadifoi dewariroi, ambori kaiwasa bitoya fosa etatosa we inontarai ebeng disa. Inontarai nanisa aiboi esobuai ria Sempaisi fo mani, maraba pari sewa rai."

Wiwina manei ne doio dohonai we Sempaisi

(Lukasi 21:1-4)

⁴¹ Na Sempaisi ne Munufoi fo, Yesusi minohi arong we katai efanduhi doi we Sempaisi nai fo tuti seite kaiwasa ehabi doi to buruao efanduhi doi nai foi. Inontarai ene ra bitoya fosa bitoya etohong doi fuba.

⁴² Ainanaya wiwina ne pari fi manei da wa, kia ne doi seni boru, kiara soniae na buruao efanduhi doi nai foi. Doi seni nani suru une hargafa katui paria.

⁴³ Ampafe Yesusi sahu ne inontarai ewesuraya mandu fosa ma, medu wesa deyo, "Tarai, yeisahrai we mea mau yeyo, wiwina nini faini fi dohonai we Sempaisi fo fuba sewa kaiwasa fuba wei foi kiai ene etohonafao.

⁴⁴ Weo ea kiai etohonai na ene ra bitoya foi, wape wiwinanei ne pari fi tonanai ki, wape dohong doi kutu wiatai

we wiori fidang naya fo awa kiai."

13

Yesusi medu kariri Sempaisi ne Munufoi we ambori mirufo

(Matiusi 24:1-2; Lukasi 21:5-6)

¹ Rabuang bo Yesusi era weru Sempaisi ne Munufoi fo, ne inontarai dirisa fosa manei da ma medu wei deyo, "Dai Mantaunaune waune, botia Sempaisi ne Munufoi denteng paria. Kamiei etana fo maihikai paria."

² Ainanaya Yesusi medu wei aha deyo, "Mewati Munufoi we mehikai paria ne ne? Munu Sengno menemikandori wani ambori inontarai manea emeiria misuhi kiai, kamieie boyari kontaio wirop doa na ne katai doa nai foi ahang kahai ki."

Yesusi medu kariri rahida nunei werea naya fo

(Matiusi 24:3-14; Lukasi 21:7-19)

³ Mayeai Yesusi dautai to wiwoi Saituni ayai minohi na katai wiatai arong we Sempaisi ne Munufoi fo. Ainanaya Petrusi, Yakobusi, Yohanesi tuti Andareasi itora siaia itomadu riati.

⁴ Itorutani itoreyo, "Boikaririafa we amea, kidoni wori fi antanafa modurai nanai kawariai ki, tuti finanaifa kawaria mani ne fiainawiafo todoni?"

⁵ Yesusi yoa we sitoru deyo, "Metanansiau weduarai ambori dohona inontarai etatofa mea fe."

⁶ Weo inontarai bitoya ambori era ma eteyo emadu we mea na wonohune tuti eteyo, ‘Mano metamang wei nei di yau.’ Tuti na kaiwo emadurai tonanane etatofa kaiwasa bitoya kontai.

⁷ Kontai ambori metarami mamunafei, tuti kaiwasa emamuna wawerasa, wape dohonao mematai fanai. Ne tonanane todoni kontaio kawaria akawuru wo. Wape nanai wiyo deinawiai we nunei werea nayai finana kaha.

⁸ Tonanai kontai parentafei ambori memuna we parentafei ki, tuti mananu manei ambori memuna we mananu siai manei ki. Na doni kontaio ambori mundie i beba foi fio nai ki, tuti kahari miung ki. Ne nani kiai arahio fi reantenang finanai, ne tarai toyari wiwinsanaio amaina pirahai tantuma we dawing.

⁹ Metanansiau, weo inontarai siai ambori etafu mea tuti efafa mea to Majelisi Agama fosa ki, kontai ambori eboi mea na munu agama Yahudi fo ki. Kontai ambori efafa mea to mano ewewafonia fosa tuti mananufosa earomireafo ki, weo meroaso yau tuti meraria yau fefe. Tuti na kutu nanai mesobu rahida we memadu kariri yau wesa finana.

¹⁰ Weo todoni kontaio nehu Kaiwo Mahikai fo wuwuaifa we kaiwasa na nunei sentenang akawuru wo.

¹¹ Tuti masino etafu mea tuti eha mea to mano ehutu kaiwo fosa mani, dohonao mearomikuayai we kaiwo ariri fianai aino ambori

memadura fo fe. Mae fianai aino menemituaitai we memadura fo mani, memaduraia. Weo kaiwo ariri memadurai nanai, wiyo mantaung meaino menemituaitawa kaha, mae Allai Nuaninu Mirarebana nei andino deisahara ne.

¹² Inontarai ambori etawayang ene doroi tera fosa we inontarai siai we emunsa ki. Ne tonanane ambori kawariai kontai we wawa mangfoi dewayang ne arikangfoi ki, tuti arikangfoi ambori dapa ne wawafosuru tuti dewayang suru we inontarai siai we emung suru ki.

¹³ Kaiwasanei kiai ambori enemirireu mea we meraria yau fefe. Wape mandoni dino doaria mutu paria sobu werea naya fo mani ambori sobu faririfo ki.”

Fi dadira fuba tuti mam-pariri tarai kaha fosa

(Matiusi 24:15-28; Lukasi 21:20-24)

¹⁴ “Rahida bo mewati mano kerira pari tuti wedaya ne karira pari fo foi doari na katai mesi we doa nai kaha foi ki, ambori wedaya Sem-paisi ne Munufoi mesi kahai ki. (Kaiwo nani todoni kontai mano metatorai nini wa mea metafurai.) Rabuang bonani mewati fi karira nani mani, inontarai enayai na Yudea fosa todoni kontaio ewawu ahera, emitto to katai weuai fo we etadiwa nayai.

¹⁵ Mano tete rabuang bonani niayai na ne munu refongfo wiyo da wafui we kia fieai na munu rorongfo fanai.

¹⁶ Mano niayai na romifoi, dohonao daraberahi to ne munufoi we kia fieai konta fe.

¹⁷ Rahida nana fo, rahida karira paria we wiwinaifosa tuti wiwingno etinsui ui fosa, weo nana mani ewawu ahera kaha.

¹⁸ Mewenadi we dohonao finanai tete danunang rorong fo fanai.

¹⁹ Weo na rabuang bonani, dadirao miung kaiwasafoi nani, ne dadira fuba pari fine wiro kawariai na wea kaharai, na rahida reantennang Allai niari nunei fo paria sobu ninai, tuti wiro kawariai na eai ahang kaha.

²⁰ Masino rahida nanai Allai fioukiraia tanang kaha mani, mansiari kontaio wiro kiahari weru karira nana kaha. Wape Allai enetituai we ne inontarai dirisa fosa, amani ne inontarai yuaisa fosa, wedaya fiouki rahida nanaia tanang.

²¹ Rabuang bonani manei medu we mea deyo, 'Mewati! Mananu Mampariri fi andinini!' ete 'Mewatianandiwan!' dohonao meroaso fe.

²² Weo mampariri tarai kaha fosa tuti nabi tarai kaha fosa ambori ehawariai ki. Ea ambori enari fi fuba bitoya paria tuti fitantuma bitoya we enari we etatofa mano Allai dirisa fosa kontai, masino ebiriu we enarisa tonanai.

²³ Ampafe metanansiau. Finanai kai wiro kawaria kaharai mae, yeikaririai kawuru we mea kai ampa, ambori metawai fanai."

Rahida Kaisung Inontarai nei daraberahi aha ma fo
(Matiusi 24:29-31; Lukasi 21:25-28)

²⁴ "Rabuang bo esodai dadira fuba pari fo kiai mani, 'Wofaisi ambori memantiti ki,

tuti embaifaisi sambewarai ahang kahai ki,

²⁵ awahafaisi ambori tiafatting na rorafaisi tuti sawai ki,
tuti fi wemambiriu na rorafaisi ambori dari babbaini ki.*

²⁶ Finanaifa kawariai akawuru wori, Kaisung Inontarai nei ambori watioi we da na kafafefo na rorafaisi meu, ne tapapafo fuba paria tuti ne sambewaraio dadafo fiabai.

²⁷ Ambori demi ne we-waifosa we efanduhi ne kaiwasa diriri foi na do wanang murang foi paria sobu do wanangfui foi, tuti na do wanangsai foi paria sobu do wanamba foi, kontai na rorafaisi reafea pari sobu reafeai."

Yesusi deinawi fiainawiai na ai urung

(Matiusi 24:32-35; Lukasi 21:29-33)

²⁸ "Fiyiwansoai kariri ai urung nei deinawi aunaufefai fa, amani wati to aifoi we wedahamia kai, rerorifoi kiawariai aha mani, nana mani waitawanai we katu wori wemunudang ki.

²⁹ Tonanai kontai we mewatio finani kiai kawariai mani, mewaitawanai kontai we rahidafo kefang ampa.

* ^{13:25} Yesayai 13:10, 34:4

³⁰ Tarai, imadurai we mea mau yeyo, inontarai na rabuang boninisa wiro emarareharao ehai kaharai mae finanai kawariai kawruua.

³¹ Rorafaisi tuti nunei niai rai, wape nehu Kaiwone watai wenumainu."

Tatanansiau tuti tata-mang na mai weo taserawawa- era rahida Kaisung Inontarai foi da nai ma fo

(Matiusi 24:36-44)

³² "Tonanai ki, wape kariri rahida tuti araha ureng beiru Kaisung Inontarai nei da nai ma fo, mandoni kontai deitawana kaha. Wewai na rorafaisa kontai ewaitawana kaha, Kaisung Inontarai nei kontai deitawana kaha, mae Dai mesiri andino deitawana ne.

³³ Ampafe todoni kontaio mewaitawang weduarai tuti metanansiau pampang, weo rahidafoi mewaitawana kaha fefe.

³⁴ Finanai ne tarai toyario, inontarai dontai to katai waroi. Donta kaharai mae, demi ne mangfatafosa we ewaitawang weduari, tuti deto fi eru fo maisa we enari. We mano deitawang wedua rahutu borongfoi deretawani we deitawang beng.

³⁵ Ampafe metanansiau, weo wiro mewaitawang kidoni mano ne munufoini da nai ma fo kaha. Tarahio da na ramindenafa, ete diru rabuangfo ete rerai aha buafo, ete wofoi dauta fo te.

³⁶ Ambori masino daraberahi tantuma mani, dohonao memainenang kaha fe.

³⁷ Fianai aino imadurai we mea mau ninai, imadurai kontai we kaiwasane kiai, amani metanansiau pampang."

14

Imami baba fosa tuti man-taunau Kaiwo Musai soi fosa esera we emung Yesusi

(Matiusi 26:1-5; Lukasi 22:1-2; Yohanesi 11:45-53)

¹ Rahida boru aha mani, etohonsua muniara fuba inontarai Yahudi fosa etang Roti Weragi kaha foi, tuti rahida esahui we rahida Paska foi. Na rabuang bonani, imami baba fosa tutu mantaunau Kaiwo Musai soi fosa esera we rang we etafu Yesusi na mamunggasai we ambori emuni.

² Manamo emadu waw-erafa eteyo, "Wiro tanari finanai na rahida Paska foi fanai, weo nana mani kaiwasa bitoya foi ehuaya etohona rai."

Na Betania wiwing manei sara Yesusi na maning niunsai mampori

(Matiusi 26:6-13; Yohanesi 12:1-8)

³ Na kutu nanai Yesusi niai na Betania na Simoni, mano raminde nanai meni-nang kusta foi, ne munufoi. Rabuang bo itorampi foi, wiwing manei da weia. Wi-wingfoi kiao maning niunsai mampori botori bei, maning nani ne harga dedai paria. Bioi karai botori rahanang foia, tuti yuai maningfoi sara Yesusi nungfo nai.

⁴ Inontarai maneiruo eminohi kontai na nana fosa ewati fi niari nana fo

ehasouwi, ampare emadu wawerasa eteyo, "We fianie wiwingfoi mei funong maning ne harga dedai tonina finina?

⁵ Ne mahikai mani, maningfoi dewayani tuti doifo dohonai we mano ene pari fi fosa. Weo maningfoi ne haragafo dedai paria amani doi dinario wepiaring webetoru (300) teai." Ampafe ehasowi paria.

⁶ Wape Yesusi medu wesa deyo, "Metawinia! We fianie metatawari tonanai nina? Fiani aino niari we yau ninai, fi mahikai fine.

⁷ Weo inontarai ene pari fi nesa mani, enayai rahang mea pampang na rahida neungne, ampare masino memaya mani rahida neungne kontaio mefatasa ki. Wape yau wiro inayai rahang mea waroi ahang kaha ki.

⁸ Wiwing nini niari fio mai wei we niari we yau fo. I sara maning niunsai mampori nei na nehu tarainei tonina ne we meineng nehu tarainei we ambori esarai fo.

⁹ Tarai, imadurai we mea mau yeyo, na nunei sentenang, na katai doni kontai nehu Kaiwo Mahikai fo ewuwuai naya mani, fi wiwingfi niari ninai kontaio etaiririai ki ambori earomioai."

Yudasi yoa we dewayang Yesusi

(Matiusi 26:14-16; Lukasi 22:3-6)

¹⁰ Ainanaya Yudasi Iskarioti, manei na Yesusi ne inontarai ewesuraya mandu fosa,

da we imami baba fosara we dewayang Yesusi wesa ki.

¹¹ Rabuang bo imamifosa etarami kaiwo fenana fo, eparaise paria tuti etarerai we ambori ebai Yudas ki. Ampafe Yudasifo sera we rahida mai we dewayang Yesusi.

Yesusi dang fiang Paska ria ne inontarai ewesuraya mandu fosa

(Matiusi 26:17-30; Lukasi 22:7-23; Yohanesi 13:21-30)

¹² Na rahida bo reantenang etohonsua muniara Roti Weragi Kaha foi, amani na rahida Yahudifosa emung domba we fiang Paska foi, Yesusi ne inontarai ewesuraya mandu fosa etutani eteyo, "Daie, katai bodoni dino enemurorong niyai nai we amemainenang fiang Paska we wau nai ne?"

¹³ Ainanaya Yesusi demi uwemandu na ea, medu we suru deyo, "Mura to bendarifoia, na wanai ambori musobu mang manei we kia babeu bei, sefang na merehara, mura riata.

¹⁴ Munu da wa suaioi foi mani, mura wa musuai nai kontai tuti mumadu we mano ne munufoi mureyo, 'Dai Mantaunafoi deyo, "Rorong bodoni dino yau tutu nehu inontarai eraria yau nesa ametang fiang Paska nai ne?"'

¹⁵ Inontarai nani ambori deinawi rorong fiebai bei na yai fo we muru. Rorong nani

meinenang ampa. Mumainenang fiang Paska na nanai we tata."

¹⁶ Ainanaya inontarai mandu fosuru ura to bendarifoia. Na wanai fianai aino usobua fo, mai kariri fi Yesusi medurai we surua fo. Ampafe na katai nani umainenang fiang Paska foi we ea naia.

¹⁷ Dirua mani Yesusi tuti ne inontarai ewesuraya mandu fosa era to munufoia.

¹⁸ Era wa eminohi etampi tonanai, mayeai Yesusi medu wesa deyo, "Tarai, imadurai we mea mau yeyo, manei na mano tatampi ruhiae nini tata ambori dewayang yau ki."

¹⁹ Etarami kaiwo fenanai enemirorong fituayai paria, ainanaya mansiari-mansiari dutang bari Yesusi aha deyo, "Daie, wiro yau kahai e?"

²⁰ Yesusi yoa deyo, "Inontarai nini mani, inontarai suraya mandu ne mea manei dine, amani andino soang ne rotifo ruhiae ria yau na rewangguai boyari ne."

²¹ Tarai, Kaisung Inontarai nei ambori mireha kariri fianai aino fafongfa nabifosa esoi na Sempasi ne Kaiwofoa fo. Wape we mano dewayang Kaisung Inontarai neia mani, ambori sobu ne karirafo ki! Ne mahikai sewa we wenanifaini mani, wiro saubaunung to nunei ma fanai."

²² Rabuang bo etampi foi, Yesusi kia rotifeai dutang Sempasi dohong mahikai wei. Ainanaya fioabau rotifoi na warangfo, tuti

dohonai wesa. Yu rotifo dohonai wesa tonanai mae medu wesa deyo, "Mehari mau tuti metani, weo nehu taraifi dinini."

²³ Mayeai kianofi soni angguri nai foi, dutang Sempasi dohong mahikai wei. Ainanaya dohong anggurifoi na nofi foi aha, we etunumi.

²⁴ Mayeai Yesusi medu wesa deyo, "Angguri nini mani nehu rika dine, rikao na Kaiwo Areraio Allai dohonai we inontarainesara fo, rikao tiwowu we kaiwasa bitoya foi."

²⁵ Tarai, yeisaharai we mea mau yeyo, angguri nini wiro yunumi ahang kahai, paria yunung angguri weworu na Dai Allai ne Mananu rorong foi."

²⁶ Ainanaya erohi rarung rowei we efiai Sempasi, mayeai era to Wiwoi Saitunia.

Yesusi medurai we ambori Petrusi feforai ki

(Matiusi 26:31-35; Lukasi 22:31-34; Yohanesi 13:36-38)

²⁷ Na rang rorong era to wiwoifoia fo, Yesusi medu wesa deyo, "Mea kiai ambori mewawu taterai weru yau ki. Weo na Allai ne Kaiwo dotu tono:

'Imung ne mantahungfoi,
tuti dombafosa ambori
ewawu taterai ki.*'

²⁸ Wape rahida bo isuwi aha foi mani, ambori ira foni meara isobu mea na nu Galilea foi ki."

²⁹ Manamo Petrusi yoa deyo, "Bereri kontai. Tarahio mano wei nesa, mae yau

* 14:27 Zakariai 13:7

mani todoni kontaio iwawu
weru wau kaha rai."

³⁰ Yesusi yoa wei aha deyo,
"Tarai, imaduarai we wau
mau yeo, diru nini wiro
manggohei bibe weberu ka-
harai mae, fofora yau webet-
oru kawurua, amani boyo
wiro boroanso yau kaha."

³¹ Manamo Petrusi kikatawanai
deyo, "Todoni kontai ki, paria
imereha kontai ria wau,
ifafora wau na wea kaha rai!"

Tuti mano wei fosao,
emadu tonana kontai.

*Yesusi wenadi na Getse-
mani*
(Matiusi 26:36-46; Lukasi
22:39-46)

³² Ainanaya Yesusi tuti ne
inontaraifosa era to katai
bei wonong fino Getsemani.
Na katai nanai Yesusi medu
wesa deyo, "Meminohi na
ninai mae itaha tourai to
wanaia iwenadi nai."

³³ Ainanaya kia Petrusi,
Yakobusi tuti Yohanesi itora
ruhiae riati. Na siari nanafo
nuruainso weansarai tuti
enerorong fituayai finanaya.

³⁴ Ampafe medu we sitoru
deyo, "Enehurorong fituayai
paria nehu tarai toyari yeo
imereha. Ampafe munton-
ayai na ninai tuti muntorena
fanai mae muntowaitawang
weduarai."

³⁵ Yesusi saha tourai waroi
kuteai weru sitoru, ainanaya
disangkapa awebukafo tuti
dutang Sempaisi. Dutanai
deyo todoni mani wiro sodai
ne dadira rorong fo fanai.

³⁶ Wenadi deyo, "Daie,*
Wau nari fiani kontai mawa
arora. Kadeo ruai fi miraba

fuba isodairi nini weru
yau, wape wiro kariri nehu
yawiane fanai, mae kariri
nemu bawiawa terai."

³⁷ Mayeai daraberahi we
ne inontarai kia sitoru fo
itoru aha, wape da wa mani
deti sitoru we itorenawa
itowaitawang mai kaha.
Ampafe medu we Petrusi
deyo, "Simone bena e? Yemi
wau we bena fanai mae
boitawang weduaraifa araha
ureng tarai boyari kawuru,
wape wiro wemambiriu wea
kaha."

³⁸ Ainanaya medu aha
deyo, "Muntowaitawang
weduarai tuti muntorutang
Sempaisi, ambori Saminseni
weanggari muntoru fanai.
Tarai we muntonumianin-
uwa biriu we dohong kariri
ne bengfo, mae muntone
taraiwa wemambiriu kaha."

³⁹ Mayeai Yesusi da wa du-
tang Sempaisi aha we kaiwo
anta dutang wea fo.

⁴⁰ Dutanai kaifo daraber-
ahi we ne inontaraifo sitoru
aha. Wape da wa mani
sobu sitoru we itorenawa,
weo itouremi mamong paria
fefe. Ampafe itoserawawera
fianai aino itore itomadurai
we Yesusi ahang fo.

⁴¹ Rabuang bo Yesusi
daraberahi we sitoru we-
betoru fo, medu deyo,
"Muntowatai muntorena
nendai e?" Mainanaya.
Rahidafe kikeu ampa we
Kaisung Inontarai nei, mano
dewayani foi soari to in-
ontarai sasari fo ewarami
rorong fo ampa.

* 14:36 Na Yahudifosa ene kaiwo Iberani mani, Abba.

⁴² Muntoroabari muntoru ambori tora. Weo muntowati, mano dewayang yau fi da kawuru ma nina."

Etafu Yesusi tuti ne inontarai erariati fosa ewawu taterai

(*Matiusi 26:47-56; Lukasi 22:47-53; Yohanesi 18:1-11*)

⁴³ Yesusi doa medu tonanai we sitoru mae, Yudasi da wei ma. Yudasi nini mani Yesusi ne inontaraio ewesuraya mandu fo manei dine. Kaiwasa bitoya era riati ma, eha sondu tuti aiboi. Kaiwasa nanisa mani, imami baba fosa, mantaunau Hukumi Musai soi fosa tuti mano ewenunggamie i we Yahudi fosa, ansaino etemisa ne.

⁴⁴ Na antanafa, Yudasi mano dewayani foi medu wesara deyo, "Inontarai mandoni dino inunahi fo mani, inontarai dinani, metafuri. Metafuri tuti mehari, wape mewaitawang weduaria."

⁴⁵ Na kutu Yudasi da ma nanai, da bau Yesusi tuti medu wei deyo, "Dai Rabio Mantaunaune waune," mae suana niuna Yesusi.

⁴⁶ Ainanaya eru tawang Yesusi tuti etafuria.

⁴⁷ Wape inontarai etoa na nana fo manei fiating ne sondufoi, doara waru ferang kutu imami fuba Kayafasi ne womingfoi tarandaungfoia fituayaia.

⁴⁸ Ainanaya Yesusi medu wesa deyo, "Mewaitarahio yau mani inontaraio mamuna di yau e,[†] donio meha

sondu tuti aiboi mera ma we metafu yau nai nina e?"

⁴⁹ Rahida neungne inayai yeunau pampang ria mea na Sempaisi ne Munufoi rofongfo, mae wiros metafu yau kaha. Wape todoni kontaio menari tonanai, ambori mai kariri fianai aino dotu na Sempaisi ne Kaiwofea fo ne."

⁵⁰ Ainanaya Yesusi ne inontarai erariati fosa ewawu taterai weruria.

⁵¹ Na nanai bariboi manei da ria Yesusi na kurufui fo, i sensang wedua ne taraifoi terai na ireu linei bei, amani ireu ne harga dedai dine.

⁵² Raifosa eteyo etafuri kontai, ampafe warapa ireufoi erutia mae mito arora wa.

Yesusi doa na Majelisi Yahudi fosa earomireafo
(*Matiusi 26:57-68; Lukasi 22:54-56, 63-71; Yohanesi 18:12-14, 19-24*)

⁵³ Mayeai eha Yesusi to imami fuba foi ne munufoia. Na nanai imami baba fosa, mano ewewafoniai we Yahudi fosa tuti mantaunau Hukumi Musai soi fosa efanduhisa kiai na nanaia, amani mano esahusa we Majelisi Agama.

⁵⁴ Petrusifo weriria Yesusi na waroi, paria suai kontai to imami fuba foi ne munu dereungfo afui. Na nanai deti inontarai ewaitawang munufoi sa eminohi eharuru adia, ampafe da wa minohi keruru adia kontai ria sa.

⁵⁵ Imami baba fosa tuti Majelisi Agama fosa tan-tenang erurai paria we

[†] **14:48** Ete mananapi.

esobu inontaraio epampamu etinggai Yesusi we dohong sarawai ambori etohong aiboi marareha fo wei. Manamo wiro esobu ne sarawafea kaha.

⁵⁶ Esahu inontarai bitoya kontai ma we etinggai funong Yesusi wape fianai aino emadurai nanai wiro emadu robong boyari kaha, ampare wedaya etapa wawerafa.

⁵⁷ Ainanaya manea siai etoaria emadu funong kaiwo kariri Yesusi,

⁵⁸ eteyo, "Ametarami inontarai nini medu tonina, 'Itota Sempaisi ne Munu inontarai enariri ninia kiai, wape rahida botoru aha mani iruai bei siai aha doa, amani bo wiro inontarai enariri kaha.'

⁵⁹ Wape kaiwo emadurai nanai kontaio wiro emadu robong boyari kaha, ampare kaiwofo dapa wawerahai kontai.

⁶⁰ Ampafe imami fuba foi doari rahangsa kiai awiai tuti dutang Yesusi deyo, "Todonie boromu tibau we kaiwo fuba etinggai wau weai nini kahai wei ne?"

⁶¹ Manamo wiro Yesusi medu sobu kaiwofea kahai mae nemboru terai.

Ainanaya imami fuba foi dutang berahi aha deyo, "Wau mani Mananu Mamparirio, Kaisung Allai mano Dedai Mirarebana fi di wau e?"

⁶² Yesusi yo deyo, "Yau aranane, tuti mea kiai ambori mewati Kaisung Inontarai nei we minohi na Allai mano weMambiriou foi

warang domoya fo tuti da na kafafefo na rorafaisi meu."

⁶³ Ampafe imami fuba foi kesou paria tuti fiosiabu ne ansungfo tuti medu deyo, "Kasau we tata ampa. Mandoni dino tatutani we medu kariri ne sarawafo aha ne?

⁶⁴ Weo metaramioai terai na metaramine we deibera Allaifo ampa, weo deyo I mani Seng Allai ne Kaisung dine. Ampafe memadu todoni?" Ea kiai emadu be-yari we eteyo Yesusi dohong sarawai, ampare sobu aiboi marareha fo.

⁶⁵ Ainanaya inontarai maneiru teai etoaria ehdioi. Tuti etabung wedua urengfo, ambori eboi mae eteikanggani, eteyo, "Nabine waune, bento, boroanai toyari nabi, boisaharai we mandoni dino bioi wau nei." Mano ewaitawang weduari fosa kontai eboi.

Petrusi gefora we wiro deroanso Yesusi kaha
(Matiusi 26:69-75; Lukasi 22:56-62; Yohanesi 18:15-18, 25-27)

⁶⁶ Petrusi doa wawerahai na munu dereungfo tonanai, wiwingno fiata imami fuba foi manei da rurami.

⁶⁷ Deti Petrusi we minohi keruru adiafo nanai, deroang wei na mai paria, tuti medu wei deyo, "Yesusi inontarai Nazareti foi ne inontarai erariati fe manei di wau to."

⁶⁸ Manamo Petrusi gefora deyo, "Iserawawerahi tuti iwaitawang fi modurai nina kaha." Ainanaya Petrusi dari weru katai nani da to rahutu borong fuba foi aha.

[Na kutu siari nanai kontaio manggohei bibe.]‡

⁶⁹ Mangfata wiwing foi deti Petrusi aha, ainanaya medu we mano etoari na nana fosa, deyo, "Inontaraio eraria Yesusi fe manei dinini."

⁷⁰ Manamo Petrusi gefora toyarine. Mayeai inontarai etoari na nana fosa emadu we Petrusi aha eteyo, "Wiro bereri ahang kaha, mae wau mani inontarai ro ria Yesusife manei di wau, weo inontarai Galilea di wau fefe."

⁷¹ Ainanaya Petrusifo doaria geforawa mutu deyo, "Kaiwo metinggai yau weai ninai, iserawa iru na wa amangwau, yau yeroanso inontarai mano meteo nani kaha."

⁷² Na tatofang siari nanai kontaio, manggoheifoi bibe weberua. Ainanaya Petrusi aro kaiwo Yesusi medurai kawuru weia fo. Medurai deyo, "Wiro manggohei bibe weberu kaharai mae fofora yau webetoru kawurua." Ampafe Petrusifo saia denteng ahang kahai we fio niaria fo.

15

Yesusi doari na Pilatusi arongreafō

(*Matiusi 27:1-2, 11-14; Lukasi 23:1-5; Yohanesi 18:28-38*)

¹ Kameai kutung, mano ehutu kaiwo we Yahudi fosa kiai, amani imami baba fosa, mano ewewafoniai we Yahudi fosa, tuti mantaunau Hukumi Musai soi fosa,

esahera emadu ruhi kaiwo, ainanaya ewora Yesusi warangfo tuti eharia etohoni we Pilatusia.

² Na wanai Pilatusi dutang bera Yesusi deyo, "Taraie, wau weMananu we inontarai Yahudi fesa ne ne?" Yesusi yoa wei deyo, "Yo, tonanai kariri modurawa."

³ Imami baba fosa etinggai Yesusi na fi bitoya paria.

⁴ Ainanaya Pilatusi dutani aha deyo, "Maya we fobai boromuwai kaha e? Taramu fi inggairai bitoya paria eru eso wau nai mau ne kaha e?"

⁵ Manamo Yesusi wiro medu sobu kaiwo kuteai ahang kaha, wedaya Pilatusi pepuhung paria.

Yesusi sobu aiboi marareha foi

(*Matiusi 27:15-26; Lukasi 23:13-25; Yohanesi 18:38-19:16*)

⁶ Na rahida fuba Paska foi neungfo mani, Pilatusi ne koang we sawingno inontarai ewatai na aitamu rorong fo manei da to boriei, kariri kaiwasa bitoya foi etiriafo.

⁷ Inontarai manei wonong fino Barabasi, wiatai na aitamu rorong fo, weo miung inontarai kontai na rabuang bo emamuna we parenta Roma foi ne.

⁸ Ampafe kaiwasa bitoya foi era ma we etutangno Pilatusi we sawingno mano ewatai na aitamu rorong fo manei, kariri fianai aino na fafongfo niaria fo.

‡ **14:68** Na kaiwo asli pari fo mani, wiro obu kaiwo rabuang bonini kaha.

⁹ Ainanaya Pilatusi dutansara deyo, "Memaya we itawingno Mananu Yahudi nei we mea re?"

¹⁰ Weo Pilatusi deitawanaifa we imami baba fosa enemirorong pirahai we Yesusi ampare doni ehari ma nina.

¹¹ Manamo imami baba fosa eha we kaiwasa bitoya foi enemirorongfoi ambori etanggewa Pilatusi we sawingno Barabasi wesa.

¹² Ampafe Pilatusi medu we kaiwasa bitoya foi aha deyo, "Tonana mani inari fiani we inontaraio mesahui we Yahudinesa ene Mananufi ne?"

¹³ Ebibe kiai tantenang beyari eteyo, "Pahui na aitabafoi."

¹⁴ Pilatusi berasa aha deyo, "Wape fisarawaio todoni fino niari ne?" Manamo esahu mambiriukariai aha eteyo, "Pahui na aitabafoi!"

¹⁵ Pilatusi niari we sona kaiwasa bitoya foi enemirorongfoi ampare sawingno Barabasi wesara. Mayeai demi inontarai eruba Yesusi, ainanaya dohoni wesara we epahui na aitabafoi.

*Pilatusi ne afai mamuna
manea emei kanggani Yesusi
(Matiusi 27:27-31;
Yohanesi 19:2-3)*

¹⁶ Mayeai Pilatusi ne afai mamuna fo manea eha Yesusi to ene munu fiabai eminohi nai foi afui, ainanaya esahu ne afai mamuna fosa kiai we efanduhisa na nanai wari Yesusi.

¹⁷ Ainanaya esansung Yesusi na ansung kehe rawanderio ne hargai dedai feiai satarai, nana mani, ansung boriei toyari ansungno mano ewemananufosa esansunsa nai fo. Tuti etaya fi na ai arirawang weababo fo bei wesapewi mananu ambori etatari na nungfoi.

¹⁸ Mayeai enari anggari we esomi wei eteyo, "Inontarai Yahudi ne ene mananune waune, amefiai wau!"

¹⁹ Eboi Yesusi nunggamieifoi na aitatahi tuti ehdioi, ainanaya etisangkapa eawemibuka mae esomi wei.

²⁰ Emei kanggania kaia fo, etisu ansung kehe rawanderi fo werui mae etohong mantauni ne ansungfo nari aha satarai. Mayeai ehari to boriei weru munufoi we epahui na aitabafoi.

*Epahu Yesusi na aitabafoi
(Matiusi 27:32-44; Lukasi
23:26, 33-43; Yohanesi 19:17-
24)*

²¹ Na rang rorong era to katai epahu Yesusi nai foi, ehanggung inontarai manei na rang rabuang, inontarai nani arahi da na munuefeai to bendarifoi aha. Wonong fino Simoni, i inontarai Kirene dine, amani Aleksanderi tuti Rufusi utamami dine. Na nanai afai mamuna fosa erutawani etemi sodua Yesusi ne aitabafoi.

²² Ainanaya eha Yesusi to katai wonong fino Golgota, nana mani, *Wyoming Nungkamiei*.

* **15:23** Muri mani, rawang weo ne tarai patite mani, wiro nuruaino pirahai kaha.

²³ Na nanai eteyo etohong anggurio etadoanai na murifeai* awa dunung, manamo Yesusi dunung kaha.

²⁴ Mayeai epahu Yesusi na aitabafoia, tuti ehabi onde we etato ne ansungfo maisa.

²⁵ Nanaya mani, kameai araha ureng indeata, epahu Yesusi na aitabafoi.

²⁶ Na aitaba nunggamieifoi esoi kaiwofea kariri fi eting-gairi wea fo, amani dotu tono Mananu Inontarai Yahudi Din

²⁷ Epahui sau rahang inontarai ukamananapi mandu, manei sau na eneung domoya foi tuti manei sau na eneung dowej foi.

²⁸ Na tonanane mai kariri Sempaisi ne Kaiwo dotu tono:

"I esahui kontai we inontarai niari fi karira."*

²⁹ Kaiwasa fuba da na nana foi ehimi enumi tuti eteiberahi eteyo, "E, inontarai boyo tota Sempaisi ne Mununei tuti rahida botoru ruaisi aha ne waune.

³⁰ Into wemambiriu tonana mani biari weru aitabawai tuti waramuirakirira ninai weru wau."

³¹ Imami baba fosa tuti mantaunau Hukumi Musai soi fosa eteibera Yesusi kontai. Emadu wawerasa eteyo, "Imani feriri inontarai siai, wape wemambiriu we feriri bera mantauni kaha."

³² Tuti eteyo, "Masino i mani Israeline tane Mananuo weMananu Mampariri fi dine mani, tonana mani bia weru aitabafoi to, ambori tawati teraifa mani

taroasoai." Inontarai mandu epahu suru kontai fo suru urei kanggani Yesusi kontai.

*Yesusi ne mireha toa fo
(Matiusi 27:45-56; Lukasi 23:44-49; Yohanesi 19:28-30)*

³³ Tete rahida rabuang araha ureng suraya boru, na tantuma kataifoi memantiti sentenang paria sobu araha ureng botoru.

³⁴ Tuti tete ramindena araha ureng botoru foi, Mesusi bibe fuba deyo, "*Eloi, Eloi, lama sabaktani?*" nana mani deyo, "Dai Allai, Dai Allai, todoni tawing yau nina?"*

³⁵ Inontarai maneiru teaio etoa kefang na nana fosa etaramio Yesusi bibe fo tuti eteyo, "Metaramia sahu we nabi Eliai."

³⁶ Inontarai manei na kaiwasa nanisa sikaherawa kia mandafeai, yorang na angguri sisasa feai, mayeai kia aifarang bei ma disanai nai, ainanaya subarai to Yesusi borongfo ayai. Mae medu deyo, "Tatamang tawaitawanai we Eliai da ma suki weru aitabafoi rai ete bireri e?"

³⁷ Ainanaya Yesusi bibe fuba beyaria aha na rawafui tapapa, mayeai kiaharaia.

³⁸ Na siari nanai kontaio ireu aburung sau wetaba na Sempaisi ne Munufoi rorongfo miabu weberu, na yaifo paria sobu kofafo.

³⁹ Rai mamuna ene mano wenunggamiei doari na nana foi, deti terai todoni Yesusi mireha toa fo nanai,

* 15:28 Yesayai 53:12 * 15:34 Masmuri 22:1

medu deyo, "Tarai, inontarai nini Allai ne Kaisung dine!"

⁴⁰ Na nanai wiwing maneiru teai etoari na waroi ewati kariri fianai aino Yesusi sodaira fo. Wiwing-fosa mantoru itowonomi fino Salome, Maria Makdalena, tuti Maria Yakobusi mano katui tuti Yosesi uinamifo.

⁴¹ Wiwing nini sitoru na raminde Yesusi niayai na nu Galilea foi mani itora riati tuti itofatari ne. Tuti wiwing siai bitoya kontai efanduhisa na nanai. Wiwing nanisa era ria Yesusi kawuru ma enayai na bendari Yerusalem ampa.

Esarai Yesusi na fafofo

(Matiusi 27:57-61; Lukasi 23:50-56; Yohanesi 19:38-42)

⁴² Wofoi rerai we sawaia tuti nana mani rerai we rahida Sabati foi finana. Weo rahida bonani mani rahida mainenang fi we rahida Sabati foi fefe.

⁴³ Ampafe inontarai manei wonong fino Yusupi, i inontarai na bendari Arimatea dine, da ma. I kontai yuo wang Majelisi Agama fo tuti kaiwasa esahu suari, tuti i yoasoa tuti demang na mai paria we rahida bo Allai we-Mananufo. Kia ne tarai da wa dutang Pilatusi we kia Yesusi ne taraifoi ambori sirai.[†]

⁴⁴ Pilatusi taraoai we Yesusi mirehara fo nanai, pepuhung. Ampafe demi inontarai manei da wa sahu mano wenunggamiei we afai mamuna fosa ama dutang berahi we tarai e Yesusi mireha ampa ne.

⁴⁵ Mano wenunggamiei we afai mamuna fosa deikariri kariri ne mireha toa fo kai we Pilatusia, ampafe yoa we Yusupi ne kaiwo dutang wea foa.

⁴⁶ Ainanaya Yusupi wiorio ireu lineni (ne harga dedai) beia, mayeai da wa su Yesusi na aitabafoi meu, sensani nayai. Mayeai kiaria dohoni wia na fafo dahi na wiwoi wekamiei dereung fo. Ainanaya, dedoi kamieie fiabai beia wia kobu fafo borongfoa.

⁴⁷ Maria Makdalena tuti Mariai mano Yosesi inanai uwati te katai esarai nai foi kontai.

16

Yesusi suwi aha

(Matiusi 28:1-10; Lukasi 24:1-12; Yohanesi 20:1-10)

¹ Rahida Sabati foi kiaja fo, Maria Makdalena, Mariai mano Yakobusi inanai tuti Salome, itowaworio finunsai mampori fo, itoha itora to fafo foi we itosara Yesusi ne taraifoi nai.

² Ampafe kameai kutung na rahida bo reantenang, amani rahida Minggu foi, wofoi arahio fioairi, mae wiwingfo sitoru itora to fafofoia.

³ Na rang rabuang itomadu wawera sitoru itoreyo, "Mandoni dino awa mani fiata totoru we dedoi kamieifoi weru fafo borongfo ne?"

⁴ Weo kamieifoi fiabai paria fefe. Itomadu tonanai, mae itofobera itouremi itowatia mani, kamieifoi

[†] 15:43 Na Hukumi Yahudi foi esarai inontarai marareha na rahida Sabati fanai. Mae na rahida bo fafong foi, wofoi sawai kaharai mani, esaraia.

dedoia wia siai weru fafo borongfoi.

⁵ Ainanaya itosuai to fafofoi afui mani itowatio bariboai mane, ansung satara fo dewaroi bua karofari paria, minohi na eneung domoya fo. Ampafe itosoi sitoru paria.

⁶ Bariboaifoi medu we sitoru deyo, "Muntomatai fanai, iwaitawanai we muntosera we Yesusi inontarai Nazareti mano epahui na aitabafoi nani. Manamo wiatai na ninai kaha, weo suwi ampa. Muntowati te katai etohoni wiatai nai fi dinini.

⁷ Ampafe muntora wa muntoraikaririai we ne inontarai erariati wasa, kontai Petrusi. Muntoraikaririai muntoreyo, 'Da foni meara demang mea na nu Galilea fi fo. Na wanai ambori mewatiao ki, kariri kaiwo medurai we meara fo.'

⁸ Ainanaya itora to boriei weru fafofoi nanai, itowawu, we itomataia itorirora fefe. Itowawua fo wiro itoraisaha sobu kaiwofo we mane, ahang kaha, we itomatai karera fefe.

*Yesusi deinawi ne tarai we Maria Makdaleni**
(Yohanesi 20:1-2)

⁹ Rahida Minggu kameai kutung Yesusi suwi na marareha rorong fea fo, dare deinawi ne tarai we ne inontaraifosa. Reantenang mani we Maria Makdaleni

(Mariai nini andino raminde Yesusi data nuaninu kerira itu werui ne).

¹⁰ Ainanaya Mariai da wa deikaririai we Yesusi ne inontarai erariati fosa. Ea mani, enemirorong fituayai, esai we Yesusia.

¹¹ Etaramioai we Yesusi suwi na marareha rorong foi ampa tuti deinawi ne tarai we Mariai, wape wiro eroasoa kaha.

Yesusi deinawi ne tarai we uwemandu na ne inontarai erariati fosa

(Lukasi 24:13-35)

¹² Mayeai Yesusi deinawi ne tarai siai aha we ne inontarai mandu ura to munuefea fo.

¹³ Ampafe urarabera suru we mano efau fosa aha, we ureikaririai kariri Yesusi wesa. Manamo eroasoa kahai kontai.

Yesusi deinawi ne tarai we ne inontarai ewesuraya mansiri fosa

(Lukasi 24:36-49; Yohanesi 20:19-29)

¹⁴ Yesusi ne inontaraifosa eminohi etampi tonanai, mayeai na tantuma Yesusi kiauwariaiosa. Suasa we eroasoai turura kahai tuti enumikamieifoi mitubaru paria. Weo kaiwo etaramioai ria inontarai mano ewati te Yesusi we suwi ahang fosa fo wiro eroasoa kaha.

¹⁵ Ainanaya medu wesa deyo, "Mera wariai to nunei sentenang, we mewuwu

* **16:8** Naskah Yunani fiabai bitoya esoi arawang 9-20, mae naskah Yunani fafong pari, wetarai pari, wiro soi arawang nani kaha. Ahli Alkitapi fosa efau eroa we kaiwo nanai wiro Markusi dino soi neng kaha, mae inontarai siai dino soi ne. Tarahio Markusi soi paria sobu arawang 8 terai, ete kaiwo siai soi fo nai ampa.

nehu Kaiwo Mahikai we kaiwasafai sentenang.

¹⁶ Mandoni dino yoasoa kaha mani ambori sobu Sorohafoi, mae mandoni dino yoasoai tuti webaptisi mani ambori kiahrai weru Sorohafoi.

¹⁷ Fiainawiai kariri eroasoafu mani, inontarai eroasoai nanisa ambori etata nuaninu kerira fosu na wonohune, tuti ambori emadu na inontarai siai ene kaiwofo.

¹⁸ Kontai ambori eru tawaifosa wape esodai ne karirafea kaha tuti etunung fi memu foi wape memusa kaha. Tuti eruai ewaramifoa wasau inontarai emaninang fosa mani, ambori ebeng ki.”

Yesusi dau to rorafaisi

(Lukasi 24:50-53; Rasuli 1:9)

¹⁹ Seng Yesusi medu ri-asara kaifo, dautai to rorafaisia. Na nanai minohi na Seng Allai warang domoya foi.

²⁰ Ampafe ne inontarai fosa etaraberasa tuti ewuwu ne Kaiwo Mahikai fo to katai doni kontai na nunei sentenang. Tuti Sengnei kontai sawing warang kaha, mae yufi riasa, deinawi ne tonanane na fitantuma fuba niari na sa fo. Antu.

Kaiwo Mahikai Na Lukasi

Kaiwo dedung we Kaiwo Mahikai na Lukasi

Kaiwo Mahikai finina mani Seng Allai dohonai we inontarai manei, wonong fino Lukasi, ambori soi kaririai. Lukasi mani manggarawang dine tuti yoaso Yesusi.

Lukasi soi fininai we inontarai fuba manei, wonong fino Teopilusi, ambori deitawanai na mai fio Seng Yesusi medurai tuti niari na nuneia fo, kontai we dohong rang we inontarai siai, Yahudi tuti Yahudi kaha fosa, ambori eroaso Yesusi mani eroasoia mutu. Kontai de deretawansa ambori era etairiri Seng Allai ne Kaiwo Mahikai kariri Yesusi ne, we inontarai na nunei sentenang.

Kaiwo na bukunei deto kuttuai toninai:

1:1-4 Kaiwo kariri bukunei.

1:5-2:52 Kariri Yohanesi tutu Yesusi utaubau unumikamiei fo pariao ufabaifo.

3:1-20 Kariri Yohanesi mano webaptisi kaiwasao.

3:21-4:13 Yesusi webaptisifo tutu sobu anggari.

4:14-9:50 Yesusi deunau kaiwasa na nu Galilea.

9:51-19:27 Yesusi na rang rabuang na nu Galilea to bendari Yerusalem.

19:28-22:46 Yesusi na Yerusalem tuti na katai kefang na nana fo.

22:47-23:56 Etafu Yesusi etohoni sau na aitabafoi.
24:1-53 Yesusi suwi aha, medu we ne inon-taraifosa, tuti dau to rorafaisi.

¹ Wau, Teopilusi inongwa di wau, yau Lukasi yenatu kaiwoariri we Dai wau. Inontarai efau enemittiuaitai erurai we etoi etang kaiwo kariri Seng Yesus Kristusi tuti fi niari rahang tata kawurua fo,

² masi karirio fio mano wemangfata we Kaiwo Mahikai fo, amani mano na reantenang ewati teri fosa, fi etaiririai we tata fo.

³ Mantaung yau kontaio irurai we iwaitawang kariri finanai kai na masi, na reantenang pari fo, ampare enehutituaitai mai we yau kontai we isefa kaiwone na mai we Dai bohi Teopilusi wau mau.

⁴ Ambori wau boitawanai weo kaiwoariri etaunauwai we wau wa mani tarai antu.

Kaiwoariri kariri Yohanesi ne dariafo

⁵ Rabuang bo Herodesi wemananu na Yudea fo, imami manei wonong fino Zakariai, nano Abiai ne imami rabuangfoi. Binengfoi kontai weriria na imami Haruni, wonong fino Elisabeti.

⁶ Uru mani umai nano Seng Allai urengreafo, urohong kariri ne Hukumifo tuti ne kaiwo pondoia fo na mai.

⁷ Wape une pari arikang, weo Elisabeti kirawah, tuti uwainonggutung ampa.

⁸ Na rahida bei Abiai ne imami rabuangfoi enari fi imami fo, amani Zakariai niari kontai weo Seng Allai.

⁹ Mayeai ehabi onde, kariri imamifosa ene koang, weo mandoni dino da to Rorong Mirarebana foi na Munu Seng foi weo niunung finunsai mampori we Seng Allai. Aweu mani tatera fino Zakariai.

¹⁰ Zakariai da afui niunung finunsai mampori fo mae kaiwasa bitoya efanduhisa na boriaifo tuti ewenadi.

¹¹ Mayeaia mani Zakariai detio Sempaisi ne wewai manei doa na mesbaو niunung finunsai mampori naya fo eneung domoya fo.

¹² Zakariai detioi fo soiri tuti mitai.

¹³ Manamo wewaifoi medu wei deyo, "Zakariae, mutai fanai. Weo nemu nadiwai Sempaisi taraoi tuti dohong kariri ampa. Binemu Elisabeti ambori minohi tuti kaisung manei ki. Bohong te wonong fino Yohanesi.

¹⁴ Wau murarising tutu puraise rai, kontai kaiwasa bitoya wai emararising weo arikangwai,

¹⁵ weo weinontarai fuba na Sempaisi urengreafo. I mani wiro dunung angguri ete ye kaha. Arikang nini inang minohi tutiri kaharai mae Sempaisi Nuaninu Mi rarebana foi sensoni kawuru na inang enemanabufoia.

¹⁶ Arikang manani mani wedaya inontarai Israeli bitoya etarababerasa we Seng Allai, ene Mananufoi.

¹⁷ I mani da foni Sem paisi, wemambiriu kariri nabi Eliai. Ampafe dohong wawa enimiroong sawai we ene arikangfosa, tuti dohong inontarai era saiworuai etarababerasa we rang mesio inontarai emararebana fosa era nai foi. Nanaia mani deunau kai wasafo ampafe emaineneng etamang we ene Sengfoi."

¹⁸ Ainanaya Zakariai medu we wewaifoi deyo, "Todoni iroaso finanai? Weo iweinonggutung ampa, tutio nehu wiwingfoi wewi winggutung ampa."

¹⁹ Wewaifoi yoa wei aha deyo, "Modu tonana fanai. Wewai Gabrieli di yau. Yauno diru rahida yoa na Seng Allai arongfo ne, amani demi yau ma yeikariri kaiwo mahikai ninai we wau.

²⁰ Fi yeoai nina mani wetarai rai, manamo roasoa kaha, ampafe boromutamu rai. Modu fiea kaha pariao kaiwo ninai wetarai na ne rahida derera fo."

²¹ Kaiwasa demang we Zakariai na boriai foi enimtituitai paria, weo niayai waroi karerai na Rorong Mi rarebana foi.

²² Mayeaia mani da to boriai, manamo borongfoi tibau wesa kaha, niari kaririai na warangfo terai. Arahioewaitawanai weo deti fiainawiai bei na Rorong Mi rarebana foi. Mae borotamu pampang wo.

²³ Mayeaia mani fi niari na Munu Seng foi kai finanaya, ainanaya tiwera tono ne munu rorong fo aha.

²⁴ Waroi aha kaha mae binnengno Elisabeti doama, amparef dediwarri na munu rorongfo we embai ring.

²⁵ Deyo, "Ikarawahi pariao iwewiwinggutung, amparef kia mamaya we yau. Wape nina mani ikarawahi ahang kaha. Seng Allai niari finini we yau. Dohong ne bengfo arora we yau amparef imamaya na kaiwasa earomireafo ahang kaha."

*Wewai Gabrieli deisaharai
we Mariai kariri Yesusi
dedariafo*

²⁶ Elisabeti doama ne embai wonang mani, Seng Allai demio ne wewai manei, wonong fino Gabrieli, da to munuefeai na nu Galileai, wonong fino Nazareti.

²⁷ Da we kadawing sowa-worua manei, wonong fino Mariai. Mariai nini da we mang manei wonong fino Yusupi, weriria na ne wawafoi, ene mananu Dauti.

²⁸ Mayeai wewaifoi da ma sobu Mariai tuti medu wei deyo, "Mahikaifeai we wau, wobu ne bengfo ampa. Sempaisi niai na wau."

²⁹ Mariai tarao kaiwofo nanai, soiri weai, enetituai na enerorongfoi we mahikai fianai aino wewaifi deyo fo.

³⁰ Mayeai wewaifoi medu wei deyo, "Mariae, wau mutai fanai! Weo wobu bengfo ria Seng Allai ampa.

³¹ Wau boama rai, ambori munohi tuti kaisung manei. Bohong te wonong fino Yesusi.

³² Arikang manani mani fiebai wefuba, ahui we

Sengno Dedai Mantaung ne Kaisung, tuti Seng Allai ambori yuaisi we Mananu fuba na ne wereng Dauti ne mananu rorong fo.

³³ I ambori yu wemananu fuba we Yakupi ne ririafoi sentenang. Ne mananufo wiwo werea na ea kaha."

³⁴ Ainanaya Mariai yoa we wewaifoi deyo, "Wape irirau kaharai mae, todoni e, boyo ambori iwearikang nina?"

³⁵ Wewaifoi medua deyo, "Sempaisi Nuaninufoi bia woru wau, ne tapapa nai woru wau, amparef arikang munohi tutiri wai mani mirarebanaifa, tuti ahui weo Seng Allai ne Kaisung dine.

³⁶ Aromuo nemu tafuai Elisabeti, wewiwinggutung ampa. Eteyo kirawahia finana, wape ambori dawingno arikang manei ki, we ninaia mani doama to ne embai wonang ampa.

³⁷ Weo fifianai aino Seng Allai de niari fo mani, miawa arora wei."

³⁸ Mariai deya deyo, "Yau mani, Sempaisi ne woming di yau. Deyo fiani mani, yohong kaririai, amparef fianai aino niari we yau ne mani tarai kariri boyoawara." Ainanaya wewaifoi da werui anina.

Mariai suambawa Elisabeti

³⁹ Waroi aha kahai mae Mariai sikera beyari da to munuefea na katai weuai, wa na nu Yudea foi.

⁴⁰ Da to Zakariai ne munufoi, da wa suai afui, dohong mahikai we Elisabeti.

⁴¹ Elisabeti tarao Mariai do-hong mahikaifo, arikang niai nano enemanabufoi dota do-honai we piraise fefe, tuti Sempaisi Nuaninu dong Elis-abeti.

⁴² Ainanaya sahu tutirai deyo, "Mariai! Wauno wobu mai fuba sewa wiwingne ameane, tuti arikang bawini wai mani sobu mai fuba rai."

⁴³ Tuti inontarai fuba di yau kaha mae, nehu Mananunei inangno da ma suambawa yau nina e?"

⁴⁴ Aweo bohong mahikai ma tarahuoi nanane arikang niai nano enehumanabufuini piraisefe dota dohonai.

⁴⁵ Wau wobu ne bengfo paria weo roaso fiani aino Sempaisi deyoai ria wewaifoi fo wetarai rai."

Mariai ne rarung fiai Seng Allai

⁴⁶ Ainanaya Maria deyo, "Yeparanding Sempaisi na enehurorongnei,

⁴⁷ tuti imararising na nuhuaninunei we Seng Allai,
nehu Mamparirifoi.

⁴⁸ Weo andino aro yau,
tuti urengfo nai na
ne womingno enehurorong tewawa ne yaune.

Tarai weo na ninai to fongna
mani,
kaiwasanei kiai senten-
nang ambori esahu
yau we mano isobu
mai ne,

⁴⁹ weo Seng Allai,
mano weMambiriuw
sewa,

niari fibeng fuba we
yau ne.

Wonongfo mani mararebanai.

⁵⁰ Riria bia we riria,
Sempaisi aro inontarai
mano emataiti fefe
eroasoi fosa.

⁵¹ Niari fi fuba paria na
warang wemambiriru
fo,
Waraepa mano etawa
fosa,
ampafe fi enemiti-
tuaita fo etohong
kariria kaha.

⁵² Su mananufosa weru ene
kadera mananu fo to
kofara,
mae yuaio inontarai
enemirorong tewawa
fosa.

⁵³ Dohong fiang beng weo
inontarai ewawisi fosa
ambori emamosi,
mae datao inontarai ene
ra fosa era arora,
era ewarami era
eawemi.

⁵⁴⁻⁵⁵ Fiata ne womingno Is-
raeli foi kawuru ampa,
tuti aroporo Abra-
hami tuti ne riri-
ane tata kaha,
mae aro ne kaiwasa Is-
raeline tata paria, aro
tata wefitawafa,
kariri dererai we
tane werengfos-
ara fo."

⁵⁶ Mariai minohi ria Elis-
abeti na nanai we embai
botoru teai, arahio daraber-
ahi to ne munufoi aha.

Yohanesi ne dariafo

⁵⁷ Elisabeti ne rahidafo
maia, minohi tutio kaisung
manei.

⁵⁸ Mano munu warareng
ruhia fosa tuti ne terafosa
etaramioai weo Sempaisi

deinawiai we aro Elisabeti paria, amparef ea kontai eparaise riati.

⁵⁹ Arikangfoi neo rahida indeatorua mani, efanduhisa weo ewesunati kariri Yahudifosa ene koang, tuti ete etohoni wononso tamangno, Zakariai.

⁶⁰ Manamo inang medua deyo, "Bireri! Tatoconi wonong fino Yohanesi."

⁶¹ Emadu wei eteyo, "Manamo na nemu ririanei ma mani, wiro manei wonong tonana kaha."

⁶² Ampafe ehamang kaririai na ewaramifo we Zakariai, weo borotamu amparef etutang berahi we wang fiani aino de dohonai we ne arikangfoi fo.

⁶³ Zakariai dutang we kamiae toi nai bei, ainanaya soi aweu mani, "Wonong fino Yohanesi." Kaiwasafai pepuhung sentenang beyari.

⁶⁴ Na kutu iyari nanai, borongfoi tibau, medu aha, tutu fiai Seng Allai.

⁶⁵ Mano munu warareng ruhia fosa ematai tantenang beyari, ainanaya kaiwoaririfo etaiririai wario munuefo tantenang na katai weuai na Yudea.

⁶⁶ Kaiwasa etaramioa fosa enemituai weai na enemirorong, tutu eteyo, "Arikang wani fiabai mani, wefiani rai?" Weo Sempaisi ne tapapa weririati.

Zakariai ne rarung fiai Seng Allai

⁶⁷ Zakariai, arikangfoi tamana, andino Allai Nuaninu Mirarebanai donti,

ampafe medu kariri Allai deyo, deyo,

⁶⁸ "Fiaifeai we Seng Allai, Seng we inontarai Israeli ne tata,

Weo da ma we feriri ne kaiwasanei ampa.

⁶⁹ Demi Mananu Mampariri wemambiri manei da we tata, na ne womingno Dauti ne ririafoi.

⁷⁰ Nafafongfa Sempaisi dohong Kaiwo Arerai kawurua, watai ria ne nabi mano dirisa fosa,

⁷¹ weo sawing tata ambori takaharai weru tane aitetafosa, tuti weru mano enemireu tata fosa ewaramirorongfo.

⁷² Weo deinawi ne aroaf we tane werengfosa, tuti dohong kariri ne Kaiwo Arerai mararebanai nanai ki.

⁷³ Fefora we Abrahami, tata-mamifoi,

⁷⁴ tuti dererai weo warai tata weru tane aitetafosa, ambori tatohong kariri tuti tasomi wei na tamatai kaha,

⁷⁵ na taenemirorong mararebanai tuti taenemirorong mesi, na arongreafo na rahi-dao taminohi na nunei kiai ne."

⁷⁶ Ainanaya Zakariai medu we ne arikangfoi, deyo, "Nehu arikangwa wau, ambori esahu wau wenabi na Seng Allai mano Dedai Mantaung. Weo ro foni Sempaisi,

weo bora rang wei, ambori bounau kaiwasanei ampare emainenang etamang wei.

⁷⁷ Ambori boisaharai we Seng Allai ne inontarai Israeli nesa, we ambori feririsa ki, weo deiai ene sasarifo ki.

⁷⁸ Weo Allai tane Sengnei mani aro tata na enerorong denteng foi, ampare demi Mananufaini da ma we feriri tata nina. Toyari wo dautai na katai dedai,

⁷⁹ Sambewarai weo sambewa inontarai enayai na mamantiti rorong fo tuti na marareha rorong fo, tuti weo wiwiang tata ambori tara na ne rangno kia mai we tata fo."

⁸⁰ Zakariai antungfoi fiabai to yai tuti enerorongfoi wemambiriu. Niayai na katai wekamamiei minano foi, pariao rahida deinawi ne tarai we inontarai Israeli fosa weo deiriri Sengnei ne Kaiwofo wesa.

2

Yesusi ne dariafo (Matiusi 1:18-25)

¹ Na rahida bonani Kaisari Agustusi, mananu fuba we katai bitoya foi, mano niai na Roma foi, i dohong kaiwoariri weo kaiwasa na ne nufoi sentenang. Demisa weo era to ene katai siai weo etoi karirio ewonomifo we deto kariri.

² Arahi we beiri reantenangno deto ne kaiwasafoi finana, (nana mani Kireniusi wegubernuri na Siria).

³ Ambori Kaisari Agustusi ne kaiwasa etaraberasa wemansisiyawawai to ene kataifoi weo etoi ewonomifo.

⁴⁻⁵ Yusupi tuti Mariai kontai ura wiru bendari Nazareti na Galilea to Yudea. Ura to bendari Betlehemi, kataiofafongno Mananu Dauti inanai minohi tutiri naya fo. We Yusupi mani wewereng na Mananu Dauti. Ambori Yusupi soi uwonomifo. Mariai wiwing da wei foi rabuang bonani mani, doama finana.

⁶⁻⁷ Usobu Betlehemi mae katai bereri we itoru na munufo, ampare uminohi na munu fiahungfosa. Mayeai, Mariai ne rahidafo mai we minohi. Ainanaya minohi tuti arikang mang maneи, arikang reatenang dine. Sensani na ireu abirarung tuti dohoni wiatai na katai fiahung etampi nayai.

Mantahung fiahung esobu Yesusi

⁸ Na nanai, kefang we Betlehemi mani, katai webuayai bei. Na katai nani inontarai manea enai wedua ene fiahungfosa na diru.

⁹ Mayeai Sempaisi ne wewai maneи da ma doa ruransa, tuti Sempaisi ne sambewaraio dadai foi doa worusa tantenang, ampare ematai beyari.

¹⁰ Ainanaya wewaifoi medu wesa, deyo, "Mematai fanai, weo yeisaha kaiwo mirising weo mea kiai na nunei sentenang.

¹¹ Diru nini Mananu Mampariri maneи dariai na Betlehemi. I mani, ahui we Kris-tus, Seng dine.

¹² Yeikaririai we mea ambori mera wa mesera wei. Mera to Betlehemi mesera

wei, mewatiao sensani na ireu abirarung tuti wiatai na katai fiahung etampi nayai. Nana mani, andine.”

¹³ Na kutu nanai Seng Allai ne wewai rabuangnei ebia meu ehontai mano reantenang foi efiai Seng Allai eteyo,

¹⁴ “Sambewaraio Dadai feai we Dai Allai na katai dedai,
tuti na nunei mano eha
enemurorongwai
esobu nemu
maiwa.”

¹⁵ Sempaisi ne wewaifosa etaraberasa to rorafaisia, ainanaya mantahung fi ahung fosa etutang wawerasa eteyo, “Mera ma, tara to Betlehemti we tawatio fianai aino Sempaisi deinawiai na wana fo, toyari deisaharai we tatara ne.”

¹⁶ Mayeai etahareniai awao esobu Mariai tutu Yusupi itoru aninai, ewati arikangfoi we wiatai na katai fiahung etampi naya fo.

¹⁷ Era wa ewatioia nanai, ainanaya era wariai eteisaha kariri fianai aino etaramioai karirio arikangfoi fo,

¹⁸ tuti kaiwasa etaramioa fosa epapuhung paria we fianai aino mantahung fi ahung fosa etaisahara fo.

¹⁹ Mae Mariai enetituai na enerorongfoi kariri finani kiai tuti yutawania mutu na enerorongfoi.

²⁰ Mayeai mantahung fi ahung fosa etaraberasa tuti efiai Seng Allai we fianai aino etaramioai tuti ewatioa fo,

tarai karirio Seng Allai ne we waifoi deisaharai wesara fo.

Uka Yesusi to Sempaisi ne Munufoi

²¹ Arikangfoi ne rahida indeatorua mani, ewesunati tutu etohoni wonong fino Yesusi, wangno wewaifoi deisaharai we inanai nano doa wei ma kaha fo.

²² Mariai ne rahida piaru we ruairuramifo mai, kariri fi Musai soi fo mani, Yusupi tutu Mariai uka une arikangfoi ura to Yerusalem weo uroa tuturi we Sempaisi.

²³ Weo Kaiwo Sempaisi dohonai we Musai fo dotu tonina,

“Arikang mang reantenang fosa mani, ohonsa we Sempaisi.”*

²⁴ Uru kontaio ureo urohong romu muntung mandu ete afurang antung mandu weo mung suru wekorbani kariri Kaiwo Allai dohonai we Musai fo.

²⁵ Na rabuang bonani na Yerusalem mani, inontarai manei wonong fino Simioni. I mani inontarai mesi dine, tuti dohong kariri Sempaisi ne Kaiwofo. Kontai demang we rahida bo Seng Allai sawing kaiwasa Israeli fosa weru mano etaha tawansa fosa.

²⁶ Sempaisi Nuaninu Mirarebana foi niayai nai, tutu deikaririai wei weo i mani mireha ahera kaha pariao detio Mananu Mampariri foi, kariri Sempaisi dererafo.

²⁷ Sempaisi Nuaninu Mirarebana foi wiwiainaing Simioni da to Allai ne

* **2:23** Keluaran 13:2, 12

Munufoi refongfo. Na iyari nana mani, Yusupi tutu Mariai uka Yesusi we uroa tuturi we Sempaisi, kariri fi Musai soi fo.

²⁸ Ainanaya Simioni kia arikangfoi ma yuti mae fiai Seng Allai, deyo,

²⁹ "Sengwa wau,
bohong kariri nemu
kaiwo arera fe ampa,
ampafe ka yau na
mai mau.

³⁰ Weo Mampariri da na wau
ma nei
yeti teri na urehune
ampa.

³¹ Mampariri nini mani
boholi we kaiwasa
nunei sentenang.

³² I mani soyari fidansairai
we kaiwasa Yahudi
kahafosa
ambori sambewa
rangno esobu faririfo
nayai.

Tutuo andi wesambewaraio
dedai
we kaiwasa Israeli ne
ameane."

³³ Tamang inang suru
utaramio kaiwo Simioni
medurai kariri une arikang-
foi fo mani, upapuhung
paria.

³⁴ Mayeai Simioni medu
kaiwo moang weo itoru tutu
medu we Mariai deyo, "Seng
Allai yuai arikang nini weo
wedaya inontarai na Israeli
manea etawai, tuti manea
siai yuaisa esobu mai. I mani,
inontarai bitoya etapai,

³⁵ ambori kaiwasanei
sentenang ewaitawanai
weo fi inontaraifosa ene-
mitituaita fo mani kerira
paria. Tuti Maria wau,

enemurorongwai fituaiyao
ne tarai toyari sonduo disang
enemuabongfuisi."

³⁶⁻³⁷ Na nanai kontai wi-
wing nabi manei, wonong
fino Anai. Tamana mani
Fanueli nano riria Aseri.
Anai mani, wewiwinggutung
paria, ne defuina piarara
boa (84). Riraua defuina itu
mani, ne mangfoi mireha
werui, minohi wewiwina,
rirau ahang kaha. Diru
rahida da weru Munu Seng
foi kaha, mae somi we Seng
Allai pampang. Wenadi tutu
wepuasa ampare ne nadifo
mutu.

³⁸ Na kutu nanai da mao
itoru, ainanaya fiai Seng
Allai, tutu medu kariri
arikangfoi we kaiwasa
bitoya, mano etamang weo
rahida bo ewati Israelifosa
ene Mananu Mampariri da
na Seng Allai meu fo, deyo,
"Mewati ma! Andinini, mano
tatamang wei na Seng Allai
meu nei."

³⁹ Yusupi tutu Mariai
urohong kariri Kaiwo Al-
lai dohonai we Musai fo
kaia, amani uka arikangfoi
uroa tutiri we Sempaisi
we mioani. Ainanaya
itorarabera itoru to itone
bendari Nazareti na nu
Galilea foi.

⁴⁰ Arikangfoi fiabai to yai
tutio tiapa, kontai i mani se-
wai sewa, tutu Seng Allai ne
bengfo nayai nai.

Yesusi na Munu Seng foi

⁴¹ Defuina neungne mani
Yesusi ne wawa fo suru ura
to Yerusalem weo etohon-
sua rahida Paska foi, rahida

fubao earomio Seng Allai fafongfa kia Israelifosa to boriae weru nu Mesiri foi.

⁴² Yesusi ne defuina suraya borua mani, itora we itorohonsua rahida fuba foi, to-yari ne etohonai fafongna fo.

⁴³ Etohonsua rahida fuba foi kaia mani, itorarabera itoru, wape Yesusi da riata kaha, niai na Yerusalem. Inang tamang usera wawerahi,

⁴⁴ mae umananaiyoai ureitarahio da ria kaiwasa bitoya eraruhia fosa. Ura wa kio ramindena wori, ambori usera wei ki, ria itone terafosa tuti aruraraafosa.

⁴⁵ Manamo usobui kaha, ampare urarabera uru to Yerusalem aha, usera wei nayai.

⁴⁶ We rahida botoru wori usobui na Munu Seng foi refongfo ki. Minohi rahang mantaunau Kaiwo Musai soi fosa, taradidausa tuti dutang wawerasa.

⁴⁷ Inontaraifosa etaramio Yesusi medu tutu dafu babau kaiwofo aha ma, ampare epapuhung we ne awaifo.

⁴⁸ Ne wawafo suru uwatioifo upapuhung parai. Mayeai inang medu wei deyo, "Kaisungne wau, nari auru todoni finana? Tamamuai tutu yau auweansarai we wau fefe ausera paria."

⁴⁹ Yesusi yo we suru, deyo, "We fiani musera we yau nina? Muwaitawana kahae weo yau mani iminohi na Dai ne mununei rai?"

⁵⁰ Manamo utafu turu kaiwo Yesusi medura fo kaha.

⁵¹ Ainanaya Yesusi da ria suru itorarabera itoru to Nazareti, tuti taradidau suru. Fianai aino medurai tutu niari fo, inangno detioai ampare soniai na enerorongfoi.

⁵² Yesusi fiabai to yai tuti sewai sewa aha, kontai Seng Allai enewawu Yesusi, tuti inontarai eparaiseri.

3

Yohanesi mano webaptisi kaiwasa dohong kaiwoariri
(Matiusi 3:1-12; Markusi 1:1-8)

¹ Defuina bo suraya ring na rabuang bo Kaisari Tiberiusi wemananu fo, amani Pontius Pilatusi wegubernuri na Yudea, tutu Herodesi Antipasi wemambaiseng na Galilea, ne tahatui Pilipusi wemambaiseng na Iturea tutu Trakonitisi, mae Lisaniasi wemambaiseng na Abilene.

² Mano uru wang imami fuba fo suru mani, Anasi tutu Kayafasi. Na defuina bonani andino Seng Allai medu we Zakariai antungno Yohanesi na katai minano wekamamie.

³ Ainanaya Yohanesi da to kataifoi sentenang rurang waya Yardeni, tutu wiwu kaiwofo deyo, "Metarabera mea weru mene sasariwa, mewebaptisi, ambori Allai feriri mene sasariwa."

⁴ Nana mani wetarai kariri kaiwo nabi Yesayai soi fo, dotu tonina:

"Inontarai manei sahu pampang na katai wekamamie minano foi deyo,

'Memainenang rang
beng feai we Sempaisi,
tuti menaria mi-
moya wei.

⁵ Weenangwa tautawanaia
mai,
uai tuti wiwoi naria
maikaburu.
Rang takahapa naria mi-
moya,
rang sanggangging
araraya kasisau.

⁶ Kaiwasa nunei sente-
nang ambori ewati
Seng Allai feriri
inontarainesa rai.'
,*

⁷ Kaiwasa bitoya era we
Yohanesi ma weo webaptisisa.
Yohanesi medu
wesa deyo, "E, inontarai
mewarami aipaya di mea,
mene tarai toyari tawai
memuna, dohona menemiti-
tuai we mera ma iwebaptisi
mea terai tonanai ambori
mekaharai weru Seng Allai
ne aiboi katu ma da ma fo fe?

⁸ Mae toyari aio webong
beng, mea kontai meteinaw-
iai na metohong toa wa
we metarabera mea weru
mene sasariwa ampa. Do-
honao meteyo mea mani
mene wereng di Abrahami
ampafe ambori mekaharai
weru Allai ne aiboifo fe.*
Mearomioai we Seng Allai
mani mawa arora we I we
niari riria Abrahami na
kamamieinei kontai.

⁹ Tamangfoi meinanang na
ai newafoi we robani. Ampafe
ai bodoni dino webong
kaha mani, robani tuti kabioi
to adia rorong fo."

¹⁰ Ampafe kaiwasafai
etutang bera Yohanesi eteyo,
"Tonana mani amenari
todoni?"

¹¹ Yohanesi yoa wesa deyo,
"Inontarai manei ne ansung
beru mani, dohong eai we
mano ne pari foi, tuti mano
ne fiang foi deto we mano ne
pari fiang foi."

¹² Mano efanduhi pajaki
we Mananu Kaisari, ea kontai
era we Yohanesi ma we
webaptisisa. Etutani eteyo,
"Mataunaune wau ne, amenari
todoni?"

¹³ Yohanesi yoa wesa deyo,
"Mefanduhio pajaki mani,
wiro fuba sewa Mananu
Kaisari demi wea fo fanai."

¹⁴ Mano eru fimamuna fosa
kontai etutani eteyo, "Amea
mani, amenari todoni?"
Yohanesi yoa wesa deyo,
"Dohonao metohong tati
inontaraifosa mewawu ene
ra, tuti dohonao metohong
babusa ambori meha ene
doifo, mae mesobu doi ria
mene babafosara mani,
ainana to."

¹⁵ Kaiwasa bitoya foi en-
emitawanai tutuo etamang
weo ene Mananu Mampar-
iri foi, ampafe ewatioai tuti
etarami fi Yohanesi deyoa foa
nanai, enemituaitai eteyo,
"Dohonao Mananu Mampar-
iri foi dine."

¹⁶ Manamo Yohanesi medu
wesa deyo, "Yau mani iwebaptisi
mea na mereha terai,
mae manei datuwa yau, i
mani fiabai sewa yau tuti we
irehu ne wai sapatu fo terai
ki, wiro imai we inari finana

* ^{3:6} Yesayai 40:3-5 * ^{3:8} Raminde nana mani, Yahudifosa enemituai esobu
mai ki weo eweriria na Abrahami, mano Allai dohong ne arerafo wei fo.

kaha. I mani webaptisi mea na Nuaninu Mirarebana foi tuti na adia, amani niari mea memararebanai tarai.[†]

¹⁷ Ne sosirufi meinenan na warangfo ampa we kifa pafoi ambori mirarebanai. Pa taraifoi fianduhi afui wiatai na munu rorongfo, mae nukahaifoi ambori kebioia dansoi na adia wiro fefe naea kaha."

¹⁸ Yohanesi dohong kaiwo aunau fiabai tuti deiriri kariri Kaiwo Mahikai fo we kaiwasa bitoya foi.

¹⁹ Manamo mayeaia mani deiuia Herodes Antipasi, mano wemambaiseng na Galilea foi, weo dauo ne tafuai[‡] binengno Herodiasi ampa, tuti weo ne wara aipayia siasi fo kontai.

²⁰ Ampafe Herodesi kesou mambiriu aha, ainanaya demi ne raifosa etohong Yohanesi to aitamu rorong foa.

*Yohanesi webaptisi Yesusi
(Matiusi 3:13-17, Markusi 1:9-11; Yohanesi 1:32-34)*

²¹ Wiro Herodesi samuo Yohanesi na aitamu rorong kaharai, mae Yohanesi webaptisi kaiwasafoi, tuti na iyari nanai Yesusi kontai da ma we Yohanesi webaptisi. Yesusi webaptisi mae wenadi, na kutu nanai mae rorafaisi tifai,

²² tuti Sempaisi Nuaninufaisi, ne tarai toyari muntung manei, sea meu minohi sau Yesusi. Mayeai tarao Allai raofuifoi medu na rorafaisi

meu deyo, "Wau mani nehu Kaisung enehuwawuti fi di Wau. Wau ka enehurorong fine."

*Yesusi ne ririafo
(Matiusi 1:1-17)*

²³ Na reantenang Yesusi deunau tuti deiriri Sempaisi ne Kaiwofoa mani, ne defuina piareya sura teai. Inontaraifosa enemitituaitai weo i manitamang di Yusupi,

Yusupi tamangno Eli,²⁴ Eli tamangno Matati, Matati tamangno Lewi, Lewi tamangno

Marki, Marki tamangno Yanai,²⁵ Yanai tamangno Yusupi, Yusupi tamangno Mata-tiasi, Matatiasi tamangno Amosi, Amosi tamangno Nahumi, Nahumi tamangno Esiri,

Esiri tamangno Nagai,²⁶ Nagai tamangno Mati, Mati tamangno Matatiasi, Matatiasi tamangno

Semei, Semei tamangno Yoseki, Yoseki tamangno Yodai,

²⁷ Yodai tamangno Yoanani, Yoanani tamangno Resai, Resai tamangno Zerubabeli, Zerubabeli tamangno Sealieri,

Sealieri tamangno Neri,²⁸ Neri tamangno Marki,

[†] 3:16 Tarahai, 'na adia' ne maksuti siasi, amani dohong aiboi we mano etaraberasa weru ene sasarifo kaha fosa. [‡] 3:19 Ete ne tahatui.

- Marki tamangno Adi, Adi tamangno Kosami,
Kosami tamangno Ermadami, Ermadami tamangno Eri,
 29 Eri tamangno Yesuai, Yesuai tamangno Erieseri,
Erieseri tamangno Yorimi, Yorimi tamangno Matati,
Matati tamangno Lewi,
 30 Lewi tamangno Simioni,
Simioni tamangno Yehudai, Yehudai tamangno Yusupi,
Yusupi tamangno Yonami, Yonami tamangno Eriakimi,
 31 Eriakimi tamangno Mereai, Mereai tamangno Mina,
Mina tamangno Matatai, Matatai tamangno Natani,
Natani tamangno Dauti,
 32 Dauti tamangno Yesi,
Yesi tamangno Obeti, Obeti tamangno Boasi,
Boasi tamangno Salmoni, Salmoni tamangno Nahasoni,
 33 Nahasoni tamangno Aminadapi, Aminadapi tamangno Adimini,
Adimini tamangno Arni, Arni tamangno Eseroni,
Eseroni tamangno Peresi, Peresi tamangno Yehudai,
 34 Yehudai tamangno Yakupi, Yakupi tamangno Isaki,
- Isaki tamangno Abrahami, Abrahami tamangno Terai,
Terai tamangno Nahori,
³⁵ Nahori tamangno Seruki, Seruki tamangno Rehui, Rehui tamangno Perehi,
Perehi tamangno Eberi, Eberi tamangno Serahi,
 36 Serahi tamangno Kenani, Kenani tamangno Afahati,
Afahati tamangno Semi, Semi tamangno Noaki,
Noaki tamangno Lameki,
³⁷ Lameki tamangno Metusaraki, Metusaraki tamangno Henoki, Henoki tamangno Yereti,
Yereti tamangno Mahalaleri, Mahalaleri tamangno Kenani,
 38 Kenani tamangno Enosi, Enosi tamangno Seti,
Seti tamangno Adami, Adami tamangno Seng Allai.

4

*Saminseni weanggari
Yesusi we sawa
(Matiusi 4:1-22; Markusi 1:12-13)*

¹ Allai Nuaninu Mirarebana foi suai afui niai na Yesusi, ainanaya Yesusi daraberahi na waya Yardeni. Nuaninu Mirarebana foi wiwiaini to katai wekamamie minano fea,

² niai na kataifoi we rahida piaru mae Saminseni weanggariri pampang. Rahida piaru fo mani dang fiae kaha, amparef rahidafo kaia mani wewisi.

³ Ainanaya Saminseni medu we Yesusi deyo, "Taraie Allai ne Kaisung di wau mani, bemi kamieiwai wefi-ang."

⁴ Manamo Yesusi yoa wei aha deyo, "Na Sempaisi ne Kaiwofo dotu tonina:
'Inontarai eminohi etarang fo,
na fiangfo titou kaha.'^{**}

⁵ Mayeaia mani Saminseni kia Yesusi to uai dedai bei nuwowongfo, tutu tato-fang kaha mae Saminseni deinawio katai mananufo ewemananu naya fo kiai na nunei sentenang wei.

⁶ Tuti medu wei deyo, "Yohong wemananu tutuo fianggeng mehikai botioi nani we wau ki, weo finana mani yohonai we yau ampa, amparef yohonai we inontarai mandoni dino enehurorong niai nai fo.

⁷ Ampafe womi we yau mani yohonai tantenang mau nemu."

⁸ Manamo Yesusi yoa weia deyo, "Sempaisi ne Kaiwo dotu toninai:

'Mesomi terai we Allai mene Sengfoi,
tuti metohong kariri ne Kaiwofo terai.'^{**}

⁹ Ainanaya Saminseni kia Yesusi to Yerusalemia, do-honi minohi na Sempaisi ne

Munufoi kuruinafo. Mayeai medu wei deyo, "Taraie Seng Allai ne Kaisung di wau mani, tawing wau tawai na ninai aweu, ambori wewaifosa esoru wau wori, tau aweu, mureha kaha.¹⁰ Weo Sempaisi ne Kaiwone rabuang bei dotu kariri wau tonina:

'Allai ambori demi ne we-waifosa etamang we wau,
tuti ewaitawang wau ki.'

¹¹ 'Etamang we wau na ewaramifo,
ampafe tau kofafea kaha.'^{**}

¹² Manamo Yesusi yoa weia deyo, "Na Sengnei ne Kaiwofo dotu tonina:

'Wiro meweanggari mene Mananu Seng Allai fanai.'^{**}

¹³ Saminseni ne anggari bitoya niariri foi kai finanaya, ainanaya pisuhi ne tarai ahao, sera we rahida siasi weo weanggariri aha.

Yesusi daraberahi to nu Galileai tuti kaiwasa na bendari Nazareti eteiaya

(Matiusi 4:12-17, 13:53-58;
Markusi 1:14-15, 6:1-6)

¹⁴ Yesusi daraberahi to nu Galilea tutu wemambiriu, weo Nuaninu Mirarebanai niai nai. Tutu wonongfoi defai wari kataifoi sentenang.

¹⁵ Yesusi deunau Kaiwo Seng na Yahudifosa ene munu agama fo, amparef kaiwasa bitoya efiai i.

¹⁶ Yesusi daraberahi to Nazareti, ne munue fiabai naya fo. Toyari ne finiari

* 4:4 Ulangan 8:3 * 4:8 Ulangan 6:13
Ulangan 6:16

* 4:11 Masmuri 91:11, 12 * 4:12

na rahida Sabati neungfo da to munu agama Yahudi foi afui, ainanaya doa weo deto Kaiwo Seng fo.

¹⁷ Etohong buku reraung kafariao nabi Yesayai soi fo weia. Fiorerawi aweu mani deti rabuang bo Yesayai soi tonina:

¹⁸ "Sempaisi Nuaninu niai na yau,

we andi deinawi yau
we yeikariri Kaiwo
Mahikai we kaiwasa
ene pari fi,

tutu demi yau weo
yeisaharai we kaiwasa
tamui foi itawinsa,
tutu kaiwasa euremifafa
fosa,

warahururang eu-
remifo ambori
ewati,

tutu iruai kaiwasa
tahatawansa fosa
weru mano etohon-
safo ea.

¹⁹ Tutu yeisaharai weo Sem-
paisi ne rahida weo
deinawi mano feriri
kaiwasa foi
da ma ne."*

²⁰ Mayeai kiafa bukufoi do-
honi tiwera we mano da wa
kiarioi ma foi, tutu suki aweu
minohi. Kaiwasa bitoyao
minohi na munu agama
Yahudi fo rorongfoi ewati kai
weia. ²¹ Ainanaya deunausa
deyo, "Na rahida bonini
mani, kaiwo rabuangno
metaramioai ninai wetarai
ampa."

²² Kaiwo deyoa fo mahikai
paria ampare epapuhung
wape emadu waweresa
eteoyo, "Inontarai wani mani

Yusupi antung dine mae?
Todoni fino sahui weo i mani
mano mampariri dine nina?"

²³ Ainanaya Yesusi
medu wesa deyo, "Ambori
memadu kaiwo netawea
ne we yau, meteyo,
'Ametaramio wau nari fi-
tantuma bitoya na munue
Kaperenaumi. Tonana mani,
nari na ninai kontai, na mantaung
wau nemu munuene.
Manggarawang di wau to.
Wau nari inontarai ebeng
ampa. Tonana mani, nari
bera wau ambori bonteng ki.'

²⁴ Dei tuwarai aha deyo,
"Mearomioai. Kaiwasa na
katai siai eroao nabi manei
na mai, wape na mantauni ne
munuefo wiro eroaoi kaha.

²⁵ Tarai tofino, nafafong
nabi Eliaifa, amani wiro
wemetang kaha, waroio
defuina botoru aburung fea,
ampafe kahari dohong nunei
sentenang. Na rabuang
bonani mani wiwina bitoya
kontai na nu Israeli.

²⁶ Tonanai mae Seng Allai
wiro demi Eliai da we yufata
wiwina na nu Israeli kaha,
mae da terai weo wiwina
mansiasi na munue Sarafati,
na nu Sidoni. Wiwina nani
mani wiro riria na Israeli
kaha.

²⁷ Na rabuang bo nabi Eli-
sai fo kontai, na nu Israeli
mani inontarai bitoya eman-
inang kusta, manamo wiro
Elisai niari inontarai Israeli
nansa ebeng kaha. Mae niari
inontarai mansiasi terai denteng,
amanu Namani, inon-
tarai Siria dine, wiro riria na
Israeli kaha."

* ^{4:19} Yesayai 61:1-2

²⁸ Inontarai Yahudi na munu agama foi etaramioafo ehasou beyari.

²⁹ Etoabarisa erutawang Yesusi efafari to boriai weru munuefo, ehari era wa weo ehabioi na katai kenatatera fo.

³⁰ Manamo Yesusi daraberahi da abu kaiwasafoi, da werusa anina.

Yesusi data inggira weru inontarai
(Markusi 1:21-28)

³¹ Ainanaya Yesusi bia to munue Kapernaumi na nu Galileai, na wana mani deunau inontarai na rahida Sabati na munu agama foi.

³² Epapuhung we ne au-naufo weo kaiwo medura fo mani kaiwo wemambiriu fine.

³³ Na munu agama Yahudi foi mani inontarai manei inggira etohoni, ampare sahu dohonai, tutu inggirafosa emadu eteyo,

³⁴ “Ee! Yesuse, inontarai Nazareti wa waune, bo nari fiani we amea ne? Ro ma weo bohong amea ameworua ne? Amewaitawanai we mandoni di wau, wau mani Mano Murarebanai, na Seng Allai ma fi di wau.”

³⁵ Manamo Yesusi somara inggirafosa deyo, “Menemboru, mera to woriai weru inontarai nini.” Ainanaya inggirafosa etotapa inontaraifo aweu, wiatai nano kaiwasa bitoya foi euremireafo, mae era weruia, wape enari kang-gani kaha.

³⁶ Kaiwasa na nana foi kiai epapuhung paria we fi ewatioai nanai, tutu emadu waw-erafa eteyo, “Kaiwone siai

paria! Na ne mambiriufu tuti na tapapa demi nuaninu karira fosa era to boriei tuti nuaninu karira fosa etohong kaririai.”

³⁷ Ainanaya Yesusi wonongfoi defai wari kataifoi sentenang.

Yesusi niari inontarai emaninang bitoya ebeng
(Matiusi 8:14-17; Markusi 1:29-34)

³⁸ Mayeaia Yesusi da na munu agama Yahudi foi to Simon Petrusi ne munufoi. Simoni niongno wiwini meninang rirora, ampare ne terafosa etekaririai we Yesusi.

³⁹ Yesusi da wa doa rurang wiwingfoi, mayeaia data fimaninangfoi weruia dentengna. Ainanaya doa meai wesarawiri ne terafosa tutu Yesusi.

⁴⁰ Wofoi sawaia de weayewia nanai, kaiwasafoi eha ene inontarai emaninang fimaninang bodoni konta foi, ehisa erao Yesusi ma. Dohong warangfo waratawansa ampare ebengna.

⁴¹ Tutu mano emaninang fo manea inggira dohonsa, ampare inggirafosa era to boriai kontai, tutu esahu eteyo, “Seng Allai ne Kaisung di wau!” Manamo Yesusi datasa tutu dei weduasa, deyo, “Menemboru!” Weo ewaitawanai we i mani Mananu Mampariri dine.

Yesusi kiorang na munue siai
(Markusi 1:35-39)

⁴² Ahafo buara mani, Yesusi da weru munuefo to katai minano bei. Manamo

kaiwasafosa esera awao esobuia. Ainanaya etei weduari eteyo, "Wiro ro weru amea fanai!"

⁴³ Manamo dei wesa deyo, "Bereri. Yau ye ira to munue siai fo kontaio weo yeiriri kariri Seng Allai ne Kaiwo Mahikai ne, weo aiwedaya mani Seng Allai demi yau ma nina."

⁴⁴ Tutu deiriri kariri Kaiwo Mahikai nano munu agama Yahudi fo na nu Yudea foi.

5

Yesusi sahu ne inontarai reantenangfosa

(Matiusi 4:18-22; Markusi 1:16-20)

¹ Rahida bei mani Yesusi doa nano ruruo Genesareti nafarengfo. Kaiwasa bitoya foi ewati we Yesusi. Ewtatioi ewarami siayasa weo ete etaramio Seng Allai ne Kaiwofo.

² Yesusi deti wa roworu urawohi na nafarengfo, manamo mamung diang fosa ebia weru wafosuru tono nafarengfo ambori esonihing erangfo.

³ Yesusi dautai to wafo rowei, Simoni, mano ahui we Simon Petrusi, ne wa dine, tuti dutang we Simoni deyo, "Tuba wanei kuteai weru nafarengnei awarau." Ainanaya Yesusi minohi na wafoi mae deunau kaiwasa bitoya foi awarei.

⁴ Deunaua kaya mani dei we Simoni deyo, "Wo to katai behuru foa muna erangwai nayai."

⁵ Simoni yoa we Yesusi deyo, "Daie, diruafa awao

kameai anina antomung ao antosobu ffea kaha. Manamo Dai bemi yau fefe imuna erangnei aha."

⁶ Itorohong kaririaia nanane, itomung diang katui kaha, bitoya beyari, awao erangfoi adareti mesiabu.

⁷ Ampafe itosahu we mano emung diang ruhia fosa na wa koiwei foi, esahusa eteyo, "Ee! Mewo ma. Tarabi ruhi erangnei." Ampafe esoni diangfoi na wa roworu fo paria adareti uraisui.

⁸⁻⁹ Simon Petrusi tuti mamung diang fosa epapuhung beyari weo emung diangfoia bitoya sonanai. Simoni detioai nanafo da wa disang kapa awebuka na Yesusi arongfo, mayeai medu wei deyo, "Seng di wau, ro weru yau, weo inontarai sasari di yau."

¹⁰ Yakobusi tutu Yohanesi, Zebedeus ne arikangfosuru, uruino ukontai Simonine, upapuhung kontai. Manamo Yesusi medu we Simoni deyo, "Mutai fanai! Na ninai to fona mani yohong wau mung wedua inontarai."

¹¹ Simoni tutu mano emung diang ruhia fosa etuai wafo to reia, itorohong itone fianggengfoi sentenang suanaiya, mae itora ria Yesusi.

Yesusi niari inontarai meninang kusta manei denteng

(Matiusi 8:1-4; Markusi 1:40-45)

¹² Na rahida bei Yesusi niari na munuefea. Na nana mani inontarai manei maninang kusta foi sinsung

ne rerawafoi sentenang. Deti Yesusifo disang kapa awebuka na arongfo mae dutani deyo, "Daie, wau wemambiriu ne, maya mani, nari yau yenteng weru nehu maninangnei."

¹³ Yesusi suba warangfoa wa sauwi tuti medu wei deyo, "Yo, imaya. Bonteng to!" Tatofang kutu nanai kontaio maninang kusta foi niai werui tuti dentengna.

¹⁴ Yesusi deretawani deyo, "Aromuoifa! Wiro boiriri fi inari ninai weo inontarai siai manei fanai, mae ro to imamifoia tuti butani we deti kariri nemu taraiwai we bontengna wa. Mayeai bohong korbanifeai we Allai we nemu bontengna wa kariri fianai aino Musai soia fo. Nana mani deinawiai we kaiwasa bitoya foi we bonteng ampa."

¹⁵ Wape kaiwoariri etairiri kariri Yesusi fo defai pari aha wari kataifoi, ampafe kaiwasa bitoya era ma weo etaramio medufo tuti weo niarisa ebeng weru ene fimaninangfo.

¹⁶ Ampafe eaia mani da to katai minano we wenadi nayai.

Yesusi niari inontarai fiaya manei denteng

(Matiusi 9:1-8; Markusi 2:1-12)

¹⁷ Na rahida bei Yesusi deunau, amani inontarai eweFarisi tuti mantaunau Kaiwo Musai soi fosa eminohi kontai na nanai. Era na fino Yerusalem tati munue watai nano nu Galilea tati na nu Yudea fo. Sempaisi

ne mambiriufo nayai na Yesusi weo niari inontarai emaninang ebeng.

¹⁸ Na rahida bonani mani inontarai manea eha inontarai fiaya wia na andaung wowong manei, erao Yesusi ma. Ete ehari era to munu rorongfo afui etohoni wiatai na Yesusi urengreafao,

¹⁹ manamo kaiwasa bitoya kareraia dadira. Ampafe ehari etautai na tehi borai to munu nuwowongfo ayai. Ainanaya ebai munu nuwowongfoi etuki tuti ne andaung wiatai nai foi aweu rahang kaiwasa bitoya foi, na Yesusi urengreafao.

²⁰ Yesusi detio enari tonanafo deitawanai we eroasoafu fuba paria, ampafe medu we inontarai fiaya foi deyo, "Waune, yeiai nemu sasarifi ampa."

²¹ Manamo mantaunau Kaiwo Musai soi fosa tuti Farisifosa enemittiuaitai na enemirorongfo, "Mandoni dino deibera Seng Allai nina? Mandoni dino biriu we deiai sasari fine? Seng Allai mantauni terai!"

²² Manamo Yesusi deitawang enemirorongfoi kawurua ampafe medu wesa deyo, "Todonie menemittiuaitai tonanai na menemirorongwai nina?

²³ Doni aino mawa ne: imadu yeyo, 'Yeiai nemu sasarifi ampa,' ete yeyo, 'Boabari wau, ka nemu andaungwai, tati roa'?

²⁴ Wape yeinawiai we mea, na inari inontarainei denteng tonina ne, ambori mewaitawanai weo na nunei

ninai, Kaisung Inontarai nei andino ne mambiri we deiai sasari fine." Ainanaya Yesusi medu we inontarai fiaya foi deyo, "We wau mani, imadu mau yeyo, boabari wau, ruai nemu andaungwai, ro to nemu munufoia."

²⁵ Na kutu nanai kontaio inontaraifoi doabariria doa na kaiwasafrai euremireafo, mayeai yuai ne andaungfoi, da to ne munu rorong foa mae deparanding Seng Allai.

²⁶ Kaiwasafrai epapuhung tantenang beyari, amparetta paranding Seng Allai. Tuti enemirorong mitai, amparetta emadu wawerasa eteyo, "Fitantuma fino tawatioai na rahida bonini nina!"

Yesusi sahu Lewi we dariati
(Matiusi 9:9-13; Markusi 2:13-17)

²⁷ Mayeaia Yesusi da weru munuefoa, deti inontarai manei wonong fino Lewi. Lewi mani inontarai fanduhi doi pajaki we parenta Kaisari dine, minohi na munu pajaki foi. Yesusi medu weia deyo, "Ro ria yau."

²⁸ Anseung ahang kahai mae Lewi doabariri tuti sawing fi yu fo tantenang, da ria Yesusi.

²⁹ Ainanaya Lewi dohong muniara fiabai paria bei weo Yesusi na ne munufoi. Inontarai efanduhi doi pajaki we parenta Kaisari fo efau paria, tuti inontarai siai kontai ewatai etampi ruhiae.

³⁰ Manamo Farisifosa tuti mantaunau Kaiwo Musai

soi fosa enimioa kaha, amparetta emadu we Yesusi ne inontarai erariati fosa eteyo, "We fianie metampi tuti metunung ruhiae ria inontarai efanduhi pajaki we parenta Kaisari foi tuti inontarai ewesasari fosa ninai?"

³¹ Mae Yesusi yoa wesa deyo, "Inontarai etanteng nesa mani etohong we manggarawangnei kaha, mae mano emaninang fosa.

³² Wiro ira ma weo isahu inontarai emararebana fosa kaha, mae we isahu inontarai ewesasari, ambori etaraberasa weruene sasari-foi."

Yesusi ne aunau waworu foi tuti koangno Yahudi ene agamafo wiro adoang ruhia fanai

(Matiusi 9:14-17; Markusi 2:18-22)

³³ Na nanai kontaio inontarai eparaise Yesusi kaha manea, etutang berahi, eteyo, "Mano eraria Yohanesi tuti mano eraria inontarai ewepuasa amparetta ene nadifo mutu. Manamo mano eraria wau wasa etampi etunung, mae esera wawera ewepuasa."

³⁴ Yesusi yoa wesa deyo, "Tofino! Ne tarai kariri mandirau mang foi tuti ne inontarai wenotisa to ne muniara mandirau foi. Na rahida mandirau mang foi minohi riasa nanai ewepuasa rai e?

³⁵ Wape rahida we mandiraufoi niayai na nanai riasa ahang kaha foi ambori da ma

ki, rabuang bonani dino ambori ewepuasa ki. [Tonanai kontai, nina mani inayai riasa ampafe ewepuasa kaha, wape rahidao ambori ira werusa foi da ma ki, rahida nanai aino ewepuasa ki.]”

³⁶ Ainanaya Yesusi deiriri fiywansoai wesa deyo, “Wiro manei eneaya ansung waworu feai weo kiutu aha dawa kobu ansung mamo fo ne masabufo naya kaha. Weo kiutu ansung waworu fo, kontaio ansung waworu fo ne tarai kariri ansung mamo fo kaha.

³⁷ Tonanai kontai we angguri waworu nei mani, wiro ariri to aderi sapi rerawa memo bei kaha, weo angguri weworu foi ambori wiwua wedaya aderi sapi rerawa memo foi tei. Nana mani anggurifo tibatara, aderi sapi rerawa foi kerirawa.

³⁸ Wape angguri weworu foi todoni kontaio ariri tono aderi sapi rerawa weworu bei kontai.

³⁹ Kontaio mano dunung angguri mamo foi miaya weo dunung angguri weworu kaha, weo deyo, ‘Angguri memo nei andi denteng sewa.’ ”

6

Farisifosa etinggai Yesusi niari fi na rahida Sabati

(Matiusi 12:1-8; Markusi 2:23-28)

¹ Na rahida Sabati bei, rahida Yahudifosa erufi nai kaha, teterai we Yesusi da riria romi potang bei,

ampafe ne inontarai erariati fosa eteting potangfoi, awa esikoyari na ewaramifo, ambori etani.

² Ampafe Farisi manea emadu eteyo, “We fiani menari fi tonana fo na rahida Sabatinei nina? Weo nana mani metohong roaing kaiwo dotu weduara fo.”

³ Ainanaya Yesusi yoa wesa deyo, “Finana mani ne tarai toyari fi Mananu Dauti niari na fafongfa na rahida bo i tuti ne mano erariati fosa ewawisi fo. Metato kariri kaiwo nana kaha e?

⁴ Amani suai to Sempaisi ne Munufoi afui dangno roti etutang tutirai we Allaia fo tuti dohonai we ne mano erariati fosa etang kontai. Wape finanai, kariri hukum agama foi mani, imami erufi na Sempaisi ne Munufoi saino etang tera ne.”

⁵ Yesusi dei aha deyo, “Kaisung Inontarai nei wemananu weo deiriri kariri fifianai aino inontaraifo enari tutu enari kaha fo na rahida Sabati.”

Narahida Sabati bei Yesusi niari inontarai warang bei mireha foi denteng

(Matiusi 12:9-14; Markusi 3:1-6)

⁶ Na rahida Sabati siai bei mani, Yesusi da wa deunau na munu agama Yahudi bei. Na nana mani inontarai maneи, warang bo domoya foi mireha.

⁷ Farisifosa tuti mantaunau Kaiwo Musai soi fosa euremi dingga Yesusi, weo niari inontaraifoia denteng na rahida Sabati mani, ambori etinggai, eteyo niari sarawai.

⁸ Manamo Yesusi deitawang fi enemituaita fo. Ampafe medu we inontarai warang mireha foia deyo, "Ro ma, boa na fongne." Ampafe doabariria, doa na fongfo.

⁹ Ainanaya Yesusi medu wesa deyo, "Yutang bera mea. Kariri fi Musai soi fo mani, ne doni aino tanari na rahida Sabati fine? Tanari ne bengfo ete ne karirafo ne? Tafata inontarai ambori etarang, ete tatuasa ao eworua ne?"

¹⁰ Yesusi deti maino kaiwasafoi sentenang, ainanaya medu we inontarai meninang foi, deyo, "Wi waramuwai ma." Inontaraifoi si warangfoi kaririaia, na tatofang kutu nanai kontai warangfoi dentengna.

¹¹ Wape Farisifosa tuti mantaunau Kaiwo Musai soi fo ehasou fuba paria, ainanaya emadu ruhi kaiwo weo fiani aino enari kanggani Yesusi naya fo.

Yesusi diri inontarai ewesuraya mandu erariati

(Matiusi 10:1-4; Markusi 3:13-19)

¹² Na rahida bei Yesusi da tono wiwoi bei we wenadi nai. Wenadi we Seng Allai na diru nani sentenang.

¹³ Kameai nani sahu ne inontarai erariati fosa eraoi ma, ainanaya diri ewesuraya mandu na sa. Inontarai ewesuraya mandu fosa sahusa weo rasuli, amani Inong Anatu na Sempaisi.

¹⁴ Ewonomi finina; Simoni mano sahui we Petrusi, tuti ne tahatui Andareasi,

Yakobusi tuti Yohanesi, Pilipusi tutio Bartolomasi,

¹⁵ Matiusi tuti Tomasi, Alfiusi antung Yakobusi, tuti Simoni (mano biriu we inontarai Israeli fosa etoa siai weru Romafos),

¹⁶ Yakobusi antung Yudas, tuti Yudas Iskarioti, mano ambori dewayang Yesusi foi.

Yesusi deunau tuti niari kaiwasa emaninang bitoya ebeng

(Matiusi 4:23-25)

¹⁷ Mayeaia mani Yesusi tuti ne inontaraifosa ebia na wiwoifo to katai webuaya bei. Na katai nani mani kaiwasa siaio era riati fe manea etamang wei, kontai kaiwasa bitoya paria na nu Yudea foi tantenang, bendari Yerusalem, tuti munue beru na nafareng rau, Tirusi tuti Sidoni.

¹⁸ Era ma weo etaramio Yesusi deunaupo tuti waraira ene fimaninang, kontai mano inggira dohonsa fosa ambori ebeng.

¹⁹ Ampafe kaiwasafai kiai, esera we eru na ne taraifoi, weo mambiriufei dari nai mandiai, ambori ebeng.

Mano esobu mai ampa tuti mano esobu karira ki

(Matiusi 5:1-12)

²⁰ Mayeai Yesusi seite ne inontarai erariati fosa aha kawuru, ambori dei wesa deyo, "Mano mene pari fiwa mea, mesobu ne maifo ampa weo meaino meminohi we Seng Allai ne inontaraifosa na ne Mananu rorong fo ne.

²¹ Mano na ninai mewawisi ne mea, mesobu ne maifo, weo ambori memamosi ki.

Mano na ninai mesai ne
mea, mesobu ne maifo, weo
ambori memiri ki.

22 Mano meraria Kaisung
Inontarai ne yau, wedaya
inontarai enemirireu mea,
etata mea, etei babera mea,
tuti eteiaya mewonomiwa
weo esahuai we fikarira fine,
mea mani mesobu ne maifo.

23 Enari tonana mani, mefaraise tuti memararising to, weo tarai tofino, mesobu fiembaitafo fuba paria na Waidani. Mefaraise tonanai weo wiru memeiri mea mesodai dadirafo tonana kaha, weo mene tarai kariri nabifafongfa fosa, weo mano enari kanggani mea ninisa ene werengfosa fafongfa enari kanggani nabifosa kontai tonanai kawuru ampa, ampare finanai deinawiai we menari ne maifo, mai kariri nabifafong fosa enari ne maifo.

²⁴ Mano mene fiwa mea
mani, mesobu ne karira rai,
weo mesobu mararising na
nunei ampa.

25 Mano nina mani
memamosi ne mea, mesobu
ne karira rai, weo ambori
mewawisi ki.

Mano nina mani memiri ne
mea, mesobu ne karira rai,
weo ambori mearomikuayai
tuti mesai ki.

²⁶ Mano mesobu fayai ria
kaiwasa bitoya foi, mesobu
ne karira rai, weo na fa-
fongfa ene werengfosa efiai
nabi tarai kaha fosa tonanai
kontai.”

*Menemiwawu mene
aitetafosa*
(Matiusi 5:38-48)

27 "Manamo yeisaharai
we mea mauo, yevo; Men-
emiwawu mene aitetafosa.
Metohong beng we mano
enemirireu mea fosa.

²⁸ Metohong mahikaifo we mano etei kanggani mea fosa; mewenadi we mano etarikang mea fosa.

²⁹ Manei bioipa metaramirei domoya wa mani, metohong metaramirei dowej wa kontaia bioiparai. Tuti manea etawa mene ansung boriai wa mani metohong mene ansung siai wa kontai.

³⁰ Manei dedo mea we mene fiea mani, metohong kaririaia. Tuti manea etawa mene fieai mani, metutang weai aha fanai.

³¹ Na fifiani kontaio, menari sua inontarai siai fosa, mai kariri metawi weai we ea kontai enari we mea fo.

32 Masino menemiwawu te mano enemiwawu mea fossa kontai tera mani, fiembaitai fianai aino mesobua ne? Weo inontarai sasari fossa kontao enemiwawu inontarai mano enemiwawusa fossa. Ampafe todoni kontao menemiwawufo fuba sewasa.

³³ Tuti metohong beng
weo mano etohong beng we
mea fosa terai, nana mani
mesobu imbaitei fiani rai?
Weo inontarai sasari fosa
enari tonanai kontai.

³⁴ Metohong fleai, ra ete doi, we inontarai mano menemitarwansa we eriwang aha. Nana mani mesobu fiembaitai fiani rai? Weo inontarai sasari fosa kontai, etohong fianggeng we inontarai mano enemitarwansa fosa, ambori eriwang mani fuba kaririai aha.

³⁵ Wiro tonana kaha. Mae mea menemiwawu mene aitetafosa tuti metohong beng wesa. Metohong fieai wesa mani, wiro mene mitawanai weo eriwang we mea aha ma fanai. Nanaya mani mene fiembaitafo fuba, tuti ambori ahu mea we Seng Mano Dedai Mantaung ne arikang dino mea. Weo Seng Allai mani, enewawu inontarai mano etohong mahikai kaha fosa, tuti mano ewarami aipaya fosa kontai.

³⁶ Ampafe menemiwawu wawera mea, karirio metamamifaini enewawu kontai.”

Metinggai inontarai funoma fanai

(Matiusi 7:1-5)

³⁷ “Wiro metinggai finong inontarai fanai, ampafe Seng Allai kontai kiutu kaiwo kariri mea kaha. Tuti wiro metohong maraba we inontarai siai fanai, ampafe Seng Allai dohong aiboi we mea kaha. Mae meteiai inontarai, ambori Seng Allai deiai mea kontai.

³⁸ Metohong finong fi we inontarai siai, ambori Seng Allai dohong finong fi we mea ki, ambori mesobu fiononia fiabai fei ki, andino tituatia mikeu we mea. Weo mene metitua we inontarai siai fo mani, Allai yu we titua mea niyai kontai ki.”

³⁹ Mayea mani Yesusi deiriri kaiwo yiawsoa fo tonina, “Inontarai urengfafa manei, bing mano urengfafa manei kontai, nana mani ambori utau rarang kamirei bei ki.

⁴⁰ Inontarai sobu aunau ne wiro fiabai sewa ne mantaunaune kaha. Wape arikangfosa esobu aunau na mai pampang mani, ene tarai toyari ene mantaunaufoi.

⁴¹ We fianie ai nukahai niyai na mene doroifoi urengfo mewati pari, mae airape niyai na meuremiwai mewatioi kahai nina?

⁴² Todoni fino metei we mene doroifosa meteyo, ‘Doroie, ro ma ikabi ai nukahai niyai na uremuwai wo,’ wape airape niyai pampang na meuremuwa wiro mewatioi we mehabioi kaha? Inontarai menari fayafayarai ne meai ne, mehabio airape niyai na meuremiwa akawuru wo, ambori mewatipa ai nukahai niyai na mene doroifoi urengfo we mehabioai werui fe.”

Ai tuti bongfoi

(Matiusi 12:33-35)

⁴³ Ai koi denteng foi mani, ne bongfoi denteng, mae ai koi kerira foi mani ne bongfoi kerira.

⁴⁴ Aifoi mani aroansoi na bongfoi. Wai sirarami nei wiro webong angguri kaha tuti boburainei wiro webong urung kaha.

⁴⁵ Inontaraine tata tonanai kontai. Inontarai mano denteng foi niarifo beng, we enerorongfoi denteng fefe. Wape inontarai mano kerira foi niarifo karira, weo enerorongfoi kerira. Weo fifiani aino dotu na borongfoi mani, finanai dari na enerorongfuisi mandiai.

*Fiyiwansoai kariri inontarai mandu unari munu
(Matiusi 7:24-27)*

⁴⁶ "We fianie mesahu yau we mene Seng, wape wiro metohong karirio fiani aino yeisaharai we mea ne nina kaha?

⁴⁷ Mano da ma tarao nehu kaiwo aunau ne, dohong kaririai na mai foi, amani yeisaharai we mea mau, mano nani mani ne tarai kariri mano niari munu.

⁴⁸ Niari ne munufoi mani, sirai aweu berorong ambori sau titawangno diri neungfo na kamamiae. Ampafe rahida bo wayafoi wefoa, foafoi dautaia sobu munufoi mani, deda bariri kaha, weo inontaraifoi niari amangfoi pepayai fefe.

⁴⁹ Wape inontarai mano tarao nehu kaiwone, mae dohong kaririai kaha, i mani ne tarai kariri inontarai mano niari ne munufoi, niariri sau kahofa wowongfo terai. Foafai sobuifo, deda bariria sawaia, ampafe aikahiafoi kerirawa kiaya."

7

Inontarai fuba yu rai mamuna fosa manei ne yoasoafu fuba

(Matiusi 8:5-13; Yohanesi 4:46-53)

¹ Yesusi medu we kaiwasa bitoya foia kaia fo, da werusa suai to munue Kapernaumi afui.

² Na wana mani inontarai fuba yu rai mamuna manei, amani Mananu Kaisari ne inontarai Roma manei dine. Ne woming manei mani niari

sauari paria. Wyomingao meninang ao adareti mireha.

³ Inontarai fuba yu rai mamuna foi tarao Yesusi nanafo, demio inontarai ewewafong weo Yahudi fo manei itoru, itora we Yesusia, itorutani weo da wa ambori niari womingfoia denteng.

⁴ Era wa esobu Yesusia, ainanaya etutani weo da riasa weo waraira maninangfoi weru womongfoi, eteyo, "Todoni mani waramuai inontaraio fuba yu rai mamuna foi,

⁵ weo i mani enewawu Yahudine tata, tuti andino niari munu agama foi we ameane."

⁶ Ainanaya Yesusi da ria eara. Rerai we munufoia mani, inontarai fuba yu rai mamuna foi demi ne maniwowirifosa era ma eteisaharai we Yesusi eteyo, "Deyo, 'Daie, wiro ro anseunai to nehu mununei ma fanai. Yau mani imai kaha weo yemang we Dai wau na nehu mununei.

⁷ Ai wedaya mani mantaung yau irao Dai wau ma kaha. Ampafe modu te kaiwofeaia, ambori nehu womingfoi denteng ki.

⁸ Weo yau kontai nehu fuba isomi wei manei, tuti iru afai mamuna fea kontai. Ampafe imadu we manei yeyo, "Ro," nana mani da kaririai, tuti imadu we manei aha yeyo, "Ro ma," nana mani da kaririai ma. Ete we nehu mangfatafoi yeyo, "Nari fininai," nana mani niari kaririai. Yeitawanai we Dai Wau tonanai kontai. Fiani

aino boyoa mani, kariria rai.’”

⁹ Yesusi tarao rai mamuna fuba foi medu tonanafo pepuhung paria. Deti berahai tuti medu we kaiwasa bitoya era riati fosa deyo, “Kei! Inontarai nini andiaranane. Na inontarai Israeli nesa kiai wiwo iwati manei yoaso yau ne fuba kariri tonina kaharai.”

¹⁰ Ainanaya inontarai mano demi ea fosa, etaraberasa to munufo aha mani, womingfoi dentengna.

Yesusi medu beiri bariboi mireha foi darang aha

¹¹ Waroi ahang kaha mae, Yesusi da to munue wonong fino Naini. Ne inontarai suraya mandu fosa tuti kaiwasa siai kontai era riati.

¹² Da wa rerai we rahutu borong munue nanai, tete kaiwasa na munuefo eha bariboi mireha manei ariai we esarai. I mani, wiwina manei ne arikang dine, tuti meiri kawuru andinania. Kaiwasa nani era ria wiwinafoi.

¹³ Mayeai Seng Yesusi detiao wiwinafoi, enerorongfoi sawai wei, aroi. Ainanaya medu wei deyo, “Wai fanai.”

¹⁴ Mayeai da wa waratawang fatafoi. Ainanaya inontarai ehari fo efotousa etoa, Yesusi medua deyo, “Bariboaiwa waune, yemi wau, boabari wau.”

¹⁵ Na tatofang kutu nanai bariboi nani doa bariria minohi, tuti medu wesa. Ainanaya Yesusi dohoni we inanaia.

¹⁶ Kaiwasa fuba nani ematai tuti esomi we Seng Allai, etaparandini eteyo, “Nabi fuba manei da worutata. Allai da kawuru ma weo dohong mai we ne kaiwasanei.”

¹⁷ Ainanaya Yesusi wonongfo etairirai wari nu Yudea foi kontai munue watai waria fo tantenang.

*Yesusi tuti Yohanesi mano webaptisi kaiwasa
(Matiusi 11:2-19)*

¹⁸ Mano eraria Yohanesi fosa etei kaririai we Yohanesi na aitamu rorong, kariri fiani aino Yesusi niari fo. Amani Yohanesi sahu ne inontaraifo mandu,

¹⁹ ambori demi uru urao Yesusia urutani tonina, “Wau mani Mananu Mamparirio ambori ro ma foi* di wau e, ete ametamang we inontarai siai manei e?”

²⁰ Ampafe Yohanesi ne inontarai mandu fo ura we Yesusi tuti umadu wei ureyo, “Yohanesi mano webaptisi kaiwasa foi demi auru ma aurutang bera Dai wau, wauno mano ambori ro ma rai, kariri Seng Allai ne kaiwo arerafo, ete ametamang weo inontarai siai manei e?”

²¹ Na rahida nani mani, Yesusi niari inontarai emaninang finomai bitoya ebeng, data inggira, tuti niari mano euremifafa ewati aha.

²² Ampafe Yesusi yoa deyo, “Murarabera muru we Yohanesi, murai kaririai wei, kariri fiani aino mutaramioai tuti muwatioa ne, mano euremifafa ewati, mano efaya etoa era, mano

* 7:19 Yesaya 9:5-6

emaninang kusta ebeng, mano etarami pararo fosa etaramiofi, mano emarareha esuwi aha, tuti mano ene pari fi fosa iwuwu Kaiwo Mahikai fo wesa.

²³ Tuti mano wiro enemiron-
rong soriru we yau kaha fosa,
esobu ne maifo."

²⁴ Yohanesi ne inontaraifo
ura wa, ainanaya Yesusi
medu kariri Yohanesi we
kaiwasa bitoya foi, deyo,
"Raminde nanai mera to
katai wekamamiei minano
foi we mewati fiani nai,
mewati ninoi wanamba
sowawerahi foi e? Bireri, we
i mani, inontaraio yu kaiwo
mutu dine!"

²⁵ Ampafe mera wa we
mewati fiani, mano sensuni
na ansung kaiwewa denteng
foi e? Bireri, weo inontarai
esansunsa na ansung tonana
fo tuti ene fi bitoya fosa mani
enayai na munu mananu fo
terai.

²⁶ Ampafe mandoni dino
mera we mewatiao ne? Nabi
manei e? Tarai, wape
yeikaririaifa we mea yeo
mano mera we mewatiao
nani mani fiabai sewa nabinesa kiai.

²⁷ Weo i mani andino Allai
medu kaririai na ne Kaiwofo
dotu tono:

'Mewati ma! Yemi nehu in-
ontaraio kia nehu kai-
wone manei,
da foni Wau.

I ambori meineng nemu
rangfoi we Wau.'*

²⁸ Yesusi medu aha deyo,
"Tarai, imadurai we mea
mau yeo, na inontarai fuba
saubaunung na nunei nini,
manei wiro fiabai sewa weru

Yohanesi nini kaha. Wape na
ninai to fong mani, inontarai
mano ehatui sewa na Allai ne
Mananu rorong fo ansaino
efabai sewa Yohanesi fo."

²⁹ Kaiwasa sentenang,
kontai mano efanduhi pajaki
we parenta Roma foi fosa
etarababerasa weru ene
sasarifoi ampa, ampare
Yohanesi webaptisia ampa.
Ampafe donio rabuang bo
Yesusi medu fimai kariri
Yohanesi mani, eroaoai
paria.

³⁰ Wape inontarai ewe-
Farisi tuti mantaunau
Kaiwo Musai soi fosa, ea
etarababerasa weru ene
sasarifoi kaha, etaramididau
kaiwo Yohanesi medura fo
kaha, tuti wiro emaya we
Yohanesi webaptisia kaha.
Ampafe donio fi Yesusi medu
kariri Yohanesi fo mani,
eroaoa kaha.

³¹ Ainanaya Yesusi medu
aha deyo, "Fiani andino
iriwanso kariri inontarai
rabuang bonini sa ne? Eto-
yari fiani ne?"

³² Ea ene tarai toyari
arikang eminohi na pasari
mae esahu wawerasa eteyo,

'Amerohi rarung mirising
fo we mea,
manamo memahai kaha,
ameba kayowa,
wape wiro mesai kaha.'

³³ Weo Yohanesi mano
webaptisi nei nini da ma
mani, wepuasa tuti dunung
angguri kaha, manamo
meteyo, 'I mani Saminseni
niasi nai.'

³⁴ Ainanaya Kaisung In-
ontarai nei da ma mani

* 7:27 Maliaki 3:1

dampi, dunung, tuti memadu meteyo, 'Mewati inontaraifoi denanggoing, meyeru biriu, tuti firaو mano efanduhi pajaki we parenta Roma foi tuti inontarai sasari.'

³⁵ Wape Seng Allai sewai sewa. Mano esomi wei fosa etainawi ne awaifo nanai na fimai etohong toa fo."

Na Betania wiwing manei sara Yesusi na maning niunsai mampori

³⁶ Farisi manei, wonong fino Simoni, wenoti Yesusi weo da wa dampi na ne munufoi. Yesusi da wao Farisifoi ne munufoia, am-pafe minohi dampi.

³⁷ Na munue nana mani wiwing manei, dohong sasari fiabai. Taraoai weo Yesusi dampi na Farisifoi ne munufoi, am-pafe da oi ma, amani kiao maning ninsai mampori botori bei.

³⁸ Doa na Yesusi kurufuifo, rurang awerengfo mae sai, am-pafe kifa urehurufo to Yesusi awerengfoa wawasa tantenang. Awa kawuru wori dufi Yesusi awerengfoa sarahiae nano nurandaungfoi, mayeai ninahai tuti sara na maning ninsai mampori foi. Niari tonana weo enewawu Yesusi, weo deitawanai ne sasari niaririfi Sempaisi deiariai ampa.

³⁹ Inontarai weFarisi wenoti Yesusi foi deti finanafo, dei na enerorong, deyo, "Inontarai nini nabi dine mani, deitawangno wiwingfoi mandoni dine, andino niariri tonanane.

Weo i mani wiwing sasari dine."

⁴⁰ Manamo Yesusi medu weia deyo, "Simone, ye imadu kaiwofea we wau." Simoni yoa deyo, "Daie, moduraia."

⁴¹ Yesusi yiwanso kaiwofea deyo, "Inontarai mandu, amani uka doi ria mano ne doi manei. Manei kiao doi dinari* piaring bering (500), tuti manei aha mani kia doi dinari piarua sura.

⁴² Uru ruhiae, wiro ubiriu weo ubai doi uka fo kaha, am-pafe mano nengfoi yabang sayarai. Mandoni, na inontarai mandu fosuru, andino enewawu mano ne doi foi sewa ne?"

⁴³ Simoni yoa weia deyo, "Yau mani, yeo mano kia doi fuba sewa foi andino enewawu mano ne doi foi sewa ne." Yesusi yoa aha deyo, "Antu! Enemutituraitawa tarai."

⁴⁴ Ainanaya Yesusi deti we wiwingfoia tuti medu we Simoni deyo, "Boti wiwing nini to ne? Ira to nemu mununei ma, amani bohong merehafea damang we iruai avehune kaha, wape wiwing nini yuai avehune na urehurune, tuti dufi aha sarahiae na nurandaungnei.

⁴⁵ Wau mani wiro bomang we yau weo nuna yau kariri tane koangnei kaha, wape wiwing nini wiro fiotou niuna avehurengne kaha, na iari antanafa ira to ninai ma ne.

⁴⁶ Wau mani wiro wara nuhunei na maningfea kaha,

* **7:41** Doi dinari mani, doi mai we ne fiembaitai rahida bei.

wape wiwing nini sara awe-hurengne na maning ninsai mampori.

⁴⁷ Tarai! Ne enewawufo fuba, weo ne sasari fuba niariri fi Sempaisi deiairi ampa. Wape mano oiairi fuba kaha mani, enewawufo fuba kahai kontai."

⁴⁸ Ainanaya Yesusi medu we wiwingfoia deyo, "Nemu sasarifi yeiairi ampa."

⁴⁹ Inontarai siai mano eminohi etampi ruhiae ria Yesusi fosa emadu wawerasa eteyo, "Mandoni dinini, doni deiai sasarifi nina?"

⁵⁰ Manamo Yesusi dei we wiwingfoia deyo, "Weo wau roaso yau, ampare wobu fariri ampa. Ro na maia."

8

Wiwing maneа efata Yesusi

¹ Waroi kaharai mae, Yesusi da wariai na bendarifo tuti munuefo, deiriri Kaiwo Mahikai ne kariri Seng Allai da weMananu ma fo. Ne inontarai suraya mandu fosa erariati.

² Kontaio wiwing maneа erariati, mano niari eara ebeng weru fimaninang finomai tuti inggirai. Ea mani, Mariai mano ahui we Makdalenaifoi (data inggira itu werui ampa);

³ kontai Yohanai, mano ne mang Kusai mano yufi weo Herodesi na munu mambaiseng foi; Sosanai, tuti wiwing siai bitoya kontai. Wiwingnesa efata Yesusi tuti mano erariati nesa, na mantaunsa ene fifo.

Fiyiwansoai kariri mangkafa aibong
(Matiusi 13:1-23; Markusi 4:1-20)

⁴ Kaiwasafoi da mutu we Yesusi ma, na munue finomai. Ampafe kaiwasafoi bitoya fianduhi na nanaiya, mayeai Yesusi deiriri fiywansoai bei we ea mani sonina,

⁵ "Weniari romi manei kia ne aibongfei da wa we sanami. Da wa kifa aibongfoi nanai mani eai sawai na rangfoi. Ampafe inontarai etaha riroyari tuti romu etani.

⁶ Eai kontai sawai na katai wekamamie. Sa rerorifoi, wape siamorang aha, weo kahofa sarahiai karerai.

⁷ Eai aha mani sawai na katai weninoi ababo foi, ampare ninoi ababo foi sifu tamui tuti kehepania memasara.

⁸ Wape aibong fei aha mani sawai na kahofa beng fea, ainanaya sifu ampare niayaia bongnei bitoya, pariao piaring (100)." Yesusi deiriri fiywansofoia kiaia mani, deya deyo, "Mewemetarami mani metaramioai!"

⁹ Mano eraria Yesusi fosa etutang berahi we fiywansoai nani kariri fifiani.

¹⁰ Yesusi yoа deyo, "Mea mani Allai dohong awai we mea, we mewaitawang kariri ne weMananu rorong fo tuti fi dediwara fo ampa. Wape inontarai siai fosa yeunausa na fiywansoai, ambori, 'Ewatioai tonanai ki,

wape ene tarai toyari eu-remifafa.

Etaramioai,

wape etafura kaha.*

¹¹ Fiyiwansoafu ne kaiwo tarai finana: Aibongfoi mani yiwanso Seng Allai ne Kaiwone aine.

¹² Aibong sawai na rangfoi mani, riwanso inontarai mano etaramio Kaiwofoa. Wape Saminseni da ma, dewa Kaiwofo weru enemirorongfo ambori eroasoa fanai, ampafe esobu faririfo kaha.

¹³ Tuti aibong sawai na kahofa wekamamiei wowong fo mani, riwanso mano etaramio Kaiwofo, esobuai na enemirorong mirising. Wape Kaiwofo wiro wenewa na enemirorongfoi kaha. Eroasoai tourai, mae fieai da ma sofara mani, esu to fua.

¹⁴ Tuti aibong sawai na katai weninoi ababo foi mani, riwanso mano etaramio Kaiwofo, wape earomikuayai karerai we fi nunei tuti ne rafo tuti ambori eminohi na mai na nunei fo. Ampafe finani kepang kaiwofo paria ne bongfoi wiro wetarai nariai na sa ahang kaha.

¹⁵ Aibong sawai na kahofa beng fo mani, riwanso mano etaramio Kaiwofo, ainanaya etonai afui nayai na enemirorongno beng tuti mai fo. Ea erutawanai tuti kaiwofo wedayasa etohong beng na etawansa na mai, ne tarai kariri kahofa beng fea wedaya aibong sifu wetarai bitoya.”

Padamarangno tabuni na

babeu

(Markusi 4:21-25)

¹⁶ “Wiro inontarai manei kiai padamarang bei, ainanaya tebuni na babeu, ete dohoni wiatai na fata arowawahifo kaha. Mae yuai padamarangfoi ayai sawai parai, ambori inontaraio era to munu rorongfo afui mani ewati sambewarafoi.

¹⁷ Weo fio adiwara ne kiai ambori atioai ki, tuti fio ohonai we kaiwo werorong fo kiai kontai ambori tarami parai na kasau ki.

¹⁸ Ampafe menemitituai sauwa weai paria kariri fianai aino metaramioai ninai. Weo mandoni dino sobu awaifo ria Allai kawurua fo, ambori sobuafu fuba aha. Wape mano sobua kaha foi, ne kutuo enetituaitai we nengfo kontai kia weruri ki.”

Yesusi inana tuti ne tahatufosa

(Matiusi 12:46-50; Markusi 3:31-35)

¹⁹ Yesusi inanai tuti ne tahatufosa eraoi ma, wape era kefani ma kaha, weo kaiwasa bitoya karerai.

²⁰ Ampafe inontarai manei medu we Yesusi deyo, “Daie, inamuai tuti nemu tahatufosa etamang na borieife fo erurai we ehanggung wau.”

²¹ Wape Yesusi yoa wei deyo, “Inontarai mano etaramio Seng Allai ne Kaiwofo tuti etohong kaririai, eaino isahusa we nehu ai tuti nehu tahatui.”

* **8:10** Yesaya 6:9

Yesusi deikutu dedukafoi mering

(*Matiusi 8:23-27; Markusi 4:35-41*)

22 Rahida bei mani Yesusi tuti mano erariati fosa eta wa rowei. Yesusi medu wesa deyo, "Tawo to ruru eneung dowaruai." Ainanaya ewo anina.

23 Etafai mae Yesusi wiata dena. Mayeai dedukafoi bia tantuma na rurufoi. Merehafoi dau wafoi, awao adareti etaisui.

24 Mano eraria Yesusi fosa era wa ebauni. Emadu wei eteyo, "Daie, Daie, tanai rai!" Yesusi doari meai, ainanaya medua sua wanangfoi tuti andeisa peperami foi. Wanangfoi tuti andeisafoi meringna, ainanaya rurufoi mering na tantumara.

25 Ainanaya Yesusi medu we mano erariati fosa deyo, "Todonie wiro meroaso yau kahai nina?" Ea epapuhung tuti ematai. Ampafe emadu waweresa eteyo, "Inontarai nini mani mandoni dine, doni sua wanangfoi tuti andeisafoi mani, mering kaririai."

Yesusi niari inontarai inggira dohoni manei denteng

(*Matiusi 8:28-34; Markusi 5:1-20*)

26 Yesusi tuti ne inontarainesa etafai finanaya paria sobu katai Gerasa na ruru Galilea eneung dowaruai.

27-29 Na katai nani inontarai inggira dohoni manei. Inontaraifoi mani na munue nana. We beiru teai ampa mani inggira dohoni, ampafe

warangfo tuti awengfo wora na wai besi tuti na fora tuti waitawang weduaria papayai, wape kehutui kontai, ambori inggirafoi kiari to katai manano fea. Tuti waroi ampa wiro sensuni kaha, tuti miaya we minohi na munufo kaha. Mae deo niayai terai na we winsaburungno etohonai we kubirifo.

Yesusi bia da warei mani, inontarai inggira dohoni foi dao ma. Detia Jesusifo bibe, mayeai sawaia disang kapari wiatai na Yesusi awerengfo. Mayeai Yesusi demi inggirafoi da to woriai werui, ampafe sahu, deyo, "Yesuse, Allai mano dedai sewa nei ne Kaisungne Waune, boyo bohong yau tofino? Todoni kontaio wiro mung kanggani yau fanai."

30 Yesusi dutang bera inontaraifoi deyo, "Wonomu fidoni?" Ampafe inggirafosa eroa, eteyo, "Amewonomi fino Raifi," weo inggira bitoya paria enayai nai fefe.

31 Inggrafosa etutang Yesusi paria, eteyo wiro datasa to Soroha rorong foi fanai.

32 Kefang na kataifoi, na wiwoi tarareifo mani, fiai rabuang nei enaya esung. Inggrafosa etutang Yesusi paria eteyo miaya mani, demisa esuai na fiaifosa. Ampafe Yesusi yoal we fi etutana fo.

33 Ainanaya inggirafosa era to borai tuti esuai na fiaifosa. Ampafe fiaifosa emitio beyari eseai na katai kenatatera fo

to rurufoi aweu, emarareha naya.

³⁴ Mano ewaitawang wedua fiai fosa ewati fitantumafe nana fo emitoa etaiririai na bendarifoi tuti na munue watai ruramai na nanafo we kaiwasafoi.

³⁵ Ainanaya kaiwasa na munue fosa era wa ewati kariri finanai. Era mao Yesusi amani ewati inontaraifoi rai inggira foi da weruia, mae minohi rurang Yesusi awerengfo sensunia tuti medu finomai aha kaha. Ampafe ematai.

³⁶ Mano ewati te fitantuma Yesusi niari we inontarai inggira dohoni foi, eteikaririai kariri fianai aino ewati terai nanai we kaiwasa era ma fosa.

³⁷ Ainanaya inontarai Gerasa fosa kiai, ematai tantenang paria, ampafe etutang Yesusi weo da weru ene kataifoi. Ainanaya Yesusi dautai to wafoi aha, we ete etafai.

³⁸ Mayeai inontarai rai inggira foi tifa weruia nani dutang Yesusi paria weo dontai riati. Manamo Yesusi demi da wa medu wei deyo,

³⁹ "Barabera wau to nemu munufoia tuti boiriri kariri fiani aino Seng Allai niari we wau ne." Ampafe inontaraifoi da wa, wiuwuo fianai aino sodaira fo tuti kariri fianai aino Yesusi niari wei fo wari bendarifoi sentenang.

Yesusi niari Yairusi ne kamitungfoi denteng tuti wiwingno denteng aha na warang disangso Yesusi

(Matiusi 9:18-26; Markusi 5:21-43)

⁴⁰ Yesusi daraberahi to ruru eneung dowarui aha mani kaiwasafoi piraise, weo enaya etamang wei fefe.

⁴¹ Mayeai mani inontarai wenunggamiai na munu agama Yahudi bei na kataifoi, da we Yesusi ma. Wonong fino Yairusi. Disang kapa awebuka na Yesusi arongfo tuti dutani nano enetawanai beyari, ambori Yesusi da to ne munufoia.

⁴² Weo ne kamitung tarai mansiari kawuru, fiabai ne defuina suraya boru ampa, meninangna adareti mireha. Ainanaya da to Yairusi ne munufoi mae kaiwasa na kataifoi sentenang da sawari ene tarai sopapari, weo efau fefe.

⁴³ Na kaiwasa bitoya nani, wiwing manei meninangno rika defairi. Sodai maninang nani defuina suraya boru ampa. Manggarawangfosa kontaio, wiro manei biriu we niariri denteng kaha.

⁴⁴ Wiwingfoi da kefang we Yesusi na kurufuifo, tuti warangfoi disangso ne ansung awerengfo. Na kutu nanai kontaio rika defairi foi fiotouraia.

⁴⁵ Yesusi dutang deyo, "Mandoni dino warang disangso yau ne?" Kaiwasafoi sentenang mani emadu eteyo, "Amea ma bereri." Ainanaya Petrusi medua deyo, "Daie, kaiwasanei bitoya soru wari wau ampafe manta esawa wau."

⁴⁶ Wape Yesusi deyo, "Wape manei warang

disangso yau. Yeitawanai, weo nuhuruainsoai we mambiriufeai dariai na yau mau wa."

⁴⁷ Wiwingfoi deitawanai weo Yesusi deitawang fi antanafa niari fo, ampare mitaia rirora beyari, da ma disang kapa awebuka na Yesusi arongfo. Arahio deiririai na kaiwasa bitoya foi urengreafo, weo todonie dohong warangfoia disangso Yesusifo tuti ne maninangfoi wedenteng na kutu iari nana fo.

⁴⁸ Yesusi medu weia deyo, "Kamitungne waune, nemu roaso yau wa wedaya bonteng ampa. Ampafe ro na maia."

⁴⁹ Yesusi doa medu tonana rai mae, inontarai etemi manei da na Yairusi, mano wenunggamiei we munu agama Yahudi foi, ne munu foi ma fo, medu deyo, "Daie, nemu kamitungfi mireha ampa. Ampafe wiro ka anseung Dai Mantaunaunei ahang fanai."

⁵⁰ Yesusi taraoai nanafo medu we Yairusia deyo, "Mutai fanai, mae roasoi terai, tuti nemu kamitungfoi denteng ki."

⁵¹ Awao Yairusi ne munufoia mani, Yesusi datapio kaiwasafrai manei da riati afui fanai, mae manta Petrusi, Yohanesi, Yakobusi tuti arikangfoi inang tamang suru, itoru terai.

⁵² Kaiwasafrai kiai saia deidu we arikang mireha foi. Manamo Yesusi medu deyo, "Mesai fanai, weo

arikangwai mireha kaha, mae dena."

⁵³ Ampafe emarari Yesusi paria, weo ewaitawanai we kamitungfoi mireha kawuru ampa.

⁵⁴ Mayeai Yesusi yu na arikangfoi warangfo tuti medu wei deyo, "Arikangne wau, boa to!"

⁵⁵ Arikangfoi ne ansengfoi daraberahi wei aha ma, ainanaya doabariria nina. Awa kawuru wori Yesusi demisa weo etohong fidangfea we dang.

⁵⁶ Ne wawafo suru upapuhung beyari. Manamo Yesusi deipi suru weo wiro uraisaha finiarifo we manei fanai.

9

*Yesusi demi ne inontarai suraya mandu fosa
(Matiusi 10:5-15; Markus 6:7-13)*

¹ Yesusi sahu ne inontarai suraya mandu fo efanduhisa, ainanaya dohong tapapa tuti wemambiri we ea, ambori etata inggira tuti enari fimaninang.

² Mayeaia mani demi ea era we enari inontarai maninang tuti etairiri kariri Seng Allai ne Mananu rorong fo.

³ Yesusi medu we ea deyo, "Wiro meha fieai ria mea na rang rorong wa fanai. Wiro meha aitatohi, ete rotang, ete fiang, ete doi, ete ansung beru kaha.

⁴ Na munu bodoni, etutang tawang mea mani, menayai nai paria mera weru munue nana.

5 Wape na munuefea, eteiaaya mea mani, awao mera weru munue nana mani, mehafa titai kangganang niayai na meawemiwa, we fiainawiai wesa kariri Allai ambori deiayasa fo."

6 Yesusi ne inontaraifosa era finanaya, era na munuefeai to munuefeai weo etairiri kariri Kaiwo Mahikai fo tuti enari we emaninang ebeng na kataifoi sentenang.

*Mambaiseng Herodesi dohona serawawerahai
(Matiusi 14:1-12; Markusi 6:14-29)*

7 Herodesi Antipasi mano wemambaiseng na nu Galilea foi, tarao fi Yesusi niariri na kataifoi sentenang, ampare dohona serawawerahai. Weo manea eteyo Yohanesi mano we-baptisi kaiwasa foi suwi na marareha rorong fe aha nina.

8 Manea kontai eteyo nabi Eliae suwi aha ma nina. Manea siai kontai eteyo, nabi manei nafino nabi fuba fafong faini kiai andino suwi aha nina.

9 Herodesi deyo, "Yohanesi mani yemi nehu inontarai eferang kutu rahanangfi ampa. Wape inontarai nini mandoni dine? Tarahuo kaiwo bitoya beyari kariri i ampa." Ampafe Herodesi sera we deti Yesusi.

Yesusi dohong inontarai ewepiaura wering wering (5.000) etampi

*(Matiusi 14:13-21;
Markusi 6:30-44; Yohanesi 6:1-14)*

10 Yesusi ne inontarai suraya mandu fosa, amani ne rasulifosa, etaraberasa tuti etaiririai we Yesusi kariri fiani aino enari ampa. Yesusi dutansa we era riati, ainanaya era ruhiai to munue Betsaida weo enayai futuai na wana.

11 Manamo, mayeai kai-wasafoi ewaitawang katai bo Yesusi daoi foi, ampare enumi riati. Demang wesa era ma, ainanaya medu kariri Seng Allai ne Mananu rorong fo wesa tuti niari inontarai emaninang fo ebeng.

12 Wofoi de sawaia mani, ne inontarai suraya mandu fo era Yesusi ma emadu wei, eteyo, "Diae, katainei minanai. Ampafe mahikai sewa mani, Dai bemisa era, ambori esera we fietang tuti katai etena naya fea, na bendari tuti munue watai rruramai na ninane."

13 Wape Yesusi yoa wesa, deyo, "Todoni kontaio meaino metohong fiang we etang." Yesusi ne inontaraifosa eteyo, "Tane roti ring kawuru tuti diang mandu, mae amera wa amewori fiang we kaiwasanei reto."

14 Manamo Yesusi medu we ne inontaraifosa aha deyo, "Metemi inontarainesa eminohi werabuang, ewepiarua sura teai rabuang bei." Mang titou mani piaura wering wering (5.000) teai.

15 Yesusi ne inontaraifosa etohong kariri fiani aino deyoai we ea fo, etemi kaiwasa eminohi tonanai.

¹⁶ Ainanaya Yesusi kia roti ring fo tuti diang mandu fo, fioai ureng deti to rorafaisi tuti dutang tuti fiangfo we Al-lai. Mayeiai mani fiobabau roti tuti diangfo na warang-foa kawuru wori, dohoni ne inontarai erariati fosa weo etatorai we kaiwasa bitoya foi.

¹⁷ Tuti kaiwasafoi dampi ao memosi beyari. Mayeai Yesusi ne inontaraifosa efan-duhi fiang seari foi mani, bayai suraya boru.

*Petrusi meduairai kariri
Yesusi mani, Mananu Mam-pariri dine*

(*Matiusi 16:13-28;
Markusi 8:27-9:1*)

¹⁸ Rahida bei mani, Yesusi mesiri wenadi we Sempaisi, mayeai ne inontaraifosa era wei ma. Yesusi dutang wesa deyo, “Kaiwasa bitoya foi emadu eteyo mantei di yau?”

¹⁹ Ne inontaraifosa eroa wei eteyo, “Manea eteyo Yohanesi mano webaptisi kaiwasa foi di wau. Manea kontai eteyo nabi Eliai di wau, tuti manea kontai eteyo wau mani nabi manei nanofafongfa suwi aha ma nina.”

²⁰ Yesusi dutansa aha deyo, “Wape na mantaung mea mani meteyo mandoni di yau?” Petrusi yoa deyo, “Diae! Wau mani Mananu Mampariri fi di wau.”

²¹ Ainanaya Yesusi deretawansa, demisa we do-honao ewuwuai we kaiwasa siai fo kariri i weMananu Mampariri fo fe.

²² Mayeai medu aha deyo, “Kaisung Inontarai nei am-bori sodai dadira bitoya ki. Imami baba fosa, tuti mantaunau Hukumi Musai soi fosa, ambori eteiayari ki. Tuti ambori emunia mireha, wape werahida botoru aha mani, suwi na marareha rorong foi aha ki.”

²³ Ainanaya dei we kai-wasa fuba wani, deyo, “Mandoni dino deyo daria yau mani, deiaya mantauni fi dohong weai na nunei fo, tuti rahida neungne sodua ne aitabafoi, amani meineng we sodai dadira kariri yau, tuti daria yau pampang.

²⁴ Weo mandoni dino de derara mantauni ne ansegfoi sewa weru daria yau mani ambori ne ansengfoi wioru ki, mae mandoni dino na nufi ninai enewawu yau awao wonohune wedaya tarahi mireha kontai ki, i ambori sobu numainufo ki.

²⁵ Ampefe manei yurai we sobu nunei sentenang, wape ambori nuarinufoi wioru tuti sobu numainufo kaha mani, we fanie yurai karerai nina?

²⁶ Mandoni mimaya we yoa tuti yau, tuti nehu Kaiwone, nana mani Kaisung Inontarai nei kontai mimaya we yoa tutiri ki, na rahida bo da na ne sambewarai dadai fo, kontai Dai ne sambewarai dadai fo tuti wewaifosa.

²⁷ Ampafe yeoai na kaiwo tarai we mano metoari na nina ne mea, manea wirowarareha kahai paria ewati Seng Allai weMananu ki.”

*Sempaisi deparanding
Yesusi na uai wowongfo
(Matiusi 27:1-8; Markusi 9:2-8)*

²⁸ Yesusi deunau kaiwasafoia kawuru, werahida indeatoru aha mani, dau to uai bei aweai weo wenadi we Sempaisi, kia Petrusi, Yohanesi, Yakobusi.

²⁹ Dutanaia mayea urengfo siaiya tuti ne ansungfo bua karofari awa kaiwewa tante-nang.

³⁰⁻³¹ Mayeai inontarai mandu uroa na sambewarai riati, umadu wei. Inontarai mandu nansuru mani, Musai kontai Eliai, nabi na fafongfa mandu aine. Itomadu karirio Yesusi weo da wa, mireha na Yerusalemifo, toyari nabifosa esoi kariria fo.

³² Ainanaya Petrusi konta mandu itora fo itoru itouremi mamong paria. Itoroabari itoru na mamong rorong foi, itowati Yesusi ne sambewaraio dedai foi awao keiwewa, tuti inontarai mandu uroa rurami.

³³ Inontarai mandu fo ure ura wiru Yesusi, mayeai Petrusi deyo, "Daie, mahikai paria we tanayai na katai nini. Mahikai mani antonari warumai botoru, ambori bei we Dai wau, bei we Musai, tuti bei we Eliai." (Wape Petrusi enetituai kaiwo medura fo kaha.)

³⁴ Medu tonanaifara, mayeai kafafe biua karofari bei sea ma sorusa kiai awafui enai na kafafe rorong fo awa Petrusi, Yohanesi tuti Yakobusi itomatai beyari.

³⁵ Mayeai na kafafe rorong fo rawafui bei medu deyo,

"Nehu Kaisung yiriri dinini. Metaramididauwi."

³⁶ Raofuifoi dotu tuti kaiwofo kaiya, itowatia mani Yesusi meiri doa siai. Na rahida nani itonemboru mampunggasai, wiro itoreisaha obu fi kuteai we manea ahang kaha pariao waroi.

Yesusi niari arikang nuaninu karira dohoni manei denteng

*(Matiusi 17:14-21;
Markusi 9:14-29)*

³⁷ Kameaia mani Yesusi tuti ne inontarai mantoru fo itobia na uaifoi meu. Mayeai kaiwasa bitoya foi dao Yesusi ma.

³⁸ Mang manei sahu abu kaiwasa bitoya foi deyo, "Daie, boti nehu kaisungnei wo. Nehu arikang tarai kutu mansiari andiaranane.

³⁹ Awao inggirafoi dohoni ma mani, bibe tantuma, tuti ne tarai fiotatouri pariao urengfo baibuara, tuti borong kawawuai tipu. Inggirafoi wiro sawini na ea kaha, mae adareti dohoni pampang.

⁴⁰ Kawuruao yutang Dai nemu inontaraiwasa we etata inggirafoi, manamo ebiriu kaha."

⁴¹ Yesusi yoa deyo, "Meai aranane? Kaiwasa fuinini mea, tarai weinontarai meroasoa di mea kaha tuti mera sarawai. Inai rahang mea tuti itawang yau we mea pari kidoni wori meroasoai ki? Ka nemu kaisungwai to ninai ma!"

⁴² Arikangfoi da we Yesusi ma rai mae, inggirafoi biariri aweu tutu dohoni fiotatou ne taraifoi. Manamo Yesusi

data inggirafoi to boriai, am-pafe arikangfoi dentengna. Ainanaya dohoni tiwera we tamanai aha.

⁴³ Kaiwasafai sentenang epapuhung we ewati Seng Allai ne mambiriwo fuba fefe.

Yesusi deikariri kariri mirehafo aha

(*Matiusi 17:22-23; Markusi 9:30-32*)

Kaiwasafai pepuhung we fi Yesusi niari fo rai mae, Yesusi medu we ne inontaraifosa deyo,

⁴⁴ "Mewati kaririai na mahikai tuti mearamiporo kaiwo yeoa ne fanai. Kaisung Inontarai nei ambori etohoni to mano ewarami aipayawa fosa ewarami rorong fo ki."

⁴⁵ Manamo mano eraria Yesusi fosa wiro enemitiuai sobu kaiwo deyoa fo kaha. Fi nanai dohonai we kaiwo werorong we ea ambori enemitiuai sobua fanai. Tuti ea kontai ewearira we etutang kariri kaiwofo we Yesusi.

Mantei dino fiabai sewa ne
(*Matiusi 18:1-5; Markusi 9:33-37*)

⁴⁶ Yesusi ne inontaraifosa esawasa weo mantei dino fiabai na sa fo.

⁴⁷ Yesusi deitawang fi enemitiuita fo, am-pafe kia arikang manei ma dohoni doa rurami.

⁴⁸ Ainanaya medu we ne inontaraifosa deyo, "Mandoni dino demang we arikangnei na mai na wonohune mani, wenani mani demang we yau kontai. Tuti mandoni dino

demang we yau mani, demang we mano demi yau foi kontai. Weo mano ketui sewa nano mea kiai foi andino fiabai sewa ne."

Mandoni dino dapa tata kaha mani sau we tata
(*Markusi 9:38-40*)

⁴⁹ Yohanesi deyo, "Daie, amewati inontarai manei data nuaninu kerira na Dai wonomune, am-pafe ametei weduari, weo i mani wiro na tata kaha."

⁵⁰ Wape Yesusi deyo, "Wiro meteiwedduari fanai. Weo mandoni dino dapa mea kaha mani, wenani sau we mea."

Munuefeai na Samaria deiaya Yesusi

⁵¹ Yesusi ne rahida neungfo rerai we dautai to Waidani, amani deiya futuai weo da to Yerusalem.

⁵² Ampafe demi ne inontarai era foni i. Mano demisa fosa era wa esuai na munuefeai na nu Samaria, weo emainenang fieai we Yesusi.

⁵³ Manamo inontarai na munue nanai emaya weo etamang we Yesusi kaha, weo ewaitawanai weo medua futuayai weo da to Yerusalem fefe.

⁵⁴ Yesusi ne inontaraifo mandu, Yakobusi tuti Yohanesi uwaitawanafa, umadu weia ureyo, "Daie, maya mani, tatutang we adia na rorafaisi meuo, kaso inontaraifosara eworua ne?"

⁵⁵ Yesusi deti berahai, mae sua suru.

⁵⁶ Mayeaa mani, era to munue siai feaia.

*Todoni raria Yesusifo
(Matiusi 8:19-22)*

⁵⁷ Yesusi tuti ne inontaraifosa era finanaya, mayeiaia inontarai manei medu we Yesusi deyo, "Daie, yeo ira ria wau to katai bodoni kontaio dino ro oa fo."

⁵⁸ Yesusi medu wei deyo, "Wintumangne mani ne kamirei we wiatai nai, tuti romunei kiai kontaio ne aisangging. Wape Kaisung Inontarai nei ne pari katai we wiatai nayai."

⁵⁹ Mayeai Yesusi medu we inontarai manei siai aha deyo, "Ro ria yau." Manamo inontaraifoi deyo, "Daie, boiai yau ira wa kio dai mireha isarai akawuru wo."

⁶⁰ Wape Yesusi yoa deyo, "Ro ria yau, mae tua mano eroaso yau kaha fosa we esarai mano emarareha fosa ki. Wape wau, roa mani boisaha kariri Seng Allai ne Mananu rorong fo, weo Seng Allai wemananu ampa."

⁶¹ Manei siai kontai deyo, "Daie, ye ira ria wau, manamo boiai yau ira wa yutang we nehu terafosa akawuru wo."

⁶² Yesusi medu we inontaraifoia deyo, "Manei de daria yau mani, aroporo fi nunei, mae de daraberahi aro fi nunei mani, wenani mai we niarifi we Seng Allai ne Mananu rorong fo kaha."

10

Yesusi demi ne inontarai piatorua sura

* **10:2** Ne maksuti mani, inontarai mano etamang we etarami Kaiwo Mahikai ne efau paria, manamo mano etairiri kaiwofo wesa etamoyara kaha.

¹ Mayeiaia mani Yesusi diri inontarai piatorua sura aha (70), ainanaya demisa era we mandirutiae, erafoni i to munue de daoa fo tantenang.

² Yesusi deya deyo, "Aibong etini foi bitoya, wape mano etetini fosa efau kaha,* ampefe metutanai we mano wenunggamiai we fietini foi ambori denatu mangfata efau we eteting aibongfo.

³ Yo, mera to! Metarami finina; yemi mea mera we mewuwu wonohunei fo, mene tarai toyari domba enayai rahang serigala rabuang.

⁴ Wiro meha aderi ete rotang ete sapatu fanai. Meha kaiwone mera wa amani mera to fong terai, wiro mewati beraha fanai.

⁵ Mera wa mesuai munu bei mani memadu fafong tonina, kadono mahikaifeai we mea na munu bonini.

⁶ Na munu bonani manei enerorong denteng mani, mene mahikai beng metohona fo ambori nayai nai, mae inontarai denteng manei niyai na nana kaha mani, mahikai metohona fo nayai na inontaraifosa na munu bonani kaha.

⁷ Menayai na munu boyari foi terai. Wiro metato na munu bei to munu bei aha fanai. Metang fiang fiani aino etohonai na nanai we mea fo, weo inontarai mano yufi foi mani sobu fiembaitai.

⁸ Awao, mera wa munuefea, etutang tawang mea na

mahikai mani, metang fiang fiani aino etohonai we mea na nana fo.

⁹ Menari inontarai mano emaninang na munue nanaya ebeng, tuti meteisaharai we inontaraifosa, weo Seng Allai waroi kaha mae ambori da ma we wemananu we ea ki.

¹⁰ Wape, mera wao munuefea, emaya weo etamang we mea kaha, eteiaya mea, nana mani, mera wa rangfoi ambori memadu tonina,

¹¹ 'Abu saha na ameawemi rengne na mene munuefi, amehafa titai, we kaiwoariri we mea, amparefetanansiau, weo mea meteiyaya Sempaisi ne Kaiwoaririfo. Wape mewaitawanai weo rahida neungfe kefang ampa, weo Seng Allai ambori wemananu we mea ki!'

¹² Imadurai we mea mau yeyo, rahida bo Allai kiutu kaiwo kariri nunei nai foi, Seng Allai kesoufo fuba we inontarai nanisa, fuba sewa ne kasou dohonai na fafongfa we inontarai Sodomi fosa."

*Munue wiro eroasoa kaha
(Matiusi 11:20-24)*

¹³ "Inontarai Korasimi mesobu ne karirafo rai! Tuti inontarai Betsaida ne mea kontai, mesobu ne karirafo konta rai. Weo fitantuma bitoyao inariri rahang mea tonina ne, masino inari na bendario borai weru Israelinei, toyari Tirusi tuti Sidoni mani, inontarai na wana fosa etarabera kawuru weru ene sasarifo tuti esansung ansung koya fo,

eruai kangganangfoa watai na enumikamieifo ampa.

¹⁴ Wape rahida bo Allai kiutu kaiwo kariri nunei nai foi, mesobu aiboi maraba sewa inontarai Tirusi tuti Sidoni fosa.

¹⁵ Tuti mea na bendari Kapernaumi, menemituai we metadai sewa paria sobu rorafaisi kontai ki, wape Allai ambori su mea beyari paria sobu katai Soroha rorong foi."

¹⁶ Mayeaia Yesusi medu we mano erariati fosa deyo, "Manei tarao mea mani, tarao yau. Mae deiaya mea mani, deiaya yau. Tuti mano deiaya yau foi mani, deiaya mano demi yau foi kontai."

Inontarai piatorua sura fo etarabera
(Matiusi 11:25-27, 13:16-17)

¹⁷ Inontarai piatorua sura fosa (70), etarabera, na mararising aha ma. Emadu we Yesusi eteyo, "Daie, inggirafo etaramio amea weo ametemisa era to borai weru inontarai, na Dai wonomune fefe."

¹⁸ Yesusi yoa deyo, "Yeti Saminseni sawai na rorafaisi toyari kaiwewa.

¹⁹ Mewaitawanai weo mea kiai, yohong mambiri we mea ampa, ambori mea, metaha tawang tawai tuti amafiahi, kontaio meharai kahobu Saminseni, tane aitetafoi ne mambiriufu, nano fi kerira fei sobu mane wau kaha.

²⁰ Tonanai wape dohona meparaise weo metata inggirafosa mani, etaramio

mea fo fe. Mae ne beng pari mani, meparaise weo mewonomine Seng Allai soi na ne buku na Waidani ampa.”

²¹ Na siari nanai kontai, Yesusi mirarising weo Nuaninu Mirarebana fo donti, ampare deyo, “Dai, Seng mano ru rorawai tuti nunei Wau, yohong mahikai we Dai Wau, weo finani kiaio bodiwarai weru mano esawai tuti ewaitawang fi bitoya fosa, mae boinawiaia kasau we mano ene tarai kariri arikangnesa. Yo, tonanai, weo ne tonanane aino Dai enemuoa ne.”

²² Ainanaya Yesusi medu deyo, “Fi kiai na rorafaisi tuti na nunei, Dai dohonai we yau ampa. Kaisungnei mani, manei wiro deroani na mai kaha, manta Dai mantauni terai, tuti Dai kontai manei wiro deroani na mai kaha, manta ne Kaisungnei mantauni terai tuti inontarai mano Kaisungnei dirisa we deinawi Dai nani wesa fosa.”

²³ Mayeai Yesusi deti berahai we ne inontarai erariati fosa ambori medu we ea siai deyo, “Mea mani mesobu ne maifo we meuremiwa tabau we mewati te fininaia.

²⁴ Weo, imadu we mea mau yeo, na fafongfa nabi bitoya tuti mananufosa efau enemirorong dohong paria we ewati fiani aino mewatioai na kutu nina ne, wape wiro ewatioa kaha. Tuti we etarami fianai aino metaramioa ne, wape wiro etaramioa kaha.”

Yesusi yiwanso inontarai Samaria enewawufo fuba

²⁵ Mayeiai mani mantau-nau Hukumi Musai soi fo manei doari ayai dutang fea Yesusi, weo deo weanggariri fefe. Dutani deyo, “Dai Mantaunaune waune, inari fiani, ambori isobu mai na rahida fui tuti iminohia numainufo?”

²⁶ Yesusi yoa deyo, “Fiani aino etoi na Seng ne Kai-wone? Botori mani sodoni?”

²⁷ Inontaraifoi yoa deyo, “Yetori mani sonina:

‘Enemuwawu Sempaisi, nemu Allai, na enemurorongwai sentenang, na numuaninuwai sentenang, tuti na enemutituaítawa sentenang.’*

Tuti yetori sonina kontai:

‘Enemuwawu inontarai siai kariri enemuwawu bera mantaung wau wa.’*

²⁸ Yesusi deyo, “Modurawa tarai. Bohong kaririai, angfino munohia numainu.”

²⁹ Manamo mano deunau fi Musai soi fo niari tofino i mani niari kaririaia mai ampa. Ampafe dutang Yesusi aha deyo, “Mandoni dino enehuwawuti ne?”

³⁰ Yesusi medu dohong rang wei, deyo, “Inontarai Yahudi manei, bia na Yerusalem to Yeriho. Na rang rabuang mani, inontarai mamuna manea eboa adareti mireha, tuti etawa ne fianggengfoa kaia niai arora, era weruia mae wiatai na rangfoi tuti fari beba foi.

* 10:27 Ulangan 6:5 * 10:27 Imamati 19:18

³¹ Teterai weo, imami manei da na rang koinani kontai. Detiao inontaraifoi fo, tiberawa da na rangfoi eneung dowej. Ampafe da weruia.

³² Mangfata imami fosa manei, weriria na Lewi, i kontai da na katai nani. Detiao inontaraifoi fo, da afuio de detioi, manamo kia bariri to rang eneung dowej foa, da weruia.

³³ Mayeaia mani inontarai Samaria manei, wiro Yahudi dine kaha, i da na nanai kontai. Detia inontaraifoi fo aroi fuba beyari.

³⁴ Da afui inontaraifoia, ainanaya yuai rurang fari beba foi na angguri ambori dohong maning soaifa, awa kawuru wori fiau weduarai ki. Mayeai yuai inontaraifoi to ne keledaifoi ayai wia sauwi, mae kiari da to munu ebaitai bei, weo niariri nayai.

³⁵ Kameaia mani kia doi dinari[†] boru, da wa dohonaio mano ne munu foi, mae deyo, ‘Nariria denteng, mae boyo bohong fiani wei kontai mani, yarabera yau aha ma wori, ibaitai ki.’”

³⁶ Ainanaya Yesusi deiriri fi airiri foia kiaya mani, dutania deyo, “Nano inontarai mantoru ne itoru mani, enemutituai we mandoni andino enewawu inontarai mano inontarai mamuna eboi foi ne?”

³⁷ Mantaunau Kaiwo Musai soi fo deyo, “Inontarai mano aro tutu fiata inontarai etohong fari oi foi.” Yesusi deya deyo, “Yo, roa mani bo-

hong kaririai tonanai kontai.”

Yesusi suambawa Martai tuti Mariai

³⁸ Mayeaia mani Yesusi tuti ne inontaraifosa era pari aha esobu munuefeai. Na nana mani, wiwing manei wonong fino Martai, wenoti Yesusi to ne munufoia.

³⁹ Martai ne tahatui manei wonong fino Mariai. Mariai nini minohi rurang Yesusi mae taradidau ne aunaufu.

⁴⁰ Wape Martai dohona urewa beyari na munu rorongfo. Ampafe dao Yesusia tuti medu deyo, “Daie, wiro Dai boti Mariai kahai mae, sawing yau inari fi siasi e? Bomi ma yufata yau wol!”

⁴¹ Yesusi yoa deyo, “Marta, Martai wo! Wau mani enenumameatai ampare bohona uremuwa towana, tonina.

⁴² Manamo fi wenoti yau weai ma ne mani, boyo taramu yeiriri Kaiwo Sengne. Ampafe Mariai diri siri ne bengfe ampa, neo wiro ka werui aha kaha.”

11

Yesusi deunau kariri tatus tang Sempaisi ne

(Matiusi 6:9-13, 7:7-11)

¹ Na rahida bei Yesusi dutanai weo Sempaisi na katai bei. Dutanaia kai, ne inontarai erariati fosa manei dutania deyo, “Dai Waune, bounau amea we ametutanai we Sempaisine toyario Yohanesi deunau ne inontarai erariati fosa nana.”

[†] **10:35** Doi dinari mani, doi mai we ne fiembaitai rahida bei.

² Ainanaya Yesusi dei wesa deyo, "Awao metutangna mani, metutang tonina:

'Daie,

Kadono wonomuwai
atori we mirarebanai,
Kadono nemu weM-
ananuwa da ma.

³ Bohong fiang demoyarai
we amea na rahida
neungne,

⁴tuti boiai amene sasari ame-
tohoni nei,
kariri amea kontaio
ameteiai mandoni
kontai ene sarawaio
etohonai we amea fo,
tuti dohona tua amea ame-
tohong kariri fi sofao
weanggari amea ame-
nari sasarifo fanai.'

⁵ Yesusi medu we inontarai erariati fosa ampafe ewaitawanaei ewenadi pampang, deyo, "Manei na mea, ro to nemu maniwowirifoi ne munufoi, diru rabuang mae butani boyo, 'Maniwowirife, bohongno taung botoru teai yau ma wo.

⁶ Weo nehu maniwowiri manei arahi da na waroi ma, da sobu yau na nehu munufoi, manamo yohong fiangfea watai we dang kaha.'

⁷ Wape maniwowiri mano ro oi foi, tarahio medu na munu rorongfo mandiai deyo, 'Ro ma totawa yau fanai! Ikafe rahutua tuti nehu arikangfe ametena ampa. Wiro imaya weo yoa aha kaha we yohong fieai we wau.'

⁸ Yesusi medu pari aha deyo, "Tofino ne maniwowiri di wau ki, wape miaya we

doari miai dohong fieai we wau kaha. Manamo wau butani mutu, ampafe doari miaio dohong fi butang wea fo ki.

⁹ Ampafe yei mau yeyo; Metutang weai ambori ohonai ki, mesera weai ambori mesobuai ki; meboi rahutufo ambori fai we mea ki.

¹⁰ Weo mano etutana fosa ambori ohonai wesa ki; mano esera wea fosa ambori esobuai ki; tuti mano eboi rahutu fosa ambori fai wesa ki.

¹¹ Na mea kiai mani, wawa mandoni dino ne arikangfoi dutang we diang mani, dohong tawai ne?

¹² Ete dutang we manggohei aibong, wape tamang dohong amafiyahi manei ki? Bereri!

¹³ Ampafe mea mewarami aipaya tonanai ki, wape mewaitawang metohong ne bengfo we mene arikangfosa. Nana mani Dai na Waidani ne dohonafo sewa weru mea aha. Ambori dohongno Nuaninu Mirarebana foi weo mano etutani fosa ki."

Yesusi tuti Barsebuli
(Matiusi 12:22-30;
Markusi 3:22-27)

¹⁴ Na rahida bei Yesusi data inggira manei weru weborotamu manei. Inggirafoi datoworiaia, ainanaya inontaraifoi medua nina. Kaiwasa bitoya foi pepuhung,

¹⁵ wape manea eteyo, "I mani data inggira weo sobu mambiriu na Barsebuli* fefe; inggira ene mananufoi."

* 11:15 Barsebuli mani, Saminseni wonongfeai ne.

¹⁶ Inontarai siai fe manea kontai eweanggari Yesusi, ampare etutani weo niari fiainawiaifea, ambori ewaitawang kanggunai weo Yesusi mani da na Seng Allai ma.

¹⁷ Manamo Yesusi deitawang fi enemitituaita fo. Ampafe medu wesa deyo, “Negara bei wiro weboyari kaha mae ebabausa tuti eweaiteta wawerasa, nana mani negara nani wiro da waroi ahang kaha, mae ambori wioru ki. Ampafe munu rorong bei sonanai kontai. Eweaiteta wawerasa mani munu rorong bonani wioru ki.

¹⁸ Tonanai kontai we Saminseni, masino Saminseni dapa bera mantauni mani tiabau finanai. Nana mani ambori ne mananufo nayai mutu kaha mae wioru ki. Mea kiai meteyo yata inggira weo nehu mambiriu na Barsebuli fefe.

¹⁹ Wape tonana kaha. Ampafe tonana mani na mandoni ne mambiriufomene inontarai eraria mea fosa etata nuaninu karira fosa nai ne? Na fianai aino enari nanai deinawiai we fio metinggai yau wea ne tarai kaha.

²⁰ Wape yau mani yata nuaninu karira na Allai ne mambiriune, nana mani yeinawiai weo na Yau mani, Seng Allai da ma we weMananu rahang mea ampa.

²¹ Inontarai tiapa manei, tuti ne fimamunafo masi, ambori demang wedua ne munufoi, nana mani mananapi wiro eha manana ne fianggeng minohi tutira fo

kutea kaha.

²² Wape mano tiapa sewari manei miuni awao saha tawani, nana mani ambori mano tiapa sewari foi wewu ne fimamuna deparandina fo, tuti deto tate ne fianggeng minohi tutira fo.

²³ Manei sau we yau kaha mani, weaiteta we yau, tuti manei doa tuwa yau na ifanduhi inontarai fo kaha mani, wenani niari kanggani nehu fi inari ne weo kiataterai.”

*Inggirafoi daraberahi
(Matiusi 12:43-45)*

²⁴ “Awao nuaninu kerira manei da to borai weru inontarai manei mani, da wariai funomai to katai karira sarahiai weo sera we katai niai nayai, tuti sobua kaha. Tonanaya mani deyo, ‘Yarabera yau to nehu munu arahi ira werui foi aha.’

²⁵ Tuti bo daraberahia foi mani, sobuai we inontaraifoi ne tarai toyari munuo fantamia mesi mirarebanai.

²⁶ Ainanaya daraberahi aha kia eweituo eharira sewa mantauni. Mayeai esuai to inontaraifoi awafui enayai nai. Ampafe wedaya inontaraifoi ne minohi toa fo kerira sewa reantenangfo aha.”

Mano esobu mai

²⁷ Yesusi medua kai tonanaya, mayeai wiwing manei na kaiwasa bitoya foi medu wei deyo, “Taraie, wiwing mano dawing wau tuti dohong uio wau wai, andi sobu mai ne.”

²⁸ Manamo Yesusi yoa wei deyo, “Yo! Wape mano sobu mai sewa mani, mano tarao

Seng Allai ne Kaiwone tuti dohong kaririai."

Etutang Yesusi niari fitantuma

(Matiusi 12:38-42)

²⁹ Inontaraifosa etoa wari Yesusi, mae medu mutu deyo, "Kaiwassa fuinini warang aipaya paria. Metutang we inari fitantuma ambori mewaitawanai kanggunai weo yau mani ira na Seng Allai ma. Wape wiro inari fitantuma siai fea we mea kaha, mae fainawiaio mewaitawana na nabi Yunusia fo.

³⁰ Toyario nabi Yunusi wefainawiai we inontarai na munue Niniwe, tonanai kontai Kaisung Inontarai nei ambori wefainawiai we kaiwasa fuinini ki.

³¹ Na rahida Allai kiutu kaiwo kariri nunei fo, wiwing mananuo na do wanangsai foi,[†] i ambori suwi kontai ria inontarai mano na rabuang bonini ne mea we dinggai mea kontai ki. Weo wiwing mananu nini da pari na nunei rea naya fo ma we sobu aunau mai na Mananu Salomoi mano sewai foi. Tuti na ninai, na katai nini manei fiabai sewa Mananu Salomoi ne, manamo wiro metaramioi kaha.

³² Tonanai kontai, na rahida Allai kiutu kaiwo kariri nunei fo, inontarai Niniwe fosa ambori esuwi ria mea, mano na rabuang bonini ne mea, tuti etinggai mea kontai ki. Weo

fafongfa nabi Yunusi medu wesa fo etaramioi, ampare efotou enari sasarifo tuti etaraberasa weru ene sasari-foi ampa. Wape na ninai, na katai nini manei fiabai sewa nabi Yunusi ne, manamo wiro metaramioi kaha."

Dansairai tuti mamantiti

³³ "Wiro inontarai manei kiai padamarang bei, ainanaya tebuni na babeu, ete dohoni wiatai na fata arowawahi fo kaha. Mae yuai padamarangfoi ayai sawai parai, ambori inontaraio era to munu rorongfo afui mani ewati sambewarafoi.

³⁴ Meuremiwa mani wepadamarang we mene taraiwai.[‡] Ampafe masino meuremiwa mamarampoti mani, mene taraiwai sentenang dansairai. Mae meuremiwa fayou mani, mene taraiwai memantiti kontai.

³⁵ Tonana mani metanasiau, we dohona dansairai nai na mea wa fafe fe, ampare mamantiti.

³⁶ Tofino nemu taraiwai sentenang sambewarai, mae wiro kuteai mamantiti kaha, nana mani nemu taraiwai sambewarai toyari padamara dansai wau."

Yesusi deiua inontarai eweFarisi tuti mantaunau fi Musai soifosa

(Matiusi 23:1-36; Markus 12:38-40)

³⁷ Yesusi medua kaiya, mayeaia mani Farisi manei,

[†] 11:31 I mani Mananu Seba. Ato kaririai na 1 Mananufosa 10:1-13 tuti na 1 Tawarikhi 9:1-12. [‡] 11:34 Tauremine mani kaiwo netawewai weo tanumianin-une, tuti Kristusi andi dohoni sambewarai.

wenoti weo dampi na ne munufoi. Ampafe Yesusi da wa dampi na nana.

³⁸ Farisifoi pepuhung weo deti Yesusi dampi, manamo wiro yuai warangfo kariri Yahudi ene koang kaha.

³⁹ Ampafe Yesusi medu wei deyo, "Farisine mea mani, menari koang bitoya. Ne tarai kariri mene nofi metunung naya wa tuti rewangguai metampi naya wa, meruai borieiwara mararebanai, wape na do rorong niaya werarika nendai. Ne tonanane kontai we mea, mea mesera we memai na kaiwasa euremireafo, wape menemirorongfuisi mani sifayara denteng kahai tuti meuremi fiabai we doi.

⁴⁰ Mewebonggoi! Meteitarahi Seng Allai niari do woriai wa mani niari do rorong wa konta kaha e?

⁴¹ Manamo fifuba meneng mani, metohonai we inontarai ene pari fi fosa. Nana mani mea memararebanai kiai.

⁴² Farisine mea, karirafu we mea! Weo menari fikatui na mai, wape fifuba menariri kaha. Weo mene fitantanang wetarai mehari, toyari kaung, marisani, tuti fisisasa, metohong we Sempaisi ne perpuluhanfo, mai kariri mene koangfoi. Kaung buai sura mani ohong buai bei, tonanai kontai marisani tuti fisisasa. Finana mani fuba kaha wape menari karirai. Mae fifuba sewa, toyari menemiwawu Seng Allai, tuti mehutu kaiwo na mesi, ne nanai menari kariria

kaha. Ne beng pari fo mani, metohong kariri fi fuba ninai kiai mae merurai we menari ne katuifo kontai.

⁴³ Farisine mesobu ne karira rai! Weo mea mani mesera we mewe mewonomi, toyari na munu agama Yahudi fo mani mesera we meminohi pari na kadera watai na fong pari fe fo. Kontai meteyo kaiwasa esomi we mea na kaiwasa bitoya euremireafo, toyari na kondirora.

⁴⁴ Mesobu ne karira rai! Weo mene tarai toyari kubirio ne pari munu, ampafe inontarai etataharai, tuti esera wawerahi weo rorongfuisi mani piro."

⁴⁵ Mantaunau Kaiwo Musai soi fo manei medu Yesusi deyo, "Dai Mantaunanune waune, modu tonana mani, boi kanggani amea finanai kontai!"

⁴⁶ Yesusi yoa deyo, "Yo! Mea kontai mesobu ne karira rai! Metohong kaiwo dadira tuti maraba we inontarai siai, meteyo nari wani, nari nini fanai, metemisa we esoduatai ete we etohong karirai, wape mantaung mea wiro mewaramiairai weo inontarai mano ete etohong karirai fosa kaha.

⁴⁷ Mantaunau Kaiwo Musai soi wa mea, mesobu ne karira rai! Weo menari riwang munu we nabifosa ene fafofo, mano mene werengfosa emunsa fo.

⁴⁸ Ampafe na menari tonana fo, mantaung mea metainawiai we meroasoai tuti meroao fi mene werengfosa enaria fo; weo

eaino emungno nabifosa tuti
meaino menari riwang ene
munu fafo fo.

⁴⁹ Nanai aino Seng Allai medu na ne awaifo, deyo, ‘Ambori yohong nabife manea tuti rasulio yemisa fe manea era wa; wape ambori kaiwasa emung manea, tuti enari kaggani manea ki.’

⁵⁰⁻⁵¹ Seng Allai niari tonanai, ambori mesuang nabifosa ene rika fuba tibata nano nunei tibaurai ma fo, wereantenang na Habeli, paria sobu Zakariai, mano memuni na Sempaisi ne Munufoi, amani na Rorong Mirarebana foi tuti mesbafoi ne katai ruhi fo. [§] Ampafe yei we mea mau yeo, inontarai fuinini meaino mesuang mirabafoi ne.

⁵² Mantaunau Kaiwo Musai soi ne mesobu ne karirai! Weo meaino meru Sempaisi ne kaiwo aunau fo. Manamo mantaung mea wiro metohong kariria kaha. Mae metohong wedua mano ete esera we ewaitawana fossa kontai.”

⁵³ Mayeai Yesusi da weru kataifoia mae, mantaunau Kaiwo Musai soi fossa tuti Farisifosa enumi riati, mae emadu tatofari ambori Yesusi niaya medu pampang.

⁵⁴ Ete etofa wei medu, ambori etafu kaiwo medu sarawa feai riati.

12

Kaiwoariri we inontarai

§ 11:50-51 Na Kaiwo Mamo foi, Habeli mani mano reantenang pari mireha weo niari kariri ne yoaso Allai fo, tuti Berekyai mani mano fui pari foi dine. Ato kaririai na bukuo 2 Tawarikhi 24:20-22 tuti Matiusi 23:35.

enari fayafayarai

(Matiusi 10:26-27)

¹ Kaiwasafoi piaura wesura, ewarami siayasa, awao manea etaha siau manea eawemine. Kaiwasafoi da ruhiae mae, Yesusi medu we ne inontarai erariati fossa deyo, “Metanansiau weo ragio na Farisifosa, amani enari toa fo, weo enari fayafayarao.

² Wape fiani aino etadiwara fo ambori atioai ki, tuti fiani aino etohonai we kaiwo werorong ambori taramioai ki.

³ Neo madurai na diru fo, ambori taramioai na rahida fo ki, tuti neo aimumunai na rorong kafe weduara fo ambori ahu tuturai ki.”

Matai te Seng Allai

(Matiusi 10:28-31)

⁴ “Maniwowirife mearomiao! Dohona mematai mano emung te mene taraiwai, wape wiro ebiriu we enari fieai kontai ahang kaha.

⁵ Mahikai fefe yeinawiai we mea, weo mandoni dino memataitai ne. Mematai Seng Allai. Weo i mani miung, tuti biriu weo kebioai to Soroha rorong fo. Meroasoai, weo andino mematai teri ne.

⁶ Romu sinsumiri ewering, awayansa weo doi seni boru. Tonanai mae wiro Seng Allai aroporo dewawu manei kaha.

⁷ Menumirandaungwai kiai kontai detori sentenang. Ampefe mematai fanai, weo

mea mani metadai sewa romu sinsumirinesa."

*Meroa tuti Kristusi na kaiwasa bitoya euremireafo
(Matiusi 10:32-33, 10:19-20)*

⁸ "Mearomioai ninariai; Inontarai mandoni dino yoa na kaiwasa bitoya euremireafo we daria yau mani, Kaisung Inontarai nei kontaio yoa tutiri na Seng Allai ne wewaifosa euremireafo ki.

⁹ Wape mandoni dino gefora na kaiwasa bitoya euremireafoa we daria yau kaha, yau kontaio ifaforai na Seng Allai ne wewaifosa euremireafo ki.

¹⁰ Tuti inontarai mano eteibera Kaisung Inontarai ne yau, ene sasari tonana foi Allai deiairi ki, wape eteibera Nuaninu Mirarebana foi mani, na todoni feai kontaio Allai deiai ene sasari tonana foi kaha.

¹¹ Awao eha mea to munu agama Yahudi fo weo etinggai mea nayai, nano parentafoi ete mano eru mananu fosa, nana mani dohona mearomikuai we fiani aino menari fo ete memadura fo fe.

¹² Weo fiani aino memadura fo mani, ambori Seng Allai Nuaninu Mirarebana foi deunau mea nayai na ne rahida neungfo ki."

Yesusi yiawanso kaiwo inontarai wenefi

¹³ Inontarai manei na kaiwasa bitoya foi medu we Yesusi deyo, "Mantaunaune waune, boisaharai weo nehu tafuai ambori biau aune

fianggengne dohongno eai we yau."

¹⁴ Manamo Yesusi medu wei deyo, "Mantei di yuai yau yoa rahang muru we yeto mune fianggengfe wa?"

¹⁵ Mayeai Yesusi medu we kaiwasafoi deyo, "Metanan-siau weo menemititawang fiwa, weo manei ne fianggengfoi bitoya ki, wape fianggeng nani kia mahikai wei kaha."

¹⁶ Ainanaya Yesusi deiriri fiywansoai bei deyo, "Inontarai wene kahofa manei tuti ne roweangfoi bitoya paria.

¹⁷ Ainanaya enetituaitai na enerorongfoi deyo, 'Fianai aino inari aha ne, weo nehu pari katai fiabai weo ifantang roweangnei sisuanai naya.'

¹⁸ Mayea enetituaitai aha deyo, 'Ira ma inari finina. Itota nehu munu aikahia sisuanai naya ne weo ketui, inaria fiabai aha, ambori ifantang nehu roweangnei tuti nehu aikahianei afui sisuanayai.'

¹⁹ Nana mani enehutituitaitai na enehurorongnei aha yevo, "Nehu aikahianei bitoya sisuanai we fuina wedediru, ampare iminohi, yampi, yunung, imararis-ing."

²⁰ Wape Seng Allai medu deyo, 'Wera wawerahai, boitawang fiea kaha! Diru nini mureha rai, aikahia fuba funtamia sisuanai nani we mandoni rai?'

²¹ Tonanaifa weo inontarai mano fianduhi ne aikahiafoi bitoya wei na nunei, wape

dohong kariri Sempaisi ne Kaiwone kaha foi."

*Meroaso Seng Allai
(Matiusi 6:25-34)*

²² Ainanaya Yesusi medu we mano erariati fosa deyo, "Ampafe yeikaririai we mea yeyo, dohonao mearomikuayai we meminohi toa wa fe, amani kariri fianai aino metang fo, tuti wiro mearomikuayai we mene taraiwai fanai kariri fiani aino mesansungna wa.

²³ Weo mene ansengwai mani dedai sewa fiang tuti mene taraiwai dedai sewa ansungno mesansungna fo.

²⁴ Menemitituai kariri romu raweifosa. Wiro etanang fi kahai, eteting fi kahai, tuti wiro ene munu etainunung fiang naya fea kaha. Tonanai ki wape Seng Allai meineng ene fiangfo wesa. Mea mani metadai sewa romufosa.

²⁵ Na mea kiai mandoni dino na ne arohuayai we minohi toa fo, wemambiriw yabi ne ansengfoia deuroi kuteai aha ne?

²⁶ Mebiriu weo menari fi katui tonana ne kaha mani, we fiani mearomikuayai weo fi siai fo nina?

²⁷ Mewati kariri kunumifo we ne weainarifo. Ainari nani wiro dohong fi kaha tuti sunungfi kaha, wape Seng Allai niariri mahikai. Wape yeisaharai we mea mau, Mananu Salomo kontaio ne ra bitoya tonanai, wape ansung sensungna fo kontaio wiro wea mehikai kariri ainarifo nani kaha.

²⁸ Ninoio weainaria denteng nani, rahida nini sifu wape aha mani ferami aha we nunumi. Tonanai wape Allai miani mehikai paria. Nana mani ambori Allai sensung mea kontai ki, mano meroasoai turura kaha ne mea!

²⁹ Ampafe, wiro mearomikuayai weo fi metang, tuti fi metnung wa fanai.

³⁰ Weo, fi tonanane, inontarai mano etaroanso Sempaisi kaha fo ansaino erurai esera wea ne. Wape mea mani, mene Dai na rorafaisi deitawanai ampa we fi tonana ne metohong weai paria.

³¹ Wape mesera fafong we Allai ne weMananufo, nana mani fi metohong weai nanai ambori Allai dohonai kontai ki."

*Ra na Waidani
(Matiusi 6:19-21)*

³² "Mano mefau kahai ni mea, mematai fanai! Weo Seng Allai mirarising weo dohongno moang we mea na ne Mananu rorong fo, weo meroasoa fefe.

³³ Metawayang mene fi meminohi tutira wa ambori metohong ne doiwa we inontarai ene pari fi wasa. Nana mani mene ra suanai na Waidani, ra nani mani wiro mananapi eha mananai kaha, tuti wohere dani kaha.

³⁴ Weo na doni mene rafoi wiatai naya mani, na nanai kontai menemirorongwai niayai nai."

Mangfata mano denansiau pampang
(Matiusi 24:43-44)

³⁵ “Metanansiau pampang. Ne tarai toyario mesansung tuti mene padamarawa danggararu pampang.

³⁶ Nana mani memainena toyari mangfata mano emainena etamang we ene mambaisengfoi, daraberahi na muniara mandirau foi. Mambaisengfoi daraberahi ma dutanai tuti bioi rahutufoi mani, mangfatafosa esahera efai rahutufoi wei.

³⁷ Mangfata mano etanansiau etamang wei fosa esobu mai ria mambaisengfoi. Tarai tofino, mambaisengfoi ambori demi mangfatafosa eminohi mae mantauni fitasaha aha.

³⁸ Mangfata mano etanansiau etamang fosa esobu mai weo mambaisengfoi sobusa etamang wei. Da na diru rabuang ete, rerai aha ete, wape emainenang pampang.

³⁹ Mearomi finina, masino mano ne munufoi deitawanai we diru araha ureng beiru mani mananapifo da ma we kiamanana ne fi minohi tutira fo mani, todoni kontai wiro da to boriai kaha mae deitawang weduara rai, wiro sua mananapifo suai to ne munufoi rorongfo kaha.

⁴⁰ Tonana mani mea kontai memainenang metamang pampang, we Kaisung Inontarai nei da tantuma na rahida bo waitawana kaha foi ma ki.”

Mangfata mano mesi tuti mangfata mano mesi kaha
(Matiusi 24:45-51)

⁴¹ Petrusi dutanai deyo, “Sengne wau, firiwansoawa dotu we amea ete we kaiwasa bitoya nei e?”

⁴² Sengfoi yoa deyo, “Mandoni dino wemangfata mesi tuti sewai ne? Mandoni dino wemangfata dohong kariri ne mambaisengfoi ne kaiwofo na mai, na rahida yuaisi wenunggamiai we mangfata mano wei fosa, ambori dohong fiang wesa na rahida neungfo ne?

⁴³ Denteng paria we mangfataao niari kariri ne mambaisengfoi ne kaiwofo na mai, ambori rahida mambaisengfoi daraberahi ma mani, sobu ne mangfatafoi we dohong kariri kaiwo demi wea fo.

⁴⁴ Tarai, imadurai we mea mau yeo, mambaisengfoi ambori yuaisi wenungkamiai we ne fianggeng minohi tutira fo kai ki.

⁴⁵ Wape tarahai mangfatafoi kerira tuti enetituaitai na enerorongfoi deyo, ‘Nehu mambaisengfoi niaya waroi paria wiro daraberahi ahera ma kaha rai,’ ainanaya bioi mangfata mano siai fosa, mang tutu wiwing, tuti dampi tuti dunung ria inontarai emayeru fosa.

⁴⁶ Mayeai mambaisengfoi daraberahi na rahida tuti araha ureng bo mananaioi foi, amani mangfatafoi wiro deitawana kaha foi. Ampefe mambaisengfoi ambori miuni amani ferangkahutu mangfata kerira nani tuti soari tono katai inontarai enari kariri Allai ne Kaiwo

kaha fosa ewatai nai fo.

⁴⁷ Mangfata mano deitawang mambaisengfoi ne dawiafo wape meinena kaha, tuti dohong kariri mambaisengfoi ne dohong wea fo kaha, ambori rubati fuba ki.

⁴⁸ Wape mangfata mano sera wawera mambaisengfoi ne dawiafo, mae fui aha mani dohong sarawai ampare rubati, nana mani rubati fuba kaha. Weo inontarai mandoni dino ohonafo fuba wei mani, ka riati fo fuba kontai. Tutu mandoni dino ainawaiafo fuba wei mani utang wea fo fuba kontai."

*Wiro mai kaha mae aiteta
(Matiusi 10:34-36)*

⁴⁹ Yesusi medu kaiwo netawea fo deyo, "Ira ma weo iso adiafo to nunei meu we kesoi. Denteng mani adiafoi denggararu ampa, wape bereri rai.

⁵⁰ Isodua maraba fuba bitoya ki, ne tarai toyari iwebaptisi na dadira rorong, ampare enehurorongnei iweansaraifafong pariao finani kiai ki.

⁵¹ Ampafe meteitarahio ira ma nina ika mai to nunei e? Bireri, mai kaha, mae aiteta.

⁵² Na ninai to fong mani, munu rorong bei, ewering mani, ambori etapa waweresa amani mantoru we mandu, ete mandu we mantoru.

⁵³ Eweboyari aha kaha. Tamang ambori dapa ne kaisungfoi, tutu kaisungfoi dapa tamanai ki. Inang

ambori dapa ne kamitungfoi, tuti kamitungfoi dapa inanai ki. Niongno ambori dapa urrawingfoi, tutu urrawingfoi dapa niong wiwini ki."

Aroanso fiainawiai na maring bonini

⁵⁴ Yesusi dei kontai we kaiwasa bitoya foi deyo, "Mewatio kafafe doa na do fui fo, amani meteyo, 'Ambori wemetang ki!' I wemetang kaririai.

⁵⁵ Menumiruainso wanang siayai na do wanansai foi, amani meteyo, 'Ambori maninggapoi ki.' I maninggapoi kaririai.

⁵⁶ Inontarai menari faya-faya di mea! Metafu kariri wanang, metang, maring, mewatioa na rorafaisi tuti nunei. Tonana mae, todonie, fi kawariai na rabuang bonini fo wiro mewaitawang metaroangna kaha?"

Metarabera mea weru karira metohoni fo ambori mesobu aiboi kaha

⁵⁷ "Todonie metohong kariri ne mai ne kaha?

⁵⁸ Inontarai manei ding-gai wau mani, wiro musobu mangkutu kaiwo nanisa kaharai mae na rang rabuang kontaio rurai we weboyari riati aha. Bereri mani, tarahai yabi wau to mangkutu kaiwo fosa rai. Tuti tarahai esoa wau to afai mamuna fosa tuti ea mani esoa wau to aitamu rorong fo.

⁵⁹ Tuti aromuaifa: na aitamu rorong fo watai paria

* **12:59** Ne maksuti toninai: Rahidao Sempaisi dohong aiboi we wau kaharai mae, barabera wau weru sasariwa ahera wo.

bai nemu fiwaifoi paria kiai
fino ro to borieife.”*

13

*Metarabera mea weru
mene sasariwai kaha mani,
mesobu karirafo*

¹ Na nanaifa inontarai
manea era we Yesusi meai.
Etaiririai we Yesusi karirio
inontarai Galilea maneiruo,
eha fiahung ne rika* we
etohonai we Allaifo kariri
ene koang, na Sempaisi ne
Munufoi. Manamo Pilatusi
demi ne rai mamuna fosa,
emunsa.

² Yesusi tefu aiririafoi,
medu wesa aha deyo, ‘Men-
emitituai todoni weo fi
inontarai Galilea fosa es-
obuai nanai? Mewaitarahio
inontarai Galilea emarareha
nansa, emarareha tonanane
deinawiai we ene sasari
fiabai sewa inontarai Galilea
fuba wei foini fe?’

³ Bireri kontai! Wape
mearomioaifa, weo metaraber-
ahai weru sasari metohoni
wai kaha mani, mea kiai
ambori memarareha kariri
ea tonanai ki.

⁴ Tofidoni kontai we in-
ontarai suraya indeatoruo
emarareha na Siloami,
na rahida bo menarafoi
sautawansa fo? Mewait-
arahio nana mani deinawiai
kontai weo, ewesasari sewa
inontarai siai enayai na
Yerusalem fosa re?

⁵ Bereri kontai! Yeoai nari
aha mau we metauberahai
weru sasari metohoni wai
kaha mani, mea kiai ambori
memarareha kontai kariri ea
ki.’

*Fiyiwansoai we ai
urungno webong kaha*

⁶ Mayeai Yesusi deiriri
fiywansoai nini kontai,
deyo, ‘Inontarai manei ne
ai urung rowei sifu na ne
romifoi. Rahida bei da wa
sera we aibongfoi. Manamo
boyari kontaio wirosobui
kaha.

⁷ Ampafe medu we mano
deitawang ne romi foi deyo,
‘Boti defuina botorua fininai,
ira ma isera we urung bong
na ai urungfoi, manamo bo-
yari kontai wirosobui kaha.
Ampafe robang aifoi weru-
aia. I kia fiang mahikai weru
kahofa wausinia kiai funo-
maia.’

⁸ Mano deitawang romifoi
yoa wei deyo, ‘Daie, tawini
doa defuina bonini ahang
wo. Yau ambori itara wari
kahofa doa naia fo tutu
yohong fi indoing kahofa
feai aha.

⁹ Tarahio defuina da aha
ma wani webong. Mae bireri
aha mani, yo, robani ki.’”

*Yesusi waraira fimani-
nang weru wiwing amaina
tikapa na rahida Sabati*

¹⁰ Na rahida Sabati bei
Yesusi deunau na munu
agama Yahudi bei.

¹¹ Na nanaifa wiwing
meninang amaina tikapa
manei minohi na munu
agama foi. Wiwingfoi
meninangno defuina suraiya
indeatoru kawurua, weo
fikahai dohong ririwani,
ampafe wirosobui kaha.

* 13:1 Amani, rika weo wekorbani.

¹² Na rabuang bo Yesusi deti wiwingfoi fo, medu wei deyo, "Wiwingne waune, rahida nini kontaio fimanangwai da weru wau."

¹³ Ainanaya Yesusi yuai warangfoa wasau wiwingfoi, na kutu nanai kontaio wiwingfoi dentengna, doa tirai, mayeai fiai Seng Allai.

¹⁴ Mano wenungkamieie we munu agama foi kesou paria, weo Yesusi waraira maninangfoi weru wiwingfoi na rahida Sabati fefe. Ampafe medu we wiwingfoi tutu kaiwasa na munu agama rorongfoi deyo, "Na Kaiwo Musai soi fo deyo rahida wonang Allai dohonai we tanari fi nayai, mae rahida itu, Sabati mani, tafoai fitanarifo, tafiae te Sengnei. Ampafe mera na rahida wonang nanaifa ma weo waraira mene maninangwai nayai, wiro na rahida Sabati nei fanai."

¹⁵ Sengnei yoa deyo, "Mano mewenungkamieie na munu agama ne mea, mantaunau fi Musai soi fo mea, inontarai meweFarisi tutu mano mewewafoniai na inontarai Yahudi ne mea, mea kiai mepararasa webeyari. Weo metaunau we kaiwasa bitoya wiro enari fi na rahida Sabati nei fanai. Wape mea metohong kariri mene kaiwofo kaha. Mae na rahida Sabati fo, meha mene fiahungnesa weru wore rorong etoa naya fo, metohonsa etunung mereha tutu etampi.

¹⁶ Wape na rahida bonini wiwing manei weriria na

Abrahami ma, Saminseni dohoni meninang waroi kawuru mauwa, ete ne tarai toyari tebuhi, defuina suraya indeatoru fininai. Tofino i wiro iforehu Saminseni ne amitabuhiri nani weru wiwingnei na rahida Sabati nei fanai e?"

¹⁷ Yesusi ne kaiwo medura fo dohong ne aitetafosa emamaya paria, wape inontarai fiau wei foi kiai eparaise we ewati Yesusi fitantuma niari fo.

Fiyiwanso Allai ne Mananufo kariri sawi bong
(Matiusi 13:31-32;
Markusi 4:30-32)

¹⁸ Yesusi dutang bera kaiwasa bitoya foi aha deyo, "Allai ne Mananu rorong fo mani ne tarai todoni? Na fifiani ambori iriwansoi ne?

¹⁹ Ne tarai toyari fiywansoai nini: Sawi bong bei, manei kiariao sanami na ne romifoi. Sawi kamieinei mani ketui pari sewa raung ete fitantanangno tatanami na romi rorong nei kiai. Wape sifua fiebai weai, fiabai demoya we romu enari aisangging na arirawanggo."

Fiyiwanso Allai ne Mananufo kariri ragi
(Matiusi 13:33)

²⁰ Yesusi dutang berahai nariai aha, "Allai ne Mananu rorong fo mani, na fifiani kontai iriwansoi ne?

²¹ Ne tarai toyari fi dohong tepung dautai, amani ragi. Wiwing manei sariri aweu fiahi tamu tepung bitoya, wedaya tepungfoi dautai paria

ketu loyang wiatai nai foi dereungfo."

Rahutu dedira

²² Na rang rorong Yesusi da to Yerusalem fo, da maino bendari tutu munuefo mae deunau nayai kontai.

²³ Mayeai inontarai manei dutang berahi deyo, "Tofino rabuang bo Sengnei wemananu nani fai mani, inontarai manea efau esobu mai ete bireri e?"

²⁴ Yesusi yoa deyo, "Mesera we mesuai to Allai ne Mananu rorong fo mani, merurai we mesuai na rahutu dadira fo. Weo mearomuoifa, inontarai bitoya erurai we esuai na rahutu nani manamo esobua kaha.

²⁵ Na rahida bo mano ne munu foi doaria kife rahutufoi, metoa na boriefo meboi rahutufoi mae meteyo, 'Daie, fai rahutunei we amea ambori ameri to rorong!' Manamo yoa we mea ma deyo, 'Yeroanso mea kaha. Mea mera na doni ma?'

²⁶ Ambo meroa wei aha meteyo, 'Daie, boroanso amea kawuru ampa! Weo tatampi, tatumung mereha ruhiai kawuru ampa mae, kontaio bounau kawuru na fino amene munuefe ampa.'

²⁷ Manamo mano ne munu foi medu aha deyo, 'Yeroanso mea kaha. Mea mera na doni ma? Mera kahai weru ninaifa, inontarai menari sasarine mea.'

²⁸ Na rahida bonani mewatio Abrahami, Isaki, Yakupi,

kontai nabifosa kiai eminohi efaraise na fino Allai ne Mananu rorong foi. Wape mea ambori mesodai ne karirafo tuti mesaia metamirai paria, weo Allai data mea to boriei fefe.

²⁹ Kaiwasa bitoya ambori era na katai doni kontai na rea diru foi, na rea aha foi, na do wanamba foi tuti na do wanansai foi, efanduhisa we etohong muniara na Allai ne weMananufo ki.

³⁰ Anture, inontarai maneiruo na nunei ninai ewefonia fosa ambori enai to kurumifui ki, tuti maneiruo na nunei ninai enai to kurumifui fosa ambori ewefoniai ki.[†]

Yesusi enerorong fituayai weo inontarai Yerusalem fosa weo wiro emaya wei kaha (Matiusi 23:37-39)

³¹ Na rahida bonani kontai Farisi maneiru teai era we Yesusi ma emadu wei eteyo, "Nayai na nina fanai! Ro ahera to katai bei siai, weo Mambaiseng Herodesi deyo ming wau fefe."

³² Yesusi yoa deyo, "Mera wa meteikarirai we inontarai kerira nani, yeitawang fikirira de niari we yau fo, mae rahida beiru da aha ma wanai yata fikahai kontai inari inontarai emaninang ebeng, akawuru wori, fiffiani aino ira weai we inari ne mani, inaria kai ki.

³³ Tonanai ki wape, rahida bonini kontai rahida beiru da aha ma wanai, nehu rang

[†] **13:30** Ne arti mani toninai: Inontarai reantenang etarami Sengnei ne Kaiwo fosa, amani inontarai Yahudi, wape wiro eroasoai kaha, esuai Allai ne Mananu rorong foi kaha ki. Wape inontarai etaramioai wefuiai, amani inontarai Yahudi kaha fosa, wape eroasoai, ansaino esuai to Allai ne Mananu rorong fo ki.

rorong iraoai to Yerusalem ne iraoaia mai. Weo na Yerusalem fafong nanai emung nabifosa nayai. Ampafe yauo emung yau nai konta rai.

³⁴Yerusalem! Yerusalem wo! Nabifosa kiai memunsa! Inontarai Sempaisi demisa era we mea ma fosa, meru kamieio sara emarareha. Webeiru teai mauwa yohong weai paria we ikaruhi mea kiai we yewawu mea, toyari manggohei inangfoi we tebung wedua ne arikangfosa na warapemafo suru, manamo memaya kaha tuti meteiaya yau.

³⁵ Mewati! Mene Munu Seng nei mani, Allai wiro weriria mea nai ahang kaha. Tuti yeisaharai we mea mau, na kutu ninai wiro mewati yau ahang kaha pariao memadu meteyo, ‘Moanafeai we mano ro na Sengnei wonongne wau.’”

14

Yesusi niari inontarai manei denteng na rahida Sabati

¹ Na rahida Sabati bei Yesusi da wa dampi ria Farisifo manei na ne munufoi, inontarai ne wafonia dine kontai na inontarai eweFarisi fosa. Na nanai inontaraifosa euremi nayai nai na mai kariri fifiani aino Yesusi niari fo.

² Mayeai inontarai bebara manei, fimaninangfoi dohong warang aweng wemereha na rorongfui, da we Yesusi ma.

³ Ainanaya Yesusi dutang berahai we mantaunau Kaiwo Musai soi fosa tutu Farisi eminohi nana fosa, deyo, “Na Kaiwo Musai soi we tata fo mani tofino? Na rahida Sabatinei mani, tanari inontarai emaninang we ebeng nai, ete nana fanai e?”

⁴ Mantaunau Kaiwo Musai soi fosa tutu Farisifosa emadu fiea kaha mae enemboru terai. Mayeai Yesusi sahu inontarai meninang foi ma, yuai warangfoa wasau inontarai meninang foia, waraira maninangfoi weruria, mayeai demi da wa.

⁵ Mayeai Yesusi medu we Farisifosa tutu mantaunau Kaiwo Musai soi fosa aha deyo, “Tofino we mea, manei na mea ne sapi manei saukaha kamirei wemereha bei, toyari sumuri, na rahida Sabati foi. Mano ne fiahung sawa foi minohi suati ete sikaherawa yuaisi na kutu iari nanai konta ne? Tawaitawanai weo yuaisi rai.”

⁶ Manamo wiro manei yoa we Yesusi kariri fi medura fo aha kaha.

⁷ Na nanai Yesusi deti inontarai notisa manea na munufoi mani, etiri katai mahikai sewa fo we eminohi nayai. Ampafe doni deiriri fiyiwansoai ninai wesa, deyo,

⁸ “Manei wenoti mea we muniara mandirau bei mani, dohonao mera wa mani metiri fatao mahikai sewa watai na fongfo weo meminohi naya fe. Weo tarahio mano ne muniara foi wenoti inontarai wewonong

manei kontai to muniarafoi fe.

⁹ Nana mani ambori mano ne muniaraao wenoti muru ruhiae nani, da we wau mau deyo, ‘Waune, katai nini imainenami we mano iwenoti mambani.’ Nana mani ambori mumaya paria boabari wau ro ahao munohi nano katai fui pari foi.

¹⁰ Ampafe manei wenoti mea mani, metiri katai fui pari fo we meminohi nayai, ambori mano ne munjara foi da ma deti mea mani medu we mea deyo, ‘Maniwowire, ro ma munohi na kataio mehikai nini.’ Ampafe kaiwasa esomi we mea na bitoyafoi euremireafo.

¹¹ Weo mandoni dino yuai ne tarai dedai mani ambori tewawa ki, wape mandoni dino niariri ao tewawa mani ambori dedai ki.”

¹² Mayeai Yesusi medu we Farisi mano ne munu foi deyo, “Boyo nari muniara bei wenoti inontarai we metampi, na rahida ete diru ete, wiro wenoti nemu maniwowiri ete arurawai, ete mano meminohi ruhiae ene fianggeng bitoya fosa fe. Weo nana mani ambori ea ewenoti wau kontai tonanai ki, ne tonanane bai wawerahai na finari nanaya.

¹³ Ampafe boyo nari muniara bei mani, wenoti inontaraio ene pari fi, inontaraio ene taraifo mesi kahai, inontaraio eawemi fananahang tutu inontaraio euremifafa.

¹⁴ Nana mani wobu moang rai, weo inontarai nanisa wiro ebai nemu mahikai bohonai nana kaha. Mae nemu mahikai nanai ambori

Allai biaitai ki, na rahida bo inontarai emai fosa esuwi na marareha rorong foi fo.”

Fiyiwansoai we muniara fuba

(Matiusi 22:1-10)

¹⁵ Inontarai manei dampi ruhiae kontai ria Yesusi na nana foi, tarao kaiwoariri Yesusi medura fo, ampafe medu deyo, “Inontarai mano ambori etampi ruhiae ria Seng Allaifoi na ne Mananu rorong fo, esobu mai paria!”

¹⁶ Manamo Yesusi medu we inontaraifoia deyo, “Na rahida bei, inontarai manei niari muniara fiabai bei, tutu wenoti inontarai bitoya paria we ne muniarafoi.

¹⁷ Rahida bo muniarafoi ne diru neungfo mai we nariri fo, inontaraifoi demi ne mano fiatari foi, da we mano wenotisara fosa, medu wesa deyo, ‘Mera ma, we fianggengfe mainenang ampa.’

¹⁸ Manamo mano wenotisa fosa kiai, na manei to manei eteiaio mangfatafoi. Mano reantenang foi medu we mangfatafoia deyo, ‘Yau arahio iwori nehu kahofafeai tutu ira we ye iwatiao fininai. Kosou yau fanai.’

¹⁹ Mano sua ahang foi medu deyo, ‘Arahio iwori sapi ewesura ma fininai we efata yau na nehu romifoi, tutu ira we yeo inari karirisa fininai. Ampafe kosou yau fanai.’

²⁰ Manei aha mani deyo, ‘Yau arahio irirau ninai ampafe wiro ira mau kaha rai.’

²¹ Mangfatafoi daraberahi aha deikaririai we mano ne muniarafoi, kariri fifiani aino mano wenotisa fosa emadura fo. Ampafe mano ne muniara wenotisa foi kesou paria, medu we mangfatafoi deyo, 'Ro kahairai to rang dereung, to katai ruhi na bendari fo. Ka inontarai ene pari fi, inontarai ene tarai mei kaha, inontarai euremifafa, tutu inontarai eawemi fananahang.'

²² Mangfatafoi da wa dohong kaririaia daraberahi aha ma deyo, 'Daie, nemu kaiwofe yohong kaririai kawuru ampa, manamo katai bitoya wiatai arora nendai.'

²³ Mano ne muniarafoi medu aha deyo, 'Ro nariai aha to rang baba, tutuo rang ai rorong, na bendari dereung boriai fo, boa biaing inontaraiwasa era ma ambori nehu mununei sefang na kaiwasa.

²⁴ Aromuoifa weo inontarai fuba iwenoti kawurua foi mansiri kontai wiro dang nehu fiangno muniara finini kaha.'

Manei de daria Yesusi mani, enetituai sauwarai na mai akawuru

²⁵ Ainanya Yesusi dao ne rang rorong daoa fo aha, tuti inontarai bitoya paria era ruhia riati. Yesusi daraberahi medu we ea deyo,

²⁶ "Manei de daria yau, wape enewawu inanai, tamanai, ne wiwing, ne arikang, ne tahatui, ne tafuaisa, kontai ne tarai bo

neng foi terai sewa yau mani, wiro daria yau kaha.

²⁷ Inontaraio mandoni dino miaya we sodua ne aitabafoi tuti daria yau kaha, amani wiro meineng we eteiberahi, enari kanggani, tutu emuni toyari yau kaha mani, wiro daria yau kaha.

²⁸ Ne tarai kariri finina. Inontarai manei na mea de biaung munu bei, wiro beyari nana mani niariri kaha, mae minohi deto kariri ne doi we niari munufoi nai foi akawuru wo. Tarahai ne doifo mai we niari ne munufopia kiai ete bireri e.

²⁹ Weo enefunomi niari amangfoi kawurua, wape ne doifo kaia, ampafe niari paria kiai kaha. Nana mani ambori inontarai fuba ewati fi niariri foia ambori emarari ki.

³⁰ Eteyo, 'Tofino, inontarai nini biaung munu amangnei ao wia funomai tonanaia, wape wiro wedaya we niariria kiai kaha.'

³¹ Ete, ne tarai kariri finina kontai. Mananu manei ne rai mamuna ewepiaura wering wesura (10.000), de era we emamuna we mananu siai manei. Wape mananu siai nani ne rai mamuna efau weberu sewa aha. Mananufoi wiro enefunomi kahai, minohi mae enetituai sauwarai we ne rai mamuna fosa, ewemambiri weo emamuna we ene aiteta efau sewa fosa ete bireri e?

³² Mae deitawanaifa weo ewemambiri kaha mani, ne aitetafosa enai waroi mae demi manea kawurua etutang berahai we mananu siai nani. Etutanai we fifianai

aino enetituaitaifa medurai we fio ambori mananu ne rai mamuna efau kaha foi dohong kaririai, ambori uenemirorong boyari.”

³³ Ampafe Yesusi deyo, “Tonanai kontai we mea. Manei de daria yau mani enetituai sauwarai akawuru wo. Manei wiro sawing pari fi niari fo kai, kontai aroporoha kaha mani, wiro daria yau kaha.”

Aio meuwai ahang kaha

³⁴ “Ainei mani mehikai we indawang fi nai, wape meuwai ahang kaha mani, ohoni todoni wori meuwai aha ki?

³⁵ Denteng ahang kahaia finana weo nari fifiani nai kontai aha. Ampafe kabi teri reto. Mewemetarami mani metarami saua kaiwo fino imadurai nina!”

15

Domba niai (Matiusi 18:12-14)

¹ Na rahida bei, inontarai efanduhi pajaki we Mananu Kaisarifo manea, tutu inontaraio siai bitoya kontai, era ma etaramididau Yesusi. Inontarai nansa, Yahudifosa esahusa we inontarai ene sasari fiabai disa.

² Ampafe inontarai ewe-Farisi tutu mantaunau Kaiwo Musai soi fosa ewatisa nana fo emadu waweresa paria. Eteyo, “Is! Inontarai nini minohi ria inontaraio ebeng kahai tutu dampi ruhiae ria sa.”

³ Yesusi tarao emadu tonana ne ampafe deiriri fiywansoai nini.

⁴ “Tofino na mea, manei ne domba ewepiaring, manamo manei da sarawai ampare niai, nana mani dohong todoni rai? I wiro niayai deitawang ne domba ewemansiri konta reti piaring fosa ahang kaha, mae todoni kontaio sawing ne efaufosa enayai na katai minano foi mae da sera we mansiario niai foi paria sobui.

⁵ Kontai sera wa sobui aha mani piraise paria, ampare yuasisia wia sau warabawafoi, kiari daraberahi aha.

⁶ Mayeai suhu ruhi ne maniwowirifosa tutu mano ene munu wariruhia fosa, medu wesa deyo, ‘Mera ma tafaraise weo nehu dombafi niai ampa, manamo isobui kawuru aha ma ne.’

⁷ Na Waidani kontaio tonana, inontarai sasari manei daraberahi weru ne sasari rorong foi mani, Seng Allai piraise fuba paria, piraise se-wao ewemansiri konta reti piaring mano eteyo ene pari sasari fosa.”

Yesusiyiwanso doio niai

⁸ “Ete, toyario fiywansoai nini kontai. Wiwing manei ne doi peraki* sura. Doi peraki sura nana mani we ne gajio rahida sura finanai. Mayeai bei niai. Fifiani aino niari fo? I ambori kiai padamarang bei sambewa munufoi, tutu fintang aikahia munufoi, sera wei paria sobui aha.

* **15:8** Doi peraki ninai wowong fino drakma, ne harga mai kariri inontarai yufi we rahida bei ne fiembaitafo.

⁹ Na rahida bo sobu doifoi nani, sahu ruhio ne maniwowirifosa kontai mano ene munu wariruhia fosa, medu wesa deyo, 'Mera ma tafaraise weo nehu doi niai fi isobui aha ma ne.'

¹⁰ Tonanai kontai inontarai seipaya maneи daraberahi weru ne sasari foi mani, Allai ne wewai rabuang faisi efaraaise fuba pari beyari."

Arikang niai

¹¹ Yesusi medu aha deyo, "Wawa maneи, amani ne kaisung mandu.

¹² Mano fui foi medu we tamanai deyo, 'Daie, nemu rao munohi tutirai fa, awao mureha mani auratorai mai we auru wa, rahida nini kontaio botoraifa bohong nehuwa ma.' Ainanaya tamang deto rao minohi tutira fo weberu maino ne kaisungfo suru.

¹³ We rahida beiru teai aha mani, arikang mano fui foi dewayangno nengfo we doia, mayeai dong to nu waroi. Na wanai sifai ne doifoi we dampi, dunung, piraise, niari fi mai kahai kontai.

¹⁴ Pariao rahida bo ne doifo kai foi, tete kahari fiebai pari beyari ming na kataifoi tentenang. I fo mayeai sodai ne dadirafo, dampi na mai kahai, sensung ansung mai aha kahai.

¹⁵ Ainanaya, da wa niari fi we inontarai na munuefo maneи, amani wenani demi da wa, deitawang ne fiai rabuang foi na katai fiai etoa nai foi.

¹⁶ I wewisi paria ampafe deyo dang fiai ene fietang fo

wea, weo wewisia tonanai wape wiرو maneи aroi dohong fiae dang kaha fefe.

¹⁷ Mayeai arahio urengfo tabau, we deroanso fifiani aino niaria fo, ampafe medu deyo, 'Inontarai bitoya erufi we dai fosa esobu fianang bitoya, wape yau na ninai adareti iwawisi ao imereha.

¹⁸ Rahida bonini kontaio yarabera yau ira we dai aha. Na dai arongreafo imadu wei yeyo, "Daie, yohong sasari fiebai we Seng Allai tutu wau kawurua.

¹⁹ Ampafe wiرو imai we wahu yau we nemu arikang ahang kaha. Yau ira ma weo nehu tarai toyario nemu inontaraio erufi we wau wasa."

²⁰ Ainanaya daraberahi da we tamanai aha. Tamang doa na itone munufoi, na waroi detiaoi kawurua. Tamang aroi paria deti kahutu urehuru mae mito wei, awa sobui mayeai fiauni tutu ninahi.

²¹ Arikangfoi medu we tamanai deyo, 'Daie, yohong sasari fiebai kawuru we Seng Allai tutu wau ampa. Ampafe wiرو imai we wahu yau we nemu arikang ahang kaha.'

²² Manamo tamang medu kutu ne kaiwofo, sahu inontarai erufi wei fosa deyo, 'Mesahera meha ansung mahikai sewa feai ma mesansuni nayai, araha mehikai bei we metatari na warakehanei, tutu sapatu mahikai feai we metatarai na awengne.

²³ Menari kariri ne nanai amani, meha sapi ne arikangno biriayai manei, ama memuni. Rahida bonini kontaio tatohong muniara fuba, tatampi tafaraise.

²⁴ Weo nehu arikangnei mireha ampa, manamo suwi nari aha ma ninai, i niai ampa manamo isobui nari aha.' Mayeai ea etohong muniarafoi.

²⁵ Wape arikang mano fuba foi mani niai nano romi. Mayeai ramindena ampare daraberahi to munufo aha, da pariao kefang munufoi, tara to munufoia mani, tarapao musiki dotu fo tutu kaiwasa mikai foi eraomifufoi.

²⁶ Ainanaya sahu tamang ne mangfatafosa manei ma dutang berahi deyo, 'Fifiani dino menariri na munufoi wana?'

²⁷ Mangfatafoi medu wei deyo, 'Nemu tahatuinei daraberahi aha ma ne. Ampafe tamamuo anta demi amea amemung sapi antung biriayai manei, we tatohong muniara fuba, weo sobu antungfoi daraberahi na mai aha ma fefe.'

²⁸ Arikang mano fuba foi tarao kaiwofo nana ne kesou paria, ampare miaya we suai munufoi kaha. Mayeai tamang taraoi we doa na boriafo, ampare dari ariei we-woriri ambori da to rorong.

²⁹ Manamo kesou medu we tamanai deyo, 'Bo! Rahida neungne iminohi ria wau na defuina to defuina, irufi ao imereha we wau, modu kaiwofea mani yohong kaririai.

Manamo fifiani aino bohonai we yau ne? Kambingne arora ki, wape wiwo bohong sobu manei we inari muniara ria nehu maniwowiri sa kaha.

³⁰ Antumu mesi kahai nani dewayang fi munohi tutura wa we doi, kia doi nani dong to katai doboriai fo niai nayai, na wanai mei doifo na wiwing diru paria kai, mayeai daraberahi ma, wape wau mungno sapi antung fiebai biriayai weo bohong muniara fuba wei!

³¹ Manamo tamang medu wei aha deyo, 'Kaisungne waune, wau munohi pampang ria yau na ninai. Fifiani aino nehu ne nemu fi fine kontai.

³² Wape nina mani nemu tahatuinei toyari mireha ampa, manamo suwi nariai aha ma ne. I niai ampa, manamo tasobui nari aha ma ninai, ampare todoni kontaio tatohong muniara taparaise.'

16

Fiyiwansoai kariri mangfatao sewai

¹ Yesusi medu we ne inontarai erariati fosa deyo, "Inontarai ne ra bitoya manei, ne mangfata manei, yuaisi we deitawang ne rafoi, yurai tuturi sera weo ne faufo kontai aha. Manamo na rahida bei inontarai ne ra bitoya foi sobu kaiwoariri weo mangfatafoi sifai ne rafoi.

² Ampafe sahu ne mangfatafoi ma, mayeai dutang berahi deyo, 'Tarahuoai weo wiwo nari sua nehu ranei na mai kaha, mae wufai funomi.

Rahida nini kontaio bohonai we yau fi woi kariri nehu ranei we bohoni toa ne, kontaio fotourai weru boitawang nehu ranei.'

³ Ampafe mangfata deitawang ne rafoi enetituaitai, 'Fiani aino inari na kutu ninaifa ne? Weo mano ifatai foi deiai yau weru fi yoasaoio yau we inari ne fefe. Inari romi nehu mambiriufea kaha, ira yedo weo fi na rang dereung imamaya.'

⁴ Mayeai enetituai obu mano eha fi riati fosa manamo wiro ebaita kaharai. Ampafe medu deyo, 'O! Enehutituai rang bei, ambori ifotourai weru fi inari ne mani, nehu maniwowiri bitoya, kontaio emirising we iminohi ria ea, na ene munufo.'

⁵ Ampafe mangfatafoi sahu mano ehao inontarai ne ra bitoya foi ne rafo, manamo ebaita kaharai fosa. Sahusa wemansiawarai ma dutang berasa. Medu we mano reantenang foi deyo, 'Nemu fi baita kaharai beiru we mano ifatai foi?'

⁶ Inontaraifoi yoa deyo, 'Maning ora babeu piaring (100).' Mangfatafoi dohongno surati fi baita kaha foini we inontaraifoi aha, medu wei, deyo, 'Munohi na nanaifa, wukahera woi riwangno fiwoi we maning ora babeu piaring na surati nani faini wa, weo babeu piarua sura (50).'

⁷ Mayeai medu we inontaraifoi mano sua aha foi deyo, 'Wau nemu fi baita kaharai beiru?' Inontaraifoi yoa wei

deyo, 'Patibu karung piaura wering (1.000).' Mangfatafoi dohongno surati fi baita kaha foini we inontaraifoi aha, medu wei, deyo, 'Nemu surati kariri fi baita kaha wai dinini. Woi riwangno fiwoi we patibu karungno piaura wering na surati nani, riwani we karung piaura wera (800).'

⁸ Mano ne ra bitoya foi tarao kariri finiarifo, ampafe fiai ne mangfatafoi weo ne enetituaitafo, weo i sewai paria, we sera we rang weo ne maifo, na rahida bo fioairai weru fi yu fong fo. Weo inontarai eroaso Allai kaha nesa, esera we ra na nunei mani esawai paria, sewao inontarai eroasoa fosa, na esera weo rao Sempaisine.'

⁹ Mayeai Yesusi medu aha deyo, "Metarami ma! Fianggengno Sengnei dohoni we mea na nu finini, menari suari na mai we mefata inontarai siai nai, karirio Seng Allai dawiafo. Ambori rahida bo mansuwi-suwi foi mani, fianggeng nunei kiai niae, wape mea mesobu mai na Waidani.

¹⁰ Inontarai manei niari fi katui fo na mai mani, ambori yuaisi we niari fi fuba fo ki. Wape inontaraio niari fi katui fo na mai kaha mani, wiro yuaisi we niari fi fuba fo kahai kontai.

¹¹ Ampafe na ra nunei wiro inontarai eroaso mea weo menari suari na mai kaha mani, mantei dino de yoaso rao tarai na Sengnei we mea ne?

¹² Kontaio manei siai ne fieaifa, yoasoao mea we menari sua neng, manamo wiro menari suarai na mai kaha, nana mani Allai wiro dohong fieai we menari suarai ahang kaha.

¹³ Wiro inontarai manei wewoming we mananu mandu kaha. Weo nana mani ambori enewawu manei mae enerireu mano wei foi ki. Ete niari kariri manei ne kaiwofo mae kiobu tarang we mano wei foi nengfo ki. Tonanai kontaifa we mea, wiro mewewoming we Seng Allai tuti mewewomong we doi ruhia kaha.”

Kaiwoariri Yesusi medurai

¹⁴ Farisifosa etaramio fifiani aino Yesusi yiwansoaia fo. Manamo emarari Yesusi ne kaiwofo, weo inontarai euremi fiebai we doi disafe.

¹⁵ Ainanaya Yesusi medu wesa deyo, “Mea mani inontarai merurai paria, ambori kaiwasafai ewati fi menari wa tutu enemituuai weai, eteyo mea mani inontaraio metohong karirio Sengnei ne Kaiwo na mai di mea. Wape Allai deitawang menemiroongwai. Weo fifiani aino inontarai nuneisa esahuai we fi dedai tutu esomi weai fa, Allai eneo a kaha tutu sahuai we fi mai kaha.

¹⁶ Hukumi Musai soi fo tutu kaiwo nabifosa emadura fo mani, wemambiriu pampang paria sobu rabuang bo Yohanesi deunau fo. Mae na nanai to fong ma mani, Kaiwo Mahikai kariri todoni Allai weMananu na demi Mananu Mampariri nei ma

fo aino airirai pampang ne. Kontai kaiwasa bitoya erurai we Sengnei yuaisa we ambori eminohi na Sempaisi ne Mananu rorong fo ki.

¹⁷ Wape Seng Allai ne Kaiwo Musai soi fo tutu nabifo emadura fo wemambiriu wefitawafa, wiro hurupi kutu bei kontai oiayari kaha.

¹⁸ Ampafe mandoni dino dira binengfoi tuti dau wiwing manei siai aha mani, wenani niari sasari, amani sasario dena ria wiwing siai fo. Tuti mandoni dino dau wiwing anta ne mangfoi dirari nani aha mani i kontai niari sasario dena ria wiwing siai fo.”

Inontarai ne ra fiebai tutu Lazarusi inontarai ne pari fi

¹⁹ “Inontarai ne ra bitoya manei, sensuni na ansungno ne harga dedai paria, tutu rahida neungne dampi na mai kontai, wiro sobu dadi-rafea kaha.

²⁰ Na rahutu borong da nai to ne munu rorong foi afuifo, inontarai ne obu fiea kaha manei minohi fefiei derewawa, dedo we fiang nayai, wonong fino Lazarusi. Inontarai nani kahai bosibosi suang wari ne taraifoi sentenang, ampafe ne mambiriu feai ahang kaha.

²¹ Ifo, minohi na rahutu borongfo finanaia, we demang we tarahio inontarai ne ra bitoya foi dang ta fieai fa ete nukahaifea tarirawai aweu, etiri to borie ariei mani ambori yuru dang. Inontarai nani faini kontaio, fiawerafosa era erare kahai

fuba suang na ne taraifoi nani.

²² Waroi kahai mae inontarai ne obu fiae kaha foi mireha, mayeai wewaifosa eha ne nuaninufoi to katai mei, awa minohi na fata dedai rurang Abrahami. Inontarai ne ra bitoya foi kontaio mayea mani mireha kontai aha, ne inontarai esarai enari suari na mai.

²³ Wape na Soroha rorong fo sodai ne dadirafo paria. Na katai nani floai ureng deti to yai awiai mani, detio Abrahami na katai waroi, kontai deti Lazarusi we minohi rurang Abrahami.

²⁴ Inontarai ne ra bitoya foi sahu we Abrahami deyo, ‘Dai Abrahame! Aromuo yau kite! Bomi Lazarusi yorang warakehawai na merehafeai, kia da ma ao wawasao rahukanangnei wo. Weo isodai ne dadira ne pari beyari na adia rorong nei fefe.’

²⁵ Wape Abrahami yoa wei deyo, ‘Nehu kaisungwa wau, aromuoifa, weo raminde munohi barang na nuwausi mani wobu ne bengfo paria. Wape Lazarusi sobu ne karirafo paria. Ampafe na ninaifa mani, i piraise we sobu mai na katai nini, tutu wau wobu ne karirawa na nanai.

²⁶ Kontaio katai nai nai wai tutu katai amenai nai nei, kenataterao fiebai berorong paria, kiutu tata. Ambori wiro amea na ninai amera mau kahai, tutu mea na nanai wiro mera ma kahai.’

²⁷ Inontarai ne ra fiebai foi medu we Abrahami aha

deyo, ‘Daie, tonana mani yutang wau na mai mau weo, bemi Lazarusi da to dai ne munufoinia.

²⁸ Weo nehu tahatui ewering eminohi na dai ne munufi fo. Bomi Lazarusi dei kaririai wesa ambori ea kontaio wiro esobu katai kerira isobui nini konta fanai.’

²⁹ Abrahami yoa wei deyo, ‘Ea ene Kaiwo Musai soi fo tutu kaiwo nabifo esoi fo ampa. Ampafe etohong kariri te fifiani aino deinawiai tutu deunau kaririaia fo.’

³⁰ Manamo inontarai ne ra fiebai foi yoa we Abrahami aha deyo, ‘Dai Abrahame! Kaiwo nanai tera mani demoyara kaha, wape inontarai mireha manei suwi na marareha rorong foi, da wa medu wesa mani, ambori etaraberasa weru sasari rorong etohoni foi ki.’

³¹ Wape Abrahami medu aha deyo, ‘Ea emaya we etarami Kaiwo Musai soi fo tutu nabifosa emadura fong kaha, tutu etohong kariria kaha mani, manei suwi na mararehafoi da wa medu wesa kontaio eroasoa kahai kontai ki.’

17

Yesusi deunau kariri mano wedaya inontarai niari sasari sobu fiani

¹ Yesusi medu we ne inontarai erariati fosa deyo, ‘Na nunei mani fi bitoya wedaya inontarai we enari sasari. Wape inontarai manei wedayarao inontarai siai enari sasari nani fai mani, ambori sobu ne karirafo rai.’

² Inontarai mano wedaya inontarai siai enari sasari

mani, ne mahikai sewa we wenani mani, kase kamiei fuba bei na rahanganfo tuti kabioi deisui na rawangan-grausi. Weo inontaraifoi ambori sobu aiboi maraba fuba sewari aha ria Seng Allai.

³ Ampafe metanansiau!

Mane nemu doroi manei dohong sasari mani, mesua wenani. Detua wawerahi we sasari dohonia nani mani, mefariri ne sasarifoi.

⁴ Manei dohong sarafieai fa we mea pampang, toyari na rahida bei we beitu, wape wenani da mauo mea deiai ne sasari dohoni we mea nani, deyo, 'Yetua we sasari yohonia fo', mea kontaio mefariri ne sasarifoni.'

Yesusi deyo tarahai taroa-soaine katui, mae wedaya tanari fifuba ki

⁵ Rasuli ewesuraya mandu fosa, emadu we Seng Yesusi, eteyo, "Sengne waune, bo-hong amea ameroasoia mutu, ambori amea kontai amenari fi toyari wau nari wa."

⁶ Sengnei yoa wesa deyo, "Sawi bongnei mani ketui paria, wape mene meroa-soawa fuba kariri sawi bong nani mani, mea kontai ambori menari fitantuma ki, toyario meteia ai rowei tifating tutu newa, awarauo doa na rawangangrau, ai nani tifating kaririai."

Fio mano ewewoming enari

⁷ Yesusi medu we ne inontaraifosa aha, deyo, "Na mea manei ne woming

manei. I da wa niai na romi ete deitawangno fiahung na kafa paria ramindena. Wyomingfoi daraberahi to munufo aha ma mani, mano ne womingfoi wiro medu wei deyo, 'Fotou finariwa, munohi, bampi.'

⁸ Wape medu wei deyo, 'Tata ansung mararebana feai, moinenang nehu fiyangwa tutu fata yau mae yampi paria kai wo. Ainanaya finariwa kai wori, bampi ki.'

⁹ Wyomingfoi niari kariri fifianai aino ne mano we-womming wei foi medura fo. Wape wiro fiai womingfoi kaha, weo inontarai yufi wei dine terai.

¹⁰ Tonanai kontai we mea. Metohong kariri fifianai aino Seng Allai medurai we meara wa mani, memadu meteyo, 'Manta ametohong kariri fifianai aino Sengnei demi amea amenari fo.'

Yesusi waraira ewesurao emaninang kusta

¹¹ Na Yesusi ne rang rorong da to Yerusalemifo, Yesusi da wa sobu katai rabuang na nu Samaria tutu nu Galilea.

¹² Da wa de suai munuefeai na nana fo mani, inontarai ewesura emaninang kusta fo, era we Yesusi ma. Etoari na waroi

¹³ esahu we Yesusi eteyo, "Dai Yesuse, aromuo amea to!"

¹⁴ Na kutu siario Yesusi detisa nana fo medu wesa deyo, "Mera wa meteinawi mene taraiwai we imamifosa, tutu metutansa ewati kariri mene

taraiwai.”* Na rang rorong era we imamifosa foi, ea kiai ene fimaninangfoi niai werusa.

¹⁵ Inontarai mansiri na ewesura nanisa, deti bera ne taraifoi deitawanai we fimaninangfoi niai weruri am-pafe dentengna. Ainanaya daraberahi we Yesusi aha, piraise fiai Seng Allai.

¹⁶ Na Yesusi arongreafo disang kapa awebuka, do-hong mahikai wei. Inontarai nani fai mani, inontarai Samaria dine, wiro Yahudi kaha.

¹⁷ Mayeai Yesusi medu deyo, “Tofino! Yeitarahi anta inontarai ewesura inarisa ebeng mae? Ewemansiri konta reti sura fe saidoni ampa?

¹⁸ Todoni fino inontarai Yahudi kaha nini faini, andino daraberahi terai aha ma deparanding Seng Allai ninai?”

¹⁹ Ainanaya medu we inontaraifoi deyo, “Boabari wau, roa. Weo roaso yau ampare bonteng ninai.”

Rabuang bo Allai da ma we wemananu

(Matiusi 24:23-28, 36-41)

²⁰ Inontarai eweFarisi maneiru teai etutang bera Yesusi eteyo, “Kidoni wori Allai da ma we wemananu we tata ki?” Yesusi yoa wesa deyo, “Rabuang bo Allai da ma we wemananu mani, wiro waitawanai na fiainawiaio atioai na nunei ete na rorafaisi kaha.

²¹ Ampafe wiro inontarai ambori emadu eteyo, ‘Mera

ma mewati andinini!’ ete ‘Andiwani!’ Weo Seng Al-lai wemananu rahang mea kawuru ampa.”

²² Ainanaya Yesusi medu we mano erariati fosa deyo, “Ambori na rabuang bo da aha ma wani, merurai paria we mewati Kaisung Inontarai nei niai woru mea, na rahida boyari kontai ki, manamo mesobua kaha.

²³ Ambori inontarai emadu we mea ki eteyo, ‘Mewatia niai na wanai,’ ete ‘Mewati ma niai na ninai!’ Wape dohonao meroasoifa mera mesera wei fe.

²⁴ Weo Kaisung Inontarai nei ne rahida arera fo mai we da aha ma mani, ne tarai toyario kaiwewao keiwewari na rorafaisi, sambewarai na rearei paria sobu rearei.

²⁵ Wape reantenangfo mani, sodai ne karirafo bitoya paria, tutu inontarai na rabuang bonini eteiayari ki.

²⁶ Rabuang bo Kaisung Inontarai nei da aha ma weo wemananu foi mani, ne tarai kariri na rabuang bo Noaki na fafong nanaia fo.

²⁷ Amani rahida neungne inontarai etampi, etunung, erirau, paria sobu rahida bo Noaki suai to ne wa fiabai rorong fo, foa fubaterehai dautai sufui nunei kontai inontaraifoi mirareha webuai kiai beyari.

²⁸ Kontai kariri rabuang bo Loti fa. Inontarai etampi, etunung, etawayang ewori fi, enari romi, enari munu.

* **17:14** Na Yahudifosa ene koang, imamifosa terai ansai eteisaharai we inontarai wedenteng ampa.

²⁹ Wape rahida bo Loti da weru munue Sodomi fo mani, na kutu siari nanai kontaio adia tutu kamieie adia bia na rorafaisi meu, kaso bendarifoia wioru tutu inontaraifosa ehai beyari.

³⁰ Ne tarai tonanai fa konta rai na rahida bo Kaisung Inontarai nei kiawariai aha ma fo.

³¹ Toyarine, kaiwasanei esobu karira tantuma rai. Ampafe na rahida bonani inontarai manei minohi na ne munu refongfo mani, dohonao da wafui we kia ne fianggengfo na munu rorongfo fe, wape mito weru katai nani. Manei niayai na romifoi, dohonao daraberahi we ne fianggengfo to ne munufoi fe, wape mito weru katai nani.

³² Mearomio fifianai aino Loti binengfoi sodairaia fo, [weo enerorong dohong we ne munu tutu ne kataifoi weo ne maifo nai naya finanai. Ampafe deti berahai we kataifoinia, ainanaya wekamiei doaria].

³³ Mandoni dino derara mantauni ne ansengfoi sewa weru daria yau fo mani ambori ne ansengfoi wioru ki, mae mandoni dino na nufi ninai enewawu yau awao wonohune wedaya tarahi mireha kontai ki, i ambori sobu numainufo ki.

³⁴ Meroasoaifa! Na diru bonani, inontarai mandu uwa na fata bei mani, Sengnei yuai manei mae manei wiatai.

³⁵ Wiwing mandu utara ruhiae na anawahi bei, kia manei mae manei bireri.

³⁶ Mang mandu unai na romi, kia manei, manei bireri."

³⁷ Mano eraria Yesusi fosa eberahi aha eteyo, "Sengne waune, finanai dariai na doni rai?" Yesusi yoa wesa deyo, "Fi mireha piro fei wiatai na doni mani, atio korowei esifo etari katai nani. [Toyari nanai kontai, rahida ira nai aha ma foi mani, ati pari ki, wiro yediwa yau kaha.]"

18

Yesusi deiriri fiywanso wiwina tutu wekiutu kaiwoariri ampafe ne inontaraifosa ewaitawanai ewenadi pam-pang

¹ Mayeai Yesusi deiriri fiywansoai nini we deunauo ne inontarai erariati fosa, ambori etutang Sempaisi we fiea mani enemitanwanai, tarahi etutanai waroia manamo esobua kaharai, nana mani dohonao ewarami mururang ahera fe.

² Yesusi deyo, "Na bendari bei, inontarai manei eruaisi we andino kiutu kaiwo ne. Inontarai nani fai mani wiro mitai Seng Allai kahai, tutu i mani wiro tarao inontarai siai kaha kontai.

³ Na nanai wiwina manei sodai kaiwoaririfeai. Ampafe wiwinafoi deikaririai we mano kiutu kaiwoariri foi, weo medu kariri neng, manamo wiro dohong kaririai ahera kaha. Ampafe wiwinafoi da weduari pam-pang, medu wei deyo, 'Fata yau, modu we mano weaiteta we yau foi.'

⁴ We beiru teaia, manamo mano kiutu kaiwo foi miaya we dohong kariri fi wiwinafoi deyoa fong kaha. Wape mayeai enetituaitai deyo, 'Yau wiro imatai Sengnei kahai tutu wiro tarahuo sobu manei ahang kahai.

⁵ Manamo wiwinanei da wedua yau pampang we ne kaiwofo, ampare ne mahikai mani yohong kariri fifianai aino deyoa foa. Bireri ki mae ambori da tetawa yau pampang, dohong yaua isera wawera yohong toai ki.'

⁶ Ainanaya Sengnei deyo, "Menemituui we kaiwo mano kiutu kaiwoariri mesi kaha fi medura fo.

⁷ I wiro inontarai mesi kaha dine, wape niari ne bengfo we wiwinafoi. Nana mani Seng Allai ne mahikaifo sewari aha. I ambori fiata ne inontarai esodai ne dadi-rafo tutu etutani pampang kameai ramindena weo fi esodairai nana fo ki.

⁸ Meroasoifa! Allai ambori sikahera fiata ne inontaraifosa weru ne karirafo ki. Wape Kaisung Inontarai nei daraberahi to nunei aha ma mani, sobu inontarai eroasoa fea rai ete bireri e?"

Fiyiwansoai kariri Farisi tutu mano fianduhi pajaki we mananu Kaisari foi

⁹ Yesusi deiriri fiywansoai nini aha, deiriri fo mani reng we mano esahu inontarai siai we emai kaha, mae ene tarai bo eneng foi di mei sewa fo.

¹⁰ Yesusi deyo, "Na rahida bei, inontarai mandu ura taterai to Sempaisi ne Munufoi we uwenadi nai. Inontarai

nani suru mani, Farisi manei tutu inontarai fianduhi pajaki we Mananu Kaisari foi manei.

¹¹ Na Sempaisi ne Munufoi rorong fo, Farisifoi doa futuayai siai na fong pari fo, mae wenadi deyo, 'Seng Allae yohong mahikaifeai we wau, weo yau wiro nehu tarai kariri inontarai siaio esera we ene ra bitoya fosa kaha, etatofa biriu, ete emaninawa fosa kaha. Yohong mahikai kontai we nehu tarai kariri mano fianduhi pajaki we Mananu Kaisari foi wani kaha.

¹² Yau weminggu bei mani, iwepuasa weberu, tutu yohong fi isobuai feai na fi inari wau, we wau.'

¹³ Wape mano fianduhi pajaki we Mananu Kaisari foi mani, doari waroi na munu warabuka refui fo, waratawang arongfo tutu ureng toungh ambori medu we Seng Allai deyo, 'Seng Allae aromuo yau inontarai sasari karira nini yau.' "

¹⁴ Yesusi deyo, "Yeisaharai we mea mau, inontarai nani suru uwenadi kai mani, inontarai fianduhi pajaki we Mananu Kaisari foi, andino Allai detori we beng riati aha ne, wiro Farisifoi kaha. Weo mandoni kontaio yuai ne taraifoia weinontarai dedai mani, Allai ambori niariria tewawa ki, tuti mandoni dino niariria enerorong tewawa mani, ambori Allai yuasisia dedai ki."

*Yesusi mioang arikang
(Matiusi 19:13-15;*

Markusi 10:13-16)

¹⁵ Yesusi doa deunau kaiwasa bitoya foi mae, inontarai manea eha ene arikang marareha manea, ehasa ma weo ete ambori Yesusi yuai warang wasausa tutu mioansa. Yesusi ne inontaraifosa ewati arikangfosa nana fo, ehasou ene wawafosa tuti esuasa.

¹⁶ Manamo Yesusi sahu arikangfosa ma, mayeai medu we ne inontarai erariati fosa deyo, "Metawing arikangwasa era we yau ma, dohonao meteiwedua fe, weo inontarai toyari arikangfesa nini saino esuai to Allai ne Mananu rorong fo ne."

¹⁷ Tarai, imadu we mea mau yeyo, inontaraio wiro yoasoai tuti niari enerorongfoia tewawa kariri arikang kaha mani, wiro suai to Seng Allai ne Mananu rorong fo kaha ki."

Yesusi deunau kariri inontarai ne ra bitoya tuti Allai ne Mananu rorong fo

(*Matiusi 19:16-30; Markusi 10:17-31*)

¹⁸ Inontarai wenungkamie i we inontarai Yahudi fosa manei, ne ra bitoya, i dutang bera Yesusi, deyo, "Mantau nau bontengne waune, fianai aino inari we ambori isobu numainufo ne?"

¹⁹ Yesusi yoa deyo, "We fiani e wahu yau we yenteng ninai? Wiro manei denteng kahai, mae Allai meiri kawuru.

²⁰ Allai ne Hukumio dohonai we tatohong kariria fo boitawanai ampa, amani:

'Wiro bena ria wiwing siai fanai,
mung inontarai fanai,
wiro komananapi fanai,
binggai inontarai na kaiwo wetarai kaha fo fanai,

womi we nemu dai tuti nemu ai.*"

²¹ Inontaraifoi yoa wei deyo, "Kaiwoariri fuba nani yohong kariri kawuru na iwebariboaifa ampa."

²² Yesusi tarao inontarai ne ra bitoya foi medu tonana ne, ampare medu wei aha deyo, "Sea fi beyari bohong kariria kaharai, bowayang nemu ra munohi tutira wara kai, tuti doiwa bohonai we inontarai ene pari fi fosa, nanaia mani wobu ra na Waidania finanai. Tuti nari tonanaia mani ro ma ro ria yau."

²³ Manamo inontaraifoi tarao kaiwo Yesusi medurai wei fo, enerorongfoi fituayai webeyari, weo ne rafol bitoya fefe.

²⁴ Yesusi deitawanai we inontaraifoi enerorong dohong we ne rafol karerai, ampare medu deyo, "Mawa kahai we inontarai ene ra bitoya nesa esuai to Seng Allai ne Mananu rorong fo."

²⁵ Weo mawa sewa we unta manei suai kaha aniai kamirei bei weru inontarai ne ra bitoya manei suai to Allai ne Mananu rorongfe fo."

* **18:20** Keluaran 20:12-16; Ulangan 5:16-20

²⁶ Inontarai etaramioai we Yesusi medu tonana fo, etutang berahi aha eteyo, “Tonana mani, mandoni dino mesi we sobu faririfo ne?”

²⁷ Yesusi yoa deyo, “Fifianai aino inontaraine ene mambiriufea we enari kaha fo, wape we Allai mani finanai mawa arora.”

²⁸ Ainanaya Petrusi medu wei deyo, “Daie, boti amene munu rorong fo kontaio ametawinaifa tuti ameraria wau!”

²⁹ Yesusi deyo, “Tarai, imadurai we mea mau yeyo, inontarai mandoni da weru ne munufoi, ete ne wiwing ne arikang, ne tahatui ne tafuai, ete ne wawafo suru, ambori yufi we Allai ne Mananu rorong fo, toyari mea ninai,

³⁰ inontarai nanisa ambori sobu fi sobuai ria Allai fo fuba pari sewa aha weru ne sobuai na nuneifo ki, tuti sobu numainufo.”

Webetoru Yesusi medu kariri ne mararehafo

(Matiusi 20:17-19;
Markusi 10:32-34)

³¹ Yesusi fianduhi ne inontarai ewesuraya mandu fosa siai, mayeai medu wesa deyo, “Metarami ma. Nina mani, tara to Yerusalem ayai finina. Na wanai fi fuba nabifosa esoi kaririai we Kaisung Inontarai nei, ambori sodairai ki.

³² I ambori manei dewayani we inontarai etaroangno Allai kaha fosa, ambori eteiberahi, enemirireuwi, tutu ehandioi.

³³ Ambori erarubati na wai, tuti emuni mireha.

Wape rahida bo botoru foi mani, ambori suwi aha ki.”

³⁴ Fifianai aino Yesusi medura fo ne inontarai ewesuraya mandu fosa, ewaitawang sobu kutea kahaia. Kaiwo neung fo medu baurai wesa kaha. Ampafe esera wawera kaiwo medu wea fo.

Yesusi niari inontarai urengfafa manei deti
(Matiusi 20:29-34;
Markusi 10:46-52)

³⁵ Rabuang bo Yesusi tutu ne inontaraifosa era wa rerai we bendari Yeriho foi mani, inontarai urengfafa manei minohi dedo we fi na rang dereung fo.

³⁶ Inontaraifoi tarao kaiwasa bitoya era ria Yesusi fosa etohong kataifoi niukuayai paria, ampafe dutang berahai deyo, “Fieato, donio kataifi niukuayai karerai nina?”

³⁷ Inontarai na nana fosa emadu wei eteyo, “O, Yesusi inontarai Nazareti foi da na ninai ma.”

³⁸ Ainanaya weurengfafafoi sahu deyo, “Yesuse! Dauti ne Kaisungwa waune, aromuo yau!”

³⁹ Inontarai era fonia fosa ehasouwi tutu etemi nemboru. Manamo tentumasa kaha mae sahu fo mambiri aha, deyo, “Dauti ne Kaisungwa waune, aromuo yau!”

⁴⁰ Yesusi taraoai nanai doa ukai, tutu demi inontarai maneitoru itobing weurengfafafoi weia. Da wa kefangna, Yesusi dutang berahai deyo,

⁴¹ “Fianai aino boyo inari we wau ne?” Inontarai urengfafa foi yoa wei deyo, “Daie! Yeyo iwati.”

⁴² Yesusi medu wei aha deyo, “Yo, tonana mani, boti to! Nemu roaso yau wa wedaya bonteng ampa.”

⁴³ Na tatofang kutu nanai kontaio urengfo tabau deti. Ainanaya da ria Yesusi tutu deparanding Seng Allai. Inontarai bitoya na nana fosa ewati fi Yesusi niari we mano urengfafa foi nana ne, ea kiai efiai Allai.

19

Yesusi tutu Zakeusi

¹ Yesusi da wafui bendari Yeriho foi, de da pari ria bendarifoi pari to Yerusalem.

² Na bendari nani mani, inontaraio wenungkamiee we mano efanduhi pajaki we Mananu Kaisari foi fosa, wonong fino Zakeusi. I mani, inontarai ne ra bitoya dine.

³ I dohong we deti inontaraio esahu we Yesusi foi, manamo kaiwasa bitoya etoa weduari, kontai i inontarai tewawa dine.

⁴ Ampafe mito foni kaiwasa bitoya foi, awa dautai na ai rowei na rang dereung fo we deti Yesusi, we katu mani da na nanaifa ma.

⁵ Mayeai Yesusi da wa sobu katai nani, deti ayaioi tuti medu wei deyo, “Zakeuse, bia kahairai! Weo rahida nini kontaio ye ira to nemu munuwaini mau.”

⁶ Zakeusi tarao kaiwo fenna fo, toyario turu pari wei na ai raingfo meu fe, tutu piraise paria we sobu Yesusi.

⁷ Inontarai fuba ewatioai we Yesusi minohi ria Zakeusi na ne munufo, ampafe euremitaterai paria, emadu wawerasa, eteyo, “Is! I da wa minohi ria inontarai kerira.”

⁸ Mayeai Zakeusi, na ne munufoi, doaria medu we Yesusi deyo, “Sengne waune, nehu ra iminohi tuturaifa ne, ambori yohong dowej we mano ene pari fi fosa, tutu inontarai itofasa ika ene doifeai kawurua mani, ambori ibai webea wesa aha.”

⁹ Ainanaya Yesusi deyo, “Abrahami ne riria di wau. Weo fi anta moduraia nana mani, na rahida bonini kontaio wau tutu nemu munu rorong ne, mesobu ne maifo ria Allai.

¹⁰ Weo Kaisung Inontarai nei da ma weo sera we inontarai eraiworuai na sasari rorong fosa tutu feririsa.”

Yesusi deiriri fiywansoai kariri mangfatafosa

(Matiusi 25:14-30)

¹¹ Kaiwasafoi etoa etaramididau Yesusi we medufo, mayeai deiriri fiywansoai bei. Weo rabuang bonani mani da kefang we Yerusalem, ampafe kaiwasafoi ewaitaraihio katu wo Allai da ma we wemananu we ea na nunei.

¹² Ampafe Yesusi deyo, “Inontaraio wewafonia mane, deyo dong to nu waroi we eruaisi we mananu, ambori daraberahi aha ma weo we mananu na katai nanai ki.”

¹³ Donta kahairai mae, sahu ruhi ne mangfata ewesura fosa ma, mayeai dohonai

wesa doi minasi* boante-nang. Medu tua fi dohonai nanai deyo, 'Metawayang na doi yetorai we meara ninai, we mesera we ne faufo aha, paria sobu yarabera yau aha ma.'

¹⁴ Wape kaiwasa na katai nanai enimirireu inontaraifoi, ampare dontai fafongna mae, etemi manea etong tuari aha emadu we ene mano fuba pari foi eteyo, 'Amemaya we inontarai nini wemananu we amea kaha.'

¹⁵ Manamo ene mano fuba pari foi kiobu tarang, mae yuasi we mananua, mayeai daraberahi to ne kataifoi aha ma. Ainanaya sahu ne mangfatafosa ma, weo etei kaririai wei doi beiru aino esobuai ahang fo.

¹⁶ Mangfata mano reantennang foi da wa medu wei deyo, 'Daie, doi minasi boyari bohoni we yau nani, irurai tuturi tutu isobu sura aha.'

¹⁷ Mananufoi medu wei deyo, 'Mahikai paria! Wau mani mangfata mosi di wau. Weo na fi katui iroaso wau, ampare iruai wau we wenungkamiei we bendari sura.'

¹⁸ Mangfata mano sua foi da ma medu wei aha deyo, 'Daie, doi boyari bohoni wai, irurai tuturia mani isobu ring.'

¹⁹ Mananufoi medu we ne mangfatafoi deyo, 'Wau ambori wenungkamiei we bendari ring.'

²⁰ Mangfata mano fui foi da aha ma medu deyo, 'Daie,

nemu doifi dinini, ikafa tawania mitu na ireu bei yediwari na nehu munufoi.

²¹ Weo imatai wau. Weo wau mani, inontaraio nemu kaiwo tapapa di wau. Wau mani nemu te fiae kahai mae ka finanai, tutu wau mani tanang te fiae kahai mae roa beting finanai.'

²² Mananufoi medu wei deyo, 'Wau mani mangfata korira di wau! Kariri nemu kaiwoariri modura wa, yohong aiboi we wau. Wau boitawanai we inontarai nehu kaiwo tapapa di yau, ika fi wiyo nehu tera kahai, tutu yeting fi itanang tera kahai.'

²³ Boitawanai tonana mani, ka doiwaia bohoni wia na bangki ambori dawing nayai. Ambori yarabera yau tonina mani ika tamu ne antungfo kontai. Wape wau nari tonana kaha.'

²⁴ Mayeai mananufoi medu we inontarai etoari na nana nesa deyo, 'Meha doifoi werui tutu metohoni we mangfata mano ne doi minasi sura foi.'

²⁵ Manamo inontaraifosa eteyo, 'Daie, i ne sura ampa mae?'

²⁶ Mananufoi yoa wesa deyo, 'Yeisaharai we mea mau yeyo, weo mano sobuai kawurua foi ambori sobuai fuba aha ki, ampare nengfo fuba aha, wape mano sobu kuteai manamo niari kaririai kaha foi ne kutu nayai nai fo kontai ambori tafating werui ki.'

²⁷ Tutu na ninaifa kontaio meha nehu aitetao emaya we

* **19:13** Doi minasi mani, mai kariri manei ne fiembaitai we yufi we embai botoru.

iwemananu wesa kaha wasa ma. Memung kahai sa na urehureane!"

Yesusi suai to bendari Yerusalem

(*Matiusi 21:1-9; Markusi 11:1-10; Yohanesi 12:12-15*)

²⁸ Yesusi medu kaiwofoa kai fo, i da foni sa to Yerusalem.

²⁹ Era wa kefang munue Betfage tutu Betania na wiwoio Saituni, demi ne inontarai erariati fosa uwe-mandu, ura fafong.

³⁰ Medu we suru deyo, "Mura to munue watai na taaromife wanai, mura waroi afui kahai mae muwati manei tebuhi ne keledai antung manei doari na nanai. Keledai nani manei wiro dau nai kaharai. Murehuwi mukari ma.

³¹ Masino manei dutang bera muru deyo, 'Murehu keledaiwai we fiani?' muroa wei mureyo, 'Sengnei andi demi auru aukari ne.'

³² Inontarai mandu fo suru ura wa, fi usobua fo kariri fifianai aino Yesusi medurai we suru fo.

³³ Ainanaya uroa urehu keledai antungfoi, mayeai mano neng foi dutang bera suru deyo, "Murehu keledaiwai we fiani?"

³⁴ Uroa we mano neng foi ureyo, "Sengnei dino demi auru aurehui aukari wei ne."

³⁵ Ainanaya uka keledai antungfoi we Yesusia. Mayeai etohongno ene ansung borai feai awiai ebua-sai na keledai kuruinafoi, tutu efata Yesusi dautai ayai minohi sauwi.

³⁶ Ainanaya Yesusi dautai na keledaifoi to Yerusalem. Na rang rorong da naia fo, kaiwasa era riati fosa eha ene ansungfeai ehafarai na rangfoi, emaranding rangfoi ambori Yesusi da nai.

³⁷ Yesusi rerai we suai Yerusalemifo, na rang bia na wiwoi Saituni aweu fo, kaiwasa fuba era riati fosa esahu na eraomifui fiabai, esahu efiai Seng Allai tutu etohong mahikai wei, weo fitantuma fuba ewatioai na euremireafoa fo.

³⁸ Ea esahu eteyo,

"Moanafeai we Mananuo da na Sengnei wonongne!*

Mai na Waidani tutu sambewaraio dedai feai we Allai na katai dedai!"

³⁹ Inontarai eweFarisi maneiru teaio era ria kai-wasafoi, ehasou etarami kaiwasafu esahu Yesusi we Mananu dine, ampare emadu we Yesusi eteyo, "Dai Mantaunaune waune, bemi nemu inontarai era ria wau wasa enemboru."

⁴⁰ Yesusi yoa deyo, "Meroa-soaifa! Inontarai ninisa enemboru mani, kamamiei nini ambori sahu tutu kaiwone ki."

Yesusi sai we Yerusalem

⁴¹ Yesusi da wao arong wao Yerusalem tutu deti bendarifofoi fo, sai we bendarifoi.

⁴² Medu kariri kaiwasa Yerusalem fo deyo, "Aroo! Tofino rahida bonini ewaitawang fifanai aino kia ne maifo ma ne mani, mahikai paria. Manamo ninaifa mani wiro ewatio ne maifo kahai.

* 19:38 Masmuri 118:26

⁴³ Ea ambori esodai rabuang bo ene aitetafosa enari fi kahobu bendarifo, esorui, etata wahisa.

⁴⁴ Ea ambori emei bendarifo we dorang kuru watai, tutu emung kaiwasafosa ki, tutu kamiei boyari kontaio wiros tuati wia sau ne katai wia nai foi kaha. Weo Seng Allai da kawuru ma weo feriri kaiwasa Yerusalem fosa ampa, manamo emaya we etoaroansoi kaha.”

Yesusi suai to Sempaisi ne Munufoi

(*Matiusi 21:12-13; Markusi 11:15-18; Yohanesi 2:13-16*)

⁴⁵ Yesusi suai to Sempaisi ne Munufoi rofongfo, mayeai data mano etawayangfi na nana fosa.

⁴⁶ Mae medu wesa deyo, “Na Allai ne Kaiwofo medu fieai, amani dotu tonina:

‘Nehu Mununei mani we munuo wenadi nai,*’ wape menariri wemunu mananapia.”

⁴⁷ Rahida neungne Yesusi deunau na Sempaisi ne Munufoi. Imami baba fosa, mantaunau Kaiwo Musai soi fosa, tutu mano ewenungkamiei we inontarai Yahudi fosa, etohong we emuni weruai.

⁴⁸ Manamo esobu rangfeai we etohong kariri fi enemittiuaitai nana kaha. Weo kaiwasa bitoya etaramioi pampang, tutu enemirorong-foi sau we ne kaiwoaririfo.

20

Mano ewefoniai we Yahudifosa etutang bera Yesusi kariri ne mambiriu we niarifi fo

(*Matiusi 21:23-27; Markusi 11:27-33*)

¹ Na rahida bei Yesusi deunau tutu deiriri Kaiwo Mahikai na Allai fo, we kaiwasafosa na Allai ne Munufoi refongfo. Imami baba fosa, mantaunau Kaiwo Musai soi fosa, tutu mano ewefoniai we Yahudi fosa, era ma emadu we Yesusi eteyo,

² “Boi kaririai we amea, na mandoni wonongne tuti ne mambiriune nari fi bitoya tonina fenina? Tuti mandoni dino yuai wau we nari fininaifa ne?”

³ Yesusi yo deyo, “Yau kontai yutang bera mea we fieai. Meteisaharai we yau,

⁴ weo Yohanesi mano webaptisi kaiwasa foi mani, mandoni dino yuaisi we webaptisi kaiwasa tonana ne? Allai ete inontarai nunei maneie?”

⁵ Mano ewenunggamilai we imami fosa tuti mano ewefoniai we Yahudi fosa emadu kaririai wawerasa eteyo, “Masino tateyo, ‘Allai dino yuaisi we niari finana ne,’ nana mani ambori dei we tata aha ma deyo, ‘Tonana mani, we fianie wiros meroaso Yohanesi kahai ninia?’

⁶ Wape tateyo, ‘Inontarai batang maneie andino yuaisi ne,’ nana mani ambori kaiwasa fuba eroaso kaiwo

* **19:46** Yesayai 56:7

medura fo tutu etohong kariria fosa, eru kamieio tata ki. Weo ea eroasoifa weo Yohanesi mani nabi manei dine."

⁷ Ampafe eroa we Yesusi eteyo eserawawerahai, mantei dino yuaisi fo.

⁸ Ainanaya Yesusi medu wesa deyo, "Tonana mani yau kontai wiro yeikaririai we mea kaha weo mantei dino yuai yau we inari fi bitoya nini faini."

*Yesusi medu flyiwansoai kariri weenari romi angguri
(Matiusi 21:33-46, 22:15-22; Markusi 12:1-17)*

⁹ Yesusi deiririai we kaiwasa fuba fianduhi nana foi flyiwansoai nini, deyo, "Inontarai manei sanang ne romi angguri bei, sanamia kiaia, dohoni inontarai manea ewaitawani, ambori romifoi wetarai mani, taraifoi etatori mai sa ki. Ainanaya mano ne romi foi dontai to nu siai, tutu awa niai waroi na wanai.

¹⁰ Tete rabuang bo romifoi wetarai fo, mano ne romifoi demi ne mangfata manei dontaia weo kia ne atorafo ria mano ewaitawang ne romifoi fosa. Manamo mano eru romifoi sa etafu mangfatafoi, eboia denteng kaha tuti etatari daraberahi na warang arora aha.

¹¹ Ainanaya mano ne romi foi demi nari ne mangfata manei siai nariai aha, manamo mangfata nani kontaio eboia tafai kiari, eteikang-gani ne woria denteng kahaia, mayeai etemi daraberahi warang arora nariai aha.

¹² Mayeai mano ne romi foi demi nari mangfata mano mantoru foi aha. Manamo mangfatafoi da wa, eboi, to-yari ne ahao tafai kiari, eruti esoi to fino romi dereung boriei fo ariei wia nayai.

¹³ Ainanaya mano ne romi foi deyo, 'Fianai aino inari aha ne? O! Tonana mani yemi nehu kaisung teraio enehuwawuti neia. Weo i da wa mani, tarahai esomi wei rai.'

¹⁴ Manamo we eru romifoi sa ewati ne kaisungfoi we da ma fo nanai, emadu wawerasa eteyo, 'Ne kaisung ambori sobu tamang fi minohi tutira fe andinini, ampafe tamunia mireha weruaia, ambori fianai aino tamang minohi tutira fo taha we tata.'

¹⁵ Etafuria tuti efafari to boriai weru romifoi awariai emuni nayai."

Ainanaya Yesusi bera kaiwasafoi aha deyo, "Tofino mano ne romi foi, fifiani aino ambori dohonai we mano eru romifoi sa fo?"

¹⁶ Todoni kontaio ambori daraberahi ma tuti miung mano yoasosa we eru ne romifoi sa ki, tuti dohong romifoi we inontarai siai manea aha we ewaitawani ki."

Kaiwasafosa etarami kaiwo Yesusi medura fo nanai, emadu wei aha eteyo, "Todoni kontaio nana fanai!" weo ewaitawanai weo Yesusi deinawiai we ene tarai kariri inontarai ewaitawang romi angguri fosa.

¹⁷ Yesusi seitesa akawuru wo medu wesa deyo, "Tonana mani Sengnei Ne Kaiwo

arawang bonini mani weneung todoni? Amani:

'Kamieio mano enari munu nesa ehabioi fi,
andi wekamieie reantenang we etang kamieifoi doa sauwi ampa.*'

¹⁸ Inontarai etawai na kamiei nani mani, eworu ki, tuti mantei dino kamiei nani sau kangguni mani ambori yoyaria wenukahai ki.*

¹⁹ Mantaunau Kaiwo Musai soi fo tutu imami baba fosa, ewaitawanai we Yesusi ne flyiwansoai medura fo reng wesa kariri todoni eteia-yari we Mananu Mampariri foi fo. Ampafe etohong we etafuri na kutu nanai kontai, manamo ematai kaiwasa bitoya foi weo kaiwasafai eparaise na fi Yesusi meduraia fo.

²⁰ Ampafe esera we rahida mai we etafuri. Ebaio inontarai maneia, ambori enari parari Weinontaraio etohong kariri Sengnei ne Kaiwofo, kontaio etemi inontarai nanisa eweanggari Yesusi na fi etutang wea fo. Ambori Yesusi yoa medu fi sara kaiwoariri na parenta Roma foi mani, etafuri na ne kaiwo nanai, tutu ehari to inontarai mano wegubernuri, na parenta Roma foi na katai nani, we i mani wemambiriu weo kiutu aiboi.

²¹ Ampafe inontaraio esobu fiembaitafo emadu we Yesusi eteyo, "Dai Mantaunaune waune, amewait-

awanai weo kaiwoariri fuba modurai tutu bounau wai nanai wetarai. Amewaitawanai kontai we bounau na mai kariri fianai aino Seng Allai medurai we inontarainesa fo tuti wiwo womi we mano ewewonomi fosa kaha fefe.

²² Ampafe kariri tane hukumifoi, mesi we tabai pajaki weo Mananu Kaisari ete bireri e?"

²³ Manamo Yesusi deitawang ene anggarifoi, ampafe medu deyo,

²⁴ "Meteinawiai we yau doi mebai pajaki nai wai. Mandoni dino yabani na doi finina, tuti mandoni dino wonongfe watai nai ne?" Eroa wei eteyo, "Mananu Kaisari."

²⁵ Yesusi medu wesa aha deyo, "Tonana mani metohonai we Mananu Kaisari fifiani aino Kaisari neng fo, tuti we Allai fifiani aino Allai neng fo."

²⁶ Tuti na inontarai bitoya euremireafo, esobu obu fi sarawai kuteai ria Yesusi kaha. Ampafe enemboru terai mae epapuhung paria we ne kaiwofo.

Yesusi deunau kariri inontarai esuwi na marareha rorong fo

(Matiusi 22:23-33; Markusi 12:18-27)

²⁷ Inontarai maneiru tea na inontarai eweSaduki fosa era we Yesusi ma. Ea mani inontarai Yahudi saine, wape eroasoai we inontarai

* **20:17** Masmuri 118:22-23 * **20:18** Kamieifoi mani yiwanoso Yesusi tuti mano esobu karira na kamieifoi mani yiwanoso mano eteia Yewusi we Mananu Mampariri Allai dema ma foi, toyari inontarai Yahudi fosa.

emarareha nesa wiro esuwi ahang kaha.

²⁸ Era wa weo etutang berahi eteyo, "Dai Mantau-naune waune, nabi Musai soi kaiwo ninai we tata, soi deyo, 'Mang manei rirau wape sobu arikang kaharai mae mireha, nana mani ne tahatuifoi dau ne wiwingfoi aha, ambori dohong arikang we mano mireha nani ne ririafoi aha.'*

²⁹ Ametaterai weo mambe-tahatui eweitu, mano fuba foi riraua, wape wiro une arikang kaharai mae mangfoi mireha weru wiwingfoia.

³⁰ Mayeai mano suari foi dau ne wiwingfoi aha, manamo wiro une arikang kaharai mae mangfoi mireha kontai.

³¹ Ne tonanane, we ne tahatui mano sua foi, paria sobu mano fui pari foi kontai. Ea kiai erau wiwingfoi wape ene arikang kaharai mae emararehara.

³² Ne fuiai pari fo wiwing-foi kontai mirehara.

³³ Ampafe na rahida mansuwi-suwi foi mani, na mambetahatui eweitu nanisa, mantei dino ne wiwingfoi ne? Weo mambe-tahatui eweitu fosa erau ruhi wiwingfoi fefe."

³⁴ Yesusi yoa wesa deyo, "Inontarai na nunei ninisa erirau,

³⁵ wape inontarai eroa-soai donio emasi na Allai arongreafo fosa esuwi na marareha rorong foi tutu eminohi na rabuang bo da

aha ma wani faini mani, wiro erirau ahang kaha.

³⁶ Ene tarai toyario wewai, tutu wiro emarareha ahang kaha. Ea mani Seng Allai ne arikang disa, weo Allai duwisa na marareha rorong foi fefe.

³⁷ Musai mantauni medurai tatarami paraifa weo inontarai emarareha nesa ambori esuwi aha ki. Na kaiwo soi karirio ai yafui denggararu foi fo, i sahu Sengnei we Allai Abrahami, Allai Isaki, tutu Allai Yakupi.

³⁸ Tonana mani, Seng Allai nani mani wiro Seng we inontarai emarareha kaha, mae i mani Seng we inontarai etarang, tutu wiro inontarai emarareha fo saino esomi wei fo kaha, mae mano etarang fosa, ansaino esomi wei ne. Nanai deinawiai we Abrahami sitoru etarang aha na Waidani ampa. Weo we Allai, inontarainei kiai etarang, na nunei kontai na rorafaisi."

³⁹ Mantaunau Kaiwo Musai soi fo maneiru teai eteyo, "Daie, nemu kaiwo modura wa mahikai paria!"

⁴⁰ Ampafe wiro ewemang we etutang bera Yesusi we fieai ahang kaha.

*Kaiwo kariri Yesusi, Man-anu Mampariri dine fo
(Matiusi 22:41-46;
Markusi 12:35-37)*

⁴¹ Yesusi dutang berahai wesa deyo, "Todoni e, inontarai eteyoai we Mananu Mampariri nei mani Dauti ne Kaisung dine?

* **20:28** Ulangan 25:5-6

⁴² Weo Dauti mantauni soi na bukuo Masmuri deyo,
‘Seng Allai medu weo nehu Sengnei deyo,

“Munohi na warahu domoya nei,

⁴³ pariao iwedaya nemu aitetanesa taha tawansa kiai na awe-muwai.”,*

⁴⁴ Ampafe Dauti mantauni sahu Mananu Mampariri foi we ne Sengfoi tonana mani, todonie i mani weriria terai na Dauti ma nina? Mae nanai deinawiai we Sengno Mampariri foi dedai sewa Mananu Dauti tuti ne riria tera fo ne.”

Anansiau we mantaunau Kaiwo Musai soi fosa

(Matiusi 23:5-7; Markusi 12:38-40)

⁴⁵ Kaiwasafoi etaramio Yesusi medufo tonanai mae, i medu we ne inontarai erariati fosa aha deyo,

⁴⁶ “Metanansiau we mantaunauo Kaiwo Musai soi fosa. Ea mani emirising we esansung ansung dewariroi, era tuturai na kaiwasa bitoya foi euremireafo, toyari na kondirora, ambori kaiwasa bitoya nanai esomi wesa. Emirising we etoa na katai mahikai na munu agama Yahudi fo rorong tutu na muniara bei mani, emirising we etiri katai mahikai na fong fo we eminohi nayai.

⁴⁷ Ea epampamu wi-winafosa weo eha fi eminohi tutura fo, tuti ewenadi mani ene nadifoi dewariroi, ambori kaiwasa bitoya fosa etatosa we inontarai ebeng disa. Inontarai nanisa aiboi

esobuai na Sempaisi fo mani maraba pari sewa rai.”

21

Wiwina manei ne doi do-honai we Sempaisi
(Markusi 12:41-44)

¹ Na Sempaisi ne Munufoi rorongfoi, Yesusi deti inontaraio ene ra bitoya fosa etohong doi to kataio efanduhi doi we Sempaisi nai foi.

² Yesusi deti wiwina ne pari fi manei kontai, kia ne doi seni boru, dohong suru na buruao efanduhi doi nai foi.

³ Ainanaya Yesusi medu deyo, “Tarai, yeisaharai we mea mau yeyo, wiwina nini faini fi dohonai we Sempaisi fo fuba sewa kaiwasa fuba wei foi kiai.

⁴ Weo ea kiai etohonai na ene ra bitoya foi, wape wiwinanei ne pari fi tonanai ki, wape dohong doi kutu wiatai we wiori fidang naya fo awa kiai.”

Yesusi medu kariri Sem-paisi ne Munufoi we ambori miru fo

(Matiusi 24:1-2; Markusi 13:1-2)

⁵ Yesusi ne inontarai manea emadu kaririai we Allai ne Munufoi wedentengfo, emarandini na kamiae marandinaio mehikai tutu na fianggengno kaiwasa etohonai we Seng Allai fo.

⁶ Ainanaya Yesusi medu wesa deyo, “Ne rahidafe naya ne, weo fi mewatioai ninai kai, ambori inontarai boriae etotawi, ampafe misuhia kiai ki, wiro kamiae boyari

* 20:43 Masmuri 110:1

kontaio wiro doa na ne katai
doa nai foi ahang kahai ki."

*Yesusi medu kariri rahida
nunei werea nayafo*

(Matiusi 24:3-14; Markusi 13:3-13)

⁷ Yesusi ne inontarai erariati fosa etarami ne kaiwofe nanisa, eberahai aha eteyo, "Dai Mantau-naune waune, kidoni wori fi antanafa modurai nanai kawariai ki, tuti finanaifa kawaria mani ne fainawiafo todoni?"

⁸ Yesusi deyo, "Metanansiau weduarai ambori dohona inontarai etatofa mea fe. Weo inontarai bitoya ambori era ma eteyo emadu we mea na wonohune tuti eteyo, 'Mananu Mampariri metamang wei nei di yau. Nehu rahida arera fe mai ampa doni ira kaririai ma nina!' Dohonao meroaso ene kaiwofo tutu meraria sa fe.

⁹ Kontaio metarami kaiwo we kaiwasa enemirorong boyari kahai tutu emamuna wawerasa mani, dohonao mematai fe. Ne tonanane todoni kontaio kawariai akawuru wo. Wape nanai wiro deinawiai we nunei werea nayai finana kaha."

¹⁰ Ainanaya Yesusi medu ne kaiwofo pampang deyo, "Parentafei ambori memuna we parentafei ki, tuti mananu manei ambori memuna we mananu siai manei ki.

¹¹ Na doni kontaio ambori mundiae beba foi fio nai ki, kahari tutu fimaninang ming ki. Ambori na rorafaisi, fi fuba mantaungno dohong kaiwasafoi mitaia mirareha foi ambori atioi ki.

¹² Wape wiro fifuba nani kiauwaria kaharai mae, mea ambori inontarai siai erutawang mea, tutu enari kanggani mea ki. Etafu mea, eha mea to munu agama Yahudi fo ambori etutang wawera mea, tutu esoa mea to aitamu rorong fo. Kontaio ambori inontarai eha mea tono mananufosa, tutu mano ewewafonia fosa earomireafo, weo etutang bera mea tutu enari kanggani mea nai ki. Weo meroaso yau tuti meraria yau fefe.

¹³ Nanaifa mani, rabuang mahikai we mea weo metairiri Kaiwo Mahikai na Allai fo finanai.

¹⁴ Dohonao mearomikuayai we kaiwo fianai aino ambori memadura fo fe, mae mene-mitawanai.

¹⁵ Weo imeiri yauno ambori yohonai fa we mea, kaiwoariri fianai aino memadura fo tutu sewaifo we mea, ampare inontarai manei kontai na mene aitetafosa wiro esawa tutu esahu fora kaiwo memadurai nana kaha.

¹⁶ Mea ambori mene wawafosa, mene terafosa, tutu mene maniwowirifosa, etawayang mea to mene aitetafosa ki. Na mea, manea ambori emunsa ki.

¹⁷ Kaiwasanesa kiai ambori enemirireu mea weo meraria yau fefe.

¹⁸ Tonanai ki, wape menumirandaung rowei kontaio wiro niai kaha.

¹⁹ Wape mehikatawanaia mutu tuti metawang mea mani, ambori mesobu ne maifo ki."

*Yesusi medu kariri
Yerusalem wemirufo
(Matiusi 24:15-21;
Markusi 13:14-19)*

²⁰“Mewati Yerusalem weo rai mamuna fea etoa wariria mani, mewaitawanai weo bendari nanai waroi ahang kahai mae ambori emeiria wioru ki.

²¹ Na rahida bonani mani inontarai enayai na Yudea fosa todoni kontaio ewawu ahera, emitto to katai weuai fo we etadiwa nayai. Mano enai na bendari Yerusalem rorong fosa, todoni kontaio emitto weru bendarifoi, tutu mano enai boriei weru bendarifoi, wiro era afui fanai.

²² Weo rahida nanaifa mani, rahidao Sempaisi su aiboifo we Yerusalem finanai, ambori mai kariri fifianai aino wa na Sempaisi ne Kaiwofia fo.

²³ Rahida nana fo, rahida karira paria we wiwinspace sanaifosa tuti wiwingno etinsui ui, weo nana mani ewawu ahera kaha. Nu bonini ambori sodai ne dadira fuba pari fo, tutu Sempaisi yu aiboio kaiwasa nini.

²⁴ Manea ambori emunsa na fimamuna, maneа kontai ambori etafusa ehisa we inontaraio aitamu to nu waroi siai, tutu inontarai Yahudi kaha fosa ambori eru bendari Yerusalem paria rahida Sempaisi dohonai wesara fo kai kaririaia.”

*Rahida Kaisung Inontarai nei daraberahi aha ma fo
(Matiusi 24:29-31;
Markusi 13:24-27)*

²⁵ “Ambori na wofaisi, embaifaisi, tutu awahafaisa,

ambori ati fiainawiaeai nai ki. Na nunei kaiwasanei kiai ambori ematai tutu enemiro-rong fituayai we dobarai pinang mantaung wiro atioi na wea kaharai, dohong rawanangrausi nikuayai paria.

²⁶ Inontarai ambori emataia emarareha weo fiafianai aino ambori kiawariai sentenang na nunei ne, weo fi wemambiriу na rorafaisi ambori dari babiaini ki.

²⁷ Na rahida bonani faini dino atio Kaisung Inontarai nei, ambori watioi we da na kafafefo na rorafaisi meu, ne tapapafo fuba paria tuti ne sambewaraio dedai fo fiabai.

²⁸ Finanai de kawariafo mani, metoabari mea tutu meruai meuremiwa, weo katu mani mea ambori mesobu ne faririfo.”

Yesusi deinawi fiainawiai na ai urung

*(Matiusi 24:32-35;
Markusi 13:28-31)*

²⁹ Ainanaya Yesusi deiriri fiywansoai nini aha deyo, “Meuremifo nai na ai urung tutu ai siai wei fo.

³⁰ Aifo wedahami, rerorifoi kiawariai aha mani, nana mani fiainawiaio katu wo wemunudang ki. Am-pafe mewati finanai, mewaitawanai weo na katai bonini, nana mani rerai weo wemunudang finanai.

³¹ Tonanai kontai, mewatio fiainawiai kiawariaifa na rorafaisi mani, mewaitawanifa weo rerai we Seng Allai da ma we wemananu finanai.

³² Tarai, imadurai we mea mau yeо, inontarai

22

*Yudasi yoa we dewayang
Yesusi*

(*Matiusi 26:1-5, 14-16; Markus 14:1-2, 10-11; Yohanesi 11:45-53*)

¹ Rahida fubao Inontarai Yahudi etang roti weragi kahai, esahui we rahida Paska, kefang we etohonsuari.

² Imami baba fosa tutu mantaunau Kaiwo Musai soi fosa, esera we emung Yesusi na mamunggasai, weo ematai kaiwasa bitoya foi fefe.

³ Mayeai Saminseni sensoni Yudasi mano esahui kontai we Iskarioti foi, i mani Yesusi ne inontarai ewesuraya mandu fo manei dine.

⁴ Ampafe donio Yudasi da wa medu ria imami baba fosa tutu mano ewenungkamie i we ewaitawang Sempaisi ne Munufoi, kariri todoni i dewayang Yesusi wesa fo.

⁵ Etaramioai nanai efaraise paria tutu etarerai we ambori etohong doi wei ki.

⁶ Yudasi kontaio yoa we fi eteoia fo, tutu sera we rahida mai we dewayang Yesusi wesa na mamunggasai, wiro manei deitawana kaha.

*Emainenang fiang we
rahida Paska*
(*Matiusi 26:17-19;
Markusi 14:12-16*)

⁷ Rahida fuba Yahudio esahui we rahida Roti Weragi Kahai, ne diru neung mai we etohonsuari, tutu domba we fiang Paska foi muni wekorbani.

⁸ Ampafe Yesusi medu we Petrusi tutu Yohanesi deyo,

na rabuang boninisa wiro emarareharao ehai kaharai mae finanai kawariai kawuruua.

³³ Rorafaisi tuti nunei niai rai, wape nehu Kaiwone watai wenumainu."

Tatanansiau tuti tata-mang na mai weo taserawawa-era rahida Kaisung Inontarai foi da nai mafo

³⁴ "Mewaitawang mene taraiwai, dohonao meuremiwa karerai we metohong mu-niara tutu metunung ye fe, ete menemitituai karerai weo meminohi toa wau tutu fi meneni wausi fe. Weo finanai wedaya mea ambori wiro metohong kariri ne maifo kaha. Weo mene tarai karira tonanaifa mani, na rahida bonani mani memainenang kaha, tuti mesoi mea paria.

³⁵ Weo rahida bonani mani, kaiwasanei na nunei kiai ewatioai.

³⁶ Mewaitawang weduarai tutu mewenadi we Sempaisi pampang, ambori mesobu mambiriu we metawang mea na ne dadirao ambori mesobua fo na mai. Ambori mea kontaio memai na Kaisung Inontarai nei arongreafo."

³⁷ Na rahidafo mani Yesusi deunau na Allai ne Munufoi, mae diru mani da to Yerusalem boriaifo, da to wiwoi Saituni we niai nayai.

³⁸ Kamiai neungne, kai-wasafoi da to Allai ne Munufoi, weo etaramidi-dauo Yesusi we deunaupo.

“Mura wa mumainenang fiang Paska we tata.”

⁹ Ainanaya ubera Yesusi aha ureyo, “Na katai bodoni dino enemurorong niai nai we aumainenamai nai ne?”

¹⁰ Yesusi yo deyo, “Mutarami ma! Mura wa musuai bendarifoi mani, muwatio inontarai mang manei, kia babeu bei, soni mereha kawuru nai, da to munu bei. Mura ria wenani to munufoia,

¹¹ mumadu we mano ne munu foi mureyo, ‘Mantau-naufoi deyo, “Rorong bodoni dino yau tutu nehu inontarai eraria yau nesa ametang fiang Paska nai ne?”’

¹² Inontarai nani ambori deinawi rorong fiebai bei na yai fo we muru. Rorong nani meineng ampa. Mumainenang fiang Paska na nanai we tata.”

¹³ Ainanaya Petrusi tutu Yohanesi ura wa, mayeai usobu fi Yesusi deyoa fo kai na mai. Urufo umainenangno fiang Paska foi.

*Yesusi dang fiang Paska
ria ne inontarai ewesuraya
mandu fosa*

(Matiusi 26:20-29;
Markusi 14:17-25; Yohanesi
13:21-30)

¹⁴ Diru neungfo mai we etang fiang Paska foi, Yesusi minohi ria ne rasulifosa na katai etampi nai foi.

¹⁵ Ainanaya Yesusi medu wesa deyo, “Wiro isodai ne dadirafo kaharai mae, yohong weai paria we yang fiang Paska nini ria mea!

¹⁶ Meroasoifa! Weo yang fiang Paska nini ahang kahai pariao Allai kia ne kaiwasafu esuai to ne Mananu rorong fo ki. Nana mani fiang Paska ne dotu wea fo mai kaririaia finana.”

¹⁷ Ainanaya Yesusi yuai kibi angguri foi, dutang Sempaisi dohong mahikai we Allai, mayeai medu deyo, “Meha anggurinei metatori,

¹⁸ weo mewaitawanai, na ninai to fona mani wiro yuning angguri nini ahang kahai pariao Allai ne Mananu Rorong fo atioi ki.”

¹⁹ Mayeai Yesusi kia rotifoi, dutang Sempaisi dohong mahikai wei, fioabau rotifo na warangfo, mayeai dohonai wesa tutu medu deyo, “Nehu taraifi dinini. Nehu taraio yohoni we mea weo ifariri mea nai fi dinini. Menari kariri fininai we mearomio yau.”

²⁰ Etampi kaia, dohongnofi angguri foi wesa aha deyo, “Angguri nini mani Allai ne Kaiwo Arerai waworu tebuahirai na nehu rikanei, rikao tiwowu we feriri mea.

²¹ Wape mewati! Inontarai dewayang yau fi minohi na ninai kontai ria yau ne!

²² Kaisung Inontarai nei anture mireha rai, kariri Allai meduraia fo, wape mano dewayani foi mani sobu ne karirafo ki.”

²³ Ainanaya etutang wawerasa, weo mantei na ea andino niari tonanane.

*Inontarai ewesuraya
mandu fosa esawasa we*

mantei dino fiebai wesa fo

²⁴ Yesusi ne inontarai ewesuraya mandu fosa esawasa we mantei dino esahui we fiebai wesa fo.

²⁵ Yesusi medu wesa deyo, "Yahudi kaha fosa, amani kaiwasao etaroang Allai kaha fosa, ene mananufosa eru ene raifosa na kaiwo tapapa. Tonanai wape mano ewenungkamiee nanisa esahusa we mano etaba wedua raifoi.

²⁶ Wape mea mani wiro tonana fanai. Mae mantei dino fiebai we mea mani todoni kontaio niariria ketui, tutu mano wenungkamiee foi mani todoni kontaio ne tarai toyario mangfata.

²⁷ Mantei dino fiebai sewa ne, mano minohi dampi na mejafoini ete, mano wesarawiri foini e? Tawaitawanai we mano minohi na mejafoi. Yau mesahu yau we mene fuba di yau, wape inai rahang meane iwemangfata.

²⁸ Na dadira rorong isodaira kawurua fo, menai ria yau pampang.

²⁹ Toyario Dai yuai yau we iwemananu, tonanai kontai, yau ambori iruai mea ambori mewemananu ki.

³⁰ Ampafe mea ambori metampi metunung ria yau na rabuang bo iwemananu foi ki. Kontaio mea ambori meminohi na kadera suraya boru fo kontai ria Kaisung Inontarai nei, tuti mehutu kaiwo kariri riria Israelio suraya boru fo ki."

*Yesusi medurai we ambori
Petrusi feforai ki*
(Matiusi 26:31-35;

Markusi 14:27-31; Yohanesi 13:37-38)

³¹ "Simone, Simoni wo, taramu ma! Saminseni sobu rang we ambori weanggari mea ki, toyario patibu iriri weru rerawafoi, ampafe ne dentengfoi iriri siai weru ne kerirafoi.

³² Wape yutang Sempaisi we Simone wau kawuru ampa, ambori roasoawa dawohi fanai. Kontaio barabera wau kawuru we yau aha ma mani, wau kontai bohong kaiwo we nemu doroiwasa ambori eroasoai kontai."

³³ Petrusi yoa deyo, "Sengne waune, yau imainenang we isuaio aitamu rorong fo tutu imereha ria wau!"

³⁴ Yesusi yoa deyo, "Petruse, imadurai we wau mau yeo, diru nini wiro manggohei bibe kaharai mae, fofora yau webetoru kawurua, amani boyo wiro boroanso yau kaha."

Ka doi, aderi ete sondu

³⁵ Mayeai Yesusi medu wesa deyo, "Raminde yemi mea mera fa, yeo mea re wiro meha doi, ansung tutu sapatu siai kaha, nanaifa ne metari we fi metang ete ansung we mesansunai fa ne?" Eroa wei eteyo, "Bereri."

³⁶ Yesusi medu wesa aha deyo, "Wape ninaifa mani, mante wauno nemu doifea mani ka, ete aderi ansung bei mani kari, tutu mante wauno nemu pari sondu mani, bowayang nemu ansung siai fea weo wori sondu nai."

³⁷ Tonanai weo Sempaisi ne Kaiwo arawang bo dotu kariri yau toninanei:

'I esahui kontai we inontaraio kerira.*'

Kaiwo kariri yau ninai, ambori wetarai kaririai ki. Weo fifianai aino esoi na Sempaisi ne Kaiwo fi kariri yau ne, isodairai kawuru maninai."

³⁸ Yesusi ne inontarai suraya mandu fosa emadu wei aha eteyo, "Sengne waune, boti sondu abururu ne." Yesusi yoa wesa deyo, "Demoyarai."

Yesusi wenadi na wiwoi Saituni
(*Matiusi 26:36-46; Markusi 14:32-42*)

³⁹ Kariri rahida beirua fo, Yesusi deunaua kai na rahidafo, mae diru mani da to wiwoi Saituni. Ne inontarai ewesuraya mansiri fosa era riati.

⁴⁰ Era wa sobu wiwoifoia mani medu wesa deyo, "Mewenadi we Allai, ambori mesobu Saminseni ne anggarifo mani, wiro metawai metohong sasari kaha."

⁴¹ Mayeai da waroi werusa kuteaia, waroifo toyari o kamieia sau naya fo, ainanaya disang kapa awebuka, wenadi we Seng Allai, deyo,

⁴² "Daie, maya mani, kadeo ruai fi miraba fuba isodairi nini weru yau, wape wiro kariri nehu yawiane fanai, mae kariri nemu bawiawa terai."

⁴³ Wewai na rorafaisi manei da wei ma, dohong mambiriu wei.

⁴⁴ Yesusi nuruainso sodai ne marabafo fuba beyari na enerorongfoi, ampafe wenadifo werorong mambiriu aha. Amayafoi ne tarai toyario rika fenanai, tipu na ne taraifoi, deda to kofafo aweu.

⁴⁵ Yesusi wenadia kai, daraberahi we ne inontaraifosa aha. Da wa mani detisa we etenawa emarareha, weo euremimamong paria, weo enemiroongfoi fituaya fefe.

⁴⁶ Ainanaya medu wesa deyo, "Todonie metena ninai? Metoabari mea mewenadi we Sempaisi, ambori Saminseni weanggari mea fanai."

Etafu Yesusi

(*Matiusi 26:47-56; Markusi 14:43-50; Yohanesi 18:1-11*)

⁴⁷ Yesusi doa medu we ne inontaraifosa tonanai mae, rai manea era wei ma. Rai nanisa Yesusi ne inontarai ewesuraya mandu fosa manei dino kiasa ma ne, wonong fino Yudasi. Mayeai Yudasi da we Yesusi awa ninahi.

⁴⁸ Wape Yesusi medu wei deyo, "Yudase, nemu nuna yau ninai ambori boyo bowayang Kaisung Inontarai nei e?"

⁴⁹ Yesusi ne inontarai ewesuraya mansiri enai na nana fosa, ewati finanaifara fo, emadu eteyo, "Amemamuna wesa na fimamunara ne?"

* 22:37 Yesayai 53:12

50 Ainanaya inontarai manei na sa, fiating ne sondufoi doa awaru ferang kutu imami fuba ne woming manei tarandaungfoia fitu-ayai.

51 Wape Yesusi deyo, "Nana fanai!" Ainanaya waratawang imami ne womingfoi tarandaungfoi tutu niariri denteng aha.

52 Mayeai Yesusi medu we imami baba fossa tutu rai mamuna ewaitawang wedua Allai ne Munufoi, kontaio mano ewenungkamiei we Yahudi fossa deyo, "Mewaitaraihio yau mani inontarai mamuna* di yau e, doni mera tutu fimamuna ma weo metafu yau nina e?

53 Rahida neungne inai ria mea na Allai ne Munufoi, wiro metafu yau kaha. Wape dirufo mai we metohona fininai, diruo Saminseni deinawi ne mambiriupo."

*Petrusi fefora we wiro deroanso Yesusi kaha
(Matiusi 26:57-58, 69-75; Markusi 14:53-54, 66-72; Yohanesi 18:12-18, 25-27)*

54 Raifosa etafu Yesusi tutu ehari to Kayafasi imami fuba pari foi ne munufoi. Petrusi da riatai na waroi.

55 Na munu dereungfo, manea eminohi eharuru adia bei na nanai, ampare Petrusi kontaio da wa minohi keruru adiafoi ria sa.

56 Mangfata wiwing manei deti Petrusifo urengfo nai nai, deroang wei, ainanaya medu deyo, "Inontarai nini

kontaio anta doa ria Yesusi na wanai."

57 Manamo Petrusi fefora deyo, "Wiwingwa wau, yau yeroanso sobu inontarai nani kahai arorawa."

58 Tourai aha mani inontarai manei siai deti Petrusi, ampare medu deyo, "Wau kontai Yesusi ne inontarai manei di wau." Manamo Petrusi yoa aha deyo, "Bereri, yau mani bereri."

59 Tarahio we araha ureng bei teai aha mani, inontarai manei siai aha medufo kika tawanai beyari deyo, "Antu inontarai nini, inontarai da ria Yesusi manei dine, weo i inontarai Galilea manei dine fefe."

60 Manamo Petrusi yoa wei deyo, "Fianai aino modura wa? Fi modurai nanai iserawa iru na wa amang wau we beyari!" Na tatofang kutu Petrusi medu nanai, manggoheifoi bibeia.

61 Yesusi fibera ureng deti rarang Petrusi urengfo. Ainanaya Petrusi aro fianai aino Seng Yesusi medurai weia fo, deyo, "Diru nini aha rorong, wiro manggohei bibe kaharai mae, fofora yau webetoru kawurua."

62 Ainanaya Petrusi dari weru katai nanai tutu saia wiro denteng ahang kaha.

*Emei kanggani Yesusi kontai eboi
(Matiusi 26:63-68; Markusi 14:60-65)*

63 Inontaraio ewaitawang Yesusi fossa, emei kanggani tutu eboia tafai kiari.

* 22:52 Ete mananapi.

⁶⁴ Etabung wedua urengfo ambori etutang berahi eteyo, “Hai! Boyo nabi di wau am-pafe bafu weaifa, mantei na amea andino bioi wau ne?”

⁶⁵ Kaiwo oiberahai bitoya beyari eru esoai rufang Yesusi.

Yesusi doa na Majelisi Yahudi earomireafo
(*Matiusi 27:1; Markusi 15:1; Yohanesi 18:19-24*)

⁶⁶ Kameaia mani eha Yesusi to Majelisi Agama efanduhisara fosa. Ea mani mano eruaisa na mano ewenungkamieie we Yahudi fosa, imami baba fosa, tutu mantaunau Kaiwo Musai soi fosa.

⁶⁷ Etutang berahi eteyo, “Boi kaririaifa we amea, wau mani Mananu Mampariri di wau e?” Yesusi yoa wesa deyo, “Yeikaririai we mea kontaio wiro meroaso kaha.

⁶⁸ Tutu yutang bera mea kontaio, wiro metei kariri fieai we yau kaha rai.

⁶⁹ Wape na ninai to fongna mani, Kaisung Inontarai nei ambori minohi na Seng Al-lai mano weMambiriu sewa pari foi eneung domoya fo ki.”

⁷⁰ Ea kiai emadu wei eteyo, “Tonana mani, wau mani Allai ne Kaisung di wau e?” Yesusi yoa wesa aha deyo, “Yo! Tonanai kariri memaduwa.”

⁷¹ Ampafe emadu eteyo, “Kasau we tata ampa. Mandoni dino tatutani we medu kariri ne sarawafo aha ne?”

Weo tatarami terai na borong nengfi ampa.”

23

Yesusi doa na Pilatusi arongreafo
(*Matiusi 27:1-2, 11-14; Markusi 15:1-5; Yohanesi 18:28-38*)

¹ Majelisi Yahudi fosa kiai eha Yesusi to Pilatusi, gubernorifoi aha.*

² Na nanai etinggai Yesusi. Eteyo, “Amesobu inontarai nini deunau kaiwasa bitoya foi we ne karirafo. I deunau kaiwasa we wiro ebai pajaki we Mananu Kaisari fanai. Tuti i deyo, i mani Kris-tus, Mananu dine.”

³ Ampafe Pilatusi dutang bera Yesusi deyo, “Taraie, wau weMananu we inontarai Yahudi fesa ne ne?” Yesusi yoa wei deyo, “Yo, tonanai kariri modurawa.”

⁴ Ainanaya Pilatusi medu we imami baba fosa tutu kai-wasa bitoya foi deyo, “Yu-tang bariria manamo isobu fi kuteai we dohong sarawa kaha.”

⁵ Wape eafo etoabiaianai eteyo, “Deunau kaiwasa fuba na Yudea fosa we enari ne karirafo. Reantenang mani deunau na Galilea, manamo ninaia mani paria sobu katai boninia ninai.”

Yesusi doa na mambaiseng Herodesi arongreafo

⁶ Pilatusi tarao kaiwofo, be-rasa aha deyo, “Ampafe inontarai nini mani, inontarai Galilea dine ne?”

* **23:1** Ehari to Pilatusi gubernuri foi tonanai weo i terai wemambiriu we kiutu kaiwo aiboi marareha.

⁷ Pilatusi taraoai ria sa we Yesusi mani na Galilea, kataio Mambaiseng Herodesi yu naia fo kontai, ainanaya Pilatusi demisa eha Yesusi we Herodesia. Teteo nana mani niiai na Yerusalem finanai.

⁸ Herodesi deti Yesusi nanafo mirarising karira, weo waroia tarao Yesusi we fi fuba niariri foi, kontai dohong we detioi paria. Enetawanaifa weo ambori Yesusi niari fitantumafeai detioai ki.

⁹ Aiwedaya mani Herodesi bera Yesusifo bitoya paria, manamo Yesusi wiro fioai borong kutea kahai arorawa.

¹⁰ Imami baba fosa tutu mantaunau Kaiwo Musai soi fosa, era wa etoa kontai na nanai, tutu etinggai Yesusifo ehikatawanai beyari.

¹¹ Herodesi tutu ne rai mamuna fosa emei kanggani Yesusi tutu enemirireuwi, esansuni na ansungno we inontarai fuba, mayeai demisa ehari we Pilatusi aha.

¹² Herodesi tutu Pilatusi uru, raminde nana mani uweaiteta, manamo na rahida bonani kontaio uweboyari aha.

Yesusi sobu aiboo marareha
(*Matiusi 27:15-26; Markusi 15:6-15; Yohanesi 18:38-19:16*)

¹³ Pilatusi fianduhi imami baba fosa, mano ewewafonia fosa, tutu kaiwasa na nana foi kiai,

¹⁴ medu wesa deyo, "Meha inontarai nini we yau ma tutu meteyo i deunau kaiwasa bitoya we ne karirafo. Na mearamireane iberahia tonanai, manamo isobu fi

metinggairi wea ne kutea kahaia.

¹⁵ Herodesi kontaio medu tonanai, weo i kontaio denatu Yesusi nani toninai we tata ma. Inontarai nini wiro niari fi sarawa feai weo ambori sodai aiboo marareha fo kaha.

¹⁶ Ampafe irubati teraia mayeai itawinia da wa."

¹⁷ Medu tonana weo rahida fuba Paskao inontarai Yahudi fosa etohonsuari, na defuina neungfo mani, Pilatusi deiai inontarai niai na aitamu fo mane, da to boriai we kaiwasa bitoya foi aha.

¹⁸ Manamo kaiwasa fuba etoari na nana fosa ehuayai, esahu eteyo, "Muni weruai! Tawing Barabasi we amea!"

¹⁹ Barabasi mani, etafuri etohoni niai na aitamu rorong fo weo i wedaya kaiwasa bitoya foi emamuna na bendarifoi. Kontai i miung inontarai.

²⁰ Pilatusi deo sawing Yesusi, ampafe medu we kaiwasa bitoya foi aha.

²¹ Manamo kaiwasa bitoya foi ehuayai esahu mambiriu aha eteyo, "Pahui na aitabafoi! Pahui na aitabafoi!"

²² Ainanaya webetoru finanai Pilatusi medu wesa aha deyo, "Wape fisarawaio todoni fino niari ne? Yau wiro isobuai we dohong sarawaio ambori sobu aiboo marareha fo kaha! Ampafe yau irarubati terai, mae itawini da wa."

²³ Manamo nana mani arahio ehubisa mantaung finanai, weo todoni kontaio Yesusi epahui na aitabafoi.

Donio fi etohong wea fo Pilatusi dohong kaririai.

24-25 Ainanaya Pilatusi kiutu kaiwofo we Yesusi sobu aiboi marareha foi, kariri kaiwasa bitoya foi ene awiafo, tutu sawing Barabasi wesa kariri ene etohong wea fo. I mani inontaraio etafuria wiana aitamu rorong fo weo wedaya kaiwasa emamuna tutu ming inontarai. Ampafe Pilatusi dohongno Yesusi we ne rai mamuna fosa weo enari kanggani karirio fianai aino kaiwasafosa enemituaita fo.

*Epahu Yesusi na aitabafoi
(Matiusi 27:33-44;
Markusi 15:22-32; Yohanesi
19:17-24)*

26 Ainanaya Jesusifo eharia. Na rang rabuang ehanggungno inontarai manei, arahio da na munuefeai de suai tono bendarifoi, wonong fino Simoni, inontarai Kirene dine. Erutawani etawi mae sodua aitabafoi da ria Yesusi na kurufuifo.

27 Kaiwasa bitoya era ria Yesusi na kurufuifo. Na kaiwasa bitoya nani, wiwing maneiru teai era riatai kontai. Wiwing nanisa esaia etaidu we Yesusi.

28 Manamo Yesusi deti berahi wesa, medu deyo, "Wiwing Yerusalemia meaine! Mesai yau fanai, mae mesai mene tarai bo meneng wai tutu mene arikangwasa.

29 Weo rabuang bo inontarai emamuna we Yerusalem, nani faini dino ambori da ma ki. Na rabuang bonani faini dino inontarai

emadu eteyo, 'Denteng sewa weo wiwingno eharawahio esobu arikang kaha fosa, tutu mano wiro earomi ui kaha fosa.'

30 Na rabuang bonani faini dino,

'Inontarai ambori emadu we uaifo eteyo,

"Tirutawang amea!"

tutu we wiwoifo,

"Biritawang amea!"*

31 Weo we ai darama nei, inontarai enari toninaia, nana mani ai memasa nei mani, waitawang enariri toa ne ahang kaha! [Ete, we yau inontarai nehu pari sasari, wape emung yau, enari kanggani yau toninai. Nana mani we mea inontarai mewesasarine mea, mesobu aiboi fuba sewa paria!]'

32 Inontarai siai mandu kontai, inontarai umamuna suruine, eha suru kontai we emung surua umereha kontai ria Yesusi.

33 Era wa sobu kataio esahui we *WomingNungkamiei* (nana mani, esahui we Golgota dine), epahu Yesusi tutu inontarai mamuna fosuru nayai, manei na dowei, manei na domoya, Yesusi na rabuang.

34 Ainanaya Yesusi wenadi deyo, "Daie, waramuai ene sasarifoi! Weo eserawawera fifianai aino enari ne."

35 Rai mamuna fosa, ehabi onde we etato Yesusi ne ansungfoi mai sa. Kaiwasa etoari na nana esairi, mae mano ewenungkamiei we inontarai Yahudi fosa eteibera Yesusi eteyo, "I mani deyo

* 23:30 Hosea 10:8

feriri inontarai siai, tonana mani feriri bera mantauni to, tarai we i mani Mananu Mamparirio Allai diriri ma!"

³⁶ Rai mamuna fosa kontai eteiberahi. Era wa etohong angguri sisasa feai wei,

³⁷ tutu emadu eteyo, "Wau inontarai Yahudi ene Mananu di wau mani, foriri bera mantaung waua!"

³⁸ Na aitaba Yesusi sau nai nungkamieifoi, esoi kaiwo ninai, Mananu Inontarai Yahudi

³⁹ Inontarai mamunao epahu suru na nana fo suru, manei deibera Yesusi. I medu deyo, "Boe! Yeitarahi wau mani Mananu Mampariri di wau mae? Tonana mani foriri bera wau tutu auru kontai!"

⁴⁰ Manamo inontarai mamuna mano wei foi sua ne maniwowirifoi deyo, "Mutai Allai kaha e? Wau kontaio emung wau mureha kariri i.

⁴¹ Manamo aiboi tusobua ne karirio fikarira fianai aino tunaria fo. Wape i mani, wiro dohong sarafiea kahai kontai."

⁴² Ainanaya medu we Yesusi deyo, "Yesuse, aromuo yau, na rabuang bo ro wemananu ma foi!"

⁴³ Yesusi medu wei deyo, "Roasoifa, rahida bonini wau ambori munohi ria yau na katai denteng foi ki."

Yesusi ne mireha toa fo

(*Matiusi* 27:45-46; *Markusi* 15:33-41; *Yohanesi* 19:28-30)

⁴⁴ Tarahio araha ureng suraya boru rahida rabuang batang, na tantuma kataifoi memantiti sentenang paria sobu araha ureng botoru,

⁴⁵ weo wofaisi wiro sambe-warai ahang kaha. Iree aburung sau wetaba na Sempaisi ne Munufoi rorongfo miabu weberu.

⁴⁶ Ainanaya Yesusi bibe mambiriu beyari deyo, "Daie! To waramu rorong wa mampui, itawing nuhuani-nunei!" Medua kaifo, kiaharaia.

⁴⁷ Rai mamuna fosa ene mano wenungkamiei foi, deti Dinini terai na urengreafu, fiai Allai, tuti medu deyo, "Tarai, inontarai nini mani, inontarai mesi dine!"

⁴⁸ Kaiwaşa fubao da ma seiri Yesusi fo, ewatio fio dariai na nana fo, ea kiai etaraberasa to ene munufo aha na enemirorong fituayai.

⁴⁹ Tutu Yesusi ne inontaraifosa, kontai wiwingno era ria Yesusi na Galilea ma fosa, etoa na waroi ewati fi fuba nani kiai.

Esarai Yesusi na fafofo

(*Matiusi* 27:57-61; *Markusi* 15:42-47; *Yohanesi* 19:38-42)

⁵⁰⁻⁵¹ Inontarai manei wonong fino Yusupi, i mani na bendari Arimatea na nu Yudea. I mani, inontarai enerorong denteng dine, kaiwasa esahu suari kontai, tutu inontaraio demang we rahida bo Allai ne Mananu rorong fo ambori atioi fo. I kontaio yuo wang Majelisi Agama fo, wape wiro yoa we kaiwo ne maniwowirifosa ehutua fo tuti fi kangganiaio enari we Yesusi fo kaha.

⁵² Yusupi nini da wao dutang Pilatusi, ambori dohongno Yesusi ne taraifoi wei.

⁵³ Mayeai suo Yesusi ne taraifoi weru aitaba epahui nai foi, ainanaya sensani na ireuo lineni ne harga dedai. Mayeai i dohoni wiatai na fafo o mantauni dahi na wiwoio wekamiai, fafofoi wiro esarai manei nai kaharai.

⁵⁴ Rahida bonani mani rahida Jumati dine, tutu wofoi de sawai ampafe rerai we rahida Sabati foi.

⁵⁵ Wiwingno era ria Yesusi na Galilea ma fosa, era ria Yusupi tutu ewati fafofoi. Ewatioai kontai weo dohong Yesusi wiatai toa fo na kamirei fafo rorong foi.

⁵⁶ Mayeai etaraberasa aha, ainanaya emainenang fininsai burayang tuti maning niunsai mampori weo esariai na Yesusi ne taraifoi.

Wo sawaia, nana mani rahida Sabati foi finana, ampafe efotourai weru fi enari fo, weo etohonsua kariri Sempaisi ne Hukumi Musai soi fo.

24

*Yesusi suwi aha
(Matiusi 28:1-10; Markusi 16:1-8; Yohanesi 20:1-10)*

¹ Na rahida Minggufoi, kamiai kutung, wiwingfosa eha fininsai burayang tuti maning nunsai mampori emainenenangna fo, era to fafofoi.

² Na fafofoi ewatioai we kamiei etadoiria wedua kamirei borongfo, dedoi weru kamireifoi anina.

³ Ainanaya esuai to fafo rorong foi afui, wape wiro ewatio Seng Yesusi ne taraifoi na nana kaha.

⁴ Masio etoari na nanai fo tutu enemittuitai paria mae, inontarai mandu, na tantuma mao uroa ruransa. Amani une ansungfo toyari kaiwewa fenanai.

⁵ Wiwingfosa ematai karira, ainanaya esomi ao ewatai, mae inontarai mandu fo suru umadu wesa ureyo, "Todoni e, mesera we inontaraio darang nei na kataio inontarai emarareha fesa ninai?

⁶ I wiro wia na nina kaha, weo suwi ampa! Mearomio fifianai aino medurai we mea kawurua fo na rabuang bo niayai na Galileafoi,

⁷ deyo, 'Kaisung Inontarai nei, etohoni to mano ewarami aipaya fosa ewarami rorong fo ki. Emuni sau na aitabafoi, tutu rahida bo botoru foi wori, ambori suwi aha ki.'

⁸ Ainanaya wiwingfosa arahio earomio Yesusi ne kaiwoariri medurai kawurua fo.

⁹ Etaraberasa weru fafofoi fo, etairiri karirio fifianai aino ewatioai kai fo we inontarai ewesuraya mansiri fosa tutu we inontarai siaio eraria Yesusi fosa.

¹⁰ Wiwingno eteikariri fi fuba ewatioai nanai we Yesusi ne rasulifosa, amani; Maria Makdalena, Yohanai tutu Yakobusi inangno Mariai, kontai wiwing siaio era riasa fosa.

¹¹ Manamo eroaso kaiwo wiwingfosa etairiria fo kaha, eteyo wiwingfosa emadu funomai.

¹² Wape Petrusi doa bariri mito to fafofoi. Suang mae deti kariri kamirei fafo foi afui, ainanaya detio ireuo

ansang Yesusi naya fosuru, ansuruino uwatai tera ne. Petrusi kiri tapereng beyari, ainanaya daraberahi aha, mae enerorongfoini berahai beyari we fi fianai aino detioa fo na fafofoa.

Na rang rabuang to Emausi

¹³ Na rahida bonani kontaio inontarai eraria Yesusi fosa, uwemandu ura to munue Emausi. Emausi mani, tarahio kiro suraya boyari terai na Yerusalem.

¹⁴ Na rang rorong fo umadu kariri Yesusi ne mararehafoi tuti fi fubao kawariai ampa.

¹⁵ Ura umadu kaririai tutu usewa weai to nanai mae, Yesusi mantauni da ma da ria suru.

¹⁶ Uwati Yesusi we da ria surufo manamo fieai sau wedua uremifo ampare uraroansoi kaha.

¹⁷ Ainanaya Yesusi medu we suru deyo, "Mura murairiri fiani na rang finina?" Uroaukai mae uremi toun.

¹⁸ Ainanaya manei na suru wonong fino Keliopasi, fia Yesusi aha deyo, "Dai wau mani, tarahio inontarai waworu na katai nini di wau fe? Weo wau wiro boitawangno fi enari kawuru na Yerusalemia fo kaha e?"

¹⁹ Yesusi berahai aha deyo, "Fifianai aine?" Uroa wei ureyo, "Fio enari we Yesusi, inontarai na Nazareti foi. I mani nabi dine, kaiwo medura fo tutu fi niari fo wemambiri paria. I mani, mai na Allai urengreaf, kontai mai na inontarai euremirea ne.

²⁰⁻²¹ Ameafo amene-mitawanai paria weo, andino ambori feriri Yahudine tata weru tane aitetafosa. Wape imami baba fosa tutu mano ewenungkamiee we inontarai Yahudi ne tata fosa, etohoni we rai mamuna Roma fosa, ampare etohong aiboi marareha wei. Ambori epahui sau na aitabafoi ao mirehara. Kontaio, rahida bonini mani rahida botorua finanai na ne mararehafoi.

²² Kontaio wiwing maneiru teai na amea, etohong amea amesioi amea paria. Weo kameai kutung fa era to ne fafofoa,

²³ wape wiro esobu inong marareha foi kaha. Ainanaya etaraberasa aha ma, eteyo, 'Amewatio wewai mandu, umadu ureyo, Yesusi suwi ampa.'

²⁴ Ainanaya maneiru teai na amea era to fafofoa, awa mani esobuaifa karirio fi wiwingfosa emaduraia fo, mae wiro ewati Yesusi kaha."

²⁵ Ainanaya Yesusi medu we suru deyo, "Muru mani anture muserawawerahai paria. We fiani e wiro muroaso fi nabifosa etoi fo kaha nina?

²⁶ Weo tarai tofino, Mananu Mampariri foi sodai ne marabafo akawuru wo Seng Allai yuaisi dohongno ne sambewaraio dedai fo wei ki."

²⁷ Mayeai Yesusi deisaharai we suru, fifianai aino eso na Sempaisi ne Kaiwofo kiai kariri ne tarai bo neng foi fo, amani na fio Musai soi fo, tutu na fi nabifosa eso fo.

²⁸ Tonanai mae itora kefangno munue itora wea foa. Yesusi niari toyario de da paria,

²⁹ manamo urei weduari. Umadu wei ureyo, "Diru fi kefang ampa, katu mani manantti fine, ampafe torena na ninai ki aha wo." Ampafe Yesusi suai munufoi afui weo dena na nanai.

³⁰ Dirua mani, minohi we dampi ria suru na nanai. Ainanaya kia rotifo dutang Allai dohong mahikai wei, tuti fioabau rotifo na warangfo, dohonai we suru.

³¹ Mayeai arahio uremifo tabau, uraroansoai we Yesusi dinani. Manamo na kutu nanai kontaio niai weru uremireafo anina.

³² Ainanaya umadu wawera suru ureyo, "Tarai! Antanafa na rangfoi ma fo, medu deisaha kaiwoariri na Sengne ne Kaiwofo we turu nana fo, tuenemirorong mirising weai paria."

³³ Na kutu iyari nanai kontaio, uroa bari suru, urarabera suru usahera to Yerusalem aha. Na nanai usobuai weo inong anatu ewesuraya mansiari fosa efanduhisa ria kaiwasa fuba wei foi kiai.

³⁴ Emadu eteyo, "Taraito! Sengnei anture suwi aha ma ne! I deinawi ne taraifoi we Simoni."

³⁵ Ainanaya Yesusi ne inontarai mandu arahio ura aha ma nansuru, urairiri karirio fifianai aino usobuaifa na rang rorong ura naia fo, kontai tofino uraroanso Yesusi na kutu fioabau rotifo we itorang fo.

Yesusi deinawi ne taraifoi we ne inontarai erariati fosa (Yohanesi 20:19-23)

³⁶ Eminohi esewa we fi ewatioai tutu etaramioai nanai mae, na tantuma Yesusi mantauni doa rahansa tutu medu deyo, "Mararebanafeai we mea."

³⁷ Esioisa tutu ematai, weo ewaitarahio ewati romoainu.

³⁸ Manamo Yesusi medu wesa deyo, "We fiani e, mematai ninai? We fiani e, menemirorongwai soriru ninai?

³⁹ Mewati warahune tutu awehune weo matatine. Mewaitawanai weo yau aranane. Mewarami kariri nehu tarainei, tutu mewati nariai, weo romoainunuei mani ne paritarai tutu neina, toyari ne mewatioai na yau ninai."

⁴⁰ Yesusi medu tonanai wesa mae deinawio warangfo tutu awengfo wesa.

⁴¹ Kontaio kature eroasoakahai, weo efaraise karerai tutu ehiri ewarami. Yesusi dutang berasa deyo, "Mene fiangfea e?"

⁴² Ampafe etohong diang ora tarai bei we Yesusi.

⁴³ Yesusi kia diangfo ainanaya dani na euremireafo.

⁴⁴ Mayeai medu wesa deyo, "Fio raminde inai ria mea mani, imadurai kawuru we meara fo aininai. Weo fifianai aino toi na fi Musai soi fo, nabifosa tutu na Masmuri kariri yau fo kawari kaririai nina."

⁴⁵ Mayeai Yesusi fiai ene enemituaitafo, weo ewait-

awangno fianai aino Sengne
ne Kaiwofo medura fo.

⁴⁶ Medu wesa deyo, “Na Sengnei ne Kaiwofo soi weo, Mananu Mampariri nei todoni kontaio sodai ne marabafo, tutu suwi na mararehafoi na rahida botoru foi.

⁴⁷ Kontaio na Mananu Mampariri nei yau wonohunei, todoni kontaio aiririai we kaiwasa fuba na nunei kiai weo etaraberasa weru ene sasarifoi, tutu weo Allai waraira sasari. Tutu kaiwo ninai aiririai na nunei sentenang, reantenang mani na Yerusalem.

⁴⁸ Meaino mera metairiri kariri fi mewatioai ninaifa ne.

⁴⁹ Tutu mantaung yauno ambori yenatuai we mea fianai aino nehu Dai dererai kawurua fo. Wape mea metamang pampang na bendari nini pariao Sempaisi ne tapapafo bia na rorafaisi meu niai woru mea.”

Yesusi dau to rorafaisi

⁵⁰ Mayeai Yesusi kiasa era to borai weru bendarifoi, paria kefang we munue Betania. Na nanai yuai warangfo mioansa.

⁵¹ Niari fi nanai mae dau to rorafaisi awao ketai werusara.

⁵² Ea esomia emarareha wei, mayeai etaraberasa to Yerusalem na enemirorong mirising paria,

⁵³ tutu efiai Sempaisi pampang na Allai ne Munufo.

Kaiwo Mahikai Na Yohanesi

Kaiwo dedung we Kaiwo Mahikai na Yohanesi

Na Kaiwo Mahikaio Yohanesi soi mani soi kariri Yesusi, we I mani Kaiwo na Allaio werea na ea kaha foi dine. I da ma weinontarai batang tuti niayai rahang tata. Kaiwo ninai Yohanesi soi we deikaririai we tata we ambori taroasoai we Yesusi mani Mananu Mamparirio Allai dereri foi dine, I mani Allai ne Kaisung dine, tuti Mano Allai yuaisi we Mananu fuba pari dine, tuti taroaso Yesusi nini mani, tasobu numainufo.

Yohanesi soi kontai kariri todoni Yesusi Kaiwofoi nani fitantuma fuba niariri foi. Na fitantuma niariri tonana foi deinawiai we I mani Kristusi dine, amani Mananu Mamparirio Allai dereria foi dine, kontai I mani Allai ne Kaisungfoi dine. Na fitantuma niariri tonana foi, inontarai manea eroasoi tuti erariati, wape manea kontai etapai tuti emaya we eroasoi kaha.

Na robong suraya botoru (13) paria suraya itu (17) dotu kariri todoni Yesusi weboyari ria ne inontarai ewesuraya mandu fosa na diru bo afai mamuna fo eteyo etafuri fo, tuti todoni meinena nasa tuti niari enemirorongfoi mitubaru na diru bonani fo.

Bukunei ne robong wefuria fo, Yohanesi soi kariri todoni Yesusi etafuria ehutu kaiwo

kariri fo, kariri todoni epahui na aitabafoi, mireha tuti suwi na marareha rorong foi aha, tuti kariri todoni deinawi ne taraifoi we ne inontarai erariati fosa na rahida suwi na marareha rorong foi aha nani fo.

Kaiwo fuba Yohanesi soi na bukunei mani kariri fio Allai dohonai na Yesusi Kristusi we tata fo, amani taminohi tatarang we numainufo. Numainu Allai dohonai nanai tasobuai kawuru na nunei ampa, tuti mano taroaso Yesusi we I mani werang we Allai, we andino deinawi Allai we tata fo tuti andino wedaya inontaraine tata tatarang ne.

Yohanesi soi kariri fianai aino Yesusi medurai na kaiwo netawea fo kariri todoni ne wetaraifo, toyari mereha, roti, sambewarai, mantahung fiahung tuti domba fosa, wai angguri tuti ne bongfoi fo.

Kaiwone deto kutuai tonina:

1:1-18 Kaiwo reantenang: Yesusi Kristusi mani Kaiwofoi dine.

1:19-51 Yohanesi webaptisi kaiwasafu tuti Yesusi ne inontarai reantenang erariati fosa.

2:1-12:50 Yesusi fi niari rahang kaiwasafu fo.

13:1-17:26 Rahida wefuiai Yesusi yufi na Yerusalem tuti katai kefang na nanai fo.

18:1-19:42 Yesusi sodai ai-boi marareha fo.

20:1-31 Yesusi suwi na marareha rorong fo tuti da deinawi ne taraifoi fo.

21:1-25 Kaiwo kafe: Yesusi na Galilea.

*Kaiwofoi weinontarai
batang, amani Yesus Kristusi*

¹ Na reantenang pari nunei
kaharai mae,
Kaiwofoi niayai kawuru-
rua.

Kaiwo nani niayai kawuru-
ria Allai ampa,
tuti I mani Allai dine.

² Na reantenang pari fo ni-
ayai kontai ria Allai.

³ Fi fuba nini kiai, Allai niariri
na Kaiwofoi nani,
tuti na fi fuba niayai kiai
nini,
boyari kontai wiro
Allai niariri boriei
weru I kaha.

⁴ Kaiwofoi mani, ansengnei
weneung nai,
tuti ansengfoi dohong
Sambewarafo we in-
ontarainesa.

⁵ Sambewarai nani dansairai
na mamantitifo,
tuti mamantitifo wiro
niariri fefe kaha.

⁶ Inontarai Allai demi foi
manei da ma, wonong fino
Yohanesi.

⁷ I da ma we deiriri kariri
fianai aino deti teri na
urengfo kariri Sambewarai
nani, ambori na i kaiwasanei
kiai taraoai tuti yoasoai.

⁸ Mantauni wiro Sam-
bewarafoi dine kaha, mae
manta da ma we deiriri kariri
te Sambewarai nani.

⁹ Kaiwofoi mani Sam-
bewarai taraio sambewa-
inontarainesa kiai enemiro-
rongfoi dine tuti da to nunei
ma finanai.

¹⁰ I niayai na nunei, tuti
andino Allai niari nunei nai
ne, wape nunei deroansoi
kaha.

¹¹ Da to ne kataifoi terai
ma, wape ne inontaraifosa
etamang wei kaha.

¹² Tonanai ki, wape we
mandoni saino etamang wei
tuti eroaso wonongfo mani,
yuaisa esobu mambiriu we
ahusa we Allai ne arikang
disa.

¹³ Amani arikangno wiro
etaubau enumi na inon-
taraine eriraufo kaha tuti
kariri ene etawiafo kaha, ete
kariri mang manei ne dawai
we ambori sobu arikangfo
kaha, mae etaubau enumi we
Allai ne arikang disa na Allai
mantauni terai.

¹⁴ Kaiwofoi weinontarai
batang ampa tuti niayai
rahang tata. Amewatio ne
sambewaraio dedai fo ampa,
sambewarai dedaio Allai
dohonai wei we ne Kaisung
Mansiari dine fo. Tuti I mani
Kaisungno da na Dai Allai na
ne wetaraifo tuti ne bengno
dohonai arora fo.

¹⁵ Yohanesi da ma we
deisaha kariri Kaiwofoi we
mandoni dine fo we tata
tuti sahu deyo, "Inontaraio
imadu kariri yevo, 'Ambori
inontarai manei datua yau
aha ma ki, wape inontarai
nani fiabai sewa yau, we
wiro ira ma kaharai mae, I
mani niayai kawuru ampa.'
Inontarai imadu kariri to-
nana foi andinini."

¹⁶ Weo I mani dohong ne
bengfo fuba sewa ampa, tuti
na ne bengno fuba sewa
nanai, mioang tata pampang.

¹⁷ Weo Sempaisi ne Huku-
mifoi tasobuai ria Musai.
Wape Allai ne beng sewa fo
tuti ne wetaraifo tasobuai ria
Yesus Kristusi.

¹⁸ Mandoni kontaio wiro deti Allai na ea kaha rai, mae Dai ne Kaisung Mansiario ne tarai kariri I tuti weboyari riati foi terai. Meiri andino deinawi Dai Allai we tata ne.

Yohanesi deisaha kaririai we i mani mandoni dine fo

(*Matiusi 3:1-12; Markusi 1:1-8; Lukasi 3:3-6, 15-17*)

¹⁹ Nini mani, kaiwo taraoi Yohanesi medu kariri mantauni tuti kariri Yesusi fo na rabuang bo mano ewenunggamieie we Yahudi fosa na Yerusalem etemi imami maneia tuti inontarai Lewi maneia, era we Yohanesia we etutang berahi eteyo, "Wau mani mandoni di wau?"

²⁰ Yohanesi feforawa kahai, mae deikariri parai wesa deyo, "Yau mani Mananu Mampariri foi* di yau kaha."

²¹ Ainanaya etutang berahi aha eteyo, "Tonana mani, mandoni di wau? Eliai di wau e?" Manamo medu wesa deyo, "Bereri." Mayeai etutani aha eteyo, "Ampafe mandoni di wau? Nabio ambori da ma foi* di wau e?" Yohanesi yoa wesa aha deyo, "Bereri."

²² Ampafe etutang berahi nariai aha eteyo, "Tonana mani boikaririai we amea we mandoni di wau. Weo todoni kontaio ameteisaharai we mano etemi amea ameria ma fosa, we wau mani mandoni di wau fo. Fianai aino modurai kariri mantaung wau ne?"

²³ Ampafe Yohanesi yoa wesa na kaiwo nabi Yesayaifafongfa medura fo deyo,

"Yau mani, mano isahu pam-pang na katai wekamamieie minano foi yeyo,

'Memainenang rang beng feai we Sempaisi,
Tuti menaria mimoya
wei.'**

²⁴ Inontarai mano era mananisa mani, inontarai ewe-Farisi maneiru teai kontai ampafe etutani eteyo,

²⁵ "Masino wau mani Mananu Mampariri foi di wau kaha, Eliai di wau kaha, tuti Nabifoi di wau kaha, tonana mani webaptisi inontarai we fiani?"

²⁶ Yohanesi yoa deyo, "Iwebaptisi na mereka, wape maneia doa rahang mea wa, inontarai nani wiro metaroani kaha.

²⁷ Andino da tua yau ma, wape we irehu ne wai sapatu fo terai ki, wiro imai we inari finana kaha."

²⁸ Finani kai kawariai na Betania, waya Yardeni eneung dowaruai, katai Yohanesi webaptisi nai foi.

Yohanesi deinawi kariri Yesusi, Allai ne Domba Antungno feriri kaiwasa foi

²⁹ Kameaia mani, Yohanesi deti Yesusi da weia. Ainanaya Yohanesi medu deyo, "Mewati, Allai ne Domba Antungno ohonai wekorbani we yiwang inontarainesa ambori feriri sasari nunei fi di wani.

³⁰ Andino imadu kariri yeyo, 'Ambori maneia da tua yau ma ki, tuti fiabai sewa yau, weo itaubau nuhu

* **1:20** Na kaiwo Yunani mani 'Kristusi', tuti ne maksuti mani Mananu Mampariri na Allai dine. * **1:21** Ulangan 18:15

* **1:23** Yesayai 40:3

kaharai mae, I mani niayai fitawa kawurua.'

³¹ Yau kontaio reantenangne mani wiro yeroansoi weMananu Mamparirio imadu kariria fo dine kaha. Wape ira ma we iwebaptisi inontarainesa na mereha ambori inontarai Israeli nesa kiai ewatiao tuti etaroansoi."

³² Yohanesi medu kontai tonina kariri fi deti teri foi, deyo, "Iwati Nuaninu Mirarebana foi ne tarai toyari muntung maneи, biari na rorafaisi meu minohi sauwi pampang.

³³ Rabuang bonani yau kontaio yeroansoi weMananu Mampariri foi dine kaha, wape Allai mano demи yau iwebaptisi na mereha foi medu kawuru we yaua deyo, 'Masino boti Nuaninu Mirarebana foi biari meu tuti minohi sau maneи mani, wenani dino ambori webaptisi na Nuaninu Mirarebana foi ne'

³⁴ Iwati teri ampa, tuti yeisaha kariri yeyo, I mani Allai ne Kaisung dine."

Yesusi ne inontarai dirisa reantenangfo

³⁵ Rahida sua aha foi mani Yohanesi doari na katai nani aha, doa tuti ne inontarai erariati fo uwemandu.

³⁶ Tuti na kutu detia Yesusi we da nana fo medu we suru deyo, "Muwatia! Allai ne Domba Antungfi diwani."

³⁷ Yohanesi ne inontarai mandu fo suru utarami medu tonana fo, uroari ahang kahai mae ura ria Yesusia.

³⁸ Yesusi fibera ureng deti afui mani, deti suru we ura

riati fo, ainanaya dutang suru deyo, "Fianang dino musera wei ne?" Manamo umadu wei aha ureyo, "Rabie, munohi maidoni?" (Kaiwo Rabi fo mani neta we Mantaunau.)

³⁹ Ainanaya Jesus medu we suru nariai aha deyo, "Mura ma, ambori muwati katai iminohi naya fo ki." Ampafe ura wa ura riati tuti uwati kataio minohi naya fo. Rabuang bonani mani araha ureng boa tuti uminohi riati na nanai paria rahida bonani kiaia.

⁴⁰ Na inontarai manduo utarami Yohanesi ne kaiwofo tuti ura ria Yesusi nani suru mani, maneи wonong fino Andareasi, i mani Simon Petrusi ne tahatui dine.

⁴¹ Andareasi nini sikera paria da sera we ne tafuaio Simonia tuti medu wei deyo, "Ausobu Mesiasi ampa!" (Mesiasi mani wang we Kristusi dine, amani Mananu Mamparirio Allai demи ma we yu fi kiai ne.)

⁴² Ampafe kia Simoni we Yesusia.

Yesusi seite Simoni mayeai medua wei deyo, "Simoni, Yonai antung di wau. Wau ambori esahu wau we Kefasi ki." (Kefasi na kaiwo Iberani mani, masi we Petrusi na kaiwo Yunani, amani: Kamie.)

Yesusi sahu Pilipusi tuti Natanieli urariati

⁴³ Kameai roainai aha mani, Yesusi kiutuai we da to Galileara. Da wa kaharai mae sobu Pilipusi tuti medu wei deyo, "Ro ria yau!"

⁴⁴ Pilipusi nini ne munue na Betsaida, katai Andareasi tuti Petrusi unayai nai foi kontai.

⁴⁵ Pilipusi da wa sobu inontarai manei aha, amani Natanieli tuti medu wei deyo, "Amesobui ampa, amani mano Musai deikariri na ne Kaiwo soi fo nani, tuti nabifosa etoi kariri foia fo. I mani Yesusi na Nazareti, Yusupi antungfoi."

⁴⁶ Wape Natanieli medu deyo, "O! Fi bengfo da na Nazareti mae?" Ampafe Pilipusi medu wei deyo, "Ro ma boti teri."

⁴⁷ Yesusi deti Natanieli da weia nanai, medu deyo, "Inontarai Israeli tarai fi diwani, inontaraio tatofane kuteai tataha nai kaha dine."

⁴⁸ Ampafe Natanieli medu we Yesusi aha deyo, "Na todonie boyo boroanso yau tonanai nina." Yesusi yoa wei deyo, "Pilipusi sahu wau kaharai mae, iwati wau we munohi na ai urung neungfo."

⁴⁹ Ainanaya Natanieli medu deyo, "Dai Rabio Mantaunaune waune, boroang yau tonana mani Allai ne Kaisung di wau! Israeli amene Mananu di wau!"

⁵⁰ Yesusi medu wei aha deyo, "Roasoai weo fitantumao yeyoai we iwati wau kawuru na ai urung arowawahi foi fo ne? Fi fuba sewa weru ninai ambori botioai ki!"

⁵¹ Ainanaya medu aha deyo, "Tarai antu! Imadurai

we mea mau yeyo, ambori mewati rorafaisi tifai tuti Allai ne wewaifosa etautai ebia we Kaisung Inontarai nei ki."

2

Yesus niari merehafo weangguri denteng na muniara mandirau na bendari Kana

¹ Rahida boru aha mani, inontarai manei niari muniara mandirau bei na bendari Kana na nu Galilea foi, tuti Yesusi inang niyai na muniarafoi kontai.

² Mano niari muniara foi wenoti Yesusi tuti ne inontarai erariati fosa kontai to muniarafoia.

³ Muniarafoi da pariao mayeai ene anggurifo kai, ainanaya Yesusi inang medu wei deyo, "Ene anggurife kai ampa."

⁴ Yesusi yoa we inanai deyo, "Aie, we fiani butang weaifa ria yau tonana? Weo wiro rahida we yeinawi mandoni di yau fo kaharai."

⁵ Manamo Yesusi inang medu we mansarawiri na muniara fosa deyo, "Fifianai aino medurai we mea wa menari kaririai."

⁶ Babeu wonang watai kefang na nanai,* babeu nanai we ambori esoni mereha soai we eruai ea nayai kariri ene koang Yahudi foi. Babeufo bei mani kia mereha literi piaring rai (100).

⁷ Yesusi medu we mansarawirifosa deyo, "Mesoni babeunea sayefang

* **2:6** Babeu wape Yahudifosa enariri na kamiei, wiro na kahofa ura kaha.

na mereha.” Ampafe esoniaia sefang na mereha kaririai.

⁸ Ainanya Yesusi medu wesa deyo, “Into metutu merehawa kuteai meha we mano wenunggamieie we muniaraneia.”

Ampafe eha merehafo kuteai we mano wenunggamieie we muniaraneia foia,

⁹ tuti inontaraifoi bororua inso kariri merehao Yesusi yiwani weanggurifoia nanai, serawera angguri nani na doni ma, manta mansarawirifo saino ewaitawang tera ne. Ainanya sahara medu we mandirau mangfoi deyo,

¹⁰ “O, siai paria! Na doni kontai, na muniarara tonina foi mani, angguri ne bengfo aino etohonai fafong we kaiwasafai dunung ne, akawuru wori ne beng turura kaha fo ki. Wape nina mani, bohong angguri ne beng ninai watai paria arahi bohonai wefuiiai mandieie nina!”

¹¹ Fitantuma nanai Yesusi niari na Kana na nu Galilea foi, wefitantuma reantenang pari na ne fiainawiai fuba niariri foi kiai. Na fitantuma nanai deinawi kariri ne sambewaraio dedai fo tuti ne inontarai erariati fosa eroasoi finanaia.

¹² Mayeai Yesusi da to bendari Kapernaumi ahaweu, inanai, ne tahatuifosa tuti ne inontarai erariati fosa era ruhiae to katai nani aha. Enayai we rahida beiru teai na bendari nani.

Yesusi data kaiwasa etawayangfi na Sempaisi ne Munufoi rorongfo fosa

(Matiusi 21:12-13; Markusi 11:15-17; Lukasi 19:45-46)

¹³ Na rabuang bo Yahudi fosa ene rahida fuba Paska foi rerai we etohonsuari fo, Yesusi dautai to Yerusalem awaei.

¹⁴ Na wanai, na Allai ne Munufoi rofongfo, deti inontaraio etawayang sapi, domba tuti romu muntung fosa eminohi etawayang na nanai, kontai mano eriwang doi fosa eminohi eriwang doi na Munu rorongfoi kontai.

¹⁵ Ampafe niari wai raru batai bei, mayeai dataса weru Allai ne Munufoi; mano etawayang andowa fosa tuti ene sapi tuti domba fosa kontai, tuti mano eriwang doi fosa kifasiaya ene doifo to kahofa wowongfo aweu tuti bebari meja eminohi eriwang naya fo.

¹⁶ We mano etawayang muntung fosa medu wesa deyo, “Meruai fi metawayanai ninai weru katai nini, wiro menari nehu Dai ne Mununei we katai awayangfi nai fanai.”

¹⁷ Ampafe Yesusi ne inontarai erariati fosa earomio kariri kaiwo dotu na Kaiwo Mararebana fo, amani kaiwo Mananu Dauti tuti nabifosa emadu fafong kariri fi arahi Yesusi niari fo, amani dotu deyo,

“Yohong we Dai Allai nemu Munuwai wedaya

niunung enehuro-
rongnei.”*

¹⁸ Mano ewewafoniai we Yahudi fosa etapa Yesusi eteyo, “Todonie enemutituai we nemu mambiriu we batasa tonanai? Fitantuma fianai aino boinawiai we amea, we nemu mambiriu we nari toninaifa ne?”

¹⁹ Ampafe Yesusi yoa wesa deyo, “Metota Sempaisi ne Mununeia wioru, tuti na rahida botoru kawuru mae ibauni aha mesi nariai aha.”

²⁰ Ainanaya Yahudifosa emadu wei eteyo, “Defuina piarua wonang (46) ambori Sempaisi ne Munu nini ebaunia kiai ki, wape boyo bauni na rahida tarai botoru kawuru e?”

²¹ Wape Sempaisi ne munu Yesusi medu kariri foi mani, mantauni ne taraifoi.

²² Ampafe na fui, rahida botoru suwi na marareha rorong foi aha ma fo, arahio ne inontarai erariati fosa earomioaifa we finanai medurai kawuru kaririae ampa. Ampefe eroaso fianai aino dotu na Kaiwo Mararebana fo tuti fianai aino Yesusi medura fo.

²³ Rahida beiru teai niayai na bendari Yerusalem na rahida Paska foi nanai, kaiwasa bitoya eroasoi, we ewati fitantuma bitoya niariri fo.

²⁴ Wape Yesusi mantauni wiro yoaso ea kaha, weo deroanso inontarainesa kiai enemirorongfoi fefe.

²⁵ Weo mandoni kontaio wiro medu kariri inontarainesa wei kaha, weo deitawang kariri inontaraine enemirorongfoi fefe.

3

Yesusi medu we Nikodemus i mani Yahudi ene Majelisi Agama fo manei dine, amani wenunggamiei kontai na agama Yahudi foi.

¹ Farisi manei wonong fino Nikodemus, i mani Yahudi ene Majelisi Agama fo manei dine, amani wenunggamiei kontai na agama Yahudi foi.

² Da diruai we Yesusi ma tuti medu wei deyo, “Dai Rabio Mantaunaune waune, amewaitawanai we wau mani Allai dino demi wau ma ne tuti ro wemantaunau ma. Weo mandoni kontaio wiro niari fitantuma nari nina kaha, Allai weriria wenani fino niari finana fe.”

³ Yesusi yoa deyo, “Tarai antu! Imadurai we mea mau yeyo, mandoni kontai wiro suai tono Allai ne weMananu rorong fo kaha, mae wenani saubaununggamiei riwanai akawuru wo.”

⁴ Ampafe Nikodemus medu we Yesusi aha deyo, “Nana mani inontarai fibai kawurua foi saubaununggamiei riwanai ahang rai e? Todoni wori suai to inang enemanabufoi afui we minohi tutiri riwanai aha ki?”

⁵ Manamo Yesusi yoa deyo, “Tarai antu. Imadurai we mea mau yeyo, masino inontarai manei saubaununggamiei na mereha baptisi foi tuti na Allai Nuaninufoi kaha mani, wenani wiro suai to Allai ne Mananu rorong fo kaha ki.

⁶ Inontaraine, weinontarai batangfo mani, saubaununggamiei na ne wawafo suru, wape na Sempaisi mani

saubaununggamiei weworu na Allai Nuaninufoi.

⁷ Dohonao popuhung we kaiwo imadurai yeyo, 'Todoni kontaio metaubau menumikamiei riwanai ahangfo,' fanai.

⁸ Wanangnei siaya to katai doni deyo defai wea fo tuti taramuo i we nukuayafo, wape wiro boitawang siayai na doni ma fo kaha tuti siayai to doni fo kaha. Mano saubaununggamiei na Allai Nuaninufoi tonanai kontai, todoni saubaununggamieia weworu tonana fo tawaitawana kaha, nanai na Allai Nuaninufoi terai."

⁹ Ainanaya Nikodemusi medu we Yesusi aha deyo, "Finanai kawariai todoni rai?"

¹⁰ Ampafe Yesusi yoa wei aha deyo, "Wau mani mantaunau Israeli di wau, wape todoni fino boitawang finana kahai nina?

¹¹ Tarai antu! Imadurai we mea mau yeyo, amemadu kariri fianai aino amewaitawana fo, tuti ametairiri kariri fianai aino amewati teri fo, wape wiro meroaso fi amemadurai tonana fo kaha.

¹² Yeiriri kariri finunei we mea, wape meroasoa kahai. Nana mani, yeiriri kariri fi na rorafaisi we mea fo, meroasoa todoni ki?

¹³ Weo wiro inontaraine manei dautai to rorafaisi kaha, manta mano ibiari na rorafaisi meu ne yau, amani Kaisung Inontarai ne yau.

¹⁴ Tuti ne tarai karirifafongfa Musai yuai tawai tembagia foia dedai na katai

wekamamiei fo ambori mano tawai ehirisa nanisa etarang,* tonanai kontai Kaisung Inontarai nei todoni kontaio ruaisi dedai,

¹⁵ ambori mandoni kontaio yoasoi mani sobu numainufo.

¹⁶ Weo Allai enewawu nunei fuba paria, doni dohongno ne Kaisung Mansiari foi, ambori mandoni dino yoasoi mani wiro wioru kaha, mae sobuo numainufo.

¹⁷ Weo Allai demi ne Kaisungfoi meufo wiro we kiutu kaiwo kariri nunei kaha, mae we feriri nunei na I.

¹⁸ Mandoni dino yoasoi mani wiro sodai aiboifo kaha, mae mandoni dino yoasoi kaha mani, wenani aiboi sobua fo mani Allai kituui kariri ampa, weo wiro yoaso ne Kaisung Mansiari foi kaha fefe.

¹⁹ Weyoasoa kahai nani, fi dapai we sobu aiboifo ainina: Sambewarafoi da kawuru to nunei ma ne, wape inontaraine etohong we mamanntiti rorong fo sewa weru Sambewarafoi, weo enari ne karirafo fefe.

²⁰ Weo mandoni kontai andino niari ne karirafo mani, enerireu Sambewarafo, tuti wenani miaya we da to Sambewarafo kaha, weo mitai ne karira niari nanai kawariai ati para rai fefe.

²¹ Wape mandoni dino niari kariri ne wetaraifo mani da to Sambewarafo, ambori wati parai we fianai

* 3:14 Bilangan 21:4-9

aino niari nanai niari na Allai."

*Yohanesi medu kariri
Yesusi we ne inontarai erariati fosa*

²² Mayeai Yesusi da tuti ne inontarai erariati fosa na bendari Yerusalem to borai awa enayai tourai na nu Yudea foi nani, tuti ewebaptisi kaiwasao eteyo erariati fosa na nanai.

²³ Mae Yohanesi kontai webaptisi kaiwasa na Ainoni kefang we Salimi, weo mereha bitoya na nana fefe. Inontarai era weia we webaptisia nayai,

²⁴ weo rabuang bonani wiro etafu Yohanesia wiatai na aitamu rorong foi kaharai.

²⁵ Rahida bei Yohanesi ne inontarai erariati fosa tuti inontarai Yahudi manei esawasa kariri todoni koangno eruairurangsara emararebanaflo kariri agama Yahudi fo.

²⁶ Ainanaya era we Yohanesia tuti emadu wei eteyo, "Dai Rabio Mantau-naune waune, inontarai mano raminde doa ria wau na waya Yardeni eneung dowarua foi tuti boinawi kariri nani, ninaifa mani webaptisi kontai tuti kaiwasanei kiai era wei pam-pang."

²⁷ Yohanesi yoa wesa deyo, "Inontarai manei sobu mambiru feai we niari fieai mani, nanai na Allai na rorafaisi teraifa.

²⁸ Mantaung mea metaramiao ampa weo, raminde imadu yeo, 'Yau mani Mananu Mampariri nei di yau kaha,

manta inontaraio Allai demi yau we ira foni foi di yau.'

²⁹ Mandirau wiwing foi mani, mandirau mang foi dino nenii ne. Mandirau mang foi ne maniwowirio weririati foi mani doa demang wei, tuti tarao medu mani, firaise paria we tarao raofuifoi. Nehu tarai toyari ne maniwiriri nani ampare yau kontai ifaraise tonanai, tuti ninaia mani ifaraisefo fuba pari ampa weo inontarai efau era weia fefe.

³⁰ Andino todoni kontaio fiabai wewonong aha, tuti yau mani ambori iweinontarai katui tuti iwewonohu ahang kaha.

³¹ Yesusi, mano da na dadaifo meu amani na rorafaisi meu mani, dedai sewa fifiani kontai. Mano da na nunei mani, inontarai nunei dine, tuti ne kaiwo medura fo dotu kariri fi nunei terai. Mano biari na rorafaisi meu mani ne yai sewa fi nunei kiai.

³² Wenani meduairai kariri fianai aino deti teri fo tuti taraoa fo, wape manei wiro yoaso kaiwo medura fo kaha.

³³ Mae mandoni dino tarao kaiwo medura fo tuti yoasoa mani, wenani yoa weai we Allai mani wetarai.

³⁴ Weo Mano Allai demi mani, wenani dino deiriri Allai ne Kaiwofo ne, weo Allai dohong Nuaninufoi weia wiro werea na ea kaha.

³⁵ Dai enewawu ne Kaisungfoi tuti dohong fi kiai tono warang rorong fo ampa.

³⁶ Mandoni dino yoaso Kaisung nani mani, ambori sobu Waidani tuti minohi

wenumainu. Wape mandoni dino deiaya Kaisungfoi mani, wenani sobu numainufo kaha, mae Allai ne kesou fuba fo nayai worui pam-pang we fitawafa."

4

Yesusi medu ria wiwing Samaria manei

¹ Farisifosa etaramioai we Yesusi sobu inontarai erariati bitoya tuti webaptisia weru Yohanesi.

² (Wape Yesusi mantauni webaptisi kaha, mae ne inontarai erariati fosaino ewebaptisi ne.)

³ Ampafe Yesusi deitawanai we Farisifosa etaramio finanafo, da weru nu Yudea foi daraberahi to nu Galilea foi aha.

⁴ Na ne rang rorong da to nu Galilea foi nani, da riria nu Samaria foi.

⁵ Ainanaya Yesusi da wa sobu bendari bei wonong fino Sikhari, katai nani kefang we katai fafongfa Yakupi dohoni we antung Yusupi foi.

⁶ Yakupi ne kamirei mereha sirai foi wiatai na katai nani. Yesusi aweng tafa paria we era waroi fefe, ampafe da wa minohi na merehafoi dereungfo. Rabuang bonani rahida rabuang, tarahio araha ureng suraya boru rai.

⁷⁻⁸ Yesusi ne inontarai erariati fosa era pari to bendar-ifoia we ewori fiang.

Mayeai wiwing Samaria manei da ma we dutu mereha na mereha Yakupi sirai foi. Yesus medu wei

deyo, "Bohong merehafeai we yau we yunung."

⁹ Wiwing Samaria foi pepuhung tuti yoa wei deyo, "Dai wau mani inontarai Yahudi di wau mae, todoni fino butang inontarai Samaria ne yau, we mereha ninai?" (Weo inontarai Yahudi nesa wiro efarao inontarai Samaria nesa kaha.)

¹⁰ Manamo Yesusi yoa wei deyo, "Masino boitawang fianai aino Allai dohona fo tuti mandoni dino dutang wau we bohong mereha we dunung nina mani, ambori butani we mereha ki tuti i ambori dohong mereha darang fo we wau ki."

¹¹ Ampafe wiwingfoi medu wei deyo, "Daie! Nemu pari fi utu mereha nai, tuti kamirei mereha nei berorong paria. Na doni wobu mereha darang fo nanai?"

¹² Dai wau mani wiro fobai sewa amene werengno Yakupi e? Andi dohong kamirei mereha nini we amea tuti mantauni kia mereha we dunung nai, i kontai ne arikangfosa tuti ne fiahungfosa. Mae boyo fobai sewa Yakupi todoni e?"

¹³ Yesusi yoa wei deyo, "Mandoni kontai, mano dunung mereha nini, rananang tataha aha ki.

¹⁴ Wape mandoni dino dunung mereha ambori yohonai wei fo mani, wiro rananang tataha na eai ahang kaha. Mae mereha yohonai nanai, ambori wemereha

ureng deda sabi pampang we numainufo."

¹⁵ Ampafe wiwingfoi medu wei deyo, "Daie, bohong mereka nanai we yau, ambori rahukanang tataha ahang fanai, tuti wiro ira to ninai pampang aha ma we yutu mereka ahang kaha."

¹⁶ Ainanaya Yesusi medu wei aha deyo, "Roa wahu wamuai, kari murarabera muru toninai ma."

¹⁷ Manamo wiwingfoi yoa wei deyo, "Yau mani nehu pari mang." Ampafe Yesusi medu wei deyo, "Kaiwo modura kariri nemu pari mangwa mani tarai,

¹⁸ weo rau mang ringna fininai, tuti mangno minohi ria wau nani mani wiro nemu mang dine kaha. Na fininai, modu tarai nei."

¹⁹ Ainanaya wiwingfoi medu deyo, "Daie! Nina mani kasau we yau ampa we wau mani nabi di wau!"

²⁰ Inontarai Samaria ne amea, amene werengfosa esomi we Allai na uai nini, wape Yahudiwa mea meteyo, inontarai tasomi we Allai mani na Yerusalem terai."

²¹ Yesusi medu aha deyo, "Roaso yau, we rahidafo ambori da ma ki, we inontaraine mesomi we Dai fo wiro na uai nini kaha, tuti wiro na Yerusalem kaha.

²² Inontarai Samaria ne mea mesomi we fi wiro metaroansoa kaha foi, wape Yahudine amea mani amesomi we mano ametaroansoi foi, weo Allai dererai we neo faririfo da na inontarai Yahudi ne amea.

²³ Wape rahidafo ambori da ma ki, tuti da kawuru ma ne, weo mano tarai esomi we Dai Allai esomi na Nuaninu Mirarebana foi tuti esomi na mai. Weo inontarai esomi wei tonana fosaino Dai dawi weai tonanai.

²⁴ Weo Allai mani Nuaninu dine, tuti mandoni kontaio somi wei mani, somi na Allai Nuaninufoi ne mambiri-ufu tuti somi na tarai wei."

²⁵ Wiwingfoi medu wei deyo, "Iwaitawanai we Mananu Mamparirio ahui we Kristusi foi ambori da ma ki. Da ma mani ambori deikariri kariri finini kiai kaririai we amea ki."

²⁶ Yesusi medu deyo, "Mano boyoi nini mani, Yaune, mano yoa imadu ria wau nina!"

²⁷ Na kutu nanai Yesusi ne inontaraifosa etaraberasa na bendarifoi ma. Epapuhung paria we ewati Yesusi medu ria wiwingfoi fo, wape na ea manei wiro dutang bera wiwingfoi deyo, "Fianai aino butani wea fo." Ete etutang-bera Yesusi eteyo, "We fiani modu ria wiwingfoi."

²⁸ Ampafe wiwingfoi sawingno babeu kiari foi wiatai mae mito to bendarifoia deikaririai we inontarai na nana fosa,

²⁹ medu deyo, "Mera ma mewati inontaraio deikaririai we yau kariri fi kiaio raminde inariri foi. Tarahio i mani Mananu Mampariri foi dine fe."

³⁰ Ampafe inontaraifosa era weru bendarifoi to boriei we Yesusia.

³¹ Na siari nanai kontai Yesusi ne inontarai erariati

fosa etutani we etampi, eteyo, "Dai Rabio Mantau-naune waune, bampi."

³² Manamo yoa wesa deyo, "Nehu fiangfea ne, fiang nanai wiro mewaitawana kaha."

³³ Ampafe ne inontaraifosa etutang waweresa eteyo, "Manei kia fiangfeai wei ma re?"

³⁴ Ainanaya Yesusi medu deyo, "Nehu fiangne mani yohong kariri fianai aino mano demi yau foi dawi wea fo, tuti inari kariri fio demi yau we inari foa kai.

³⁵ Memadu meteyo, embai boa aha mani rahida we tateting fitatanangfo. Wape imadu we mea mau yeyo, mewati wari katai metoari naya wa tuti mewati to romifo, fitantanangfi bioangna kiai ampa tuti meineng we metetini ampa.

³⁶ Na ninaifa kontaio mano eteting fi fosa esobu ene fiembaitafo, tuti efanduhi fi etetinai nanai we esobu numainufo. Ampafe mano eteting fi fosa tuti mano anta etanang fosa efaraise ruhiae.

³⁷ Weo na fi toninane wetarai kariri kaiwo neta weai ninai amani, 'Manei sanang fi tuti manei siai andino detinai.'

³⁸ Yemi mea mera we meteting fio wiro metanang kaha fo, inontarai siai ansaino etanang tuti erurai nai, tuti mera wa we metetingno fi wetarai nano ene fi eru fo nanai."

³⁹ Inontarai Samaria bitoya na bendarifoi eroaso Yesusi, weo kaiwo wiwingfoi medurai fa deyo, "Fianai aino ra-

minde nanai inaria fo, inontarai nini deisaha kaririaia kai beyari."

⁴⁰ Ampafe inontarai Samaria fosa era wa esobu Yesusi nanai, etutani we niayai na nanai riasa, ampafe Yesusi niayai na nanai rahida boru.

⁴¹ Kaiwasa bitoya aha eroasoai we etarami te Yesusi mantauni ne kaiwo aunau medurai wesa fo fefe.

⁴² Tuti emadu we wiwingfoi eteyo, "Ninaia mani ameroasoai ampa, wape wiro we kaiwo modurai we amea fo tera kaha, mae we mantaung amea ametarami terai we medufo tuti amewaitawanai we inontarai nani mani tarai Mananuo feriri nunei dine."

Yesusi niari inontarai fuba yufi na munu mananu foi ne arikangfoi denteng

(Matiusi 8:5-13; Lukasi 7:1-10)

⁴³ Yesusi ne rahida boru na Samariara nanai, mayeai da pari to nu Galilea foi aha.

⁴⁴ Weo mantauni raminde medurai kawuru ampa deyo, "Nabi manei na ne katai saubaunung nai foi, ne inontaraifosa wiro etatori kaha."

⁴⁵ Ampafe na rahida da wa sobu nu Galilea foi nanai, inontarai na wana fosa etamang wei na enemirorong mirising, weo ewati te fitantuma fuba raminde niariri kiai na bendari Yerusalem na rahida fuba Paska foi fo weo ea kontai anta era to wanai we etohonsua rahidafoi nai fefe.

⁴⁶ Ampafe da paria sobu Kana na nu Galilea foi aha,

kataio raminde niari merehafoia weangguri denteng pari fo. Na bendarifoi inontarai fuba na munu mananu foi manei, ne arikangfoi meninang na bendari Kaper-naumi.

⁴⁷ Taraoai we Yesusi da na nu Yudea foi to Galilea foi ma nanai, da wei tuti dutani paria we da riatia niari ne arikangfoia denteng, weo meninangna adareti mireha fefe.

⁴⁸ Ampafe Yesusi medu we inontaraifoi aha deyo, "Todoni e? Masino mewati fitantumafea tuti fiainawiaifea kaha mani, wiro meroasoai na ea kaha nina."

⁴⁹ Wape inontarai fuba foi medu we Yesusi deyo, "Daie, ro na nehu arikangfi wiro mireha kahai wanaia."

⁵⁰ Yesusi medu wei aha deyo, "Roa, nemu arikangfoi darang ki."

Inontaraifoi yoaso Yesusi ne kaiwofo, ainanaya da wa.

⁵¹ Na rang rabuang, ne mangfatafosa era weuwi ma eteisaharai wei eteyo, "Daie, nemu arikangfoi darang fo."

⁵² Ainanaya dutang berasa deyo, "Araha ureng beiru mani denteng?" Eroa wei eteyo, "Ramindenafa, tarahio araha ureng boyari rahida rabuang mani ne tarai meninggapoi denunangfo niai."

⁵³ Ainanaya inontaraifoi arooaifa we na araha ureng bonani dino Yesusi medu wei deyo, "Nemu arikangfoi darang ki." Ampafe i tuti ne

munu rorong foi sentenang eroaso Yesusi.

⁵⁴ Finana mani, fitantuma weberuo Yesusi niari na nu Galilea foi na rabuang bo daraberahi na nu Yudea foi ma fo ainana.

5

Yesusi niari inontarai manei denteng na rahida Sabatifo, na Kuru Betesda

¹ Webeiru teai aha mani, rahida fuba Yahudi bei, ampafe Yesusi da to bendari Yerusalem awiai.

² Na Yerusalem kefang we kataio wonong *Rahutu Domba foi*, na nanai kuru mereha fiabai bei, na kaiwo Iberani mani wonong fino Betesda. Na rurang kuru mereha Betesda nani ne refongfo ring.

³ Inontarai emaninang bitoya ewatai na munu refong nanai, manea euremifafa, manea era esoberasa, tuti manea kontai efaya. [Inontarai nanisa kiai ewatai etamang we mereha na kurufoi wedohifo.

⁴ Weo wea mani Sempaisi ne wewai manei biari na rorafaisi to kurufoi meu we nihing merehafoi. Tuti inontarai meninang mano saukaha merehafoi reantenang mani, ne maninangfoi niai weruri, maninang sodoni fei kontai ki.]*

⁵ Na katai nani, mang manei meninangfo defuina piareia sura suraya indeatoru ampa (38).

* ^{5:4} Kaiwo na tanda [...] toninai wiro obuai na kaiwo asli ete reantenang pari fo kaha.

⁶ Yesusi detioi we wiatai na nanafo, tuti deitawanai we meninang tonana fo waroi ampa, ampare dutang berahi deyo, "Boyo bonteng ne?"

⁷ Inontarai meninang foi yoa wei deyo, "Daie, wiro manei minohi kefang na ni-nai we merehanei dohi mani, su yau to kurufoi aweu kaha. Tuti irurai we isawaya to kurufoia, wape manei nefafong kawurua saukaharia."

⁸ Yesusi medu wei aha deyo, "Boabari wau ruai nemu andaungwai tuti roa."

⁹ Na kutu nanai kontaio inontaraifoi denteng tuti yuai ne andaungfoi tuti da.

Wape rahida bonani mani, rahida Sabati dine.

¹⁰ Ampafe mano ewenunggamieie we Yahudi fosa emadu we mano arahi denteng nani eteyo, "Rahida nini mani rahida Sabati dine. Tonana mani kariri hukumi na tane agamane mani wodua nemu andaungwai ro fanai."

¹¹ Manamo inontaraifoi yoa wesa deyo, "Mano anta niari yau yenteng foi, andino medu we yau deyo, 'Ruai nemu andaungwai tuti ro.'"

¹² Ampafe etutang berahi eteyo, "Mano demi wau ruai nemu andaungwai tuti ro nani mani, mandoni dine?"

¹³ Manamo inontarai dentengna nani wiro deitawang mandoni dino niariri denteng tonanafo kaha, weo Yesusi fiononami na kaiwasa bitoya foia fefe.

¹⁴ Waroi aha kaha mae Yesusi sobu inontaraifoi na Sempaisi ne Munufoi

rorongfo aha tuti medu wei deyo, "Ninaia mani bonteng ampa, ampare wiro nari sasari ahang fanai, ambori wiro wodai ne karira pari sewa fo ahang kaha."

¹⁵ Ainanaya inontaraifoi da wa deikariraijai we mano ewenunggamieie we Yahudi fosa, we Yesusi dino niariri denteng tonana ne.

¹⁶ Tuti na tonanane wedaya mano ewenunggamieie we Yahudi fosa erurai we enari kanggani Yesusi, weo niari fi tonana fo na rahida Sabatifo fefe.

¹⁷ Wape Yesusi medu wesa deyo, "Nehu Dai yufi paria sobu ninai, tuti yau kontai irufi kontai."

¹⁸ Yesusi ne kaiwo medurai nanai wedayasa erurai mam-biriu aha we emuni. Enari tonanafo wiro we dohong sara fi dotu na Hukumi Musai soi fo [hukumi na ene agamafo] kariri rahida Sabatifo tera fo kaha, wape kontai we medu deyo Allai mani tamang dine fo, weo na tonanane yuaisi we ne tarai kariri Allai.

Yesusi medu kariri ne mambiriufo

¹⁹ Nanai wedaya Yesusi yoa wesa medu toninai deyo, "Tarai antu, imadurai we mea mau yeyo, Kaisungfoi wiro biriu we niari fieai na mantauni kaha, mae fio detioai ria Tamai we niari fo fine. Weo fianai aino Tamang niari fo, finanai kontai aino Kaisungfoi niari ne.

²⁰ Weo Tamang enewawu ne Kaisungfoi tuti deinawi fi fuba mantauni niariri foi wei

kiai. Tuti Tamainai kontai ambori deinawi fi niario fuba sewa weru ne nanaifa fo wei aha ki, nanai wedaya mea mepapuhung pari aha.

²¹ Weo kariri Dai we duwi inontarai emarareha fosa tuti dohonsa etarang ahang fo, tonanai kontai we Kaisungfoi, mandoni dino eneoi we duwiri aha darang ahang fo ambori niariri darang tonanai ki.

²² Dai wiro kiutu kaiwo kariri inontarai manei kaha, mae mambiriu we kutu kaiwo kariri inontarai tonanafo dohonai we Kaisungfoi ampa,

²³ ambori kaiwasanei kiai esomi we Kaisungfoi kariri esomi we Daifo. Mandoni dino somi we Kaisungfoi kaha mani, wiro somi we Dai mano demi Kaisungfoi da ma foi kaha.

²⁴ Tarai antu, imadurai we mea mau yeyo, mandoni dino tarao nehu kaiwone tuti yoaso Mano demi yau foi mani, sobu numainufo ampa tuti wiro sodai aiboifo konta kaha, weo wenani tiwera weru mararehafoi to arangfo ampa.

²⁵ Tarai antu, imadurai we mea mau yeyo, rahidafo ambori da ma ki, tuti da kawuru ma ne, we inontarai emarareha fosa ambori etaramioi Allai ne Kaisungfoi raofuifoi. Tuti mano etaramioi fosa ambori etarang ki.

²⁶ Weo Dai mantauni mani arangfoi weneung nai, tonanai kontai we I ambori dohongno mambiriu dohong arangfo nani we ne

Kaisungfoi, ampafe arangfoi weneung nai kontai.

²⁷ Tuti dohong mambiriu kontai we ne Kaisungfoi we kiutu kaiwo, we I mani Kaisung Inontarai foi dine.

²⁸ Wiro mepapuhung we fi metaramioai nina fanai, weo rahidafo ambori da ma ki, inontarai emararehara fosa kiai ambori etaramioi raofuifoi,

²⁹ tuti era to borai weru ene fafo rorong fo, mano enari ne bengfo ambori etoabarisa we etarang we numainufo, wape mano enari ne karira fosa, ambori etoabarisa we esobu aiboifo.”

Yesusi medu kariri fi kiaio deinawi kariri Ifo

³⁰ “Yau mani wiro iwe-mambiriu we inari fieaifa na mantaung yau nehu awiafo kaha. Ikutu kaiwo kariri fianai aino tarahuai na Allai fo. Tuti fianai aino ikutuai tonana fo mai, weo wiro yohong we ikutu kaiwo kariri nehu awiafo kaha, mae kariri Dai mano demi yau foi ne awiafo.

³¹ Masino mantaung yau yeiririai yeisaharai we Allai andino demi yau ma ne, fi imaduairai nanai wiro we-fiea kaha.

³² Wape inontarai siai manei dino meduairai kariri yau ne, tuti iwaitawanai we fi medurai kariri yau nanai wetaraifi.

³³ Metemi inontarai we Yohanesia we etutang berahi tuti meduairai kariri ne wetaraifo.

³⁴ Fi medurai tonana ne, wiro isera we yeyo inontarai

emaduairai kariri yau kaha, wape we ambori meroaso ne kaiwofo ambori mesobu faririfo.

³⁵ Yohanesi nini ne tarai kariri padamarangno denggararu tuti sambewarai. Tuti mefaraise menayai na sambewarai nani tourai fa.

³⁶ Wape fiainawiai kariri yau ne fuba sewa Yohanesi medura fo, amani fi kiaio Dai dohonai we yau we ambori inari kariria ne. Finanai kontai aino inari nina, tuti finanai wefiainawiai kariri yau we Dai demi yau.

³⁷ Tuti Dai mano demi yau nei, andino meduairai kariri yau ne. Wiro metarami rao-fuifoi na ea kaha rai, urengfo terai kontaio wiro mewatioai na ea kaha rai,

³⁸ tuti ne Kaiwofo wiro metanamai na menemiro-rongwai kaha, weo mano demi ma nini mani, wiro meroasoi kaha fefe.

³⁹ Merurai paria we metato Kaiwo Mararebana fo we ambori mewaitawanai na mai, weo mewaitarahio mesobu numainufo na Kaiwo nanai. Tuti Kaiwo Mararebanai nani medu deinawi kariri yau tonanai ki,

⁴⁰ wape wiro memaya we mera we yau ma we mesobu arangfo kaha.

⁴¹ Yau mani wiro isera we inontaraine mefiai yau kaha.

⁴² Weo mea mani yeroanso mea, iwaitawanai we wiro menemiwawu Allai na menemirorongwai kaha.

⁴³ Ira kawuru ma ne na Dai wonongfo ampa, tuti wiro metamang we yau kaha. Wape inontarai siai manei da

na mantauni wonongfo ma mani, wenani metamang wei na mai.

⁴⁴ Ampafe masino meparaise we mantaung mea mefiai bera mea, mae wiro mesera we Allai mano Mansiri foi we fiai mea kaha, nana mani ambori meroasoai todoni?

⁴⁵ Wape dohonao mewaitarahio yauno ambori yinggai mea na Dai arongreafo fe. Mae mano ambori dinggai mea mani Musai, mano menemitawani foi.

⁴⁶ Weo masino meroaso Musai tarai mani, todoni kontaio meroaso yau konta rai. Weo fianai aino Musai soi fo mani soi kariri yau.

⁴⁷ Wape masino meroaso fianai aino Musai soi fo kaha mani, todoni meroaso nehu kaiwo imaduraifa ne ki?"

6

Yesusi dohong inontarai ewepiaura wering wering (5.000) etampi

(Matiusi 14:13-21; Markusi 6:32-44; Lukasi 9:10-17)

¹ Mayeai Yesusi da to ruru Galilea foi eneung dowaruai, amani ruruo esahui we Rawanangno Tiberiasi foi.

² Kaiwasa bitoya paria na katai nani era riati, weo ewati fitantuma bitoyao Yesusi niariri foi, amani niari inontarai emaninang fosara ebeng fo.

³ Yesusi dautai to wiwoifoi ayai minohi na nanai ria ne inontarai erariati fosa.

⁴ Rabuang bonani mani rerai we rahida fuba Yahudi

fosa esahui we rahida Paska foi.

⁵ Yesusi fioai ureng deti wari katai doa nai foi tonanaia fo, deti kaiwasa bitoya paria era wei ma. Ampafe medu we Pilipusi deyo, "Tawori fiangfeai na doni we tatohong inontarai fuba nini kiai dampi ne?"

⁶ (Yesusi medu tonanafo we titua kariri Pilipusi ne yoasoaf, weo Yesusi mantauni deitawang fianai aino ambori niari fo ampa.)

⁷ Pilipusi yoa wei aha deyo, "Roti ne harga doi dinari* piaring weberu (200) kontaio wiro demoya inontarai fuba ninisa kaha, masino ene we marirahi kontai ki."

⁸ Yesusi ne inontarai erariati fo manei wonong fino Andareasi, i mani Simon Petrusi ne tahatuifoi dine, medu we Yesusi deyo,

⁹ "Kaisung manei na ni-naifa ne, ne roti ring tuti diang mandu ne. Wape kutu tonanane we fiani rai we kaiwasa fuba tonina fine?"

¹⁰ Yesusi medu deyo, "Metemi kaiwasawai minohi." Katai nani weninoi ampafe kaiwasafai minohi na kahofa nuwowongfo, kaiwasa nani titou mangfosa tera mani ewepiaura wering wering (5.000).

¹¹ Ainanaya Yesusi kia rotifo ma dutang tutirai we Allai, dohong mahikai wei, ainanaya fioabau rotifo tuti detorai we kaiwasa bitoya foi. Niari tonanai kontai we

diangfo tuti dohonsa etampi pariao emamosi paria.

¹² Kaiwasafai dampia memosi beyari tonanaia, Yesusi medu we ne inontarai erariati fosa deyo, "Mefanduhi fiang sea wai, dohonaowea watai funoma fe."

¹³ Ainanaya efanduhi ne searifo na roti ring etani nani mani, bayai fuba suraya boru sefang.

¹⁴ Rabuang bo kaiwasa bitoya foi deti fitantuma Yesusi niariri tonana foi nanai emadu eteyo, "Tarai inontarai nini mani, Nabio taenemitawani we da to nunei ma fi dine!"

¹⁵ Yesusi deitawanai we kaiwasafai da ma we etangoari we eruaisi we mananu wesa, ampafe kidori ne taraifoi werusa to uaifoi aha.

*Yesusi da na mereha wowongfo na rurufoi
(Matiusi 14:22-33; Markusi 6:45-52)*

¹⁶ Dirua mani ne mano erariati fosa ebiari to rurufoi aweu,

¹⁷ tuti etauo wafeai etafai wanambafoi to Kapernau-mia. Dirufoi waroi ampa wape Yesusi wiro da wesa ma kaharai.

¹⁸ Etafai tonanai mayeai dobarafoi bia na rurufoi wedaya rurufoi weandeisa paria.

¹⁹ Ewo touraia meirabuang, tarahio kiro ring ete wonang teai weru reifo tonanai, mayeai ewati Yesusi da na ai wowongfo wesa to

* **6:7** 200 dinari mani, mai toyari manei ne fiembaitai yufi we embai indeatoru fo.

ene wafoia. Ewatioi nanai
ematai paria.

²⁰ Wape Yesusi medu wesa deyo, "Mematai fanai, yaune!"

²¹ Ainanaya na enemiro-
rong mirising etamang wei
we dautai to ene wafoi, tuti
na tatofang nanai kontai ene
wafoi fong suba katai etafai
wei foja.

*Kaiwasa bitoya esera we
Yesusi*

Testasi
22 Kameaia mani, kaiwasa
bitoyao niayai na ruru ene-
ung dowej foi nani, ewatioai
we wafeai na nanai konta
kaha, mae wa rowoyario
anta inontarai ewesuraya
mandu fosa etauoi foi terai,
tuti ewaitawanai we Yesusi
wiro dautai riasa kaha, mae
titou ne inontarai ewesuraya
mandu fosa terai. Ampafe
enemittuitai paria.

²³ Mayeai wa roweiru teai
dafai na bendari Tiberias
kefang to katai ramindenafa
Seng Yesusi dohong mahikai
we Allai we rotifo tuti do-
honaia kaiwasa bitoya foi
etangfo.

²⁴ Rabuang bo kaiwasa
bitoya foi ewatioai we Yesusi
tuti ne inontarai erariati
fosa enayai na nana kaha fo,
ea kontai etautaio wa anta
dafai ma nanai tuti etafai
to bendari Kapernaumi we
esera we Yesusi nayai.

*Yesusi mani rotio wedaya
kaiwasa etarang we fitawafa
dine*

²⁵ Na kutu kaiwasa bitoya
foi esobu Yesusi na ruru
eneung dowej fo nanai,

etutang berahi eteyo, "Dai Rabio Mantaunaune waune, araha ureng beiru wobu katai nini?"

26 Yesusi yoa wesa deyo,
"Tarai antu! Imadurai we
mea mau yeo, mesera
we yaune wiro we metafu
fitantuma inari fo na mai
kaha, wape we yohong mea
metampia memamosia fo.

27 Dohonao merufi we mesobu fiangno ambori kai tuti karira fo fanai, mae merufi we fiangno watai we fitawafa fo tuti dohong mea mesobu numainufo. Fiang nanai ambori Kaisung Inontarai nei dohonai we mea ki. Weo I mani, Dai Allai yuaisi we sobu ne mambiriupo tuti na tonanane deinawiai we yoa wei paria."

²⁸ Ainanaya etutang berahi eteyo, "Amenari fiani ambori ameru fio Allai dawi wea fo tonana ne?"

“Fi Allai dawiai we meru ne
mani, meroaso mano Allai
demi ma nei.”

³⁰ Ampafe eroa wei aha eteyo, "Tonana mani fitan-tuma fiani aino bohonaifa we fiainawiai we amea ambori amewatioai tuti ameroaso wau ne? Fianai aino nari ne?

31 Bohongno fiang weamea, amani fiang mannao amene werengfosa fafongfa etang na katai wekamamiei minano fo. Kariri kaiwo dotukariri Musai fo devo.

**'Dohongno roti na rorafaisi
we etani ,*''**

32 Ainanaya Yesusi yoawesa aha deyo, "Tarai antu!

* 6:31 Keluaran 16:4, 15; Masmuri 78:24

Imadurai we mea mau yeyo, wiro Musai dino dohong roti na rorafaisi we meafo kaha, mae Dai andino dohong rotio tarai fo na rorafaisi meu ne.

³³ Weo Allai ne rotifo mani, rotio biari na rorafaisi meu fine tuti dohong arangfo we nunei."

³⁴ Etaramio Yesusi medu tonanafo, etutani aha eteyo, "Dai Mantaunaune waune, bohongno roti nanai we amea pampang."

³⁵ Ampafe Yesusi medu wesa deyo, "Yauno iwerotio dohong inontaraine mea metarang ne. Mandoni kontai andino da we yau ma mani wiro wewisi ahang kahai we fitawafa, tuti mandoni kontai andino yoaso yau mani, wiro arongtataha na weai ahang kaha.

³⁶ Wape toyari anta yeisaharai we meara nanai, mewati yau kawuru ampa, tonanai ki mae meroasoa kaha ne rai.

³⁷ Kaiwasa fuba Dai dohonsa we yaua fosa ambori era we yau ma ki. Tuti mandoni kontaio andino da we yau ma fo, wiro ikabioi kaha.

³⁸ Weo ibiari na rorafaisi meu ne wiro we yohong kariri nehu awiane kaha, mae we yohong kariri mano demi yau foi, amani Allai, ne awiafo.

³⁹ Tuti mano demi yau foi ne awiafo ainina: ambori na kaiwasa fuba dohonsa we yau ma nanisa, maneи wiro wioru fanai, wape ambori yuwisara esuwi aha na Rahida Wefuiai pari foi.

⁴⁰ Weo Dai ne dawiafo ainina, amani ambori mandoni kontai andino deti Kaisung-foi tuti yoasoi mani, sobu numainufo tuti ambori yuwiri aha na Rahida Wefuiai pari foi."

⁴¹ Inontarai Yahudi fosa ehutu Yesusi na enemiro-rong, weo medu deyo, "Yau mani rotio ibiari na rorafaisi meu di yau fo."

⁴² Ampafe emadu eteyo, "Tofino? Mano medu nini mani Yesusio Yusupi antung-foi dine mae, inang tamang suru mani tataroanso suru ampa? Todoni fino medu deyo i mani roti biari na rorafaisi meu dine nina?"

⁴³ Ainanaya Yesusi medu wesa deyo, "Mehutu yau fanai.

⁴⁴ Mandoni kontaio wiro wemambiriw we da we yau ma kaha, mae Dai, mano demi yau ma foi, kia wenani we yau ma reto, tuti mandoni dino da ma mani, ambori yuwiria suwi na Rahida Wefuiai pari foi ki.

⁴⁵ Na kaiwo nabifosa esoi fo dotu tonina:

"Tuti ea kiai ambori Allai deunausa ki.*"

Mandoni kontaio taraoai tuti sobu aunaufu ria Dai fo, da we yau ma.

⁴⁶ Na tonanafo wiro deinaw-iai we maneи deti Dai kawuru ampa kaha. Weo maneи wiro deti Dai kahaia, manta mano da na Allai ma foi terai, andino deti Dai ne.

⁴⁷ Tarai antu! Imadurai we mea mau yeyo, mandoni dino yoaso yau mani, sobu numainufo.

* **6:45** Yesayai 54:13

48 Yau mani rotio dohong inontarai etarang foi di yau.

49 Mene werengfosa fafongfa etangno manafoi na katai wekamamiee minano foi mae emarareha ampa.

50 Wape rotio biari na rorafaesi meu ne andinini, tuti mandoni dino dangno roti nini mani, wenani wiro mireha kaha.

51 Yauno roti darangno biari na rorafaesi meu ne, amani rotio dohong arang foi. Mandoni dino dang roti nini mani ambori minohi we numainu. Roti nini mani nehu tarainei dine, tuti nehu tarainei, yohoni ki, ambori inontarainesa na nunei etarang."

52 Inontarai Yahudi fosa etaramio Yesusi medu tonanafo, esawa waweresa tuti emadu eteyo, "Todoni fino inontarai nini deyo dohong ne taraifoi we tata we tatani nina?"

53 Ainanaya Yesusi medu wesa deyo, "Tarai antu! Imadurai we mea mau yeyo, masinowiro metang Kaisung Inontarai nei ne taraifoi tuti metunung ne rikafoi kaha mani, wiro metarang tarai kaha.

54 Inontarai mano dang nehu tarainei tuti dunung nehu rikanei mani darang we numainu tuti ambori yuwiri na Rahida Wefuia foi ki.

55 Weo nehu tarainei mani tarai fiang fine, tuti nehu rikanei mani tarai fiunung fine.

56 Inontarai mano dang nehu tarainei tuti dunung

nehu rikanei mani, weboyaria yau pampang, tuti yau kontai iweboyari riati.

57 Toyari Dai mano darang we fitawafa nani, demi yau, tuti yau kontai iminohi yarang na I, tonanai kontai we mano dang nehu tarainei, ambori na yau minohi darang.

58 Roti biari na rorafaesi meu foi dinani, wiro roti kariri mene werengfosa fafongfa etani foi tuti emararehafo kaha. Mandoni dino dang roti nini mani ambori minohi darang we fitawafa."

59 Finanai kai Yesusi medurai na Kapernaumi, na rahida deunau na munu agama Yahudi foi fo.

*Na Galilea kaiwasa eraria
Yesusifosa bitoya esu to fui*

60 Etaramio Yesusi ne kaiwofo tonanaia fo, Yesusi ne inontarai erariati fosa bitoya emadu eteyo, "Kaiwone maraba paria we tata. Mandoni dino wemambiriu we taraoa ne!"

61 Yesusi mantauni deitawanai we ne inontarai erariati fosa ehutuwi na enemirorongfoi we kaiwo medurai tonana fo, ampare medu wesa deyo, "Meparaise we kaiwo anta imadura nana kaha e?

62 Tonanaifa mani, todoni we mea rai e, na rahida mewati Kaisung Inontarai nei dautai to ne katai raminde biari nai meu foi ki?

63 Allai Nuaninufoi andino dohong arangfo we nunei ne, inontarai nunei ene mambiriupo wiro wifiea kaha. Kaiwo imadurai we mea mau nina

mani, kaiwo na Allai Nuanin-ufoi aine tuti kaiwo dohong arangfoi fine.

⁶⁴ Tonanai ki wape na mea manea wiro eroasoa kaha." Yesusi medu tonanai, we na reantenangfo deitawanai kawuru we mandoni dino yoasoa kaha fo, tuti deitawanai kontai we mandoni dino ambori dewayani fo ampa.

⁶⁵ Ainanaya medu aha deyo, "Nanai wedaya anta yeisaharai we mea yeyo: Mandoni kontaio wiro da we yau ma kaha, mae Dai kiari we yau ma reto."

⁶⁶ Na rahida bonani to fongna fo, inontarai erariati fosa bitoya esu to fui tuti wiro erariati ahang kaha.

⁶⁷ Ainanaya Yesusi dutang bera ne inontarai ewesuraya mandu dirisa fosa deyo, "Mea kontai, meteyo mera weru yau tonana e?"

⁶⁸ Simon Petrusi yoa we Yesusi deyo, "Sengwa wau, mandoni dino amerawi aha ne? Nemu kaiwone terai aino dohong inontaraine tata tatarang we numainufo ne."

⁶⁹ Ameroasoai tuti amewaitawanai tarai we wau mani Mano Murarebanai na Allai di wau."

⁷⁰ Yesusi medu wesa deyo, "Imesiri yauno yiri mano mewesuraya mandu nini mea ne, tonanai ki wape manei na mea mani, we-Saminseni dine."

⁷¹ Mano Yesusi medu kariri tonanai foi mani Yudasi, Simon Iskarioti antungfoi. Weo Yudasi nini mani manei na inontarai ewesuraya

manduo Yesusi dirisa fosa dine, wape andino ambori dewayang Yesusi ki.

7

Yesusi ne tahatuifosa etanggoari we da to Yerusalem ambori kai-wasafoi ewatioi

¹ Mayeai Yesusi da wari nu Galilea foi, weo miaya we da wa niayai na nu Yudea foi aha kaha, weo na wanai mano ewenunggamie i we Yahudi fosa erurai we emuni fefe.

² Rabuang bonani mani rerai we inontarai Yahudi fosa ene rahida fuba esahui we Rahida Warumai fo.

³ Ampafe Yesusi ne tahatuifosa emadu wei eteyo, "Munohi pampang na ninai fanai, mae ro to nu Yudea foia, ambori nemu inontarai eraria wau fosa ewati fianai aino nari fo.

⁴ Weo inontarai manei deyo ambori wewonong na kaiwasa bitoya foi mani, wiro fi niari fo niari worawa kaha. Masino nari fi tonana fo mani, boinawi nemu taraiwai we nunei we deitawanai!"

⁵ Weo ne tahatuifo mantaunsa kontai wiro eroasoi weMananu Mampariri foi dine fo kaha.

⁶ Manamo Yesusi medu wesa deyo, "Nehu rahida we yeinawi yau fo mai kaharai, wape we mea mani rahida fiani kontai mai we mea.

⁷ Weo nunei wiro enerireu mea kaha, wape yau mani nunei enerireu yau, weo imadurai pampang kariri

nunei we fi niari fo mani, fi karira fine.

⁸ Ampafe mera to Rahida fuba nania. Yau mani wiro ira riata kaharai, weo wiro nehu rahida mai kaharai."

⁹ Yesusi medu tonanai we ne tahatuifosara, tuti mantauni niayai na nu Galilea foi.

¹⁰ Wape Yesusi ne tahatuifosa era fafongna, mayeai mantauni na mamunggasai da riasa to Rahida fuba foi na Yerusalem aha ambori kaiwasafoi wiro deitawana kaha.

¹¹ Na rahida etohonsua rahida fuba nani fo, mano ewenunggamieie we Yahudi fosa esera wei tuti etutang wawerahaifa eteyo, "Andi doni?"

¹² Tuti kaiwasa bitoya esaimumung wawerasa kariri i, maneae eteyo, "I mani inontarai denteng dine." Manea kontai eteyo, "Bereri! I sofa wawera kaiwasanei."

¹³ Tonanai ki wape manei wiro wemang we medu parai kariri i kaha, weo ematai mano ewenunggamieie we Yahudi fosa fefe.

Yesusi deunau na Rahida Warumai foi

¹⁴ Etohonsua Rahida fuba foia meirabuang, mayeai Yesusi suai to Allai ne Munufoi afui, tuti deunau kaiwasafoi.

¹⁵ Mano ewenunggamieie we Yahudi fosa epapuhung wei paria tuti emadu eteyo, "Inontarai nini sobu aunau na ea kaha, wape todoni fino deitawang fi bitoya paria kariri Sempaisi ne Kaiwofo nina?"

¹⁶ Yesusi yoa wesa deyo, "Fio yeunauwai ninai wiro na mantaung yau kaha, mae na I, mano demi yau foi.

¹⁷ Mandoni kontai deyo dohong kariri Allai ne dawiafo mani, deitawanaifa we nehu aunau ninai na Allai ete na mantaung yau e.

¹⁸ Inontarai mano medu na mantauni foi mani, wenani sera we wewonong. Wape mano sera we mano demi foi ambori wewonong foi mani, inontarai nani mesi, wiro tetofa kaha.

¹⁹ Allai ne Hukumifo raminde Musai dohoni we mea ampa. Tonanai ki, wape na mea manei wiro dohong kariri Hukumi nana kaha. We fianie merurai we memung yau nina?"

²⁰ Kaiwasa bitoya foi eroa we Yesusi eteyo, "Wefiauou ampa! Mandoni dino deyo yurai we miung wau ne?"

²¹ Yesusi yoa wesa aha deyo, "Inari fitantuma beyari na rahida Sabati foi, tuti wedaya mea kiai mepapuhung wéa.

²² Musai dohong kaiwofoa watai we todoni kontaio mewesunati. Mae tarai we sunati nani wiro na Musai ma kaha, mae na wawao ene fafongna fosa. Tuti arikang manei ne rahida we wesunati foi tete rahida Sabati bei mani, menemitituai towea kaha mae mewesunati na rahida Sabati nani kontai.

²³ Mewesunati arikang na rahida Sabati tonanai we ambori wiro metohong sara Kaiwo Musai soi kariri sunati foi fanai, tonana mani we fianie mehasou yau we inari

inontarai manei ne taraifo sentenang denteng na rahida Sabati foi nina?

²⁴ Wiro mehutu kaiwo kariri inontaraine kariri fio watioa fo ahang fanai, mae mehutu kaiwo mani na mai to.”

Inontarai esawasa kariri tarai Yesusi mani Mananu Mampariri dine ete bereri e

²⁵ Mayeai inontarai Yerusalem maneiru teai emadu eteyo, “Inontarai nini dino esera wei we emuni ne mae?”

²⁶ Wape mewati, doa medu na kaiwasa bitoya foi euremireafo na wiro mitai kahai, tuti manei wiro medu sobu kaiwofeai wei kaha! Tarahio tane mano ewenunggamieie we tata nesa ewaitawanai we I mani Mananu Mampariri dine foa fe?”

²⁷ Wape inontarai nini tawaitawang kariri ne katai da nai ma fo ampa. Tutti tawaitawanai we Mananu Mampariri foi da ma mani, mandoni kontaio deitawang ne katai da nai ma fo kaha.”

²⁸ Yesusi doa deunau na Sempaisi ne Munufoi tonana fo, sahu na raofui fiabai deyo, “Tarai yau mani metaroanso yau tuti mewaitawang nehu katai ira nai ma fo. Wape wiro ira na mantaung yau nehu awiafo kaha, mae Mano wetarai foi andino demi yau ira ma ne, amani Mano metaroani kaha foi.

²⁹ I mani yeroani, weo ira na I ma tuti andino demi yau ne.”

³⁰ Na siari nanai kontai erurai we etafuri, manamo

manei wiro warakehafo disansoi kaha, weo wiro ne rahida we etafuri kaharai.

³¹ Wape na kaiwasa fuba fianduhi nani, inontarai efau kontai eroasoi tuti emadu eteyo, “Mananu Mampariri foi da ma mani, niari fitantuma bitoya sewa weru fitantuma inontarai nini niari ninaifa ne?”

Farisifosa erurai we etafu Yesusi

³² Farisifosa etaramioai we kaiwasa bitoya esaimumung kaiwo nanai kariri Yesusifo, ampare ehontai imami baba fosa, etemi mano ewaitawang wedua Sempaisi ne Munufoi maneiru teai era wa we etafu Yesusi.

³³ Ampafe Yesusi medu we kaiwasa bitoya foi deyo, “We rahida beiru teaifa inaya na ninaifa ria mea, tuti rahida nanai kaia mani ambori yarabera yau we Mano demi yau foi aha.

³⁴ Ambori mesera we yau wape wiro mesobu yau kaha, tuti katai ambori inayai naya fo mani, wiro mera wa kaha rai.”

³⁵ Ainanaya mano ewenunggamieie we Yahudi fosa emadu wawerasa eteyo, “Inontarai nini deyo da to katai bodonie doni tasobui kahai nina? Ete deyo dontai to katai waroi to inontarai Yahudio enayai na katai siai fo ria inontarai Yunani fosa we deunau inontarai Yunani fosa naya ne?”

³⁶ Fianai medurai kontai deyo, ambori tasera wei wape wiro tasobui kaha tuti

wiro tara to katai niyai nai
foi kahai nina?"

*Nuaninu Mirarebana foi
ne tarai kariri mereha wedaya
numainufo*

³⁷ Na rahida bo wefuia foi, amani ene rahida fuba foi na Rahida Warumai nani, Yesusi doa na Sempaisi ne Munufoi tuti suhu deyo, "Mandoni dino arongtataha mani, da we yau ma we dunung.

³⁸ Mandoni dino yoaso yau mani, sobu fio na Kaiwo Mararebana fo dotu kariri fo tonina, 'Na enerorongfoi, mereha wedaya numainufo ambori deda pampang nai ki.'

³⁹ (Na kaiwo nani Yesusi medu kariri Nuaninu Mirarebanaio ambori inontarai eroasoa fosa esobui foi. Weo pariao nanai Allai wiro dohong Nuaninu Mirarebana foi ma kaharai, weo wiro yuai Yesusia dedai sambewarai kaharai.)

⁴⁰ Inontarai maneiru teai na kaiwasa bitoya etarami Yesusi ne kaiwofo nanisa emadu eteyo, "Inontarai nini tarai Nabio ambori da ma foi dine."

⁴¹ Manea kontai emadu eteyo, "I mani Mananu Mamparirio Allai demi ma foi dine." Wape manea aha mani eteyo, "Bereri, Mananu Mampariri nei wiro da na nu Galilea foi ma kaha!"

⁴² Weo kariri Kaiwo Mararebana fo mani, Mananu Mampariri nei mani weriria na Dauti ne ririafoi ma tuti na bendari Betlehemi, amani Dauti ne munue saubaunung nai fo."

⁴³ Ampafe kaiwasa bitoya foi esawasa kariri Yesusi.

⁴⁴ Manea na sa eteyo etafuri, manamo manei wiro warakehafoi disansoi kaha.

*Nikodemusi medu tuti
Yesusi*

⁴⁵ Rabuang bo mano ewaitawang wedua Sempaisi ne Munufoi, amani mano imami baba fosa tuti Farisi-fosa etemisa we etafu Yesusi fo etaraberasedara nanai, mano etemisa fo etutang berasa eteyo, "We fianie wiro mehari ma kahai nina?"

⁴⁶ Manamo emadu eteyo, "Oh, wiro amewati manei medu kariri i na ea kaha rai!"

⁴⁷ Ampafe Farisifosa emadu aha eteyo, "Tofino, inontarai nani sofa wawera mea konta ne?"

⁴⁸ Mewatio mano ewenunggamiei we tata nesa manei yoasoi ampa ne? Ete Farisinesa kontai manei yoasoi ampa ne? Bereri!

⁴⁹ Wape kaisawa bitoya ninisa etaroanso Kaiwo Musai soi fo kaha, tuti todoni kontaio inontarai nanisa Allai deikangganisa ampa."

⁵⁰ Inontarai manei na inontarai eweFarisi fosa wonong fino Nikodemusi, i mani raminde da kawuru we Yesusi ampa. Nikodemusi nini medu we Farisi mano wei fosa deyo,

⁵¹ "Kariri tane hukuminei mani, inontarai manei wiro utang berahi we taramioai tuti waitawang ne sarawafo kaharai mae ohong aiboifofafong wei kawurua ne?"

⁵² Ampafe Farisi mano wei fosa emadu wei eteyo, "Wau kontai inontarai Galilea

di wau e? Boto Kaiwo Mararebana fo! Na nanai ambori boitawanai we nabi manei wiro da na Galilea ma kaha!"

Wiwingno esobui we niari maninawa denaria mang siasi, ehari we etafu Yesusi na medu fisarawaio kariri wiwingfoi sobu aiboi fiani rai fo

⁵³*[Emadu tonanaia kaia fo, ea kiai etaraberasa to ene munufoa.

8

¹ Wape Yesusi da to uai Saituni.

² Kameaia wofoi dautaia nanai, Yesusi doari kawuru na Sempaisi ne Munufoi aha, tuti kaiwasa bitoya era weia. Yesusi minohi na wanai mae deunausa.

³ Na siari nanai mae mantaunau Kaiwo Musai soi fo manea tuti Farisi manea eha wiwing manei ma, wiwing nani esobui we niari maninawa denaria mang siasi. Etononi doari rahansa,

⁴ ainanaya emadu we Yesusi eteyo, "Mantaunaune waune, wiwing nini amesobui we niari maninawa denaria mang siasi.

⁵ Na Kaiwo Musai soi fo medurai we wiwing tonina nei mani todoni kontaio ru kamieie soi paria mireha. Ampafe enemutituai todoni?"

⁶ Etutang tonanaifa we esera we ambori Yesusi medu sarawa mani etinggairi we niari sarawai. Wape Yesusi

suang terai, tuti soi kaiwo na kahofafo na warakehafo.

⁷ Manamo etanggewari pampang, ampafe doaria doa tirai tuti medu wesa deyo, "Na mea kiai mandoni dino ne pari sasari mani, andino reantenang pari so wiwingnei na kamiei."

⁸ Yesusi medu tonanaia mae, suang nariai aha soi kaiwo na kahofa nuwowongfo na warakehafoi.

⁹ Etaramio Yesusi we medu tonanaifa nanai, mano etinggai wiwingfoi nanisa efouhisa wemansiawarai weru kataifoia, reantenang mani na mano fuba foi paria ehai weru kataifoia. Era wa ehaia sea Yesusi tuti wiwingfoi we doari na katai siari doa nai foi fo.

¹⁰ Ainanaya Yesusi doaria doa tirai tuti medu we wiwingfoi deyo, "Wiwingne wau, inontarai fuba anta nanisai doni ampa? Manei wiro dohong aiboifea tau we wau kaha e?"

¹¹ Wiwingfoi yoa we Yesusi deyo, "Daie, bereri." Yesusi medu wei aha deyo, "Yau kontaio wiro yohong aiboifea tau we wau kaha. Ampafe roa, wape na ninai to fongna mani wiro nari sasarifo ahang fanai.]

Yesusi wefisambewarai we nunei

¹² Yesusi medu we kaiwasa bitoya foi aha deyo, "Yau mani iwfisambewarai we nunei. Mandoni dino daria yau mani da na mamantitifo

* ^{7:53} Kaiwo ninai na 7:53 pariao 8:11 wia na tanda [...] toninai weo na kaiwo asli ete reantenang fo, wiro obu kaiwo ninai kaha, nana mani deinawiai weo kaiwo ninai manei dohonai kontai kawuru ampa wiatai na injil Yohanesi nei nina.

aha kaha, wape sobu samb
berawaio kia arangfo."

¹³ Farisifosa emadu wei
eteoyo, "Oh! Moduairai kariri
mantaung wau terai, nemu
kaiwowa wetarai kaha."

¹⁴ Yesusi yo a wesa deyo,
"Masino imaduairai kariri
mantaung yau terai ki,
wape kaiwo imadurai ninai
wetarai, weo iwaitawang na
doni ira nai ma fo tuti to doni
ira wea fo. Wape mea mani
meserawawerahai paria,
mewaitawang na doni ira nai
ma fo ete to doni ira wea fo
kaha.

¹⁵ Mehutu kaiwone kariri
todoni inontaraine menene-
mitituaitafo. Yau mani wiro
ikutu kaiwo we inontarai
manei kaha.

¹⁶ Wape masino ikutu
kaiwo we inontarai manei
mani, kaiwo ikutuai nanai
wetarai, weo imeiri yau
kaha, mae Dai mano demi
yau foi dino kiontai yau ne.

¹⁷ Na mene Kaiwo Musai
soi fo dotu tonina, 'Uwe-
mandu uwati te fieai tuti
umadu kariria mani, kaiwo
nanai ahuai we kaiwo we-
tarai fine.'

¹⁸ Yauno imaduairai kariri
mantaung yau ne tuti Dai
mano demi yau nei kontai
meduairai kariri yau."

¹⁹ Ainanaya emadu we
Yesusi aha eteyo, "Tamamu
niai na doni?" Yesusi yo a
wesa deyo, "Yau ete Dai,
wiro metaroanso auru kaha.
Weo masino metaroanso
yau mani, metaroanso Dai
kontai."

²⁰ Kaiwo nanai Yesusi
medurai na Sempaisi ne
Munufoi, kefang we katai
doi korbani fo watai nai fo.
Medu tonanai wape manei
wiro tefuri kaha, weo wiro
ne rahida mai we etafuri
kaharai.

Yesusi wiro na nunei kaha
²¹ Ainanaya Yesusi medu
wesa nariai aha deyo, "Amb
bori ira weru mea, tuti
mesera we yau ki, tuti amb
bori memarareha na mene
sasariwai. To katai ira wei foi
kontaio, wiro meroaoia kaha
rai."

²² Ampafe mano ewe-
nunggamiei we Yahudi fosa
emadu eteyo, "Tarahio deyo
ming berahi fe, doni medu
deyo, 'To katai iraoi foi wiro
mera wa kahai nina.'"

²³ Ainanaya Yesusi medu
wesa aha deyo, "Mea mani
mera na kofane ma, wape
yau mani ibiari na yaifai
meu. Mera na nunei nini
ma, wape yau mani wiro na
nunei kaha.

²⁴ Nanai wedaya anta
imadu we mea mau
yeo, memarareha na
mene sasariwa ki; weo
masino meroasoai we
'Yau mani mano ahui we
YAUNE'²⁵ Ainanaya etutang
berahi aha eteyo, "Wau mani
mandoni di wau tarai ne?"
Yesusi medu wesa deyo, "Yau
mani, mano kariri fianai anta
imadurai na reantenangfo
kawuru we meara fo di yau.

²⁶ Kaiwo bitoya paria yeo
imadurai kariri mea tuti

* **8:24** YAUNEMANI, YHWH, AMANI WANG WE ALLAI MANTAUNI, DOHONAI WE MUSA
NA KELUARAN 3:14.[YHWH] FOI DINE' KAHU MANI, AMBORI MEMARAREHA NA MENE
SASARIWAI KI."

ikutuai kariri mea. Wape Mano demi yau nei mani Mano mesi we taroasoi dine, tuti fianai aino tarahuuai riati fo, nanai aino imadurai we nunei ne."

²⁷ Ewaitawana kaha we fianai aino Yesusi medurai tonana fo kariri Dai.

²⁸ Ampafe Yesusi medu wesa deyo, "Kio meruai Kaisung Inontarai neia dedai wori, mewaitawanai we YAU^{NE} fo ki, tuti ambori mewaitawanai we fi fuba inariri na nufi nini, wiro na mantaung yau kaha. Manta imadu te kariri fianai aino Dai deunauwai we yau fo.

²⁹ Tuti Mano demi yau foi weriria yaune, wiro sawing yau imeiri yau kaha, we inari fio eneo afo pampang fefe."

³⁰ Yesusi medu finanaia kai fo, kaiwasa bitoya eroasoi.

Mano wetarai wedaya kaiwasa etafaresua foi

³¹ Mayeai Yesusi medu we inontarai Yahudio eroasoia fosa deyo, "Masino metoaria mutu na nehu kaiwone mani, nehu inontarai di mea tarai,

³² tuti ambori metaroanso ne wetaraifoi, tuti ne wetarai nani ambori wedaya mea mehasau ki."

³³ Ainanaya emadu wei eteyo, "Amea mani Abrahami ne riria di amea, wiro amewewoming we manei na ea kaha! Ampafe todonie modu we amea boyo, ambori amehasau nina?"

³⁴ Yesusi medu wesa deyo, "Tarai antu! Imadurai we mea mau yeyo, mandoni kontaio niari sasari foi mani, wewoming we sasarifoi.

³⁵ Tuti woming manei wiro ne katai na mano yuti foi ne munu rorong fo kaha, wape mantauni ne kaisungfoi mani, ne katai we fitawafa na munu rorong fo.

³⁶ Ampafe masino Kaisungfoi wedaya mea mehasau mani, mehasau taraitonanai.

³⁷ Iwaitawanai we mea mani Abrahami ne riria di mea, wape merurai we memung yau, weo nehu kaiwone ne katai na mene-mirorongwai kaha fefe.

³⁸ Fianai iwatioai ria Dai fo, finanai aino imadura ne. Tuti tonanai kontai we mea, metohong kariri fianai aino metaramioai ria mene daifoia fo."

³⁹ Ainanaya eroa wei eteyo, "Amene dainei mani Abrahami dine!"

Yesusi medu wesa nariai aha deyo, "Masino mene dai dino Abrahami mani, na todoni kontaio menari fianai aino Abrahami niari fo.

⁴⁰ Wape mea mani meteyo memung yau, amani mano imadu kaiwo wetarai itarahuuai ria Allai fo we mea mau ne yau. Abrahami wiro niari fi karira tonana ne kaha!

⁴¹ Mea mani menari fianai aino mene daifoi niari fo terai."

Inontarai Yahudi fosa emadu aha eteyo, "Amea mani wiro arikang ninoi di amea kaha. Amene Daifoi mani mansiari amani Allai mesiri."

⁴² Ainanaya Yesusi medu wesa deyo, "Masino Allai mene Dai dine mani, menemiwatu yau rai, weo ira na Allai ma tuti inayai na

ninai nina. Kontai wiro ira na mantaung yau ma kaha, mae andi demi yau ma ne.

⁴³ Metafu nehu kaiwo imadura ne kaha, weo wiro mewemambiriw we metaramio nehu kaiwone kaha.

⁴⁴ Mea mani na mene daifoi ma, amani Saminseni, tuti memirising we metohong kariri mene daifoi ne fi dohong wea fo. Andino wemiung inontarai dine na reantenang parifoa ne tuti wiro dohong kariri ne wetaraifo kaha, weo na i mani wiro obu ne wetaraifeai nai kaha. Medu tetofa mani, finani medurai na mantauni ne taraifoi, weo i mani mano tetofa dine tuti tatofafoi weneung nai.

⁴⁵ Imadu ne wetaraifo tonanai ki, wape wiro meroaso yau kaha.

⁴⁶ Na mea mandoni wauno nemu fiainawiaifeai kariri yau we inari sasari ne? Masino imadu kariri ne wetaraifo mani, we fianie meroaso yau kahai nina?

⁴⁷ Allai ne inontarainesa mani, etaramio kaiwo Allai medura fo. Wape mea mani wiro Allai ne inontarai di mea kaha, nanai wedaya memaya we metarami ne kaiwofo kahai nina.”

Yesusi fiabai sewa Abrahami

⁴⁸ Inontarai Yahudi fosa emadu wei eteyo, “Kasau ampa we kaiwo anta amemadurai kariri wau nanai kaiwo wetarai fine, amani inontarai Samaria kerira di wau. Tarai, inggirai dohong wau.”

⁴⁹ Yesusi yoa wesa deyo, “Wiro inggirai dohong yau kaha. Yau mani isomi we Dai tuti wiro mesomi we yau kaha.

⁵⁰ Wiro isera we inontarai etaparanding yau kaha. Mae Manei andino dawiai we iwwonohu tonanafo ne, tuti I mani Mano kiutu kaiwo dine.

⁵¹ Tarai antu! Imadurai we mea mau yeyo, mano dohong kariri nehu kaiwofo mani, wiro sodai mararehafoi kahai we fitawafa.”

⁵² Ainanaya inontarai Yahudi fosa emadu eteyo, “Nina mani amewaitawanai we wau mani tarai inggirai dohong wau! Weo Abrahami mantauni mireha ampa, tonanai kontai we nabifosa kiai. Wape modu boyo, ‘Inontarai mano dohong kariri nehu kaiwofo mani, wiro mireha na ea kaha.’

⁵³ Oh! Wiro fobai sewa Abrahami, mano mirehara foi, kaha fe? Nabifosa kiai kontaio emarareha ampa. Tonana mani mandoni dino titua wau nai ne?”

⁵⁴ Yesusi yoa wesa deyo, “Masino yeparanding bera mantaung yau mani, finanai wefieai we yau kaha. Mano deparanding yau foi mani Dai, Dai nini dino mesahui we mene Allai dine nanai.

⁵⁵ Wiro metaroansoi kaha tonanai ki, wape yau mani yeroani. Tuti masino imadu yeyo wiro yeroansoi kaha, nana mani yau mani inontarai ipampamu paria di yau, ne tarai kariri mea. Yeroani tuti yohong kariri ne kaiwofo.

⁵⁶ Mene Dai Abrahami piraise paria we deti nehu rahidanei, tuti detioi kawuru ampa tuti mirising wei."

⁵⁷ Ainanaya inontarai Yahudi fosa emadu we Yesusi eteyo, "Wiro nemu defuina piarua sura kahai kontai, tuti boti Abrahami e?"

⁵⁸ Yesusi medu wesa aha deyo, "Tarai antu! Imadurai we mea mau yeyo, wiro Abrahami saubau-nunggamieie kaharai mae, YAUNE kawuru ampa."

⁵⁹ Ainanaya inontarai Yahudi fosa eha kamiei we eteyo esoi, manamo Yesusi dediwa werusa, ainanaya da weru Sempaisi ne Munufoia.

9

Yesusi niari inontarai urengfafa manei deti aha

¹ Yesusi da wa mani deti inontarai manei, inontarai nani urengfafa na siari saubaununggamieifo.

² Yesusi ne inontarai erariati fosa etutang berahi eteyo, "Dai Rabio Mantau-naune waune, mandoni dino niari sasario wedaya inontarai nini urengfafa na siario saubaununggamieifo nina? Mantauni ete ne wawafo suru re?"

³ Yesusi yoa wesa deyo, "Urengfafa tonana fo wiro mantauni ne sasarifoi ete ne wawafo une sasariffo wedaya tonanafo kaha, mae ambori Allai deinawi ne mambiriwo na i.

⁴ Todoni kontaio tanari Mano demi yau nei ne finiarifo na rahidafo. Weo dirufoi ambori da ma, tuti

mandoni kontaio wiro yufi kaha.

⁵ Rahida inayai na nufi nina mani, yauno isambewa nufi ne."

⁶ Yesusi medu tonanaia fo mayeai, kendi to kahofa nu-wowongfo aweu, tuti fia kandi-froi na kahofafo eai, yuai-sai ayai piso inontaraifoi urengfo nayai, ainanaya medu wei deyo,

⁷ "Roa ruai uremuwa na kuru Siloami." (Siloami nana mani *Mano Demi*.) Ampafe inontaraifoi da wa yuairurang urengfo na kurufoi. Niari tonanaia kai daraberahi ma fo, detia.

⁸ Ne ruramafosa tuti inontarai mano na fafong ewatioi we minohi dedo na rang dereung fosa, emadu kai eteyo, "Oh! Inontarai nini dino raminde minohi dedo we fi na rang dereung fo ne mae?"

⁹ Manea eroa tubarai eteyo, "Tarai andi aranane." Wape maneia kontai eteyo, "Bereri, inontarai nini ureng kariri terai."

Wape mantauni medu wesa deyo, "Yau arana ne."

¹⁰ Ampafe emadu wei eteyo, "Todonie boti aha nina?"

¹¹ Yoa wesa aha deyo, "Inontarai mano wonong Yesusi foi fia kahofa kuteai na ne kandifoi, ainanaya yuaisai ma piso na urehune tuti medu deyo, 'Roa ruairurang uremuwa na kuru Siloami.' Ainanaya ira wa tuti iruairurang urehufo nayai nanai, iwati aha."

¹² Etutani eteyo, "Inontarai nani andi doni?" Manamo yoa wesa deyo, "Isara wawerahai."

Farisifosa esera we ewaitawang kariri todoni inontaraifoi denteng toa fo

¹³⁻¹⁴ Rahida Yesusi niari kahofa fo, piso inontaraifoi urengfo naya deti nani mani, rahida Sabati dine. Ampafe inontarai arahi deti nani ehari to inontarai eweFarisi fosara.

¹⁵ Farisifosa kontai etutang berahi kariri todonie deti aha nanai. Ampafe yoa wesa deyo, "Inontaraifoi piso kahofafeai na urehune, mayeai iruui ruramaia tuti iwati aha ninai."

¹⁶ Farisifo maneiru teai emadu eteyo, "Inontarai nani wiro da na Allai ma kaha, weo wiro dewawu rahida Sabati foi kaha fefe."

Manamo mano siai wei fosa emadu eteyo, "Inontarai wesasari manei niari fitantuma tonina fea rai e?" Ainanaya esawa wawerasa kariri.

¹⁷ Ampafe etutang bera mano anta urengfafa foi aha eteyo, "Fifianai aino enemutituitaifa kariri inontarai nani faini ne? Weo wauno niari uremuwa beng tonanai." Mano detia foi deyo, "I mani nabi dine."

¹⁸ Manamo mano ewenunggamieie we Yahudi fosa emaya we eroasoai we inontarai nani mani tarai mano raminde urengfo fafa na siari saubaununggamieifo tuti ninaia mani denteng aha foi

dine kaha. Ampafe esahu ne wawafo suru ma,

¹⁹ tuti etutang bera suru eteyo, "Taraie mune arikangno urengfafa na siari saubaununggamieifo andi nini e? Todoni fino deti aha ninai?"

²⁰ Ne wawafo suru umadu ureyo, "Ne auwaitawana mani, tarai aune arikang dine, tuti urengfo fafa na siari saubaununggamieifo.

²¹ Wape todoni deti aha ninaifa mani, auwaitawana kaha. Tuti mandoni dino niariria deti toninai aha ne mani, auwaitawana kahai kontai. Metutang bera mantauni teraifa, fiabai ampa, ampafe mantauni ambori deikaririaifa ki."

²² Wawafo suru umadu tonanai we umatai mano ewenunggamieie we Yahudi fosa, weo ehutuai ampa we mandoni dino meduairai Yesusi weMananu Mampariri dine mani, wenani wiro da to munu agama Yahudi fo afui ahang kaha.

²³ Nanai wedaya mani wawafo suru umadu ureyo, "Fiabai ampa, metutang teri."

²⁴ Ainanaya esahu mano detia nani aha ma, esahui weberu finanaia, tuti emadu wei eteyo, "Fofora na Allai wonongfo* we fianai moduraifa fo, modu te ne wetaraifo. Amewaitawanai we inontarai nani mani wesasari."

²⁵ Inontaraifoi yoa wesa aha deyo, "Wesasari ete bereri ete, iwaitawana kaha.

* 9:24 Ene maksuti mani, na deparanding Allai.

Wape fi beyari iwaitawana mani, raminde nanai urehu-fafa, wape nina mani iwati ampa.”

²⁶ Ainanaya emadu wei nariai aha eteyo, “Niari fiani we wau? Niari uremuwa todoni e boti aha ninai?”

²⁷ Inontaraifoi medu wesa aha deyo, “Yeikaririai kawuru we mea ampa, wape memaya we metaramioa kaha. We fianie meteyo metaramioai nariai aha nina? Tarahio meteyo merariati konta fe?”

²⁸ Ainanaya eteiberahi paria tuti eteyo, “Wau ro riati ne. Amea mani bereri! Amea mani inontarai ameraria Musa di amea.

²⁹ Amewaitawanai we Allai medu we Musai ampa. Wape kariri inontarai nani mani amewaitawang da nayai ma fo kaha.”

³⁰ Inontaraifoi medu aha deyo, “Nanai siai paria, do-hong yau imarari paria. Weo meteyo mewaitawang katai da nai ma fo kaha, mae andi niari yaua iwati ampa.

³¹ Tawaitawanai we wiro Allai tarao inontarai sasari fosa kaha, mae tarao te mano esomi wei tuti etohong kariri ne awia fosa.

³² Na reantenang nunei tibaurai ma fo, wiro tataramio inontarai manei niari weurengfafa na siario saubaunungfo deti kaha rai.

³³ Masino inontarai nani na Allai ma kaha mani, wiro niari fiea kahai kontai.”

³⁴ Eroa wei eteyo, “Sasarine sefang na wau na siari taubau numuwai paria sobu ninai, mae boyo bounau

amea re?” Ampafe na siari nanai to fongna fo eteiayari we wiro da to munu agama foi aha fui kaha.

³⁵ Yesusi taraoai we mano ewenunggamiei we Yahudi fosa eteiaya inontaraifoi we wiro da to munu agama Yahudi foi aha kaha. Ampafe sera we inontaraifoia sobui tuti medu wei deyo, “Roaso Kaisung Inontarai nei e?”

³⁶ Inontaraifoi bera Yesusi aha deyo, “Daie, mandoni dine? Boikariri we yau ambori iroasoi.”

³⁷ Yesusi yo a wei deyo, “Inontarai nani mani botioi ampa, tuti andino doa medu ria wau nina.”

³⁸ Inontaraifoi medu wei aha deyo, “Sengne waune iroasoi,” tuti somi wei.

³⁹ Ainanaya Yesusi medu deyo, “Ira to nunei ma ninai we ikutu kaiwo, ambori mandoni kontaio ureng-fafafdoi deti, tuti mano deti foi urengfafa.”

⁴⁰ Farisi maneiru teaio enayai na nana fosa etaramio kaiwo Yesusi medurai tonana fo, ampafe emadu we Yesusi aha eteyo, “Ampafe boyo amea kontai ameuremifafa e?”

⁴¹ Yesusi yo a wesa deyo, “Masino meuremifafa mani, mewesasari kaha weo mewaitawang ne wetaraifo kaha fefe. Wape meteyo mewati, ampafe tonana mani mene sasariwai niayai pampang.”

10

*Fiyiwansoai kariri domba
tuti mantahung foi*

¹ Yesusi medu aha deyo, "Tarai antu! Imadurai we mea mau yeo, inontarai mandoni dino suai to rorong fiahung dombafo enayai nai foi afui, wape wirosuai na rahutufoi kaha, mae dautai kutuai na katai siai, wenani mani inontarai mananapi tuti dewa fi dine.

² Wape mano suai na rahutufoi to rorongfoi afui mani, wenani dino weman-tahung we dombafosa ne.

³ Inontarai tonana nei, mano deitawang wedua rahutufoi fiai rahutufoi wei tuti ne dombafosa etaramio raofuifoi. Sahu ne dom-bafosa mansiari-mansiari kariri ewonomifo tuti wi-wiainsa to boriei.

⁴ Dombafosa era to borieia ehaia mani, mantauni da fonisa mae dombafosa era riati na kurufuifo, weo etaroanso raofuifo fefe.

⁵ Wape Weinontarai ai-sei nei mani, dombafosa emaya we era riati kaha, kontai emitowerui, weo etaroanso inontarai tonana fosa eraomifuifoi kaha fefe."

⁶ Yesusi deiriri fiiywanoai nani wesa, wape etafu fianai aino yiwansoai tonanai wesa fo kaha.

⁷ Ampafe Yesusi medu nar-iai aha deyo, "Tarai antu! Imadurai we mea mau yeo, yau mani rahutu we dom-bafosa foi di yau.

⁸ Mano era foni yau kawurua fosa mani, ea kiai mananapi tuti mantawa fi saine, mae dombafosa wirosuai etarami eraomifuifo kaha.

⁹ Yau mani rahutu di yau. Mandoni dino suai na yau

mani, ambori sobu faririfo ki, i ambori suayai dariai tuti sobu ninoi kehe foi.

¹⁰ Manananapesa era terai ma we ehamananapi, we emung tuti we emei fi pariao woru. Wape yau mani ira ma we ambori esobu arangfo tuti esobuai na bitoya funomai.

¹¹ Yau mani mantahung denteng foi di yau. Mantahung denteng foi dohong ne taraifoi we ne dombafosa.

¹² Mae inontarai mano yufi we sobu fiembaitai tuti wirosuai te dombafosa kaha foi, serigala manei mito ma we mingno dombafosa mani, ambori mito weru dombafosa tuti serigalafoi mingsa tuti kiatatesa.

¹³ Inontarai nani mito weru dombafosa, weo i mani yufi terai we sobu fiembaitafo tuti wirosuai we dombafosa aha kaha.

¹⁴⁻¹⁵ Yau mani mantahung denteng foi di yau. Yeroanso nehu dombafosa tuti nehu dombafosa etaroanso yau, ne tarai toyari Dai we deroanso yaupo tuti yau kontai yeroanso Dai. Tuti yohong nehu tarainei we nehu dombafosa.

¹⁶ Wape yau kontai nehu domba siai fea kontai, domba nanisa wirosuai na domba rabuangno enayai na wore rorongfe ninisa kaha; domba nanisa todoni kontaio iwi-wiainsa kontai tuti ambori etarami raohufuinei. Ea kiai ambori ewerabuang boyari ria ene mantahungnei.

¹⁷ Dai enewawu yau we yohong nehu tarainei

imireha ambori isobui aha fefe.

¹⁸ Mandoni kontaio wiro kia nehu taraifoi weru yau kaha, mae yohong nehu taraifoi imireha tonanafo kariri mantaung yau nehu awiafo. Nehu mambiriu we yohoni tonanai tuti nehu mambiriu kontai we ikari aha. Finana mani fio Dai demi yau weai we inari fine."

¹⁹ Yesusi medu tonanafo wedaya Yahudifosa wiro eweboyari ahang kaha mae esawasa.

²⁰ Bitoya na sa emadu eteyo, "Inggira dohoni tuti wefiauwou ampa! Ampafe tataramioi we fiani?"

²¹ Manamo manea kontai emadu eteyo, "Inontarao inggira dohoni nei mani wiro medu tonana kaha! Inggiranei niari inontarai urengfafa manei denteng rai e?"

Inontarai Yahudi fosa eteiaya Yesusi we weMananu Mampariri

²² Waroi ahang kahai mae, tete rahida inontarai Yahudi fosa etansua Sempaisi ne Munufoi na bendari Yerusalem. Na rabuang bonani mani tete danunanangfo ne diru neung finana.

²³ Yesusi niayai da wawerahai na Allai ne Munufoi refongfo, amani refong esahuai we Refong Salomoi fo. ²⁴ Ainanaya inontarai Yahudi fosa era etoa wari Yesusi. Emadu wei eteyo, "Tua amea amenemiwawera we wau kidoni wo? Masino Mananu Mampariri foi di

wau mani, boikaririaia kasau we amea tonanai."

²⁵ Yesusi medu wesa deyo, "Yeisaharai kawuru we mea ampa wape meroasoa kaha. Fio inari na Dai wonongfo kai, finanai wefiainawiai we mea kariri yau ampa.

²⁶ Wape meroasoa kaha weo wiro mehontai na nehu domba rabuangfoi kaha fefe.

²⁷ Nehu domba nanisa etaramio raohufuinei, tuti yeroansosa tuti era ria yau.

²⁸ Yohongno numainufo wesa tuti wiro esobu ne karirafo ahang kahai we fitawafa. Mandoni kontaio wiro dewasa weru warahune kaha.

²⁹ Dai mano dohonsa we yau foi, fiabai sewa mandoni kontai, tuti mandoni kontaio wiro dewasa weru Dai warangfo kaha.

³⁰ Dai tuti yau mani auwe-mansiari."

³¹ Ainanaya inontarai Yahudi fosa eha kamieifo aha we eteyo eso Yesusi.

³² Manamo Yesusi medu wesa deyo, "Fitantumao na Dai ma fo aino bitoya yeinawiai we mea ne. Na fi bitoya yeinawiai tonana fo, doni aino wedaya mea meteyo meru kamieio yau weai nina?"

³³ Inontarai Yahudi fosa emadu wei eteyo, "Ameteyo ameru kamieio wau tonanafo, wiro we fi bengno nari fo kaha, mae we boibera Allai fo. Wau mani inontarai batang di wau, wape boyo wau mani Allai di wau."

³⁴ Ainanaya Yesusi medu wesa aha deyo, "Na mene Kaiwo Mararebana foi dotu

kariri mene wawafosa,
amani na kaiwo rabuangno
Allai medu deyo,
'Isahu mea kiai weseng di
meara.*'

35 Tawaitawanai we fianai
dotu na Kaiwo Mararebana
fo mani, kaiwo nanai wiro
wioru kaha. Ampafe masino
Kaiwo Mararebana fo deyo,
'Seng di mea,' tonanai we
mano esobu kaiwo nani fosa
mani, todoni kontai yau
tonanai kontaia!

36 Weo yau mani Dai Allai
diri yau we mantauni neng-
foi di yau, tuti demi yau to
nunei meu. Tonana mani
we fiani metinggai yau we
yeibera Allai nina, na nehu
kaiwo imadurai yeyo Allai ne
Kaisung di yau fo nina?

37 Masino inari kariri fianai
aino Dai demi yau weai we
inari fo kaha mani, wiro
meroaso yau fanai.

38 Wape masino inari kariri
fio Dai demi yau wea fo
tuti memaya we meroaso
yau kaha, tonana mani
meroaso te fianai aino inari
nanai. Ambori na tonanane
mewaitawanai tuti metafurai
we Dai niayai na yau tuti
yau kontai inayai na Dai."

39 Ampafe erurai nariai
aha we etafu Yesusi manamo
kiahari weru ewaramifo.

40 Yesusi daraberahi to
waya Yardeni dereung dowiei
fo, to katai raminde Yohanesi
webaptisi nai foi tuti niayai
na nanai.

41 Na nanai kaiwasa bitoya
era weia. Emadu eteyo,
"Yohanesi wiro niari fitan-
tuma kutu boyari kahaia,

wape fi kiaio medurai kariri
inontarai nini fo wetarai
ampa."

42 Tuti kaiwasa bitoya na
nana fosa eroaso Yesusi we
Mananu Mampariri na Allai
dine.

11

Lazarusi ne mirehafo

1 Inontarai manei wonong
fino Lazarusi, minohi ria ro-
rowingno Mariai tuti Martai
suru na munue Betania na
nu Yudea foi. Inontarai nani
meninang.

2 Mariai nini mani wi-
wingno raminde sari maning
nunsai mampori foi mae
sara Yesusi awengfo tuti dufi
na nurandaungfo foi dine.
Tuti roromang dino Lazarusi
mano meninang nani.

3 Ampafe rorowingfo suru
uranatu kaiwo we Yesus-
sia uraikarirai wei ureyo,
"Sengwa waune, mano ene-
muwawuti nei meninang."

4 Yesusi tarao kaiwofo
nanai medu deyo, "Fiman-
nang nani wiro kia marareha
kaha, wape ambori deinawi
Allai ne sambewaraio dedai
fo, weo na maninang nani
wedaya inontaraine eta-
paranding Allai ne Kaisung-
foi."

5 Yesusi tarai enewawu
Martai, Mariai tuti Lazarusi.

6 Wape, tarao kaiwofo we
Lazarusi meninang nanai, da
ahera wa kaha, mae niayai
rahida boru aha.

7 Wape mayeaia mani
medu we ne inontarai er-
ariati fosa deyo, "Tatarabera
tata to nu Yudea foi aha."

* 10:34 Masmuri 82:6-7

⁸ Ampafe eroa wei eteyo, “Dai Rabio Mantaunaune waune! Ararafanai ninai, inontarai Yahudi fosa eteyo eru kamieio wau, tonanai mae boyo barabera wau to wanai aha nina e?”

⁹ Manamo Yesusi yoa wesa deyo, “Mewaitawana kahai we na wofoi dautafo paria sobu sawafo mani, araha ureng suraya borufo ne? Mandoni dino da na rahidafo mani, wiro sodai kaha, weo deti fio sambewa nufi nini fefe.

¹⁰ Wape da na dirufo mani sodai, weo sambewarafo nayai na i kaha.”

¹¹ Yesusi medu tonanai, mayeai medu aha deyo, “Tane maniwowirio Lazarusi dena ampa, wape ambori ira wa we ibauni ki.”

¹² Ampafe ne inontarai erariati fosa emadu eteyo, “Sengne waune, masino Lazarusi dena mani, ambori denteng ki.”

¹³ Weo etafu sara Yesusi kaiwo medu tutirai we deyo, Lazarusi denafo, ewaitarahio dena tarai tonanai, wape Yesusi medu tonanafo mani deyo Lazarusi mireha.

¹⁴ Nanai wedaya Yesusi medu parai deyo, “Lazarusi mireha ampa.

¹⁵ Wape ifaraise kontai weo wiro inayai na wanai tete ne tonanafo kaha fo. Weo nana mani beng paria we mea ambori meroasoai. Ampafe tara we Lazarusia.”

¹⁶ Tomasi, mano ahui kontai we *Didimusi* foi medu we ne maniwowiri eraria Yesusi

fosa deyo, “Tara riati kontai, ambori tamarareha riati.”

Yesusi mani Mano duwi inontarai emarareha tuti dohonsa etarang aha dine

¹⁷ Rahida bo Yesusi sobu katai nani fo, Lazarusi mireha esaraia we rahida boa na fafo rorong foa.

¹⁸ Betania mani watai kefang we bendari Yerusalem, waroifo tarahio kiro botoru rai.

¹⁹ Inontarai Yahudi bitoya era wa etuambawa Martai tuti Mariai uru, we enari unemirorongfoi mitubaru aha weo unemirorongfoi fituayai we uroromifoi fefe.

²⁰ Martai taraoai we Yesusi da wa nanai, dari weru munufoi da weu Yesusia, mae Mariai mani minohi na munu rorongfo.

²¹ Martai medu we Yesusi deyo, “Sengne waune, masino nayai na nina fea reti, rorohunei wiro mireha kahai ki.”

²² Tonanai ki wape nina mani iwaitawanai we Allai ambori dohongno fianai kontai aino butani wea fo ki.”

²³ Yesusi medu we Martai deyo, “Roromuwai ambori suwi nariai aha ki.”

²⁴ Martai yoa wei aha deyo, “Iwaitawanai we na rahida Sempaisi kife nuneifo mani, Lazarusi ambori suwi aha ki.”

²⁵ Yesusi yoa wei aha deyo, “Yauno yohong anseng we kaiwasanei tuti yuwi inontarai emarareha nesara esuwi aha ne. Mandoni dino yoaso yau mani, mireha ki wape ambori darang aha.”

²⁶ Tuti mano etarang nesa, amani mano eroaso yau fosa,

wiro emarareha kahai we fitawafa. Roaso fininaifa ne?"

²⁷ Martai yoa wei deyo, "Yo, Sengne waune, iroasoai we wau mani Mananu Mampariri foi di wau, Allai ne Kaisungno dererai na fafongfa we ro to nunei ma foi di wau."

²⁸ Martai medu tonanaia fo, mayeai da wa sahu ne tahatuio Mariai, seimumung wei deyo, "Dai mantaunafoi niayai na wanafo, dutang we wau."

²⁹ Mariai tarao kaiwofo nanai, sikahera doa bariri tuti da we Yesusia.

³⁰ Rabuang bonani mani, Yesusi wiro da to munuefo afui kaha wo, mae minohi na katai anta sobu Martai naya fo.

³¹ Inontarai Yahudio efanduhisa ria Mariai we etohong kaiwo wawori wei fosa, ewati Mariai doabariri tuti sikahera da to boriei tonanafo, ea kontai era riati. Weo ewaitarahio da to fafofo we sai naya.

³² Mariai da wa sobu katai Yesusi minohi nai foi tuti detioi nanai, sau aweu wiatai na awerengfo tuti medu deyo, "Sengne waune! Masino nayai na nina fea reti, rorohunei mireha kahai ki."

³³ Yesusi deti Mariai we saifo tuti inontarai Yahudi era riatia fosa kontai we esaifo nanai, enerorongfoi fituayai paria.

³⁴ Ampafe dutang berasa deyo, "Metohoni wiatai na doni?"

Eroa wei aha eteyo, "Sengne waune, ro ma botio katai wiatai nai foi."

³⁵ Ainanaya Yesusi saia.

³⁶ Ampafe inontarai Yahudi fosa emadu eteyo, "Mewatia, enewawu Lazarusi fuba paria."

³⁷ Wape manea kontai emadu eteyo, "I mani inontaraio niari mano urengfafa foi deti aha, todoni fino wemambiriu we dirapa mararehafoi ambori wiro Lazarusi mireha kahai nina?"

Yesusi duwi Lazarusi na marareha rorongfoi aha

³⁸ Yesusi enerorongfoi fituayai nariai aha, da sobuo fafofoa. Fafofoi mani kamirei kamieie dine, tabung wedua borongfo na kamieie fiabai.

³⁹ Medu deyo, "Metadoi kamieinei weruai!" Lazarusi mano mireha foi rorowingno Martai medu we Yesusi deyo, "Manamo, Sengne waune, piro ampa, weo araia ne rahida boa finina."

⁴⁰ Manamo Yesusi medu we Martai aha deyo, "Taramuo kaiwo anta imadurai we wau yeyo, roasoa mani ambori boti Seng Allai ne sambewaraio dedai fo ki e?"

⁴¹ Ampafe mano era wa fosa etadoi kamieifoi weru kamirei borongfoa. Mayeai Yesusi fioai urengfo deti to rorafaisi tuti medu deyo, "Daie, yohong mahikai we wau weo taramuo yau ampa fefe.

⁴² Iwaitawanai we taramuo yau pampang, wape na ninai kaiwasa bitoya etoawari yau ampafe yeyo imadu tonanai, ambori

eroasoai we wauno bemi yau ma ne."

⁴³ Yesusi medu tonanaia kai fo, sahu na raofui fiabai deyo, "Lazaruse, ro to boriei mandie!"

⁴⁴ Na tatofang kutu nanai, inontarai mirehara nani darang aha tuti kiawariai ariei, wape wiro da kifadei kaha, weo ne taraifoi ansania mutubaru na ireu biua fo rai fefe. Tuti urengfo tabung weduarai na ireuo fanahang tuti sayaha. Ainanaya Yesusi medu we kaiwasa fiau foi deyo, "Merehu ireu ansang ne taraifoi naya wa tuti ne tabung wedua urengfe naya wa, tuti metawini da wa."

Mano ewenunggamiei we Yahudi fosa emadu ruhi kaiwo we emung Yesusi

(Matiusi 26:1-5; Markusi 14:1-2; Lukasi 22:1-2)

⁴⁵ Ampafe inontarai Yahudi bitoyao era wa efata Mariai fosa ewati te fitantuma Yesusi niari tonana fo, ne faufosa eroaso Yesusi we ene Seng dine.

⁴⁶ Wape maneiru teai na sa era wa eteikaririai we Farisifosa kariri fitantuma Yesusi niari nanai.

⁴⁷ Ainanaya imami baba fosa tuti Farisifosa esahu Majelisi Agama fosa ma efanduhisa tuti emadu eteyo, "Finanai aino tanari ne, we inontarai wani niari fitantuma tuti fiainawiai bitoya paria.

⁴⁸ Weo masino tatuati niari pampang tonana mani, ambori kaiwasa bitoya eroaso. Tuti finanai wedaya inontarai Roma fosa era ma

we emei Allai ne Munu Mirebanai na Yerusaleminei tuti enari inontarai Israeli ne tatarataworuk."

⁴⁹ Manamo manei na sa amani Kayafasi, imamio na defuina bonani mani weimami fuba foi, medu wesa deyo, "Mewaitawang fiea kaha,

⁵⁰ tuti mewaitawana kahai we mansiari mireha we kaiwasa bitoya foi, nanai beng sewa weru tane rai na nu Israeli ne emarareha tantanang fo ne."

⁵¹ Kayafasi medu tonanafo, wiro medu na mantauni kaha, mae medu na wangno imami fuba yu na defuina bonani fo. Medu toyari nabi manei we ambori Yesusi mireha we inontarai na nu Israeli foi,

⁵² tuti wiro we nu Israeli foi tera kaha, mae we fianduhu Allai ne arikangno enayai tatera fosa kiai ambori fianduhisa weboyari na Allaifo.

⁵³ Ampafe na rahida bonani to fongna fo emadu ruhiae eweboyari we emung Yesusi.

⁵⁴ Ampafe Yesusi wiro kiawari parai na kaiwasa bitoya foi na inontarai Yahudi fosa euremireafo ahang kaha, wape dontai na nanai to katai kefang we katai sarahiae wewui fo, amani to bendario Efraimia. Niayai na wanai ria ne inontarai ewesuraya mandu fosa.

⁵⁵ Rabuang bonani mani, rerai we inontarai Yahudi fosa ene rahida Paska foi. Ampafe wiro etohonsua rahida Paska foi kaharai mae, kaiwasa bitoya na

munuefo era kawurua to Yerusalemia we eruairuransara emararebanai kariri ene koangfoi.

⁵⁶ Na wanai kaiwasa nanisa esera we Yesusi tuti etoari na Allai ne Munufoi rorongfo mae emadu wawerasa eteyo, "Menemitituai tofino, Yesusi da kontai to rahida Paska nei ma rai e?"

⁵⁷Tuti imami baba fosa tuti Farisifosa, etohong kaiwo pondoayai kawurua we mandoni dino deitawang Yesusi we niyai na doni mani, todoni kontaio deikaririai wesa ambori era wa etafuri.

12

Mariai sara Yesusi na maning ne harga dedai na Betania

(Matiusi 26:6-13; Markusi 14:3-9)

¹ Rahida wonang aha werahida Paska foi, Yesusi da to munue Betania, amani Lazarusi mano raminde Yesusi duwiria suwi na marareha rorong foi ne munuefo.

² Na nanai Lazarusi itorohong muniara bei we etamang we Yesusi na munufoi. Martai wesarawiri wesa tuti Lazarusi tuti mano wenotisa fosa ewatai etampi ruhiae ria Yesusi.

³ Ainanaya Mariai kia maning niunsai mampori literi mairabuang feai ma. Maning nani mani enariri na ai newao niunsai mampori tuti ne harga dedai paria. Sari maningfoi to Yesusi awengfo aweu, ainanaya

dufi na mantauni nurandaungfo aha. Maningfoi ne niunsai mampori fo wedaya munufoi sentenang niunsai mamporia.

⁴ Wape Yudasi Iskarioti, Yesusi ne inontarai dariatio katu mani dewayani foi medu deyo,

⁵ "We fianie maning ne harga dedai tonana nei wiro awayani obu doi dinari piaring webetoru (300)*, tuti doi nanai ohonai we mano ene pari fi fosa kahai nina?"

⁶ Yudasi medu tonanafo, wiro weo urengfo nayai na mano ene pari fi fosa kaha, wape we i mani mananapi dine. Weo wea mani kia doio watai na ene kasifoi, doi nani andino yuti ne.

⁷ Wape Yesusi medu deyo, "Metawing wiwingnei niari kariri fianai aino deyo niari ninai, weo fio niari tonina ne, meineng yau we rahida imereha foi.

⁸ Weo inontarai ene pari fi fosa mani, rahida neungne enayai ria mea, wape yau mani wiro inayai ria mea pampang kaha rai."

⁹ Inontarai Yahudi bitoya etaramioai we Yesusi niyai na Betania, ampafe era weia. Era wa fo wiro we ewati Yesusi tera kaha, mae we ewati Lazarusi kontai we Yesusi duwiria suwi na marareha rorong foi aha fo.

¹⁰ Ampafe imami baba fosa emadu ruhiae we emung Lazarusi kontai.

* **12:5** 300 dinari mani, mai toyari maneui ne fiembaitai yufi we fuina bei fo.

¹¹ Weo na i, inontarai Yahudi bitoya era werusa tuti eroaso Yesusi aha.

*Yesusi suai to bendari
Yerusalem tuti kaiwasa
bitoya foi etaparandini*

(*Matiusi 21:1-11; Markusi 11:1-10; Lukasi 19:28-38*)

¹² Kameaia mani, kaiwasa bitoyao da kawurua we dohonsua rahida Paska foi etaramioai we Yesusi da to bendari Yerusalemia nana,

¹³ eha kafadei baya fo, ainanaya era wa etamang wei. Yesusi da wa kiawariai nana esahu na eraomifui fiabai eteyo,

“Hosana! Tafiai Sempaisi!

Moanafeai we Mano da na
Sengnei wonong ne
ma,

Moanafeai we Mananu Is-
raeli ne!”

¹⁴ Yesusi sobu keledai antung manei, tuti dautai nai, ampare mai kariri Sempaisi ne Kaiwo dotu deyo,

¹⁵ “Kadawing Sioni[†] wa
waune, mutai fanai!
Botia, nemu Mananufoi da
ma ne,
dautai na keledai antung
manei!”*

¹⁶ Rahida nana, Yesusi ne inontarai ewesuraya mandu fosa etafu kaiwo dotu tonanafo na mai kaharai. Wape kio Allai yuai Yesusi dedai sambewarai na rahida suwiri na marareha rorong fo wori, arahio earomioai we fianai aino inontaraifosa enari we Yesusi nana, Allai soi kawuru na Kaiwo Mararebana fo kariri ampa.

¹⁷ Inontaraio raminde enayai na wanai ria Yesusi na rahida sahu Lazarusi na marareha rorong fo mandie fosa, emadu kariri finanai pampang.

¹⁸ Nanai wedaya kaiwasa bitoya foi da we Yesusia, weo etaramioai we andino niari fitantuma nana ne.

¹⁹ Ampafe Farisifosa emadu wawerasa eteyo, “Tawefieai ahang kaha! Weo tawatioai we nunei sentenang erariati ampa!”

*Inontarai Yunani maneia
esera we Yesusi, tuti Yesusi
medurai we ambori mireha ki*

²⁰ Na kaiwasa era wa we etohonsua rahida Paska foi nanisa mani, inontarai Yunani maneiru teai ehontai.

²¹ Inontarai Yunani nanisa era wa emadu we Pilipusi eteyo, “Doroi waune, ametohong weai paria we amemadu ria Yesusi.” (Pilipusi nini mani na bendari Betsaida na nu Galilea foi.)

²² Ampafe Pilipusi da wa deikariri kaiwofo we Andareasi, tuti mayeai ura wa uraikarirai we Yesusi.

²³ Wape Yesusi medu deyo, “Rahidafe mai ampa we Kaisung Inontarai nei Allai yuasia dedai sambewarai.

²⁴ Tarai antu! Imadurai we mea mau yeo, masino patibu bong bei wiro memasa kahai tuti tanami toyari arai inontarai marareha na kahofafo kaha mani, weboyari pampang tonanai. Wape patibu bong boyari nani memasa tuti arai na kahofafo mani, ambori tifu

[†] **12:15** Kadawing Sioni foi mani kaiwo neta weai we ‘kaiwasa na bendari Yerusalem fo.’ * **12:15** Zakariai 9:9

aha tuti wedaya bong bitoya
aha.

²⁵ Mandoni dino enewawu mantauni ne ansengfoi ambori ne ansengfoi wioru ki, mae mandoni dino na nufi ni-nai wiro enewawu ne ansengfoi kaha, nana mani wenani dewawu ne ansengfoi we ambori sobu numainufo.

²⁶ Mandoni dino deyo wemangfata we yau mani, todoni kontaio da ria yau, tuti inayai na doni mani, mangfata nani niyai na nanai kontai. Mandoni dino fiata yau mani, Dai na rorafaisi somi we wenani.

²⁷ Enehurorongnei fituayai paria, wape yeo imadu fi-an? Imadu yeo, ‘Daie, ka yau weru fi dadira ninaifa,’ ne? Wiro tonana kaha, weo we isodai dadira ninaifa aino wedaya ira weaifa ma ne.

²⁸ Daie, nari wonomuwai ao dedai sambewarai!”

Ampafe raofui bei sahu na rorafaisi meu deyo, “Inari wonohune dedai sambewarai ampa, tuti inariri dedai sambewarai nariai aha.”

²⁹ Kaiwasa bitoyao etoari na nana fosa etarami rao-fuifoi, ampafe emadu eteyo, “Kadidu dine!” Wape manea kontai emadu eteyo, “Bereri! Wewai dino medu wei ne!”

³⁰ Ainanya Yesusi medu wesa deyo, “Raofui nani medufo, wiro we yau kaha, mae we mea.

³¹ Ninaia mani rahidafe mai we Allai kiutu kaiwo kariri nunei to. Tuti ninaifa kontaio Allai ambori so mananu nunei foi, amani

mano kerira pari foi, to boriei.

³² Tuti rahida eruai yaua itawai yedai na nunei fo mani, ambori irabi kai-wasanei kiai da we yau ma ki.”

³³ Yesusi medu tonanafo we deinawiai we todoni ambori mirehafo.

³⁴ Ainanya kaiwasa bitoya foi emadu wei eteyo, “Na Kaiwo Musai soi fo, amewaitawanai we Kristusio, ahui we Mananu Mampariri foi mireha kahai mae minohi darang we fitawafa, ampafe todoni fino boyo, ‘Kaisung Inontarai nei todoni kontaio yuasia dedai,’ nina? Tuti Kaisung Inontarai nei mani mandoni dine?”

³⁵ Yesusi medu wesa aha deyo, “Sambewaranei niayai ria mea na ninai we rahidafeai waroi aha kaha. Ampafe Sambewaranei niayai rahang mea nina ne rai mani, mera nai, bereri mani mamantitifo soru mea rai. Weo mano da na mamantitifo mani, wiro deitawang da weafo kaha.

³⁶ Meroaso Sambewaranei na rahida Sambewara nani niyai rahang mea nina ne, ambori mewearikangno Sambewarai.”

Yesusi medua kai tonanafo, da wa dediwa werusara.

Inontarai Yahudi fosa wiro eroaso Yesusi we Mananu Mampariri foi kaha ne rai

³⁷ Yesusi niari fitantuma bitoya paria na inontarai Yahudi fosa euremireafo, tonanai ki wape wiro eroasoi kaha.

38 Finanai ambori mai kariri Sempaisi ne Kaiwo nabi Yesayai medurai deyo, "Sengne waune,

toyari manei wiro yoaso kaiwo amemadura ne kahaia.

Tuti boinawi nemu mambiri- ufo wesa tonanai ki, mae eroasoa kaha ne rai."*

39 Nanai wedaya wiro ewe-mambiri we eroasoa kahai, weo Yesayai medurai kawuru kontai ampa deyo,

40 "Allai medu deyo,

'Yau inari euremifoa kabe tuti enemiro- rongfoia mitubaru,

ambori wiro ewati fi inari nanai na eu- remifo fanai,

tuti etafurai na ene- mitituitafo fanai.

Ambori wiro etarabera-
sa we yau ma we inarisa
ebeng fanai.'**

41 Yesayai medu tonanai we deti Yesusi ne sambewaraio dedai fo kawuru ampa tuti medu kariri Yesusi tonanai.

42 Tonanai ki wape mano ewenunggamie we Yahudi fosa bitoya eroasoi kontai. Wape wiro eteiai ene eroasoi nanai para kaha, weo ematai Farisifosa we dohonao na tonanane etataswa weru munu agama fo fe.

43 Weo mano ewe- nunggamie we Yahudi nanisa esera terai we inon- tarai etaparandinsa, sewa weru Allai deparandinsa fo.

Yesusi ne kaiwo medura fo dinggai nunei tuti kiutu kaiwo kariri

44 Ainanaya Yesusi sahu deyo, "Mandoni kontaio yoaso yau fo mani, wiro yoaso yau tera kaha, mae yoaso Mano demi yau foi,

45 tuti mandoni dino deti yau fo mani, wenani kontaio deti Mano demi yau ma foi.

46 Weo ira to nunei ma nina ne we iweSambewarai, ambori mandoni saino eroaso yau fo mani, wiro enayai na mamantitifo aha fanai.

47 Mandoni dino tarao nehu kaiwofo wape wiro dohong kariria kaha mani, wiro ikutu kaiwo kariri kaha. Weo wiro ira ma we ikutu kaiwo we nunei kaha, mae ira ma we ifariri nunei.

48 Mandoni dino deiaya yau tuti wiro tarao nehu kaiwofo kaha mani, sobu aiboofo rai, weo nehu kaiwo imadura fo aino dinggairi tuti kiutu kaiwo kariri wenani na rahida Sempaisi kife nunei nai foi ne.

49 Weo wiro imadu na man- taung yau kaha, wape Dai, mano demi yau foi, andino demi yau we imadu fianai aino todoni kontaio imadurai we meafo ne.

50 Tuti iwaitawanai we ne kaiwo pondoai we inon- tarainesa fo dohonsa emi- nohi we numainu. Ampafe fianai aino imaduraifa fo, imadurai kariri kaiwo Dai demi yau we imadura fo."

13

Yesusi yuairurang ne inontarai ewesuraya mandu fosa eawemifo we deunausa we ewewoming wawera wesa

¹ Rerai we rahida Paska foi, Yesusi deitawanai we ne rahidafo mai we da weru nunei, daraberahi we Dai aha. Yesusi enewawu ne inontaraifosa paria, amani ne inontarai eroasoi enayai na nunei ninisa, tuti enewawusa pampang paria werea naya fo.

² Yesusi minohi dampi diruai ria ne inontarai ewesuraya mandu fosa tonanai, tuti Saminseni weanggariri Yudas Iskarioti, Simoni antungfoi kawurua, medu wei na enerorongfoi we ambori dewayang Yesusi.

³ Yesusi deitawanai we Dai na rorafaisi dohongno mananufo wei ampa we yu fifiani kontai, tuti deitawanai kontai we da na Allai ma tuti ambori daraberahi we Allai aha.

⁴ Ainanaya doari ayai, disu ne ansung boriei foi, tuti yu ireu aburung feaia wiora na enerabuangfo,

⁵ mayeai wiowu mere-hafeai na loyang bei tuti da mae yuairurang ne inontarai ewesuraya mandu fo eawemifo, tuti dufi eawemifo na ireu aburung wiorahi na enerabuangfo nanai.

⁶ Niari finanai paria sobu Simon Petrusia mani, Simon Petrusi medu wei deyo, "Sengne waune, wiro ruairurang avehune kaha fe?"

⁷ Ampafe Yesusi medu wei deyo, "Fianai aino inari ni-nai wiro boitawana kaharai, wape ambori boitawanai ki."

⁸ Petrusi medu wei deyo, "Nana fanai, todoni kontaio wiro ruai avehune fanai!"

Wape Yesusi medu wei deyo, "Masino iruairurang wau kaha mani, wiro kontai yau kaha."

⁹ Ampafe Simoni medu wei deyo, "Sengne waune, tonana mani wiro ruairurang avehune tera fanai, mae warahu tuti nuhukamieinei kontai!"

¹⁰ Yesusi medu wei aha deyo, "Mandoni dino deria fo mani, mirarebanai kiai ampa, ampafe wiro yuairurang ne taraifoi ahang kaha, mae awengfo terai aino yuairurama ne. Tuti memararebanai ampa, wape wiro mehai tonana kaha."

¹¹ (Yesusi deitawang mandoni dino ambori dewayani fo ampa, doni medu deyo, "Wiro meara mehai memararebana kahai" nina.)

¹² Yesusi yuairurang eawemifo kaia, mayeai yuai ne ansung boriei fo aha sensuni tuti daraberahi to ne katai minohi nai foi aha. Ainanaya medu wesa deyo, "Mewaitawang fi arahi inari we mea ninaifa ne?

¹³ Mesahu yau we Mantaunau tuti Seng, tuti kaiwo memadurai tonana fo tarai, weo yau mani Mantaunau tuti Seng di yau.

¹⁴ Ampafe masino yau mene Mantaunau tuti Seng di yau, tuti iruairurang meawemiwa weo iwewoming we mea tonana mani, mea kontai na todoni feai kontaio meruairurang wawera meawemiwa tonanai, amani mewewoming wawerahai we mea tonanai.

¹⁵ Weo yohong fiainawiai nanai we mea ampa, ambori mea kontai menari kariri fianai aino inari we mea tonanaia fo.

¹⁶ Tarai antu! Imadurai we mea mau yeo, woming manei wiro dedai sewa mano yufi wei foi kaha, tuti mano emi foi wiro dedai sewa mano demi foi kaha.

¹⁷ Mewaitawang fininai na mai ampa, ampare metohong kaririaia mani, mesobu ne maifo rai."

Yesusi medu kariri todoni Yudasi dewayanifo

(*Matiusi 26:21-25; Markusi 14:18-21; Lukasi 22:21-23*)

¹⁸ Yesusi medu aha deyo, "Fianai aino imadurai ninai wiro kariri mea kiai kaha, weo iwaitawang mandoni saino yirisara fo. Wape fianai aino dotu na Kaiwo Mararebana fo todoni kontaio kaririai, amani:

'Mano kionta yau dang nehu rotine mani,
wenani ambori biari
nehu rewangguainei
ki.*'

¹⁹ Finanai wiro kawaria kaharai mae yeikaririai fafong we mea, ambori finanai kariria mani, meroasoai we yau mani mano ahui we YAUNE foi dine.

²⁰ Tarai antu! Imadurai we mea mau yeo, mandoni dino demang we mano yemi foi na mai mani demang we yau kontai. Tuti mandoni dino demang we yau mani, demang we Mano demi yau foi."

²¹ Yesusi medu tonanaia kai fo, enerorongfoi fituayai paria tuti medu deyo, "Tarai antu! Imadurai we mea mau yeo, manei na mea ambori dewayang yau ki."

²² Ne inontarai erariati fosa ewati wawerasa na enemitituai paria we mandoni dino Yesusi deyo tonanafo.

²³ Manei na ne inontarai ewesuraya mandu nanisa, amani mano Yesusi enewawuti foi, wiatai na eneung domoya fo sauo Yesusi.

²⁴ Ampafe Simon Petrusi urekamani deyo, "Butang berahi, we mandoni dino deyo tonanai nina!"

²⁵ Ainanaya mano wiatai sauo Yesusi nani deti we Yesusi tuti medu wei deyo, "Sengne waune, mandoni dino boyoi tonanai nina?"

²⁶ Yesusi yo a wei deyo, "Inontarai nani mani, andino irorang rotifoa tuti yohonai wei ne." Medu tonanaia mayeai kia rotifo yorang na rewangguifa, ainanaya dohonai we Simon Iskariotio antungno Yudasia.

²⁷ Yudasi yu roti Yesusi dohonai tonanai weia fo nanai, enerorongfoi Saminseni sensonia. Ainanaya Yesusi medu wei deyo, "Fianai aino boyo nari wa mani, nari kahairaia."

²⁸ Yesusi medu tonanai wape manei na ne inontarai eminohi etampi ruhiae nanisa wiro tefu fiani aino medurai tonanai we Yudasifo kaha.

* **13:18** Masmuri 41:9

²⁹ We Yudasi yu ene kasi doi foi, amparef mano etampi ruhiai nanisa ewaitarahio Yesusi demi we wiori fieai we rahida Paska foi ete demi we dohong fieai we inontarai ene pari fi fosa.

³⁰ Yudasi yu rotifo ria Yesusia nanai, mayeai doabariri tuti da to boriai sikaherawa. Rabuang bonani mani, diru kawurua.

Yesusi dohongno kaiwo pondoai waworu

³¹ Yudasi da wa nanai, mayeai Yesusi medu we ne inontarai wei fosa deyo, "Ninaia mani Kaisung Inontarai nei, Allai yuaisi dedai sambewarai ampa, tuti na I wedaya inontaraine etaparanding Allai we dedai tuti mirarebanai.

³² Masino na Kaisung Inontarai nei wedaya inontaraine etaparanding Allai mani, na I kontai wedaya Allai deparandini tonanai. Kontai Allai yuaisi dedai tuti mirarebanai ahera tonanai.

³³ Nahu arikangne meaine, wiro inayai waroi ria mea ahang kaha. Ambori mesera we yau ki, wape kariri fianai aino raminde imadurai we mano ewenunggamie iwe Yahudi fosara nanai, tonanai kontai imadurai we mea aha, amani yeyo: To katai ira wei foi, todoni kontaio mane ro weia kaha rai.

³⁴ Yohong Kaiwo Pondoai waworu feai we mea amani: Menemiwawu wawera mea. Toyari yau we enehuwawu meafo, mea kontai menemiwawu wawera mea tonanai.

³⁵ Na tonanane, ambori kaiwasanei kiai ewaitawanai we nehu inontarai meraria yau di mea, amani na mene-miwawu wawera mea fo."

Yesusi medurai we ambori Petrusi feforai ki

(*Matiusi 26:31-35; Markusi 14:27-31; Lukasi 22:31-34*)

³⁶ Simon Petrusi dutang bera Yesusi deyo, "Sengne waune, boyo ro todoni?" Yesusi yoa wei deyo, "To katai iraoi nini, na ninaifa mani wiro ro ria yau kaha rai, wape akawuru wori ro ria yau ki."

³⁷ Simon Petrusi dutang berahi aha deyo, "Sengne waune, we fiani na nina mani ira ria wau kahai nina? Imainenang we imereha we wau!"

³⁸ Yesusi medu wei aha deyo, "Tarai we moinenang we mureha we yau e? Tarai antu! Imadurai we wau mau yeyo, wiro manggohei bibe kaharai wape fofora yau webetoru kawurua!"

14

Yesusi mani weRang we Dai Allai

¹ Yesusi medu paria aha deyo, "Wiro meweansarai fanai. Meroaso Allai, meroaso yau kontai.

² Na Dai ne munu rorong fo mani, katai bitoya we meminohni nai. Masino tonana kaha mani, todoni kontaio yeikaririai we mea ki. Weo ira to wanaia we imainenang katai we mea.

³ Tuti ira to wanaia tuti imainenang kataifeai

we meara mani, ambori yarabera yau we mea aha ma tuti ika mea to nehu kataifoia, ambori na katai doni inayai nai nana mani, mea kontai menayai na nanai.

⁴ To katai bodoni ira wei mani, mewaitawang rangfoi."

⁵ Ainanaya Tomasi medu we Yesusi deyo, "Sengne waune, amewaitawang to katai bodoni ro wei foi kaha, amafe amewaitawang rang nani todoni?"

⁶ Yesusi medu wei aha deyo, "Yauno iweRangne, mano iweTarai di yau, tuti mano Yohong Ansengfoi di yau. Mandoni kontaio da we Dai mani wiro na rang siai bei kaha, mae na yau terai.

⁷ Masino metaroanso yau mani, metaroanso Dai kontai. Na ninai to fongna mani metaroani tuti mewatiao ampa."

⁸ Pilipusi dutang Yesusi aha deyo, "Sengne waune, boinawi Dai we amea, nana mani demoyara we ameara finanai."

⁹ Ampafe Yesusi medu wei deyo, "Pilipuse, waroi mau wa inayai rahang mea, wape metaroanso yau kaharai e? Mandoni kontai andino deti yau mani, deti Dai kontai ampa, amafe todonie modu boyo, yeinawi Dai nani we mea ninai?

¹⁰ Roasoa kahai we Dai niayai na yau tuti yau kontai inayai na Daine ne? Fianai aino imadurai we mea ne, wiro imadurai na mantaung yau

kaha, mae na Dai mano niayai na yaunei. Andino niari ne fi yu fo kai na yaune.

¹¹ Meroasoifa we Dai niayai na yau tuti yau kontai inayai na I. Ete tonana kaha mani, kadono meroasoai weo mewati fitantumao inaria fo.

¹² Tarai antu! Imadurai we mea mau yeyo, mandoni kontai andino yoaso yau mani, ambori niari fianai aino inari ne kontai ki, tuti nanai tera kaha mae niari fi fuba sewa ne nanafo kontai ki. Weo ira we Dai aha.

¹³ Tuti fianai aino metutang weai na wonohune mani, ambori inari kaririai ki, inari kariri finanai ambori iwedaya inontaraine etaparanding Dai.

¹⁴ Masino metutang we fiani kontai we yau na wonohune mani, ambori yohong kaririai ki."

Yesusi dererai we ambori dohongno Nuaninu Mirarebana foi we fiata tata ki

¹⁵ "Masino menemiwawu yau mani, ambori metohong kariri nehu kaiwo pondoia nani."

¹⁶ Yau ambori yutang Dai tuti I ambori dohong Mangfata siai manei we mea aha ma, ambori weriria mea we fitawafa.

¹⁷ Mangfata nani mani Allai Nuaninufoi dine, I mani Nuaninuo deinawi ne wetaraifo. Nunei wiro demang wei kaha, weo wiro detioi kaha tuti deroani kaha. Wape mea mani metaroani, weo weriria mea tuti niayai na mea ki.

¹⁸ Wiro itua mea meweawata kaha, mae ambori yarabera yau we mea aha ma ki.

¹⁹ Waroi ahang kahai mae nunei ambori deti yau ahang kaha, wape mea mani ambori mewati yau. Yarang amparef mea kontai ambori metarang ki.

²⁰ Na rahida bonani dino ambori mewaitawanai we iweboyari ria Dai, tuti meweboyari ria yau, tuti iweboyari ria mea.

²¹ Mandoni kontai andino yu nehu kaiwo pondoia ne tuti dohong kariria mani, wenani dino enewawu yaune. Tuti mandoni kontai andino enewawu yau, wenani Dai ambori enewawuti kontai ki, tuti yau kontai ambori enehuwawuti tuti yeinawi nehu tarainei wei ki.”

²² Yudasi (wiro Yudas Iskarioti kaha) dutang bera Yesusi deyo, “Sengne waune, we fianie boyo boinawi nemu taraiwai we wau mani Mananu Mampariri foi di wau we amea terai mae wiro we nunei sentenang kahai nina?”

²³ Yesusi yoa wei deyo, “Masino inontarai manei enewawu yau mani, inontarai nani dohong kariri nehu aunaune. Wenani Dai ambori enewawuti, tuti Dai tuti yau ambori aura weia tuti auminohi riati.

²⁴ Mandoni kontaio enewawu yau kaha mani, wiro dohong kariri nehu aunaune kaha. Aunauo metaramioai ria yau ninai, wiro na yau kaha, mae na Dai mano demi yau nei.

²⁵ Finanai kai imadurai we mea na inayai na nunei ria mea nina.

²⁶ Wape Mano Fiata foi, amani Nuaninu Mirarebana foi, andino Dai demi na wonohune ma we fiata mea. Nuaninu nani dino ambori deunau fikiai doni konta foi we meane, tuti ambori deretawang mea we fianai aino imadurai kawuru we meara fo.

²⁷ Ne maifo yohonai watai ria mea. Nahu maine yohonai we mea, tuti fianai aino yohonai ninai, wiro ne tarai kariri ne maio nunei dohonai we mea fo kaha. Dohona meweansarai tuti mematai fanai, mae meminohi na mai na nehu maine.

²⁸ Metaramioai we imadu yeyo, ira weru mea, wape yarabera yau we mea aha ma ki. Masino menemiawu yau mani, mefaraise we ira ne. Weo ira we Dai, weo I mani fiabai sewa yau.

²⁹ Wiro fininai kawaria kaharai mae, imadurai fafong tonanai we mea, ambori finanai kawaria mani meroasoai.

³⁰ Wiro imadu kaiwofeai bitoya we mea ahang kahai, weo rahida mai we mananuo wenunggamieie we nunei da ma ne. I wiro ne mambiriufefai we yau kaha,

³¹ wape todoni kontaio finanai kawariai ambori nunei deitawanai we enehuwawu Dai tuti fiani kontai aino Dai demi yau wea fo yohong kaririai na mai.

Into, metoabari mea tara weru katai nini.”

15

Yesusi mani toyari wai robong tarai tuti mano erariati fosa ene tarai toyari ne arirawangfo

¹ Yesusi medu aha deyo, "Yau mani wai angguri robong tarai di yau, tuti Dai dino ne romi angguri foi ne.

² Angguri arawang sobaurai na yau foi, bodoni dino webong kaha mani ferangkutui tuti arawang bo webong foi derari ambori webong bitoya aha.

³ Nahu aunau yeunauwai we mea ne wedaya mea memararebanaia mehai ampa.

⁴ Todoni kontaio menayai na yau pampang, tuti yau kontai inayai na mea ki. Weo angguri arawangfoi siaia mani wiro webong kaha, mae sobaurai na robongfoi fino webong fe. Tonanai kontai we mea, masino menayai na yau kaha mani mewebong kaha.

⁵ Yau mani wai angguri robong di yau tuti mea mani arawang di mea. Mandoni kontaio niayai na yau tuti yau kontai inayai na i mani, webong bitoya. Weo menayai boriei weru yau mani, wiro menari fiea kaha.

⁶ Mandoni kontai wiro niayai na yau kaha mani, wenani kabioi to boriei ne tarai toyari arawangfoi ambori memasa, mayeai fanduhi tuti kabioi to adiafoi we kesoi.

⁷ Masino menayai na yau tuti nahu aunaufo nayai na

mea, nana mani fifiani kontai aino metutang wea fo, mesobuai.

⁸ Masino mewebong bitoya mani wedaya inontarai etaparanding Dai paria tuti na tonanane kontai metainawiai we nehu inontarai meraria yau di mea.

⁹ Toyari Dai we enewawu yau fo, yauo enehuwawu mea kontai tonanai. Menayaia mutu na nehu enehuwawufo nana to.

¹⁰ Masino metohong kariri nehu kaiwo pondoia fo mani, ambori menayai na nehu enehuwawufo, toyari yau we yohong kariri Dai ne kaiwo pondoia fo tuti inayai na enewawufo nanai.

¹¹ Fininai kai yeikariria we mea tonanai, ambori nehu imirisngfo nayai na menemirorongwai, tuti memararisingwa mai.

¹² Nahu kaiwo pondoai we mea finina: Menemiwawu wawera mea, kariri yau we enehuwawu mea fo.

¹³ Mano enewawufo fuba sewa ne mani, inontarai mano dohong ne taraifoi mireha we ne maniwowiri-fosa foi. Wiro enewawufeai fuba sewa ne tonana fo kaha.

¹⁴ Masino metohong kariri nehu kaiwo pondoai we mea fo na mai mani, nehu maniwowiri di mea.

¹⁵ Wiro isahu mea we woming ahang kaha, weo womingfoi wiro deitawang fio ne inontarai yufi wei foi fi niari fo kaha. Wape isahu mea we nehu maniwowiri, weo fi kiaio tarahuoi ria Dai foi, yeisahari kiai we mea ampa.

¹⁶ Wiro meaino metiri yau ne kaha, mae yauno yiri mea ne, tuti iruai mea we ambori mera tuti mewebong bitoya paria, tuti mene bong nanai wiro wioru kaha, mae niayai waroi. Na tonanane fianai aino metutang weai we Dai na wonohune mani, ambori dohonai we mea ki.

¹⁷ Nahu kaiwo pondoai we metohong kariria fo ainai-nai: Menemiwawu wawera mea.”

Yesusi meduraifa we nunei ambori enerireu mano erariati nesa ki

¹⁸ Yesusi medu aha deyo, “Masino nunei enerireu mea mani, mearomioai we ne tonanane enerireu yaufafong ampa, akawuru wori mea ki.

¹⁹ Masino nunei ne inontarai di mea mani, enewawu mea rai. Wape yiri mea weru nunei ampa, ampare wiro nunei ne mea ahang kaha. Nanai wedaya nunei enerireu mea ninai.

²⁰ Mearomio fianai aino anta imadurai kawuru we meara fo amani, ‘Womingnei wiro fiabai sewa mano yufi wei foi kaha.’ Masino enari kanggani yaua mani, ambori enari kanggani mea, mano merufi we yau ne mea kontai ki. Masino etohong kariri nehu kaiwofo mani, ambori etohong kariri mene aunafo kontai ki.

²¹ Wape wonohunei wedaya enari kanggani mea tonanai, amani weo meraria yau fefe, weo nunei wiro deroanso Mano demi yau foi kaha fefe.

²² Masino ira ma tuti imadu wesa kaha, nana mani wiro ewaitawanai we ewesasari kaha, wape ira ma imadu wesa ampa ampare ninaia mani wiro ehidori weru ene sasari nani ahang kaha.

²³ Mandoni kontaio enerireu yau mani, wenani kontai enerireu Dai.

²⁴ Inari fitantuma bitoya na euremireafu ampa, fitantu-mao manei siai wiro niari na wea kaha rai. Masino inari tonanai rahangsa kaha mani, ewesasari kaha. Wape ninaia mani ewatio fitantumao inari fo tonanai ki, wape enemirireu yau tuti Dai kontai.

²⁵ Wape ne tonanane kawariai ambori mai kariri kaiwo dotu na ene Kaiwo Mararebana foi deyo,

‘Inari sarafiea kahai, wape enemirireu yau funomai.*

²⁶ Mangfata ambori yemi da ma foi, amani Nuaninu Mirarebanai Wetaraio ke-wariai na Dai ma foi mani, I ambori meduairai kariri yau ki.

²⁷ Tuti mea kontaio memaduairai kariri yau, weo meweriria yau na reante-nangfo paria sobu nina fefe.”

16

¹ “Fininai kai yeikaririai we mea tonanai ambori wiro metawa fanai.

² Ambori mano ewenunggamiei fosa etata mea weru munu agama Yahudi fo ki. Tuti ambori mano emung mea fosa enemituai we enari tonanafo deinawiai we esomi we Allai tarai finanai.

* 15:25 Masmuri 35:19

Rabuang bo inontarai enari tonanafo ambori kawariai ki.

³ Enari tonanai we mea, weo wiro etaroanso Dai kontai yau kahaia.

⁴ Wape imaduraifafong we mea tonanai ambori fininai kawariai aha mani, mewaitawanai we imadurai kawuru we mea ampa.”

Yesusi medu kariri Nuaninu Mirarebana foi fi niari fo

Yesusi medu aha deyo, “Fininai wiro imadurai we mea na reantenangfo kaha, weo inayai rahang mea ne rai.

⁵ Wape ninaia mani, ira we Mano demi yau ma foi aha, tuti wiro manei na mea dutang deyo, ‘Ro todoni?’

⁶ Wape kaiwo imadurai toninaifa we mea ne wedaya menemirorongwai fituaya.

⁷ Tonanai ki, wape kaiwo imadurai ninai tarai, amani masino ira weru mea mani, finanai kia bengfo sewa we mea. Weo ira wa kaha mani, Mangfatafoi da we mea ma kaha, wape ira wa fino yemi Mangfatafoi da we mea ma fe.

⁸ Mangfata nani da ma mani, ambori wedaya nunei deroanai we niari sasari, deinawiai we nunei kariri ne masifo tuti nunei deitawanai we ambori Sempaisi kiutu kaiwo karirisa ki.

⁹ Mangfata nani deinawi kariri ene sasarifoi weo eroaso yau kaha,

¹⁰ deinawi kariri ne masifo weo ira we Dai aha tuti wiro mewati yau ahang kaha,

¹¹ tuti kariri Sempaisi we kiutu kaiwo kariri nuneifo weo Saminseni, mananu nunei, sobu aiboifo.

¹² Fi bitoya kontai yeyo imadu kariri we mea, wape nina mani wiro mewemam-biriu we metamang wei kaharai.

¹³ Wape Nuaninu nani, amani Nuaninu Mirarebanaio Wetarai foi, ambori wiwiaing mea we metaroanso ne wetaraifo. Wiro medu na mantauni kaha, mae fianai aino taraoaia fo aino medura ne, tuti ambori deikaririai we mea kariri fianai aino ambori kawariai na rahida fui wanai ahang fo.

¹⁴ I ambori deparanding yau, weo ambori medurai we mea fianai aino sobuai ria yau fo.

¹⁵ Fi kiaio Dai nenifoi, yau kontai nehu fi fine. Nanai wedaya imadu yeyo, I ambori medu fi kiaio sobui ria yau foi we mea ki.”

Yesusi ne inontaraifosa emirorong fituaya rai, wape ne nanai ambori yiwang na esfaraisefo aha ki

¹⁶ Yesusi medu aha deyo, “Katu mani mewati yau ahang kaha, tuti katu aha mani mewati yau aha ki.”

¹⁷ Ne inontarai ewesuraya mandu fosa etarami kaiwofo nanai, emadu wawerasa eteyo, “Kaiwo todoni fino medurai deyo, ‘Katu mani mewati yau ahang kaha tuti katu aha mani ambori mewati yau aha nina?’ Tuti deyo, ‘Ira we Dai aha nina?’

18 Fianai aino medurai deyo, 'Katu aha nina?' Tatafu kaiwo medurai tonana fo kaha."

19 Yesusi deitawanai we eteyo etutang berahi we kaiwofo, ampafe medu wesa deyo, "Kaiwo anta imadurai yeyo, 'Katu aha mani wiro mewati yau ahang kaha, tuti katu aha mani ambori mewati yau aha ki'. Kaiwo nanai aino mesewa weai nina e?"

20 Tarai antu! Imadurai we mea mau yeyo, ambori mesai tuti metaidu, wape nunei ambori mirising. Ambori menemirorong fituayai, wape menemirorong fituayai nanai ambori yiwani na memararisingfo aha ki.

21 Wiwinsanai manei ne rahidafo maia mani, amaina pirahai tuti arohuayai, wape minohi tuti arikangfoia kasaua mani, aroporo ne pirahafo tuti arohuayai nanaia, weo mirising we arikang manei saubau-nunggamiei to nunei fefe.

22 Tonanai kontai we mea, ninaifa mani menemirorong fituayai, wape ambori isobu mea aha ki, ampafe wedaya memararising aha, tuti mandoni kontaio wiro wedaya memararising nanai nai weru mea kaha.

23 Na rahida bonani mani, wiro metutang we fieai we yau ahang kaha. Imadurai na kaiwo tarai we mea ne, fiani kontai aino metutang weai na wonohune we Dai fo, finanai ambori Dai dohonai we mea ki.

24 Paria sobu rahida bonini

wiro metutang we fieai na wonohune we Dai kaharai. Ampafe metutanaia, ambori finanai mesobuai ki, ambori memararisingfo mai.

25 Fi imadurai kai tonina ne, imadu na kaiwo netawea fo. Wape rahidao ambori imadu na kaiwo kasau beyari we mea foi ambori da ma ki. Rahida bonani wiro imadu na kaiwo netawea fo ahang kaha, mae imadua kasau we mea kariri Dai.

26 Na rahida bonani ambori mewenadi na wonohune we Dai. Tuti wiro imadurai we mea yeyo yutang Dai we fieaifa we mea kaha.

27 Weo Dai mantauni enewawu mea, weo menemiwawu yau ampa tuti meroasoai we ira na Allai ma fefe.

28 Tarai we ira na Dai ma tuti ira to nunei ma. Wape ninaia mani, ira weru nunei aha tuti ira we Dai aha."

29 Ainanaya Yesusi ne inontaraifosa emadu wei aha eteyo, "Ninaia mani wiro modu na kaiwo netawea fo ahang kaha, mae modu parai ampa.

30 Ninaia mani amewaitawanai we fifiani kontaio boitawanaia kai tuti wiro manei bera wau we fieai ahang kaha. Nanai wedaya ameroasoai we wau mani ro na Allai ma."

31 Yesusi medu wesa aha deyo, "Ampafe meroasoai taraia finina e?"

32 Mearomioaifa! Rahidafo ambori da ma ki, tuti da kawuru ma ne, weo inontarai ewedaya mea mewawu taterai to mene kataifo tuti mewawu weru yaua imesiri

yau. Tonanai ki wape wiros imesiri yau kaha, weo Dai weriria yau fefe.

³³ Fininai kai imadurai we mea tonanai, ambori menumiruinso ne maifo we meweboyari ria yau fefe. Na nunei ninai mesobu dadirafo we inontarai enari kanggani mea, wape metawang meara mutu, weo ikaraikobu nunei ampa!"

17

Yesusi wenadi we mantauni

¹ Yesusi medu tonanaia kaifo, fioai ureng deti to rorafaisi tuti medu deyo, "Daie, rahidafe mai ampa. Ruai nemu Kaisungnei dedai sambewarai, ambori nemu Kaisungnei kontai wedaya wonomuwa dedai sambewarai kontai.

² Toyari bohong mananufo wei we yuo inontarainesa kiai fo ampa, tonanai kontai we I ambori dohong numainufo we mano Dai bohonsa weia fosa kontai.

³ Minohi arang we numainufo ainina: Inontaraine etaroanso Dai wau, we mesiri wauno Allai tarai di Waune. Tuti etaroanso Yesus Kristusi mano Dai bemi ma nei. Nana mani minohi arang we numainufo ainanai.

⁴ Inari Dai wonomuwai dedai tuti sambewarai na nunei ampa, amani na yohong kariri fianai aino Dai bemi yau weai we inari fo na maia fo.

⁵ Tuti ninaifa mani, Daie, ruai yau yedai imararebanai na mantaung wau aro-mureawa, na sambewarai

dedaio raminde nehu kawuruwa fo na nunei wiros tamui kaharai fo."

Yesusi wenadi we ne inontarai erariati fosa

⁶ "Yeinawi Dai wau kawuru we inontarai nunei ninisa ampa, amani inontaraio bohonsa we yaua fosa. Inontarai nanisa mani, nemu inontarai saine tuti bohonsa we yau ampa tuti etohong kariri nemu Kaiwowa ampa.

⁷ Ninaifara mani, ewaitawanai we fi kiaio bohonai we yau ne, finanai na Wau ma.

⁸ Weo nemu Kaiwo bohonai we yau fo, imadurai kai wesa ampa tuti etamang weai na mai ampa. Ewaitawanai tarai we yau mani ira na Dai wau ma tuti eroasoai we wauno bemi yau ne.

⁹ Iwenadi wesa. Wiro iwenadi we nunei kaha mae wesa terai, amani mano bohonsa we yau ma nesa, weo ea mani nemu inontarai saine.

¹⁰ Tuti mandoni kontai saino nehusa ne nemusa kontai, tuti mandoni kontai saino nemu sa wa nehu sa kontai. Tuti na tonanafo etaparanding wonohune dedai tuti sambewarai.

¹¹ Ninaifa mani ira we wau mau ne, wiros inayai na nunei ahang kaha, wape ea mani enayai na nunei ne. Daio murarebanawa Wau! Bowawusa na wonomu wemambiriwa, amani wonomu wemambiriwo bohonai we yau kawurua wa, ambori eweboyari kariri turu we tuweboyari ne.

¹² Na siario inayaifa riasa na nunei ninai, yewawusa

na wonomuwa amani mambiriuo bohonai we yau ma fo, yewawusa kawuru ampa tuti manei wiro niai kaha. Mano niai foi mani, mano kuttuai kawuru kariri we ambori niai, tuti finanai ambori mai kariri kaiwo dotu na Kaiwo Mararebana foa fo.

¹³ Ninaifa mani, ira we Dai wau aha mau tuti fininai kai imadurai na inayai na nunei nina, ambori emirising na mararising tarai yohonai wesa fo.

¹⁴ Dai nemu Kaiwone yohonai kawuru wesa ampa tuti nunei enerireusa, weo ea mani wiro na nunei kaha, toyari yau we wiro na nunei kaha ne.

¹⁵ Yutang wau ninai wiro we ambori kasa weru nunei kaha, mae we ambori borarasa weru mano kerira pari foi.

¹⁶ Ea mani wiro na nunei kaha, toyari yau we wiro na nunei kaha fo.

¹⁷ Narisa emararebanai na ne wetaraifo; Ne wetaraifo mani, nemu Kaiwo Mararebana fo.

¹⁸ Ne tarai toyari bemi yau to nunei ma fo, yau kontai yemisa to nuneia.

¹⁹ We ene maifo wedaya yohong nehu tarainei we wau terai, amani yohong kariri nemu awiawa, ambori na tonanane ea kontai rruaisa we nemu inontarai emararebanai."

Yesusi wenadi we inontarai eroaso nesa kiai ne

²⁰ "Wiro iwenadi tuti ea tera kaha. Mae iwenadi kontai we inontarai ambori eroaso yau fosa, amani inontarai ninisa ansaino

ewuwu kaiwo kariri yau wesa fo.

²¹ Iwenadi ambori ea kiai eweboyari, kariri Dai wau weboyari ria yau tuti yau kontai iweboyari ria wau niae. Tutti ambori eweboyari ria turu, ambori na tonanane nunei deitawanai we Dai wauno bemi yau to nunei ma ne.

²² Ne sambewarai dedaio Dai bohonai we yaua nanai, yohonai kawuru wesa ampa ambori ea kontai eweboyari kariri turu we tuweboyari nina.

²³ Yau iweboyari riasa tuti Dai wau weboyari ria yau, ambori eweboyari tarai. Na tonanane nunei ambori deitawanai we Dai wauno bemi yau ne tuti enemuwawusa kariri enemuwawu yau ninai.

²⁴ Daie, yohong weai paria we ambori mano bohonsa we yaua ninisa, eminohi ria yau na katai bodoni dino inayai nai fo, ambori ewatio nehu sambewaraio dedai fo, amani dadai mirarebanaio bohonai we yaua nanai, weo nari nunei kaharai mae, enemuwawu yau kawurua.

²⁵ Daio mosi wa waune! Nunei wiro deroanso wau kaha, wape yau mani yeroanso wau tuti inontarai ninisa ewaitawanai we Dai wau bemi yau ma ne.

²⁶ Tutti yeiriri wonomuwai wesa ambori etaroanso wau ampa tuti yeiririai pampang wesa tonanai, ambori Dai nemu enemuwawu yau wa nayaia mutu na enemiro-rongfoi tuti yauo iweboyari riasa pampang."

18*Etafu Yesusi**(Matiusi 26:47-56;
Markusi 14:43-50; Lukasi 22:47-53)*

¹ Yesusi wenadi tonanaia kaia fo, i tuti ne inontarai ewesuraya mansiari fosa era to waya sirarang Kidroni eneung dowej foia. Romi bei wiatai na nanai, ampare Yesusi tuti ne inontaraifosa esuai to romifoi afui.

² Yudasi, mano dewayang Yesusi foi, deitawang katai nani kontai, weo Yesusi tuti ne inontarai suraya mandu fosa wea mani era to katai nania fefe.

³ Ampafe Yudasi da to katai nania, kia afai mamuna Roma fosa manea tuti mano ewaitawang wedua Sempaisi ne Munufoi na Yerusalemifo manea, amani inontaraio imami baba fosa tuti Farisi-fosa etemisa fosa. Inontarai nanisa eha fimamuna, pelita tuti obori.

⁴ Yesusi deitawang fi kiaio ambori sodaira fo, ampare dariaia da weu inontarai nanisara tuti dutang berasa deyo, "Mandoni dino mesera wei ne?"

⁵ Eroa wei aha eteyo, "Yesusi, inontarai Nazareti foi." Ampafe Yesusi medu wesa aha deyo, "Yau nina." Yudasi mano dewayani foi kontai doari na nanai riasa.

⁶ Na kutu Yesusi medu deyo, "Yau nina," tonanafo esu to fua ehai beyari tuti etawai aweu ewatai na kahofa nuwowongfo.

⁷ Ainanaya Yesusi dutang berasa nariai aha deyo,

"Mandoni dino mesera wei ne?" Ampafe emadu wei aha eteyo, "Yesusi, inontarai Nazareti foi."

⁸ Yesusi medu wesa aha deyo, "Anta imadurai ampa we yeyo, yaune. Masino yauno mesera we yaune mani, metawing nehu inontarainesa era wa."

⁹ Na tonanane ambori masi kariri kaiwo anta medurai deyo, "Inontaraio bohonsa we yau nesa, wiro itua manei sodai ne karirafo kaha."

¹⁰ Ainanaya Simon Petrusi kia sondu aburuei, ampare fitatini doa awaruo imami fuba foi ne womingfoi tarandaung domoya foi nanai fituayaia. Imami ne woming nani mani wonong fino Malkusi.

¹¹ Ampafe Yesusi medu we Petrusi deyo, "Tata nemu sonduwai na ne kataiwai aha! Weo todoni kontaio yunung anggurio deinawi kariri dadirao Dai dohoni we yau ma nei rai."

Yesusi doari na Hanasi arongreafao, tuti Petrusi gefora Yesusi

*(Matiusi 26:57-75;
Markusi 14:53-72; Lukasi 22:54-71)*

¹² Ainanaya afai mamuna Roma fosa tuti ene mano wenunggamie wesa foi kontai Yahudio mano Farisi fosa tuti mano ewenunggamie we imami fosa etemisa fosa, etafu Yesusi tuti eworahi.

¹³ Reantenang mani ehari to Hanasia, weo Hanasi mani Kayafasi nyong dine. Defuina bonani mani Kayafasi dino weimami fuba ne.

¹⁴ Andino raminde deunau mano ewenunggamie we

Yahudi fosa deyo, "Ne beng sewa mani, inontarai mansiari mireha we kaiwasanei sentenang."

¹⁵ Simon Petrusi tuti manei siai na Yesusi ne inontaraifosa ura ria Yesusia. Inontarai mano siai nani mani imami fuba foi deroansoi, ampare suai kontai ria Yesusi to imamifoi ne munu refongfo afui.

¹⁶ Mae Petrusi mani doari na rahutu borong boriei fo. Mano siai nani dariai ahariei tuti medu we wiwingno deitawang wedua rahutu borongfo nania, ainanaya kia Petrusi usuayai to rongfo afui.

¹⁷ Wiwing deitawang wedua rahutu borongfoi medu we Petrusi deyo, "Wau mani, mano etafuri wani ne inontarai erariati fosa manei di wau to?" Petrusi yoa wei deyo, "Yau mani, bereri."

¹⁸ Rabuang bonani mani, danunangfo ne diru neungfo ampare mangfatafosa tuti mano ewaitawang wedua Sempaisi ne Munufoi na Yerusalem fosa, eruru adia bei kawuru na nanai we eharuruwi. Petrusi kontai da wa doari riasa na nanai we keruru adiafoi kontai.

¹⁹ Na siari nanai kontai, imami fuba foi dutang bera Yesusi kariri ne inontarai erariati fosa tuti kariri ne au-naufo.

²⁰ Yesusi yoa wei deyo, "Imadu parai na kaiwasa bitoya foi urengreafo. Yeunau pampang na munu agama Yahudi fo tuti na Sempaisi ne Munufoi na Yerusalem, kataio inontarai

Yahudi fosa kiai efanduhisa naya fo, wiro imadu wora fiea kaha.

²¹ Ampafe we fianie butang bera yau ninai? Butang bera mano etarami yau yeunau tonana fosa. Inontarai nanisa todoni kontaio ewaitawang fianai aino yeunauwai nana rai."

²² Yesusi medu tonanaifara fo, inontarai ewaitawang wedua Sempaisi ne Munufo manei biari awaru bioipa Yesusi tararei tuti medu wei deyo, "Imami fuba nei mani madu wei tonanaifa ne?"

²³ Yesusi medu we mano bioi foi deyo, "Masino kaiwo imadura ne imadu sarawa mani, boinawi kariri ne imadu sarawai nanai. Mae kaiwo imadura ne wetarai mani, we fianie boipa tarahurei nina?"

²⁴ Ainanaya Hanasi denatu Yesusi to Kayafasi, imami fuba foi, na warangfo eworahia.

²⁵ Simon Petrusi doari mae keruru adiafoi na nanaifa wo. Ainanaya inontarai na nana fosa emadu wei eteyo, "Wau mani, inontarai wani ne inontarai erariati manei di wau to?" Petrusi fefora deyo, "Bereri, yau mani bereri."

²⁶ Ainanaya imami fuba foi ne mangfata manei, i mani imami ne womingno anta Petrusi ferangkutu tarangfoi ne tera dine, medu wei aha deyo, "Antanafa iwati wau we nayai kontai na romifoi riati to?"

²⁷ Mayeai Petrusi fefora aha deyo, "Bereri." Na

tatofang kutu nanai kontaio manggoheifoi bibe.

Yesusi doari na Pilatusi arongreafō

(*Matiusi 27:1-2, 11-14; Markusi 15:1-5; Lukasi 23:1-5*)

²⁸ Kameai kutungna mani, eha Yesusi na Kayafasi ne munufoi to gubernuri Roma foi ne munufoi aha. Inontarai Yahudi fosa wiro esuai to gubernuri ne munufoi afui kaha, weo ematai nana mani, kariri ene hukumifoi mani wedayasa ewerarika, weo eteyo etangno fiang Paska foi fefe.*

²⁹ Ampafe Pilatusi dariai ariei medu wesa na munufoi dereung boriei fo tuti dutang berasa deyo, “Fifianai aino metinggai inontarai nini wea ne?”

³⁰ Emadu we Pilatusi eteyo, “Masino inontarai nini dohong sarawa kaha mani, wiro amehari to aromureane ma kaha.”

³¹ Ampafe Pilatusi medu wesa aha deyo, “Meharia, mehutu kaiwo kariri i, kariri mene hukumi Yahudi wai.” Manamo inontarai Yahudi fosa emadu wei eteyo, “Mae kariri mene hukumi Roma wa mani amene pari haki we amehutu kaiwo we maneia sodai aiboi marareha fo.”

³² Ampafe na tonanane ambori mai kariri kaiwo Yesusi meduraia fo, amani meduraj we deikariri kariri todoni mireha toa fo.

³³ Ainanaya Pilatusi suai to ne munufoi afui tuti sahu

Yesusia dutang berahi deyo, “Taraie, wau weMananu we inontarai Yahudi fesa ne ne?”

³⁴ Yesusi medu we Pilatusi aha deyo, “Kaiwo butanai tonina ne mani, kaiwo tabau na enemurorongfuisi mandiei fine ete mano siai etaisaharai we wau e?”

³⁵ Pilatusi kesou medu wei aha deyo, “Ampafe inontarai Yahudi di yau e? Mano etafu wau eha wau we yau ma nesa mani, nemu inontarai mene nu boyari fosa tuti imami baba fosa. Fisarawai fianai aino nari ampa ne?”

³⁶ Yesusi medu wei aha deyo, “Nehu mananune wiro na nunei kaha, weo masino na nunei mani, ambori na toninane nehu inontaraine erurai we emamuna tuti yau, ambori Yahudifosa wiro etafu yau kahai ki. Manamo tarai we nehu mananune wiro na nunei kaha!”

³⁷ Ampafe Pilatusi dutang berahi aha deyo, “Aa! Tonana mani Mananu di wau e?” Yesusi medu wei aha deyo, “Moduwa tarai we boyo yau mani mananu di yau ne. Ne nanai wedaya itaubau nuhukamiei to nunei ma ninai tuti ira to nunei ma ninai, ambori imaduairai kariri ne wetaraifo. Tuti mandoni kontaio da na ne wetaraifo nani tarao yau.”

³⁸ Pilatusi medu wei aha deyo, “Ne wetarai fianai aino boyoa ne?”

Yesusi sobu aiboimarareha fo
(*Matiusi 27:15-31;*

* **18:28** Esuai to inontarai Yahudi kaha manei ne munufoi mani wedayasa ewerarika kariri ene agamafoi, ambori wiro emai we etohonsua rahida Paska foi kaha.

Markusi 15:6-20; Lukasi 23:13-25)

Ainanaya Pilatusi kiawariai na munu refongfo ahariei, medu we inontarai Yahudi fosa deyo, "Iberahia manamo wiro isobuai we dohong sarafiea kaha.

³⁹ Wape kariri fianai aino inari we mea na defuina neungne na rahida Paska tonina nei, amani yeiai inontaraio ewatai na aitamu rorong ne manei. Ampafe meteyo itawing mano ahui we Mananu we inontarai Yahudi nei we mea re?"

⁴⁰ Manamo kaiwasa bitoya foi ebibe eteyo, "Bereri, wiro inontarai nani fanai, mae Barabasi!" (Barabasi mani, raminde nanai yurai na rabuangno etapa parenta Roma foi paria, tuti inontarai niari ne karirafo dine.)

19

¹ Mayeaia Pilatusi suai afui kia Yesusi ariei tuti demi ne afai mamuna fosa erubati.

² Afai mamuna fosa etanung sapewi weababo bei na ai arirawang weababo foi, tuti etatari na Yesusi nunggamieifoi. Esansuni na ansung borieio kehe rawanderi tuti ne harga dedai fo,

³ mae etaha afong webeliru teai we emarari esomi wei eteyo, "Inontarai Yahudi ne ene mananune waune, amefiae wau!" Ainanaya eboipa Yesusi tarareia.

⁴ Mayeai Pilatusi kiawariai nariai ahariei tuti medu we kaiwasa bitoya foi aha deyo, "Mewati! Ikari mandie i yohoni we mea, ambori

mewaitawanai we wiro isobuai we dohong sarafi kutuea kahaia."

⁵ Yesusi kiawariai ariei, na nunggamieifoi sata sapewi weababo foi tuti sensung ansung borieio kehe rawanderi tuti ne harga dedai fo. Mayeai Pilatusi medu wesa aha deyo, "Mewati inontaraifoi."

⁶ Na kutu imami baba fosa tuti mano ewaitawang wedua Sempaisi ne Munu fosa ewatia Yesusi nanai, ebibe eteyo, "Pahui na aitabafoi! Pahui na aitabafoi!"

Pilatusi medu wesa aha deyo, "Meharia tuti mantaung mea mepahui na aitabafoi, weo wiro isobu fisarawafeai na i kaha fefe."

⁷ Inontarai Yahudi fosa emadu we Pilatusi aha eteyo, "Amene hukumi, tuti kariri hukumi nani mani, todoni kontaio sobu aiboi marareha fo, weo medu deyo i mani Allai ne Kaisung dine fefe."

⁸ Rabuang bo Pilatusi tarao kaiwofo nanai, mitaifo fuba pari aha,

⁹ tuti suai to rorongfo ahafui demi eha Yesusi ahafui dutang berahi aha deyo, "Wau mani na doni ma?" Manamo Yesusi wiro yoa wei kaha.

¹⁰ Ampafe Pilatusi medu wei aha deyo, "Maya we roa we yau kaha e? Boitawana kahai we nehu mambiri we ikutu kaiwo kariri waufone? Weo masino yeyo kosau weru aiboi nini mani kaririai, tuti yeyo wobu aiboi marareha fo mani, finanai kaririai."

¹¹ Yesusi medu wei aha deyo, "Masino Sempaisi dohong mambiriw we wau tonana kaha mani, wiro wemambiriw we kutu kaiwo kariri yau kaha. Ampafe yeikaririai we wau, we mano soa yau to waramurorongfe ma nini mani, ne sasarifoi fiabai sewa wau."

¹² Pilatusi tarao Yesusi we medu tonanafo, yurai paria we sawing Yesusi. Manamo inontarai Yahudi fosa ebibe mambiriw eteyo, "Masino tawing inontarai nani weru aiboi marareha mani, wiro wemaniwowiri we Kaisari kaha. Mandoni dino deyo i mani mananu dine mani, wenani weaiteta we Kaisari."

¹³ Pilatusi tarao emadu tonanafo, demi eha Yesusi ariei, mae minohi na kadera eminohi nai we ehutu kaiwo foi na kataio wonongno Litrostotosi (Nang Kamie) ete na kaiwo Iberani mani esahui we Gabatafoi.

¹⁴ Rahida bonani mani, rahida mainenang we kameaia mani rahida Paska foi, kontai tete araha ureng suraya boru rahida rabuang. Pilatusi medu we inontarai Yahudi fosa deyo, "Mewati mene mananunei!"

¹⁵ Manamo ebibe mantaung eteyo, "Muni weraui! Muni weraui! Pahui na aitabafoi!" Ainanaya Pilatusi medu wesa deyo, "Masi we ipahu mene mananunei na aitabafoi e?" Imami baba fosa eteyo, "Amene mananu siai manei kaha, mae Kaisari mesiri kawuru!"

¹⁶ Ampafe Pilatusi dohong Yesusi wesara we epahui na

aitabafoia.

*Yesusi epahu na aitabafoi
(Matiusi 27:32-38;
Markusi 15:21-27; Lukasi 23:26, 33-43)*

Ampafe eha Yesusi ria Pilatusia.

¹⁷ Yesusi mantauni sodua ne aitabafoi, da to boriei to kataio wonong fino *Woman Nungkamie*, na kaiwo Iberani mani esahui we Golgota.

¹⁸ Na katai nani epahui na aitabafoi. Inontarai siai mandu kontai epahu suru riati, amani manei na domoya manei na dowej, mae Yesusi ne rabuang.

¹⁹ Pilatusi demisa etata kaiwofeai na aitabafoi nunggamieifo. Kaiwo nanai dotutono, Yesusi Inontarai Nazare

²⁰ Inontarai Yahudi bitoya etato kaiwofo, weo katai epahu Yesusi nai foi kefang we bendarifoi tuti kaiwofo esoi na kaiwo Iberani, kaiwo Latin, tuti na kaiwo Yunani fefe.

²¹ Ainanaya imami baba we Yahudi fosa emadu we Pilatusi eteyo, "Wiro woi boyo, 'WeMananu we inontarai Yahudi' fanai, mae woi boyo, 'Medu deyo: Yau mani, inontarai Yahudi ene Mananu di yau.' "

²² Manamo Pilatusi medu wesa aha deyo, "Fianai aino isoia fo, manei wiro yiwang ahang kaha."

²³ Afai mamuna fosa epahu Yesusia kai na aitabafoia fo, mayeai eha ne ansung-foa etatorai webea maisa, mansiari-mansiari sobu beyari tuti eha ne ansung

boriei foi kontai. Ansung nani wiro etawari kaha, mae esairi na nungfo paria sobu awerengfo.

²⁴ Nanai wedaya emadu wawerasa eteyo, "Wiro tasabu ansungnei fanai, mae tahabi onde wei we mandoni dino sobui ne." Enari tonanafo ambori mai kariri fianai aino dotu na Kaiwo Mararebana fo deyo, "Etato nehu ansungfo maisa, tuti ehabi onde we nehu ansung boriei foi."^{*}

Finanai, afai mamuna fosa ansaino enari ne.

²⁵ Kefang we Yesusi ne aitabafoi, Yesusi inangno doari na nanai tuti wing manei kontai, amani inangno ne tahatui dine. Na nanai kontai Mariai Klopasi binengfoi tuti Maria Makdalena uroari kontai.

²⁶ Yesusi fioai ureng detiao inanai tuti ne inontarai dariatio enewawuti foi doari rurang inanai nanafo, medu we inanai deyo, "Aie, nemu arikangfi andinani!"

²⁷ Mayeai medu we ne inontarai dariati foi deyo, "Inamu dinani!" Na siari nanai to fongna fo, Yesusi ne inontarai dariatio enewawuti foi kia Yesusi inanaia minohi riati na ne munufoi.

Yesusi ne mirehafo

(*Matiusi 27:45-50; Markusi 15:33-37; Lukasi 23:44-46*)

²⁸ Mayeai Yesusi deitawanai we fikiaio soduati foi kiai ampa, tuti ambori fianai aino dotu na Kaiwo Mararebana

fo kaririai, doni medu deyo, "Arohutataha."

²⁹ Na nanainofi bei sefang na anggurio sisasa suanai. Ampafe erorangno mandafeai na anggurifoa, tuti etubarai na ai esahui we hisopifoi to Yesusi borongfo ayai.

³⁰ Yesusi sisu anggurifoa kaifo medu deyo, "Kai ampa." Ainanaya Yesusi kirai rahanangfoi to kofa tuti sawing nuaninufoi we Sempaisi.

Etisang Yesusi na ne urangfo

³¹ Rahida bonanai mani rahida emainenang fi kiai we rahida Sabati foi, katu wofoi sawaia mani rahida Sabati foi da ma finanai. Tutu mano ewefonai we Yahudi fosa wiro eroa we na rahida Sabati foi mani mano emarareha na aitaba fosa etawai na aitabafoi kaha. Kontai rahida Sabati bonani tete rahida fuba Yahudifosa etohonsuari bei dine. Ampafe mano ewefonai we Yahudi fosa era we Pilatusia tuti etutani we ambori afai mamuna fosa eharaikobu mano itosobu aiboi marareha fo nani sitoru itoawemifo ambori itomarareha ahera tuti etu sitoru weru aitabafoi we esarai sitoru weruai.

³² Ampafe afai mamuna fo era wa eharaikobu inontarai manduo epahu suru na une aitabafo ria Yesusi fo uwemifo fafong.

³³ Mayeai eteyo etabera we Yesusia mani, ewatiodi we mireha kawurua. Ampafe wiro eharaikobu awengfo kaha.

* **19:24** Masmuri 22:18

³⁴ Wape afai mamuna fo manei disang ti Yesusi eneungfo na wombua aburuei, tuti rika tuti mereha deda na kahaifoi ariei.

³⁵ Inontarai mano deti finanai terai na urengfo, andino soi kariria ne tuti meduai kariri kaiwofo ne, tuti deitawanai we kaiwo meduairai nanai kaiwo tarai fine, ambori mea kontai meroasoai.

³⁶ Weo finanai kawariai tonanai ambori mai kariri kaiwo dotu na Kaiwo Mararebana foa fo, amani:

“Wiro neinafo bei tikai kaha.”*

³⁷ Tuti Kaiwofeai dotu kontai tono:

“Esaite mano etisani foi ki.”*

Eha Yesusia esarai

(Matiusi 27:57-61;

Markusi 15:42-47; Lukasi 23:50-56)

³⁸ Yesusi mirehara fo, mayeai Yusupi inontarai Arimatea foi da wa dutang Pilatusi we yoa wei we kia Yesusia sirai. (Yusupi nini mani Yesusi ne inontarai dariati manei dine, manamo mitai mano ewefoniai we Yahudi fosa ampare wiro daria Yesusi para kaha.) Pilatusi yoa we fio dutani wea fo, ampare da wa kia Yesusi ne taraifoi.

³⁹ Nikodemusi, mano raminde da diruai ma dutang Yesusi foi kontai da riatai. Nikodemusi nini kia maning nunsai mampori fo, amani maning enariri na muri tuti na gaharu foi. Maning nani

mirabafo tarahio kiro piareia sura rai.

⁴⁰ Uka Yesusi ne taraifoia, usansani na ireuo ne harga dedai foi tamu finunsai mampori fo, kariri koangno Yahudi foi we manei mireha mani enariri tonana fo.

⁴¹ Kefang we katai epahu Yesusi na aitabafoi nani mani, romi bei tuti na romi nani fafo waworuo wiro arai manei nai kaharai bei na nanai.

⁴² Rahida bonani rahida Yahudifosa emainenang fi we rahida Sabati foi dine tuti katu mani wofoi sawai werahida Sabati foi aha, tuti fafofoi wiro waroi kaha, ampare eha Yesusi ne taraifoia etohoni wiatai na nanai.

20

Yesusi suwi aha

(Matiusi 28:1-10; Markusi 16:1-8; Lukasi 24:1-12)

¹ Na rahida bo reantenang foi amani rahida Minggu foi, kameai kutung, rerai we ahafoi fioraris, Maria Makdalena da to fafofoia. Deti kamieie etadoiria wiatai wedua kamirei borongfo dedoi weru kamirei borongfoa.

² Ampafe mitoa sera we Simon Petrusi tuti Yesusi ne inontarai mano enewawuti foi, tuti medu we suru deyo, “Eha Sempaisi ne taraifoi weru fafofoi ampa, tuti amewaitawana kahai we eharia etohoni wiatai na doni fo.”

³ Ainanaya Petrusi tuti mano Yesusi enewawuti nani, umito to fafofoa.

* **19:36** Keluaran 12:46; Bilangan 9:12; Masmuri 34:20 * **19:37** Zakariai 12:10

⁴ Umito ruhiaia, wape mano Yesusi enewawuti foi ne fafong weru Petrusi awa sobu fafofa.

⁵ Detikaha fafofa afui tuti deti ireu esansang Yesusi nai foi wiatai na fafo rorongfo, wape suai afui kaha.

⁶ Simon Petrusi nefui ma suai to fafofa afui. Deti ireu esansang Yesusi nai foi wiatai na kataifoi,

⁷ tuti ireuo eworabau nunggamiei nai foi, dedoia wiatai siai.

⁸ Mayeai mano anta ne fafong weru Petrusi to fafofa foi suai kontai afui, detioai tuti yoasaoi.

⁹(Paria sobu rahida bonani wiro etafu fianai aino dotu na Kaiwo Mararebana fo we i ambori suwi na marareha rorong foi aha fo kaha.)

¹⁰ Ainanaya Yesusi ne inontarai urariati fo suru, urarabera suru aha.

Yesusi deinawi ne tarai we Maria Makdalena

¹¹ Wape Maria Makdalena wiro da kahai, mae doari na fafo borongfo mae sai we Yesusi. Sai tonanai mae suang deti to fafo rorongfo afui,

¹² tuti deti wewai mandu, usansung ansung buakarofari, uminohi na katai etohong Yesusi wiatai nai foi, manei na nunggamieifo, manei na awerengfo.

¹³ Wewaifo suru urutang berahi ureyo, "Aie, wai we fiani e?" Mariai yoa we suru deyo, "Nehu Sengnei ehari ampa, tuti iwaitawana kaha we etohoni wiatai na doni ne."

¹⁴ Medu tonanaia, mayeai fiobera ureng deti to kurufui afui mani, deti Yesusi we doari na nanai. Wape deroani we Yesusi dine kaha.

¹⁵ Yesusi dutani deyo, "Aie, fiani wai wei ne? Mandoni dino wera wei ne?"

Mariai deitarahio mano deitawang wedua romifoi dine, ainanaya dutang bera Yesusi aha deyo, "Daie, masino wau kari ne mani, boikaririai we yau we bohoni wiatai na doni, ambori ira wa ikari."

¹⁶ Yesusi medu we Mariai deyo, "Mariae!"

Mariai kia bariri deti we Yesusia, ainanaya medu na kaiwo Iberani deyo, "Rabunie!" (Nana mani, Mantaunau.)

¹⁷ Yesusi medu wei deyo, "Wiro ru yau fanai, weo wiro yarabera yau we Daia kaharai fefe, wape ro wa boikaririai we nehu doroiwasa tuti modurai wesa boyo, ninaia mani yarabera yau we nehu Dai tuti mene Daifoi, we nehu Seng Allai tuti mene Seng Allai foi."

¹⁸ Ampafe Mariai da wa deikaririai we Yesusi ne inontarai erariati fosa, deyo, "Iwati Sempaisi ampa," tuti deisaharai wesa kariri fi kiaio medurai wei fo.

Yesusi deinawi ne taraifoi we ne inontarai erariati fosa
(Lukasi 24:36-39, 47-49)

¹⁹ Na rahida Minggu siari nani, amani dirua, Yesusi ne inontarai erariati fosa efanduhisa na munu bei tuti ehafe rahutufoa marareha, weo ematai mano ewefoniai

we Yahudi fosa fefe. Na tantuma Yesusi da wa doari rahansa tuti medu wesa deyo, "Mararebanafeai we mea."

²⁰ Medu wesa tonanaia fo, mayeai deinawi warafangfo tuti eneungfoi wesa. Ewati Sempaisi tonanafo emirising paria.

²¹ Ainanaya Yesusi medu wesa nariai aha deyo, "Bengfeai we mea. Toyari Dai demi yau fo, tonanai kontai we yemi mea."

²² Medu wesa tonanaia, mayeai fiurarang ansengfoi wesa tuti medu wesa aha deyo, "Mesobuo Allai Nuaninu Mirarebana nei mau.

²³ Masino meteiae inontarai manei ne sasarifoi mani, sasari nani kontaio Allai deiairi. Mae wiro meteiae manei ne sasarifoi kaha mani, Allai kontai deiari kaha."

*Yesusi deinawi ne taraifoi
aha we Tomasi kontai*

²⁴ Wape rahida bonani mani, Tomasi, Yesusi ne inontarai suraya mandu fosa manei, mano esahui kontai we Didimus foi, wiro kiontaisa na kutu anta Yesusi kiauwariaio sa nana kaha.

²⁵ Ampafe Yesusi ne inontarai erariati mano fau fosa emadu wei eteyo, "Amewati Sengnei ampa."

Manamo Tomasi medu wesa deyo, "Masino iwati warafang epahu fo kaha tuti isa warahukehane naya kaha, kontai wiro isa warahune na eneung etisang na wombua fo kaha mani, todoni kontaio wiro iroasoa kaha."

²⁶ Rahida minggu bei aha mani, Yesusi ne inontarai erariati fosa efanduhisa nariai aha na katai nani tuti Tomasi kionta riasa. Rahutufo ehafea marareha, wape Yesusi da wafui doari rahansa. Medu wesa deyo, "Bengfeai we mea."

²⁷ Mayeai medu we Tomasi deyo, "Tomase! Boti warahu-fangne tuti tata waramuke-hawai na nina. Tuti tuba waramuwa ma tatarai na enehuungnei. Tuti enemuro-rong soriru ahang fanai, mae roasoai!"

²⁸ Ainanaya Tomasi medu we Yesusi aha deyo, "Nehu Sengne wau, nehu Allai wau!"

²⁹ Ampafe Yesusi medu wei deyo, "Boti te yau na uremune, ampafe roasoai nina. Mahikaifeai we mano ewatiao kahai, wape eroasoa fosa."

*Fio wedaya oi kaiwone
weafo*

³⁰ Fitantuma bitoya kontaio Yesusi niariri na ne inontarai erariati fosa earomireafo, wape wiro finani oia kiai na bukunei kaha.

³¹ Wape finini kiai oi ne mani, we ambori meroasoai we Yesusi mani, Kristusi dine, amani Mananu Mam-paririo da na Allai ma foi dine, Allai ne Kaisung dine, tuti na meroasoifo metarang na tarai tuti mesobu numain-ufu na wonongfo.

21

*Yesusi deinawi ne taraifoi
aha we eweitu na ne inon-*

tarai erariati fosa na nafareng Tiberiasi

¹ Mayeai aha mani, Yesusi deinawi ne taraifoi aha we ne inontarai erariati fosa na ruru Tiberiasi. Finanai kawariafo tonina.

² Rahida bei mani, Simon Petrusi, Tomasi mano esahui we Didimus foi, Natanieli na bendari Kana na nu Galilea foi, Zebedeus ne arikangfo suru, tuti ne inontarai erariati fo mandu siai kontai, efanduhisa.

³ Simon Petrusi medu wesa deyo, "Yeyo ira we imung erang." Mano wei fosa emadu wei eteyo, "Amera riatai." Ampafe era wa etau-taio wafoa. Wape diru nania kameai mani, wiro esobu diang mansiari kahaia.

⁴ Wofoi deo dautai nanai, Yesusi doari na nafarengfo, wape etaroani we Yesusi dine fo kaha.

⁵ Yesusi medu wesa deyo, "Nehu arikangwa meaine, mesobu diang manea re?" Eroa wei eteyo, "Bereri."

⁶ Yesusi medu wesa deyo, "Mehabi erangwai to domoyawa aha, ambori mesobu diang manea ki." Ainanaya ehabi erangfoi na domoyafoa, wape wiro ewemambiriw we erabiti ahang kaha, weo miko diang bitoya karera fefe.

⁷ Ainanaya Yesusi ne inontarai mano enewawuti foi medu we Petrusi deyo, "Sengnei andi reisi!" Rabuang bo Simon Petrusi taraoai we Sengfoi andinani fo, sata ne ansungfo (weo anta disu ne

ansungfo we miung we diang fefe) ainanaya yobuia.

⁸ Yesusi ne inontarai mano wei fosa fo ewo riatai to nafarengfo arei. Katai emung nai foi to nafarengfo arei mani waroi kaha, tarahio meteri piaring tea rai, tuti erabi erangno sefang na diangfoi nani arei.

⁹ Na kutu ewo arei esobu reifo nanai, ewati adia bei werahisengfo dedoria tonanai tuti na adia rahiseng nani, keso diang manea nai tuti rotifeai.

¹⁰ Yesusi medu wesa deyo, "Meha diangno arahio metafusa nani manea ma."

¹¹ Ainanaya Simon Petrusi dautai to wafoi ayai tuti yabi erangfoi arei. Erangfoi sefang na diang beba, ne fiaufo piaringna piarua sura suraya mantoru (153), tuti bitoya tonanai ki wape erangfoi wiro miabu kaha.

¹² Mayeai Yesusi medu wesa aha deyo, "Mera ma tuti metampi." Yesusi medu tonanai wesa fo, wiro ne inontaraifosa manei wiro dutang berahi aha deyo, "Mandoni di wau?" nanai ahang kaha, weo ewaitawanai we i mani Sengnei dine.

¹³ Yesusi saha tourai afong kia rotifo dohonai wesa, ainanaya niari tonanai na diangfo kontai.

¹⁴ Yesusi deinawi ne taraifoi wesa tonana, na rahida suwi na marareha rorong foi aha ma fo, paria sobu rahida bonani mani we betoru finanai.

Yesusi medu we Simon

Petrusi we dehung ne domba rabuangfoi

¹⁵ Etampi ao kai tonanaia fo, Yesusi medu we Simon Petrusi deyo, "Simoni, Yohanesi ne kaisungne waune, enemuwawu yau fuba sewa weru inontarai ninisa re?" Simon Petrusi yoa wei deyo, "Yo, Sengne wau boitawanai we enehuwawu wau." Yesusi deyo, "Bowawu nehu dombafosa."

¹⁶ Yesusi dutang Simoni weberu aha deyo, "Simoni, Yohanesi ne kaisungne waune, tarai we enemuwawu yau e?" Simon Petrusi yoa wei aha deyo, "Yo, Sengne wau boitawanai we enehuwawu wau." Ainanya Yesusi medu wei aha deyo, "Bowawu nehu domba rabuangnei."

¹⁷ Mayeai Yesusi dutang bariri webetorufo aha deyo, "Simoni, Yohanesi ne kaisungne waune, tarai we enemuwawu yau e?" Simon Petrusi taraaoai we Yesusi dutani tonanai we betorufoa nanai saia. Tuti medu we Yesusi aha deyo, "Sengne waune, wau mani boitawang maino fifiani kontai. Boitawanai we enehuwawu wau." Ampafe Yesusi medu wei aha deyo, "Bowawu nehu domba rabuangnei.

¹⁸ Tarai antu! Imadurai we mea mau yeyo, tarai we raminde webariboaine mani, mantaung wau wora kota enemurabuangwa, tuti ro to katai bodoni kontaio boyo ro wei foi. Wape weinongtawara mani, am-

bori tuba waramuwa we inontarai siaia tuti wenani wiora wau tuti kia wau to kataio maya wei kaha foi ki."

¹⁹ Yesusi medu kaiwo nanafo we deinawi kariri Petrusi, todoni ambori mireha we wedaya inontarai etaparanding Allai na mireha nana foi. Mayeai medu we Petrusi aha deyo, "Ro ria yau."

Yesusi ne inontarai mano enewawutifoi

²⁰ Petrusi deti berahaia mani, deti Yesusi ne inontaraio ewesuraya mandu fo mano Yesusi enewawutifoi we da ria suru. (Yesusi ne inontarai nini dino raminde eminohi etampi ruhiaifa mani, sauo Yesusi tuti andino dutang berahi deyo, "Sengne waune, mano dewayang wau nei mani mandoni dine?" fo.)

²¹ Na kutu Petrusi deti Yesusi ne inontaraifoi nanai, medu we Yesusi deyo, "Sengne waune, inontarai nini fianai aino ambori sobuaifa ne?"

²² Yesusi yoa wei deyo, "Masino yeyo ambori minohi darang paria yarabera yau aha ma mani, wiro nemu fieai we modu wea kaha. Wape wau mani, ro ria yau."

²³ Ampafe nanai wedaya Yesusi ne inontarai mano wei fosa emadurai na sa we eteyo mano Yesusi enewawutifoi nani wiro mireha kaha. Wape Yesusi wiro deisaharai we wiro mireha kaha, mae medu deyo, "Masino yeyo ambori inontarai nani minohi darang paria yarabera yau aha ma mani, wiro nemu fieai we modu wea kaha."

²⁴Inontarai nani dino med-
uairai kariri fininai kai ne,
tuti andino soi kariria ne tuti
tawaitawanai we fianai aino
medurai nanai tarai.

Kaiwo kafe

²⁵ Fi bitoya paria Yesusi
niari kontai, wape finanai
kai oi kariria mesi kiai mani,
enehutituai tarahio nunei
wiro demang we buku fuba
oi kariri fi Yesusi niariri nani
fo kaha.

Fi Rasulifosa Enari

Kaiwo dedung we Fi Rasulifosa Enari

Buku nini mani, buku wefuiaio na Lukasi. I soi kariri Kaiwo Mahikai na Allai fo. Fi fuba kawariai na buku nini mani, soi karirio Yesusi ne rasuli suraya mandu fosa tutira fino Allai Nuaninufoi fiatasa fo, ampare ewuwu Kaiwo Mahikai kariri Yesusi fo na bendari Yerusalem, na nu Yudea foi sentenang, na nu Samaria, pariao sobu nunei rea naya fo.

Buku nini kontai medu karirio rabuang bo erurai tuni Yesusi fi deunau fo pariao fi deunau nanai wedaya esodai dadira bitoya tuni manea kontai awa emarareha. Na bukunei kontai, Lukasi yurai we deisaha kaririai we mano etatora fosa we rang Kristenai nei mani, rang weworu na agama Yahudi foi dine, wiro fi kia karira we dapa parenta Roma foi kaha.

Fi fuba kontai na bukunei mani, watioaia kasau we todoni Nuaninu Mirarebana foi dohong mambiri we mano ewuwu Kaiwo Mahikai kariri Yesusi fo tuni todoni agama Kristenai nei we wewu to fong na nu siai weru Yerusalem fo.

Kaiwo na bukunei deto kuttai toninai:

1:1-26 Emainenang we etairiri Kaiwo Mahikai fo.

1:1-14 Yesusi demisa tuni dohong kaiwo arera.

1:15-26 Etiri mane i we yi-wang Yudasi.

2:1-8:3 Etairiri Kaiwo Mahikai fo na Yerusalem.

8:4-12:25 Etairiri Kaiwo Mahikai fo na Yudea tuni Samaria.

13:1-28:31 Paulusi yufi.

13:1-14:28 Paulusi dontai na reantenang fo.

15:1-35 Rasulifosa efanduhisa emadu na Yerusalem.

15:36-18:22 Paulusi dontai weberu ne.

18:23-21:16 Paulusi dontai webetoru ne.

21:17-28:31 Etafu Paulusi ehari to Roma.

Lukasi ne kaiwoariri fafongne

¹ Teofilus inong mano bontengwa wau. Na nehu buku bo reantenang wai yeiririai we wau kawurua kai ampa, kariri fi Yesusi niari tuni deunauwaia fo,

² na reantenang kutu yuai fi niari fo, paria sobu rahida bo dau to rorafaisi fo. Wiro dau to rorafaisi kaharai mae, na mambiruo Seng Allai Nuaninu Mirarebana foi dohong kaiwoariri we ne rasuli* dirisa fosa, kariri fianai aino enari fo.

³ I mani mireha na aitabafoi kawuru ampa, mae na rahida bo suwi nai nani paria rahida piaru da re deinawi ne tarafrai we rasulifosa tuni niari fi na euremireafo, ambori ewaitawanai weo anture suwi na marareha rorong foi ampa. Ewatioi,

* **1:2** Amani neo Inong Anatu fosa.

kontai medu wesa kariri todoni Allai weMananufo.

⁴ Tuti rabuang bo i minohi etampi ruhiaifa mani, demisa deyo, "Mera weru Yerusalem fanai, wape metamang na ninaifa pariao Dai dohongno fifianai aino dereraia fo, amani aino yeikaririai kawuru we meara nanai.

⁵ Weo Yohanesi webaptisi kaiwasa na mereha terai, wape rahida beiru teai aha mani Seng Allai webaptisi mea na Nuaninu Mirarebana foi, amani sensoni mea ki."

Yesusi dau to rorafaisi

⁶ Ampafe rahida bo rasulifosa efanduhisa ria Yesusi nana fo, etutang bera Yesusi eteyo, "Sengne waune, tofino? Boyo bohong Yahudine amea we ametoa siai weru Romaifosa, mano eru amea nesa finina e?"

⁷ Medu wesa deyo, "Nanane mani, wiro fi weo mea mewaitawana fine kaha. Weo Dai meiri andino medu kiutu kaiwofo na ne mambiriufo ne.

⁸ Wape mea, Nuaninu Mirarebana foi da we mea ma mani, ambori mesobu mambiriuk. Ampafe fio mewati yau inari ne tuti fi yeunauwi we mea mani, metaiririai na bendari Yerusalem nei, kontai na nu Yudea nei sentenang, tuti na nu Samaria foi, tuti katai siai paria sobu nunei werea naya fo."

⁹ Yesusi medu kaiwofoa kai nanafo, Seng Allai yuaisi to rorafaisi na euremireafo, tutu kafafe weduari weru

eara ampafe wiro ewatioi ahang kaha.

¹⁰ Na siario etoa esairaria Yesusi dau to rorafaisi nana fo, tatofang kutu nanai kontaio, inontarai uwemandu uroa riasa. Ansung usansuna fo bua karofari webeyari.

¹¹ Umadu wesa ureyo, "Inontarai Galilea wa meaine, we fiani e metoari na katai kutu siari nani mae mewati we rorafaisi wei ne? Yesusi, mano mewatioi dau to rorafaisi na meuremirea fenani, ambori daraberahi aha ma ki. Daraberahi aha ma fo mani, na kafafe rorong, ne tarai mai kariri mewatioi dau to rorafaisi nanai."

Etiri Matiasi we yiwang Yudasi

¹² Mayeai rasulifosa etaraberasa weru wiwoi Saituni to bendari Yerusalem aha. Wiwoifoi wiata waroifo tarahi kiro bei teai weru Yerusalem.

¹³ Na Yerusalem era to munu bo eminohi nai foi, ainanaya etautai to rorong bo yai pari foi. Rasulifosa mani, Petrusi, Yohanesi, Yakobusi, Andareasi, Pili-pusi, Tomasi, Bartolomasi, Matiusi, Yakobusi mano Alfiusi ne arikangfoi, Simoni (mano biriu we inontarai Israeli fosa etoa siai weru Romaifosa), tutu Yudasi mano Yakobusi ne kaisungfoi.

¹⁴ Rasulifosa kiai, konta Mariai (Yesusi inanai), ne tahatuifosa, kontai wiwing maneiru teai (mano eraria Yesusi fosa), enemirorong boyari efanduhisa ewenadi pampang.

¹⁵ Mano eroasoai efanduhia fosa mani ewepiaring-nao piarei (120) teai. Rahida bei aha mani Petrusi doa rahansa medu wesa,

¹⁶⁻¹⁷ deyo, "Nehu doroi bohi ne meaine! Fiani ainofafongfa Nuaninu Mirarebana foi medu na Mananu Dauti, tuti Dauti soi kaririai na Sengnei ne Kaiwofo, kariri Yudasifo, nana mani mai kaririai ampa. Yudasi nani mani, tane inontarai manei dine, tuti i kontaio Sengnei diriria weo niari fi tanari ne kontai. Wape i mano kia inontaraio etafu Yesusi fosa dine.

¹⁸ Yudasi nini sobu fiembaitai ria imamifosa weo fikarira pari niari fo, amani dewayang Yesusi fefe. Doi etohonai we fiembaitainanai wiori kahofafeai nayai. I sawai, mireha, saupori eneng awa enewairifoi tirurang kiai to boriaia wia nayai.

¹⁹ Kaiwasa fuba eminohi na Yerusalem fosa ewaitawangno Yudasi ne mireha toa fo. Ampefe katai Yudasi wioriri nani, esahui na kaiwo ene etohoni wonongno Akeldama, nana mani *Kahofa Rika*.

²⁰ Ne tonanane kai kariri kaiwo Dauti soi fo, na buku Masmuri, amani dotu toninai:

'Ne katai minohi naya ne watai wawui,
wiro manei minohi naya
fanai.*

Ampefe soi toninai kontai:

'Ne fi yu fo bento, manei yu

siaiya.*"

²¹⁻²² Petrusi medu aha deyo, "Ampefe rahida nini tatiri manei we yiwang Yudasi weo kionta rasuline amea, we ametaiririai we kaiwasa bitoya nei weo Yesusi amewati teri na ameuremireane weo suwi na marareha rorong fi ampa. Mano tatiriri nei mani, manei na inontaraio tararia Seng Yesusi pampang ne tata to katai doni daoa fo, na rahida bo Yohanesi webaptisia fo, paria sobu dau to rorafaisi weru tata naya fo."

²³ Amani mano efanduhisa nanisa, etainawi uwemandu, amani Yusupi, mano esahui we Barsabasi (esahui kontai we Yustusifoi), tutu manei aha mani, wonong fino Matias.

²⁴ Ainanaya ewenadi, eteyo, "Sengne waune, wau boitawang kaiwasa enemiro-rongnei kiai ne. Rahida nini boinawiai we amea, na inontarai mandu nini suru, mantei dino biriri

²⁵ weo werasuli yiwangno Yudasine. Weo Yudasi sawai weru rasulife ampa tuti mireha ampa."

²⁶ Mayeai ehabi onde weo inontarai mandu fo suru, amani tetera fino Matias. Ampefe eruaisi we rasuli kionta ria ewesuraya mansiri fosa.

2

*Nuaninu Mirarebana foi
bia meu na rahida Pentakosta*

* 1:20 Masmuri 69:25

* 1:20 Masmuri 109:8

¹ Rahida fuba Yahudi bei, amani Yahudifosa esahui weo rahida Pentakosta dine, amani inontarai eroasoq fosa efanduhisa na munu bei.

² Mayeai etaramio fiei dotu tantuma na rorafaisi, nikuayai toyario dobarai fenana. Ne nikuayafo bia meu kenggingno munu eminohi nai foi sentenang.

³ Mayeai ewatio fi ne tarai toyario adia ureng fenanai tibohawai wari katai eminohi nai foi, tutu awao sioiriosa.

⁴ Sengnei Nuaninu Mirarebana foi sensoni ea kiai tutu dohonsa emadu na kaiwo aisei bitoya paria, amani kaiwo ewaitawana kaha.

⁵ Na rabuang bonani mani, inontarai Yahudi bitoya na nunei sentenang enayai na Yerusalem. Ea inontarai eroaso Seng Allai.

⁶ Rabuang bo etarami fi dotu foi nana fo, kaiwasa bitoya paria era ma efanduhisa. Ea kiai ehababerafa we etarami rasulifosa emadu na kaiwasa fuba da ma nani ene kaiwofo fefe.

⁷ Epapuhung tuti enemiwawera weai, emadu eteyo, "Inontarai emadu ninsa mani, ea kiai inontarai Galilea saine mae!"

⁸ Tonana mani todonie tatarami terai weo emadu na tane kaiwofe kiai ninai?

⁹⁻¹¹ Tata inontarai na nu Partia, Media, Elami, Mesopotamia, Yudea, Kapadokia, Pontusi, Asia, Frigia, Pamfilia, na Mesiri tutu katai na Libia kefang we bendari Kirene, na nu Kreta tutu na Arapi, manea kontai

na bendari Roma. Tata mani inontarai Yahudi tuti wiro inontarai Yahudi kaha, wape tata kiai tane agama Yahudi. Tataramioai we emadu na tane kaiwone kiai, emadu kariri fitantuma Allai niari fo."

¹² Ea kiai epapuhung paria, etutang wawerasa, eteyo, "Fitantuma tawatioai ninai, taserawawerahai paria!"

¹³ Wape manea eteiberahaifa eteyo, "Ah! Emayeru, ampefe emadu funomai."

Kaiwo Petrusi kioramai

¹⁴ Ainanaya Petrusi doari ria Yesusi ne inontarai mano ewesuraya mansiari wei fosa, mayeai medu we kaiwasa bitoya foi na rawafui fiebai deyo, "Doroi bohi Yahudine meaine, tuti mano menayai na Yerusalemine meaine. Mefobibi metaramiwa we metarami nariaifa, weo yeyo yeikaririai we mea kariri fifianai aino rahida bonini mewatioai ninai."

¹⁵ Inontarai ninisa wiro emayeru kariri meteyoawa kaha, weo kameaine rai arahio araha ureng indiata ninai.

¹⁶ Wape fianai aino rahida bonini mewatioai ninai, Seng Allai medurai kawuru na fafongfa ria nabi Yoweli ampa.

¹⁷ Amani Allai medu deyo, 'Rerai we rahida Sengnei kife nunei foi mani, ambori yenatu Nuhuaninu Mirarebana nei we kaiwasanei sentenang ki.'

Ampafe mene arikangnesa, wiwing tuti mang,

ambori emadu fio
yohonai wesa we
emadura fo,

amani kariri fio ambori
kawariai fo.

Bariboaiwasa ambori ewati
fiainawiaio yeinawiai
wesa we ewatiao fo.

Wawafosa ambori etamiei
kariri amieio yohoni
wesa foi ki.

18 We nehu womingnesa kon-
tai, wiwing tuti mang,
ambori yenatu Nuhuaninu
Mirarebana nei na
rahida bonani we
sensonisa.

Ambori emadu fio yohonai
wesa we emadura fo,
amani kariri fio ambori
kawariai fo.

19 Ambori yeinawi fitantuma
bitoya na rorafaisi,
tuti fitantuma fiebai na
kofa na nunei,
toyari atio rika tuti adia,
tuti riraung dautai
tikahipa kontai ki.

20 Wiro Rahida Fiebai Mi-
rarebana foi,
amani rahida Sengnei
daraberahi nai ma foi
kaharai mae,

wofaisi ambori memantiti ki,
tuti embaifaisi ambori
berika kariri rika ki.

21 Rabuang bonani mandoni
dino sahu Sempaisi
wonongfo mani
ambori kiaharai weru ne
karirafo.*

22 Doroi bohi inontarai Is-
raeli ne meaine. Metaramio
kaiwo fianai aino imadu-
rai ninai kariri Yesusi na
Nazareti foi. Na fitantuma
fuba Seng Allai niari rahang
mea na Yesusi, deinawiai
kasau we mea weo yuaisi,

demi biari we mea meu. Ne
nanai mewaitawanai ampa.

23 Kariri mantauni ne
enetituaifa fo kiutuai we
dohong Yesusi we mea
meu, wape memuni, amani
metua inontarai eharira fosa
epahui na aitabafoia mireha.

24 Wape Seng Allai duwiri
suwi na marareha rorong
foi aha. Mararehafoi kiari,
wape Allai fioresuwi weru
warangfo, weo todoni kontaio
mararehafoi yu weduari
kaha rai.

25 Yesusi nini dino raminde
Dauti medu kariri kontai
deyo,
'Iwati Sengnei doari pam-
pang na arohune,
Da ria yau na warahu do-
moya nei,
ampafe fiani kontaio do-
hong yau irirora kaha.

26 Nanai wedaya enehuro-
rongnei mirising,
ifiai Sempaisi na boro-
hunei,
tuti iminohiwau ene-
hutawang Sempaisi
pampang.

27 Weo wiro tua nuhuan-
nunei wiatai na
marareha rorong foi
kaha,
tuti wiro tua nemu Mano
Mirarebana ne yau in-
lia iworu na fafo ro-
rong fo kaha.

28 Boinawiai we yau ampa
rangno da to numain-
ufo.
Ambori bohong yau
ifaraise katui ahang
kaha,
weo weriria yau pam-
pang fefe.*

* 2:21 Yoweli 2:28-32 * 2:28 Masmuri 16:8-11

29 Doroi bohine mea, tawaitawanai ampa weo tane werengno Dauti mireha ampa tuti esarai ampa, paria sobu rahida bonini ne fafofoi wia rahang tatane, amparefi medu kariri ne taraifoi we wioru kaha fo mani dotu we mantauni kaha, wape kariri manei siai.

30 Wape nabi dine, amparefi deitawanai weo Seng Allai dereraia gefora tutirai, weo ambori yuai manei na ne riria rabuang foi we wemananu ki.

31 Donio deti to fong medu kaririaifa weo Mananu Mampariri Seng Allai dereria foi ambori suwi na marareha rorong foi aha ki, amani medu deyo, 'I wiro Seng Allai suati wiatai na marareha rorong foi kaha, tuti ne taraifoi wiro niaya wioru kaha.'

32 Yesusi nini mani Seng Allai duwiri na marareha rorong fi ampa. Finanai mani amewati terai na ameuremireane.

33 Seng Allai yuasisia minohi na warang domoya fo, tuti sobu Nuaninu Mirarebana foi riati, amparefi denatui we amea meu kariri dereraia fo, donio rahida bonini Nuaninu Mirarebanai nani mewati teri na meuremine tuti metarami teri na metarami feninai.

34 Tarai Yesusi mani Seng dine, weo Dauti mantauni wiro dautai to rorafaisi kaha, wape medu kaririai deyo,

'Seng Allai medu we nehu Sengnei deyo,

"Munohi na warahu domoya ne,

35 pariao inari nemu aitetawausa etawaia ehai tuti esomia ehai we wau."*

36 Ampafe nanai aino inontarai Israeline mea kiai todoni kontaio mewaitawang kepanai na mai we Yesusi mano mepahui sawai na aitaba finani, andino Allai yuasisi we Seng tuti we Mananu Mampariri ne."

37 Na kutu etarami kaiwo fenanai, etatua wawerasa paria. Ainanaya etutang bera Petrusi tuti rasuli mano wei fosa eteyo, "Tonana mani ambori ametohong todoni ki?"

38 Petrusi yo wesa deyo, "Metauberahai weru mene sasariwai. Tutti mansiari mansiari wau webaptisi na Yesus Kristusi wonongne, ambori Seng Allai deiai mene sasariwai, tutti ambori mesobu Nuaninu Mirarebana foi riati.

39 Weo Seng Allai ne dererai ninai dohonai we mea, mene arikangfosa tuti we mano enai na nu waroi fosa kiai, amani inontarai kiaio ambori Seng Allai, tane Sengnei, sahu ruhisa we erariati ma fosa."

40 Petrusi deikaririai wesa tonanai, tuti na kaiwoariri siai bitoya meduri foi kontai, deretawansa tuti deunausa we eroasoai, deyo, "Metanansiau, weo inontarai eharira fosa esobu aiboi maraba ki."

41 Kaiwasa bitoya eroaso fiani aino Petrusi medura

* 2:35 Masmuri 110:1

fo, ainanaya ewebaptisi. Ampafe na rahida bonani kaiwasa eroasoa fosa efau ehontai aha, amani ewepi-aura wering wetoru (3.000).

⁴² Efanduhisa pampang we esobu aunaufo ria rasulifosa, we etampi ruhiae tuti we ewenadi ruhiae, tuti eweboyari riasa pampang.

Inontarai eroasoa fosa eminohi toafo

⁴³ Seng Allai niari fitantuma bitoya paria ria rasulifosa, ampefe kaiwasa bitoya na Yerusalem fosa ematai tutu esomi wei.

⁴⁴ Inontarai eroasoa fosa kiai eweboyari pampang. Fianai aino eneng fo esahuai we fiene ruhiae.

⁴⁵ Ene ra eminohi tutira fo etawayanai, doifo etatorai mai sa kiai kariri fianai aino mansiari-mansiari ewepararura fo.

⁴⁶ Na rahida neungfo efan-
duhisapampang na Allai ne Munufoi refongfoi, we ewenadiwei, kontai na enemunu rorong fo etampi ruhiae na enemirorong mei tuti mirising.

⁴⁷ Efiai Seng Allai pampang, tuti kaiwasafai kiai enemirorong mirising wesa. Rahida neungfo Sempaisi sahu kaiwasa siai bitoya we ehontaisa, amani inontaraio arahi feririsa weru ene sasarifoi.

3

Petrusi tutu Yohanesi unari inontarai fiaya doabariri da

¹ Na rahida bei araha ureng botoru, amani rahida we Yahudifosa ewenadi. Ampefe Petrusi tuti Yohanesi ura to Sempaisi ne Munufoi we uwenadi nai.

² Na wanai, inontarai mang mane, fiaya na siario saubaununggamilai fa. Rahida neungne ne maniwowiri manea eharia minohi na rahutu borong esahuai we *Rahutu Mehikai* weo dedo we doi ria inontarai esuayai to Sempaisi ne Munufoi afuifo.

³ Na kutu siario inontaraifoi deti Petrusi tuti Yohanesi ure usuayai to Sempaisi ne Munufoi fo, dutang suru we urohong doi wei.

⁴ Ampefe usaite inontaraifoi, mayea Petrusi medu wei deyo, "Boti we auru ma."

⁵ Ainanaya inontaraifoi seiraria suru, enetawanai weo ambori sobu fieai ria suru.

⁶ Manamo Petrusi medu wei deyo, "Nehu sobu doi bei kahai arorawa, wape fianai aino nayai ria yau ne, nanai aino ambori yohonai we wau. Na Yesus Kristusi inontarai Nazareti foi ne mambiriufo, boa ro!"

⁷ Ainanaya Petrusi yu na inontarai fiaya foi warang domoya foi tuti fiatari doabariri. Na tatofang kutu nanai kontai awengfo tuti aweng kamiei neung fo suru umutubaru.

⁸ Ainanaya i soiria doa tuti da towana toninai, mayeai da ria Petrusi tutu Yohanesi to Sempaisi ne Munufoi refongfoi afui, da tutu sioiri fiai

Seng Allai.

⁹ Kaiwasa na nana fosa kiai ewatiao we da tutu fiai Seng Allaifo.

¹⁰ Ainanaya etaroansoi we i mani inontaraio fiaya minohi dedo we fi na rahutu borong *Rahutu Mehikai* foi na Sempaisi ne Munufoi. Ampafe ehiri ewarami paria tutu esomi, weo ewati inontarai fiaya foi dentengna fefe.

Petrusi kiorang na Sempaisi ne Munufoi refongfo

¹¹ Inontarai nani weriria suru pampang, itosuai to Sempaisi ne Munufoi refongfo afui. Itoroari na refongno esahuai we *Refong Salomo* foi. Kaiwasafai kiai na nanai emitio kiai ma etoa wari sitoru weo epapuhung paria fefe.

¹² Petrusi deti kaiwasa bitoya foi nanai, medu wesa deyo, "Inontarai Israeline meaine. We fiani e mepapuhung kareraifa tuti mesaite antoru pampang ninai? Mewaitarahio na aune mambiriune ete na aurohong kariri Allai ne Kaiwone aino wedaya inontarai nini doabariri da nina e?

¹³ Bireri, mae Allai mano tane werengfosa esomi wei foi, Allai Abrahami, Allai Isaki tuti Allai Yakupi, Allai nani dino yuai ne womingno Yesusia dedai sambewarai mantaung. Yesusи nani dino raminde metohoni to mano eru mananu fosa we emuni, tuti meteipari na Pilatusi arongreafo, amani na rabuang bo deyo sawini weru aiboifoi fo.

¹⁴ I mirarebanai tuti mei wape metapai tuti metangge-warai pampang ampafe Pilatusi sawini kaha, mae sawingno weming inontarai manei we mea.

¹⁵ I mani andino dohong anseng we tata kiai tuti tasobu numainufo riati, manamo memuni. Wape Allai duwiria suwi kawuru na marareha rorong fi ampa, ne nanai amewati terai na ameuremine tuti amemadu kaririai.

¹⁶ Rahida bonini mewati terai na meuremine kiai kariri fifianai aino inontarai nini sodaira ne. I awengne mutubaru, wemambiri we doa da aha nina ne, weo auroasoai na Yesusi wonongfo. Na Yesusi wonongfo nanai wedaya denteng na meuremirea feninai.

¹⁷ Doroi meaine, Ninaifa amani iwaitawanai we fianai aino mea tuti mene mano ewewafoniai we mea wasa, fi menari we Yesusi nanai meserawawerahai.

¹⁸ Wape na ne toninane donio, fianai aino Allai medurai kawuru na fafongfa ria ne nabifesara fo, weo Mananu Mampariri foi todoni kontaio sodai dadirafo ki, kaiwo nanai aino kawariai anina weo Allai andino wedaya tonanai.

¹⁹ Ampafe doroi mea kiai, metarabera mea weru mene sasariwai, mera we Allai aha ambori waraira mene sasariwai tuti dohong maifo we mea ki, amani Nuaninu Mirarebana foi dohong mea mearomiwa fanahang.

²⁰ Tuti ambori demi Yesusi

da we mea aha ma, weo yuaisi kawuru we weM-ananu Mampariri we mea ampa.

²¹ Yesusi nani minohi na rorafaishi terai paria Seng Allai niari fianggeng fuba nini kiai weworu aha, kariri fianai aino fafongfa medurai na ne nabi emararebana fosara foi.

²² Yesusi nani Musai medurai kawuru kontai ampa deyo,

'Allai, mene Sengfoi, ambori denatu Nabi manei na mene nu Israeli nei we mea mau ki, kariri denatu yau ninai. Fianai aino medura fo todoni kontaio metaramididauwi.

²³ Mandoni dino taradidau Nabifoi kaha mani, wenani ambori Allai warapari weru ne inontaraifosa tuti sodai karirafo.*

²⁴ Tarai, nabi fubao emadu kariri Sempaisi ne Kaiwofe kawurua fosa, amani na nabi Samueli tuti nabi siaio era tuari aha ma fosa, ea kiai emadu kariri rabuang bonini.

²⁵ Sempaisi ne Kaiwo Areraio nabifesa emaduri nani, amani we mea. Na Allai ne Kaiwo Areraio meduri we mene werengno Abrahami mani dotu toninai:

'Na nemu ririanei ambori imoang kaiwasanei kiai na nunei ki.*'

Kaiwo arerai nanai we mea kontai.

²⁶ Ampafe doni Allai yuai ne womingfoi, we demi da we Yahudine mea fafong ma, ambori mioang mea, amani dohong mea metarabera mea weru mene karira metohona fo."

4

Petrusi tuti Yohanesi uroa na Majelisi Agama earomireafo

¹ Petrusi tuti Yohanesi uroa umadu ria inontaraifosa tonana rai mae, imamifosa tuti mano wenunggamie i weo mano ewaitawang wedua Sempaisi ne Munufoi fo, kontai inontarai eweSaduki fosa, era rufang uru ma.

² Ehasou paria we umadurai weo kaiwasafosa weo, Yesusi suwi na marareha rorong fi ampa. Umadurai wesa ureyo, ne tonanane deinawiaifa we inontarai emarareha fosa ambori esuwi aha ki.*

³ Ampafe etafu rasulifo suru eha suru to aitamu rorong fo, manamo diru ampefe uwa na aitamu rorong fo paria sobu kameai.

⁴ Wape kaiwasa etarami rasulifo suru une aunaufo, bitoya paria eroaso ampefe kaiwasa eroaso Seng Yesusi efau aha, tarahio ewepiaura weura wering teai (5.000).

⁵ Ahara mani Majelisi Agama fosa efanduhisa na Yerusalem. Ea mani mano ewenunggamie i weo Yahudi

* ^{3:23} Ulangan 18:15, 18-19 * ^{3:25} Kejadian 22:18, 26:4 * ^{4:2} Sadukifosa mani inontarai Yahudi maneaine, wape eroasoai we inontarai emarareha wiro esuwi ahang kaha. Metatori kontai na Lukasi 20:27-40.

fosa, mano ewewafoniai fosa
tuti mantaunau Kaiwo Musai
soi fosa.

⁶ Efanduhisa ria imami
fuba Hanasi, kontai Kayafasi,
Yohanesi, Aleksanderi tutu
mano ene fami boyari ria
imami fuba foi.

⁷ Mayeai eha Petrusi tutu
Yohanesi awa uroari na
earomireafo etutang bera
suru eteyo, "Muraikaririai
we amea, todonie munari
inontarai fiaya fi denteng
nina? Na mambiri fiani
tutu na mandoni wonongne
munari finanai?"

⁸ Ainanaya Seng Allai
Nuaninu Mirarebana foi
sensoni Petrusi, ampefe
medu wesa deyo, "Dai mea,
mano mewenunggamiai tutu
mewewafoniai ne mea.

⁹ Na rahida bonini auroari
na meuremireane, metutang
bera weo aunari fi mahikai
weo aufata inontarai fiaya
foi, tutu weo meteo
mewaitawang kariri todonie
aunariri denteng toa fo!

¹⁰ Tonana mani metarami
ma, mea kiai tutu inontarai
Yahudi na nu Israeli ne tata
kiai, todoni kontai mewait-
awanai weo inontarai nini
mewatioi we dentengna,
doari na meuremireafe nina
mani, na Yesus Kristusi
inontarai Nazareti foi ne
mambiriufu tutu wonong
mananu fo. Yesusi nini
mani, mea kiai mepahui na
aitabafoi mireha, wape Allai
dohoni suwi aha.

¹¹ Yesusi nini dino Sengnei
ne Kaiwo arawang bonini
dotu wei ne:

'Kamieio mano menari mu-
nune mea, mehabioifi,
andino wekamiei rean-
tenang metang kamiei
doa sauwi ampa.'[†]

¹² Weo Yesusi mesiri
andino weMampariri we
feriri inontaraife tatane. We
na inonotarai fuba nunei
sentenang wiros manei siai
sobu mambiri na Allai weo
feriri tata kaha."

¹³ Majelisi Agama fosa
ewaitawanai weo Petrusi
tutu Yohanesi suru mani
inontarai usewai kaha tutu
usobu aunau dadai fea
kaha, wape ewati suru mani
umadu na mai tutu umatai
kaha, nanafo epapuhung
paria. Ainanaya ewait-
awanai weo uru mani inon-
tarai eraria Yesusi fe mandu
aine.

¹⁴ Wape wiros emadu fieai
ahang kaha, weo inontarai
ufataria denteng foi doari ria
suru na euremireafo fefe.

¹⁵ Ampefe etemi rasulifo
suru ura to boriei weru
rorong eminohi nai foi,
ainanaya emadu kariri fifi-
anai aino enari we suru fo.

¹⁶ Emadu eteyo, "Tanari
fiani we inontarai nini suru?
Weo kaiwasa na Yerusalem
nesa kiai ewaitawanai
kawuru ampa we uru unari
fitantuma fiebai paria. Fi
unariri nani wiros tafaforai
kaha.

¹⁷ Wape ambori kai-
woaririne wuwuai na kai-
wasa bitoya foi kaha mani,
tahasou suru tutu tafafora
wedua suru weo wiros
urairiri Yesusi we manea
ahang fanai."

[†] 4:11 Masmuri 118:22-23. Botio na Lukasi 20:17 Yesusi medu kariri mantauni
toyarine fo.

¹⁸ Ampefe esahu rasulifo suru mampui, etaretawang suru weo dohonao umadu tutu uraunau na Yesusi wonongne ahang fanai.

¹⁹ Manamo Petrusi tutu Yohanesi uroa wesa ureyo, "Mantaung mea menemitiuai weai, we fianai aino wetarai na Allai urengreafone; aurohong kariri mene kaiwone, ete aurohong kariri Seng Allai ne Kaiwone ne?

²⁰ Weo wiro amefotou amemadu kariri fifianai aino ametaramioai tutu amewati terai na ameuremireane, kariri fianai aino Yesusi medurai tutu niari fo."

²¹ Majelisi Agama fosa etaretawang surufo mamboni paria, ainanaya etawing uru ura wa. Weo eserawawerahai etohong aiboi fiani we suru, weo kaiwasafai efiai tutu etaparanding Sempaisi paria we fitantuma unari fo.

²² Inontarai mano sobu fitantuma fuba paria denteng nani ne defuina piaru ampa.

Inontarai eroasoai ewenadi we Sempaisi dohong mambiriw wesa ambori etairiri Yesusi wonongfo pampang

²³ Etawing Petrusi tutu Yohanesi ura to boriei nanafo, urarabera uru we une maniwowirifosa aha, urairiri fifianai aino imami baba fosa tutu mano ewenunggamieie we Yahudi fosa eteyoa fo.

²⁴ Etarami kaiwo fenana fo, ea kiai ewenadi we Sempaisi na enemirorong boyari. Ewenadi eteyo, "Mananu

Sengne Wau, Wauno nari rorafaisi, airausi tutu reireisi, kontai fi niai nai foi sentenang ne.

²⁵ Na Numuaninu Mirarebana waifafongfa modu kawuru ria amene werengno Dauti, nemu womingfoi, modu kariri kaiwasa ambori eweaiteta we Seng Yesusi, boyo,

'Todonie inontarai Yahudi kaha fosa ehasou?

Todonie kaiwasa fuba nunei enemitituai ne beng kaha fo ninai?

Fio enari fo wiro wefiea kaha.

²⁶ Mananu na nunei sentenang emainena we emamuna, tutu mananufosa eweboyari we eweaiteta we Sengnei tutu Mananu Mampariri foi.*

²⁷ Weo antu, Mananu Herodesi tutu Pontius Pilatusi ufanduhu inontaraio Yahudi kaha nesa, amani inontarai Roma nesa, tutu inontarai Israeli nesa kontai. Efanduhisa na bendari bonini eweboyari eweaiteta weo Yesusi nemu Mangfatao mei mirarebana foi, andino ruaisi we Mananu Mampariri.

²⁸ Eweboyari we enari maino fisarawai, weofafongfa wau na nemu mambiriwa, modurai weo finanai ambori kawariaiki. Ampafe tarai, arahio kawariai ampa!

²⁹ Sengne wau boti ma, taramuo todoni etohong tati amea nina. Ampafe bohong mambiriw we amea, ambori

* **4:26** Masmuri 2:1-2

ametairiri nemu kaiwone na mai tutu wiro amematai kaha.

³⁰ Bohong nemu mambiri-uwa weo amea ambori amenari inontarai emaninang ebeng tutu amenari fitantuma siai bitoya we inontarai nunesa na Yesusi, nemu arikangno mei mirarebana foi, ne mambiriufu tutu na wonongfo."

³¹ Ewenadia kai nanafo, ne tarai toyari mundiai fenanai, fio rirou katai eminohi nai foi. Ea kiai Nuaninu Mirarebana foi sensonisa am-pafe esobu mambiri paria tutu ematai kahai we etairiri Allai ne Kaiwo kariri Yesusi fo.

Fianai aino mansiari neng fo, etohonai we ene fi ruhiae

³² Kaiwasa fuba eroasoai nanisa enemirorong boyari eminohi na mai. Na ea kiai manei ne fiae mani sahuai we ne fisiasi kaha, mae fianai aino esobua fo esahuai we ene ruhiae.

³³ Na mambiriufu fuba Allai dohonai we rasulifosa etaiririai we kaiwasa bitoya foi weo Seng Yesusi suwi weru marareha rorong fe ampa. Ampafe Allai mioang ea paria.

³⁴ Na ea kiai manei wiro sobu dadirafea kaha, weo wea mani, mano ene kahofa ete munu fosa etawayanai, ambori doi etawayang weai nanai ehara

³⁵ etohonai we rasulifosa. Mayeai rasulifosa etato doi nanai we mano ene pari fi fosa.

³⁶ Yusupi kontai tonanai. I mani inontarai weriria na

Lewi dine, na nu Siprusi. Rasulifosa esahui kontai weo Barnabasi ete *Arikang Kia Mirising*.

³⁷ I dewayang ne kahofafo, ainanaya doi dewayang wea fo kiara dohonaio rasulifosa.

5

Ananiasi tutu Sapirai ut-ofa rasulifosa am-pafe usobu aiboi marareha na Sempaisi

¹ Inontarai manei wonong fino Ananiasi, ne wiwing wonong fino Sapirai. Ur-awayang une kahofafeai.

² Doi urawayang wea fo, unemirorong boyari we urato kutuai weberu. Weai ma unemitawanai watai we uru, mae weai kiara dohonaio rasulifosa we etatorai. Medu wesa deyo, "Doi aurawayang wea fei ninai kai."

³ Ampafe Petrusi medu wei deyo, "Ananiasie, todoni fino tua Saminsenie sensoni enemurorongwai, paria doni totifa Allai Nuaninu fininai? Na mamunggasai boaria enemutawang doi bowayang weai na kahofa fenanai, bohong weaia watai we wau.

⁴ Todoni fino enemutituai ne karira ninai na enemuro-rongwai meai we totifa tonanai ninai? Kahofafo nemu kahofa fine, bowayanai we doiwa nemu doi fine kontai. Ampafe bohong eai ete bereri ete, nanafo wiro totifa fanai. Boitarahio inontarai nune amea manei dino toto-fari ne ne? Wape Allai dino totofari ne!"

⁵ Ananiasi tarao kaiwofe tonanafo, na tatofang kutu

nanai kontaio sau aweu mirehara. Kaiwasa fuba etarami fio Ananiasi sodairi nana fo ematai karira.

⁶ Ainanaya bariboaifosa era ma esansangno Ananiasi, mayeai eruaisi to borai ariei eharia esaraia.

⁷ Tarahio araha ureng botoru teai aha mani, binengfoi da aha mampui. Wape i deitawangno fianai aino arahi ne mangfi sodaira fo kaha.

⁸ Petrusi medu wei deyo, "Boikaririai we yau, doio wamu murawayang kahofa wea fo ne harga fininai beyari e?" Sipirai yoa deyo, "Yo! Ayaranane."

⁹ Ainanaya Petrusi medu wei aha deyo, "Todoni fino wau tuti nemu mangfoi muweanggari Sempaisi Nuaninu Mirarebana fininai? Taramu ma! Bariboaio esarai wamua fesa etaraberasa kawuru ma ne, wau kontai eha wau esarai wau ahang fininai."

¹⁰ Tatofang kutu nanai kontaio, Sipirai mireha sau aweu wia na Petrusi arongreafo. Bariboaifosa era mampui ewatiao we mireha wiata fo, ampare eruaisi ehari to borieia esarai rurang ne mangfoi.

¹¹ Ampafe inontarai eroaso fosa tutu kaiwasa siai etarami fi karira Ananiasi bineng Sipirai usodairai nana fo, ematai karira.

Rasulifosa enari inontarai efau ebeng

¹² Rasulifosa enari fitantuma bitoya paria na kaiwasa bitoya foi euremireafo.

Inontarai eroaso fosa, enemirorong boyari efanduhisa na Sempaisi ne Munufoi refong esahuai we Serambi Salomoni fo.

¹³ Kaiwasa siai emataisa paria ampare wiwo era wa efanduhisa ria mano eroaso fosa ahang kaha. Tonanai ki, wape kaiwasa bitoya foi esahu suasa paria.

¹⁴ Tuti rahida yiwang rahida inontarai bitoya paria, wiwing tuti mang, eroaso Sempaisi, ampare ehontai riasa.

¹⁵ Kontai awa kaiwasa eruai inontarai emaninang fosa tutu andaung ete fata ewa naya fo, ehosa to rangfoia, ewa nai. Weo enemituitai eteyo, "Ambori Petrusi da na nanaifa mani, nuaninufoi tete inontarai emaninang nanisa, ambori ebeng ki."

¹⁶ Kaiwasa siai bitoya kontai era na bendari watai kefang we bendari Yerusalem fo. Eha inontarai emaninang bitoya tutu mano inggira dohonsa fosa. Tutu inontarai emaninang nanisa, ea kiai rasulifosa enarisa ebeng.

Enari kanggani rasulifosa

¹⁷ Ainanaya imami fuba foi tuti mano erariati fosa, amani inontarai eweSaduki na katai nani saine, enemirorong pirahai we rasulifosa paria.

¹⁸ Ampafe etemi afai maneia we etafu rasulifosa, tuti esoasa to aitamu fuba rorong fo.

¹⁹ Wape diru nani Sempaisi ne wewai manei fiai rahutu

aitamu fo, ainanaya kiasa to borieia, medu wesa deyo,

²⁰ "Mera wa metoari na Sempaisi ne Munufoi refongfo tuti metaiririai na mai we inontarainesa kariri Allai ne Rang Weworu nei, amani rangno kia arangfo nei."

²¹ Ampafe etohong kariri wewaifoi ne kaiwo arera fo. Kameai kutu era to Sempaisi ne Munufoi refongfoa etoa etaunau nayai. Kameai iari nanai kontai imami fuba foi tuti mano erariati fosa era to katai bei na Sempaisi ne Munufoi tuti esahu mano ewenunggamiei we Yahudi fosa efanduhisa, nana mani ahusa we Majelisi Agama. Mayeai etemi ene afai mamuna manea era wa eha rasulifosa na aitamufoi weo awa etutang berasa.

²² Mano era wa fosa esuai tono munu aitamufoi afui, wape wiro ewati sobu rasulifosa kaha. Ampafe etaraberasa aha eteikaririai we Majelisi Agama fosa.

²³ Emadu eteyo, "Amera wa sobu munu aitamufoi mani, amewati rahutufo kafe na mai, tuti mano ewaitawang wedua mano ewa na aitamu rorong fosa etoari na rahutu borongfo ewaitawanai na mai. Wape rabuang bo amefai rahutufoi afui fo mani, amewati sobu manei ubong neung kutea kahaia."

²⁴ Na kutuo mano wenunggamiei we mano ewaitawang Sempaisi ne Munufoi fosa tuti imami baba fosa etarami kaiwo fenana fo, eserawera kaiwo emadurai fa tuti enemituuai paria.

²⁵ Mayeai tutuba inontarai

manei da ma kia kaiwo nina, deyo, "Wawa bohine meaine, metarami ma. Inontarai mano meru aitamuosa nanisa etoa etaunau kaiwasa bitoya foi na Mununei refongfe fo."

²⁶ Ampafe mano wenunggamiei we deitawang Sempaisi ne Munufoi fo tuti ne arombawahifosa era wa eha rasulifosa to Majelisi Agama fosa aha. Wape wiro ehisa na tapapa kaha mae eha suasa, weo ematai kaiwasa bitoya foi, dohonao eru kamieio sa fe.

²⁷ Ehasa afui etohonsa etoa na Majelisi Agama euremireafo. Ainanaya imami fuba foi dutang berasa, deyo,

²⁸ "Amefafora wedua mea kawurua weo wiro metau-nau kaiwasa na inontarai nani wonongfo ahang fanai. Tonanai ki wape metohong kariria kaha! Mene au-nauwai metairiri na bendari Yerusalem sentenang, kontai metoaria metinggai amea weo ameaino ametohona mani inontarai nani mireha ne."

²⁹ Petrusi tuti rasuli wei fosa eroa eteyo, "Todoni kontaio ametohong kariri te fianai aino Allai deyoa fo terai wiro ametohong kariri inontarai manei kaha.

³⁰ Yesusi mano memunia mireha sau na aitaba finani, Allai mano tane werengfosa esomi wei foi, duwiria suwi na marareha rorong fi ampa.

³¹ Kontai Allai yuaisi to warang domoya foi tuti dohoni we Mananu tuti Mam-pariri, ambori inontarai Israeline tata kiai todoni

kontaio tatarabera tata weru tane sasarinei tuti Sengnei deiai tane sasarinei.

³² Ne nanai kiai amewati terai na ameuremireane ampare ametairiri kaririai, tuti Nuaninu Mirarebanaio Allai dohoni we inontaraio etohong kariri ne Kaiwofo deinawiai we finanai kaiwo tarai fine."

³³ Majelisi Agama fe etarami kaiwo fenana fo, erirora awao etang wawerasa beyari we emungno rasulifosa.

³⁴ Wape na Majelisi Agama fosa, Farisi manei wonong fino Gamalieli, mantaunau Kaiwo Musai soi fo manei dine, i kaiwasa etatori kontai. Doari ayai, demi rasulifosa era wariei etoa tourai na borieifoa kawuru wo.

³⁵ Ainanaya medu we Majelisi Agama fosa deyo, "Nehu inontarai bohi Israeline meaine. Menemitituai sauaraifa weo fianai aino ambori menari we inontarai ninisa ne.

³⁶ Weo raminde nanai inontarai manei wonong fino Teudasi, i niariri Weinontarai fuba, tuti ne inontaraio erariati fosa tarahio ewepiaura weru (400) tea rai. Wape afai Roma fosa emuni ampare ne mano erariati fosa era tateraia tuti ne finiarifo wefieai ahang kaha.

³⁷ Tourai aha mani, na rabuang bo eha kariri kaiwasa Yudea ewonomi we etato kaririai nani, amani inontarai Galilea manei, wonong fino Yudasi. I kontai deiaya fiffianai aino parenta Roma fosa enari fo tuti wedaya kaiwasa bitoya

erariati. Wape i emuni kontai tuti ne inontarai erariati fosa ewawu taterai wemansiawaraia.

³⁸ Ampafe fianai aino rasulifesa enari nina mani, nehu kaiwo aunaufinaifa we mea. Fi enari fo tuti ene aunaufo da na Seng Allai ete na inontarai nunei terai e? Taserawawerahai! Ampafe tatamang tawati kaririai ki. Wiro menari fi karira feai wesa fanai! Metawinsa era wa! Weo fi enari ninai tuti ene aunaune na inontarai nunei mani, finanai nai rai!

³⁹ Wape ne nanai da na Seng Allai ma mani mebiriuia todoni kontai fi enari fo nai kaha. Mae tarahio nana mani memamuna weo Allai."

Majelisifosa eroao Gamalieli ne aunaufo.

⁴⁰ Esahu rasulifosa afui, etemi manea siai erarubasa tuti efafora weduasa weo wiro etaunau na Yesusi wonongfo ahang fanai. Mayeai etawinsa era wa.

⁴¹ Rasulifosa era weru Majelisi Agama fosa wape eparaise paria, weo na Allai urengreaflo emai we esodai dadirafo weo eraria Yesusi fefe.

⁴² Wape rahida yiwang rahida, na Sempaisi ne Munufoi refongfo tuti na inontarai ene munufo, etaiririai tuti etaunau Kaiwo Mahikai fo pampang kariri Yesus Kristusi, we i mani Mananu Mampariri dine.

6

Etiri inontarai eweitu weo efata rasulifosa

¹ Rahida yiwang rahida kaiwasa eraria Yesusi fosa

bitoya pari aha. Ea mani inontarai Yahudi saine kiai, wape manea emadu te kaiwo ambe, amani kaiwo Yunani, manea emadu na ene kaiwo Iberani fo. Wape mano emadu na kaiwo Yunani fosa enemirorong tiawera we mano emadu kaiwo Iberani fosa eteyo, "Fianang tatahonai fa na rahida neungne weo fiata mano ene pari fi nesa mani, amene wiwinanesa wiro esobu ea kaha."

² Ampafe doni rasuli ewesuraya mandu fosa efanduhi kaiwasa eraria Yesusi fosara ehai, tuti emadu wesa eteyo, "Doroi bohine meaine, fiangne wedaya ameuremiwa weai we ametatorai awa wiro ametairiri nari Allai ne Kaiwone na mai kaha, nana mani beng kaha.

³ Ampafe metiri doroi eweitu na mea, amani inontaraio mewaitawansa weo Allai Nuaninufoi sensonsisa, kontai esawai, ambori ansaino tatemisa we enari finanai,

⁴ weo amea amene fino, amewenadi tuti ametairiri te Allai ne Kaiwone."

⁵ Kaiwasafoi kiai eroa na fi rasulifosa eteyoa fo. Ainanaya etirio Stefanusi inontaraio yoaso kanggung Yesusi tuti Nuaninu Mirarebana foi sensoni. Kontai Pilipusi, Perkorusi, Nikanori, Timoni, Permenasi, tuti Nikolasi mano na bendari Antiokia; i mani inontarai Yahudi kaha, wape weagama Yahudi waroi kuteai ampa.

⁶ Eteikariri inontarai eweitu fosa we rasulifosa,

ainanaya rasulifosa ewenadi we Sempaisi, tuti ewarami tawansa ambori Sempaisi mioansa we fi enari fo.

⁷ Ampafe Seng Allai ne Kaiwone dafai wariai, tuti na bendari Yerusalem fo kaiwasa bitoya aha eraria Yesusi, tuti imami bitoya kontai eroaso Yesusi.

Etafu Stefanusi etinggairi na Majelisi Agama fosa euremireafo

⁸ Stefanusi nani mani, Allai dohong ne bengfo arora wei paria tuti dohong ne mam-biriufu wei, ampafe niari fitantuma bitoya paria na kaiwasa bitoya euremireafo.

⁹ Wape inontarai manea emamuna wei. Ea mani mano na munu agama Yahudi bei maneaine, amani esahui we *Munu Agama Yahudio Kaiwasa Wyoming Ahang Kaha*. Inontarai na munu agama nanisa mani inontarai Yahudi na bendari Kirene tuti Aleksandria, kontai inontarai Yahudi na nu Kilikia tuti Asia. Ea kiai eruhisa we Stefanusi.

¹⁰ Wape fianai aino Stefanusi medura fo, emadu sobu kaiwofeai ahang kaha, weo Allai Nuaninufoi sensoni dohoni sewai paria.

¹¹ Ampafe ebai inontarai manea na mamunggasai we epampamu etinggairi eteyo, "Ametaramio Stefanusi nani deibera nabi Musai tuti Allai."

¹² Eha weinontarai enemirorongfo, tuti mano ewenunggamiei we Yahudi fosa kontai mantaunau Kaiwo Musai soi fosa. Ainanaya era

wa etafu Stefanusi tuti ehari to Majelisi Agama fosa.

¹³ Eha inontarai mano epampamu etinggai Stefanusi fosa kontai. Mano etinggai fosa emadu eteyo, "Inontarai nini wiro fiotou deibera Sempaisi ne Munu Mirarebana nei tuti Seng Allai ne Kaiwo Musai soi fo kaha.

¹⁴ Weo ametaramioai kawuru ampa weo medu deyo, 'Yesusi inontarai Nazareti foi ambori sota Sempaisi ne Mununei, tuti yiwang pario tane koangno weriria na Musai ma ne.'

¹⁵ Majelisi Agama fosa eminohi esaite Stefanusi. Tuti na kutu siari nanai urengfo sambewaraia toyari wewai ureng fenanai.

7

Stefanusi kiorang na Majelisi Agama earomireafo

¹ Ainanaya imami fuba foi dutang Stefanusi deyo, "Kaiwo inontaraifi medura fo wetarai e?"

² Stefanusi meduai kaiwo etinggairi wea fo, deyo, "Dai mea tuti doroi meaine, metarami ma. Wiro tane werengno Abrahami da wa ne katai na bendari Harani kaharai mae, na rabuang bo minohi na nu Mesopotamia foi, Allai mano Dedai Sambewara foi da wa medu wei

³ deyo, 'Ro weru nemu katainei tuti nemu teranesa, Ro to kataio ambori yeinawi we wau foi.*'

⁴ Ampafe Abrahami yuai aweng weru nu inontarai

Kasdimi foi, deunaung to nu Harani foia. Minohi na nanai awa tamangno mireha, ainanaya Allai demi da weru Harani to katai nini ma, amani katai dino doroi tuti dai mea kiai meminohi nai nini.

⁵ Rabuang bonani wiro Seng Allai dohong kahofafeai fa wei we sahuai fa we fine kaha, kahofa aburung kuteai kontaio wiro dohonai wei kaha. Na rabuang bonani mani Abrahami ne pari arikang, wape Allai dereraia mareha we ambori nu nini dohoni wei ki tuti we ne ririafosa ki.

⁶ Kaiwo ninaifa aino medurai we Abrahami deyo,

'Nemu ririanei ambori eminohi siawai na inontarai siai ene kataifoi ki. Inontarai nanisa ambori enari kangganisa tuti etohonsa we ewewoming wesa defuina pialura weru ki. ⁷ Wape inontarai siai nanisa iru ai-boiosa, tuti ambori ika nemu ririafosa to boriei werusa ambori esomi we yau na ninai ki.*'

⁸ Ainanaya dohong Kaiwo Arera kariri sunatifo we Abrahami tuti medu wei deyo, 'Mewesunati mene arikang mang wausa kiai. Menari tonana mani metainawiai we yau weo mea mani nehu inontarai di mea, tuti metohong kariri nehu Kaiwone.' Ampafe rahida bo Isaki saubau-nunggamie fai awa ne

* 7:3 Kejadian 12:1 * 7:7 Kejadian 15:13-14

rahida indeatoru fo tamang Abrahami wesunati kaririai. Mayeai Isaki kontai wesunati ne kaisungno Yakupi. Tuti Yakupi kontai wesunati ne kaisung ewesuraya mandu fosa, amani ansaino ewewereng we Yahudife tata ninai.

⁹ Na rabuang bonani tane wereng nanisa enemirorong pirahai we Yusupi, ampafe etawayania wewoming na nu Mesiri foi. Wape Allai weririati

¹⁰ donio kiahrai weru dadira fuba sodairi foi, tuti Allai dohong awai wei tuti dohoni biriu paria na rabuang bo da wa doari na Firauni* Mesiri foi arong-greafo. Ampafe Firauni dohong ne bengfo arora wei donio yoasoi tuti yuaisi we gubernuri we nu Mesiri foi tuti wenunggamie we ne istanafoi.

¹¹ Mayeai kahari fiebai bei ming na nu Mesiri foi tuti na nu Kanani nei, ampafe kaiwasafoi kiai esobu dadira paria. Tane werengfosa kontai kahari minsia.

¹² Ampafe rahida bo Yakupi taraoai we na Mesiri mani etawayang patibu naya fo, demi ne arikangno ewewereng we tata fosa era wa, amani era wereantenang pari finanai.

¹³ Rabuang bo era weberu fo arahio Yusupi deikaririai wesa weo i mani ene tahutuifi dine tuti rahida bonani kontai Firauni Mesiri foi deitawang kariri Yusupi ne

terafosa.

¹⁴ Mayeai Yusupi denatu kaiwo we tamangno Yakupi we da tuti ne arikangfosa, amani Yusupi ne terafosa we era to Mesiri ma. Ea kiai efau fo ewepiatorua sura suraya ring (75).

¹⁵ Ampafe Yakupi yuai aweng to Mesiri tuti niai na wanai paria i tuti tane werengfosa emarareha nayai.

¹⁶ Ene ririafosa eha ene neinafo to bendari Sikemi aha ma, tuti esarayai na fafo Abrahamifafongfa biaiti na doi katui kahai ria Hemori ne arikang rabuang foi na bendari Sikemi.

¹⁷ Rabuang eai aha, amani rerai we Allai dohong kariri ne kaiwo dererai we Abrahami fo, tane werengfosa etawing separai bitoya pam-pang aha na nu Mesiri foi.

¹⁸ Mayeai mani Firauni siaio deroanso Yusupi kaha mane iyu na nu Mesiri foi aha.

¹⁹ Firauni weworu nani mei kanggani tanengfosa tuti tiapasa. Dawisa ehabi ene arikang marareha arahio etaubau enumi fosa we ewa funomaia emarareha.

²⁰ Rabuang bonani dino Musai saubaunungne, ne wawafo suru uwatiao we denteng paria, ampafe uradi-wari embai botoru na une munu rorongfo.

²¹ Ainanaya rahida bo ukabioi foi Firauni antuwingfoi sobui ampafe kiari dehumu we ne arikang terai.

* **7:10** Firauni mani, wang dine, wang we mananu Mesiri dine, wiro inontarai wonong fine kaha.

²² Ampafe Musai sobu au-nau bitoya paria kariri au-nau Mesiri foi, donio i we-mambiri paria na medufo tuti yufifo.

²³ Rabuang bo Musai ne defuina piaru fo, enerorong-foi tibau mandie we da wa deti ne doroi inontarai Israeli fosa kariri eminohi toa fo.

²⁴ Ainanaya deti nengfo manei we inontarai Mesiri fo manei niari kanggani kareri, ampafe doa rufang inontarai Mesiri foia miuni paria mirehara.

²⁵ Niari tonanafo deitarahio ambori nengfosa etaroang kaririai we Allai yuaisi we fiatasa kiasa weru ne karirafo. Manamo etaroang kariria kaha.

²⁶ Kameaia mani da aha deti inontarai Israeli mandu umung suru aha, ainanaya yurai we kia ruhi suru aha, deunau suru deyo, ‘Doroi murui ne. Muru mani aisei di muru kaha, ampafe wiro mumung muru fanai!’

²⁷ Wape mano bioi ne doroi foi suang saya Musai to boriei, mae medu wei deyo, ‘Mandoni dino yuai wau we mananu tuti wemangkutu kaiwo we amea ne?’

²⁸ Tarahio nari we boyo mung yau kariri raminde-nafa mung inontarai Mesiri foi e?’

²⁹ Na kutu Musai tarao fi-anai aino nengfi medurai wei nana fo mitai paria, ampafe wewu weru Mesiri, awa minohi waroi na nu Midiani. Na wanai rirau sobu ne kaisung mandu.

³⁰ Defuina piaru da aha ma,

mayeai Sempaisi ne wewai manei da wei ma na katai wekamamiei wowong fo ke-fang we uai Sinai. Wewaifoi da ma na ai denggararu foi rorongfoi.

³¹ Musai pepuhung paria we fi detioai nanai ampafe da kefanai we detioi na mai, ainanaya tarao Sengnei rao-fuifoi medu wei deyo,

³² ‘Yau mani mene wereng-fosa ene Sengfi di yau, amani mene werengno Abrahami, Isaki tuti Yakupi itone Sengfoi.’ Ampafe Musai mitai karira, paria wiro fioai ureng deti we kataifoi ahang kaha.

³³ Mayeai Sengnei medu wei aha deyo, ‘Fatingno sandari tatarwa wa, weo kahofa boa nayai nanai, kahofa mararebana fine.

³⁴ Iwatioai tuti urehu nayai kawuru na nehu inon-taraifosa ene dadira rorong fo paria na nu Mesiri foi ampa. Tarahuo erawamifui esai foi tuti ene dadirafe nanai kawuru ampa, tuti ibiari meu we itawinsa weru ene dadirafu. Ampafe ro ma, yau ambori yemi wau we barabera wau to Mesiri aha we fatasa.’

³⁵ Yo, Musai nini mani, Musaio Israelifosa eteiayari na kaiwo emadurai eteyo, ‘Mandoni dino yuai wau we mananu tuti we mangkutu kaiwo we amea ne?’ Tonanai wape andino Allai mantauni demi we wenunggamiei tuti wemampariri wesa, amani na rahida bo Allai demi ne wewaifoi darioi na ai denggararu foi rorongfo.

³⁶ Musai nani kia inontarai Israeli fosa to boriei weru nu Mesiri foi na fitantuma fuba niariri foi na wanai, kontai na Rawanang Berika foi tuti na katai wekamamiei wowong fo paria defuina pi-aru fo.

³⁷ I kontai Musai mano medu we Israelifosa deyo, 'Allai ambori diri Nabi manei rahang mea na mene ririanei we mea ma, ne tarai kariri diri yau fo.*'

³⁸ Musai dino wiwiaing kai-wasa Israeli fosa, amani tane werengfosa, na katai wekamamiei wowong fo, kontai wewaifoi da ma medu riati na uai Sinai nuwowongfo. Tuti andino sobu Kaiwo Kia Mai we tata fo ria Allai, we medurai we tata ne.

³⁹ Tonanai ki wape tane werengfosa emaya we etaramioi kaha, mae eteia-yari tuti enemirorongfoi dohong we etaraberasa to Mesiri aha.

⁴⁰ Emadu we Haruni eteyo, 'Nari aririwang manea we amesomi wesa we amene seng, ambori seng nani saino ewiwiang amea. Weo Musai nini wenunggamiei we amea kia amea na Mesiri ma, wape ninaifa amewaitawana kahai we fianai aino sodaira fo.'

⁴¹ Ainanaya na siari nanai enari aririwangno sapi ne arikang manei, mayeai emung fiahung we etohonsa we korbani we aririwangfoi tuti etohong muniara we efiai mantaunsa fi enari nanai.

⁴² Ampafe Allai sawing warang werusa tuti suasa esomi we awaha na rorafaisi. Nanai kariri fianai aino mayeai mani nabifosa esoi ahang fo, amani dotu toninai:

'Inontarai Israeline
meaine. Defuina
piarue mera na
katai wekamamiei
wowong fo mani,
fiahung memu-
nsa metohonsa we
korbanifo mani
menari we yau
e? ⁴³ Enehutituai
menari fieai we
yau kaha, mae ne
tarai karirio meriria
munu seng Moloki
tuti aririwang
awaha Refani na
mene rang rorong
fo. Adareti toyari
uru mani aririwang
menari suru we
seng we mesomi
we suru. Ampafe,
ambori iso mea
waroi to inontarai
eharira na nu Babeli
foi we etahe tawang
mea nai.*'

⁴⁴ Stefanusi medu pam-pang, medu kariri Sempaisi ne Munufoi, deyo, "Fafongfa, rabuang bo tane werengfosa enai na katai wekamamiei wowong fo mani, Allai demi Musai niari munu bei wei ambori esomi wei nai. Munu bonani mani era todoni kontaio eriati. Munufoi deinawiai weo Allai niayai rahangsa finanai. Enariri kariri fianai aino Allai deinawiai we Musaia fo.

⁴⁵ Tuti munu nani tane

* 7:37 Ulangan 18:15 * 7:43 Amosi 5:25-27

werengfosa eriati pampang, paria rabuang bo Yosuak kiasa eha katai taneni nini weru kaiwasa siai fosa ene mambiriufo, amani Allai data kaiwasa nanisa na tane werengfosa earomireafo. Munu nani wiatai na nanai paria rabuang bo Dauti yu mananu fo.

⁴⁶ Allai, mano Yakupi somi wei foi, deinawi ne bengfo arora we Dauti, ampafe Dauti dutani we biaung munu bei wei.

⁴⁷ Wape Allai ne Munufoi Mananu Salomoi andino bi-auni ne.

⁴⁸ Tonanai, wape Allai mano Dedai Sewa foi wiru minohi na munu inontaraine tanariri nei kaha, weo nabi manei soi kaririai deyo,

⁴⁹ Rorafaisi mani katai iminohi naya finanai tuti nunei mani katai we awehu doa naya fine. Munu fianang dino meteyo menariri we yaune tuti katai todoni dino ambori iminohi ukai nai ne?

⁵⁰ Yeitarahio na mantaung yau warahune, inari fianggeng fuba nini kiai ne mae?**

⁵¹ Medu aha deyo, "Mea mene tarai kariri inontarai siaio ene pari seng fosa. Menumikamiei mitubaru tuti mehobu metarami we Allai ne Kaiwone. Mea mene tarai kariri mene werengfosa, metapa Allai Nuaninu Mirarebana nei pampang.

⁵² Na nabi rabuang fosa mandoni dino wiro mene werengfosa enari kanggani kaha ne? Kontai etoari aha emung inontarai mano fafongfa Allai demisa we emadu kariri Mano Mirarebana foi we da ma fo ne. Tuti na ninaifa inontarai nani da we mea ma, wape metawayani to mano eharira fosa, tuti memuni.

⁵³ Mesobu Allai ne Kaiwo Musai sobuai ria wewaifosa fo kawuru ampa, wape wiro metohong kariria kaha."

Eru kamieio Stefanusia mireha

⁵⁴ Majelisi Agama fosa etaramio kaiwoariri fuba meduri foi nanafo, ehasoua ehika ederemi wei.

⁵⁵ Wape Stefanusi mano Allai Nuaninu Mirarebana foi sensoni foi, deti we rorafaisi. Deti Allai ne sambewaraio dadai fo tuti Yesusi doa na Seng Allai warang domoya fo.

⁵⁶ Stefanusi medu deyo, "Mewati, iwati rorafaisi tifai tuti Kaisung Inontarai nei doari na Seng Allai warang domoya fo!"

⁵⁷ Majelisi Agama fosa ebibe ehobu wedua kaiwo medura fo tuti ehobu etarami weai. Na kutu nanai kontai eruhisa emamuna wei.

⁵⁸ Efafari to boriei weru bendarifo, mayeai eru kamieoi. Inontarai mano antao epampamu etinggairi nanisa etisu ene ansung boriei fo, etohonaia wa ria bariboa manei wonong fino

* **7:50** Yesaya 66:1-2 † **7:58** Na ene koangfo mani mano etinggairi fosa ansaino eru kamieoi reantenangne.

Saulusi, ambori ene taraifo kesau we eru kamiei oi.[†]

⁵⁹ Na siari eru kamiei oi nana fo, dutanai deyo, "Seng Yesuse, ka nuhuaninunei mau."

⁶⁰ Ainanaya sau aweu disang kapa awebuka, sahu mambiriу deyo, "Sengne waune, sasari enariri nini, dohonao bohoni sau wesa fe!" Medu kaiwofoao kai tonanafo i kiaharaia.

8

¹ Tuti Saulusi doa kontai na nanai, yoа we Stefanusi we emunifo.

Saulusi niari kanggani mano eroasoа fosa ambori ewawu taterai

Rahida kutu siari nani kontaio enari kanggani inontarai eroasoai enai na Yerusalem fosa finanaya, amparef ewawu taterai we mansiawaraia, manea esinsung nu Yudea foi tuti manea na nu Samaria foi, mae rasulifo saino bireri ne.

² Mae Stefanusi nani mani, inontaraio ematai Allai manea, esaia etaidu wei tuti eharia esarai.

³ Wape Saulusifo yurai we niari kanggani inontarai eroasoа fosa pampang ambori wedayasa eraria Yesusi ahang kaha. I suai mai munu bong we sera we inontarai eroasoа fosa, wiwing tuti mang, we tefusa, fiafasa to munu aitamu foi.

Pilipusi deiriri Sengnei ne Kaiwo Mahikai fo na nu Samaria

⁴ Na doni kontaio inontaraio eroasoao ewawu taterai nanisa era wariai

etairiri Kaiwoariri Mahikai fo.

⁵ Pilipusi biari to bendari na nu Samaria foi tuti deiririai we inontarai nanisa kariri todoni Yesusi mani Mananu Mampariri dine.

⁶ Kaiwasao etarami Pilipusi ne kaiwofo tuti ewati fitantuma niari fo, bitoya na ea enemirorong sau we kaiwo medura fo,

⁷ weo inontarai bitoya inggira dohonsa fosa, inggirafo ebibe mantaung tuti era to boriei werusa. Inontaraio efaya tuti esoberaha fosa kontai efau paria niaris ebeng.

⁸ Ampafe kaiwasa na bendari nani fosa efaraise paria.

Simoni mano wesulapi dine tarao Kaiwo Mahikai fo

⁹ Na bendari nani kontai inontarai wesulapi manei, wonong fino Simoni. Waroi ampa ne sulapi niari fo wedaya kaiwasa bitoya na nu Samaria foi epapuhung wei. I bioi arong deyo wiro inontarai funoma dine kaha.

¹⁰ Ampafe kaiwasa fubao na bendarifoi, inontarai fuba tuti inontarai katui, etau we ne kaiwofo tuti etaparandini eteyo, "Inontarai nini mani Allai ne mambiriufi dine, wewonong weo Mambiriу Fuba."

¹¹ Waroi paria ne sulapifo wedaya kaiwasa bitoya foi epapuhung, donio erariati.

¹² Wape Pilipusi deiriri Kaiwo Mahikai fo wesa kariri todoni Allai weMananufo tuti kariri Yesus Kristusi

Mampariri foi, donio eroasoai, ainanaya webaptisia, wiwing tuti mang.

¹³ Simoni mantauni kontai yoasoai tuti Pilipusi webaptisi. Na rahida bonani, da riati pampang. Fitantuma fubao Pilipusi niari fo dohoni pepuhung paria.

¹⁴ Na kutuo rasulifosa na Yerusalem etaramioifa weo inontarai Samaria fosa eroaso Sempaisi ne Kaiwofe kawurua fo etemi Petrusi tuti Yohanesi ura wesara.

¹⁵ Na kutu siario usobusa fo, uwenadi wesa ambori Nuaninu Mirarebana foi sensonisa,

¹⁶ weo ea kiai mansiari kontaio wiro sobu Nuaninu Mirarebana foi kaharai, ea arahio Pilipusi webaptisia terai na Yesus Kristusi wonongfo.

¹⁷ Ainanaya Petrusi tuti Yohanesi uruai uwaramifo awa wasau ea, donio esobu Nuaninu Mirarebana foi anina.

¹⁸ Simoni deti kahairaifa weo rasulifosuru uruai uwaramifo wasau inontaraifosa, amani Nuaninu Mirarebana foi sensonisa. Ampafe donio de dohong doi we suru,

¹⁹ deyo, "Murohong mambiru nanai weai we yau kontai ambori iruai warahua wasau manei mani, wenani sobu Nuaninu Mirarebana foi kontai."

²⁰ Manamo Petrusi yoa wei deyo, "Wau tuti nemu doiwa woru weruai! Weo boitarahio Allai fi dohona fo mani wori na doi e?"

²¹ Enemurorongwai mei we Allai kaha, ampafe nemu

hakifeai we wiro kontai amea na fi ameru ne kaha.

²² Ampafe barabera wau, tawing pario nemu karira enemutituitawa, tuti buttangno Sempaisi ambori tarahai waraira numukamieie kerira nani.

²³ Weo iwaitawanai we wau enemukadatai pampang tuti wau wewoming we sasari."

²⁴ Ainanaya Simoni medu we suru deyo, "Mufata yau muwenadi we Sempaisi ambori fi mumadurai nanai kiai wiro isodai sobu kutea fanai."

²⁵ Petrusi tuti Yohanesi umadu kariri Yesusi tuti urairiri kariri Sempaisi ne Kaiwofoa, ainanaya urarabera suru to Yerusalem aha. Tuti na rang rorong fo urairiri kariri Kaiwo Mahikai fo na munue bitoya na nu Samaria.

Pilipusi sobu inontarai fuba na Etiopia manei tuti deunauwi kariri Yesusi

²⁶ Sempaisi ne wewai manei medu we Pilipusi deyo, "Pilipuse, ro! Ro to do wanansai to rangno bia na Yerusalem tono Gasa foi." (Rangfoi wewui wekamamieie wowong sirahiai.)

²⁷ Ampafe Pilipusifo da wa. Na wana sobu pegawai fuba manei na nu Etiopia, i na rang rorong wa daraberahi to ne kataifoi aha. Inontarai nani andi yufi we Kandake mananu wiwing na Etiopia foi, wenunggamieie we ne rafoi ne. Inontarai nani defai to Yerusalemia we somi we Allai

28 tuti arahi daraberahi aha. I minohi na ne oto kuda umito riwui rorongwa defai fantamai mae deto buku nabi Yesayai.

29 Allai Nuaninufoi medu we Pilipusi deyo, "Ro we otofoia, ro riatu."

30 Ainanaya Pilipusi da kefang otofoia, amani tarao inontaraifoi deto buku nabi Yesayai. Pilipusi dutang berahi deyo, "Daie! Fi botorai nanai boitawanaia?"

31 Inontaraifoi yoa wei aha deyo, "Yeitawanai todoni, manei deikaririai we yau fino?" Ampafe dutani dau to oto rorong fo ayai minohi riatu.

32 Sempaisi ne Kaiwo rabuangno pegawaifoi detora fo ainina:
"I ne tarai toyario dombao etafuri,
erabitia we emuni,
ne tarai toyario domba ne arikangno ehutu nuawurufo mani bibe kaha,
tonanai i wetamui be-yari.

33 I emei kanggani
tuti wiro manei niariri na mai kaha.
Ne ansengfoi efatini weru nunei,
ampafe wiro ne riri-afei aha weo manei kontaio deiriri kariri kaha."*

34 Pegawaifoi dutani deyo, "Boikaririai we yau, mandoni dino nabifi medu kariri ninai? Medu kariri mantauni ete manei siai e?"

35 Ampafe Pilipusifo fioai borong medu, i kia kaiwo aririo pegawaifoi fidetorafo we kaiwo reantenang we deiriri Kaiwo Mahikai kariri Yesusi fo wei.

36 Urafaia sobu kuru bei na rang rabuang, pegawaifoi medu wei deyo, "Botia mereha di wani! Fianai aino masi kahai we webaptisi yau ne?" [

37 Pilipusi yoa deyo, "Roaso Yesusi tarai na enemuro-rongwai mani, iwebaptisi wau." Pegawaifoi deyo, "Iroasoai tarai we Yesus Kristus mani Allai ne Kaisung dine."]*

38 Ainanaya demi mano kia ne otofoi weo fiotouri, ubiari to kurufoi aweu, ainanaya webaptisia.

39 Na kutuo urau weru merehafoi fo, Allai Nuaninufoi kia Pilipusi na tatofang kutu nanai weru kataifoi, ampafe pegawaifoi wiro detioi ahang kaha, mae i defai to ne kataifoi na enerorong mirising paria.

40 Tatofang tonanai mae Pilipusi niai na bendari Asdotia, tuti ne rang rorong daoa fo deiriri Kaiwo Mahikai kariri Yesusi na bendari fubao da maia fo paria sobu bendari Kaisarea rausi.

9

Saulusi daraberahi weru ne karirafu tuti daria Yesusi

1 Na rabuang bonani Saulusi dei kahera inontarai eraria Seng Yesusi fosa,

* 8:33 Yesayai 53:7-8 * 8:37 Fafongfa manei soi kariri Sengne ne Kaiwone amani kaiwo rabuang ninai mantauni dohonai we kaiwo ming tuarai.

meduraifa deyo minsia. I da we imami fuba foi

² we dutani niari surati yoasoi bei, we da to mano ewenunggamiei we munu agama Yahudi watai na bendari Damsiki fosa, ambori sobu inontarai era na Rang Yesusi fe manea na nana mani, wiwing ete mang, tefusa tuti kiasa to Yerusalem.

³ Na ne rang rorong da to Damsikifo, da wa rerai we bendarifoi, tatofang kutu nanai sambewara bei na rorafaisi meu tibohawai wariri. ⁴I sau aweu wiatai na kahofa nuwowongfo, ainanaya tarao manei rawafuifea medu wei deyo, "Sauluse, Saulusi wo! We fiani e nari kanggani yau ninai?"

⁵ Saulusi yoa aha deyo, "Sengne waune, mandoni di wau?" Rawafuifoi medu wei aha deyo, "Yau Yesusi mano nari kanggani fi di yau.

⁶ Wape nina mani boabari wau roa wuaio bendarifoi. Na wanai ambori wobu kaiwoariri kariri fianai aino ambori nari ne."

⁷ Inontarai era ria Saulusi fosa esoisa, epapuhung paria wiro emadu obu kaiwofeai ahang kaha, weo etaramio rawafuifoi wape wiro ewati sobu manei kahaia.

⁸ Ainanaya doabariri tuti fiobau urengfo we deti, manamo urengfafara wiro deti fieai ahang kaha. Ampafe eru na warangfo tuti ebinti esuai to Damsiki.

⁹ Rahida botoru wiro deti kaha, tuti dampi kaha, kontaio mereha arora ne dunung sobu kutea kahaia.

¹⁰ Na Damsiki inontarai manei wonong fino Ananiasi, i inontarai daria Yesusi dine. Detio Seng Yesusi medu wei deyo, "Ananiase!" Ananiasi yoa wei deyo, "Sengne waune, yau ninai."

¹¹ Sempaisi medu wei deyo, "Boabari wau, ro to rangno wonong fino Rang Mimoya, to Yudasi ne munufoi. Butanaifa na nanai we inontarai Tarsusi manei wonong fino Saulusi, we i wenadi we yaupo,

¹² tuti na ne nadi rorong fo deti mang manei wonong fino Ananiasi, da weia tuti yuai warangfo wa sauwi ambori deti aha."

¹³ Manamo Ananiasi yoa wei aha deyo, "Sengne waune, tarahuo kaiwoariri bitoya kariri inontarai nani tuti ne niari fo, toyari niari kangganio nemu inontarai emararebanai na Yerusalem fosa.

¹⁴ Tutu andi nina mani kia surati bei ria imami baba fosa, da kawuru ma weo tefu inontarai ameroaso wau ne amea kiai."

¹⁵ Manamo Sempaisi medu wei aha deyo, "Tonanai ki, wape roa, weo inontarai nani mani yiriri kawuru ampa weo wewoming we yau, ambori deiriri wonohunei we kaiwasa siaio wiro Yahudi kaha fosa, tuti weo ene mananufosa, kontai weo inontarai Israeli nesa.

¹⁶ Tutu yau ambori yeinawai wei kariri ne maraba ambori sodaira fo weo deiriri wonohunei fefe."

¹⁷ Donjio Ananiasifo da to munufoia da wafui. Yuai

warangfo sau Saulusi medu wei deyo, "Sauluse, nehu doroi bohine waune. Seng Yesusi, mano botioi na rang rabuang na rahida bo ro nai ma nani, andi demi yau ira we wau ma nina, ambori boti aha, tuti Nuaninu Mireebana foi sensoni wau."

¹⁸ Na tatofang kutu nanai kontaio fi niai kobi na urengfo, ne tarai toyario diang neuna fenanai, tifasa weru urengfo ampefe deti na mai aha. Ainanaya doa bariri, mayeai Ananiasi webaptisi.

¹⁹ Tuti dampi aha ampefe ne taraifoi mitubaru aha.

*Saulusi deunau kariri
Yesusi na bendari Damsiki*

Saulusi niai na Damsiki rahida beiru teai aha ria mano eraria Yesusi fosa.

²⁰ Ifo da finanaya to munu agama Yahudi fo tuti deiririaifa na nanai we Yesusi mani Allai ne Kaisung dine.

²¹ Kaiwasa na nana fosa ehiri ewarami paria weo etaramioi medu tonana fo. Eteyo, "Waitarahio inontarai nini faini dino mingno inontarai eraria Yesusi fesa na Yerusalemifo mae? Kontai da to ninaifa ma ne mani, da wea fino tefu inontarai eroasoai na nina nesa weo kiasa to imami baba fosa mae?"

²² Wape rahida yiwang rahida Saulusi kaiwo medura fo wemambiriu pari aha. Kaiwoariri medura fo deinawiai weo Yesusi tarai Mananu Mampariri dine, paria Yahudi enai na Damsiki fosa etaperemi tinang we beyari we kaiwofo.

²³ Rahida bitoya da wa, amani inontarai Yahudi fosa ehasou Saulusi we yoaso Yesusi fefe, ampefe eteiruhi kaiwo weo emuni.

²⁴ Ampafe diru rahida etamang wedua rahutu bendari borong fo. Manamo ene enarifo taraoaifa ampefe deitawanaia.

²⁵ Ampafe diru bei Saulusi ne inontarai erariati fosa ehari, etuki na fino nawang bei, etuki roaino wore kamiee eruti wedua bendarifoi nai foi aweu.

*Saulusi daraberahi to
Yerusalemi*

²⁶ Saulusi da to Yerusalemia, i niari we kiontaio Yesusi ne inontarai erariati fosa, manamo ea kiai emataiti weo eroaso tururi kahai, weo dohonao i mani inontaraio daria Yesusi tarai dine kaha fe.

²⁷ Wape Barnabasi yoasoi ampefe kiari ura we rasulifosara, tuti deiririai wesa kariri todoni Saulusi deti Sempaisi na rang rabuang fo, tuti kariri medu wei fo. Deikaririai kontai kariri todoni Saulusi mitai kaha deiriri Yesusi wonongfo na Damsikifo.

²⁸ Donio Saulusi niayai riasa tuti kiorang Sempaisi wonongfo na mitai kahai wari bendari Yerusalem tantenang.

²⁹ Kontai medu ria inontarai Yahudi mano emadu na kaiwo Yunani fosa kariri Yesusi awa esawasa, wape ea erurai we emuni.

³⁰ Doroio eroasoai fosa etaramioi we Yahudifosai ete emuni ampefe ewawuri to bendari Kaisarea arau,

mayeai etanatui pari to bendari Tarsusi.

³¹ Ampafe donio jemati na nu Yudea foi sentenang, nu Galilea foi tuti Samaria foi eminohifo ematai Sempaisi tuti eminohi na mai, manea enari kangganisa ahang kaha. Allai Nuaninu Mirarebana foi fiatasa dohong enemirorongfoi fiabai, ampafe ewemambiriу aha, kontai efau aha.

Na Lida Petrusi niari Eneasi denteng

³² Petrusi da wariai suambawa mano eroasoa fosa na kataifoi sentenang. Na rahida bei i suambawao Sempaisi ne inontarai emararebana fosa na bendari Lida foi.

³³ Na wanai sobu inontarai mang manei wonong fino Eneasi, inontarai nani fiaya defuna indeatorua finanai. I wia terai na ne fatafoi.

³⁴ Medu wei deyo, "Enease, Jesus Kristusi waraira mani-nangwai weru wau. Boabari wau tuti funtang fatao wa nai wai." Na kutu nanai kontai Eneasi doabariri.

³⁵ Kaiwasa fuba eminohi na Lida tuti Saron fosa ewati Eneasi we dentengfo ampafe ea kiai eroaso Sempaisi.

Na Yope Petrusi duwi Tabitai

³⁶ Na bendari Yope wiwing manei wonong fino Tabitai (wonong na kaiwo Yunani mani *Dorkasi*, neta we rusa). I mani inontarai daria Yesusi, tuti niari fi beng bitoya pam-pang tuti fiata inontarai ene pari fi fosa.

³⁷ Na rabuang bonani fai i meninang pariao mireha. Ainanaya wiwing mireha nani etohoni deriaia, eruaisi ao wiatai na rorong bo yai foi.

³⁸ Yope wiro waroi tururai weru Lida kaha, donio Yesusi ne inontarai erariati fosa na Yope etaramio Petrusi niai na Lida, ampafe etemi uwemandu ura weia, urutani ureyo, "Wukahera ro we amea ma."

³⁹ Ampafe Petrusi doabariri da ria suru. Itora wa sobu kataifoi ainanaya eha Petrusi to rorong bo yai foi. Wiwina na nana fosa kiai etoa wariri mae esai etainawi ansung dawa wesa fo wei.

⁴⁰ Petrusi demisa era wa ehai to boriei, ainanaya disang kapa awebuka tuti wenadi. Mayeai daraberahi arong we wiwing mireha foi tuti medu wei deyo, "Tabitae, boabari wau!" Ainanaya ureng tabau detia Petrusifo doabariri beyaria minohi.

⁴¹ Ainanaya Petrusi yu na warangfo tuti fiataria doa, mayeai sahu mano eroasoai tuti wiwina fosa, ainanaya dohong mano suwi na marareha rorong foi wesa aha.

⁴² Kaiwoariri kariri fitantuma nanai dafai wari bendari Yope tantenang, ampafe inontarai bitoya eroaso Yesusi.

⁴³ Petrusi niai na nanai we rahida beiru teai ria inontarai manei wonong fino Simoni, i mani inontarai niari andowa rerawa we fisiasi aha.

Korneliusi dere we Petrusi da wei ma

¹ Na Kaisarea inontarai Roma manei wonong fino Korneliusi. I mani afai mamuna dine, ne pangkatio kapteni. I tuti ne raifosa afai mamuna Italia disa.

² I tuti ne munu rorong fosa kiai ematai Allai tuti esomi wei, kontai fiata inontarai Yahudi mano ene pari fi fosa bitoya paria, tuti wenadi pampang we Allai.

³ Na rahida bei wofoi tiwerawa tarahio araha ureng botoru teai, detioai terai na urengfo weo Allai ne wewai manei da ma tuti dutani deyo, "Korneliuse!"

⁴ Korneliusi seite wewaifoi mitai paria, mae medu wei deyo, "Daie, tofino?" We-waifoi medu wei deyo, "Allai tarao nemu nadiwa ampa tuti detio enemurorong denteng we kaiwasa wai. Finari tonanane ne tarai we korbani we Allai, ampare piraise we wau.

⁵ Ampafe na kutu iari ni-nai kontaio bemi inontarai maneitoru itora to Yope we itosahu Simoni we da ma, i wonong siai feai aino Petrusi.

⁶ Minohi ria inontarai manei wonong fino Simoni, mano niari andowa rerawa we fi siai ahang foi na ne munufoi. Ne munufoi wiana wenafareng fine."

⁷ Na kutu siario wewaifoi da werui nanai, sahu ne mangfata na munufoi uwemandu tuti afai mamunao somi we Allai manei, amani mano weririati pampang foi.

⁸ Deiriri kariri fianai aino detioa foa kai we itoru, ainanaya demi itoru itora to Yopea.

Petrusi detifi ria Sempaisi

⁹ Kameai weroa naia mani, rahida rabuang teaia, mano itorafo itoru itora wa rerai we munue Yope tonanai, Petrusi dau to munu minohi nai foi nuwowongfo ayai we wenadi.

¹⁰ Ainanaya wewisi paria tuti deo dampi. Ampafe fiangfo emainenamai tonanai mae, mayeai mani detio fiainawiaifeai ria Sempaisi.

¹¹ Detio rorafaisi tifai tuti detio fi ne tarai toyario ireu fiebai tirera Allai suki to nunei meu, sawai na warabuka boa fo.

¹² Na ireu rorong fo andowa Yahudifosa ene wori wea fo, na rabuang botoru, amani andowao eawemi boa, kontai ne efafa na earomifo,* tuti romufosa.

¹³ Ainanaya tarao manei raofuifeai medu wei deyo, "Petruse, boa! Muni ambori bani!"

¹⁴ Petrusi yoa deyo, "Sengne waune, nana fanai! Weo fiang amene wori weai ninai, yang eai na wea kaha rai, weo fimai kaha fine fefe."

¹⁵ Manamo Sengnei medu wei aha deyo, "Fianai aino inaria mararebanaifa tuti mai we metang fo mani, wiro mesahuai we fimai kaha fine fanai."

¹⁶ Fi detioai nani Allai medu wei webetoru, mayeai ireufoi dau to rorafaisi aha.

* **10:12** Ne tarai toyario tawai, fiwaradi, ananaui, wanggori tuti fisiasi tonanai.

¹⁷ Petrusi weraia kerira, enetituai paria weo fi detioi foi. Masi minohi enetituai weai tonanai mae, mano Korneliusi demi sitoru itoroari kawuru na wore rahutu borong foa.

¹⁸ Ainanaya itosahu inontarai manei ma itorutang berahi itoreyo, "Inontarai mano wonongno Simon Petrusi nei minohi na nina e?"

¹⁹ Petrusi masih minohi enetituai we fi detioa fo tonanai mae, Allai Nuaninufoi medu wei deyo, "Petruse, inontarai mantoru itora ma itosera we wau fo.

²⁰ Ampafe wukera bia tuti dohonao enemuwawera weo ro ria itoru wa fe, weo yauno yemi itoru wa."

²¹ Donio Petrusi biari aweu tuti medu we itoru deyo, "Yauno muntosera we yau ne. Muntosera we yau we fiani?"

²² Itoroa wei itoreyo, "Kapteno Korneliusi andi demi antoru antora ma ne. I inontarai enerorong mesi dine tuti mitai Allai, kontai inontarai Yahudi nesa kiai etatori paria. Allai ne wewai mirarebana manei da wa medu wei, weo demi we wau ma weo ro wei to ne munufoia ambori tarao fianai aino modurai wei fo."

²³ Ampafe Petrusi dutang sitoru itorena riati diru bonani na nanai.

Petrusi deiriri Yesusi we Korneliusi

Kameaia Petrusi doari meai tuti da ria itoru. Doroi eroasoai na Yope fea kontai era riatai.

²⁴ Era na rahida bonani paria kameai aha arahio era sobu Kaisarea. Na nanai Korneliusi tuti ne terafosa kontai ne maniwowiri wenotisara fosa efanduhisa etamang wei kawurua.

²⁵ Petrusi da to munufoi afui, Korneliusi detiaoi na kutu siari nanai da weui tuti suki aweu disang kapa awebuka somi wei.

²⁶ Wape Petrusi yuna warangfo yabiti aweai doa tuti medu wei deyo, "Boabari wau, weo yau kontaio inontarai siari fe yau ne."

²⁷ Medu wei tonanai mae usuai pari to munufoi afui. Na rorongfo detio kaiwasa bitoya efanduhisa kawurua.

²⁸ Ainanaya medu wesa deyo, "Mewaitawanai weo na Kaiwo Musai soi fo, medu weduarai weo inontarai Yahudi nesa wiros ameweboyari ria inontarai siaio Yahudi kaha fosa, toyari mea kontai. Wape Allai deinawiai kawuru we yau ampa weo wiros imameatai we inai we kaiwasa siai fanai, weo ea kontai wiros isahusa we inontarai emai kaha saine ahang fanai.

²⁹ Ai wedaya bemi weo yau we ira ma mani wiros imadu riwana kaha. Ampafe yeo iwaitawang fianai aino bemi we yaua ira weai ma ne."

³⁰ Korneliusi yoa deyo, "Rahida botoru da wa fo, tarahio ramindena toninai, araha ureng botoru, iwenadi na munu iminohi nai nei. Na tantuma kutu nanai, mang manei doari na arohureane. Ansung sensuna fo kaiwewa paria.

³¹ Medu we yau deyo, ‘Korneliuse, Allai yoa we nemu nadiwai ampa tuti deitawang todoni enemuwawu mano ene pari fi fosa ampa.

³² Ampafe bemi maneitoru itora to Yope, awa itosahu inontarai manei, wonong fino Simon Petrusi. I minohi sau ria inontaraio niari andowa rerawa, wonong fino Simoni, ne munufoi wiatai na wena-fareng fine.’

³³ Aino wedaya mani isahera yemi inontarai we itora mau itosahu wau. Tuti wau enemurorong denteng paria we ro ma. Nina mani amea kiai amefanduhi amea na Allai urengreane weo ametarami kariri fianai aino Allai demi wau moduri kiai we amea ne.”

³⁴ Ainanaya Petrusi medu deyo, “Arahio ninai amani yeitawanaifa weo fianai aino Allai niari weo inontarainesa kiai ne amani masi.

³⁵ Inontarai da na nu bodoni kontai ki, Yahudi tuni wiro Yahudi kaha, wape mitai Seng Allai tuni dohong kariri ne bengfo amani Allai sahui we ne arikang kontai.

³⁶ Mea kiai mewaitawangno kaiwo neung kutu Seng Allaifafongfa medurai weo inontarai na nu Israeli fosa. Kaiwoariri nana mani deiriri karirio Kaiwo Mahikai kia mai we tata na Yesus Kristusi, amani i weSeng we inontarai fuba nini kiaia.

³⁷ Tuti mewaitawangno fianai aino kawariai na nu Yudea foi sentenang, amani wereantenang na Galilea na rabuangno Yohanesi deiriri

kariri baptisifo kaia fo.

³⁸ Nana mani kariri Yesusi inontarai Nazareti foi, Allai yuaisi tuni sensoni na Nuaninu Mirarebana foi tuni na ne mambiriufu. Kontai Yesusi nani da niari bengfo mai katitaifoa kai. Inontarai fuba Saminseni dohonsa fosa, niaris ebeng, weo Seng Allai weririati.

³⁹ Ameaino inontarai amewati terai na ameuremireane kariri fi niariri kiai foi na nu Yahudi foia tuni na bendari Yerusalem. Tonanai ki wape emuni etohoni sau na aitabafoi.

⁴⁰ Wape werahida botoru Seng Allai duwiri na marareha rorong foi tuni deinawi we inontarainesa.

⁴¹ Wiro inontarai fuba nini kiai ewatiao kaha, mae mano Allai diri ameafafong weo ametairiri wonongfo, ameaino amewatiao terane. Weo suwi na marareha rorong foi mani ametampi ruhiae riati.

⁴² Tuni Yesusi demi amea ametairiri kaiwo nanai weo inontarainesa, tuni ametaiririai kontai weo andino Seng Allai yuaisi we mano kiutu kaiwo weo inontarai fuba minohi darang nei tuni inontarai fuba mirehara foi ne, ambori na rahida kife nunei Yesusi deto tatesa kiai, amani mano ambori esobu mai fosa siai tuni mano ambori esobu ne karira fosa siai.

⁴³ Andino nabifosa kiai emadu kariri eteyo, inontarai mandoni kontaio yoaso Yesusi mani, ambori Yesusi feriri ne sasarifoi na ne wonongfo ki.”

Inontarai Yahudi kaha

nesa esobu Allai Nuaninufoi

⁴⁴ Na kutu siari Petrusi doa medu wesa nanai, Nuaninu Mirarebana foi biari meu tuti sensoni mano Yahudi kahaio etarami kaiwofe nanisa kiai.

⁴⁵ Inontarai Yahudi eroaso Yesusio era ria Petrusi na Yope ma fosa, ea kiai epapuhung paria, weo ewati Allai dohong Nuaninu Mirarebana foi we inontarai siai konta fefe.

⁴⁶ Weo etarami terai weo inontarai nanisa emadu na kaiwo siai bitoya tuti efiai Seng Allai.

⁴⁷ Ainanaya Petrusi medu deyo, ‘Mewati inontarai ninisa esobu Nuaninu Mirarebana foi kontai mai kariri Yahudine tata ampa. Ampafe iwebaptisia na mereha mani manei medu weduasa rai e?’

⁴⁸ Ampafe demisa weo ewebaptisi na Yesusi Kristusi wonongfo. Mayeaia mani etutani weo minohi riasa rahida beiru teai aha.

11

Petrusi fi medura fo we mano eroaso fosa na Yerusalem

¹ Rasulifosa tuti doroi eroasoai na nu Yudea foi sentenang etaramioai weo inontarai siaio Yahudi kaha fosa kontai etarami Allai ne Kaiwofo tuti eroasoai.

² Ampafe rahida bo Petrusi da to Yerusalemia foi, inontarai Yahudi mano eroasoia fosa ewekaiwo wei eteyo,

³ “Todonie ro to inontaraio ewesunati kaha fosa ene munufoa wei ne? Kontai boaria bampi riasa nariai aha.”

⁴ Ampafe donio Petrusi deikaririai wesa na mai, karirio fi fuba sodaira fo pari na reantenangfo.

⁵ Medu deyo, “Rahida bei na munue Yope iwenadi, amani iwati fieai. Fi iwatiaoa fo mani ne tarai toa fino ireu aburung tirera Allai suki na rorafaisi meu, sau na warabuka boa fo rurang yau.

⁶ Na kutu siari iwati afui oi nanai, iwati andowa mano eawemi boa fosa, tuti mano ahumi kaha fosa, tutio mano efafa na earomi fosa, tuti romuo yuainsowang kaha foi.

⁷ Ainanaya manei rao-fuifeai medu we yau deyo, ‘Petruse, boa! Muni ambori bani.’

⁸ Wape iroa wei aha yeyo, ‘Sengne waune, nana fanai. Weo fiang amene wori weai ninai, wiro yang eai na wea kaha rai weo fimai kaha fine fefe.’

⁹ Manamo raofuifoi medu na rorafaisi aha meu deyo, ‘Fianai aino inaria mararebanaifa tuti mai we metangfo mani wiro mesahuai we fimai kaha fine fanai.’

¹⁰ Fi iwatiaoai nanai iwatiaoai pari we betoru, ainanaya dau to rorafaisi weru yaua.

¹¹ Na kutu iari nanai kontai tete etemi inontarai itowemantoru itora na Kaisarea we yau ma, itosobu munu iminohi nai foi.

¹² Ainanaya Seng Allai Nuaninufoi demi yau ira ria itoru na wiro enehuwawera-hai ahang kaha. Doroio eroasoai ewewonang ninisa era ria yau to Kaisarea, tuti amea

kiai amesuai to Korneliusi ne munufoia.

¹³ Mayeai deirirai we amea kariri todoni deti wewai manei doa na ne munufoi rorongfo tuti medu deyo, 'Bemi maneitoru itora to Yope itosahu inontarai manei wonong fino Simon Petrusi.

¹⁴ I ambori deikarirai we wau kariri todoni Allai ambori feriri wau tuti nemu munu rorong wai kiai ne.'

¹⁵ Petrusi medu pampang deyo, "Tuti na kutuo imadu kaiwofo tonana fo, Nuaninu Mirarebana foi bia aweu sensonisa, ne tarai toyari reantennangfe sensoni tata kawurua nanai.

¹⁶ Arahio arohuoai weo, Sengnei raminde medurai kawuru ampa deyo, 'Yohanesi webaptisi kaiwasa na mereka, wape ambori Seng Allai webaptisi mea na Nuaninufoi, amani sensoni mea ki.'

¹⁷ Ampafe tarai ampa weo Nuaninu Mirarebanaio Allai dohonai we tataro fo na rabuang bo taroaso Seng Jesus Kristusi fo, dohonai mai kontai we inontarai Yahudi kaha fosa. Ampafe tonana mani ambori isua Seng Allai e?"

¹⁸ Etarami kaiwo fenana fo, emadu awarai ahang kaha, mae efiai Allai. Eteyo, "Oh, tarai! Tonana mani inontarai Yahudi kaha fosa kontaio Allai dohong rang wesa weo etaraberasa weru ene sasari-foi ambori esodai ne maifo."

Jemati na bendari Antioquia

¹⁹ Rabuang bo Majelisi Agama fesa emung Stefanusi

nanai, inontarai eroaso Yesusi fosa etawisa ewawu tateraia. Manea ewawu paria sobu nu Fenisia, manea kontai ewawu paria sobu nu Siprusi tuti bendari Antioquia. Na katai ewawuoai nanai etairiri Allai ne Kaiwofo we inontarai Yahudi fosa terai. ²⁰ Wape na inontarai eroasoai nanisa, amani inontarai Siprusi tuti Kirene, manea etontai to Antioquia tuti na nanai etairiri Kaiwo Mahikai kariri Seng Yesusi we inontarai Yahudi kahai emadu kaiwo Yunani fosa.

²¹ Sengnei warang mananu fo weririasa ampare kaiwasa bitoya eroasoai tuti etaraberasa we Sengnei aha.

²² Kaiwo kariri nanai dafai paria sobu jemati na Yerusalem fosa etaramioai kontai, ampare etemi Barnabasi dontai to Antiokiara we detisa.

²³ Rahida bo dontaia sobu kataifoi, detio Allai dohong ne bengfo arora tuti mioang inontarai eroasoai na nana fosa ne, piraise paria tuti deunausa kontai we eroasoia mutu.

²⁴ Barnabasi nini mani inontarai enerorong denteng dine tuti Nuaninu Mirarebana nei sensoni. Kontai yoaso Sengnei na mai ampare wedaya kaiwasa bitoya eraria Sengnei.

²⁵ Mayeai dontai to bendari Tarsusi awa sera we Saulusi.

²⁶ Na wanai sobui kiari to Antioquia aha ma. Unayai ria jemati na nana fosa defuina bei sentenang, tuti uraunau jematifosa tuti kaiwasa siai bitoya kontai. Na Antioquia

nanai aino inontarai eroaso Yesusi fosa ahusa we inontarai Kristen reantenang pari.

²⁷ Rabuang bonani nabi manea era na Yerusalem to Antiokiara.

²⁸ Na ea manei wonong fino Agabusi. Na Nuaninu Mirarebana foi ne mambiri-ifo doari aweai medu deyo, "Na nunei sentenang ambori kahari fiebai bei ming ki." (Fi medurai nanai tarai kaririai, amani na rabuang bo Klaudiusi yu Mananu Kaisari fo.)

²⁹ Ampafe inontarai eraria Yesusi na nana fosa kiai, emadu ruhiae we efanduhi doi, etanatuai we doroio eroasoai na nu Yudea fosa, mansiari-mansiari dohonai kariri fianai aino sobua fo.

³⁰ Fi emadurai nanai etohong kaririai, ainanaya etemi Barnabasi tuti Saulusi uka fi etohona fo, ukara urohonai we mano ewenunggamiei we jemati na nu Yudea fosa.

12

Rasulifosa esobu dadira fuba aha

¹ Na rabuang bonani kontaio Mananu Herodesi tefu inontarai eroaso manea we de niari kangganisa.

² Demi afaí mamuna emungno Yakobusi, i mani Yohanesi ne tafuai dine, emuni na sondu.

³ Na kutuo detioai we Yahudifosa enemirorong piraiese weo fi niari fo nanai, demi ne afaí mamuna etafu nari Petrusi aha. Petrusi etafuri fo mani tete rahida

fuba Yahudifosa esahuai we *Rahida Roti Weragi Kaha* fine.

⁴ Etafuria mayeai ehari to munu aitamu rorong foi. Afaí mamuna fosa etatosa werabuang boa, we ewaitawang wedua Petrusi na nanai. Rabuang bei mani ewemana. Herodesi enetituitai weo rahida Paska foi kiai wori, dutang wawera Petrusi na kaiwasa bitoya foi euremireafo ki.

⁵ Ampafe Petrusifo eru aitamuoi wiana munu aitamu foi, wape mano eroasoa fosa ewenadifo mambiriwei paria we Allai.

Petrusi da to boriei weru munu aitamu foi

⁶ Diru bo kameai ma weo Herodesi sahu Petrusi weo dutang wawerahi fo, diru nani Petrusi dena, wape warang awengfo eru aitamuoi tuti afaí mamuna mandu uroa wahai. Na rahutu borong fo manea kontai ewaitawang weduari nayai.

⁷ Tatofang nanai Sempaisi ne wewai manei doari na nanai, tuti sambewara bei ma sambewa rorong foi sentenang. Wewaifoi nihingno Petrusi paria doabariri, ainanaya medu wei deyo, "Boabari wau aheral!" Na kutu nanai kontaio wai besio ewora warangfe nai foi tiparesuai. ⁸ Mayeai wewaifoi medu wei aha deyo, "Tata nemu ansungwa tuti sapatuwa." Ainanaya niari kaririai. Wewaifoi medu nariai aha deyo, "Wonsung nemu ansung boriai wai tuti ro ria yau."

⁹ Ainanaya Petrusi da ria wewaifoi to boriae weru munu aitamu foi, wape deitarahio fifianai aino we-waifoi niari nanai wiro antu kaha, mae manta demiei arora.

¹⁰ Ura weru mano ewaitawang weduari fosa, mano reantenang fosa mayea mani mano sua fosa aha, ainanaya ura sobu rahutu besio wia to bendarifo fo. Rahutufoi tifai na mantauni, ainanaya ura to boriei tuti ura ria rang bei paria rea fo. Tatofang kutu nanai wewaifoi niai weruia.

¹¹ Mayeai arahio Petrusi deitawangno fianai aino sodaira fo, ainanaya medu deyo, "Oh, ninaia mani arahio yeitawanai weo Sengnei taraie demi ne wewai manei kawuru ma weo waraira yau weru Herodesi ne mambiriufu tuti fikarira fuba kiaio Yahudifosa enemitawanaifa weo ambori isodairaifa ne."

¹² Doae enetituaitai tonanai, mayeai da to Mariai, Yohanesi mano esahui kontai we Markusi foi inang, itone munufoia. Na nanai inontarai eroasoa bitoya efanduhissa ewenadi we Sempaisi.

¹³ Petrusi bioi rahutu boriei foi, mangfata wiwing manei wonong fino Rodei, da we fiai rahutufoi.

¹⁴ Awa mani deroanso Petrusi rawafuifoi weriwang beyari. Wape piraise karerai amparef fiai rahutufoi kaha, mae sikahera daraberahi ahafui, deikaririai wesa

deyo, "Petrusi doari na borieife fo."

¹⁵ Wape etei wei eteyo, "Mata wefiauwou fe." Manamo Rodei kika tawanai we beyari weo anture Petrusi dine. Doni emadu eteyo, "Tarahine wewaio deitawani fi dine."

¹⁶ Esawasa tonanai mae, Petrusifo doa mae bioi rahutufoi pampang. Donio awa efai rahutufoi tuti ewatiao nanai ehiri ewarami webeyari.

¹⁷ Petrusi kiamang tawansa na warangfo ambori enemboru, mayeai deiriri kariri todoni Sempaisi kiari weru munu aitamu foi fo. Ainanaya deyo, "Meteikariri fininai we Yakobusi^{*} tuti tane doroi manoei wasa." Mayeaia mani da weru katai nanai to katai siai aha.

¹⁸ Kameaia mani afai ewaitawang weduari fosa emadu kariria. Enemittuaia kai na wea kaha we fianai aino Petrusi sodaira fo.

¹⁹ Ainanaya Herodesi demi ne afaifosa era esera we Petrusi na mai, manamo wiro esera sobui kaha. Ampafe Herodesi sahu afai ewaitawang weduari fosa ma dutang berasa, ainanaya demi manea emunsa. Mayeaia mani Herodesi da weru nu Yudea tuti niai na Kaisarea waroi kutea.

Herodesi mireha

²⁰ Na rabuang bonani Herodesi kesou inontarai Tirisi fosa tuti inontari Sidoni fosa paria. Ampafe donio ea ruhiai era wei etoari

* **12:17** Wiro Yakobusi mano Herodesi miuni foi kaha, mae Yesusi ne tahatui dine.

na arongreafo. Reantenang mani ewawori we Balastusi mano wenunggamiei we munu Herodesi foi, ampare i sau wesa. Mayeai era wa etoari na Herodesi arongreafo, ainanaya etutani we eweboyari aha, weo nu eminohi nai foi eha fiang na Herodesi ne kataifoi fefe.

²¹ Na rahida bo wenotia foi, Herodesi sensuni na ne ansung mananu fo, ainanaya minohi na ne kadera mananu foi, kiorang we ne rai bitoya foi.

²² Ne rai fuba etarami di-dauwi fosa ebibe tutiri eteyo, "Mano medu nini mani seng dine wiro inontarai batang kaha."

²³ Na kutu nanai kontaio Sempaisi ne wewai maneи bioi weo enerorongfoi dedai we sobu fiai na sa, kontai wiro somi we Allai kaha fefe. Ampafe kauboi dani pariao mireha.

²⁴ Donio Sempaisi ne Kaiwone dafai wariai to katai bitoya tuti efau eroasoifa.

²⁵ Barnabasi tuti Saulusi unari fi unari fo kai,[†] urarabera suru na Yerusalem, tuti uka Yohanes Markusi kontai da ria suru.

13

Allai diri Barnabasi tuti Saulusi tuti demi suru

¹ Na inontarai eroasoai na Antiochia fosa, na wanai nabifea tuti mantaunaufea, toyari Barnabasi, Simeoni mano wonong tatawa fino Kumetani, Lukiusi na Kirene, Menahemi (i mani Herodes

Antipasi tamangno yuti kontai), tuti Saulusi.

² Na rabuang bo ewenadi we Sempaisi tuti ewepuasa fo, Nuaninu Mirarebana foi medu wesa deyo, "Metiri Barnabasi tuti Saulusi metohong suru terai we yau, ambori unari fi yohonai kawuru we surua fo."

³ Ewepuasa tuti ewenadia kai fo, eruai ewaramia wasau suru, ewenadi we suru tuti etemi suru ura wa.

Barnabasi tuti Saulusi ura to nu Siprusi

⁴ Allai Nuaninu Mirarebana foi demi Barnabasi tuti Saulusi ampare urong to bendari Seleukia arau. Na nanai urafai to nu Siprusi.

⁵ Na rabuang bo usobu bendari Salamisi fo, urairiri Allai ne Kaiwofo na Yahudifosa ene munu agama fo. Yohanesi mano ahui we Markusi dontai kontai ria suru we fiata suru.

⁶ Itora wari nufoi sentenang paria sobu bendari Pafosi. Na wanai itosobu inontarai Yahudi maneи, wonong fino BarYesusi, ete na kaiwo Yunani esahui kontai we Elimasi. I inontaraio wesulapi dine tuti nabi wetarai kaha,

⁷ i kontai mangfata we gubernorifoi. Gubernuri yu na nufoi nani wonong fino Sergius Paulusi, i inontarai sewai dine. Sahu Barnabasi tuti Saulusi urua, weo enerorongfoi dohong we tarao Al-lai ne Kaiwofo.

⁸ Wape Elimasi, mano wesulapi nani, yurai paria we

[†] 12:25 Botio Fi Rasulifosa Enari 11:30.

pempamu gubernurifoi ambori wiro yoaso Yesusi fanai.

⁹ Ainanaya Saulusi mano esahui kontai we Paulusi foi, Nuaninu Mirarebana foi sensoni, ampare seite Elimasi tuti medu wei deyo,

¹⁰ “Ne, Saminseni ne arikang di wau! Wau weaiteta we ne bengne, tuti purarasa webeyari. Todoni fino wiro fotou nari kanggani fibeng Allai niari we feriri inontaraifesa ninai?

¹¹ Ninaifa mani boti, Sengnei ambori bioi wau! Ambari uremuwa fafa tourai, paria wiro boti wofaisi ahang kaha.”

Na kutu nanai kontaio Elimasi nuruainso toyari ayewi tuti mamantiti bei ma wedua urengfo, ampare da warafafarai sera we inontarai we binti.

¹² Gubernurifoi deti teraifa na urengreafu weo fianai aino Elimasi sodairai nana fo, yoaso Yesusi, weo Semppaisi ne Kaiwofo dohoni pepuhung paria.

Paulusi tuti Barnabasi na bendari Antioquia na nu Pisidia

¹³ Paulusi tuti ne maniwowirifosa itorafai na bendari Pafosi to bendari Perga na nu Pamfilia. Na nanai Yohanes Markusi dontai weru sitoru, daraberahi to Yerusalem aha.

¹⁴ Na Perga itora paria aha to Antioquia na nu Pisidia. Mayeai na rahida Sabati foi itora wa itominohi na munu agama Yahudi foi.

¹⁵ Na rabuang bo etato Kaiwo Musai soi fo tuti nabifosa esoi foa kai fo, mano ewenunggamie i we munu agama foi etemi inontarai na nana fosa etutang Paulusi tuti ne maniwowirifosa eteyo, “Amene doroi bohine muntorune, masino muntone kaiwo aunau feai we muntofata inontarai ninisa mani muntomadurai.”

¹⁶ Ainanaya Paulusifo doari ayai, yuai warang wesa mayeai medu deyo, “Nehu doroi inontarai Israeli tuti mano Yahudi kahai na nu siaio mesomi we Allai ne meaine. Metarami nehu kaiwone wo.

¹⁷ Allaio Israelifosa ene Sengfoi, diri tane werengfosa kawuru ampa tuti niaris etawing separai fuba paria na rabuang bo enayai we inontarai aisei na nu Mesiri fo. Mayeai na ne mambiriufu kiasa to boriei weru Mesiri.

¹⁸ We defuina piarua fo, na katai wekamamie i wowong fo, enari fimai kahai pampang wape sawani wesa.

¹⁹ Kaiwasa siao ewerabuang itu ene katai na Kanani fosa, Allai minsia tuti deto ene kataifoi we kaiwasa Israeli fosa, ambari esahu katai nana i we enefi terai.

²⁰ Ne nanai kiai dao defuina piaura weru awa piarua sura (450).

Etato nu Kanani foi wesa akawuru, mayeai Allai yuai mangkutu kaiwo* wesa, paria rabuang bo nabi Samueli daria fo.

* **13:20** Mangkutu kaiwo ninisa wiro ne tarai kariri mangkutu kaiwo na fui nini kaha, mae ne tarai kariri mambaiseng. Na rabuang bonani Israelifosa ene mananu kaha, mae ene mangkutu kaiwo terai.

²¹ Mayeai etutang we esobu mananu manei, ampare Allai dohong Kisi antungno Sauli na Benyamini ne riri-afoi, we wemananu wesa. Iyu mananufo defuina piaru.

²² Sauli yu mananufo defuina piaru foa, mayeai Allai wara sayari weru ne mananufo. Ainanya yuai nari Dauti, yiwanu we mananu wesa aha. Tuti Dauti nini Allai medu kariri kawuru deyo, 'Isobu Isai antungno Dauti kawuru we inontarai enehuoi dine kawuru ampa. Andino ambori niari kariri fi yawi wea fo na mai.'

²³ Na Dauti nani ne ririafoi, Allai yuai Mananu Mampariri manei we inontarai Israeli nesa kariri ne kaiwo dereraia fo, amani Yesusi andino we-Mananu Mampariri ne.

²⁴ Wiro Yesusi niari fi na nunei kaharai mae, Yohanesi sahu kawuru we inontarai Israeli nesa we etaraberasa weru ene sasarifoituti we-baptisisa.

²⁵ Tuti Yohanesi rerai we yufia kai nana fo, medu we kaiwasafosa deyo, 'Menemittuitai we mandoni di yau e? Yau mani wiro mano metamang wei fi di yau kaha. Bireri! Wape i ambori da tua yau aha ma ki, tuti we irehu ne wai sapatu fo terai ki, wiro imai we inari finana kaha.'

²⁶ Doroi bohi meweriria na Abrahami ma ne mea, tuti mano Yahudi kahaio mematai Allai ne meaine, we tatainokaiwo kariri Allai feriri tata fo dohonai kawuru meu ne.

²⁷ Weo kaiwasa enayai na Yerusalem fosa tuti ene mano ewenunggamie fosa, ewaitawana kahai we Yesusi mani Mananu Mampariri dine, ampare eteiayari tuti emuni. Ampafe kaiwo nabifosa emadurai nafafongfa nanai, amani kaiwo na Sabati neungfo etaramioifa fo, wetarai kaririaia, na rahida bo emuni foi.

²⁸ Wiro esobu fi sarawa feai riati we sodai aiboi marareha fo kaha, tonanai ki wape etanggewa Pilatusi we dohong aiboi marareha fo wei.

²⁹ Tuti enari kariri fianai aino na kaiwo mararebana fo esoi kariria kai fo, etu ne taraifoi weru aitabafoi tuti eharia wiatai na fafo rorong fo.

³⁰ Wape Allai duwiria suwi na marareha rorong foi aha,

³¹ tuti rahida beirua fo deinawi ne taraifoi we ne inontarai mano erariati kawuru na Galilea to Yerusalem ma fo. Inontarai nani saino ninaifa mani etairiri kaririai we kaiwasa Israeli fine.

³² Ampafe na ninaifa ametairiri Kaiwo Mahikai nanai kontai we mea, amani fianai aino Seng Allai dererai kawuru we tane werengfia fo,

³³ finanai niari kawuru we tane werengfosa ene ririane tata, amani na duwi Yesusi na marareha rorong foi aha ne. Kariri kaiwo dotu na Masmuri bo boru foi deyo,

'Wau mani nehu Kaisung di wau,

* 13:33 Masmuri 2:7

tuti na rahida bonini
yeinawiai we kai-
wasanei we yau mani
tamamu di yau.*

³⁴ Allai duwiri kawuru na
marareha rorong fi ampa,
tuti ne taraifoi wiro wioru
kaha. Ne tonanane Allai
medu kaririai kawuru deyo,

'Fi kiaio mirarebanai tuti
wiatai wenumain-
ufo

amani fafongfa yereri
we Mananu Dautia foi,
ambori yohonai we wau
ki.*

³⁵ Na kaiwo siaio Dauti
medurai kontai toninai,

'Wau wiro tua nemu Mano
Mirarebana ne yau
inaya iworu na fafo
rorong fo kaha.*

³⁶ Dauti niari kariri fianai
aino Allai demi niari fo na
mai ampa, paria i mireha
kontai ria ne werengfoi tuti
esarai. Tuti ne taraifoi wioru
ampa.

³⁷ Wape Yesusi mano Allai
duwiri na marareha rorong
foi, ne taraifoi wioru kaha.

³⁸ Ampafe doroi bohine
mea, todoni kontaio mewait-
awanaifa weo tane sasarinei
Yesusi nini dino feriri ne.
Nanai aino yeisaharai we
meane.

³⁹ Weo Hukumi Musai soi
fo wiro demoyara kaha we
feriri sasarinei. Wape man-
doni dino yoaso Yesusi mani,
wenani beng ria Allai aha fi-
nanaia.

⁴⁰ Ampafe meuremi nai
nayai na mai, weo dohonao
mesodai kaiwo nabifesa
emadurai eteyo,

⁴¹ 'Inontarai menemikadatai
biriu ne meaine,
meuremi nai nayai.

Mea ambori mepapuhung
paria we fi inari ne,
wape memarareha.

Weo na rabuang bonini inari
fifuba,
finani mani manei deisa-
harai we mea kontai,
wiro meroasoa kaha.*"

⁴² Rabuang bo Paulusi tuti
Barnabasi ura to boriei weru
munu agama foi fo, inontarai
efanduhisa na munu agama
fi nanisa etare suru aha weo
rahida Sabati bo da aha ma
foi mani urarabera suru aha
ma, we urairiri Allai ne Kai-
wofo wesa nari aha.

⁴³ Era to boriei, inontarai
Yahudi tuti mano Yahudi
kaha fosa mae eweagama
Yahudi, bitoya paria era ria
suru, ampafe uraunausa
ambori eru tawang Seng
Allai ne bengnea mutu.

⁴⁴ Na rahida Sabati da aha
ma foi, adareti kaiwasa na
bendarifoi kiai da ma weo
etarami Sengnei ne Kaiwone.

⁴⁵ Na kutuo mano ewe-
nunggamie we Yahudi na
nana fosa ewati kaiwasa
bitoya foi nana fo, enemiro-
rong pirahai paria. Eteibera
Paulusi tuti etapa kaiwoariri
fuba umadura fo.

⁴⁶ Wape Paulusi tuti
Barnabasi urufo, umadu
kaiwofo na umatai kaha,
mae umadu parai we ea,
ureyo, "Allai demi auru
auka ne Kaiwoaririne we
Yahudi mea akawuru wo.
Wape memaya we meroasoa
kaha, ampafe mantaung

* 13:34 Yesayai 55:3 * 13:35 Masmuri 16:10 * 13:41 Habakuki 1:5

meaino meteiayarai, weo wiro memai we mesobu maring Waidani kaha. Ampafe na ninai kontaio aura weru mea to kaiwasa siai, amani inontarai Yahudi kaha fosa.

⁴⁷ Weo Sengnei dohong kaiwo pondoai we tata, amani medu toninai, 'Yau isahu wau weadia weo sambewa inontarai siai Yahudi kaha fosa, ambori ka mai tuti foriri kaiwasa we nunei sentenang.*'

⁴⁸ Na kutuo inontarai Yahudi kaha fosa etaramioai nanai efaraise karira, tuti eteyo Sempaisi ne Kaiwo kariri Yesusi fo mahikai paria. Tuti inontarai Allai nafafongfa dirisa we esobu ne maifo tuti Waidanifo, inontarai nanisa eroasoai.

⁴⁹ Sempaisi ne Kaiwofo dafai wariae na katai nani sentenang.

⁵⁰ Wape inontarai Yahudi fosa eweanggari inontarai baba na bendarifoi tuti wingfosa, mano na inontarai dedai na bendarifoi ambori eweaiteta we Paulusi tuti Barnabasi, tuti etata suru weru ene kataifoi.

⁵¹ Ampafe rasulifo suru ukafasefa kangganang niai na uawemifo we urainawi kariri esobu ne karirafo ki. Ainanaya ura to bendari Ikoniumia.

⁵² Mano eraria Yesusi na Antiokia fosa efaraise paria tuti Nuqanu Mirarebana foi sensonisa.

14

Paulusi tuti Barnabasi na bendari Ikoniumi

* **13:47** Yesayai 49:6

¹ Na Ikoniumi Paulusi tuti Barnabasi usodai fianai aino usodairai na bendari Antiokia fo. Na nanai kontai ura to munu agama Yahudi foi, ukorang Sengnei ne Kaiwone na mai paria, donio wedaya Yahudi tuti Yahudi kaha fosa bitoya eroaso Yesusi.

² Wape Yahudi mano emaya we eroaso kaha fosa, ewuwu kaiwo karira kariri kaiwasa eroaso fosa, ambori ewedaya kaiwasa Yahudi kaha fosa enemirorong kerira doroio eroaso fosa.

³ Tonanai ki wape Paulusi tuti Barnabasi unayai waroi kutea na nanai, tuti ukorang kariri Sempaisi na wiro umatai kahai wesa. Ampafe Sengnei kontai dohong mambiri we suru we unari fitantuma bitoya. Finanai deinawiai we kaiwo ukoramai kariri ne beng fenanai, kaiwo wetarai fine.

⁴ Wape kaiwasa na bendarifoi esawa wawerasa, ampafe manea eta we inontarai Yahudi fosa tuti manea kontai eta we rasulifo suru.

⁵ Ainanaya Yahudifosa kontai Yahudi kaha fosa tuti mano ewenunggamie wesa fosa, enemirorong boyari we enari kanggani suru tuti eru kamieio suru.

⁶ Wape uwaitawang enari toa fo, ampafe uwawu une tarai to bendari na nu Likonia foi, amani bendari Listra tuti Derbe, tuti to katai wa kahefang na nana fo.

⁷ Na nanai urairiri Kaiwo Mahikai fo kontai nayai.

Na Listra tuti Derbe

⁸ Na bendari Listra inontarai mang maneи, awengfo fananahang ao fiaya beyari na siari saubaunung fo, am-pafe wiro doa da kaha.

⁹ I minohi na wanai taradi-dau saua Paulusi we medu fo tuti yoaso ne kaiwofo paria. Ampafe Paulusi seite inon-taraifoi tuti deitawanai we yoasoafu fuba we niariri den-teng.

¹⁰ Ampafe na rawafui fiebai deyo, "Boari ayai, boa tirai." Ainanaya inontaraifoi awengfo mutu soiria doa tirai tuti da.

¹¹ Na kutu kaiwasafoi ewatio fianai aino Paulusi niari nanai, ebibe esahu kai na kaiwo Likaonia eteyo, "Tane sengfesa enari ri-wansa Weinontarai batang, ebiari to nufi meu ne."

¹² Ampafe Barnabasi esahui we seng Zeusi mae Paulusio we seng Hermesi we andino medu ne fefe.

¹³ Seng Zeusi ne munu esomi wei foi wiana bendari refongfoi, ampafe mano weimami wei foi da kontai ma kia sapi mang maneia tuti fi maranding enari na ainari feai, kia to bendarifoi ne rahutu borong fo. Weo i deyo kiontai kaiwasa bitoya foi emung sapifosa we etohong korbani we suru.

¹⁴ Wape na kutu Paulusi tuti Barnabasi utaramio fi-anai aino kaiwasafosa eteyo enari we suru nanai, ukas-sou paria ufoisiabu une an-sungfo mae umito we kai-wasa bitoya foia, ubibe us-ahu wesa ureyo,

¹⁵ "Eh! We fiani e menari fininai ninai? Auru inontarai batang di auru kariri mea. Aunai na ninaifa ne we aurairiri Kaiwo Mahikai ne we mea, ambori metarabera mea metawingno fi karira mesomi weai ninai, mera we Allai mano meiri kawuru weSengfoi aha. I andino niari rorafaisi tuti nunei, rawanangrausi tuti fi niai nai foi kiai ne.

¹⁶ Rabuang bofafong nanai, Allai sua kaiwasanei kiai na nunei etohong kariri fianai aino mantaunsa ene-mittiuaita fo.

¹⁷ Wape wiro aroporo dohong fiainawiai kariri ne bengfo kaha. Deinawi ne bengfo we dohong metang ming na rorafaisi meu tuti dohong rahida we fi kainuing wetarai. Kontai dohong roweang bitoya we mea tuti dohong menemirorong mirarising."

¹⁸ Umadu paria tonanai ki, wape mawa kahai we uro-honsa etawing korbani eru-rai we enari fo.

¹⁹ Ainanaya Yahudi maneiru teai era na bendari Antiokia na nu Pisidia foi tuti na bendari Ikoniumi foi to Listra ma, eha we kaiwasa bitoya foi ene-mirorongfoi, ampafe eta wesa. Ainanaya eru kamieio Paulusia, mayeai efafari to bendari deraung boriei fo ariei, we ewaitarahio mireha ampa.

²⁰ Era weruia, wape mano eraria Yesusi fosa era wa etoa wariri nanai, doa bariri tuti suai to bendarifoi aha.

Kameaia kiontai Barnabasie ura to Derbe aha.

Paulusi tuti Barnabasi urarabera uru to Antioquia

²¹ Na Derbe Paulusi tuti Barnabasi urairiri Kaiwo Mahikai fo tuti inontarai bitoya eroaso Yesusi. Ainanaya urarabera suru to bendari Listra, mayeai na Listra urontai to Ikoniumi urong pari to bendari Antioquia na nu Pisidia.

²² Na bendari nanai urau-nau inontarai eraria Yesusi fosa, tuti uraretawansa ambori eroaso Yesusi mutu. Uraunausa ureyo, "Tateo tasuai to Sempaisi ne Mananu rorong mahikai fo mani, tasodai dadira bitoya akawuru wo."

²³ Kontai Paulusi tuti Barnabasi uruai inontarai manea we ewenunggamiae we jemati nanai na bendari uraoa fo. Ainanaya uwenadi tuti uwepuasa we urohong inontarai eroasoai nanisa we Sempaisi ampare dewawusa.

²⁴ Mayeai mani Paulusi tuti Barnabasi urao une rang rorong fo pari, na nu Pisidia pari to nu Pamfilia.

²⁵ Tuti na bendari Perga urairiri Sengnei ne Kaiwofo nayai, ainanaya ura pari to Atalia.

²⁶ Na nanai urabera suru urafai to bendari Antioquia na nu Siria aha. Bendari nani fai dino na siari nanai etohong suru we Allai ne bengfo, ambori unari fianai aino unari fo amani unari kawurua kai anina.

²⁷ Rabuang bo urontaia sobu bendari Antioquia foi fo, ufanduhi kaiwasa na jematifoi, ainanaya urairiri

kariri fianai aino Allai niari na suru we kaiwasa na bendari siai fo. Urairirai kontai kariri todoni Allai fiai rang we inontarai Yahudi kaha fosa ambori eroaso Yesusi kontai.

²⁸ Na bendarifoi Paulusi tuti Barnabasi unayai waroria inontarai eroasoa fosa.

15

Emadu na Yerusalem kariri Yahudi kaha fosa we ewesunati riae

¹ Inontarai Yahudio eroaso Yesusi maneiru teai na Yudea era to Antioquia tuti na nanai etaunau doroi eroasoai na Antioquia fosa kariri kaiwo mai kaha, amani eteyo, "Yahudi kaha ne meaine, mewesunati kariri Kaiwo Musai soi fo kaha mani, wiro Allai feriri mea kaha ki."

² Ampafe Paulusi tuti Barnabasi usawasa tuti ureipa pari ene aunaufu. Ampefe doni inontarai eroaso fosa emaduruuhiae ehutu kaiwo ambori Paulusi tuti Barnabasi kontai inontarai maneiru kontai na Antioquia era to Yerusalem weo emaduria rasulifosa tuti mano ewenunggamiae na nana fosa. Emadu kariri mano Yahudi kahaio eroasoa fosa, we wepararu ewesunati ete bireri e.

³ Jematifosa etemisa era wa, ampafe rasulifo suru tuti mano era ria suru fo ewerurang nu Fenesia foi, esoi ea to nu Samaria foi. Na nanai etaiririai we inontarai eroasoai na nana fosa kariri todoni inontarai Yahudi kaha fosa eroaso Yesusi fo, tuti kaiwo nani dohonsa emararising paria.

⁴ Rahida bo etontai sobu Yerusalem fo, jemati na nana fosa, rasulifosa, tuti mano ewenunggamiai we jemati fossa etamang wesa na mahikai. Ainanaya uraiririai wesa kariri fi fuba Seng Allai niariri we kaiwasa Yahudi kaha fosa ria suru fo.

⁵ Wape inontarai eroasoai maneiru teai na mano Farisi fosa, etoabarisa emadu eteyo, "Inontarai Yahudi kahaio eroasoai kawurua nanisa todoni kontaio ewesunati tuti etohong kariri Kaiwo Musai soi fo ambori Allai feririsa ki."

⁶ Ainanaya rasulifosa tuti mano ewenunggamie fosa efanduhisa we emadu kariri kaiwo nanai.

⁷ Eminohi esewa we kaiwofo waroi paria, ainanaya Petrusi doari ayai medu deyo, "Doroi bohine meaine. Mewaitawanai weo rahida da wa fo Allai diri yau rahang mea, we yeiriri Kaiwo Mahikai fo we inontarai siaio Yahudi kaha fosa, ambori etaramioai tuti eroasoai.

⁸ Tuti Allai mano deitawang taenemirorong-fuisi, deinawiai kawuru we yu kepansa ampa, amani finanai deinawiai na dohong Nuaninu Mirarebana foi sensonisa mai kariri dohoni kawuru we tatara fo.

⁹ Allai fi niari wesa fo wiro siai weru fi niari we tata fo kaha, weo ea eroasoai ampare yuairurang enemironfongfoi mai kariri niariri we tata ne kontai.

¹⁰ Meteyo Yahudi kahaio eroaso Yesusi fosa etohong kariri kaiwo maraba metohonai nanai, nana mani

mewedua fianai aino Al-lai niari wesa fo. Weo kaiwoariri marabao Musai dohonai nanai, tane wereng-fosa pari ma tata kontai wiro tawemambiriu we tatohong kariria kaha.

¹¹ Bireri kontai, mae taroasoai weo na Seng Yesusi ne bengno dohonai arora fo terai aino feriri tata ne, tonanai kontai we ea."

¹² Ainanaya mano efanduhisa na nana fosa emborua ehai beyari weo etarami Barnabasi tuti Paulusi urairi kariri fitantuma fuba Allai niari na suru rahang kaiwasa siaio Yahudi kaha fosa.

¹³ Umadua kaifo Yakobusi deyo, "Doroi bohine meaine, metarami ma.

¹⁴ Simoni arahio dei kaririaifa kariri todoni na reantenangfa Allai deinawi ne mahikaifo we inontarai Yahudi kaha fosa, amani na diri inontarai maneia na sa, ambori sahusa we ne kaiwasa.

¹⁵ Tonana mani mahikai paria weo Yahudi kaha fosa eroaso Yesusi ria tatané, nanai kariri nabifesa emaduraia fo. Weo esoi kaiwofeai toninai, amani Sengnei deyo,

¹⁶ 'Mayeai akawuru wori ira aha ma ki.

Ira ma we ibaung Dauti ne munuo sawaia foi aha ki,

tuti iriwangno ne tawafo,

iruasia doa aha,

amani ira ma we imoang kaiwasa mano Dauti wemananu wesa fosa ene ririafoi,

¹⁷ ambori inontarai nunei kiai esera we yau ki,

wiro Dauti ne ririafosa
tera kaha.

Sengnei medu tonanai,

¹⁸ tuti niari mai kariri fi
deikaririai kawuru na
fafong nanaia fo.*”

¹⁹ Yakobusi medu aha
deyo, “Ampafe nehu enehutiuaitane toninai; inontarai
ewesunati kaha fosa amani
Yahudi kaha fosa, mano
etaraberasa we Allai erariati
fosa, wiro tanari dadirafo
wesa fanai.

²⁰ Wape tasoi surati
bei wesa, tataunausa we
wiro etang fiangno ohonai
kawuru we saminseni ete
aririwangfo fe, ehatai weru
maninawawaus, etang
andowa tarao munia mireha
ne rika deda kaha foi fe, tuti
etang rika fanai.

²¹ Mae eteyo enari kariri
Musa ne Kaiwofo bitoya
aha mani, mantaunsa, weo
kaiwo nanai ehoramai na
bendarifo tantenang, na
fafongfa pariao rahida
bonini, tuti na rahida Sabati
neungne etatorai na munu
agama Yahudi fo kiai.”

*Kaiwo anatu we Yahudi
kahao eroasoafosa*

²² Ainanaya rasulifosa tuti
mano ewenunggamiai fosa
tuti jematifoi kiai emadu
ruhiai we etiri maneiru teai
na ea, ambori etemisa to
Antiokia ria Paulusi tuti
Barnabasi. Ampafe etiri
Silasi tuti Yudasi, mano
esahui kontai we Barsabasi
foi. Uru mani, mano un-
ewafoniai kontai na doroi
eroasoai na Yerusalem.

²³ Etanatu kaiwo anatu feai
ria sa, amani dotu toninai:

Weo bohiwa mea kiai
amanu Yahudi kaha
wa mea na Antiokia,
Siria, tuti Kilikia,

Na mene doroio taroasoai
ruhia ne, amani rasuli
tuti wafonia ne
amea,

Mahikaifeai we mea.

²⁴ Ametaramoai we inontarai
maneiru teai na amea, era
kawuru we mea
mau tuti etaunau
mea, na aunau wetarai kaha, wedaya
mea meserawawera
kaiwo memadurai.
Wape wiro ametemisa
we enari tonana kaha.

²⁵ Nanai wedaya amemadu
ruhiai tuti ameroa kiai we
ametiri inontarai maneiru
teai we ametemisa we mea
mau, ambori era ria Barnabasi
tuti Paulusi, mano
amenemiwawu suru ne.

²⁶ Inontarai nini suru
mani inontarai urawayang
une tarainei we Seng Yesus
Kristusi ampa.

²⁷ Ampefe ametemi Yudasi
tuti Silasi suru we mea mau.
Ansruino ambori uraiririai
terai we mea kontai kariri
kaiwo ametanatuai we mea
mau nina.

²⁸ Allai Nuaninu Mirerebana
foi yoaoai tuti amea
kontai ameroaoai, ambori
mea wiro menari ete
metohong kariri fi maraba
karerai weru fi kofa fenina
fe.

²⁹ Amani: Dohonao
metang fiang ohonai wekorbang
kawuru we saminseni
ete aririwang fe. Metang
rika fanai, metang andowa

munia mireha ne rika deda kaha foi fe, tuti mehatai weru maninawawausi. Mehatai weru ne tonanane amani metohong kariri ne bengfoa finanai. Mainanaia wo.

Mahikaifeai.

³⁰ Etohong mahikaia, mano etemisa fossa etontai to Antiokiara. Na wanai esahu ruhi jematifoi, ainanaya etohongno suratifoia.

³¹ Jematifosa etato kaiwo anatu fenanai, eparaise paria, we kaiwo mahikai nanai dohong enemirorong-foi mitubaru fefe.

³² Yudasi tuti Silasi uru kontai nabi di suru, amani inontaraio umadu fio Al-lai dohonai we suru we umadura fo. Umadu we doroifosa waroi paria, urau-nausa urohong kaiwo wesa ambori eroaso Yesusia mutu.

³³ Yudasi tuti Silasi unayai na Antiokiara rabuang eai, mayeai doroi na nana fossa etemi suru urarabera suru na mai aha we mano etemi suru fossa. [

³⁴ Wape Silasi medu we de niayai na Antiokia.]*

³⁵ Paulusi tuti Barnabasi uru unayai rabuang eai na Antiokia. Na nanai uru tuti inontarai siai bitoya etaunau tuti etairiri Sengnei ne Kaiwo Mahikai ne.

Paulusi tuti Barnabasi ukatate suru

³⁶ Waroi ahang kaha mayeai Paulusi medu we Barnabasi deyo, "Ro ma turarabera turu, tutuambawao tane doroi eroaso Yesusi na

bendari raminde turairiri Sempaisi ne Kaiwofe nayai nana, ambori tuwati kariri eminohi toa fo."

³⁷ Barnabasi deyo kia Yohanesi mano ahui kontai we Markusi foi ria suru,

³⁸ manamo Paulusi enetituai weai amani beng we ukari kaha weo raminde dontai weru suru na Pamfilia tuti wiro miaya we yufi ria suru pampang kaha.

³⁹ Ampafe ukasisou suru paria, donio ukatate suru aninai. Barnabasifo kia Markusi tuti urontai to nu Siprusi.

⁴⁰ Mae Paulusi diri Silasi we da riati tuti wiro uronta kaharai mae doroi na nana fossa ewenadi tuti suru, etohong suru we Sempaisi ne bengfo.

⁴¹ Urufo urontai wari nu Siria kontai Kilikia, na wanai uraretawang mano eroasoai na nana fossa.

16

Timotiusi dontai ria Paulusi tuti Silasi

¹ Paulusi tuti Silasi urontai pari to Derbe, mayeai to bendari Listra. Na nanai inontarai daria Sempaisi manei, wonong fino Timotiusi. Inana mani inontarai Yahudio yoaso Yesusi dine, wape tamana mani inontarai Yunani dine.

² Na inontarai fuba eroasoai na bendari Listra tuti Ikonumi fossa, Timotiusi nini mani wewonong we inontarai denteng dine.

* **15:34** Arawangno bonini ne tarai toyari kaiwo na 8:37, amanifafongfa manei soi kariri Sengne ne Kaiwone amani kaiwo rabuang ninai mantauni dohonai we kaiwo ming tuarai.

³ Paulusi enerorong we kia Timotiusi dontai riati am-pafe donio wesunati. Niari finanai ambori inontarai Yahudi na katai nani fosa wiro eteiaya Timotiusi fanai, weo ea kiai ewaitawanai ampa weo tamana mani inontarai Yunani dine.

⁴ Na bendari itoraoa fo, itoraikarirai we inontarai eroasoa fosa kaiwoaririo rasulifosa tuti mano ewen-nunggamiai we jemati na Yerusalem fosa ehuturaia fo, ambori etohong karirai.

⁵ Ampafe jematifosa eroasoaf mambiriu aha tuti rahida neungfo kaiwasa bitoya kontai eroasoa.

Paulusi deti fieai kariri Makedonia

⁶ Paulusi tuti ne inontaraifosa itora wari nu Frigia foi tuti Galatia foi weo Nuaninu Mirarebana foi wedua sitoru weru itorairiri ne Kaiwofo na nu Asia foi fefe.

⁷ Rahida bo itora sobu nu Misia reafo, itorurai we itora to nu Bitinia, manamo Yesusi Nuaninufoi sua itoru kontai we itora wa fanai.

⁸ Ampafe itora ria Misia paria to bendari Troasi arau.

⁹ Diru nani Paulusi deti fieai. Deti inontarai Makedonia manei doari na arong-greafo kontai dutani paria, deyo, "Muntorontai to nu Makedonia nei ma, munto-fata amea."

¹⁰ Paulusi deti finanaia fo antorufo* antomainenang we antorontai to nu Makedonia, weo antoroasoai we Allai dino demi antoru we antorairiri ne Kaiwo Mahikai

fo we inontaraifosa na nana ne.

Na bendari Filipi Lidiai yoaso Yesusi

¹¹ Ainanaya antorafai weru Troasi, antohutu beyari to nu Samotrake, kameaia ametafai pari to bendari Neapolis.

¹² Na nanai antora to bendari Filipi arei. Filipi nini mani Romafosa ene bendari bei dine, esahui we bendari fuba pari na nu Makedonia foi. Na nanai antonayai rahida beiru teai.

¹³ Na rahida Sabati foi antora to waya dereung fo na bendari dereung boriai fo, weo antoenemitituitai we tarahio inontarai Yahudi fosa ene katai ewenadi nai bei na nanai. Ainanaya antominohi antomadu ria wiwingno efanduhisa na nana fosa.

¹⁴ Wiwing manei na ea wonong fino Lidiai, na bendari Tiatira. I wiwingno de-wayang ireu kehe rawanderi ne harga dedai na Tiatira. I wiro Yahudi dine kaha mae somi we Seng Allai kontai, tuti Sengnei fiai enerorongfoi ambori yoaso kaiwo Paulusi deunauai wei fo.

¹⁵ Antowebaptisi Lidiai tuti ne munu rorong foi senten-nang. Mayeai wenoti antoru, deyo, "Muntoenemiru-ing weai we iroaso Seng Yesusi tarai mani, muntora ma muntominohi ria yau." Ainanaya boroai antorua we antorohong kariri fi deyoa fo.

Eru aitamuo Paulusi tuti Silasi na Filipi

* **16:10** "antoru" deinawio Lukasi mano soi kaiwonei kiontai.

¹⁶ Na rahida bei antora to katai nadi foi, antora sobu wiwing maneи, amani wiwing woming dine. Wiwing nani mani nuaninu kerira maneи sensoni, dohong mambiriу wei we medu kariri fi ambori dariai na rahida da ma wanai. Na fi medurai tonana fo wiwingfoi kia doi bitoya paria we mano wewoming wesa foi.

¹⁷ Wiwingfoi da ria Paulusi tuni antoru kontai bibe sahu deyo, "Inontarai nini sitoru mani Seng Allai mano Dedai Sewa foi ne woming sitoru ne! Itora ma we itoraikaririai we mea kariri rang bo mera nai weo Allai feriri mea foi!"

¹⁸ We rahida beiru teaia bibe sahu pampang tonanaia. Ampafe Paulusi sawania tuaraia, ampafe deti berahai we wiwingfoia, medu we nuaninu kerira niai nai foia deyo, "Na Yesus Kristusi wonongne, yemi wau ro to boriae weru wiwingnei!" Na kutu siari nanai kontao nuaninu kerira foi da wiru wiwingfoi.

¹⁹ Rabuang bo wiwingfoi ne mano wewoming wesa fosa ewaitawanai we ene rahida we esobu doi naya fo naia, ampafe etafu Paulusi tuni Silasi, tuni efafa suru to kondirorafoi awa uroa na mano ewenunggamiai na nana fosa earomireafo.

²⁰ Eha suru to mano ehutu kaiwo fosara, mayeai epampamu etinggai suru eteyo, "Inontarai nini suru mani inontarai Yahudi suruine. Uwedaya kaiwasa na tane

bendarinei kiai ehuayai etohonai.

²¹ Uraunau we tatohong kariri koangno wiro mai we inontarai Roma ne tane hukuminei kaha. Koang nani wiro tamaya wei tuni tatohong kariri kaha."

²² Kaiwasa bitoya foi kontai ehasou emadu suru, tuni mano ehutu kaiwo fosa etemi manea efosiabu ansung usansuna fo tuni eruba suru.

²³ Eruba surua ubeng ahang kahai tonanai, mayeai eru suru esoa suru to aitamu rorong fo afui tuni etemi mano wenunggamiai we munu aitamu foi we deitawang wedua suru na mai.

²⁴ Kaiwo etare tawani tonana fo wedaya kia pari suru afui, kife wedua suru na rorong pari fo, tuni yu aitamu uwemifosuru na airape na rorongfoi.

²⁵ Tarahi diru rabuang, Paulusi tuni Silasi uwenadi we Seng Allai urohi ufiai. Inontarai siai ewa na aitamu rorong fo kontai etaramio fi unari fo.

²⁶ Mayeai na tantuma, mundiai fuba bei fiorirouai paria munu amangfoi kontai rirora sentenang. Na kutu nanai kontai rahutufo tapapasa kiai wai besio eru aitamu inontaraifosa nai fo kontaio tafaresuai werusa.

²⁷ Mano wenunggamiai we munu aitamu foi kipatetahi doa bariri tuni detiao rahutufo we tapapasa nana ne, fiating ne sondufoi deyo

† **16:27** Weo enetiuai ambori sodai aiboi marareha foi, toyari Herodesi ne rai mamuna fosa na kaiwo rabuangno 12:18-19.

ming berahi, weo deitarahio inontarai ewa na aitamu fosa ewawu ehai ampa.[†]

²⁸ Manamo Paulusi bibe deyo, "Eh! Mung bera wau fanai! Ameai ninai kiai."

²⁹ Inontaraifoi dutang we padamarang bei ma, ainanaya mito afui, mitaia denteng kaha disang kapa awebuka na Paulusi tuti Silasi uaromireafo.

³⁰ Mayeai kia suru to rorong bo borai fai ariai, dutang bera suru deyo, "Dai muruine, inari fiani ambori ikaharai weru ne karirane ki?"

³¹ Uroa wei ureyo, "Roaso Seng Yesusi ambori feriri wau ki, wau tuti nemu munu rorong wai!"

³² Ainanaya Paulusi tuti Silasi urairiri Sengnei ne Kaiwone wei tuti mano eminohi riati fosa.

³³ Na diru siari nani kontai kia suru awa yuairurang une kahaifo. Na kutu nanai kontai uwebaptisi, i tuti ne munu rorong fosa kiai.

³⁴ Mayeai kia suru to ne munufoia dohong fiang we suru. I tuti ne munu rorong fosa eparaise karira, weo ninaia mani eroaso Seng Allai ampa.

³⁵ Kameaia mano ehutu kaiwo fosa etemi mano erufi na parentafo to munu aitamu foi, eteikaririai we ambori etawing Paulusi tuti Silasi ura to borai ki.

³⁶ Mano wenunggamiai we aitamu foi deikariri kaiwofo we Paulusi deyo, "Dai muruine, mano ehutu kaiwo fosa etohong kaiwo ma weo etaw-

ing muru. Ampafe mura na maia. Mahikaifeai."

³⁷ Wape Paulusi medu mano era ma nanisa deyo, "Suwo! Ehutu kaiwo kariri fi etinggai auru wea fo kaha mae eruba auru kawuru na kaiwasa bitoya euremireafo. Kontai esoa auru funomai tono aitamu rorong ne. Wape auru mani inontarai Roma di auru. Ampafe nana mani enari kariri tane kaiwo hukumi Roma ne kaha. Kontai, na ninaia eteyo etemi auru aura na mamunggasai e? Nana mani aumarira! Metemisa era terai ma weo era tutu auru na mai to borai."

³⁸ Mano nanisa etaikariri kaiwofo we mano ehutu kaiwo fosa tuti na kutu etaramioai we Paulusi tuti Silasi uru mani inontarai Roma di suru nana ne, ematai paria.

³⁹ Ampafe era wa eteiai ene etehong sarawai we surua fo, mayeai era tuti suru to borai weru aitamu rorong fo kontai etutang suru we ambori ura weru bendarifoi.

⁴⁰ Ura weru aitamu rorong fo, ura to Lidiae ne munufoi. Ura wa ukonta doroio eroaso fosa efanduhisa tuti uraretawansa ambori eroaso mutu. Mayeai urontaia.

17

Paulusi tuti Silasi uru na Tesalonika

¹ Ainanaya Paulusi tuti Silasi ura riria bendari Amfipolisi tuti Apolonia awa usuaio bendari Tesalonika. Na nanai inontarai Yahudi fosa ene munu agama bei.

² Ampafe Paulusi da to munu agama foia, kariri ne niari na doni kontai na munu agama Yahudi fo. Da wa sewa we Sempaisi ne Kaiwofo ria Yahudio efanduhisa na nana fosa. Niari tonanai titua pampang na rahida Sabati botoru fo.

³ Na Sengnei ne Kaiwofo deiririai tuti deinawiai na mai wesa kariri Mananu Mampariri Allai dereria foi, we todoni kontaio sodai dadi-rafo tuti suwi na marareha rorong foi aha. Deyo, "Yesusi mano yeiriri we mea nini andino we Mananu Mampariri ne."

⁴ Yahudifosa maneiru teai ansaino eroaso ne, kontai inontarai Yunani katui ahang kahai ematai Allai fosa, tuti wiwing ewewafoniai na katai nani fosa, ea kiai era ria Paulusi tuti Silasi.

⁵ Wape Yahudifosa enemirorong pirahai paria, ampare era wa ebai inontarai eharirao rahida neungne efanduhisa eminohi funomai na kondirora fosa, ambori eweaiteta we Paulusi tuti Silasi. Ainanaya kaiwasa nanisa ehuayai etohonai na bendarifoi sentenang tuti enumikuayai rufang inontarai yoasoai manei wonong fino Yasoni to ne munufoi we esera we suru nayai, we efafa suru to boriei to kaiwasa bitoya foi earomireafo.

⁶ Wape esobu suru kaha ampare efafa Yasoni tuti doroi maneiru teai siai na nana fosa to mano eru wang mananu fosa na bendarifoi. Efafasa mae esahu tutisa eteyo, "Inontarai ninisa

na katai doni kontai na nunei sentenang, ewedaya kaiwasanei we ehuayai etohonai. Ninaifa mani enari na tane bendarifi kontai aha ninai.

⁷ Tuti Yasoni fiatasameine-nang ne munufoi we eminohi nai. Ea kiai etapa fianai aino Kaisari Roma nei medura fo, we etaiririai eteyo mananu fuba siai manei aha mani wonong fino Yesusi."

⁸ Na kaiwo etinggai funomai tonana fo wedaya bendarifoi nikuayai na kaiwasa bitoya foi tuti mano ewenunggamie na bendari fosa.

⁹ Ampafe mano ewenunggamie fosa etemi Yasoni tuti mano siaio eroaso fosa we etohong doifeai we fiainawiai we parentafloi ambori Paulusi tuti Silasi wiro unari fieai na nanai ahang fanai, pariao unari kariri ene kaiwofoa mani etohong Yasoni tuti ne maniwowirifosa ene doifo aha, ainanaya etawinsa era wa.

Inontarai efau na Berea eroaso Paulusi Kaiwo Mahikai medura fo

¹⁰ Dirua mani inontarai eroasoai na bendari nani fosa etemi Paulusi tuti Silasi ura to Berea. Ura wa sobu bendarifoi fo, ura to Yahudifosa ene munu agama foi.

¹¹ Inontarai Berea fosa enemirorong denteng sewa weru inontarai Tesalonika fosa. Na enemirorong mirising etarami kaiwoariri kariri Yesusi, tuti rahida neungfo etato Sempaisi ne Kaiwofo weo ambori ewaitawanai we Paulusi ne aunaufo wetarai ete bireri e.

¹² Na nanai Yahudifosa efau eroaso Yesusi, kontai wiwing Yunani mano ewewafonia fosa tuti mangfea efau eroasoai.

¹³ Na rahida bo inontarai Yahudi na Tesalonika fosa etaramioai we Paulusi deiriri Sengnei ne Kaiwofo na Berea, ea kontai era to Berea tuti enari kaiwasafosa ehasou tuti enimirorong weansarai paria.

¹⁴ Doroi na Berea fosa esa-hera etanatu Paulusi to nafarengfo, mae Silasi tamuo Timotiusi unayai na bendarifoai.

¹⁵ Mano era ria Paulusi fosa, era tutiri paria sobu Atena, mayeai etaraberasa to Berea aha, tuti Paulusi dere riasa we Silasi tuti Timotiusi weo urontai ahera riati ma.

Paulusi kiorang na Atena

¹⁶ Paulusi niayai demang we suru na Atenafo enerong fituayai paria weo deti bendarifoai sefang na aririwang.

¹⁷ Ampefe na munu agama Yahudi foi sewa we Sengnei ne Kaiwofo ria inontarai Yahudi tuti inontarai Yahudi kahaio esomi we Seng Al-lai fosa. Tonanai kontai na kondirorafoi, rahida neungne sewa weai ria inontarai kenggunsa na nana fosa.

¹⁸ Mantaunau etaunau Epikorusi ne aunau fosa tuti mano esomi we aunau Stoa fosa,* esawari kontai. Manea eteyo, "Inontarai nini deitawang fiani? Borong fiabai finomai!" Manea siai aha mani eteyo, "Tarahio

deiriri kariri aririwang na nu siai." Emadu tonanai weo Paulusi deiriri Kaiwo Mahikai kariri Yesusi tuti mansuwi-suwi ahang fo.

¹⁹ Ainanaya ehari to mano efanduhisa na wiwoi Aropagusi. Na nanai emadu wei eteyo, "Ameteo ametarami kariri aunau waworuo moduri nani.

²⁰ Weo boiriri fio ametaramioa mani siai paria. Ampafe ameteyo modu bau kaiwowa ma amewaitawanai."

²¹ (Weo inontarai Atena fosa kiai tuti inontarai siaio enai na nana fosa emirising paria we ene rahidafo etohonai kai we etaramididau kariri kaiwoariri waworu).

²² Ainanaya na wiwoi Aropagusi Paulusi dautai ayai, doari na kaiwasa efanduhisa fosa earomireafo tuti medu wesa deyo, "Inontarai Atenane meaine. Iwatioifa we na fifiani kontai mesomi we sang bitoya paria.

²³ We na rabuang bo ira wari mene bendari fine tuti urehu nayai na mene munu mesomi naya fo, iwati mesbaio menunung korbani nai bei mani, mesoi toninai, Weo Seng Mano Aroansoi Kahafoi. Yo, ampafe Seng mano mesomi wei wape metaroansoi kahai nani andino ikorang kariri we mea ninai.

²⁴ Allai mano niari nunei tuti fi niai nai foi sentenang, andino weSeng we rorafaisi tuti nu fine. I wiro niai na munu omi naio inontaraine enariri foi kaha.

²⁵ I kontai wiro demang we tafatari na fiea kahai, ne

* **17:18** "Stoa" botio na Kaiwofea na Daftar Kaiwo.

tarai toyario we ne pari fi fennana kaha. Weo andino dohong ansengfi we tatane tuti fi fuba nini kiai we tatane.

²⁶ Na inontarai mansiari kawuru, Allai niari kaiwasanei kiai, ambori etawing separai eminohi tatinrai na nunei sentenang tuti dohong katai maisa we eminohi nayai. I kontai andino na reantenangfo kiutuaifa kariri rahida tuti kataio mananufosa eru naya fo tuti rahida bodoni ambori etawai ki.

²⁷ Allai niari tonanaifane ambori inontaraine tata tasera wei, paria kadeo tasobui, wape wiwo minohi waroi weru tata kaha.

²⁸ Kariri na kaiwofeai eteyo, 'Na mantauni terai taminohi tauremi barika, tarurai towana toninai.' Kontai kariri mene inontarai erohi manea ene rarungfo eteyo, 'Tata kiai mani ne arikang di tata.'

²⁹ Ampafe tarai Allai ne arikang di tata, tonana mani dohonao tateyo Allai mani ne tarai toyari aririwangno inontarai esawai ne enariri na emasi ete na peraki ete na kamiefe.

³⁰ Rabuang bo taserawawerahaifa foi wedaya tatohong sasari amani tasomi we aririwangfi. Finanai Allai deti weai ahang kaha, wape ninaifa mani demi kaiwasanei kiai na nunei we todoni kontaio etaraberasa weru ene sasarinei.

³¹ Weo meduraifa futuayai weo rahida bei, ambori kaiwasa nunei sentenang etoari na arongreafo ki weo kiutu

kaiwo karirisa na enerorong mesi foi. Finanai inontarai mano Allai diriria foi andino niari fo. Tuti Allai duwiri suwi na marareha rorong fi ampa, ambori deinawiai we kaiwasanei kiai weo ne nanai tarai kaririai ki."

³² Rabuang bo inontaraifosa etaramioai weo mansuwi-suwi aha nana, manea emarari Paulusi. Manea kontai eteyo, "Ameteyo modu riwang kaiwo ninai we ametaramioai aha."

³³ Ainanaya Paulusi da werusa.

³⁴ Wape manea na ea etau we Paulusi ne kaiwofo tuti eroaso Yesusi, amani; Donesiusi, i mani inontarai fuba na Aropagusi manei dine, tuti wiwing manei wonong fino Damarisi, tuti manea siai kontai.

18

Paulusi na bendari Korintusi

¹ Mayeai Paulusi dontai weru bendari Atena to bendari Korintusi.

² Na nanai sobu inontarai Yahudi manei wonong fino Akwilai, tuti ne wiwingno Persekilai. Akwilai mani inontarai Pontusi dine, mae arahio urontai na nu Italia to bendari Korintusi ma, weo Kaisario Klaudiusi data inontarai Yahudi fosa kiai weru bendari Roma foi fefe. Paulusi da wa suambawa suru,

³ tuti minohi ria suru, yufi ria suru na nanai, weo fi uru na rahida neungfo mai kariri Paulusi ne fi yu fo, amani unario tenda.

⁴ Wape rahida Sabati neungfo mani, da to munu agama Yahudi foi deiriri Sengnei ne Kaiwofo nayai, yurai paria ambori Yahudifosa kontai Yunanifosa eroaso Yesusi.

⁵ Rabuang bo Silasi tuti Timotiusi urontai na Makedonia ma fo, Paulusi niari fisiasi kaha, mae rahida neungfo kiorang terai we Yahudifosa kariri Yesusi, weo i mani Mananu Mamparirio Seng Allai dereria fi dine.

⁶ Wape inontaraifosa eteipa ne kaiwofo tuti etei kanggani ne wori, ampafe Paulusi kifa titai kangganang niayai na ne ansung sensuna fo we fiainawiai kariri ene sarawafo, deyo, "Mesobu ne karirafo mani iruai warahu, weo mantaung mea mene sarawa fine. Ampafe na ninai to fongna mani ira yeiriri Kaiwo Mahikai nei we inontarai Yahudi kaha fosa terai."

⁷ Ainanaya Paulusi da werusa na munu agama Yahudi foi, da awaru minohi na munu wiatai kefang munu agama foi. Mano ne munu foi mani wonong fino Titius Yustusi. I mani Yahudi kaha dine wape yoaso Seng Allai.

⁸ Wape Krispusi, mano wenunggamiai we munu agama foi tuti ne munu rorong fo tantenang eroaso Seng Yesusi. Inontarai Korintusi manea siai kontai, efau etarami kaiwo Paulusi medura fo, eroaso Yesusi ampafe ewebaptisisa.

⁹ Na diru bei Paulusi deti feiae. Na fi detioai nanai Sempaisi medu wei deyo, "Pauluse, mutai fanai! Modu pampang, nemuboru fanai.

¹⁰ Weo iweriria wau. Wiro maneui warangfo tataha wau tuti niari kanggani wau kaha rai, weo inontarai bitoya na bendari nini nehu inontarai saine."

¹¹ Ampafe donio Paulusi niayai na Korintusi defuina bei aburung feai, deunau Seng Allai ne Kaiwo kariri Yesusi fo wesa.

¹² Rabuang bo Galioi wegubernuri we nu Akhaya foi, inontarai Yahudi eweboyari we eweaiteta we Paulusi, tuti ehari to gubernuri arongreafao we kiutu kaiwofo.

¹³ Etinggairi eteyo, "Inontarai nini wedaya inontarai bitoya ambori esomi we Seng Allai na rang siai, wiro kariri Kaiwo Musai soi fo kaha."

¹⁴ Paulusi fiobai borong we medu, manamo Galioi kiutu ne kaiwofo medu we Yahudi fosa deyo, "Yahudine meaine, dohong sara fikarira fuba fea kariri hukumi Roma ne mani, yemang we tarahudidau mene inggairai nini.

¹⁵ Wape nina mani meweaiteta karirio kaiwo tuti wang kontai tuti mene Kaiwo Musai soi wa. Ampafe metairiri weai siaia. Yau wiro imadu kariri fi ne tarai tonana neng kaha."

¹⁶ Ampafe datasa to boriai.

¹⁷ Ainanaya etaurufang Sostenesi, mano wenunggamiai we munu agama Yahudi foi, eboi na Galioi urengreafao. Wape wiro

Galioi dohong fiae wesa kaha.

Paulusi daraberahi to Antioquia

¹⁸ Paulusi niaya waroi kuteai aha na Korintusi. Mayeai da weru doroi na nana fosa, Persekilai tuti Akwilai urontai rati itorafai to Siria. Paulusi defai kaharai mae, na bendari Kengkrea dei nungfo kariri ne areraio meduri we Sempaisi kawurua foi.*

¹⁹ Itorontai sobu Efesusia Persekilai tuti Akwilai unai na nanai mae Paulusi meiri andi dontai to Siria. Donta kaharai mae da to munu agama foia, medu ria Yahudi na nana fosa kariri Sempaisi ne Kaiwofo.

²⁰ Etutani we ambori minohi waroi riasa, manamo merira.

²¹ Tonanai ki wape rahida bo donta foi, medu wesa deyo, "Masino Sengnei miaya mani, yarabera yau aha ma ki." Medu wesa tonanai kai fo, dontai weru Efesusia.

²² Dontaia biari na Kaisarea, mayeai da to Yerusalemia weo dohong mahikaifeai weo jemati na nana fosa, ainanaya da pari to Antiokiara.

²³ Niayai na Antiokia waroi kuteai, ainanaya dontai aha da wari nu Galatia tuti Frigia weo suambawa mano eraria Yesusi fosa, deretawansa ambori eroasoia mutu.

*Apolosi kiorang na Efesusi
tuti Korintusi*

²⁴ Na rabuang bonani kontai inontarai manei, wonong fino Apolosi, da to Efesusi aha. I Yahudi dine wape saubaununggamiai na Aleksandria. Sewai paria tuti deitawangno Sengnei ne Kaiwofo na mai.

²⁵ Sобу aunau kariri Sempaisi kawurua ampafe medua sabi, deunau kariri Mananu Mampariri tuti todoni ambori da ma fo. Wape deitawang te Yohanesi mano webaptisi foi ne aunaufo.

²⁶ Na wirow mitai kaha kiorang na munu agama Yahudi foi. Persekilai tuti Akwilai utarami ne aunaufo nana ne, urutani da ria suru to munu uminohi nai foia. Na nanai urairiri nariai na mai wei kariri Allai ne Rangno feriri inontarainei kiai, amani Yesusi andino Mananu Mampariri foi.

²⁷ Mayeai Apolosi enerong we dontai to nu Akhaya, ampafe doroi na nana fosa eroaoai tuti etoi kaiwo anatu feai we mano eraria Yesusi na Akhaya fosa, ambori etamang wei na mai. Dontai sobu Akhayafo, ne aunaufo fiata pari mano Seng Allai dohong ne bengfo arora we eroasoia fosa, ambori eroasoai mutu.

²⁸ Weo Apolosi sawao Yahudifosa paria na kaiwasa bitoya foi euremireafo, tuti deinawiai na Sengnei ne Kaiwofo kariri Yesus Kristusi weo andino Mananu Mamparirio Seng Allai dereria fi

* **18:18** Yahudifosa ene koang tonana. Manei ne arerafeai we Sempaisi, rahida bo dei nungfo deinawiai we ne arerai we Sempaisi niari kaririaia mai finanaya.

dine.

19

Paulusi na Efesusi

¹ Na rabuang bo Apolosi niai na Korintusi fo, Paulusi dontai riria reitahafoi paria sobu Efesusi. Na nanai sobu inontarai eraria Yesusia fo meneiru teai.

² Dutang berasa deyo, "Bo-hine meaine, meroaso Yesusi neo mesobu Allai Nuaninu Mirarebana fi kontai ampana?" Eroa eteyo, "Bireri. Weo wiro ametaramioai konta kahai we Allai Nuaninu Mirarebana manei kaha."

³ Berasa aha deyo, "Tonana mani, mewebaptisine kariri mandoni ne baptisifo?" Eroa wei aha eteyo, "Kariri Yohanesi ne baptisifo."

⁴ Ainanaya Paulusi medu kaririai wesa deyo, "Yohanesi webaptisi kaiwasa fo mani, deinawiai weo inontarai nanisa etarabera sa weru ene sasarifi ampa. Wape na siari nanai kontai deikaririai we inontarai Israeli fosa weo, todoni kontaio eroaso inontaraio ambori da tuwari aha ma foi, amani Yesusi."

⁵ Na kutu etarami kaiwo fenanai, webaptisia na Seng Yesusi wonongfo.

⁶ Tuti na kutu Paulusi yuai warangfo awa wasausa fo, Nuaninu Mirarebana foi sensonisa, ainanaya emadu na kaiwo siai, kontai eteikariri kaiwoariri Seng Al-lai dohonai wesa na Nuaninu Mirarebana foi.

⁷ Ea kiai efaupo tarahio ewesuraya mandu rai.

⁸ Weembai botoru Paulusi medu na wiro mitai ahang kaha we kaiwasa na munu agama Yahudi fosa tuti medu deikairiri todoni Allai yu Mananufo.

⁹ Wape maneiru tea na ea enumikamiai mitubaru, emaya we eroaso kaha, tuti na kaiwasa efanduhisa na nana fosa euremireafo eteibera Sempaisi ne Rangno feriri kaiwasanei na Yesusi fo. Ai wedaya da werusa, kia mano eraria Yesusia fosa da to Tiranusi ne munu deunau nai foi. Na nanai rahida neungne deunausa kariri Sengnei ne Kaiwonei.

¹⁰ We defuina boru niari finanai pampang, ampare kaiwasa fuba eminohi na nu Asia foi, inontarai Yahudi kontai inontarai siai ea kiai etaramio Sengnei ne Kaiwofo.

Skewai ne arikangfosa eteyo etata inggira na Yesusi wonongfo

¹¹ Seng Allai niari fitantuma bitoya paria ria Paulusi,

¹² ampare inontaraifosa eha ne fi satarai toyari lenso ete ireu, awa etohonaia wa sau mano emaninang nanisa mani, ebeng tuti inggirafosa ehawari weru sa.

¹³ Mangketu Yahudi maneiru teai era mai katai na doni kontai, weo etata inggira weru kaiwasa, erurai we enari kariri Paulusi kontai, ampare eteyo etata inggira na Seng Yesusi wonongfo. Emadu we inggirafosa eteyo, "Na Yesusi mano Paulusi

deiriri foi wonongne ametata mea!"

¹⁴ Imami baba manei wonong fino Skewai, ne arikang eweit uansaino enari tonana ne.

¹⁵ Manamo inggirafoi medu wesa deyo, "Yeroanso Yesusi, tuti Paulusi yeitawani, wape menemitiuai inontarai fuba todoni di meare, donio mete metata yau nina?"

¹⁶ Ainanaya mano inggira dohoni foi soiri rufansa awa miuntatisa, kirama siabu ene taraifoi awa ewekahai, fiosiabu ene fiawawafo, ampafe emitio kahabirai weru munufoi tuti rika deda siabu ene taraifoi.

¹⁷ Inontarai Yahudi fosa kiai tuti inontarai siaio enayai kiai na Efesusi fosa etarami finana fo ematai karira. Ampafe kaiwasa bitoya efiai Seng Yesusi wonongfo pampang.

¹⁸ Inontarai bitoya eroaso Yesusi fosa era ma eteiaio ene sasari etohoni kawuru na fafongna foi na kaiwasa bitoya foi euremireafo.

¹⁹ Tuti mano enari sulapi fosa efanduhi ene buku sulapi fo kiai, tuti enunumi na inontarai bitoya foi euremireafo. Buku sulapi enunung ruhi nani etato wei na doi mani ne harga dedai paria, tarahio demoyarai we etampi nayai fa defuina sura.

²⁰ Na rang tonana fo Sengnei ne Kaiwo kariri Yesusi fo dafai wariai tuti efau aha eroasoai.

Kaiwasa bitoya ewekaiwo na Efesusi

²¹ Ne nanaia kaia mani Paulusi deyo dontai to Makedonia tuti Akhaya kontai ambori dontai pari to Yerusalem. Medu deyo, "Yontaia mani yontai to bendari Roma kontai."

²² Demi ne mano efatari fosa mandu, amani Timotiusi tuti Erastusi weo urontai fafong to Makedonia, wape mantauni niayai waroi kuteai na nu Asia.

²³ Tarahio rabuang bonani faini dino kaiwasa bitoya ewekaiwo fuba na Efesusi weo kaiwo aunau kariri Seng Yesusi ne Rangfo.

²⁴ Weo na bendari nani inontarai manei wonong fino Demetriusi, i mani sewai we niari fi siai na peraki, andino niari munu aririwang weo aririwang wiwing wonong fino Artemisi, mano esahui we ene sengfoi. Fi yu nanai wedaya doi bitoya wei tutu mano eru fi kariri fosa, we inontarai efau eworio munu aririwang fo we esomi weai fefe.

²⁵ Ampafe donio fianduhisu tuti inontarai siai esawai enari fisiai na peraki konta fosa, ainanaya medu wesa deyo, "Bohine meaine. Mewaitawanai weo tasobu doi bitoya na fi taru ninai.

²⁶ Wape ninaia mani mewatioai tuti metarami terai fiani aino inontarai mano wonongno Paulusi niari fo. I medu deyo, 'Aririwangno inontaraine enariri esomi wei foi mani wiro seng dine kaha.' Ampafe ne aunau kerira nanai wedaya kaiwasa bitoya etaui weai, wiro na

bendari Efesusi nei tera kaha mae, adareti na nu Asia nei sentenang.

²⁷ Ne tonanane ambori wedaya fi taru ne tawonomi karira tutirai ki. Nanai tera kaha, wape munu aririwangno Artemisi, mano dedai nei, kontai ambori esahui we fi tarai kaha, kontai seng Artemisi mantauni ambori wiro esomi wei kahai ki. Wape i aririwang fuba tasomi wei, weseng na nu Asia nei sentenang dine."

²⁸ Etarami kaiwo meduri foia kiai tonanafo, ehasoua etang waweresa, ehuayai esahu eteyo, "Artemise meiri wau kawurua, wau weseng we kaiwasa na Efesusi fine!"

²⁹ Ampafe ea tuti kaiwasafoi kiai era wari bendarifoi sentenang esahu etohonai. Mayeai etafu Gayusi tuti Aristarkusi, uru inontarai Makedoniao uraria Paulusi na ne rang rorong to Efesusi ma di suru. Efafa suru eha suru to munu fiabao kaiwasa na bendarifoi fianduhi nai foi.

³⁰ Paulusi deyo suai to munufoi afui kontai, we medu we kaiwasafoi, manamo mano eraria Yesusi na nana fosa eweduari.

³¹ Kontaio Paulusi ne maniwowiri maneiru teai, ea inontarai efabai na nu Asia foi, etemi inontarai esuari ambori wiro dario kaiwasa bitoya foi fanai.

³² Na kutu siari nanai kontaio, kaiwasa fianduhi na munu fiabai foi, ehuayai etohonai pariao eserawerahai paria. Manea ebibe funomai towanaia tuti manea ebibe esahu funomai

toninai ma, weo kaiwasafoi fubaei eserawawera fianai aino wedayasa etohong wei ne.

³³ Inontarai Yahudi fosa ewarami tuba inontarai manei to fona fong, wonong fino Aleksanderi, weo meduai Yahudifosa kaririai we kaiwasafoi. Ampafe kiamang tawansa we enemboru ambori de medu wesa.

³⁴ Manamo ewatioi we Yahudi dine, ampafe ebibe kiai tantenang beyari awao araha ureng boru teai, efiai ene aririwangfoi eteyo, "Artemise meiri wau kawurua, wau weseng we kaiwasa Efesusi fine!"

³⁵ Ainanaya sekertarisi we bendarifoi sua kaiwasafoi we enemboru. Medu wesa deyo, "Inontarai Efesusine meaine. Mantei na nu bodoni kontai deitawanaifa weo bendari Efesusi meiri andino dewawu munu seng wiwing Artemisi tuti ne aririwang biari na rorafaisi meu fine.

³⁶ Mantei kontaio wiro sahu forawa kaha. Ampafe menemboru wiro metohong funong mea fanai.

³⁷ Meha inontarai nini suru to ninai ma ne, wiro ukamanana fi na seng Artemisi ne munufoi ete ureibera tane sengnei kaha.

³⁸ Mae Demitriusi tuti mano erufi toyari i fosa etinggai manei mani, tonana mani eha kaiwoariri nanai to mano ehutu kaiwo fosa. Kantorio kiutu kaiwo foi tuti ne mano ehutu kaiwo fosa emainenang etamang.

³⁹ Wape menemitiuai kaiwofeai siai konta mani, meha

kaiwo nanai awa memadu weai na mano parentafoi yoasosa we ehutu kaiwo kontaia fosa.

⁴⁰ Weo fianai aino menari na rahida bonini, ambori kia ne karirafo we tata kontai ki. Tarahio parentanei ambori dinggai tata we tahuayai tatohonai ki, nana mani tamadu fiani, weo fi tatohong weai ninai tupu dawohi arorawa."

⁴¹ Medu kaiwofoa kai wesara, ainanaya demisa etaraberasa to ene munu rorong fo aha.

20

Paulusi da to nu Makedonia tuti nu Yunani

¹ Kaiwasa na Efesusi fosa efoairai weru etohonafoa, mayeai Paulusi fianduhu inontarai eraria Sempaisi na nana fosa, tuti deunausa we enemirorongfoini mitubaru na Sempaisi. Ainanaya dohong mahikaifeai wesa tuti da to Makedonia.

² Da suambawa katitai na nu Makedonia foi, tuti dohong kaiwo aunau bitoya we inontarai eroaso Yesusi na nana fosa, ambori enemirong mitubaru na Sempaisi. Mayeai da sobu nu Yunani foi.

³ Ne embai botoru na nanai, ainanaya rahida bo meinenang we dontai to nu Siria foi, taraoai we inontarai Yahudi fosa eteiruhi kaiwo we emuni. Ampafe enerorongfoi disangbariri beyari we daraberahi dontai riria nu Makedonia foi aha.

⁴ Inontarai maneia etontai riat, amani Pirusi na Berea antungno Sopateri, Aristarkusi tuti Sekunderi uru na Tesalonika, Gayusi na fino Derbe, kontai Timotiusi, Tikhikusi tuti Trofimus ea na nu Asia.

⁵ Eweitu nanisa etong foni antoru* etamang we antoru na Troasi.

⁶ Rabuang bo etohonsua rahida fuba esahui we Rahida Roti Weragi Kaha fo awao kiai fo, antorafai weru bendari Filipi. Rahida ring aha mani amefanduhi amea kiai ria ea na Troasi. Amene rahida itu na nanai.

Na Troasi Etikusi sawai awei mireha mae suwi aha

⁷ Rahida Sabtui diru mano ameroasso Yesusifo amea amefanduhi amea we ametang ruhi rotio deinawi kariri Yesusi ne taraifoi. Paulusi kiorang we inontarai efanduhisa na nana fosa paria diru rabuang, weo enerorong we kameai amani donta fefe.

⁸ Na munu rorong bo yaio amefanduhi amea nai foi mani padamarang bitoya paria.

⁹ Bariboaai manei wonong fino Etikusi minohi na jendelafoi. Paulusi medu waroi karerai paria wedaya bariboaifoi ureng mamong ampafe dena. Denawa kifa bariri sawai na rorong bo botoru ne yai pari foi awei wiana kahofa nuwowongfo. Inontaraifosa emitio awei eruaisia mani mirehara.

* ^{20:5} "antoru" deinawio Lukasi mano soi kaiwonei kionta.

¹⁰ Wape Paulusi biari aweu fiauni derirorai ria bariboaifoi ne taraifoi, duwiri weru marareha rorong fo aha. Medu wesa deyo, "Mearomikuayai fanai, darang ampa."

¹¹ Mayeai Paulusi daraberahi ayai, fioabau rotifoi dohonai etang ruhiae. Etampia kai Paulusi medu pari ahao aha foi fiorarisi, ainanaya dontaia.

¹² Mae bariboaifoi darang kaiwasafosa era tutiri to ne munufoia, tuti enemirorong-foi mirarising aha.

Paulusi dontai na Troasi to Miletusi

¹³ Ametautai to kaparifoi, ametafai fafong to bendari Asosi, ametamang we Paulusi nayai, weo i sang ne rang rorong fo mai we da na rei.

¹⁴ Na Asosi, kenggung amea, ametafai ruhiae to bendari Mitilene.

¹⁵ Kameaia ametafai pariao nu Kiosi arau, tuti kameai roainai aha mani amesobu nu Samosi. Kameai nari aha mani amesoa na bendari Miletusi.

¹⁶ Weo Paulusi medua futuayai we wirop ametafai tawangno Efesusi kaha, ambori wirop ne rahidafo kai funomai na nu Asia foi fanai. Weo yurai paria we rahida fuba Pentakosta foi kaharai mae sikaherawa niai kawuru na Yerusalem.

Paulusi ne kaiwo arerai we mano ewenunggamieie we jemati Efesusi fosa

¹⁷ Na Miletusi Paulusi dere we mano ewenunggamieie we

jemati na Efesusi fosa we era ma.

¹⁸ Rahida bo era ma esobui fo, medu wesa deyo, "Doroi bohine meaine, mewaitawanaifa ampa kariri fianai aino inari rahang mea na nu Asia fine, na rahida bo isi awehu katainei paria sobu rahida bo ye iruai awehu weru katai fi aha ne.

¹⁹ Isodai dadira na Yahudifosa weo eteiruhi kaiwo we enari kanggani yau tuti ete emung yau. Tonanai ki wape irurai we yeiriri Sempaisi ne Kaiwo pampang na enehurorong tewawa tuti rayai nai na urehu.

²⁰ Mewaitawanaifa kontai weo fi mai we mea fo yediwarai weru mea kaha. Ne nanai kiai yeiririai we mea tutu yeunau mea na rabuang bo tafanduhi tata ruhia foi tuti na mene munu rorong wa.

²¹ Yeiririai we inontarai Yahudi fosa tuti Yahudi kaha fosa, yeunausa we etaraberaisa weru ene sasarifoi, era we Allai aha kontai eroaso Seng Yesusi.

²² Tuti na ninaifa mani yontai to Yerusalem weo Nuaninu Mirarebana fi demi yau tonana fefe. Kontai iwaitawang fianai aino isodairai na wana fo.

²³ Ne iwaitawanaifa mani, na bendari iraoa fo, Nuaninu Mirarebana nei deikaririai we yau we isodai dadirafo tuti eru aitamu yau.

²⁴ Tonanai ki wape imatai wedua imerahafu kaha, mae Seng Yesusi fi demi yau wea fo irurai paria we inariao kai na mai, amani yeiriri Kaiwo

Mahikai fo kariri Allai ne bengfo paria sobu imereha.

²⁵ Ira mai mea kiai na mene munuewa ampa, tuti yeiriri kariri todoni Allai yu Mananufo. Wape na ninai to fongna mani yeitawanai we mewati urehu ahang kaha.

²⁶ Ai wedaya rahida bonini imaduraia tapapa we mea, we rahida da ma wanai manei kontai sobu ne kari-rafu mani, wiro yau nehu sarawa fine kaha.

²⁷ We wiro iwawu fi iru ne na rahida bei kaha, mae yeirirai awa kasau we mea kariri fianai aino Allai enetutaiti tuti niariri kiai fo.

²⁸ Mewaitawang wedua mea tuti kaiwasa fuba Nuaninu Mirarebana fi dohonsa ma weo mewaitawansa fo, weo Allai yuai mea weo mewenunggamiae wesa fefe. Mewaitawansa toyari mantahungno deitawang wedua ne domba rabuang foi, weo Allai mantauni feririsa na Yesusi ne rikafo.

²⁹ Weo iwaitawanaifa weo yontai weru meara nina mani, wiro bireri kahai mae ambori inontarai karira fea esuai we enai rahang mea we enari kanggani mea, ne tarai toyari serigalao etawio dombafosa weo etansa.

³⁰ Kontai na mantaung mea ambori manea ewemantau-nau kaiwo karira ki. Enari tonanai we ewedaya mea mano meroasoia wa mea we mera sarawaifa tuti mera riasa.

³¹ Ampafe metanansiau weduaraifa! Mearomioai-fara waroi we defuina botoru mau wa rayai nai na urehu,

irurai pampang na diru rahida we yeretawang mea.

³² Ninaifa amani itawing mea to Seng Allai ambori dewawu mea tuti merua mutu na Allai ne Kaiwofo kariri ne bengno dohonai arora fo. Kaiwo nanai kia mambiri we mea tuti Allai mioang mea tuti fi kiaio dohonai we ne arikangfosa, dohonai we mea kontai ki.

³³ Na irurai tuti Sengnei ne Kaiwofe ne wiro enehutawanai we ambori isobu doi ete ra fuba ria mea kaha.

³⁴ Mewaitawanai we mantaung yau irurai we iru fi siai fo we isobu doi tuti fiang demoyarai we yau tuti mano era ria yau nesa.

³⁵ Na fiffiani kontai iwekasinai we mea na rurai mambiri we rufi tonina ne, ambori tafata inontarai ewemambiri kaha fosa. Weo taromio fianai aino Seng Yesusi mantauni meduraia fo, medu deyo, ‘Tatohong fi we tafata inontarai siai mahikai sewa inontarai etohong fi we tata ne.’”

³⁶ Paulusi medua kai wesa fo, disang kapa awebuka ri-asa tuti wenadi.

³⁷ Ewenadia kaifo efauni, esaia ehai beyari wei tuti enunahi.

³⁸ Enemirorongfoi fituayai paria, weo kaiwo Paulusi medura fo deyo, na rahida bonani to fongna mani wiro ewati ureng ahang kaha. Ainanaya era tutiri pari arau dautai na kaparifoi.

21

*Paulusi da to bendari
Yerusalem*

¹ Na amenemirorong fituayai amehatai weru mano ewenunggamie we jemati na Efesusi fosa, ainanaya ametautai to kaparifoi ametafai werusara. Ametafai beyari to nu Kosi. Kameaia mani amesuaio nu Rodasi, na nanai ametafai pari beyari amesoa na Patara.

² Na Patara amesobu kapari rowei de defai to nu Fenisia, ampare amesoi amea kapari bonani tuti ametafai,

³ ametafaia amewati bera nu Siprusi to rei, mae amehutu bau bendari Tirusi na nu Siria foi. Ametafaia amesoa na nanai we deunaung fi kia fo nayai.

⁴ Na nanai amera wa ametuambawa inontarai eraria Yesusi fosa, kontai ameminohi riasa ari minggu bei. Allai Nuaninufoi deinawiai wesa ampare etaunau Paulusi we wiro da to bendari Yerusalem fanai.

⁵ Manamo amene rahida na nana kaifo, ametawinsa tuti ametafai pari. Era kiai tuti ene wiwing ene arikang era tuti amea paria bendari rea fo. Na nanai na nafarengfo amea kiai ametsang kapa ameawemibuka amewenadi.

⁶ Ainanaya ameru na amewaramifo kai, ametautai to kaparifoi tuti ea etaraberasa to ene munu rorong fo aha.

⁷ Ametauoai na Tirusi amewerurang paria bendari Petolomaisi. Na nanai amera wa ametuambawa doroi eroasoai na nana fosa, weo ametohong mahikai wesa,

kontai ameminohi riasa rahida bei.

⁸ Kameaia mani, ametafai aha amesoa na bendari Kaisarea. Na nanai amera we inontarai deiriri Kaiwo Mahikai manei wonong fino Pilipusi, i mani manei na eweituo etirisa na Yerusalem we efata rasulifosa manei dine. Ameminohi riati na ne munufoi rahida beiru teai.

⁹ Ne kamitung itowemana amani Allai dohong mambiriu we itoru we itomadu kaiwo dohonai we kaiwasafoi.

¹⁰ Rahida beiru teaifa mani, inontarai manei wonong fino Agabusi da na Yudea ma. I mani wenabi, inontaraio Seng Allai medu nai, kariri fio ambori kawariai ki, weo kaiwasafoi.

¹¹ I da ma kia Paulusi ne aikapurunei, yuti aha wiora mantauni aweng tuti warangfo nayai, ainanaya medu deyo, "Nuaninu Mirarebana foi medu toninai, 'Mano ne aikapurunei inontarai Yahudi na Yerusalem fosa eworahi kariri ninai ki, tuti esoari to inontarai Yahudi kaha fosa ewarami rorong fo aha.'

¹² Na kutu ametaramio kaiwofe nanai, amea tuti amene doroi na Kaisarea fosa, amemadu wedua Paulusi ameteyo wiro dontai to Yerusalem fanai.

¹³ Manamo medu we amea aha ma deyo, "Todoni mesai wedua yau ninai, metohong enehurorongnei fituayai funomaia. Mewaitawanai weo imainenang ampa, amani wiro we etafu yau fo

tera kaha, mae we imereha na Yerusalem i we Seng Yesusi kontai."

¹⁴ Paulusi kiobu tarang we amea ampafe amefotou amemadu weduari fo. Ameteyo, "Bento, todoni kontaio kariri Sengnei ne dawiafoa."

¹⁵ Amenai tourai na nanaia, mayeai amefantang amene fianggengfo, amera to bendari Yerusalem i arei.

¹⁶ Amene doroi maneiru teai na Kaisarea fosa era tuti amea to inontarai Siprusi manei, wonong fino Menasoni, weo ameminohi rati na ne munufoi. Menasoni nini daria Yesusi na siari Yesusi niai na nunei.

*Paulusi suambawa
Yakobusi*

¹⁷ Rahida bo amesobu bendari Yerusalem i fo, amene doroi na nana fosa, etamang we amea na enemirorong mirising.

¹⁸ Kameaia mani Paulusi tuti amea amera we ametuambawa Yakobusi. Na nanai mano ewenunggamiei we jemati na nana fosa efanduhisa kontai.

¹⁹ Ametohong mahikai wesa ameru na amewaramia kai, mayeai Paulusi deiririai na mai wesa, kariri fifianai aino Seng Allai niariri kiai na inontarai Yahudi kaha fosa fo.

²⁰ Etaramididau Paulusi kaiwo medura foa kai fo, ea kiai efiai Seng Allai. Mayeai emadu we Paulusi aha eteyo, "Amene doroi bohine waune, Boitawanaifa weo inontarai Yahudi katui ahang kaha, eroaso Yesusi ampa. Ea kiai mani inontarai enemirorong

dohong we etohong kariri Kaiwo Musai soi fo na mai saine.

²¹ Wape na fui etaramio kaiwo wetarai kaha kariri wau. Etaramioaifa weo bounau inontarai Yahudi mano enai na nu Yahudi kaha fosa we etohong kariri Kaiwo Musai soi fo fanai, tuti enemituuaio bounausa we wiwo ewesunati ene arikang-fosa fanai, ete etohong kariri koangno Yahudi nei fanai.

²² Inontarai Yahudi eroassoai enai na nina nesa, todoni kontaio ambori etaramioai we bontai kawuru ma we nayai na ninaifa ne, tuti tarahio eteyo enari kanggani wau ki.

²³ Nana mani tatohong fiani e? Tonana mani, nari kariri amene aunaune, ambori ewaitawanai weo kaiwo etaramioai kariri wau nanai wiwo tarai kaha. Amani na ninai inontarai itowemana, itorohong kaiwo arerai we Sempaisi ampa.

²⁴ Ro riasa we mewenadi, we meruairurang mea, tuti bai weduasa na nemu doifea ambori etohong kariri ene kaiwo arerai etohoni nani na mai, tuti ambori metei menuimiwa. Ambori fi nari nanai deinawiai we inontarai Yahudi eroaso fosa kiai we kaiwo etaramioai kariri wau nanai wetarai kaha, tuti ewaitawanai weo wau kontai bohong kariri Kaiwo Musai soi fo.

²⁵ Mae kariri inontarai Yahudi kahaio eroaso Yesusia fosa mani, ametanatu kaiwo wesa kawuru ampa kariri kaiwo amehutuaia fo, weo wiwo etang fiangno ohonai we saminseni ete

aririwangfoi fanai, etang rika fanai, etang andowa munia mireha ne rika deda kaha foi fanai, tuti wiro emaninawa funoma fanai."

²⁶ Ampafe kameaia mani Paulusi da ria itowemanafo sitoru, awa enari ruhi nadio eruairuransa foi. Esuai Sempaisi ne Munufoi we eteikaririai we rahida beiru aha ambori nadio eruairuransa foi kiai tuti fiwai etohona fo etohonai ki.

Yahudifosa etafu Paulusi na Sempaisi ne Munufoi

²⁷ Rabuang bo rahida itu fo rerai we kai fo, inontarai Yahudi maneiru teai na Asia ewati Paulusi na Sempaisi ne Munufoi. Ainanaya eha weinontarai bitoya foi enemirongfoi, mayeai era wa erutawang Paulusi,

²⁸ mae esahu tuturi eteyo, "Inontarai Israeline meaine, memito ma mefata amea wo. Inontarai da mai katitaine kiai mae deunau kaiwasanei we eweaiteta we nu Israeli nei, Kaiwo Musai soi fo, tuti Sengnei ne Mununei, andinini! Na ninai doari aha kia inontarai Yahudi kaha manea esuai to Sempaisi ne Munufoi rorongfoi kontai aha fui, ampafe enariri werarika.*"

²⁹ (Emadu tonanai we antanafa ewati Trofimusi inontarai Efesusi foi da ria Paulusi na bendarifoi. I mani Yahudi kaha dine, tuti enemitituai we Paulusi kiari kawuru to Sempaisi ne Munu rorongfe afui fo, mae bireri.)

³⁰ Ampafe bendarifoi nikuayai sentenang tuti tatofang kutu nanai kontai kaiwasafrai mito ma fianduhi wari Paulusi. Etafuri efafari to boriei weru Sempaisi ne Munufoi. Na kutu nanai kontai ehafe Sempaisi ne Munufoi.

³¹ Kaiwasafosa erurai we emung Paulusi tonanai, mae inontarai manei mitoa deikaririai we afai Roma fosaene komandangfoi, weo bendaru Yerusalem sentenang nikuayai na kaiwasa etohona fosa.

³² Na kutu nanai kontai komandangfoi kia perwira maneiru teai tuti afai manea, era esahera to katai etohong nai foi. Kaiwasafosa ewati afai mamuna fosa nanai arahio efotou eboi Paulusi fo.

³³ Komandangfoi da wa tefu Paulusi tuti wiora tate warangfo suru ria afai mamuna mandu uwaramifo na wai besi. Mayeai dutang bera kaiwasafosa kariri Paulusi we i mani mandoni dine tuti fianaino niari sarawaifa fo.

³⁴ Manamo kaiwasa bitoya foi emadu boyari kaha, manea eteyo dohong sara fininai, manea aha eteyo dohong sara fiwanai. Ehobu tuti ene kaiwofoa komandangfoi urewara kerira, tuti sobu kaiwoariri mai kariri fi wedaya emung Paulusi wea fo kaha. Ampafe demi afai mamuna fosa we ehari to markasifoi aha.

³⁵ Na rabuang bo eha Paulusia sobu tehifoi fo, kaiwasa etohona fosa eto-

* **21:28** Kariri agama Yahudifosa, Yahudi kaha manei suai tono Sempaisi ne Munufoi mani, dohong Munufoi werarika.

hong mambiriu paria aha we emuni, ampare afaifosa esoduatia.

³⁶ Kaiwasa bitoya foi era ria Paulusi tuti afaifosa na ehurumifo mae ebibe eteyo, “Muni wiruai!”

Paulusi medu we kaiwasa bitoya foi kariri fi etinggairi wea fo

³⁷ Rerai we ete esuai to markasifoi afuifo Paulusi medu we komandangfoi deyo, “Daie, yeo imadu ria wau ararafanaifa.” Koman-dangfoi yoa wei aha deyo, “Boitawang modu kaiwo Yunani nei e?”

³⁸ Tonana mani wau ma wiro inontarai Mesiri di wau kaha fe. Yeitarahi wau mani inontarai Mesirio raminde nanai fianduhi inontarai ewepiaura wering webea (4.000) emainenang na fimamuna emamunara, mayeai kiisa ewawu to katai wemereha kaha foi.”

³⁹ Paulusi yoa aha deyo, “Yau mani inontarai Yahudi di yau, na bendari Tarsusi, bendario wewonong na nu Kilikia foi. Fata yau bohong rahida we yau we imadu we mano emamuna we yau fosa.”

⁴⁰ Ainanaya komandangfoi dohong rahida we medu, ampare Paulusi doari na tehifoi yuai warang we kiamang tawansa we enemboru. Ainanaya medu wesa na kaiwo Iberani.

22

¹ Medu deyo, “Dai tuti doroi bohine meaine. Metaramidi-dau kariri nehu kaiwo yeiai

fifianai aino metinggai yau wea ne.”

² Etaramio Paulusi we medu na ene kaiwo Iberani fenanai, fiei sawa mani yu na enumifo.

Ampafe Paulusifo medu pari wesara,

³ deyo, “Yau mani inontarai Yahudi di yau, itaubau nuhukamiei na bendari Tarsusi foi na nu Kilikia foi, wape ifiebai na Yerusalem ninai, tuti isobu aunau ria mantaunau fubao Gamalieli na mai kariri Kaiwo Musai soi dohonai we tane werengfesa foi. Ne tarai kariri mea na rahida bonini faini ninai, yau kontai enehurorong dohong we iruraifa paria, inari fi kariri mea ninai we Allai.”

⁴ Inontarai eraria Rang Weworu nanisa kiai, wiwing mang, itafusa imunsara emarareha, isoasa to aitamu rorong fo.

⁵ Imami fuba foi tuti Majelisi Agama fosa emaduairai we kaiwo yeoai ninai we itofa kaha. Weo ansaino etohong surati bei we yau we ikaria yeinawi we inontarai Yahudi na bendari Damsiki ne. Ambori na surati nani itafu inontarai eroaso Rang Weworu nani tuti ikasa to Yerusalem we esobu aiboi nayai.”

Paulusi medu kariri todoni Seng Yesusi sahui fo

⁶ “Rahida bo ira wa nanai, ira paria rerai we bendari Damsiki tete rahida rabuang, na tatofang kutu nanai sambewara bei na rorafaisi meu tibohawai wari yau.”

⁷ Itawai aweu iwatai na kahofa nuwowongfo, mayeai tarahuo raofui bei medu deyo, ‘Sauluse, Saulusi wo! We fiani e nari kanggani yau ninai?’

⁸ Ainanaya iroa wei aha yeyo, ‘Daie, mandoni di wau?’ Manamo medu we yau aha ma deyo, ‘Yau Yesusi inontarai Nazareti mano nari kanggani fi di yau.’

⁹ Inontarai era ria yau fosa ewati sambewarafoi, wape kaiwo raofuifoi medurai we yau foi, eserawawerahai.

¹⁰ Ainanaya yutang bariri aha yeyo, ‘Sengne waune, fianai aino inari ne?’ Sengnei yoa deyo, ‘Boabari wau tuti wuai to bendari Damsiki afui. Na wanai ambori wobu kaiwoariri kariri fikiaio Allai deyo nari fo.’

¹¹ Sambewarafoi dang kai urehu wedaya urehufafa, ampare nehu maniwowiri-fosa ebing yau amesuai to Damsiki.

¹² Na wanai inontarai maneiwonong fino Ananiasi. I mano dohong kariri Kaiwo Musai soi fo na mai tuti Yahudi fuba eminohi na nana fosa etatori paria.

¹³ Da ma suambawa yau, doari na enehung dowie medu deyo, ‘Sauluse, nehu doroi bohine waune. Fobai uremuwa boti aha!’ Na kutu nanai kontaio ifoai urehu iwatiaoai.

¹⁴ Mayeai medu we yau deyo, ‘Allai mano tane werengfosa esomi wei foi diri wau kawuru ampa ampare boitawang fi dawi wea fo tuti boti Yesusi Mano Mirarebana foi tuti taramuo te raofuifoi.

¹⁵ Wau ambori weinontaraio boiririai pampang we kaiwasanei kiai kariri fianai aino botioai tuti taramuoia fo.

¹⁶ Wiro bomang waroi ahang fanai, mae na kutu ninai kontaio baobari wau tuti webaptisi. Butang we Sempaisi ambori waraira nemu sasariwai na wonongfo.’

¹⁷ Yarabera yau to Yerusalem tuti na kutu iwenadi we Sempaisi na ne Munufoi nanai, Allai deinawi fi we yau.

¹⁸ Iwati Sempaisi medu we yau deyo, ‘Wukera ruai awemu weru Yerusalem, weo inontarai ninisa ambori emarira we etaramio kaiwo modu kariri yau wa fefe.’

¹⁹ Wape imadu aha yeyo, ‘Oh! Sengne waune, eroaso yau rai, weo ewaitawang kepanaifa weo isuai mai munu agama Yahudi fo we itafu inontarai eroaso wau fosa we irubasa tuti isoasa to aitamufoi.

²⁰ Tonanai kontai we rahida bo nemu woming Stefanusi emuni fo mani, yauo yoari na nanai, iroa we emunifo kontai. Nanai tera kaha mae yauno iwaitawang wedua mano emuni fosa ene ansungfo ne.’

²¹ Manamo Sengnei medu we yau aha ma deyo, ‘Modu riwana fanai mae roa, weo ambori yemi wau ro to katai waroi we Yahudi kaha fosa.’

Paulusi deikaririai we i mani Roma dine

²² Kaiwasafosa etaramididau Paulusi we medufo, wape paria kaiwo medurai wefuria fo, amani kariri de

da we Yahudi kaha fosa fo, ebibe na mambiriу eteyo, "Inontarai tonana nei mani muni wiruaia, wiro mei we minohi ureng barika ahang kaha!"

²³ Ebibe, ehafa ene an-sungfo towana tonina, tuti ehafung kangganangfoi ehafari to yai, weo ehasoua emarareha we Paulusi medu tonana fefe.

²⁴ Ampafe afai mamuna Roma fosa ene komandan-gfoi demi eha Paulusi to ene markasifoi, ambori etutang berahi na tapapa we ewaitawang fianai aino wedaya Yahudifosa etohong karerai wei nina.

²⁵ Wape na kutu ewora Paulusi we erubati na ene wai weababo fo, medu we perwirafoi deyo, "Tofino na tane hukumi Roma nei mani tarai kariri metohona ne, weo inontarai Roma maneи wiro metutang berahi kariri fi metinggairi wea fo kaharai mae meru aiboi soi e?"

²⁶ Perwirafoi tarao kaiwofe nanai, da we ene komandan-gfoia deyo, "Daie! Bohong todoni e nari toninai nina? Inontarai wani mani Roma dine!"

²⁷ Ampafe komandangfoi da wa dutang bera Paulusi deyo, "Boikarirai we yau, weo taraie wau mani Roma di wau e?" Paulusi yoа wei aha deyo, "Tarai inontarai Roma di yau."

²⁸ Komandangfoi medu wei aha deyo, "Oh! Raminde nanai ibai doi fuba paria akawuru wo iweinontarai Roma ki." Paulusi yoа wei aha deyo,

"Yo! Ayaranane, wape yau itaubau nuhukamiei weinontarai Roma. Nana mani wemambiriу sewa."

²⁹ Na kutu nani kontai afai mamuna ete etutang berahi fosa ene tarai toyario isang tuhing ufu doa na iareng. Komandangfoi kontai mitaia denteng kahai weo Paulusi Roma dine, mae anta demi ne afai mamuna fosa ewora funomi fefe.

Paulusi doa na Majelisi Agama fosa earomireafo

³⁰ Wape komandangfoi dohong weai paria we deitawang kariri fianai aino wedaya Yahudifosa etinggai Paulusi wei fo. Donio kameaia mani sahu imami baba fosa tuti Majelisi Agama fosa kiai we efanduhisa. Ainanaya afai mano ewaitawang wedua Paulusi fosa etisu wai besi foi weruri tuti ehari ma doa na earomireafo.

23

¹ Paulusi seite Majelisi Agama fosa, mayeai medu wesa deyo, "Doroi meaine. Paria rahida bonini na enehurorong ketui fuisi iwaitawanaifa weo Sengnei ne awiafo inari karirai na mai."

² Na kutu medu tonana ne, imami fuba Ananiasi demi mano doa rurang Paulusi foi bioikobu borong.

³ Ampafe Paulusi medu we imami fuba foi aha deyo, "Wau inontarai taparemu sobaurai weberu di wau. Allai ambori bioi wau ki, weo munohi na nanai binggai yau

kariri Musai Kaiwo soi fo, wape mantaung wauno bo-hong kariri Kaiwo nana kaha wa, mae bohong sarawaifa, amani bemi inontarai bioi yau."

⁴ Mano eminohi na nana fosa etei wei eteyo, "Eh! We fiani boi bera Allai ne imami fuba fininai?"

⁵ Paulusi yo aha deyo, "Oh! Doroi meaine, iseraw-erahai we i mani imami fuba dine. Tarai na Sengnei ne Kaiwone, rabuang bei dotu toninai:

'Dohonao meteibera mano ewenunggamiei we kaiwasanei fe.'*

⁶ Paulusi deitawanaifa weo mano eminohi na Majelisi Agama fosa nana mani, Saduki maneia tuti Farisi maneia. Ampafe medu wesa deyo, "Doroi meaine, yau mani Farisi di yau, nehu ririafo kontai na Farisi. Metinggai yau na nina ne, we iroasoifa weo inontarai emarareha fosa ambori esuwi aha ki."

⁷ Na kutu etaramioai we medu tonanane, Sadukifosa tuti Farisifosa esawasa pariao wiro eweboyari ahang kaha.

⁸ (Weo Sadukifosa eroasoifa weo wiro mansuwisuwi kahai, wewai bireri, tuti nuaninu bireri, wape Farisifosa eroaso ne tonanane kai.)

⁹ Ampafe etawisa fuba beyari. Farisi maneiru teao ewemantaunau Kaiwo Musai soi fosa etoabarisa etapa Sadukifosa eteyo, "We amea mani inontarai nini wiro niari sara fi kutea kahaia.

Tarahai anture nuaninu te, wewai te manei dino medu wei ne!"

¹⁰ Ehiwasa fuba beyari ampafe komandangfoi mitai dohonao eruhisa emung Paulusi fe. Ampafe demi ne afai mamuna fosa ehari weru katai nani to markasi-foi aha.

¹¹ Diru aha ma foi Seng Yesusi doa rurang Paulusi medu wei deyo, "Tawang enemurorongwaia mitu! Weo toyari modu kariri yau kawuru na Yerusalemampa, ambori modu kariri yau aha na bendari Roma foi kontai ki."

Yahudi maneia eteiruhi kaiwo we emung wora Paulusi

¹² Kameaia, inontarai Yahudi fosa maneia efanduhisa emadu ruhi kaiwo we emung wora Paulusi. Efafora beyari na Allai wonongne weo wiro etampi ete etunung mereha kaha pariao emuni akawuru wo.

¹³ Mano enari tonana nesa ewepiarua sea rai.

¹⁴ Era we imami baba fosa tuti mano ewewafoniai we Yahudi fosa, emadu eteyo, "Amefafora ruhiae ampa weo wiro ametampi kaha pariao amemung Paulusi akawuru wo.

¹⁵ Ampafe mea tuti mano meminohi na Majelisi Agama fosa mesoi kaiwo anatu feai we afai mamuna fosa ene komandangfoi, weo metutani kiari ma weo toyari meteo metutang berahi na mai aha. Nana mani da ma sobu mea kaharai mae amemainenang

kawuru na rang rabuang we amemunia."

¹⁶ Manamo Paulusi anomang tera manei tarao kaiwofo, ampafe da to markasifoia, deikaririai we Paulusi.

¹⁷ Ainanaya Paulusi sahu perwira manei ma deikaririai wei deyo, "Ka bariboa nini we komandan-gfoia, weo deyo deikariri fieai wei fefe."

¹⁸ Ampafe perwirafoi kia bariboaifoi we komandan-gfoi deyo, "Paulusi mano wiana aitamufoi sahu yau tuti dutang yau we ika bariboa nini we Dai wau ma, weo deyo deikariri fieai we wau."

¹⁹ Komandangfoi yu na bariboaifoi warangfo utabera siai we dutang berahi deyo, "Fianai aino boyo boikaririai we yau ne?"

²⁰ Bariboaifoi yoa wei aha deyo, "Yahudifosa emadu ruhi kaiwo kawurua weo etutang wau we aha kameai mani ka Paulusi we Majelisi Agama fosara, we toyari eteyo etutang berahi na mai aha.

²¹ Wape Daie, dohonao roa we ene kaiwofo fe, weo ewepiarua sea etamang na rang rabuang we etoapi ki. Ea kiai efafora na Allai wonongne weo wiro etampi ete etunung mereha kaha pariao emung Paulusi akawuru wo. Na ninai kontaio emainenang kawuru ampa, etamang terai we roao ene kaiwofo."

²² Komandangfoi deretawangwea fo, ampafe ikari to ene bariboaifoi deyo, "Oh, to-

nana mani tarahu kaiwo boyoai we yau fe ampa. Dohonao boikaririai funo-mai we manei ahang fe." Ainanaya demi bariboaifoi da wa.

Etanatu Paulusi we Gubernuri Feliksi to bendari Kaisarea

²³ Ainanaya komandangfoi sahu ne perwira mandu, medu we suru deyo, "Mu-mainenang afai mamuna manea we era tuti Paulusi to Kaisarea diru bonini kontai araha ureng indeata. Amani ewepiaura (200) esiru sondu, ewepiaura kontai eha wombua, tuti ewepiatorua sura (70) etaun na kuda.

²⁴ Mumainenang kuda kontai we Paulusi dau nai. Mehari na mai paria sobu Gubernuri Feliksi."

²⁵ Ainanaya komandangfoi soi surati bei amani dotu ton-inai:

²⁶ We inong Gubernuri Felikse wau, na Kaisarea,
Na yau komandang Kladius Lisiasi,

²⁷ Inontarai nini mani Yahudinesa etafuri kawuru ampa tuti kutea reti emunia weraimuna, manamo fiei deyo isahera tuti nehu afai mamuna nesa, nanai doni weinontarai ninai, weo tarahuai we i mani Roma dine fefe.

²⁸ Enehurorongnei dohong weai paria we yeitawang kariri fianai aino etinggairi Majelisi Agama fosara.

²⁹ Manamo awa mani wiro dohong sarafiea kariri tane hukumi Roma ne kahai weo sodai aiboi marareha fo ete we eru aitamuoi. Fi etinggairi wea fo mani reng we ene Kaiwo Musai soi fo terai.

³⁰ Mayeai tarahuoi we eteiruhi kaiwo we emung worai. Ampafe doni isahera yenatui we Dai Gubernuri wau mau ninai. Kontai na ninai yemi mano etinggairi fosa we eha ene kaiwo etinggairi wea fo we wau mau.

Nehu kaiwone werea tonanai.

Mahikaifeai.

³¹ Ampafe afai mamuna fosa etohong kariri kaiwo komandangfoi deyoa fo. Diru nani kontaio eha Paulusi paria sobu bendari Antipatrisi.

³² Na Antipatrisi kameaia mani etawing mano etaun na kuda fosa era tuti Paulusi paria, mae ne fiau era na eawemi fosa etaraberasa to markasifoi aha.

³³ Mano era tutu Paulusi na kuda fosa era paria sobu Kaisareara arau, eha kaiwo anatu fo we gubernurifo, tuti etohong Paulusi kontai weia.

³⁴ Gubernurifo deto kaiwo anatu foa kaia, mayeai dutang bera Paulusi we i mani na nu bodoni. Paulusi deikaririai we i mani na nu Kilikia foi,

³⁵ ampafe medu wei deyo, "Yo! Rahida bo mano etinggai wau fosa era ma sobu ninaifa, ambori ikutu kaiwone ki." Ainanaya demisa eha Paulusi to munu Mananu

Herodesia we ewaitawani nayai.

24

*Yahudifosa etinggai
Paulusi na Gubernuri Feliksi
arongreafa*

¹ Rahida ring aha mani imami fuba Ananiasi tuti mano ewenunggamie i we Yahudi fosa ebia to Kaisarea arau. Eha inontarai sewai na hukumi Roma foi manei, wonong fino Tertulusi, ebaiti we medu tuti ene kaiwofo. Era to gubernurifoia we etinggai Paulusi.

² Ampafe eha Paulusi ma, ainanaya Tertulusi doari ayai medu we Feliksi deyo, "Inongwa Dai Gubernure, ru wang gubernurife waroi maua, donio ameminohi na mai wiro amesobu dadirafea kaha, weo Dai wau wewai paria. Tuti nari fiaworu bitoya ampafe Yahudine amea amene nunei denteng pari aha.

³ Ne nanai kiai na doni kontaio ametato wau, ametohong mahikaifeai pampang.

⁴ Wape ambori wiro nemu rahidane kai funoma kaha mani, todoni mani taramuo amene kaiwo fininai, amene kaiwone werea arora.

⁵ Inontarai nini kerira paria, na doni kontai amesobui we wedaya mamuna bitoya ria Yahudinesa tuti i wenunggamie i kontai we mano etaun we inontarai Nazareti foi ne aunaufu.

⁶ I kontai niari fi werarika we Allai ne Munufoi kawuru ampa, ampafe ametafuri.

[Amenemirorong we amehutu kaiwo kariri Kaiwo Musai soi we amea fo,

⁷ wape komandanio Lisiasi sikahera kiari weru amea na tapapa, tuti demi amea amera we wau ma.]*

⁸ Ampafe mantaung wau butang berahi mani ambori taramuoifa wetarai kariri kaiwo fuba ametinggairi weai ninai ki."

⁹ Yahudi fuba eminohi na nana fosa kontaio eroa tuba kaiwo Tertulusi medura fo.

Paulusi meduai kariri fi Yahudifosa etinggairi wea fo

¹⁰ Mayeai gubernurifoi urekamang Paulusi we medu. Ampafe medu deyo, "Iwaitawañaifa weo Dai wau mani inontarai kutu kaiwo na nu Yahudi nei waroi ampa. Aiwedaya mani ifaraise paria we yoa na aromureane we imaduai kariri kaiwo etinggai yau weai ninai.

¹¹ Dai mantaung wau ambori wera weai we boitawang kaririai ki, weo wiro rahidafeai waroi kaharai, arahio rahida suraya boru da wa wanai, amani ira to Yerusalem we iwenadi nayai.

¹² Amani wiro Yahudinesa esobu yau we imamuna we manei na Sempaisi ne Munufoi ete ifanduhi kaiwasa we amehuayai ametohonai na munu agama fo ete na katai siai na bendarifoi kaha.

¹³ Ea kontai wiro ebiriu we etohong fiainawiafea we Dai

wau kariri fi etinggai yau weai nina kaha.

¹⁴ Imadu tarainei weo isomi we Allai mano amene werengfosa esomi wei foi, amani kariri Rang Weworu esahuai we wetarai kaha fo. Wape yau kontaio iroaso Kaiwoariri fubao Musai tuti nabifesa esoi kiai foi.

¹⁵ Ne tarai toyari ea ninai, yau kontai enehutawanai we Allai weo kaiwasa fuba mireha nei kiai, mano ebeng fosa tuti mano eharira fosa, ambori esuwi aha ki.

¹⁶ Nanai wedaya mani, irurai pampang na mai ambori enehurorong ketui fuisi mirebanai we Allai tuti inontaraine kiai.

¹⁷ Tuti yari wariai defuina beiru teaia, ampafe yarabera yau to Yerusalem aha, ika doi fata fo we nehu inontarai Yahudi na nana fosa, mano ene parifi fosa, tuti we yohong korbani we Seng Allai na ne Munufoi kariri Kaiwo Musai soi fo.

¹⁸ Rahida bo ewati yau na Sempaisi ne Munufoi we inari finana fo mani, iruai yaua imararebanai kawurua kariri Kaiwo Musai soi fo ampa. Kontai manea efau etoari na nanai ria yau kaha tuti iwedaya moroafeai na nana kaha.

¹⁹ Mae rahida bonani na nanai Yahudi maneiru teai na nu Asia foi etinggai yau. Tarai yohong sara fiaeifa mani, inontarai nani saino todoni mani rahida bonini faini etinggai yau na Dai aromureane reto.

* **24:7** Ne tarai toyari kaiwo na 8:38, amani fafongfa manei soi kariri Sengne ne Kaiwone amani kaiwo rabuang ninai mantauni dohonai we kaiwo ming tuarai.

²⁰ Ete bento mae mano ninisa emadu kariri fi kerira fi anि dino esobuai na yau we inari ne na rahida bo Majelisi Agama fesa ehutu kaiwo fe-nanai fa ne.

²¹ Tarahi fi esobu teraifa mani kaiwo rabuang beyario imadurai fa wesa yeyo, ‘Mettinggai yau ma yoari na ni-naifa ne, weo iroasoifa we inontarai emarareha ne ambori esuwi aha ki.’”

²² Feliksi wiyo yoaso Yesusi kaha, wape deitawang kepang Seng Yesusi ne Rang Weworu foi, ampafe tarao Paulusi medu tonanane kife kaiwofo deyo, “Metamang-nao komandanli Lisiasi da ma akawuru wo ikutu kaiwone ki.”

²³ Ainanaya demi perwirafoi kia Paulusi aha we deitawang weduari, wape dohong rahida wei kontai we ne maniwowirifosa era ma etuambawari tuti efatari.

Paulusi deiriri kariri Yesusi we Feliksi bineng Dursilai uru

²⁴ Rahida beiru teai aha, Feliksi binengno Dursilai, i mani wiwing Yahudi dine, ura to kataifoi aha ma. Feliksi demi we Paulusia ehari ma doa na uaromireafo tuti utaramididauwi medu kariri todoni taroaso Yesus Kristusi fo.

²⁵ Wape rabuang bo Paulusi medu kariri todoni taenemirorong mesi na Seng Allai urengreafo, tatawang tata weru fi mai kaha fo, tuti aibooi we mano enari fikarira fosa ambori esodairai na rahida Sengnei daraberahi nai aha ma foi nana ne, Feliksi mitai paria

ampafe medu wei deyo, “Oh! Nemuboru mainanaya mae barabera wau aha wo, kio nehu rahida aha wori isahu wau aha ki.”

²⁶ Kontai na nanai enetawanai paria we Paulusi biaiti na doifeai ambo sawini da. Ampafe demi we ehari pampang ma weo medu riati.

²⁷ Wape we defuina boru aha, Perkius Festusi yiwang Feliksi weo wegubernuri na nanai. Tuti Feliksi deyo kia we Yahudifosa enemirorong-foi, ampafe sua Paulusi niai pampang na munu aitamu foi.

25

Paulusi medu we kia ne kaiwofo dautai to Kaisari

¹ Na rahida bo gubernuri Festusi si aweng so bendari Kaisarea foi, rahida botoru aha mani dautai to Yerusalem arei.

² Na nanai imami baba fosa tuti mano ewewafonia we Yahudi fosa, eha kaiwo etinggai Paulusi wea fo wei aha.

³ Etutani paria we dohonsa enemirorong mirising, amani demi we Paulusi we ehari to Yerusalem ma. Etutani tonana weo na mamunggasai emainenang we emung worai na rang rabuang.

⁴ Manamo yo wesa aha deyo, “Wape i eru aitamuoi na Kaisarea tuti yau kontaio katu mani yarabera yau to wanai aha.

⁵ Ampafe dohong sarafieai fa mani, ne mahikai mani metemi mene mano ewewafonia wasa era ria yau

to wanaia weo etinggairi nayai."

⁶ Festusi ne rahida sura teai na Yerusalem mayeai daraberahi bia to Kaisarea aha. Kameaia mani deyo kiutu kaiwofo ampare dema eha Paulusi to arongreafoa.

⁷ Na kutu ureng kawari-ao sa fo, Yahudio era na Yerusalem ma fosa esoru wariri, mae etinggairi we fi maraba paria. Wape fi etinggairi weai nanai wiro etohong fiainawiafeai we deinawiai we kaiwo tarai kaha.

⁸ Ampafe Paulusi medu kariri fi etinggairi wea fo deyo, "Wiro yohong sarafieai we Yahudi amene Kaiwo Musai soi fo ete we Allai ne Munufoi ete we Mananu Kaisari kaha, mae etinggai funong yau."

⁹ Wape Festusi de kia we Yahudifosa enimirorongfoi, ampare medu we Paulusi aha deyo, "Maya we ro to Yerusalemia we ikutu nemu kaiwone naya ne?"

¹⁰ Paulusi yo a wei aha deyo, "Bereri kontai! Na Mananu Roma foi wonongfo na katai nini kontai kutu kaiwo Yahudifesa etinggai yau wea ne. Weo boitawanai ampa weo wiro yohong sarafieai we Yahudinesa kaha.

¹¹ Mae taraie inari sarafieai kariri eteyeoafu we isobu aiboi marareha fo mani imainenang we imereha kaririai. Wape etinggai yau funoma mani, mantei kontaio wiro biriw we dohong yau wesa kaha. Ampafe

todoni kontaio yutanaifa we yautai to Kaisari Roma foi we kiutu nehu kaiwone nayai."

¹² Ainanaya Festusi medu ria ne mano efatai we etohong kaiwo aunau wei fosara, mayeai medu wei aha deyo, "Butang we ka nemu kaiwone to Kaisari, ampare todoni kontaio ro we Kaisari rai."

Paulusi doa na Mananu Agripai tuti Bernikei uaromireafo

¹³ Rahida beiru teai aha mani, Mananu Agripai tuti Bernikei ura na wang mananu fo we uwati Festusi.

¹⁴ Une rahida beiru na nana fo, ampare Festusi deikaririai we suru kontai kariri Paulusi we Yahudifosa etinggairifo. Medu deyo, "Na ninai inontarai manei wiana munu aitamu foi na raminde Feliksi wegubernurifa paria iriwani aha ninai.

¹⁵ Rahida bo ira to Yerusalemia foi fo, imami baba fosa tuti mano ewewafonai we Yahudi fosa, eha ene kaiwo etinggairi fo we yau ma tuti eteyeo yohong aiboifeai wei.

¹⁶ Manamo imadu wesa aha yevo, 'Yo! Wape na hukumi Roma nei mani, inggai manei we dohong sarafieai, wiro ohoni tono ne aitetafosa ewarami rorong fo funoma kaha, mae i tuti mano etinggairi fosa emadu weai na mano ehutu kaiwo fosa akawuru wo.'

¹⁷ Ampafe rahida bo era ma foi, wiro yemang aha kaha, mae kameaia mani ifanduhisa tuti yemi we

Paulusia ehari ma doari na arohureane.

¹⁸ Na kutu Yahudifesa emadu kariri kaiwo etinggairi wea foa kai fo, yeitarahio etinggairi we fi sarawa feai, manamo bireri.

¹⁹ Mae fi etinggairi wea fo mani kariri ene agamafoi tuti kariri inontarai mano wonongno Yesusi foi. Yesusi nini mireha ampa, wape Paulusi nunggamiei mitubaru beyari we suwi ahangfa.

²⁰ Iseraweraha weo todoni wori isobu kaiwoariri kariri fi etinggairi wea fo ki, ampare yutang berahi aha yeyo, miaya wori da to Yerusalem we ikutu ne kaiwofo nayai.

²¹ Wape Paulusi kiming nung beyari, dutang we kia ne kaiwofo dau we dadaifo aha, demang we Mananu Kaisari kiutu kaiwofo. Donio yemi afai mamuna fosa ehurumi na munu aitamu foi, paria isobu rahida we yenatui to Kaisari."

²² Ainanaya Agripai yoa we Festusi deyo, "Yau kontai ye tarahuoi." Festusi yoa aha deyo, "Mahikai, tonana mani aha wori taramuoiki."

²³ Kameaia mani etadung Agripai tuti Bernikei suru kariri wang mananu fo ma, usuai to munu emadu nai foi ria afai mamunao baba fosa tuti mano ewewafoniai na bendari fosa. Mayeai Festusi demia we eha Paulusi ma.

²⁴ Ainanaya Festusi doari ayai medu deyo, "Mananu Agripa wau, tuti nehu inontarai bohine mea kiai. Yahudinesa kiai na mano na Yerusalem fosa tuti

na Kaisarea nesa etinggai inontarai nini we yau ma, tuti etawiai pampang, ebibe eteyo mei we minohi ureng barika kaha.

²⁵ Wape wiro isobu fi dohong sarawai kutea kahai we sobu aiboi marareha fo. Tuti mantauni dawiai we kia ne kaiwone dau to Kaisari, ampare iroa kontai kawuru ampa we yenatui to wanaia.

²⁶ Wape wiro isobu kaiwo mai feai kariri fi etinggairi weai ninai we isoi kaririai ambori yenatuai tutiri tono Kaisari kaha. Aiwedaya ikari to mearomireafe ma ninai. Enehutawang mea paria, reantenang mani we Mananu Dai Agripa wau, weo rahida bonini ambori isobu kaiwo mai feai kariri inontarai nini na ne kaiwo etinggairi wea ne ki.

²⁷ Weo enehutituaitaifa weo anatu funong inontarai ru aitamuoi manei awiai, wape wiro oi kariri fi dohong sarawa fo kaha, nana mani beng kaha."

26

Paulusi medu kariri kaiwo etinggai wea fo na Agripai arongreafe

¹ Ainanaya Agripai medu we Paulusi deyo, "Bento, modu kariri fi etinggai wau wea wa." Ampafe Paulusi yuai warang we dohong mahikai wesa mayeai deyo,

² "Inongwa Mananu Agripae. Enehutituai isobu mai paria we rahida bonini

imadu kariri fi kiaio Yahudifosa etinggai yau wea ne na aromureafe ne,

³ reantenang mani weo wau boitawang kepanai na mai kariri Yahudinesa ene koangwausi tuti kaiwoariri etohona fo. Ampafe enehutawanaifa, tawang wau we taramudidau saua nehu kaiwone.

⁴ Yahudinesa kiai ewaitawanaifa na mai kariri fifianai aino raminde iwebariboi kaharai mae inari, reantenang na nehu katai itaubau nuhukamiae naya fo, paria inai rahansa na Yerusalem.

⁵ Wiro arahio iwaworu wesa nina kaha. Tarahio emaya fea reti, ea kontai emadu kariri yau, weo na reantenangfo yau mani Farisi di yau. Farisinesa mani enemirorong dohong we enari kariri Kaiwo Musai soi fo na mai paria, sewa mano siai fosa. Yau kontai tonana.

⁶ Kontai rahida bonini yoa na mearamireafe ninai, tutira fino iroaso kaiwo Allai dererai kawuru we amene werengfia foi.

⁷ Ne kaiwo dererai nanai kontai aino inontarai Israeli rabuangno suraya boru foi kiai etamang weai, diru rahida erurai we enarifi we Seng Allai pampang ninai. Dai mananune waune, kaiwo dererai nanai iroasoai kontai, aiwedaya Yahudinesa etinggai yau nayai ninai.

⁸ Wape we fiani Yahudine wiro meroasoai we Allai duwi inontarai emarareha fesa kahai ninai?

⁹ Raminde nanai mantaung yau kontai enehurorong tonanai we irurai we inari fifiani kontai we inari kanggani Yesusi inontarai Nazareti foi wonongfo.

¹⁰ Ne nanai kontai aino raminde inari na bendari Yerusalem ne. Rahida bo isobu surati yoasoai bei ria imami baba fosa foi, isoa kaiwasa eraria Yesusi fo bitoya paria. Nanai tera kaha, mae rahida ehutu kaiwo we esobu aiboi marareha fo mani, yau kontai iroa weai.

¹¹ Na munu agama Yahudi bong fo kontai inari kangganisa bitoya paria tuti yawisa weo etawing ene eroasoafu tuti eteibera Yesusi. Ene-hurorongnei wiuwu paria ampafe nuhuaisa to bendari siai na nu siai kontai."

Paulusi kiorang kariri todoni Seng Allai sahui fo

¹² Paulusi medu pampang, deyo, "Dai mananune waune, enehurorong nani wedaya ika surati yoasoai bei na imami baba fosa na ene mambiriufu we ira to bendari Damsiki.

¹³ Ampafe na nehu rang rong fo tete rahida rabuang, iwati sambewara bei na rorafaisi meu wape sambewarai nani fiabai sewa wofaisi, tibohawai wari yau tuti mano era ria yau fosa.

¹⁴ Ametau kiai aweu amewatai na kahofa nu-wowongfo, mayeai raoefui bei medu we yau na kaiwo Iberani meu deyo, 'Sauluse, Saulusi wo! We fiani e nari kanggani yau ninai? Boiaya nehu kaiwo iwiwang wau

nai ne mani, ambori maraba we wau.'

¹⁵ Ampafe yutani aha yeyo, 'Daie! Mandoni di wau?' Sengnei yoa we yau aha ma deyo, 'Yau Yesusi mano nari kanggani fi di yau.

¹⁶ Wape yeyo boabari wawa boa tiraifa, weo rahida bonini yeinawi yau we waune mani, yeo iruai wau wewomung we yau ambori boiriri kariri fianai aino rahida bonini botioaifa kariri yaune tuti kairiri fifianai aino ambori yeinawiai ahang fo.

¹⁷ Yau yerara wau weru nu Israeli nei sentenang, tuti weru inontarai Yahudi kaha fosa na nu siai fo. Yemi wau ro wesa.

¹⁸ Ro wesa weo fobai euremifo, amani kasa weru mantitifo to sambewarane ma, tuti nano Saminseni ne mambiriufo tono Allai wararorongne aha, ambori eroaso yau, tuti Allai waraira ene sasarifo tuti yuaisa we ne inontarai.'

Paulusi kiorang karirifi yu fo

¹⁹ "Ampafe Mananu Agripa waune, irurai paria we inari kariri fi iwatioai ria Sempaisi nanai na mai we beyari.

²⁰ Imadurai we kaiwasanei kiai we todoni kontaio etaraberasa weru ene sasarifoi, era we Allai aha ma tuti eteinawiaifa na eminohi toa wau weo anture etaraberasa weru ene sasarifi ampa. Kaiwo ninai imadurai reantenang na bendari Damsiki mayeai na bendari Yerusalemti tuti na nu Yudea foi sentenang,

we Yahudifosa tuti we Yahudi kaha fosa na nu siai fo kontai.

²¹ Nanai aino wedaya Yahudinesa etafu yau na Sempaisi ne Munufoi, tuti erurai we emung yaua imereha.

²² Wape paria rahida bonini Seng Allai sawing warang we yau kaha, mae derara yau pampang, donio yoari na ninaifa imadu kaririae we kaiwasanei kiai, inontarai fuba tuti inontarai katui. Fianai aino imadurai ninai wiwo kaiwo siai fea kaha, mae Kaiwo nabifosa tuti Musai emadurai kawrua fo aine,

²³ amani Mananu Mampariri Allai dereria foi, todoni kontaio sodai dadira ria inontaraine tata, mireha tuti andino wereantenang pari suwi na marareha rorong foi ne, ambori na ne mambiriunai, kia sambewarafo we Yahudine tata tuti Yahudi kaha fosa, amani feriri tata."

²⁴ Paulusi kiorang kariri fi niari fo paria mai nana fo, Festusi bibe mambiriwei deyo, "Wefiauwo ampa! Au nau fuba wobui nani kiai do-hong wauwa wouwou!"

²⁵ Wape Paulusi yoa wei aha deyo, "Inongwa Dai Festuse! Wiwo iwefiauwou kaha, kaiwo imadurai ninai tarai, tuti wiwo dadira kaha.

²⁶ Mananu Agripai kontai deitawang kaiwo imadurai ninai na mai, donio imatai we imadu worawa kaha mae imadu parai na arongreafe ninai. Iroasoai we Mananu Agripai wiwo sera we wea kaha, weo fi imaduri nini kiai wiwo fi dadiwa fea kaha, mae

fi kaiwasa bitoya ewati para fine.

²⁷ Mananune waune roaso kaiwo nabifesa emadurai ni-naifa ete bireri e? Yeitawanai roasoifa.

²⁸ Ainanaya Agripai dei wei aha deyo, "Boitarahio mawa arora we wau wedaya yau weo iweKristeni ahera toninane ne?"

²⁹ Manamo Paulusi yoai wei aha deyo, "Ahera ete waroi ete, iwenadi we Allai ambori Mananune wau tuti Dai mea kiai, mano rahida bonini metarami yau we imadu feninai, ambori mene tarai kariri yau ki, tarahio aitamu isodairi nini."

³⁰ Ainanaya Mananu Agripai, gubernuri tuti Bernikei kontai kaiwasa fuba fianduhi na nana foi kiai etoabarisa era to borieia.

³¹ Etoari na borieifo emadu wawerasa eteyo, "Inontarai nini wiro dohong sarafieai we sodai aiboi marareha fo ete we ru aitamuoi."

³² Ainanaya Agripai medu we Festusi deyo, "Inontarainei dawi we kia ne kaiwone to Kaisari, bireri fea reti rahida bonini kontaio da to boriei weru munu aitamu nei."

27

Paulusi dontai to Roma

¹ Emaduraia futuayai we ametafai to Italiafo, etohong Paulusi tuti mano siaio ewatai na aitamu rorong fosa, etohonsa to perwira Yuliusi mano wenunggamiei we afai mamuna rabuangno esahui we ewonomi fino Afai

Mamuna Kaisari fosa warang rorong fo we deitawansa.

² Ainanaya ametau kapari rowei, mayeai ametafai. Kapari nani defai na bendari Adramitium ma, tuti de defai soa maino bendari watai na nu Asia foi. Aristarkusi dontai ria amea * kontai, i mani inontarai Makedonia dine na bendari Tesalonika.

³ Diru nania kameai mani amesoa na bendari Sidoni. Yuliusi niari sua Paulusi na mai paria, ampafe dohong rahida wei we da wa suambawa ne maniwowirifosa na nanai, ambori efatai na finai aino enerorongfoi dohong weai we sobua fo.

⁴ Na nanai ametauoi ametafai pari, wape wanang kiobu amene wa fongfo, ampafe amehutu rurang nu Siprusi eneung to rei taha foi.

⁵ Mayeai ametubapa nufoi, amewerurangno rawanang nu Kilikia foi tuti Pamfilia foi uaromi weai mandau fo, paria amesoa na bendari Mira na nu Likia foi.

⁶ Na nanai perwirafoi sobu kapari rowei defai na Aleksandria ma, de defai to nu Italia. Ampafe kia amea to kapari nani aha.

⁷ Amewerurang kataifoi manamo amesahera kaha, paria rahida beiru teai arahi amesobu bendari Kinidusi. Wape wanangfoi wiro mering na wea kaha, ampafe wiro ametafai mimoya kariri ametafai wea fo kaha, mae amefoberhai bau nu Kreta foi rea do wanansai foi arau. Ametari urefang Salmone we

* ^{27:2} Lukasi mano soi kaiwone dong kontai.

ambori wedua amea weru wanangfoi.

⁸ Wanangfoi ming ameara amebeng kahai wari ure-fangfoi, paria mayeai amesoan na katai bei wonong fino *Raing Mahikai*, kataifoi kefang we bendari Lasea.

⁹ Rabuang bonani mani amene rahida bitoya naia, paria rahida Yahudifesa ewepuasa nai fi da wa, amafe rahida we ametafai na mai ne mani bireri ampa. Nanai wedaya Paulusi deunausa deyo,

¹⁰ "Doroi bohine meaine. Enehutituitaitai we meteo tatafai pari, wape nana mani ambori tawao ne karirafo, amani kaparinei, fianggeng tahari nei, tuti inontaraine tata kontai."

¹¹ Wape perwirafoi taraoi kaha, mae tarao te kapteni tuti mano ne kaparifoi fo.

¹² Kaiwasa na kaparifoi bitoya eroa kontai we ametafai weru kataifoi, weo nafareng amesoan nayai nanai wiros denteng we danunanangfo ne diru neungfo mani kaparifoi dewohi mimoya naya kaha. Ampafe enemitawanai we ametafai ahera wa amesoan na bendari Feniksi, ambori amenai nai pariao rabuang bo danunanangfoi ne diru neungfo kai. Feniksi mani katai weraing na nu Kreta foi dine, katai denteng we deduka mani kapari dewohi nai, kataio wiata miara to do wanangfui foi.

Dedukai ming kaparifoi

¹³ Rahida bonani wanansai marirahi bia. Ampafe mano kapari fosa ewaitarahio maringfoi wiwiainsa we etafai finanai. Ampafe esahera erabi kamutufoi, mayeai ametafai amewerurang nafareng Kreta foia.

¹⁴ Wape ametafai tourai, mayeai mani dedukai wanang murang siai na amenemiung dorei nei,

¹⁵ amafe tebao kaparinei, ming kaparineia denteng kaha. Kaparifoi wiros mambiri we dapa wanangfoi ahang kaha, amafe ametawing amea wanangfoi kia te ameara.

¹⁶ Ametadaria tete nu katui bei, wonong fino Kauda, mandau, amafe wedua amea kuteai. Na nanai fiatasa kuteai we erabi wa anduai fo to kaparifoi awiai.

¹⁷ Erabiai awiai, mae kaparifoi mantauni kontai efautawania mitubaru na wai. Kontai ematai dohonao saya amea na sayari pinangno wiatai kefang we rawanang Libia foi fe, amafe etisu arawingfo to kofa mae wanangfoi kia te ameara.

¹⁸ Wanangfoi bia pampang tuti andeisafoi ming kaparifoi pampang amafe kameaia mani, fianggeng kaparifoi esoari to rawanangfoi finanaya.

¹⁹ Rahida sua aha foi, wanangfoi siai mambiri aha, amafe mano eru fi na kapari fosa esoan nari fianggeng amehari foi wei aha.

²⁰ Rahida beiru pam-pangna fo, wiro amewati sobu wofaisi tuti awaha kutu bei aha kaha. Wanangfoi wiro finahang na weai aha kaha, mae biriu pampang na diru rahida, donio dohong amea pariao amenemiro-rong fituayai we amesobu maine mani bireria.

²¹ Rahida beirua fo wiro etampi kaha, ampare Paulusi da wa doa rahansa, medu wesa deyo, "Doroi meaine. Raminde metaramio nehu aunaune ne, wiro tatafai weru Kreta kaha reti, tasodai karira toninane kahai ki.

²² Wape yeunau mea we dohonao mematai fe. Weo mea kiai wiro manei kontaio niai kaha, mae kaparinei terai.

²³ Weo diruafa Allai mano ne yau nei tuti isomi wei nei, ne wewai manei da ma doari ria yau.

²⁴ Medu we yau deyo, 'Pauluse, mutai fanai. Weo boari na Kaisari arongreafo we kiutu kaiwo we wau rai. Tuti na Sempaisi ne enewawufo, yoa we nemu nadiwai, ampare kaiwasa fuba metafai ruhiae ninisa ambori manei niai kaha, mae ekaharai weru ne karirao ki.'

²⁵ Ampafe mematai fanai mae menemitawanai, weo iroaso Allai, we fianai aino medura ne wiro sofa kaha, mae ambori finanai kaririae ki.

²⁶ Wape wanangnei ambori kia tatarao sotaba tata na nu bei ki."

²⁷ Diru bo suraya boa foia mani, wanangfoi so

amea na rawanang Adria foi towana toninai. Rerai we diru rabuung mani inontarai erufi na kapari fosa enumiru-ainsoai we kaparifoi rerai we reifo.

²⁸ Ampafe etu maraing bei aweu we etitua kariri rawanangfoi berorongfo. Etituara mani berorongfo rerai meteri piaru. Touraia etitua aha mani berorongfo rerai we meteri piarea surawa.

²⁹ Ematai we dohonao kaparifoi defai ubahai na kamirang fe, ampare etu kamutu boa na kapari fui fo, mae enemitaowanai we kadono ahafoi sikera kameai.

³⁰ Mano erufi na kapari fosa enari we efononansa weru kaparifoi, ampare etu wa anduai fo aweu, mae enari anggari we ete etu kamutu na kapari fongfo aha.

³¹ Wape Paulusi medu we perwirafoi tuti afa mamuna fosa deyo, "Mano erufi na kaparife ninisa, enayai na kaparinei kaha mani, mea kiai ambori menai ki."

³² Ampafe afa mamuna fosa etoaria eferang kutu wai anduai foi, tuti anduaifoi dedaria.

³³ Wiro ahafoi tibau kaharai mae, Paulusi dutansa we etampi, deyo, "Rahida suraya boa mau fininai, wiro metang fiea kaha, mae metamang terai na menemirorong weansarai paria.

³⁴ Ampafe yeyo, ambori meweinontarai mani wepararu metampi kuteai.

Mematai fanai weo mane wau kontai wiro numurandaung kutu bei niai kaha rai."

³⁵ Medua kai tonanafo, kia rotifo wenadi tutirai we Al-lai na earomireafo, ainanaya fiobabau rotifoa tuti dang.

³⁶ Ampafe ea kiai enemirong wemambiriу aha tuti etampi kontai.

³⁷ Kaiwasa fuba na kaparifoi amewepiaurawa piatorua sura suraya wonang (276).

³⁸ Ametampi pariao amemamosi, mayeai ehabi patibu amehari na kaparifoi to rawanangfoi, ambori kaparifoi seayai.

Kaparifoi sayari

³⁹ Ahafoi fiorarisia mani, inontarai kapari fosa ewati arei reifo, ewati raing bei tuti ne nafafoi deuroi, wape ewaitawana kahai we katai bodoni dine. Ampafe enemirong we etafai arei we saya kaparifoi na nanai.

⁴⁰ Ainanaya eferang kutu wai kamutu fo daisui to kofara, kontai etisu wai ewora tawang ne bo irua foi nai foi, mayeai eruai arawingfoi na kapari fongfo we defai kaparifoi to nafarengfo arei.

⁴¹ Manamo kaparifoi defai tourai arei, mayeai fongfoi sayaria pepayai na nafa wiatai arau, mae fuifoi andeisa biohaia wenukahai beyari.

⁴² Afai mamuna fosa enemitituaitai we emung mano eru aitamusa fosa, weo ematai dohonao manei deriai arei nafarengfo wewu fe.

⁴³ Manamo perwirafoi suasa, enerorong we ambori Paulusi sodai mararehafo konta fanai. Ainanaya demi mano eteri naria fosa erobusa eterifafong to rei.

⁴⁴ Mae mano eteri rirewa fosa erutawang na wonggang abirarungno kaparifoi, we eteri nai to rei kontai. Na rang tonanane amea kiai amesobu reifo na mai.

28

Paulusi na nu Maltafoi

¹ Ameteri arei ametoari kai na reifo, arahio amewaitawanai we nu ametoari nai nani mani wonong fino Maltai.

² Kaiwasa na nu nanisa, etohonsua amea fo mahikai pari beyari. Etamang we amea na mai tuti enari adia we amea we ameharuruai, weo metangfoi ming, tuti kataifoi denunanang paria.

³ Paulusi da kehafung ruhi aimasa we dohonai to adiafoi arau we ameharuruai. Niari tonanayao adiafoi data karerai ampafe tawai memuna manei dariai na kutu siari nanai mandiei kiria mutu na Paulusi warangfoi.

⁴ Na kutuo kaiwasa nu fosa ewatioai we tawaifi sawai na Paulusi warangfi nana fo, emadu wawerasa eteyo, "Inontarai nini, tarahi weming inontarai dine, donio kiahrai weru dedukarausi to rei mandei, wape tane seng mano kiutu kaiwo na mai nei sawini kaha, mae demi tawainei kirifi, ambori mireha."

⁵ Wape Paulusi kifasaya tawaifoi weru warangfoi to

adia rorong fo arau, mae mantauni wiro niuruainso pirahai kutea kahaia.

⁶ Kaiwasa nu fosa enemiti-tuitai we katu wori warang-foi bebara tuti mireha sau tantuma. Wape etamangna manamo wiro sodai kari-rafea kaha, ampare enemiti-tuitai aha eteyo tarahi i mani seng dine.

⁷ Inontarai fiebai na nu-foi wonong fino Publius, ne kahofafeai wiatai kefang na nanai. Na enerorong denteng wenoti ameara ameminohi riati rahida botoru.

⁸ Rabuang bonani mani tamang wia na fatafoi terai we ne tarai meninggapoi tuti amasori. Paulusi da wa wenadi wei, yuai warangfoa wa saui ampare denteng.

⁹ Fi Paulusi niari we mano meninang finani, wedaya kaiwasa fuba meninang na nu foi era we Paulusi ma tuti niarisa ebeng.

¹⁰ Kaiwasa nanisa etato amea paria tuti etohong mahikai paria we amea, kontai rahida bo ameteyo ametafai foi, efata amea eha fianggeng bitoyao amewepararui foi we ameha ria amea na kapari wowongfo.

Paulusi dontai na nu Malta foi to bendari Roma

¹¹ Amene embai botorua kai na nu Malta foi, mayeai ametafai to Roma aha. Kapari ametontai nai foi mani defai na Aleksandria ma, tete danunangfo ne diru neungfo ampare dewohi na nanai. Na kaparifoi fongfo,

eraraio aririwang seng, amani arikang tantamuruio uwonomi fino Kastori tuti Poluksi.

¹² Ametafaia amesoa reantenang na bendari Sirakusi, ametawohi na nanai rahida botoru.

¹³ Na nanai ametafai aha amesoa na bendari Regiumi. Kameaia mani wanang sai bia, ampare sotuba amea amesahera paria donio rahida botoru kawuru mae, amesoa na bendari Putioli na nu Italia foi anina.

¹⁴ Na nanai amesobu doroi eraria Yesusi manea tuti ewenoti ameara ameminohi riasa na nanai ari minggu bei. Na tonanane amerwa amesobu bendari Roma foia.

¹⁵ Inontarai na Romao eroaso Yesusi fosa etarami kaiwo kariri amea, ampare era ma etamang we amea. Manea etamang na katai Hotel Botoru foi, mae manea era pari ma etamang we amea na Kondirora Apiusi. Rabuang bo Paulusi sobusa nana fo, enerorongfoi mitubaru aha, tuti wenadi dohong mahikai we Allai.

Paulusi kiorang na bendari Roma

¹⁶ Rahida bo amesobu bendari Roma foi fo, parenta Roma fosa etohong Paulusia minohi siai na munu bei, mae etohong afai mamuna manei deitawani.

¹⁷ Rahida botorua, Paulusi sahu ruhi mano ewewafonai we Yahudi enai na nana fosa. Efanduhisa ma medu wesa deyo, "Doroi meaine, wiro yohong sarafieai we kaiwasa Yahudi nesa kahai, ete we tane koangno weriria na

tane werengfesa ma foi kaha. Tonanai ki wape Yahudifosa etafu yau na Yerusalem tuti etohong yau to inontarai Roma nesa ewarami rorong ne.

¹⁸ Rahida bo emadu kariri nehu kaiwone nai foi, wiro esobu fisarawaifeai ria yau we isobu aiboi marareha fo kaha, tuti mano ehutu kaiwo fosa eteyo etawing yau.

¹⁹ Manamo Yahudifosa etapa kare yau, ampare donio yawiaw we ika nehu kaiwone yau to Kaisari Romafi ma ninai. Inari toninane wiro nehu fieai we yingga inontarai Yahudi nesa kaha.

²⁰ Nanai aino wedaya mani yutang mea ma we imadu ria mea ninai, weo eru aitamu yau nina mani, tutira fino Mamparirio inontarai Israeli ne taenemita wani we da ma feriri tata foi."

²¹ Ainanaya emadu wei aha eteyo, "Pariao rahida bonini kontaio wiro amesobu surati bei kariri wau na Yudea ma kaha, tuti tane doroi era na wanai ma fosa wiro manei deikariri fieifa ete medu kaiwo karira feai kariri wau kaha.

²² Wape ameteyo ametarami kariri nemu roasoawa, weo amea kiai ametaramioai kawurua we na doni kontai, inontarai eteibera aunau roasoi nani."

²³ Ampafe emadu ruhi rahida bei we efanduhisa nai. Rahida bo etarerri nani kaiwasa bitoya era ma efanduhisa na Paulusi munu minohi nai foi. Na kameaifo paria sobu ramindena medu

kaririai wesa kariri todoni Allai weMananufo. Na Kaiwo Musai tuti nabi-fosa esoi fo, Paulusi yurai paria we deunausa ambori eroasoai weo Yesusi mani Mananu Mampariri dine.

²⁴ Manea eroaso kaiwo medura fo wape manea kontai eroaso kaha.

²⁵ Ampafe wiro enemiro-rong boyari ahang kaha, esawasa tuti era weru kataifoi, donio Paulusi medu kaiwo ninai deyo, "Fianai aino Nuaninu Mirarebana fi medurai na nabi Yesayai we mene werengfia fo tarai kaririai ampa.

²⁶ Medurai deyo,
‘Roa modurai we kaiwasa ninisa boyo,
“Metaramioai pampang wape metafu kahai ki;
Meuremifo nai nayai pampang wape meser-aweaifa ki.”

²⁷ Weo kaiwasa nini enemituitafo rehaibu ampa,
ehobu etaramifo ampa tuti etabung wedua euremifo ampa.

Weo tonana kaha mani,
tarahio euremifo ewati,
etaramidaungfo etaramioai, tuti enumikamieifo enemitiuitaifa,
ambori etaraberasa weru ene sasarifo we yau aha ma tuti ifaririsa.*”

²⁸ Ampafe Paulusi medu wesa deyo, "Metarami ma! Mea kontai mene tarai tonana kariri fi nabifosa emadurai nanai. Ampafe

* **28:27** Yesayai 6:9, 10

Allai denatu ne Kaiwo Mahikai kariri feriri tata ne tono inontarai Yahudi kaha fosa, tuti ea etaramioai tuti etohong kaririai ki.” [

²⁹ Paulusi medu tonanai-fara kai fo, Yahudifosa esawa waweresa tuti era weru kataifoia.]*

³⁰ Paulusi niai na bendari Roma defuina boru, minohi na ne munu mantauni biaiti foi, tuti piraise paria we kaiwasa bitoya paria era ma etuambawari na ne munufoi fo.

³¹ Manea wiro etohong weduari kaha, donio na wiro mitai kahai kiorang kariri todoni Allai weMananufo tuti kariri Seng Yesus Kris-tusi.

* **28:29** Arawangno 28:29 ne tarai toyari kaiwo na 8:38, amanifafongfa manei soi kariri Sengne ne Kaiwone amani kaiwo rabuang ninai mantauni dohonai we kaiwo ming tuarai.

Kaiwo Anatu Paulusi Soi We Jemati Na Roma

*Kaiwo dedung we surati
Roma nei*

Bendari Roma mani bendari fiabai paria, tuti na rahida nani Mananu Kaisari Roma foi yuo nunei sentenang. Rasul Paulusi soi ne kaiwo anatu nei we Kristusi ne jemati na Roma foi weo meinena weo ambori dontai suambawasa. Enetiuai we yufi na mano eroaso fosa na wanai kuteai, akawuru wori efatari dontai pari to Spanyoli.

Na suratinei, reantennang mani Paulusi dohong mahikai we jemati na Roma foi tuti deikaririai wesa kariri todoni dutang tutisa pampang we Sempaisi fo. Akawuru wori deisaha ne kaiwoariri fuba sewa foi, amani Kaiwo Mahikai na Allai fo deinawi todoni niari inontaraine tata tabeng riati aha, nana mani na taroaso Seng Yesus Kristusi terai, wiro na tatohong kariri Allai ne Hukumi dohoni we Musai foi kaha, ete na fi bengno tanari fo kaha, mae manta na taroasoi tera fo.

Ainanaya Paulusi medu bitoya aha kariri finana. Kaiwasane kiai, Yahudi tuti Yahudi kaha nesa, tabeng ete tawebayari ria Allai kaha, tata kiai tanai na sasari rorong fo, tuti sasarifo yu tata kiai. Wape tabeng ria Allai aha na taroaso Yesus Kristusi

fo. Tuti na tawebayari ria Kristusi fo mani Allai niari riwang tata ambori tatarang waworu aha tuti tabeng ria Allai aha. Mano taroasoi ne tata ne mani taminohi na mai ria Allai tuti Nuaninu Mirarebana foi sawing tata weru sasari rorong fo tuti weru marareha rorong fo une mambiriufu.

Na robong ring (5) pariao indeatoru (8) Paulusi medu kariri Allai ne Hukumifoi tuti kariri Allai Nuaninu-foi ne mambiri na tata fo. Medu kariri Allai ne enetituaitafo we inontarai Yahudi tuti Yahudi kaha fosa, tuti kariri ne dawiafo wesa kiai. Deyo Allai enetituaifafong ambori Yahudi fosa bitoya eteiaya Yesusi ambori wedaya kaiwasa na nunei kiai nesa esobu rang weo ehahefang Allai na Yesus Kristusi. Mae deyo yoasoai we Yahudifosa kontai, waroi ahang kaha mae, eteiaya Kristusi ahang kaha mae eroasoi tuti erariati ki. Kontai soi kariri todoni taminohi Weinontarai Kristen ne, tuti todoni taenemiawu wawera tata, tarufi we Allai na mai, tatato parentanei, tafata wawera tata, tuti fi siai wei fo. Na fui pari fo denatu mahikaifeai we inontarai maneiru teai na Roma fosa tuti fiai Sempaisi wesa.

Kaiwo na suratinei deto kutuui toninai:

1:1-17 Kaiwo fafong tuti ne kaiwo fuba sewa ne.

1:18-3:20 Todoni kontai inontaraine esobu fariri weru ene sasarifo.

3:21-4:25 Allai dohong rang we esobu faririfo,

amani na Kristusi.
5:1-8:39 Todoni inontarai eminohi etarang wa-worun na Kristusi.
9:1-11:36 Allai ne enetitua-itafo we Israelifosa.
12:1-15:13 Inontarai Kris-tensi ne taminohi toa fo.
15:14-16:27 Kaiwo kife suratinei tuti dohong mahikaifeai we inon-taraifosa.

*Paulusi dohong mahikai
we jemati na bendari Roma*

¹ Kaiwo anatu nei na yau Paulusi, mano iwewoming we Kristusi Yesusi ne yau. Allai diri yau kawuru ampa we iwersasuli* tuti yuai yau we iwuwu ne Kaiwo Mahikai fo.

² Kaiwo Mahikai nanai Allai dererai fafong kawuru ampa ria ne nabifosa, tuti esoi kaririai na ne Kaiwo Mararebana fo na Buku Mamo foi ampa,

³ amani kariri ne Kaisung-foi. Watioai na weinontarai batang ne mani, weriria na mananu Dauti ma,

⁴ wape na Nuaninu Mi-rarebana foi ne mambiriuo mani, deinawiai we Allai ne Kaisung dine, tuti finanai deinawiai na mambiriuo suwi na marareha rorong foi aha ma fo; nana mani Yesus Kristusi, tane Sengfoi.

⁵ Na Yesus Kristusi nani, Allai dohong ne bengfo arora we yau we iwersasuli, ambori iwiwiaing kaiwasa na nu bodoni konta foi,

we eroaso Kristusi ambori etohong kariri, ambori eruai wonongfo dedai.

⁶ Tuti mea na Roma wa mea, mea kontai mehontai inontarai Allai sahusa tuti yuaisa we Yesus Kristusi ne inontarai disara fo.

⁷ Isoi kaiwo ninai we mea kiai na jemati Roma wa mea, mano Allai enewawu mea wa tuti sahu mea we ne inon-tarai memararebanaia wa mea.

Kadono tane Dai Allai tuti Seng Yesus Kristusi urohong une bengfo arora we mea tuti urohong mea menumiru-ainso ne maifo.

*Paulusi de dontai we deti
mano eroasoai na Roma fosa*

⁸ Fi reantenang mani, yohong mahikai we nehu Seng Allai ria Yesus Kristusi we mea kiai, weo nunei sentenang etaramioai we meroaso Kristusi na mai paria.

⁹ Na nehu nadi yutang Al-lai fo, arohuporo mea kaha, mae yutang tuti mea pam-pang wei. Fianai imadurai tonina ne itofa kaha. Al-lai deitawang kaiwo imadurai ninai wekaiwo wetarai fine. Allai nini mani Allaio irufi wei na enehuro-rongfuisi sentenang, amani na iwuwu Kaiwo Mahikai fo kariri ne Kaisungfoi fo.

¹⁰ Yutang tuti Allai we mea pampang, tuti yutani paria we kadono, yoa we yau we na ninai kontaio dohong rang we ira mau iwati mea.

* **1:1** Rasulinei mani, siai weru pendeta nei. Rasuli mani, mano ewati te Kristusi na euremifo tuti Allai yuaisa we ewuwu Kristusi nani tuti ne Kaiwo Mahikai kariri fo, ne tarai toyari Paulusi, Petrusi tuti mano siai wei fosa. Weaifa mani ahui we inong anatu kontai.

¹¹ Weo yawi weai paria we ira we mea mau, ambori ifata mea na yohong Fi Maio Nuaninu Mirarebana foi dohonai arora fo we mea,[†] ambori memutubaru na meroasawa.

¹² Amani, mea tuti yau, tata kiai tafata wawera tata na taroaso Kristusi ne, ambori tawemambiri aha.

¹³ Doroi meaine, yohong weai paria we dohona meserawawerahai kariri todoni irurai pampang paria we yontai mau iwati mea, manamo isobu dadira pampang. Yohong weai tonanai we ambori fi iru we mea, na iwuwu Kristusi we mea kiai, wetarai na mea, amani na mano wiro eroasoai kaharai fosa ambori erariati, mai kariri wetarai na Yahudi kahai siai fosa na katai siai fo ampa.

¹⁴ Weo todoni kontaio irufi we Kristusi rahang kaiwasa na nu bodoni konta fosa, amani mano Yunani fosa konta mano Yunani kaha fosa, mano esawai fosa konta mano ewebonggoi fosa.

¹⁵ Nanai wedaya yohong weai paria we iwuwu Kaiwo Mahikai fo we mea mano menayai na bendari Roma wai mea kontai ninai.[‡]

Kaiwo weneung we kaiwo anatu ne

¹⁶ Imamaya tuti Kaiwo Mahikai fo kaha, weo Kaiwo

[†] 1:11 Nana mani, fi weo fata jemati nai, toyari fio oikaririai na 1 Korintusi 12 tuti 13. Fi Mai nanai toyari madu na kaiwo siai, Fi Mai we nari inontarai emaninang fosa ebeng, tuti ne siai wei fo kontai.

Mahikai fo mani, Allai ne mambiriupo aine we feriri inontarai eroaso Kristusi nesa kiai, reantenang mani inontarai Yahudi fosa, tuti sua aha mani, Yahudi kaha fosa.

¹⁷ Weo na Kaiwo Mahikai nanai aino Allai deinawi kariri todoni inontarai emasi na arongreafio; amani emasi na eroasoifo, tuti na eroasoifo na reantenang pariao we rea fo. Nanai kariri kaiwofo dotu tono:

*"Inontarai mano mesi dine, darang na ne yoasoafio."**

Inontarai mandoni kontai, Yahudi ete Yahudi kaha nesa kiai, enari sasari, ampare emasi na Allai urengreafio kaha (1:18-3:20)

Allai dohong aiboifo we inontarai wiro etaroansoi kaha fosa, weo ewaitawanai we sengmanei, wape eteiayari tuti esomi wei kaha

¹⁸ Na rorafaisi, Allai deinawi ne kesoufo we inontaraine ene sasarifoi kiai tuti we ene karirafo kai. Weo fi kerira inontarai etohong kariri Allai kaha fosa enariri tonana foi wedayasa etaha tawang aunau wetarai fo.

¹⁹ Weo eroaso Allai kaha mae fianai aino ewaitawanai

[‡] 1:15 Ne fuba paria we Paulusi niari fo mani, wiwu Kaiwo Mahikai kariri Yesusi we Yahudi kaha fosa, mano etaramioai kaharai fosa, akawuru wori we Yahudifosa kontai. Tutu na bendari Roma foi mani, Yahudi maneia, wape ne faufosa mani Yahudi kaha saine. Na jemati Roma foi mani tonanai kontai.

* 1:17 Habakuki 2:4

kariri I fo, finanai kasau wesa ampa. Weo Allai mantauni dino deinawiaia kasau wesa ne.

²⁰ Weo na rahida Allai niari nunei tuti rorafaisi fo pariao ninai, neo mambiriu werea kaha fo, tuti ne weSengfo, ne mirarebanaf, ne enerorong beng fo, wiro wati parai kaha, wape watioai kontai ampa, amani waitawanai kasau paria na fi kiaio niariri nini ampa. Ampafe mandoni kontaio wiro wemambiriu we medu deyo, "Iwaitawang Allai ne mambiriu weSeng fo kaha."

²¹ Inontaraine ewaitawang seng manei wape etaroansoi tuti etatori we weSengfo kaha, tuti etohong mahikai wei kaha. Mae enemitituaitafo wefieai ahang kaha, tuti enemirorong webonggoi foi memantiti ampa.

²² Eteyo esawai, wape wiro tonana kaha mae, ewebonggoia,

²³ weo wiro Seng Dedai Sambewaraio minohi wenu-mainu foi dino esomi wei fo kaha, mae aririwangno ne tarai kariri fidarangfoi, amani fio ambori wioru foi andino esomi wei ne, amani aririwang toyari inontarai, romu, andowa, tuti tawai foi.

²⁴ Nanai wedaya Allai sawinsa kariri enemirorong wesasari foi, sawinsa we enari fi kerirao enemirorong dohong we enari fo, donio enari maninawao werarika fo tuti fio kia mamaya wawerasa fo paria.

²⁵ Allai mano wetarai foi, eriwani na fio wiro wetarai

kaha fo. Tuti wiro Mano niari fi fuba nini kiai foi dino esomi wei kaha tuti etohong kariri ne kaiwofo kaha, mae fio niari nanai aino esomi wea tuti etohong kariria ne. Wape Mano niari finini kiai foi andino tafiai we fitawafa ne. Antu!

²⁶ Na inontaraine ene enari tonana fo, wedaya Allai sawinsa etohong kariri epaing funomaio kia mamaya paria fo. Wiwingfosa kontai wiro etohong we mangfosa kariri todoni tonanafo kaha, mae eriwang ne nanai na etohong wesa wawerahai, nana mani wiwing epaing we wiwing siai fosa.

²⁷ Mangfosa kontai tonanai, wiro etohong we wiwingfosa we erausa kaha, mae epaingfo niunung enemirorongfoi ampafe etohong we emaninawa we mang siai fosa aha. Ampafe enari fi werarika kia mamaya paria fo wawerasa tonanai, tuti wedaya esodai fiembaitai kerira foi kariri fi kerira enariri nani.

²⁸ Tuti inontarainesa emaya we enemitituai kariri Allai ahang kahai nanai, wedaya Allai sawinsa enari kariri enumikamieio kerirara foi, ampafe enari fi wiro mai we nari fo kaha.

²⁹ Enemirorongfoi sefang na fi karira tuti fi poro doni konta fo, euremi fiabai we ra, tuti enemitituaitafo mai kahai ampa. Ehasou we kaiwasa ne fi, etawiai we emung inontarai, emamuna, etatofa, enemirorong pirahai

we inontarai, etairiri inontarai siai.

³⁰ Eteibera inontarai siai, enemirireu Allai, ene kaiwo karira we inontarai siai, enemirorong dedai tuti eboromi fiabai funomai, esawai paria we esera we rang waworu we enari ne karirafo nayai, etapa ene wawafosa,

³¹ ewebonggoi, etohong kariri kaiwo emadura fo kaha, ene pari enemiwawu, tuti earomi inontarai siai kaha.

³² Inontarai mandoni dino niari ne karira nanai mani, Allai ne Hukumio mesi nei dotu deyo wenani mai we sobu aiboi marareha fo. Ewaitawang tonanai ki, wape enumiairai we enari fi kerira nani pampang. Tuti fi kerira sewa aha mani, eroa we inontarai siai we enari kontai.

2

Allai kiutu kaiwo na masi we inontarai mandoni kontai, kiutu kaiwo we inontarai Yahudio enemitituai we etohong kariri ne Hukumifo na masi kontai

¹ Ampafe tonana mani, imadu we mano enai rahang mea ne tuti enemittuai we ea mani emasi ampa weo etohong kariri Allai ne Hukumifo, imadu we mea mau yeyo inontaraine waune nemu pari mambiriu we wahu mantaung wau we enemurorongwai mesi ne. Ampafe inontarai todoni di wau e, doni kutu kaiwo we inontarai siai we ansaino etohong sarawai ninai? Weo masino kutu kaiwo

we inontarai siai tonanai, nana mani nari aiboifo tau we mantaung wau aha, weo kutu kaiwo karirisa tonanai wape mantaung wau kontai nari sarawai tonanai karirisa.

² Tawaitawanai we Allai kiutu kaiwo we inontarai etohong sarawai tonana fosa mani, fianai aino Allai kiutuai nanai kaiwo wetarai fine.

³ Wape inontaraine waune, kutu kaiwo kariri inontarai siai we enari sarawa fo, mae mantaung wau kontai nari tonanai, boitarahio ambori kaharai weru aiboi Allai dohona fo rai e?

⁴ Ete boyo enemurireu Allai ne enerorong denteng we tata fo tuti ne sawang enerorongfoi mae demang we tata fo ne? Boitawana kahai e we niari tonanai we wau fo, tuti deinawi enerorong denteng foi we wau, we ambori wiwiaing wau barabera wau weru nemu sasariwai.

⁵ Wape numukamiei mitubaru, tuti wiro barabera wau kaha. Na tonanane mantaung wau nari aiboifo maraba we wau, na rahida Allai deinawi ne kasoufo tuti ne aiboi mesi fo we nunei fo.

⁶ Weo Allai ambori biai mansiari-mansiari kariri fi niari fo ki.

⁷ Amani, we mano etawansa na enari ne bengfo, amani na esera we esobu sambewaraio dadai fo, wang dadai na rorafaisi fo, tuti etarang we fitawafa fo mani, dohongno numainufo wesa ki.

⁸ Wape mano ewati we mantaunsa tera fo tuti

eteiaya kaiwo wetarai fo, tuti etohong kariri ne karirafo, inontarai nanisa Allai kesousa tuti dohong aiboi wesa ki.

⁹ Mandoni dino niari ne karirafo mani, ambori sodai dadira pari fo, reantenang mani inontarai Yahudi fosa, sua aha mani inontarai Yahudi kaha fosa.

¹⁰ Wape mano enari ne beng fosa mani, ambori esobu sambewaraio dadai fo, wang dadai na rorafaisi fo, kontai enumiruainso ne maifo. Finanai reantenang mani we Yahudifosa, sua aha mani we Yahudi kaha fosa.

¹¹ Weo fianai Allai niari we inontaraine tata fo masi kai, wiro deto manei siai weru manei kaha.

¹² Inontarai Yahudi kaha fosa ewaitawang Hukumi Yahudi foi kaha, tuti etohong sasari mani, esodai aiboifo eworu ki. Tuti inontarai Yahudi fosao ewaitawang Hukumifoi kawurua fosa, etohong sasari mani esobu aiboifo kariri Hukumifoi.

¹³ Weo wiro inontarai ewaitawang Hukumi fosa ansaino emasi na Allai urengreaflo kaha, mae mano etohong kariria fosa ansaino Allai detosa we ebeng riati aha ki.

¹⁴ Inontarai Yahudi kaha fosa wiro etaroang Hukumi Yahudi foi kaha. Tonanai ki wape weaifa mani, fianai aino enari fo masi kariri fio dotu na Hukumifoi nani. Ampafe enimirorongno niari kariri Hukumio etaroani kaha foi nani mani, finanai deinawiai weo ewaitawang ne karirafo weru ne bengfo

kawuru ampa, kariri fianai aino dotu na Hukumifoi nani.

¹⁵ Fianai aino enari nanai deinawiai we kaiwo dotu na Hukumi Yahudi foi we ohong kariria fo nani, soi na enimirorongfoi kontai. Enemirorong ketui foi deinawiai kontai kariri finanai, tuti emitituaitafo dinggaisa we fi sarawaio enari fo mae yoa we fi wetarai enari fo.

¹⁶ Fi tonana ne ambori kawariai na rahida Allai dereria foi. Na rahida bonani, kariri Kaiwo Mahikai iwuwuaifa ne mani, Allai, na Yesus Kristusi, ambori kiutu kaiwo kariri fio dadiwa na taenemirorongfuisi tuti taenemitituaitanei kiai ki.

Yahudifosa eru Hukumifoi, wape nanai feririsa kaha

¹⁷ Wape ninaifa mani, emutituai tofidoni we mantaung wau ne? Tarahai boyo Yahudi di wau. Nana mani rutawang Hukumi Allai dohonai we Musai foi mitu tuti boi aromu we weboyari ria Allai fo.

¹⁸ Boyo boitawang kariri Allai ne dawiafo tuti biri ne doni aino beng sewa fo, weo wobu aunau na Hukumifoi ampa.

¹⁹ Roasoai we wau mani inontarai wiwiaing we euremifafa fosa di wau, tuti wepadamarang we sambewa inontarai enayai na mamantiti rorong fo di wau.

²⁰ Enemutituai inontarai bounau mano eseraweraha fosa di wau, tuti inontaraio bounau mano ewaitawang kariri Allai

turura kaha fosa di wau. Weo roasoai we na mene Hukumi Yahudi foi, boitawang fi bitoya tuti wobu aunau wetarai fo.

²¹ Ampafe mano bounau inontarai siai tonanane wau mani, we fianie bounau bera mantaung wau kahai nina? Mano bounau inontarai we ehamananapi fanai wa wau, mantaung wau komananapi kaha e?

²² Bounau inontarai erirau fosa we enayai ria wiwing ete mang siai fanai, wape mantaung wau kontaio moninawa ria wiwing siai e? Enemurireuo aririwangfo tuti womi wesa kaha, wape ka fi na mamunggasai weru munu aririwang fo kaha e?

²³ Boi aromu we Hukumio Musai soi foi, wape wiro bohong mamaya Allai na fianai aino Hukumifoi dei weduara fo kaha e?

²⁴ Kaiwofeai dotu tonina:

“Meaino mewedaya inontarai Yahudi kaha fosa eteibera Allai wonongfe ne.”*

²⁵ Sunatinei mani, wefiainawiai we Yahudifosa we Allai ne inontarai disa. Masino bohong kariri Hukumi Allai dohonai we Musai wai na mai mani, nemu sunati kariri Hukumifoi nani kia mai we waurai. Wape bohong sara Hukumifoi mani, nemu sunati nani wifieai we wau ahang kaha, ne tarai toyari wesunati kaha.

²⁶ Ampafe masino inontarai Yahudi kaha mane, amani inontarai wiro we-

sunati kaha, dohong kariri kaiwo dotu na Allai ne Hukumifoi mani, inontarai tonana nei Allai sahui we ne tarai kariri Weinontaraio wesunati kariri ne Hukumifoi dine.

²⁷ Tuti inontarai ewesunati na ene taraifoi kahai mae etohong kariri Hukumifoi nanisa, ambori etinggai mano meweYahudi ne mea we metohong sarawai, amani mano meteyo mene Hukumi Allai dohonai we Musai foi tuti sunatifoi, wape metohong sara Hukumifoi ne mea.

²⁸ Weo mano Allai sahui we Yahudi tarai foi mani, wiro inontaraio saubaunungfoi Weinontarai Yahudi tera kaha, tuti mano wesunati tarai foi mani, wiro mano wesunati na ne taraifoi kariri koang Yahudi foi tera kaha.

²⁹ Bereri! Mae Yahudi tarai foi mani, inontaraio na enerorongfoi tarai weYahudi, tuti sunati tarai foi mani, na enerorongfoi tarai. Sunati tonana nei, Allai Nuaninufoi dino niariri ne, wiro na kaiwo ariri arora oi na buku kaha. Inontarai tonana nei mani inontarai siai fosa wiro efiai kaha, mae Allai andino fiai ne.

3

Allai niari sua ne inontarai Yahudi fosa na mai

¹ Tonana mani, inontarai eweYahudi ne, esobu fiani mai sewa inontarai siai fosa, tuti enari kariri sunatifoi mani we fiani wesa?

² Esobu fi bitoya paria na finanai. Reantenang mani,

* ^{2:24} Yesaya 52:5

we inontarai Yahudi nesa ansaino Allai yoaso ne Kaiwofo wesa ne.

³ Yoaso ne Kaiwofo wesa tonanai, wape maneua eroasoai ahang kaha ampare, ne tonanane wedaya Allai dohong kariri ne kaiwo arera fo wesa ahang kahai e?

⁴ Todoni kontaio bereri! Weo masino inontarainesa kiai etatofa, wape Allai mani wetarai pampang. Kariri kaiwo dotu tonina fo:

“Ambori atioai we Wau wetarai na kaiwo modura wa,

tuti kutu kaiwo mani, manei dapa nemu kaiwowa kaha.”*

⁵ Ampafe, ne karira tanari fo wedaya Allai enerorong mesi foi wati pari kasau paria, tuti denteng paria we Allai enerorong mesi foi wati pari tonana. Ne tarai toyari na tanari sasari fo tawedaya bengfo kontai. Tonana mani, masino Allai dohong aiboifo we tata we tawesasari tonana fo, Allai wiro doa rahana kaha e? (Finanai manta imadu kariri inontarai enemituaitafo terai.)

⁶ Todoni kontaio tonana kaha, weo masino Allai doa rahana kaha mani, kiutu kaiwo kariri nunei todoni ki?

⁷ Wape masino fi inari wetarai kaha fo wedaya Allai ne wetaraifo tuti ne sambe-waraio dadai fo wati parai, ambori kaiwasa efiae, nana mani we fianie, kiutu kaiwo kariri yau weinontarai sasari di yau fo nina? Weo ne tarai

toyari yohong sasari fo ifatarai tonanaia.

⁸ Tuti we fianie, wiro tamadu tateyo, “Masino tonana mani, ne mahikai mani tanari ne karirafo, ambori ne bengfo kawariai na ne karira tanariri nanai? Amani tanari sasari ambori kaiwasa ewati we Allai mani inontarai mesi dine.” Tarai inontarai maneua eteibera yau eteyo imadu tonana kawuru ampa. Inontarai tonana nesa mai we esobu ene aiboifo ria Allai.

Inontarai mandoni kontai wiro mesi na Allai urengreafoka kaha

⁹ Ampafe tofino? Yahudine ameaino amebeng sewa weru Yahudi kaha fosa e? Todoni kontaio bereri! Weo toyari anta imadurai ampa, inontarai Yahudi fosa ete inontarai Yahudi kaha fosa, ea kiai enayai na sasari ne mam-biruifo.

¹⁰ Kariri kaiwo dotu tono: “Inontaraine mandoni kontaio wiro enerorong mesi kaha, tarai, wiro manei mesi kaha.

¹¹ Wiro manei deitawang ne wetaraine kaha, tuti wiro manei sera we Allai kaha.

¹² Inontarainesa kiai ehuru-mitare Allai, ea kiai ewefieai ahang kaha,

Mandoni kontaio wiro niari ne bengfo kaha, tarai, manei sonana kaha.*

* **3:4** Masmuri 51:4 * **3:12** Masmuri 14:1-3, 53:1-3; Pengkhottabah 7:20

- 13 Kaiwo kawariai na eboromi rorong fo toyari kubirio tibau; etaperemifo sofa biriu, tuti eboromi rawa fo sefang na tawai memuna ne memu-foi.*
- 14 Eboromifo sefang na kaiwo eteiberahai fo tuti na enemirorong pirafo fo.*
- 15 Eawemifo sahera we emamuna tuti emung inontarai.
- 16 Na katai doni kontai eraoa fo,
eha karira tuti enari dadira paria fo.
- 17 Rang mai fo etaroana kaha,
18 tuti ematai we Allai kaha.**
- 19 Wape tawaitawanai fi kiai na Allai ne Hukuminei reng we mano erutawang Hukumifoi nanisa. Ambori mandoni kontaio wiro sobu rang we medu fieai ahang kaha, tuti Allai dohong aiboi we nunei sentenang, we Yahudifosa kontai.

20 Weo inontaraine maneи wiro atori we denteng ria Allai na dohong kariri Hukumi Allai dohonai we Musai fo kaha, weo wiro maneи wemambiriu we dohong kaririai na mai pari kaha. Mae Hukumi nani wedaya tataroang tane sasarinei.

Inontarainesa tamasi na Allai urengreafu na taroaso Yesus Kristusi

21 Wape ninaia mani, rang siai bei kewariai we ambori tamasi na Allai urengreafu, wape wiro na tatohong kariri

Hukumi Musai fo kaha. Rang nani Musai deinawi kaririai na Hukumi soi foi, tuti nabifosa kontai etoi weo rang nani wetarai.

22 Nana mani, Allai deiai inontarainesa we emasi na urengreafu na eroaso Yesus Kristusi fo terai. Tuti niari tonanafo we inontarainesa kiai, amani mano eroaso Kristusi nesa. I wiro deto kariri inontarainesa manei mesi sewa manei kaha.

23 Weo inontarainesa kiai ewesasari tuti ehatai waroi weru Allai ne sambewaraio dadai fo ampa.

24 Tuti na ne beng dohonai arora fo, wedaya inontaraine ebeng ria Allai aha, amani na Kristus Yesusi feririsa.

25 Allai dohong Kristus Yesusi we wekorbani, ambori ne rikafoi werang we tahasau weru Allai ne kasoufo na taroasoafu. Allai niari tonanafo, we deinawi ne doa rahana fo. Weo na fafongfa, i kontai sawani we inontaraifosa ene sasarifoi, ampafe wiro esobu aiboifo riati kaharai.

26 Niari tonanafo, we deinawi kariri ne doa rahana fo na rabuang bonini, ambori inontaraine ewaitawanai we i mani mano doa rahana dine, tuti ambori deiai inontarainesa ebeng riati na eroaso Yesusi fo.

27 Ampafe tonana mani taboi taaromi we fi tasobuaifa nana e? Bereri, wiro tonana kaha! Wape we fiani tonana kahai nina? Weo tanari kariri Allai ne Hukumifoi fo ne? Nanai

* 3:13 Masmuri 5:9, 140:3
Masmuri 36:1

* 3:14 Masmuri 10:7

* 3:18 Yesayai 59:7-8;

kontai bereri. Wape we taroasoa fefe.

²⁸ Weo tane kaiwone weneung tonina: Allai deto inontaraine manei denteng riati aha fo wiro na wenani dohong kariri Hukumifoi kaha, mae na yoaso Kristusi fo terai.

²⁹ Ete, Allai mani weSeng we Yahudinesa terai, mae inontarai siai mani bereri e? Bireri, wiro tonana kaha, mae ne wetaraine mani weSeng we inontarai siaio Yahudi kaha fosa kontai.

³⁰ Weo Allai mansiari kawuru, andino deiai inontarai Yahudi fosa we ebeng ampa we eroaso Yesusifo. Allai nani kontai andino deiai inontarai siaio Yahudi kaha fosa kontai we ebeng konta fo, we eroasoai konta fefe.*

³¹ Ampafe tonana mani, Hukumi Musai soi fo tahabioaifa we taroaso Yesus Kristusfoa fo ne? Todoni kontaio wiro tonana kaha! Mae na taroasoai tonana fo wedaya taroa we Hukumifoi na mai.

4

Abrahami wefainawiai; i mani mesifo na ne yoasoaf, wiro na fibeng niari fo kaha

¹ Tonana mani fianai aino tamadurai kariri tane werengno Abrahami kariri fi sobua fo ne?

² Masino fianai aino mantauni niari fo wedaya Allai detori we inontarai beng dine riati, nana mani we-mambiriu we bioi arongfo.

* **3:30** Amani, inontaraio ewesunati ampa (Yahudifosa), tuti inontaraio ewesunati kaha fosa (Yahudi kaha fosa). * **4:3** Kejadian 15:6; Galatia 3:6 * **4:8** Masmuri 32:1-2

Wape wiro ne rangfeai we bioi arong na Allai urengreafio kaha.

³ Na Kaiwo Mirarebana fo rabuang bei dotu tonina: "Abrahami yoaso Allai tuti na ne yoasoaf terai, Allai detori we inontarai enerorong mesi dine."*

⁴ Masino manei yufi mani sobu fiembaitafo, tuti fiembaitai sobuai nanai wiro ahuai we fi sobuai arora fine kaha, mae ne mambiriu we sobuai tonana.

⁵ Mae masino manei yufi kaha, wape yoaso Allai mano deiai inontarai sasari fosa we ebeng riati fosa, nana mani na ne yoasoai tonana fo Allai detori Weinontarai mesi dine.

⁶ Mananu Dauti kontai medu tonanai, na rabuangno medu kariri inontaraio Allai mioansa paria, amani detosa we inontarai enemirorong mesi disa, detosa tonana fo wiro na fibeng mantaunsa enari fo kaha. Medu deyo,

⁷ "Inontaraio Allai deiai ne sarawafo, tuti mano Allai dufisaya ne sasarifoia mani, na tonanafo sobu moanafo paria.

⁸ Inontarai mano ne sasarifo Sempaisi detori ahang kaha foi, na tonanafo wenani sobu moanafo paria."*

Allai deiai Abrahami Weinontarai mesi dine, weo

* **3:30** Amani, inontaraio ewesunati ampa (Yahudifosa), tuti inontaraio ewesunati kaha fosa (Yahudi kaha fosa). * **4:3** Kejadian 15:6; Galatia 3:6 * **4:8** Masmuri 32:1-2

ne yoasoaf, wiro na sunatifo kaha

⁹ Kaiwo moanai tonana fo dotu terai we mano ewesunati nesa, amani Yahudinesa, ete we mano ewesunati kaha nesa konta ne? Tamadu kawuru ampa, we Allai deto Abrahami we inontarai mesi dine fo nanai, weo Abrahami yoasoai.

¹⁰ Ampafe, na rabuang bodoni Allai deto Abrahami tonanafo ne, na rahida wesunati kawurua fo, ete na rahida wesunati kaharai fo ne? Tawaitawanai, wiro na rahida wesunati kawurua fo kaha, mae na rahida wiro wesunati kaharai fo.

¹¹ Tuti sobu sunati nanai we fiainawiaifa we Allai detori we inontarai mesi dine, we yoaso Allai fefe, na rabuang bo wesunati kaharai fo. Ampafe Abrahami nini mani, wedai we mandoni kontao yoasoa ne, amani mano wiro ewesunati kaha fosa kontai, ambori na eroasofo nanai wedaya Allai detosa kontai we inontarai emasi disa.

¹² Abrahami kontai wedai we mano ewesunati fosa kontai.* Wedai tonanai wesa fo, wiro na etohong kariri sunatifoi tera fo kaha, mae na eroaso Allai fo kariri tane Dai Abrahami we yoasoi na rabuang bo wiro dohong kariri sunatifoi kaharai fo.

Tasobu Allai ne kaiwo arerafo we taroasoafefe

¹³ Allai dererai we Abrahami tuti ne ririafosa ampa, we dohong nunei wei ki. Dererai tonanafo wiro we

* **4:12** Amani, inontaraio Yahudi fosa.

Abrahami dohong kariri Allai ne Hukumifoi kaha, mae weo Allai detori we inontarai mesi dine, finanai weneung na ne yoasoaf fefe.

¹⁴ Weo masino inontarai etohong kariri Hukumi Musai soi fo ansaino esobu Allai ne kaiwo derera fo, nana mani roasoaf wiro wifieai ahang kaha, tuti Allai ne kaiwo derera fo kontai wifieai ahang kaha.

¹⁵ Weo Hukumi Musai soi fo kia Allai ne kesou fuba fo we inontaraine tata. Wape Hukumi bereri mani, ohong roaina fo kontai bereri.

¹⁶ Ampafe dohong ne kaiwo derera fo nanai weo taroasoi, ambori tasobu ne dererafo na ne bengno dohonai arora fo, tuti ne kaiwo derera fo nanai dotu we Abrahami ne ririafok kiai, wiro we mano etohong kariri Hukumi Musai soi fo sa tera kaha, mae we mano eroaso Allai kariri Abrahami we yoasoi fosa. Weo Abrahami mani tane dai dine kiai.

¹⁷ Kariri Allai ne kaiwo medurai we Abrahami tonina:

*"Iruai wau weDai we nu bitoya foi."**

Abrahami nani, na Allai urengreaf mani, tane dai dine, tuti yoasoi. I mani Allaio wemambiriu mantaung dine, Mano duwi inontarai emarareha fosa etarang aha dine, tuti Allaio dei beyaria mani, finini kiai kawariai.

¹⁸ Masino kaiwo areraio dotu tonanafo paria adareti wetarai ahang kaha tonanai ki, wape Abrahami

* **4:17** Kejadian 17:5

enetawanaia mutu tuti yoasoai. Nanai wedaya sobuai wedai we kaiwasa bitoya foi, mai kariri kaiwo dotu deyo,

“Toyari awahafaisi bitoya fo,
nemu ririawai ambori
bitoya ki.”*

¹⁹ Rabuang bonani Abrahami deitawanai we weinongkutungna adareti kahofa diri tawani ampa. Weo ne defuina adareti piaring ampa, kontai binengno Sarai kirawahi ampa. Wape yoasoafu wiro mikeu kaha.

²⁰ Yoasoia mutu tuti wiro enewawera we Allai ne kaiwo derera fo kaha, mae enerorong wemambiriu aha na ne yoasoafu tuti deparanding Allai.

²¹ Yoasoai tarai we Allai wemambiriu we ambori dohong kariri fianai aino dereria fo.

²² Nanai wedaya kaiwofo dotu tonina,

“Allai deto Abrahami we inontaraio mesi dine.”

²³ Kaiwo rabuang dotu we ‘detori we inontarai mesi dine’ nana fo, wiro dotu terai we Abrahami meiri kaha,

²⁴ wape dotu we tata kontai. Tata kontai Allai ambori deto tata we inontarai tamasi di tata ki, amani tataino taroaso Allai mano duwi Yesusi, tane Sengfoi, na marareha rorong foi.

²⁵ Yesusi nini, Allai dohoni meu, mireha we tane sasarine, tuti Allai duwiri aha, ambori na I, tabeng ria Allai aha.

5

*Tabeng ria Allai aha na
Yesus Kristusi*

¹ Ninaia mani tabeng ria Allai ampa, weo taroasoia fefe, amafe tanayai na Allai ne maifo. Tasobu ne tonana ne ria Yesus Kristusi tane Sengfoi.

² Taroaso Yesus Kristusi fo wedaya tasobu rang we tasuai to Allai ne beng dohonai arora fo, tuti na ne beng dohonai arora nanai tatoaria mutu nayai, tuti tamararising weo taene-mitawani we ambori tawati Allai ne sambewaraio dadai fo ki.

³ Nanai tera kaha mae, fi sewa aha mani tamararising kontai na tane dadira rorong tasodaira fo. Weo tawaitawanai we dadira rorong tasodaira fo wedaya tatawang tata.

⁴ Tuti na tatawang tata fo wedaya Allai yoao tata, tuti na yoao tata nanai dohong tata taenemitanwanai.

⁵ Tuti taenemitanwanai tonana ne wiro dohong tata tamamaya kaha. Weo Allai soni enewawufo na taene-mirorongnei ampa. Niari finanai we tata tonanafo na Nuaninu Mirarebanaio dohoni we tatara foi.

⁶ Weo tete rahidafo maia, amani rahida Allai kiuturaia fo, na rabuangno tawemambiriu kaha fo we sasari we-wora tata fo, Kristusi mireha we inontarai wesasari ne tata.

⁷ Mawa kahai we obu manei dohong ne taraifoi mireha we inontarai mesi

* 4:18 Kejadian 15:5

manei, tarahai we inontarai denteng manei reto, wape dadira kontai.

⁸ Wape Allai deinawi mantauni ne enewawu tata fo na fininai: rabuang bo taweinontarai sasari nendai fo, Kristusi mireha we tata.

⁹ Ninaia mani, tabeng ria Allai aha na Kristusi ne rikafoia, ampare nanai deinawiai we todoni kontaio na Kristusi takaharai weru Allai ne kasoufo konta rai.

¹⁰ Weo, masino na rabuang bo taweaiteta we Allai fo, ne Kaisungfoi fianduhi tata tawebayari riati aha na ne mararehafoi, tonana mani na tawebayari ria Allai aha ninai, todoni kontaio na Kristusi ne darang aha fo takaharai weru ne karirafrai.

¹¹ Tuti nanai tera kaha mae, tata kontai tamararisng na Allai na tane Sengno Yesus Kristusi fo. Weo na Kristusi, ninaia mani tawebayari ria Allai ampa.

Adami wedaya mararehafoi, mae Kristusi wedaya inontarainesa etarang aha

¹² Ampafe, inontarai mansiari wedaya sasarine suai to nunei ma, tuti na sasari nani kia mararehafoi. Na tonanane wedaya mararehafoi sinsung inontarainesa kiai na nunei, weo inontarainesa kiai enari sasari fefe.

¹³ Hukumi Musai soi fo wiro Sempaisi dohona kaharai mae, sasarifoi niyai kawuru na nunei ampa. Wape Allai wiro deto sasari nanai kaha, weo rabuang

bonani wiro Hukumifei we ohong sarawi kaha.

¹⁴ Tonanai ki wape na rahida Adami minohi darang fo paria sobu Musai fo, rabuang bonani mararehanei yutawang inontarainesa kiai. Tuti inontarai mano wiro etohong sasari we Allai kariri sasari Adami niariri foi, amani na dohong roaing Allai ne hukumi dohoni wei fo, inontarai nanisa kontaio enayai na marareha rorong foi kontai.

Adami mani wefiainawiai kariri mano ambori da aha ma foi.

¹⁵ Wape inontarai mandu nini suru wiro umasi kaha, weo ato wea mani, ne bengno Yesus Kristusi niari fo, fuba sewa fisarawaio Adami niari fo. Weo na mansiari niari sarawai wedaya kaiwasa bitoya foi emarareha. Wape fi fuba sewa aha mani, na inontarai mansiari ne bengfo, amani Yesus Kristusi, Allai dohong ne bengfo arora we kaiwasa bitoya foi kontai.

¹⁶ Tuti Allai ne fi beng dohona fo, wiro masi kariri inontarai mansiari nani ne sasarifo kaha, weo sasari boyari kia aiboifo, wape Allai ne beng dohona fo waraira sasari bitoya fo. Weo sasari boyario inontarai mansiari nani niariri foi wedaya Allai kiutuai we dohong aiboifo. Wape inontarai bitoya nesa enari sarawa bitoya tonanai kontai ki, wape Allai ne bengno dohonai arora fo wedaya niarisa ebeng riati aha.

¹⁷ Weo masino na inontarai mansiari ne sarawafo wedaya mararehafoi* tirerawai nai to katai doni konta fo, nana mani todoni kontaio inontaraio esobu Allai ne bengno dohonai arora fo fuba paria, tuti esobu fi beng fo riati, amani sahusa weinontarai emasi na urengreafu sa, todoni kontaio inontaraio tonana fo saino eru wang mananu fo etarang wenumainu ki. Finanai esobuai na inontarai mansiari, amani na Yesus Kristusi.

¹⁸ Ampafe kariri na fisarawai boyario Adami niariri foi, wedaya kaiwasa bitoya foi esobu aiboifo, tonanai kontai na fi masi boyario Yesusi niari fo, inontarainesa ebeng ria Allai aha, wedaya ea kiai etarang na tarai.

¹⁹ Weo kariri inontarai mansiario wiro dohong kariri Allai ne Kaiwofo kaha foi wedaya kaiwasa bitoya foi eweinontarai sasaria, tonanai kontai we na inontarai mansiario dohong kariri Allai ne dawiafo wedaya kaiwasa bitoya foi emasi na Allai urengreafu aha.

²⁰ Hukumi Musai foi, Allai dohonai we inontarainesa we etohong kaririai. Hukumi nani wedaya inontarainesa kiai ewaitawanai we enari sarawai bitoya paria. Wape na sasari bitoya inontaraine enariri aha foi nani, Allai dohong ne bengfo arora we in-

ontarainesa fuba sewa aha.

²¹ Ampafe kariri sasarifoi wemambiri we yutawang inontarainesa tuti wedayasa emarareha fo, tonanai kontai we Allai ne beng dohona fo, ambori wemambiri we yutawang tata tuti dohong tata tamasi aha, ambori tatarang wenumainu, na Yesus Kristusi, tane Sengfoi.

6

Tamarareha weru sasari ne mambiriufoi ampa, tuti tatarang na Kristusi aha

¹ Ampafe tonana mani tamadu fiani kariri finanai? Tanari sasarifo pampang ambori Allai dohong ne bengfo arora we tata fuba aha ne?

² Todoni kontai bereri! Weo na taweboyari ria Kristusi fo tamarareha weru sasari ne mambiriufo. Tonana mani mai we tanayai na sasari rorong fo pampang aha kaha.

³ Ete mewaitawana kahai we rahida tawebaptisi fo, finanai deinawiai we taweboyari ria Kristusifo ne? Na tonanane, nana mani taweboyari kontai na ne mararehafoi amani tata kontai tamarareha riati.

⁴ Na baptisi nani deinawiai kontai we esarai tata kontai ria Kristusi, weo tamarareha riati fefe, ambori kariri Kristusi we suwi na marareha rorong foi na Dai Allai ne sambewaraio dadai fo, tonanai kontai tatarang aha

* **5:17** Kariri mararehafoi, Adami ne sarawafoi wedaya tata kiai tane tarainei mireha, tuti tanumianinunei kontai mireha, nana mani tanumianinunei ketai waroi weru Allai tuti sodai dadirafo wefitawafa.

tuti taminohi weinontarai weworu aha. Ampafe todoni kontai wiro tanayai na sasari rorong fo ahang kaha.

⁵ Masino tawebboyari ria Kristusi kawurua na ne mararehafoi mani, nana mani todoni kontai ambori tawebboyari kontai riati na ne suwi aha foi, amani tata kontai tasuwi kariri I.

⁶ Weo tawaitawanai we tane tanari toaio memo nei, epahuai kontai ria Kristusi na aitabafoi ampa, ambori tane tarai wesasari nanai wefiea aha kaha, ambori wiro tawewoming we sasarifoi tuti tanayai na sasari rorong foi aha fanai.

⁷ Weo mandoni dino mireha mani wenani kesau weru sasarifoi.

⁸ Ampafe masino tamareha ria Kristusia mani, taroasoai we tata kontai ambori tatarang riati aha.

⁹ Weo tawaitawanai we Kristusi Allai duwiri suwi na marareha rorong foi aha fo, wiro mireha aha kaha; mararehafoi wiro wemambiriu we yutawani ahang kaha.

¹⁰ Marareha Kristusi sodairi nani mani, mireha we kiraikobu sasari ne mambiriufoi. Sodai ne tonanane we beyari kawuru we fitawafa, wape darang aha, amani minohi darang we Allai.

¹¹ Mea kontai todoni kontai metato mea tonanai, amani memarareha we sasarifoi ampa, wape metarang we Allai aha na meweboyari ria Kristus Yesusi fo.

¹² Ampafe wiro metua sasarifoi yutawang mene taraio ambori wioru wai

fanai, ambori wiro metohong kariri menemiro rongno kerira wai kaha.

¹³ Dohonao metohong mene taraiwai kontai we sasarifoi we niari fi karira fo fanai. Wape metohong mea we Allai we inontaraio raminde nanai memararehara wape ninaia mani metawera weru mararehafoi to arangfo aha. Tuti metohong mene taraiwai sentenang we Allai ambori niari mea we menari fi masi fo.

¹⁴ Weo sasarifoi wiro wenunggamiei we yutawang mea ahang kaha, weo wiro menayai na Hukumi Musai foi ne mambiriufo aha kaha, mae ninaia mani Allai ne bengno dohonai arora fo yutawang mea ampa.

Wiro mewewoming we sasarinei ahang kaha, mae mewewoming we Allai ne dawiafo

¹⁵ Tonana mani tatohong todoni? Tarahai tarurai we tanari sasari aha e, weo Hukumi Musai soi foi ne mambiriufo wiro yutawang mea ahang kaha, mae Allai ne beng dohonai arora fo ne mambiriufo aino yutawang meara. Todoni kontai tanari tonana kaha!

¹⁶ Mewaitawanaifa we masino metohong mene taraiwai we manei we menari kariri ne dawiafo, nana mani mewewoming we wenani. Amani mewewoming we sasario kia mea we mararehafoi fo, ete mewewoming we metohong kariri Allai ne dawiafo tuti na tonanane memasi na Allai urengreaflo.

¹⁷ Wape tafiai Allai tato-hong mahikai wei, weo raminde nanai mewewoming we sasarifoi, wape ninaia mani na menemirorong boyari metohong kariri aunau wetarai mesobuai tuti meroasoaoia fo.

¹⁸ Kristusi feriri mea mehasau weru sasarifi ampa, tuti ninaia mani mewewoming we Allai ne awiafo, we ambori menari fi masi fo terai.

¹⁹ Mene metafu kaiwo na Allai fo masi kaharai, ampare imadu we mea na kaiwo riwansoai kariri inontarai ewewoming fo, ambori ahera metafu. Raminde nanai metohong mene taraifoi sentenang wewoming we fi werarika fo tuti fi karira fo we menari ne karirafo sewa aha. Tonanai kontai we ninaifara mani, todoni kontaio metohong mene taraiwai wewoming we Allai ne dawiafo, we menari fi masi fo terai, ambori memararebanai ki.

²⁰ Rahida mewewoming we sasarifoi mani, mehasau weru Allai ne masifo.

²¹ Rabuang bonani fi mai fianio mesobuafa na fio ninaia mani dohong mea memamaya wea fo ne? Weo finanai kia maifea kahai, mae kia te mararehafo.

²² Wape ninaia mani mehasau weru sasarifoi tuti mewewoming we Allai ampa. Fi bengno mesobuai na ne tonanane mani, meminohi memararebanai, tuti finanai wedaya metarang we fitawafa tuti meminohia numainu.

²³ Weo mararehanei mani sasarifoi ne fiembaita finana, wape arang we fitawafa tuti we numainufo ria Kristus Yesusi tane Sengfoi mani, fio Allai dohonai arora fine.

7

Fiyiwansoai kariri riraufo, deinawiai kariri tane fi tasobuai na Kristusi

¹ Doroi meaine! Mea kiai mewaitawang kariri Hukumi Musai soi fo ampa. Ampafe mewaitawanai we Hukumi nani wemambiriw we manei dohong karirifo, na rabuang bo wenani minohi darang fo terai.

² Weo ne tarai kariri wiwing riraua manei, na rahida ne mangfoi minohi darang fo wiwing nani hukumi rirau foi tebuhibiri ria ne mangfoi. Wape mangfoi mirehara mani, wiwingfoi kesau weru hukumi rirau nania.

³ Ampafe masino mangfoi minohi darang mae wiwingfoi rirau siai aha mani, wiwing nani ahui wewiwing niari sasari maninawa fo ria mang siai dine. Wape masino ne mangfoi mirehara mani, wiwingfoi kesau weru hukumi rirau foi ne mambiriuo yutawani tonanai ria ne mangfoi fo. Ampafe dau mang siai manei kontaio, niari sarawa kaha.

⁴ Doroi meaine, tonanai kontai we mea! Na mewebayari ria Kristusi ne mararehafoi fo wedaya memarareha we Hukumi Musai soi fo ampa, ambori Hukumifoi wiro yutawang

mea aha kaha. Ambori Kris-tusi, mano suwi na marareha rorong foi aha nani, ne mea ampa, ambori taminohifo tahasau we tanari fi beng bitoya we Allai.

⁵ Weo raminde nanai tathong kariri tanenemirorong wesasario yutawang tata foi. Fikarirao Hukumifoi deiwedua-ra fo mani, finanai sahu tata paria we tanariri, weo Hukumifoi neo deiwedua-rafo mani wedaya taene-mirorong dohong we fikarira nanai. Weo Hukumifoi mani ne tarai tonanai. Tuti nanai wedaya tasobu fiembaitao marareha fo.

⁶ Wape ninaia mani, Hukumi Musai foi wiro wiora tata ahang kaha. Tamara-reha we finanai ampa, ampafe wiro wemambiriu we tata ahang kaha. Tuti wiro tarufi karirifafong nanai, amani kariri fio soi na buku Hukumi foi, ahang kaha, mae tarufi we Allai na fi waworu kariri fianai aino Nuaninu Mirarebana foi deinawiai we tata we tanari fo.

Na tathong sara Hukumi Musai foi mani, deinawiai kasau ampa we taweinontarai sasari

⁷ Ampafe tonana mani fianai aino tamadurai kariri Hukumi Musai soi fo ne? Hukumi nani sasarifi dine ne? Bereri, wiro sasarifi dine kaha. Mae Hukumi nani dino deunau yau kariri sasarifi mani fifiani dine fo. Weo Hukumi nani bireri mani, iserawawera sasario ahui we ohong we inontarai siai

ene fi fo. Weo Hukumifoi medurai deyo, "Wiro bohong we inontarai ene fi fanai."* Mae medurai tonana kaha mani iserawerahai kontai we todoni yohong we inontarai ene fi fo sasari fine.

⁸ Wape na Hukumi Allai dohonai we tathong kaririai nanai, sasarifi sobu rang we yuai fi kerirao enehurorong dohong wea fo kai, toyari yohong we inontarai siai ene fi fo. Weo Hukumi nani bereri mani sasarifoi kontai mireha, amani ne pari mam-biriu.

⁹ Raminde nanai yarang imino hi fo wiro kariri Hukumifoi kaha, weo iserawawera Hukumifoi. Wape rahida isobu Hukumifoi nanai, sasarifoi darang na yau

¹⁰ tuti imereha finanaia, amani ikatai waroi weru Allai. Ampafe Hukumio todoni kontai wedaya yau yarang fo, wiro kaririai tonanai kaha, mae kia mararehafo we yau.

¹¹ Weo sasarifoi sobu rang na Hukumifoi we sofa yau, tuti na Hukumi nani kontai ming yau nai.

¹² Ampafe, Allai ne Hukumifoi mirarebanai, tuti ne Kaiwo dohonai we tathong kaririai fo mani, mi-rarebanai, masi tuti beng.

¹³ Ampafe na tonanane, deinawiai we Allai ne fi beng fo, amani ne Hukumifoi, kia mararehafo we yau e? Todoni kontaio bereri! Weo sasarifoi dino kia mararehafoi ne. Wape Hukumi Allai dohonai we tathong kariria fo mani,

* **7:7** Keluaran 20:17; Ulangan 5:21

sasarifo niariri we rang we kia mararehafo we yau, amani niari yau ikatai weru Allai. Nanai kawariai ambori deinawiai kasau we sasarifo niayai na enehurorongnei, tuti ambori atioai we kasau we sasarifo mani fi karira paria fine.

Tawemambiriu we tathong kariri Allai ne Hukumifoi kaha, weo sasari niai na tata pampang fefe

¹⁴ Tawaitawanai we Hukumi Allai dohonai we Musai foi, fi da na Nuaninu Mirarebana foi ma fine, wape yau mani inontarai batang di yau, inontarai iwewoming we sasarinei di yau.

¹⁵ Weo fi inari ne mantaung yau kontai iserawawerahai. Fio beng yohong weai we inari fo, finanai wiro inari kahai, mae fio enehurireuwa fo aino inari ne.

¹⁶ Ampafe masino inari fi karirao wiro enehurorong dohong wea kaha fo, nana mani iroa weai we Hukumi Musai soi fo mani denteng.

¹⁷ Masino tonana mani wiro yauno inari fi karira fo nana kaha, mae sasario wemambiriu na yau foi andino niariri ne.

¹⁸ Weo iwaitawanai we na yau, amani na yau iweinontarai sasari nei, wiro fi beng feai niai na yau kaha. Weo enehurorongnei dohong we inari ne bengfo paria, wape iwemambiriu we yohong kariria kaha.

¹⁹ Wiro fi bengno yohong wea fo aino inari fo kaha,

mae fi karirao imaya we inari kaha fo aino inari pampang ne.

²⁰ Ampafe masino inari fi imaya we inari kaha fo, finanai deinawiai we wiro yauno inari fo aha kaha, mae sasario wewora yau foi andino niari ne.

²¹ Ampafe isobuaifa we fi kawariai pampang toninai. Na kutuo yeo inari ne bengfo mani ne karirafo aino kawariai na yau ne.

²² Weo na enehurorongfuisio Nuaninu Mirarebana foi niarioa weworu nei ifaraise paria we Allai ne Hukumifoi.

²³ Wape na nehu tarainei iwati mambiriu siai bei kontai, amani sasario yurai we dapa Hukumio enehurorong ketui fuisi yoa wei foi. Tutu mambiriu siai nani wewora yau inayai na sasari rorong fo ne tarai toyari inai na aitamu rorong.

²⁴ Inontarai kerira paria di yau! Mandoni dino ambori feriri yau weru nehu tarao kia yau to mararehafoi nini ne?

²⁵ Ifiai Allai, yohong mahikai paria wei. Weo I feriri yaua, na Yesus Kristusi, tane Sengfoi, tuti dohong yau ikaharai weru sasari ne mambiriufoi.

Ampafe mantaung yau na enehurorong ketui nei, iwewoming we yohong kariri Allai ne Hukumifoi, wape kariri na nehu tarainei mani, enehurorong wesasari nei wedaya yau iwewoming we inari kariri hukumi sasari foi.

8

Taminohi kariri todoni Allai Nuaninufoi sensoni tata fo

¹ Tonana mani, ninaia mani mano eweboyari ria Kristus Yesusi nesa mani, Allai wiro dinggaisa ahang kaha, tuti esodai aiboifo ahang kaha.

² Weo na taweboyari ria Kristus Yesusi fo, Nuaninu Mirarebanaio dohong arang foi, ne mambiriufoi fiorehu tatara tahasau weru sasari tuti marareha foi ne mambiriufo ampa.

³ Weo fianai aino Hukumi Musai soi fo wemambiriw we niari kaha fo, amani wiro fiorehu tata weru sasarifoi ne mambiriufo kaha fo, weo mantaung tata tawemambiriw we tato hong kariria kaha fefe, finanai Allai niari ampa. Amani na denatu mantauni ne Kaisungfoi meu, weinontarai batang kariri inontarai tawesasari ne tata, ambori dohong ne tarai fofoi mireha we dufiira tane sasarinei. Tuti na tonanane Allai kiraikobu sasarinei ne mambiriw ni-ayai na tata foi.

⁴ Allai niari tonanafo, ambori ninaia mani tamasi na urengreaf, toyari Hukumifoi dereraia foi. Weo tato hong kariri taenemiro- rong wesasari nei aha kaha, mae ninaia mani taminohi weinontaraio tatarang na Allai Nuaninufoia fo.

⁵ Inontarai mano eminohi kariri enemirorong wesasari fo fosa, enemituui terai we fianai aino mantaunsa enemirorong wesasari nani dohong wea fo. Mae mano eto-

hong kariri Allai Nuaninufoi sa mani, enemituui pam- pang kariri fianai aino Allai Nuaninufoi dohong wea fo.

⁶ Masino enetituuitawa niayai na enerorong wesasari foi mani, ambori sodai mararehafo. Wape masino enetituuitawa Allai Nuaninufoi yutawani mani, sodai ne maifo, amani darang na tarai tuti minohi na mai.

⁷ Inontarai mano enetitu- aitafo kariri sasari foi mani, wenani weaiteta we Allai. I wiro dohong kariri Allai ne Hukumifoi kaha, tuti miaya kontai ki wape ne mambiriufeai we dohong kariria kaha.

⁸ Mano eminohi kariri enemirorong wesasari fo fosa mani, Allai eneosa kaha.

⁹ Wape mea mani wiro meminohi kariri menemiro- rong wesasari wai kaha, mae meminohi kariri Allai Nuaninufoi ne dawiafo. Masino Allai Nuaninufoi niayai na menemirorongwai tarai, nana mani meminohi tonana. Mandoni dino sobu Kristusi Nuaninufoi kaha mani, wenani wiro Kristusi nenii kaha.

¹⁰ Wape masino Kristusi niayai na mea mani, masino sasarinei wedaya mene taraiwai mireha ki, wape na Allai Nuaninufoi metarang aha, weo Allai deto mea memasi na arongreaf ampa.

¹¹ Allai duwi Kristusia suwi na marareha rorong foi na Nuaninu Mirarebana foi ne mambiriufoi. Tuti masino Allai Nuaninu nani niayai na mea kontai mani, mene taraiwai mireha kontai ki, wape

Allai ambori duwi mene taraiwai ambori metarang aha, na Nuaninuo niayai na mea nani fai ne mambiriufok.

¹² Ampafe, doroi meaine, tata mani wiro inontaraio tahasau funoma di tata kaha, weo todoni kontai tatohong kariri Allai. Wape tahasau weru tatohong kariri taenemirorong wesasari nei tuti taminohi kariria fo.

¹³ Weo metohong kariri menemirorong wesasari wai tonanafo mani, ambori memarareha ki. Wape masino na Allai Nuaninufo ne mambiriufo, mehabi pari mene menari toaio kia sasari we mea fo pampang mani ne tarai toyari memung sasario niayai na mea nani, nana mani ambori metarang ki.

¹⁴ Weo inontaraio Allai Nuaninufo wiwiainsa fosa mani, ea mani Allai ne arikang saine.

¹⁵ Weo Allai Nuaninu mesobui foi mani wiro dohong mea mewewoming ahang kaha, ampafe wiro mematai ahang kaha. Mae Nuaninu mesobuia nani mani, Nuaninuo Allai dohoni we inontaraio yuaisa we ne arikangfosa. Tuti na Allai Nuaninu nani ne mambiriufo terai, tasahu Allai tateyo, "Daie, Dai wo!**"

¹⁶ Allai Nuaninufoi deikaririai wetarai kontai we tanumianinunei we tata mani Allai ne arikang di tata.

¹⁷ Ampafe Allai ne arikang di tata tonana mani, tane mambiriufo kontai we tane

tarai toyari arikangno ambori sobu wawafoi ne rafo, amani tata kontai tasobu fio Allai dererai we dohonai we ne arikangfosara fo. Tuti tasobu fio Allai meinenaamai we Kristusi fo kontai riati ki, weo tasodai dadirafo ria Kristusi mani, ambori Allai dohong tata tasobu neo sambewaraio dedai fo riati kontai ki.

Dadirafo tasodairi nini wiro ne tarai kariri fi sambewarai tuti dadaio ambori tasobuafo kaha

¹⁸ Iroasoai we fi dadirafo tasodairi na nunei nini sayaiyai arora, masino titua weai na fi sambewarai tuti dadaio ambori Allai deinawiai we tata fo.

¹⁹ Allai ne warawauanei sentenang, amani nunei tuti fi kiaio niai nai nei, ne tarai toyari sai rahangan demang we rahida Allai deinawi mano sahusa we ne arikangfosa.

²⁰⁻²¹ Weo nunei tuti fi kiaio Allai niariri nei, Allai suatia doni wefieai ahang kaha, na rahidao Adami dohong sasarifoi. Finanai wiro kariri nunei ne awiafo kaha, mae Allai dino suati sodai ne tonanafo ne. Tonanai ki, wape nunei tuti fi kiai nani enetawanai we rahida bei wori Allai fiorehui weru ne wewoming we karirafo tuti kenggung tonana fo ki, yuaisi ambori kesau tuti dedai sambewarai mai kariri Allai ne arikangfosa esobua fo.

²² Weo tawaitawanai, nunei tuti fi kiai niai nai nei sodai dadira karira bitoya paria. Ampafe paria

* **8:15** Na Yahudi ene kaiwo Iberani mani, Abba.

ninai, finanai disani sai tuti pepirahai paria, ne tarai toyari wiwinsanaio pepirahai demang we katu mani minohi fo, amani demang we rahidao Allai niari finini kiai weworu ahang fo.

²³ Tuti wiro nunei meiri dino sodai ne tonana ne kaha, mae tata kontai, mano tasobu Allai Nuaninu Mirarebana foi wefiaiawiai reantenang foi, deinawi kariri fi beng kiaio ambori tasobua fo ki. Tata kontai taenemirongnei disang tata tasai tuti tapapirahai, tatamang weai paria we Allai fiorehu tata tuti yuai tata we ne arikang, amani feriri tane tarainei.

²⁴ Na rahida takaharai weru tane sasarifi paria ninai, taenemitawanai pampang we ambori tasobu finani kiai nano Allai. Wape fianai taenemitawana fo, tasobuai kawurua mani, finanai wiro fi taenemitawana fine ahang kaha. Weo mandoni dino enetawang fi sobuai kawurua fo ne?

²⁵ Wape masino taenemitawangno fi tasobua kaharai fo mani, finanai tatamang weai na tatawang tata.

Nuaninu Mirarebana foi fita tata tatutang we Allai

²⁶ Tonanai kontaifa, Allai Nuaninufoi fiata tata na tane tafanahangfo. Weo taserawera todoni tawenadifo, wape Nuaninu nani mantauni doa rahanai dutang tuti tata we Allai, sai na enerorong pepirahai paria, dutang na kaiwo taramioa kaha fo.

²⁷ Tuti Allai mano deti bau inontaraine taene-mirorongfuisi, deitawangno Nuaninu Mirarebana foi ne enetituaitafo, weo doa rahanai dutang tuti inontarai tamararebana ne tata we Allai, tuti dutanafo kariri Allai ne dawiafo.

Nafifiani kontaio, Allai do-hong beng we tata

²⁸ Tuti tawaitawanai we Allai kiontai yufi na fifiani kontai, we wedaya ne bengfo we inontaraio enemiwawuti nesa, amani inontaraio sahusa kariri ne dawiafoa nesa.

²⁹ Weo na reantenangfo Allai deitawangno mandoni dino ambori ne inontarai disa fo, ampafe dirisa kontai we ambori ene tarai kariri ne Kaisungfoi, amani Yesus Kristusi. Ambori na tonanane wekaisung fuba na ne tahatui bitoya fosa.

³⁰ Tuti mano dirisa na reantenangfoa nanisa, sahusa kontai. Tuti mano sahusara nanisa, deiaisa kontai we ebeng riati. Tuti mano deiaisa we ebeng riati nani sa, ansaino yuaisa tono ne sambewaraio dedai rorong fo konta ne.

Fifiani kontai wiro we-mambiri we dirapa tata weru Allai ne enewawu tata na Yesus Kristusifo

³¹ Ampafe tonana mani, finanai tamadurai kariri finanai kai ne? Masino Allai kiontai na do tata mani, mandoni dino wemang we dapa tata ne?

³² Weo ne Kaisungfoi mantauni kehiwari kaha, mae sawini we mireha we

tata kiai, tonana mani todoni kontaio fi siai wei fo dohonai arora we tata rai.

³³ Allai ne inontarai diri tatara di tata. Ampafe mandoni dino wemang we dinggai tata ne? Allai mantauni deiai tata we tabeng riati.

³⁴ Mandoni dino wemang we dinggai tata tuti deyo tasobu aiboi ne? Weo Kristus Yesusi doa rahanai tuti medu tuti tata. Andino raminde mireha we tatane, tuti wiro mireha tera kaha mae, suwi na marareha rorong foi tuti minohi na Allai warang domoya foi, medu tuti tata pampang.

³⁵ Fianai aino wemambiriu we dewa tata weru Kristusi ne enewawu tata fo ne? Dadi-rafo ne? Ete dadira doni konta fo, ete inontarai enari kanggani tata fo, ete kaharifo, ete tane pari fi fo, ete fi memuna fo, ete inontarai emung tata fo ne? Wape finani kiai wiro dewa tata weru Kristusi ne enewawu tata fo kaha.

³⁶ Weo na Kaiwofo weai dotu toninai:

“Rahida neungne kaiwasa
enari kanggani amea,
pariao adareti emung
amea amemarareha,
weo ameraria Sengwa
wau fefe.

Ewati amea toyari dombao
emainenang we emunsa.”*

³⁷ Wape na finanai kai, tatawai kahai mae taharai kobuai na Kristusi, mano enewawu tata foi.

³⁸ Weo iroasoai paria we fifiani kontai, amani

mararehafoi ete arangfoi, wewaifosa ete nuaninu karira fosa, fio kia dadira fo we tatafo na ninai ete na rahida da aha ma fo, ete mambiriu siai wei fo,

³⁹ fio na rorafaisi tuti na nunei, ete fifiani kontai ki, finanai wiro wemambiriu we dewa tata weru Allai ne enewawu tata fo kaha, amani na enewawu tata na Kristus Yesusi tane Sengfoi.

9

Paulusi sai we Yahudi efau fosa weo eroaso Kristusi, Mananu Mampariri foi, kaha

¹ Fianai aino imadurai ninai mani, imadu tarai na Kristusi, wiro itofa kaha. Enehurorong ketuio Allai Nuaninufoi wiwiainia foi, medurai kontai we kaiwo imadurai ninai wetarai.

² Enehurorongnei fituayai tuti arohukuayai pampang,

³ we nehu doroio amene nu boyari fosa paria, weo eroaso Yesusi weMananu Mampariri fo kaha. Imaine-nang we itawing yau pariao Allai deikanggani yau tuti ikatai weru Kristusi we nehu doroi nanisa masino nanai wedaya esobu faririfo.

⁴ Weo ea mani inontarai Israelia Allai dirisa tuti yuaisa we ne arikangna fo saine, tuti esobu ne sambewaraio dadai fo. Eaino ene Kaiwo Arerai ria Allai tuti Allai do-hong ne Hukumifo ria Musai wesa. Deikaririai wesa kariri todoni esomi wei fo tuti do-hong kaiwo dereral siai wei fo wesa ampa.

* **8:36** Masmuri 44:22

⁵ Ea mani eweriria na Abrahami, Isaki nanisa ma, tuti Kristusi mantauni, na weinontarai batang fo mani, weriria na ene werengfosa kontai ma. Kristusi mani Allai dine, dedai sewa fifiani kontai, tuti tafiai we fitawafa. Antu!

Abrahami ne ririafosa, wiro ea kiai Allai dirisa we mioansa na kaiwo arera fo kaha

⁶ Fiani anta imadurai kariri Yahudi ne ea kiai wiro ehontai Allai ne arikangfosa kahai nanai, finanai wiro deinawiai we Allai wiro dohong kariri ne kaiwo arerai we inontarai Israeli fosa kaha. Wape Allai tarai dohong kariri ne kaiwo arera fo nana rai! Weo inontarai etaubau enumi we Israeli fosa Allai wiro sahu ea kiai we ne inontarai dirisa disa kaha.

⁷ Kontai wiro Abrahami ne ririafoi sentenang Allai sahui we Abrahami ne arikang tarai dine sentenang kaha. Weo Allai medu toninai we Abrahami deyo, “Isaki ne ririawai terai ansaino ahusa we nemu arikang ne.”*

⁸ Nana mani wiro mano eweriria kiai na Abrahami ma fosao ahusa we Abrahami ne arikang disa kai kaha, mae manta mano eweriria na arikang mano saubaunung kariri Allai ne kaiwo derera foi terai.

⁹ Weo Allai ne kaiwo derera fo dotu deyo, “Na rahida ikutuaia foi, amani rahidao ira aha mau ki, ambori Sarai

minohi tuti ne kaisung manei kawurua.”*

¹⁰ Wiro nanai tera kaha, mae ne kasau aha mani, watioai na Isaki tane werengfoi binengno Ripikai. Weo minohi tuti ne arikang tantamuru mang mandu fo une dai mansiri, amani Isaki.

¹¹⁻¹² Weo arikangfo suru wiro utaubau unumi kaharai mae, Allai medurai kawuru kariri mandoni dino diriri fo ampa. Allai diriai tonanafo wiro kariri fianai aino inontaraine enari fo kaha, mae kariri mantauni deo sahu mandoni fo kariri ne dawiafo. Weo rahida bo arikangfo suru wiro uwaitawang unari fi bengfo ete karirafo kaharai mae, Allai medu kawuru we Ripikai deyo, “Mano fuba foi ambori wewoming we mano katui foi ki.”*

¹³ Kariri ne kaiwofo dotu deyo, “Yakupi na reantenangfo paria ninai, enehuwawuti, wape Esauwi enehurireuwi.”*

¹⁴ Ampafe na diri manei mae manei bereri tonana fo tateyo Allai enerorong mesi kaha e? Bereri kontai!

¹⁵ Weo Allai medu we Musai tonina:

“Yau ambori yeinawi nehu enehurorong denteng nei
we mandoni dino enehurorong denteng wei fo,

tuti arohuo mandoni dino yevo arohuoi fo.”*

* 9:7 Kejadian 21:12

* 9:9 Kejadian 18:10, 14

* 9:11-12 Kejadian 25:23

* 9:13 Maliaki 1:2-3

* 9:15 Keluaran 33:19

16 Ampafe Allai kiuntuai we diri mandoni fo, wiro kariri inontaraine ene etawiafo ete erurai toa fo kaha, wape kariri ne aro inontaraine tata fo.

17 Weo na ne kaiwofo rabuang bei dotu kariri medu we mananu Firauni na nu Mesiri foi fo. Amani medu tonina:

*"Iruai wau we wemananu Firauni ne mani,
we fi beyari terai yawi
weai,*

amani na wau yeinawi nehu
mananune
tuti inari Yau iwe-
wono hu na nunei
sentenang."*

18 Ampafe Allai deinawi ne aroafo we mandoni dino deyo dohonai tonanai wei fo, tuti niari manei nunggamiei mitubaru fo, finanai kariri mantauni deyo niari wenani tonana fo.

*Allai ne haki we deinawi
ne kasoufo we mandoni dino
diriri we sodai ne tonana fo,
tuti deinawi ne enerorong
denteng foi we mandoni dino
diriri we sobu finana fo*

19 Nanaia mani mane wau modu boyo, "Masino Allai niari tonana mani, we fiane dinggai inontaraine tata we tatohong sarawai nina? Weo inontaraine mandoni dino wemambiriu we dirapa Allai ne dawiafo ne?"

20 Wape inontaraine waune, mandoni di wae we modu tonanai we Allai nina? Wau mani inontarai arora di wau, ampafe we fiani modu tonanai boyo finiarifo mai

kahai nina? Tofino, manei niari fiea mani, finiarifo dutang berahi deyo, "We fiani nari yau toninai wei ne?" tonana rai e?*

21 Todoni kontaio mano niari fi na kahofa ura foi ne haki we samu babeu bei na kahofa nanai we fio mai pari fo, tuti weai kontai we fi mayewa fo, nana mani kariri mantauni ne dawi wea fo terai.

22 Tonanai kontai we fianai aino Allai niari fo. I ne haki we niari sua inontarainesa kariri ne dawiafo terai. En-erorong we niari kariri ne ka-soufo we inontarai ewesasari fosa tuti deinawi ne mam-biriufo. Tonanai ki, wape i kontai sikera we dohong ai-boi wesa kaha mae sawani we inontarai mano emasi we ambori esobu aibooi eworu fo nani sa.

23 Niari tonanai weo de deinawi ne sambewaraio dadai bitoya paria fo na inontaraio arosa fosa, amani inontarai siaio na reant-nangfo niarisatutimeine-nansa we esobu ne sambe-wara dadai fo.

24 Amani tata kontai mano sahu tata kawurua ne tata, wiro na Yahudifosa tera kahai, wape na kaiwasa siaio wiro Yahudi kaha fosa kontai.

25 Weo na kaiwo nabi Hoseai soi foi Allai medu toninai:

*"Mano wiro nehu inontarai
disa kaha fo,
ambori isahusa we
'Nehu Inontarai' ki;
tuti mano raminde ene-
huwawusa kaha fosa,*

* 9:17 Keluaran 9:16 * 9:20 Yesayai 29:16, 45:9 * 9:25 Hosea 2:23

ambori isahusa we
'Mano Enehuwawusa'
ki."*

26 Tuti Hoseai medu aha,
"Tete na nu siaio etarami
kaiwo deyo,
'Mea mani wiro nehu in-
ontarai di mea kaha,'
Na katai nanai kontai ki, am-
bori esobu wangno,
'Allaio Darang Wefitawa
fo ne arikangfosa'."*

27 Tuti nabi Yesayai sahu
kariri inontarai Israeli fosa
deyo,
"Inontarai Israeli fosa bitoya
toyari ninuaing na na-
fareng,

tonanai ki wape efau
kaha ansaino ambori
esobu faririfo ne,

28 Weo Sengnei ambori saw-
ing ne aiboifo to nunei
ki,
niaria kai, tuti ahera."*

29 Tuti toyarifafong nanai
Yesayai medurai kontai deyo,
"Masino Seng Allai mano We-
mambiri Mantaung
nei wiro sawing riria
we Yahudine tata kaha
mani,
tata kiai tane tarai kariri
Sodomi,
tutu tane tarai toyari Go-
morafoi ampa."*

*Yahudifosa eteiyaya eroaso
Yesusi fo, donio paria ninai
kontai wiro emasi na Allai
urengreafoka*

30 Tonana mani fianai
aino tamadurai aha ne,
mae kaiwo finina; Inontarai
Yahudi kaha fosa wiro erurai
esera we ambori emasi na
Allai arongreafoka. Wape

esobuai ampa. Na ene
eroasoaf terai Allai niaris
emasi na arongreafoka.

31 Wape Inontarai Israeli
fosa mani etawiai paria we
etohong kariri Allai ne Huku-
mifoi ambori emasi na aron-
greafo, wape esobua kaha.

32 We fiani esobua kahai
tonanai? Weo esera we
emasi na Allai arongreafoka
wiro na eroaso Kristusi fo
kaha, mae na enemitawang
te fi mantaunsa enari fo.
Ampafe kamiei odairi foi
esodai eawemifo nai, amani
Kristusi, tuti etawai.

33 Toyari na Sempaisi ne
Kaiwofo rabuang bei dotu
kaririai tonina:

"Mewati! Nano Sioni yohong
kamiei bei wiatai nai
ampa,
kamiei nani ambori
wedaya inontarai
esodairi,
amani kamiei fubao
manei sodairi mani
wedayari sawai.

Wape mandoni dino yoasoi
mani,
wiro sobu mamaya
kaha."*

10

¹ Doroi meaine! Enehuro-
rong dohong weai paria, we
ambori nehu doroi amene nu
boyari fosa Allai feririsa. Tuti
yutanai paria we Allai wesa.

² Imadu kaririai kariri
sa we enemirorongfoi niu-
nunsa paria na ene esomi
we Allai fo, wape Allai ne
rang wetarai foi ewaitawana
kaha.

³ Weo ewaitawang kariri todoni emasi ria Allai fo kaha, amani rangno Allai dohoni we inontarainesa, amani Kristusi. Etawiai we eru tawang mantaunsa ene rang siai, tuti emarira we ehontai Allai na ne rang dohoni we ambori emasi riati foi nani.

⁴ Hukumi Musai foi mani, Kristusi niari ambori we reng ahang kaha. Ampafe inontarai mandoni dino yoaso Kristusi mani, wenani mesi na Allai arongreafo.

Na roasoafu terai wedaya mandoni kontai Allai feriri

⁵ Weo Musai soi deyo, mandoni dino deo mesi na Allai arongreafo na dohong kariri Hukumifoi mani, wenani minohi darang nano ne dohong kaririai na mai pari fo.*

⁶ Wape kariri todoni inontaraine emasi na Allai arongreafo na eroasoafu, Musai ne kaiwo rabuang bei dotu tonina:

“Dohonao enemutituai boyo,
‘Mandoni dino dautai to rorafaisi ne?’*

[Weo nanai mai kaha weo ne tarai kariri boyo ka Kristusi biari meu ne,]

⁷ ete, ‘Mandoni dino biari to marareha rorong foi aweu ne?’*

[Weo nanai kontai mai kaha weo ne tarai kariri tata taha Kristusi dautai weru marareha rorong foi meai ne.]

Weo roasoane mani, ne tarai tonana kaha.

⁸ Wape fiani aino kaiwone dotu kariria fo mani tonina: “Allai ne kaiwofo waroi weru mea kaha,
mae kefang we mea paria,
nayai na meboromiwa tuti na menemirorongwai.”*

Kaiwo nanai aino amewuwuaifune, amani kaiwo we inontaraine eroasoai.

⁹ Weo masino memadurai na meboromiwa we “Yesusi mani Seng dine,” tuti meroasosai na menemirorongwai we Allai duwiria suwi na marareha rorong foi aha fo mani, Allai feriri mea ki.

¹⁰ Weo na taenemirorongfoi taroasoai, ampafe Allai deto tata we inontaraio tabeng riati aha. Tuti tamadurai na taboromine we Yesusi mani Seng dine, ampafe Allai feriri tata.

¹¹ Toyari Sempaisi ne Kaiwofo weai dotu tonina:
“Mandoni dino yoasoi mani, fiea dohoni mimaya kaha.”*

¹² Kaiwo nanai dotu we inontarainesa kiai, weo inontarai Yahudi fosa tuti Yahudi kaha fosa emasi kiai, wiro manei siai weru manei kaha weo ea kiai esobu fariri na eroaso Kristusi fo terai. Weo Seng mansiari foi mani, weSeng we kaiwasanei kiai, tuti inontarai mandoni kontaio eroaso Kristusi tuti esahu na wonongfo mani, mioansa fuba paria.

¹³ Weo Kaiwofeai dotu deyo,

* **10:5** Imamati 18:5 * **10:6** Ulangan 30:12 * **10:7** Ulangan 30:13 * **10:8**

"Inontarai mandoni kontao esahu Sengnei ne wonong fosa mani ambori feririsa ki."*

¹⁴ Wape masino eroasoai kaharai, nana mani esahu we Sempaisi we feririsa todoni? Tuti todoni ambori eroaso mano etaramio kaiwo kariri I kaharai fo? Kontai todoni ambori etaramioai, masino manei wiuwui wesa kaha?

¹⁵ Tuti todoni ambori inontarai ewuwu kariri, masino manei demisa kaha? Toyari na Kaiwofo weai dotu tonina:

"Inontaraio era ma eha Kaiwo Mahikai fo fosa mani kaiwasa demang wesa."*

¹⁶ Wape Israelifosa, wiro ea kiai eroaso Kaiwo Mahikai fo kaha. Weo Yesayai medu toninai deyo,

"Sengne waune,

toyari manei wiro yoaso kaiwo amemadura ne kahaia."*

¹⁷ Ampafe roasoafu kawariai na fianai aino etaramioa fo, tuti fianai etaramioai nanai weneung na kaiwo ewuwua fo, amani Kristusi ne kaiwofo.

¹⁸ Wape yutang berahai, tarai we etarami kaiwo kariri Kristusi kaharai e? Todoni kontai etaramioai kawuru ampa! Weo na Sempaisi ne Kaiwofo weai dotu deyo,

"Erawamifuifoi dotu wari nunei sentenang ampa,

tuti ene kaiwofo dafai wariaia sobu nunei rea naya fo ampa."*

¹⁹ Yutang berahai nariai aha mau wo, tarai we inontarai Israeli fosa etafu kaiwofo kaharai e? Todoni kontai etafu kawuru ampa! Weo kaiwone Musai medu kaririai fafong, medu we Israelifosa, deyo, "Allai medu tonina,

'Inari mea we ambori menemirorong pirahai
na imoang inontarai na nu siai fo,
tuti inari mea mehasou inontaraio na nu eserawawer-
aha fosa.' **

²⁰ Yesayai medurai raisa aha deyo,

"Allai ne Kaiwo finina,

'Inontarai mano esera we yau kaha fosa esobu yau ampa,
tuti yeinawi yau we mano wiro etutang we yau kaha fosa.' **

²¹ Wape kariri inontarai Israeli fosa, Yesayai medu tonina,

"Allai medu deyo,

'Rahida neungne isi warahu we inontarai na nuo etapa yau tuti etohong kariri nehu kaiwofo kaha fosa.' **

11

Allai enerorong denteng we inontarai eweriria na Israelifoi ma

¹ Ampafe yutang berahaifa aha, we na toninane deinawai we Allai kebi ne inontarainesa ete deiayasa ampa ne? Bereri kontai. Mantaung

* **10:13** Yoweli 2:32 * **10:15** Yesayai 52:7 * **10:16** Yesayai 53:1 * **10:18**
Masmuri 19:4 * **10:19** Ulangan 32:21 * **10:20** Yesayai 65:1 * **10:21** Yesayai
65:2

yau kontai inontarai Israeli iweriria na Abrahami ma di yau, tuti na riria Benyamini.

² Yeikarirriaifa we wiro tonana kaha. Allai wiro kebi ne inontaraio na reante-nangfo dirisa kawurua fosa kaha. Mewaitawang kariri fianai aino dotu na Kaiwo Mararebana ne kariri Eliae fo ampa, amani kariri rahida bo dinggai inontarai Israeli fosa we Allai fo. Eliae medu deyo,

³ "Sengne Waune, inontaraine emung nemu nabifesa ampa tuti emei mesbaao nunung korbani we Wau nai fi kerirawa kiai ampa. Sea imeiri yau tuti ninaia mani esera we emung yau kontai."*

⁴ Allai medu fiani we Eliae ahang fo? Medu deyo,

"Inontarai ewe-7.000 yer-arasa we Yau ampa. Inontarai nanisa wiro esomi we Baali, mano weseng tarai kaha foi kaha, mae esomi terai we Yau."*

⁵ Tonanai kontai we na ninai, inontarai Israeli efau fosa eroaso kaha, wape maneiru teaio Allai dirisa na dohong ne bengfo arora wesa ampa, ambori eroaso Yesusi kontai.

⁶ Dirisa tonanafo kariri ne beng dohonai arora fo terai, wiro kariri inontaraifo ene erurai we enari beng fo kaha. Weo masino Allai dirisa tonanafo kariri ene enarifo

mani, ne bengno dohonai arora fo nanai wiro ahuai we ne beng fine aha kaha.

⁷ Ampafe tonana mani, fi inontarai Israeli fosa esera wea pari fo, amani ebeng ria Allai aha fo, wiro esobua kaha. Maneiru teai na sa ansaino esobua ne, amani mano Allai dirisara fosa. Mae bitoya na sa enumikamieifoi mitubaru.

⁸ Weo na Sempaisi ne Kaiwofo, wea dotu tonina:

"Allai niarisatoyari euremimamong
pariao enumiruainso
fiea ahang kaha,
tuti wedaya euremifotoyer
kabe
ampafe wiro ewati
ahang kaha,
tuti niari etaramifo etarami
fi ahang kaha,
pariao rahida nini kontai."*

⁹ Dauti medurai karirisa kontai deyo,

"Kadono ene fiang eparaise
nai fo,
ne tarai wewaitepari we
tipa berasa nariai aha,
toyari erang miko di-
angfo,
tuti ne tarai toyari bare
wesa,
ambori ene karirafo
tau wesa nariai
aha.

¹⁰ Kadono mamantitifoi
tebung wedua euremifo,
ambori wiro ewati kaha,
tuti kadono ehurumifo
tahapa we fitawafa."*

* **11:3** 1 Mananufosa 19:10, 14 * **11:4** 1 Mananufosa 19:18 * **11:8** Ulangan 29:4; Yesayai 29:10 * **11:10** Masmuri 69:22-23

Ninaia mani Yahudifosa etawai waroi weru Allai ampa, wape Yahudi kaha fosa esobu faririfo

¹¹ Ampafe tonana mani yutang berahaifa we, inontarai Israeli fosa etawai tonanafo, ambori wedayasa eworu we fitawafa ne? Todoni kontaio bereri! Wape we etohong roaina fo, wedaya inontarai Yahudi kaha fosa Allai feririsa. Ambori finanai wedaya Yahudifosa enemironing pirahai we Yahudi kaha fosa.

¹² Weo masino Yahudifosa ene etohong roaina fo wedaya Allai mioang nunei, tuti na ewaramitafufirafo wedaya inontarai na nu siai esobu moanafo, nana mani fi sewa aha mani, na etaraberasa we Allai aha fo, waitawang turu moanai fuba toai esobua fo aha kaha. Masino ne karirafo kia ne moanafea mani, todoni kontaio ne bengfo kia moanafo fuba sewa aha.

¹³ Ninaifa mani imadu we doroio Yahudi kaha wa mea. Na iwerasuli we Yahudi kaha ne mea fo, fio Allai dohonai we inari we iwerasuli fo, finanai yohonai ne fonai sewa fifiani kontai.

¹⁴ Enehutawanai paria we na fi inari tonana fo, wedaya nehu inontarai Yahudi fosa enemirorong pirahai weai pariao ea kontai emaya we eroaso Seng Yesusi, ambori na tonanane iwedaya manea na sa esobu faririfo.

¹⁵ Weo masino na Allai deiayasa to boriei fo wedaya nunei weboyari ria Allai aha, nana mani masino Allai

kiasa nariai aha mani, fi fuba sewa aha. Nana mani ne tarai toyari inontarai manei mirehara wape suwi darang aha.

¹⁶ Masino roti rea reantenang fo ohonai we Allaia mirarebanai, nana mani rotifoi sentenang mirarebanai kontai. Tuti masino ai newafoi mirarebana mani, arirawangfo kontai mararebanai.

¹⁷ Ai saituni foi arirawangfeai ferang kahutuai ampa, amani inontarai Yahudi manea ehatai weru Allai. Ea ene tarai toyari ai arawangfo we ferang kahutuai weru robongfoia fo. Tuti na katai ferang kutuai naya fo, Allai kia ai saitunio tifu funoma feai arawangfeai ma samu riwani na katai nanai awei, amani doroio Yahudi kaha wa mea. Allai sahu mea na nanai ambori mea kontai menumiruainso fiang mahikai we Yahudifosa fo, amani fiang da na ai saituni newa foi meai fo.

¹⁸ Mearomioaifa we mea mani ai arawang di mea tuti kaiwasa Yahudi fosa mani ene tarai kariri ai newafoi we mea. Meaino metohong fiang we ai newafoi kaha, mae newafoi dino dohong fiang we mea. Ampafe wiro mesahutawang mano Allai deiayasa to boriei toyari ferangkutusa weru ai robongfoia nanisa fanai.

¹⁹ Wape tarahio memadu meteyo, "Yo, wape ne arirawangfafong fo ferangkahutuaifa ampa

ambori Allai samu riwang amea na robongfoi!"

²⁰ Tarai, wape Allai ferangkutusa tuti kebisafō we eroasoa kaha, mae mea mani Allai kia mea ma fo we meroasoafō terai. Ampafe dohonao menemirorong dedai we finana fe, mae todoni mani mematai we dohonao mea kontai mene tarai tonana fe.

²¹ Weo masino Allai wiro kehiwao Yahudifosa kaha, amani mano ene tarai we ai arawang sobaurai beyari na ai robongfoi mandieī fosa, tonana mani dohonao mewaitaraihio menari sarawa mani, ambori kehiwa mea fe.

²² Ampafe na fininai tawati kariri Allai ne enerorong denteng fo tuti kariri ne tapapafo. Niarifo tapapa we mano etawa fosa, wape enerorongfoi denteng we mea, kutu na fino meminohi na enerorong denteng nanai pampang. Bereri mani, mea kontai ambori ferangkutu mea tuti kebi mea rai.

²³ Tuti kariri inontarai Yahudi fosa mani, masino efotourai na ene eroasoa kaha fo mani, Allai ambori samu riwansa na ai robongfoi aha ki. Weo Allai ne mambiriw we kia ea nariai aha ma we eweboyari riati aha.

²⁴ Weo, doroio wiro Yahudi kaha ne mea, mene tarai toyari ai arawang na saituni sifu funoma foi. Tonanai ki wape Allai kia mea tuti samu mea tono ai saituni mehikai sanami foi, amani ne inontaraifosa. Ampafe todoni kontai miawa arora

wei we kia ne arirawang tera fo, amani Yahudifosa, tuti samusa aha na ai denteng anta nani, amani ne inontaraifosa.

Allai enewawufo dohonai we inontaraine tata kiai, Yahudifosa tuti Yahudi kaha fosa kontai

²⁵ Doroi meaine, yohong weai paria we dohonao meserawawerahaifa, kariri fifafongfa Sempaisi dediwarai nanai. [Fi dediwarai nanai mani, Allai demang we Yahudi kahaio dirisara fosa eroasoai tuti weo Yahudifosa wiro enumikamiei mitubaru aha kaha, akawuru wori, Allai kia Yahudifosa aha ma feririsa ki.] Weo tarahai na meserawawerahai nanai wedaya mea mewaitarahio mewaitawang maino fifiani kontaifara ne. Amani, kariri todoni Yahudi bitoya enumikamiei mitubaru, wiro etohong kariri Allai ne Kaiwofo kaha. Wape ene tarai tonana fo paria inontarai Yahudi kahaio Allai dirisa fosa kiai era wei ma tuti eroaso Yesusi akawuru wo.

²⁶ Tuti ne tonanafoa kawuru, inontarai Yahudi fosa kiai ambori Allai feririsa, toyari kaiwofea dotu deyo,

"Mamparirinei da na benda dari Sioni ma,
I ambori dufisira riria Yakupi ene karira enari fo ki.
²⁷ Tuti nehu Kaiwo Arerai risa fo, yohong kariri ki,

amani yeiai ene sasarifoi fo.”*

²⁸ Inontarai Yahudi fosa eteiaya Kaiwo Mahikai kariri Kristusi fo, ampare eweaiteta we Allai, tuti na rang tonanane doroi inontarai Yahudi kaha wa mea mesobu mai nayai. Wape Allai dirisa kawuru ampa, ampare todoni kontaio Allai enewawusa, weo aro ene werengfosa.

²⁹ Weo masino Allai diri maneia tuti mioang wenanai mani, wiro fiouki fi niari nanai ahang kaha.

³⁰ Raminde nanai wiro metohong kariri Allai kaha, wape ninaia mani Allai aro mea ampa, weo Yahudifosa etohong kariria kaha fefe.

³¹ Tonanai kontai we inontarai Yahudi fosa. Ninaifara mani wiro etohong kariri Allai kaha, wape na tonanane Allai aro mea, tuti nanai ambori wedaya ea kontai Allai arose kontai ki.

³² Weo Allai sawing inontarainesa kiai enai na sasari rorong fo, ambori na tonanane deinawi we aro tata kiai na feriri tata fo ki.

Fiaifea we Allai

³³ Oh! Tarai paria, we Allai fianai aino neng fo werorong paria,

Ne awaifo tuti ne biriupo fuba paria!

Ne kiutu kaiwo fo manei tefu kaha,

Tuti ne yufi toa fo manei wiro deti maia kaha.

³⁴ “Mandoni dino deitawang Sempaisi enetituaitafone,

Ete mandoni dino dohong kaiwo aunau weia ne?”*

³⁵ “Mandoni dino dohong fieai kawuru wei ne, Ampafe yiwang fi dohonai wei tonana fo aha ne?”*

³⁶ Weo Allai meiri niari finini kiai ne.

Tuti fi kiai nini da na Ima, tuti we I kontai. Sambewaraio dadai feai we Allai we fitawafa! Antu!

12

Taminohiwau we Kristusi terai

¹ Doroi meaine, Allai ne aroaofo fuba paria we tata. Nanai wedaya yutang mea paria we todoni kontaio na meminohiwa metohong mene taraiwai terai we Allai, ne tarai toyari korbani darang tuti mirarebanaio metohoni terai we Allai fine tuti kia enerorongfo. Fio menari tonana fo, nana mani mene omi mesi dinani.

² Dohonao metohong kariri fi nunei aha fanai, mae metawing mene taraiwai we Allai we niariria weworu, na meriwang menemitituaitawara waworu aha. Na tonanane mewemambiriw we mewaitawang na mai kariri Allai ne awiafo, amani ne awiaio bengno kia enerorongfo tuti masifo.

³ Na Allai ne beng fuba pario dohonai arora we

* **11:27** Yesayai 59:20-21, 27:9; Yeremiai 31:33-34

* **11:34** Yesayai 40:13

* **11:35** Ayupi 41:11

yau ne, yeunau doroi mea kiai, dohonao menemitiuai we metadai sewa fe. Mae todoni kontaio metitua we mantaung mea na mene-mirorong tewawa, mansiari-mansiari wau titua bera wau kariri mene meroasoaf, amani mesobu mambiriw we meroasoaf fuba ete katui.

⁴ Weo tata mani, tane tarai bei, tuti tane tarai nani we-warang, aweng, nunggamie i tuti ne siai wei fo. Tuti finanai kiai wiro masi kaha. Mae waramifo we rufi nai, awemifo we ra nai, tuti ne siai wei fo tonanai.

⁵ Tonanai kontai we tata na Kristusi. Tafau tonanai ki, wape tata kiai tane tarai bo-yari na Kristusi. Tuti tata kiai manei doa siai weru mano wei foi kaha, mae ne tarai to-yari tatamuriruhiaifa, manei ria manei.

⁶ Mansiari-mansiari na tata, tasobu Nuaninu Mi-rarebana foi ne Fi Mai fo ria Allai we tafata inontarai naya fo. Fi Mai nanai wiro masi kaha mae mansiari-mansiari sobu nengfo siai, kariri Allai ne bengno do-honai arora fo. Ampafe todoni kontaio tanari kariri Fi Mai tasobuai nanai. Mano sobu Fi Mai we wenabi ambori wiuwu kaiwo Allai deinawiai wei kariri fio kawaria kaharai fo, todoni kontaio niari finanai kariri ne yoasoaf.

⁷ Mano sobu Fi Mai we fiata inontarai siai mani, niari kariri finanai na mai we fiata inontarai siai. Mano sobu Fi Mai we deunau mani, wenani yurai we deunau na mai.

⁸ Mano sobu Fi Mai we

niari inontarai siai enemiro-rong mitubaru foi mani, yurai we niari tonanai na mai kontai. Mano sobu Fi Mai we deto ne ra sobua fo we inontarai siai fo mani, yurai we niari tonanai na warang takahetuai funomai tuti na enerorong mirising. Mandoni dino sobu Fi Mai we wenunggamie i we yu kaiwasa mani, yurai we yusa na mai. Tuti mandoni dino sobu Fi Mai we aro inontarai siai mani, niari kariri finanai na enerorong mirising kontai.

Meteinawi mene mene-miwawu inontarai siai fo na meminohi toa wa tuti na menari suasa

⁹ Menemiwawu inontarai na menemirorong mesi. Menemirireu ne karirafo tuti merutawang te ne bengfo.

¹⁰ Doroi meaine, todoni kontaio menemiwawu wawera mea na mai, toyari mambetahatuio ene wawa mansiari, tuti merurai we menefafong metato wawera mea.

¹¹ Meuremi maya, wiro meuremi marira fanai. Merufi we Sempaisi na meuremi mirising, na mirisingno Allai Nuaninufoi do-hona fo.

¹² Menemitarwang te Sem-paisi na menemirorong mirising, metawang mea na dadira rorong fo, tuti metutang Sempaisi pampang.

¹³ Merurai we mefata doroi Kristenio ene pari fi fosa ambori esobu fi, tuti memainenang metamang we inontarai siai na mene munuwa.

¹⁴ Memoangno mano enari kanggani mea wasa, memoansa, wiro meteikanganisa fanai.

¹⁵ Memararising ria mano emararising fosa, tuti mesai ria mano esai fosa.

¹⁶ Meweboyari na meminohi toa wa. Wiro mene-mirorong dedai fanai, mae mefaraao mano etawawa fosa, amani wiro mewati tutisa fanai. Tuti dohonao meteyo meaino mesawai sewa ne fe.

¹⁷ Manei niari karirafeai we mane wau mani, dohonao baitai nari ne karirafo tonanai wei aha fanai. Mae merurai paria we menari te fianai aino masi na kaiwasanei euremireafo.

¹⁸ Meruraifa paria na fifiani kontai we meminohi na mai ria kaiwasanesa kiai.

¹⁹ Mano enehuwawu mea wa meaine, dohonao mebai ne karirafo aha we mano enari karira we mea fo fanai, mae finanai metawinai we Allai, ambori andino biaitai na ne kasoufo ki. Weo na Kaiwofo weai dotu tonina:

“Sempaisi medu deyo,

‘Bai mano niari ne karirafo mani,
yau nehu nana ne.

Yauno ambori ibaitai ki.’
**

²⁰ Wape,

“Masino nemu aitetafoi
wewis mani,
bohong fiang wei;
arongtataha mani,
bohong mereha wei we
dunung.

Weo na nari tonana fo,

ambori bohoni mimaya
pariao serawera katai
we dediwa urengfo
nayai.”*

²¹ Dohonao metua ne kari-
rafo kiraikobu mea fe, wape
meharaikobu ne karirafo na
ne bengfo.

13

Kaiwo kariri todoni tatato parentanei fo

¹ Mandoni kontaio taradi-
dau parentanei we dohong
kariri, weo parenta nunei
kiai sobu mambiriuo ria Al-
lai ma, wiro bei beriri kaha.
Tuti parentao yu tata nini,
eru ene kaiwasane na mam-
biriuo sobuai ria Allai fo.

² Nanai wedaya mandoni
dino deiaya parentanei
mani, deiaya fianai aino Allai
kiutuaia fo. Tuti mano enari
tonana fosa ambori esobu
aiboifo ki.

³ Weo masino manei niari
ne bengfo mani, wenani
wiro mitai parentanei kaha,
mae mano niari ne karirafo
andi mitaiti ne. Memaya we
wiro mematai parentanei
kaha mani, menari ne bengfo
ambori mesobu fiaifo.

⁴ Weo parentanei mani
Allai ne mangfatao dohoni
we yufi we mene bengfo
dine. Wape mane nari kari-
rafo mani, todoni kontaio
mutai parentafoi rai, weo ne
mambiri sobuai we dohong
aiboifo wiro ne tarai we
fimaranding we miranding
ne taraifoi tera kaha. Weo i
mani Allai ne mangfata dine,
niari kariri Allai ne kesoufo,
ampafe ne mambiri we

* **12:19** Ulangan 32:50 * **12:20** Amsali 25:21-22

dohong aiboifo we mano enari ne karira fosa.

⁵ Nanai wedaya yeo metaramididau parentanei, wiro we ambori mekaharai weru aiboifo tera kaha, wape kontai we ambori menari ne maifo kariri menemirorong ketui wai.

⁶ Finanai wedaya kontai doni we fiani mebai pajaki finina, weo mano erufi na parenta nesa mani, Allai ne inontarai erufi wei saine, tuti etohong ene rahidafo kai we efata na parentanei.

⁷ Ampafe fianai aino masi we mebaitei we inontarai mandoni konta fo, mebaitei tonana; pajaki tuti barasteng we mano esobu pajaki tuti barasteng fosa, metato mano todoni kontai atosa fosa, tuti mesomi we mano todoni kontai omi wesa fosa.

*Taenemiwawu, weo
rahidafo kikeu ampa*

⁸ Fio todoni kontai mebaitei fo mani, dohonao metuatai pampang fe, mae mebaitei kariri ne rahidafo. Wape fi beyario todoni kontai mebaitaia kiai na wea kaha fo, nana mani mene menemiwawu wawera mea pampang wa. Weo mandoni dino enewawu inontarai siai mani, wenani dohong kariri Hukumi Musai soi foa mai ampa.

⁹ Weo Hukumifoi dotu deyo, wiro nai ria wiwing siai fanai, wiro mung inontarai fanai, wiro komananapi fanai, wiro bohong we inontarai ene fi fanai, finanai kiai kontai fi siai wei fo, dawi ruhiae na hukumi boyari

amani, "Enemuwawu inontarai siai kariri enemuwawu bera wau wa."

¹⁰ Inontarai mano enewawu foi mani, wiro niari karirafo we inontarai siai kaha. Ampafe taenemiwawu mani, tatohong kariri Hukumifo na mai finanai.

¹¹ Tuti todoni kontai menari tonanai, na mewaitawang rabuang bonini. Amani rahidafe da kawuru we mea ma weo metoari weru metenawa. Weo ninaia mani rahida Allai feriri tata nai fi kefang sewa weru rahida taroasoa foi ampa.

¹² Dirufi waroi ampa, rerai we aha to, ampafe tafotourai weru tanari fi mamantiti fo to, tuti tamainenang tane tarainei na fimamunao sambewara fo.

¹³ Tanari maifo terai kariri ne inontarai enari na rahidafo, dohonao metohong muniara mai kaha fo fanai, tuti memayeru fanai. Dohonao menari maninawa kerira fo fanai ete menari fi werarika fo fanai. Dohonao mesawa wawera mea fanai ete, menemirorong pirahai we mea fanai.

¹⁴ Mae meru Seng Yesus Kristusi ma niaya mutu na mea, tuti na tonanane dohonao menemitituaitai kariri todoni mesobu rang we metohong kariri fi kari-rao menemirorong wesasari fo dawi wea fo fe.

14

Metinggai mene doroi eroasoai konta wasa fanai

¹ Inontarai mano ne yoasofo mutu kahai foi, wiro

meteiyari fanai, mae metamang wei na mai kontai. Dohonao metapai we fi enetitua itawa fe.

² Inontaraine manea na ene eroasoafu mani etang maino fiang bong fo kai. Wape inontarai manea kontai eroasoafu mutu kaha, amparefetang raung terai.

³ Inontaraio metampi fiani konta wa mea mani, dohonao mesahutawang mano etang te raung tera wasa fanai. Tuti mano metang te raung wa mea dohonao metinggai mano etampi fiani konta wasa fanai, weo wenanisa Allai sobusa we nesa kontai ampa.

⁴ Mandoni di wuae boyo binggai Sempaisi ne womingfoi nina? Wenani doaria mutu ete sawaifa te, nanafo Mano wewoming wei foi andino detioi ki. Wape doari pampang rai weo Sempaisi wemambiriu we deitawani we doari pampang.

⁵ Inontarai manea na eroasoafu mani enemituiaitai we rahidafo masi kai kaha, bei mirarebanai sewa ne wei fo. Wape manea aha na ene eroasoafu mani eteyo rahidafo masi kai. Ampafe na toninane, mansiari-mansiari wau kutuai kaririai na enemurorongwai.

⁶ Mandoni dino enetitua i we rahidafo bei mirarebanai sewa rahida wei fo mani, niari tonanai we somi we Sempaisi nayai. Tonanai kontai na ampifo, mano dang andowa taraifoi, niari tonanai we Sempaisi, tuti

dohong mahikai wei. Tuti mano wiro dang andowa tarai kaha foi, niari kontai tonanai we Sempaisi kontai, tuti i kontai dohong mahikai we Sempaisi na finanai.

⁷ Weo na tata kiai manei wiro minohi darang we mantauni kaha, tuti manei wiro mireha we mantauni konta kaha.

⁸ Taminohi tatarang mani, tatarang we Sempaisi, tuti tamararehara mani, tamararehara we Sempaisi kontai. Ampafe taminohi tatarang ete tamararehara fo, tata mani Sempaisi ne tata.

⁹ Weo nanai wedaya Seng Kristusi mireha tuti suwi aha, ambori we Seng we mano emararehara fosa tuti we mano etarang fosa.

¹⁰ Ampafe doroi meaine, we fianie metinggai mene doroi eroasoai konta fosa nina? Ete we fianie mesahutawang mene doroi eroasoafu fosa nina? Weo tata kiai todoni kontai tatoari na Allai arongreafu we kiutu kaiwo kariri tata rai.

¹¹ Weo kaiwofo dotu tonina:
“Sengnei fefora na wonongfo deyo,

‘Mandoni kontaio ambori disangkapa awebukafo na arohureane ki,

tuti mandoni kontai ambori deyoai we yau mani Seng Allai di yau.’”*

¹² Ampafe mansiari-mansiari na tata todoni kontaio deiai kariri mantauni finiarifo we Allai rai.

* 14:11 Yesayai 45:23

Wiro mewedaya mene doroi yoasoai konta foi dohong sarawa fanai

¹³ Ampafe tonana mani, wiro tatinggai wawera tata aha fanai. Mae ne mahikai mani menemirorong tonina, wiro tane tarai toyari kamiee we wedaya tane doroi sodairi sawa fanai.

¹⁴ Na iweboyari ria Seng Yesusi fo, iwaitawanai tuti iroasoai we fiang tatang ne masi kai, wiro wea ahuai we werarika kaha. Wape mandoni dino suhu fiangfeai we werarika, nana mani finanai werarika we mantauni.

¹⁵ Masino wedaya nemu doroifoia ne yoasoaf dohi we fiang bang wa mani, wiro bohong kariri taenemiwawufo kaha, ampafe bang fi tonana fanai. Wiro nari nemu doroiwai, amani inontaraio Kristusi mireha kontai wei foi, wioru na fiang bang wa fanai.

¹⁶ Ampafe fiea menemituai we fibeng fine, wape masino finani wedua inontarai siai mani, denteng sewa mani menari finana fanai, ambori wenani ne yoasoaf dohi kaha, tuti inontarai siai wiro etinggai mea na kaiwo oiberaha fea we menari kari-rafao fanai.

¹⁷ Weo Allai ne Mananufo mani, wiro we fiangfo tutu fiunungfo kaha, mae we tamasi na taminohi toa ne, taminohi na mai, tuti tamararising na Nuaninu Mirarebana foi.

¹⁸ Weo mandoni dino fiata Kristusi na ne tonanafo

mani, wenani Allai eneoitut inontaraine eroa wei.

¹⁹ Ampafe tarurai we tanari te fio wedaya tata taminohi na mai fo, tuti fio wedaya tafata wawera tatara taenemirorongnei mitubaru aha na tane taroasoaf.

²⁰ Dohonao fiangne wedaya menari fio Allai niaria foa woru fanai. Fiangne mani masi kai we ang, wape fio metang nanai wedaya inontarai siai etawai tono sasari rorong fo mani, menari sarawa finanai.

²¹ Ne tarai tonana mani, ne mahikai mani, wiro metang andowa taraifoi kaha, ete metunung anggurifoi kaha, ete wiro menari fifiani kontaio wedaya mene doroifoia niari sasarifo kaha.

²² Fianai aino meroasoia fo, metohong kaririai na Allai arongreafo we mantaung mea terai. Mandoni dino niuruainso wiro dohong sarawa kaha, na fio sahuai we fi wetarai fo, wenani mani Allai mioani ampa.

²³ Wape inontarai mano enewawera we fiangfo, mayeai dang fiang nanai aha fo, inontarai nani sobu aiboifo, weo wiro niari kariri ne yoasoao kariri fio doni aino wetarai fo tuti doni aino sarawa fo kaha. Tuti fifiani kontai aino wiro na roasoaf kaha, finana mani fi sasari fine.

15

Tafata inontarai siai fosa, wiro tawati terai we mantaung tatafanai

¹ Mano taroasoqia mutu ne tata, todoni kontaio tatawang tata we tafata mano eroaso mutu kaha fosa. Wiro tasera we ambori tafaraaise siai fanai.

² Mansiari mansiari na tata yurai we fiata tane doroifosa we ene bengfo, ambori eroasoafu mutu aha.

³ Weo Kristusi kontai wiro sera we fio dohong mantauni piraiesera fo kaha, wape niari kariri kaiwo dotu tono:

“Kaiwo karirao inontarai eteibera Seng Allai
Wau fo,

isodairai kontai ampa.”*

⁴ Weo kaiwo ariri fuba esoi kiai na Kaiwo Mararebana fo na fafongfa nani, oi we deunau tata nai, ambori aunau tasobui tonana foi dohong tata tatawang tata tuti taenemirorong mitubaru, amparefia taenemitanai we Allai.

⁵ Kadono Allai mano wedaya inontarai etawansa tuti dohonsa enemirorong mitubaru foi, fiata mea we menemirorong boyari, kariri Kristus Yesusi ne minohi toa fo.

⁶ Ambori na menemirorong boyari tuti merawam-ifui boyari metaparanding Allai, amani tane Seng Yesus Kristusi tamana.

Metamang wawera mea toyari Kristusi sobu mea, weo Kristusi feriri tata kiai, Yahudi tuti Yahudi kaha ne tata kiai ruhiae

⁷ Ampafe todoni kontaio metamang wawera mea, kariri Kristusi kontai demang we tata fo. Ambori

na tonanane kaiwasafou etaparanding Allai.

⁸ Weo, yevo yeikaririaifa we mea we Kristusi da ma wewoming we inontarai Yahudi fosa kawuru ampa. Niari tonanafo we deinawiai wesa we ewaitawanai, we Allai mani dohong kariri ne kaiwo derera fo na mai, amani na kaiwo dereraio dohonai we ene riria fafong fosa fo.

⁹ Tuti we niari inontarai na nu siai, amani ne Yahudi kaha fosa, kontaia etaparanding Allai we ne arosa fo. Toyari na Kaiwofo rabuang bei dotu tonina:

“Ampafe yau ambori ifiai wau rahang kaiwasa Yahudi kaha fosa kontai,
ambori irohi rarung fiai fo we ifiai wonomuwai.”*

¹⁰ Rabuang bei dotu kontai aha tonina:

“Kaiwasa Yahudi kaha wa mea,
memararising kontaio ria Allai ne inontarai dirisara fosa!”*

¹¹ Tuti rabuang bei aha mani dotu kontai tonina:

“Kaiwasa Yahudi kaha wa mea kiai, mefiai Sempaisi,

todoni kontaio kaiwasanei kiai efiai!”*

¹² Tuti nabi Yesayai medurai kontai deyo,

“Ambori Isai* ne bitiri sanami foi,
ureng bei soparimai kiarariaia fiabai,

* 15:3 Masmuri 69:9 * 15:9 2 Samueli 22:50; Masmuri 18:49 * 15:10 Ulangan 32:43 * 15:11 Masmuri 117:1 * 15:12 Isai mani Mananu Dauti tamanai.

amani manei na Isai ne riri-rafoi,
kiawariai we yu nu bodoni kontai ki,
tuti kaiwasa Yahudi kaha foi enemitawang te I.”*

¹³ Kadono Allai mano taenemita wani foi, dohong mea memararising pampang tuti wedaya mea menumiruainso ne maifo, na meroaso pampang fo. Ambori na Nuaninu Mirarebana foi ne mambiriufu, mene-mitawanafo fuba paria.

Paulusi deisaha kariri we fiani soi suratinei fo

¹⁴ Doroi meaine. Iroasoai we mea mani, menari kariri ne bengfo bitoya paria, tuti mewaitawang maino fifiani kontai tuti mewemambiriufu we metaunau wawera mea kontai.

¹⁵ Wape fieai wedaya anta iwemambiriufu we isoi kaiwone we mea, we yeretawang mea, weo Allai dohong ne bengfo arora we yau ampa,

¹⁶ amani yuai yaua iwe-mangfata we Kristus Yesusi ampa, we ifata Yahudi kaha fosa na nu bodoni konta foi. Tuti dohong yau nehu tarai weimami we yeiriri Kaiwo Mahikai na Allai fo, ambori inontarai Yahudi kaha fosa eroaso Seng Yesusi ambori ewekorbani mesi we Allai, we Nuaninu Mirarebana foi yuairuransa awa emararebanaia fefe.

¹⁷ Ampafe iboiwawa arohu na Kristus Yesusi we fi iru we Allai fo.

¹⁸ Imaya we imadu kariri fi siai fea kaha, manta kariri fianai aino Kristusi niari na yaua fo, amani we iwiwiaing Yahudi kaha fosa na kaiwo imadura fo tuti na yohong toa fo, ambori eroaso Yesusi tuti na tonanane mani etohong kariri Allai ne dawiafo.

¹⁹ Tutu iwiwiansa we Allai tonanai na iwemambiriufu we inari fiainawiai tuti fitantuma fo, amani fio inari na Nuaninu Mirarebana foi ne mambiriufu. Doni Kaiwo Mahikai kariri Kristusi fo iwuwuifa na masi wariai mai kataifo kai, na bendari Yerusalem paria sobu nu Irilikumi foi.

²⁰ Na iwuwu Kaiwo Mahikai ne tonanafo, yawiai paria we iwuwuai terai na kataio etaramio Kristusi kaharai fo, ambori na tonanane wiwo ibaung fi iru fo sau fio manei siai niari kawurua wataia fo fanai.

²¹ Wape kariri fianai aino dotu na kaiwofo:
“Inontarao wiwo esobu kaiwo kariri I kaha fo, ambori ewati, tuti mano wiwo etaramioa kaha fosa, ambori etafu.”*

Paulusi enetituai we ambori dontai to Roma

²² Nehuo irurai we iwuwu Kaiwo Mahikai fo na katai etaramioa kaha fo akawuru wo nani, wedua yau pam-pang we yontai mau we itu-ambawa meawa nina.

²³ Wape ninaia mani, wiwo katai siai feai we irufi nai na ninai ahang kaha weo Kaiwo Mahikai kariri Kris-tus fo wuwuai maino katai

* 15:12 Yesayai 11:10 * 15:21 Yesayai 52:15

nini kiai ampa. Tuti defuina beiru mau wa yohong weai paria we ituambawa mea,

²⁴ Ampafe enehutawanaifa we rahida yontai to nu Spanyoli foi mani, yontai mauso mea na nanai, tuti imirising ria mea tourai na nanai ki. Mayeai enehutawanai we mefata yau ambori yontai to Spanyoli aha.

²⁵ Wape nina mani yeo yontai to Yerusalemine weo yeo ifata Yesusi ne inontarai emararebana fosa na wana fo.

²⁶ Ika fio jemati na nina nesa efanduhiae we efatasa nai, weo jemati kiai na nu Makedonia nei tuti na nu Akhaya foi, ehutuai we etohong fi we efata tane doroio ene pari fi na bendari Yerusalem fosa.

²⁷ Na enemirorong mirising ehutuai we enari finanai, tuti todoni kontaio masih paria we enari tonanai we efata tane doroi na Yerusalem fosa tonanai. Weo inontarai Yahudi fosa ewedaya inontarai Yahudi kaha fosa esobu moanaio ra mai fo ria Allaia fo, amani na esobu Kaiwo Mahikai fo konta fo. Ampafe todoni kontaio Yahudi kaha nesa efata tane doroio inontarai Yahudio eroaso Yesusi fosa na moanai nuneio esobuai ria Allaia fo, nana mani na ene doifo.

²⁸ Ampafe yohong kariri finanafo kai, tuti yohongno fio efanduhiae we efata tane inontaraio enayai na Yerusalem fosara nana mani, ambori yontai to

Spanyoli, tuti na nehu rang rorong fo nani ituambawa mea mau kontai ki.

²⁹ Iwaitawanai we yontai mau ituambawa mea mani, yontai tuti moanai bitoya na Kristusi.

³⁰ Doroi meaine. Na tane Seng Yesus Kristusi tuti na enemiwawuo Allai Nuaninu-foi dohona fo, yenggoa mea, kadono merufi meweboyari ria yau na metutanai kontai tuti yau we Allai.

³¹ Metutanai ambori Allai derara yau weru inontarai eroaso Kristusi kahaio na nu Yudea foi sa, tuti ambori fianai aino ika yontaia ninai, Allai ne inontarai emararebana fosa etamang weai na mai.

³² Ambori na Allai ne yoa weai nanai, yontai we mea mau na enehurorong mirising ambori nuhuruainso enehurorongnei mitubaru tuti mirising kontai aha rahang mea.

³³ Kadono Allai, mano dohong inontarai enumiruainso ne mai foi, weriria doroi mea kiai. Antu.

16

Paulusi denatu mahikai we jematifosa

¹ Yutang mea we mewati we tane doroi Febei na mai. I mani wiwingno wemangfata na jemati Kengkrea foi dine.

² Na Sengnei wonongfo metamang wei na mai, toyari masih we metamang we ne inontarai emararebanai siai fosa. Masino deyo mefatari na fiea mani, mefatari tonanai, weo mantauni kontai

fiata kaiwasa bitoya ampa
tuti fiata yau kontai ampa.

³ Metohong mahikaifea we Persekilai tuti Akwilai, nehu maniwowirio amerufi ruhiai we Kristus Yesusi wa suru.

⁴ Ururai we ufata yau ikaharai weru ne karirafo, wedaya adareti umarareha. Yohong mahikai we suru we fi unari we yau fo tuti imeiri yau kaha, wape jemati na nu Yahudi kaha fosa kontai etohong mahikai we suru kontai.

⁵ Meteisaharai kontai we jemati efanduhisa na une munuwai sa, we yenatu mahikai wesa kontai.

Mahikaifeai we Epenatusi, inontaraio enehuwawuti wai. Na nu Asia foi mani andino yoaso Kristusi reantenangne.

⁶ Yenatu mahikai kontai we Mariai, mano yufi mamboni paria we meara foi.

⁷ We nehu doroio Adronikusi tuti Yuniasi amene nu boyari wa suru, amani uweinontarai Yahudi kariri yau, yenatu mahikai we suru kontai. Uru mani rasuli ato suru di suru, tuti raminde uwatai na aitamu rorong fo kontai ria yau ampa. Uruino uroaso Kristusifafong weru yau ne.

⁸ Mahikaifeai we Ampliatusi, inontaraio enehuwawuti na Sengnei.

⁹ Mahikaifeai we Urbanusi, tane maniwowirio yufi kontai we Kristusi wai. Tuti mahikaifeai kontai we Stakisi mano enehuwawuti wai.

¹⁰ Mahikaifeai we Apelesi, inontaraio deinawiai na dohong toa fo we daria

Kristus na mai wai. Kontai mahikaifeai we Aristobolusi ne munu rorong wasa,

¹¹ tuti we Herodioni, nehu maniwowirio aune nu boyari wai. Kontai mahikaifeai we tane doroio eroasoai konta wasa na Narkisusi ne munu rorong fo.

¹² Mahikaifeai we Trifenai tuti Trifosai suru. Uru mani urufi mamboni paria we ufata Sempaisi. Tuti mahikaifeai kontai we Persisi, maniwowirio enehuwawuti wai. I kontai yufi mamboni paria we Sempaisi.

¹³ Mahikaifeai we Rufusi inontaraio Sempaisi diriri wai. Kontai we Rufusi inanai, i mani niari yau toyari ai tera dine.

¹⁴ Mahikaifeai kontai we Asinkritusi, Flegoni, Hermesi, Patrobasi, Hermasi tuti doroi eroasoao eminohi riasa wasa.

¹⁵ Mahikaifeai kontai we Filalogusi tuti Yuliai, tuti we Neurusi tuti ne rorowing, we Olimpasi, tuti inontarai emararebana eminohi riasa wasa kontai.

¹⁶ Metohong mahikai wawera mea na menemirorong mesi kariri inontarai Kristen ne tane koangne. Kristusi ne jematin kiai na ninai etanatu mahikai we mea kiai.

Kaiwo areraio wefuiai

¹⁷ Doroi meaine. Yeretawanai na tapapa paria we mea, we metanansiau we inontaraio eha aiteta we mea ewedaya meweboyari aha kaha wasa tuti ewedua mea weru meroasoai na mai wa. Finanai wirosi masi kariri fianai aino raminde

ametaunauwai nana kaha.
Ampafe mehatai werusa.

¹⁸ Weo inontarai tonana nesa mani, wiro erufi we tane Seng Kristusi kaha, erurai we etohong kariri te fianai aino enemirorongfoi dohong wea fo terai. Na kaiwo miaing we taramioa fo, eboromi wemereha we ewawori kaiwasa enemirorong mesi fosa, etofasa we etawai.

¹⁹ Mene metohong kariri Allai wa, kaiwasa bitoya etaramioai ampa. Tuti imirising paria we finanai. Wape yawiai paria we todoni mani mesawai we fi beng fo, tuti mehatai weru fi kia karira fo mae menemirorongwai mesi.

²⁰ Allai mano dohong inontarai tanumiruainso ne mai foi, sikera saha kanggung Saminsenia mingganggung na meawemi reng wa.

Kadono tane Seng Yesusi ne bengfo weriria mea kiai. Antu.

²¹ Nehu maniwowirio Timotiusi mano yufi we Kristusi ria yau ne, denatu mahikaifeai we mea. Tonanai kontai we Lukiusi, Yasoni tuti Sosipateri, mano antone nu boyari fo sitoru, itoranatu mahikai kontai we mea.

²² Yau Tertiusi, mano isoi Paulusi ne kaiwo anatu fe nini yau, yenatu mahikai we mea na Sengnei kontai.

²³ Gayusi kontai denatu mahikai we mea. I mani fiata yau iminohi riati na ne

mununei, tuti fiata jematinei ewenadi nai kontai. Erastusi mano wenunggamie i we yu doi na bendarinei, denatu mahikai we mea kontai. Tonanai kontai we tane doroi Kwartusi.

²⁴ [Kadono tane Seng Yesus Kristusi dohong ne bengfo arora we mea kiai. Antu.]*

Kaiwo kafe

²⁵ Tataparanding Allai! Andino wemambiri u we niari mea meroasoai mutu, kariri ne Kaiwo Mahikaio ikoramai we meara fo, tuti kariri kaiwo iwuwuai kariri Yesus Kristusi fo, amani fianai aino Allai dediwarai nafafongfa wata fo waroi ampa pariao na fuininai arahio deinawiai kasaua fo.

²⁶ Wape ninaia mani Allai ne Kaiwo dediwarai nanai, deinawiai tuti ati parai na kaiwo Allai dererai we nabifosa etoi kaririaia fo. Kaiwo nanai, Allai, mano minohi wenumainu foi, dohonai we wiwiang Yahudi kaha fosa kiai we eroasoi ambori etohong kariri.

²⁷ Mesiri kawuru andino tasahui we tane Allai ne, andino sewai sewa ne.

Andino tataparandini we fitawafa na Yesus Kristusi! Antu.

* **16:24** Arawangno 24, wiro tarai na Paulusi ne suratinei kaha, mae mano esoi kaririai aha fosa, ansaino esoi kaiwo rabuang nini kontaifa aha ne.

Kaiwo Bo Boyari Paulusi Soi We Jemati Na Korintusi

Kaiwo dedung we 1 Korintusi

Bendari Korintusi mani, raminde nanai bendari fiabai sewa na nu Akhaya foi. Kaiwasa na Korintusi foi etaroanso Seng Allai kaha, tuti eweagama siai bitoya; efau esomi we seng wetarai kaha fo. Paulusi kiorang Kaiwo Mahikai kariri todoni Seng Yesus Kristusi feriri inontaraine tata na ne mirehafoi, tuti manea nasa eroasoai. Dontai werusara mani, Apolosi dontai to Korintusi aha, fiatasa aha ambori eroaso Kristusi mutu.

Embai beiru teai aha mani, mano eroasoai na Korintusi fosa etanatu surati bei we Paulusi. Nanai wedaya Paulusi soi surati bonini wesa aha. Deisaha kariri fi etutani wea fo tuti deretawansa weo fi masih kahai enari fo bitoya. Weo eweboyari kaha mae esawasa, manea eteyo eraria Apolosi, manea aha ria Paulusi. Kontai deunausa kariri rirau tuti maninawafo.

Kontai medu kariri Kristenifosa we fiang ohonai wekorbani we aririwang beia fo, etang ete nana fanai. Tuti maneiru teai nasa enemitituai we ene doroifosa kaha mae enemirorong dedai, tuti eteyo esobu Fi Maio Nuaninu Mirarebana foi dohona fo beng sewa weru mano siai

wei fosa. Medu kariri rangno enemiawufo, na robong suraya botoru (13), tuti kariri todoni kontaio inontarai emararehara fosa ambori Allai duwisa aha fo. Fi siai bitoya kontai deunau wesa.

Kaiwo na suratinei deto kutuua tonina:

1:1-9 Paulusi denatu mahikaifea tuti dohong mahikai we Allai.

1:10-6:20 Paulusi deretawang mano eroaso Yesusi na Korintusi fosa, weo esawasa tuti enari fikarira bitoya.

7:1-40 Deunausa kariri rirau.

8:1-11:1 Deunausa kariri fiang ohonaia we omi we aririwangfo nai.

11:2-16 Koang kariri wingfosa na nadi rorong fo.

11:17-34 Kariri todoni etohonsua perjamuangfoi, etang roti tuti etunung anggurifo we ambori earomio Seng Yesusi ne mireha wesa fo.

12:1-14:40 Deunau kariri Fi Maio tasobuai ria Nuaninu Mirarebana foi fo.

15:1-58 Deunau kariri mansuwi-suwi aha foi.

16:1-4 Kariri ene etohong doi we Kristen ene pari fi fosa na nu Yudea foi.

16:5-24 Kaiwo wefuiai tuti dohong mahikaifeai wesa.

Paulusi urohong mahikai we jemati na bendari Korintusi

1-2 Weo doroio Allai ne jematiwa mea na bendari Korintusi, amani inontaraio memararebanai

na Kristus Yesusi ne mea, tuti Allai sahu mea we meminohi weinontarai memararebana wa mea, mai kariri sahu ne inontarai na doni konta fosa ambori eminohi emararebanafo, amani mano eroaso tane Seng Yesus Kristusi, mano weSeng wesa tuti weSeng we tata konta foi.

Kaiwo anatu ninai na yau Paulusi, na Seng Allai ne dawiafo, yuai yau we Kristus Yesusi ne rasuli, tuti kaiwone na imeiri yau kaha mae na tane doroi Sostenesi kontai.

³ Auenemita wanaifa kadono tane Dai Allai tuti Seng Yesus Kristusi urohong une bengfo arora we mea tuti urohong mea menumiruainso ne maifo.

Paulusi fiai Allai tuti dohong mahikai wei, we ne mahikai deinawia fo na ne inontarai na Korintusifosa

⁴ Yohong mahikai pampang we Allai, we fio niariri pampang we mea na Kristus Yesusi wa, amani dohong ne bengfo arora we mea fo.

⁵ Meweboyari ria Kristus Yesusi wa wedaya Allai dohong mea mewemambiriu na fifiani kontai. Dohong mea mewaitawang kariri ne mahikaifo tuti mesawai we memadu kaririai kontai.

⁶ Na tonanane deinawiai we amene kaiwo kariri Kristusi fo, mesoniaia mai na menemirorongwai ampa.

⁷ Ampafe fi kariri taminohi weinontarai Kristen fo mesobuai mai ria Allai Nuaninufoi ampa, tuti metamang we rahida tane Seng

Yesus Kristusi da nai ma foi, amani rahida kaiwasa fuba nunei kiai ewatiao we da ma fo.

⁸ Allai mantauni ambori dohong mea mewemambiriu pampang, ampafe meroasoia mutu, paria rahida tane Seng Yesus Kristusi da nai ma foi. Ambori paria rahida nani sobuai we menari sarawafea kaha.

⁹ Allai mani meroasoi tarai, we dohong kariri ne kaiwo arera fo na mai. Andino sahu mea ma meweboyari ria Kaisungno Yesus Kristusi, tane Sengfoi ne.

Paulusi sua jematifosa we esawasa

¹⁰ Doroi meaine, na Seng Yesus Kristusi wonongne, yutanai na tapapa we mea paria, we mesawa mea fanai. Mae menemirorong boyari, tuti meweboyari pampang, na fi memadura wa tuti na fi menemituaita wa.

¹¹ Weo Klui ne arikangfosa, eteisaharai we yau eteyo wiro meweboyari ahang kahai mae mesawa wawera mea paria.

¹² Fianai aino imadurai mau ninai mani, manea meteyo mene mano wenunggamiei we mea mani Paulusi. Manea aha mani meteyo meneng dino Apolosi, manea kontai aha mani meteyo meneng dino Petrusi, tuti manea kontai aha mani meteyo meneng dino Kristusi.

¹³ Manamo Kristusi ne taraifoi wiro tababauri tonana kaha. Kontai mewaitawanai weo, wiro imereha na aitabafoi we mea kaha,

ete mewebaptisi na wonohu Paulusi ne kaha.

¹⁴ Yohong mahikai we Allai, weo na mea kiai wiro iwebaptisi mane wau kaha, mae Krispusi tuti Gayusi umeiri uru terai.

¹⁵ Ampafe na toninane, wiro manea meteyo iwebaptisi mea na wonohune ambori meraria yau fanai.

¹⁶ (Oh! Arohuoai kontai we Stefanusi ne munu rorong fosa mani, yauno iwebaptisia konta ne. Wape enehutituai, tarahai wiro manei siai ahang kaha.)

¹⁷ Weo Kristusi demi yau we iwebaptisi kaiwasa kaha, mae we iwuwu Allai ne Kaiwo Mahikai ne. Kontai kaiwo iwuwuai nanai, wiro iwuwuai na kaiwo awai nunei kaha, weo imaya we Kristusi ne marareha na aitabafoi ne mambiriupo wifiea kaha fanai.

Allai ne awaifo tuti ne mambiriupo tawaitawanai na Kristusi, wiro na awai nunei kaha

¹⁸ Tatairiri Kaiwo Mahikai kariri Kristusi we mireha na aitabafoi we feriri inontaraine tata fo. Kaiwasa ambori esodai aiboi fosa, amani mano eteiyara fosa mani, eteyo kaiwo nanai kaiwo webonggoi paria fine. Wape weo mano Allai feriri tatara ne tata mani, tataramioai mani taroasoai tuti tateyo, "Kaiwo ninai mani Allai ne Mambiriufi dine!"

¹⁹ Weo na Sempaisi ne Kaiwone rabuang bei dotu tonina:

"Ambori mano eteyo ewait-awangfi disa
ambori ene ewait-awanafo wioru,
tuti mano esawai fosa enemittuitafo,

inaria nai werusa ki."*

²⁰ Sempaisi ne Kaiwone dotu tonana mani ambori tamadu fiani kariri mano esawai fosa, ete mantaunau Kaiwo Musai soi fosa, tuti mano esawai esawa tuti fi nunei fosa ne? Tateyo esawai tuti esobu aunau dedai paria, wape na Allai arongreafo mani, enemittuitafo webonggoi paria. Weo Allai deinawiaia kasau ampa, we inontarai nunesa ene awaio enemittawana fo tupa dawohi arorawa.

²¹ Weo Allai na ne awaifo wedaya ambori mandoni kontai, sewaia todoni ki, wape wiro deroanso Allai na ne awai nunei nani kaha. Wape Allai piraise we feriri inontarai eroasoi fosa na kaiwo amewuwuaifa kariri Kristusi fo, amani na kaiwo inontarai eroasoa kaha nesa esahuai we kaiwo webonggoi fo.

²² Inontarai Yahudi nesa etawiai we ewati te fitantumafeai we fiainawiai kariri kaiwo amewuwuwa fo, akawuru wori eteyo eroasoai. Tuti inontarai Yunani fosa mani, esera tuti te ene awaifo.

²³ Wape tata mani, tawuwu te Kristusi wemireha na aitabafoia fo. Kaiwo tawuwuai tonana fo disang inontarai Yahudi fosa emirorongfoi paria, tuti Yahudi kaha fosa kontai

* **1:19** Yesaya 29:14

esahuai we kaiwo webonggoi fine.

²⁴ Wape we mano Allai sahusara fosa, amani na Yahudi fosa ete na Yunani fosa, kaiwo kariri Kristusi we mireha na aitabafoi, deinawi Allai ne Mambiriufo tuti ne Awai Fuba fo.

²⁵ Weo inontaraine etaparanding ene awaifo, wape ene awai nanai wiro wefiea kaha, mae tawawa sewa Allai ne bonggoifo. Tuti etaparandingno ene mambiriufo, wape ene mambiriu nanai wiro fuba kaha, mae fanahang sewa Allai ne finahangfo.

Allai sahu inontarai ehatui fosa eroasoai

²⁶ Doroi meaine, mearomi kariri mea we raminde Allai sahu mea we meraria Kristusi fo. Rahida nanai, na inontarai nunei euremireafo, na mea mano mesawai wa mea mefau kaha, tuti mano mewemambiriu ete mewewafoniai wiro mefau kaha, tuti mano meweriria na riria mananufe ne kontai mefau kaha. Eteyo mea mani inontarai mesawai turura kaha, tuti mewemambiriu kaha, ete meweinontarai funomai di mea.

²⁷ Tonanai ki, wape Allai deo diri mano inontarai esahu kaherasa ewebonggoi fosa, we ambori na ea, dohong mamaya mano eteyo esawai fosa. Tuti diri mano efanahang fosa, we ambori na ea, dohong mamaya mano eteyo ewemambiriu fosa.

²⁸ Tuti diri mano inontarainesa etatosa kaha

fosa, enemirireusa fosa tuti esahusa we ewefiea kaha fosa, we na ene eroaso Kristusi fo mani Allai dirasaya mano nunei detosa fosa.

²⁹ Ambori na tonanane, mandoni kontaio wiro bioi arong na Allai arongreafafo kaha. Wiro manei biriu we deyo, "Yau mani, isawai paria wedaya Allai diri yau ninai."

³⁰ Allai mantauni dino niari mea meweboyari ria Kristus Yesusine. Tuti na Kristusi mewati Allai ne awaifo, amani Kristusi andino niari tata tamasi na Allai urengreafafo, tamarebanai tuti andino feriri tata.

³¹ Ampafe kariri fianai aino dotu na ne Kaiwofo amani:
"Mandoni dino bioi arong we fiea mani,
wenani bioi arong we Sempaisi terai."*

2

Kaiwo kariri Kristusi wemireha na aitabafoi fo

¹ Doroi inontarai Kristen wa meaine! Na rahida ira mau iwuwu Allai ne Kaiwo wetarai fo we mea nai nani, wiro imadurai kariri mantaung yau nehu awaine kaha, ete imadu we mea na kaiwo sariati ne feai we iwawora menemirorongwai naya kaha.

² Weo imaduraia futuayai ampa, we rahida inayaifa na nanai ria mea wa, wiro imadu kaiwo siai fea kaha, mae imadu kariri Yesus Kristusi terai, amani kariri

* **1:31** Yeremiai 9:24

Kristusi mano mireha na aitabafoia foi.

³ Tuti rabuang bonani nehu mambiriufea kaha tuti nuhuruainso imatai paria, adareti yeo iwawu weru fi iru fo.

⁴ Kaiwo Mahikai ikoramifa we mea nana fo, wiro ikoramai kariri mantaung yau nehu awaine kaha, ete na kaiwo wedaya kaiwasa efaraise we etaramioafo kaha, mae na enehutawang te Nuaninu Mirarebana foi ne mambiriufo terai.

⁵ Inari tonanafa mani we ambori mewaitawanai we na Allai ne Mambiriufo terai aino wedaya meroaso Kristusifo, wiro na inontaraine ene awaifo kaha.

Nuaninu Mirarebana foi deunau tata kariri Allai na ne awaifo

⁶ Tonanai ki, wape we mano eroaso Kristusi na mai fosa mani, kaiwo amemaduraifa sewai paria. Awai nani wiro na awai nunei kaha, tuti wiro awai nano mananu nunei fosa kaha, amani parentao ambori eworu foi kaha.

⁷ Wape awaio amemaduri wesa nani mani Allai ne awai dediwari foi fine. Awai nani nunei deitawani kaha, weo dediwari werusa fefe, wape rahidao niari nunei kaharai fo Allai meinenaami kawuru ampa, we dohong ne sambewaraio dadai fo we tata nai.

⁸ Mano ewemananu na nufi ninisa, manei wiro deitawang kariri awai nani kaha. Weo ewaitawang awai nani fea reti, wiro epahu

Sengno dedai sambewara foi na aitabafoi kahai ki.

⁹ Wape fininai kariri fianai aino dotu na ne Kaiwofo deyo,

“Fio tawatioai na tauremine na wea kahai,
tataramioai na tataramine na wea kahai,
tuti taenemitituai weai na wea kaha,
finanai kiai Allai meinena-mai we mano enemi-wawuti fosa ne.”*

¹⁰ Wape Allai deinawiai we tata na Nuaninu Mirarebana foi ampa, weo Nuaninufoi mani deitawang maino fiani kontai, paria Allai enerorong ketui pari foi kontaio deitawani.

¹¹ Weo mandoni kontaio wiro deitawang inontarai manei enerorongfoi kaha, mae wenani mantauni nuaninufoi reto. Tonanai kontai we Allai, mandoni kontaio wiro deitawang enerorongfoi kaha, mae Allai Nuaninufoi mantauni dino deitawani ne.

¹² Tuti tata mani, wiro taenemitituaflo ete tatafu kaiwo fo wiro kariri inontarai nunesa ene etafuraflo kaha. Mae Allai denatu Nuaninufoi we tata ma we fiata tata, ambori fianai aino dohonai we tata meu fo, tatafu na mai.

¹³ Ampafe, kaiwo amemadurane, amemadurai wiro kariri kaiwo na inontaraine ene awaifo kaha, mae na kaiwo Allai Nuaninufoi deunauwai we amea we amemadura fo, ambori ameteikariri fi na rorafaini, amani fio wetarai fo.

¹⁴ Wape mano esobu Allai Nuaninufoi kaha fosa mani,

* **2:9** Yesayai 64:4

wiro ebiriu we esobu fio Allai Nuaninufoi dohona fo kaha. Weo finanai esahuai we fi webonggoi fine, tuti wiro ewaitawang sobu finana kahaia. Weo fi tonanane, mano sobu Allai Nuaninufoi dino tefurai na mai ne.

¹⁵ Wape inontaraio esobu Allai Nuaninufoi sa mani, ewemambiri we etaroang maino fifiani kontai, ampafe ehutuai we doni aino bengfo tuti doni aino karirafo. Wape we mantaunsa mani, inontarai siai etaroansa we ehutu kaiwo kariri sa kaha.

¹⁶ Weo na Kaiwofo, arawang bei dotu deyo,

"Mandoni kontaio wiro deitawang Allai enetituitafo kaha,

tuti wiro wemambiri we deunauwi kaha."*

Wape inontarai taroasoa ne tata mani, Kristusi enetituitafo nai na tata ampa.

3

*Paulusi deunau jematifosa
we wiro esawasa fanai, mae
enemirorong boyari tuti er-
aria Kristusi terai*

¹ Doroi meaine, raminde iminohi ria meawa nanai, wiro imadu na kaiwo mai we madurai we inontarai etohong kariri Nuaninu Mirarebana foi kaha fosa. Mae imadu na kaiwo miawa we inontaraio era ria nunei tuti wiro etohong kariri Nuaninu Mirarebana foi kaha fosa etafura fo, amani we inontaraio ewearikang marereha na ene eroaso Kristusi fosa.

* **2:16** Yesaya 40:13

² Raminde nana mani kaiwo imadurai we mea fo, ne tarai toyari yohong ui we mea, amani fiang we arikang marareha, wiro fiang we inontarai fuba kaha. Yeunau mea tonana weo wiro mewemambiri we mesobu fiang mutubaru fo kaharai, amani kaiwo mai we inontaraio etohong kariri Nuaninu Mirarebana fosa esobua fo. Tuti paria ninai, wiro mewemambiri we mesobu fi tonana fong kaha.

³ Weo na fi menari wa, ne tarai toyario meweinontarai mera ria nunei di mea. Weo menemirorong pirahai wawera mea tuti meweaiteta wawera mea. Fianai aino menari tonana ne, deinawiai we mea mani, inontarai mera ria nunei di mea terai.

⁴ Weo masino manea meteyo, "Yau mani, Paulusi ne inontaraio irariati di yau," mane mea aha mani meteyo, "Yau mani, Apolosi ne inontarai irariati di yau." Mewaitawana kahai e, we na mene menari tonana wa deinawiaia kasau ampa we nana mani meweinontarai nunei di mea terai ne?

⁵ Menari tonanai wape, yutang bera mea mau we Apolosi mani mandoni dine? Tuti Paulusi mani mandoni dine? Auru mani mangfata arora di auru. Allai yuai auru tonanai we ambori auwiwiaing mea we meroaso Kristusi. Mansiari-mansiari niari kariri fianai aino Sempaisi dohoni we auru we aunari fo.

⁶ Ne tarai toyari mano

erufi na romi, yau mani weo itanang aibong, mae Apolosi dino sara weduara ne. Wape Allai meiri andino dohong aibong nani tifu ne.

⁷ Ampafe mano sanang foi wiro wefiea kaha, tuti mano sara weduara foi kontai wiro wefiea kaha, mantao Allai andino atori ne, weo andino niari aibong nani tifu ne.

⁸ Mano sanang foi tuti mano sara weduara foi, uru mani umasi, wiro maneи dedai sewa maneи kaha. Tutи mansiari-mansiari ambori sobu ne fiembaitafo, kariri fianai aino niari nanai ki.

⁹ Weo auru mani inontarai aurufi ruhiae we Allai di auru, tuti mea mani, mene tarai toyari Allai ne romi aurufi nai di mea.

Tuti mea mani Allai ne munu di mea kontai.

¹⁰ Na ne bengno Allai dohonai arora we yau ne, nehu tarai toyari inontarai sewai we niari munu, inari munu amangfoia mitu ampa, tuti inontarai siai maneи biaungno munufoi nai. Amani imadu Kaiwo Mahikai fo we mea ambori meroasoia, tuti maneи siai deunau mea ambori metoa mutu na mene meroasoai nani. Wape mandoni dino biaung munufoi mani, enetituai sauurai we todoni biaung munufoi sauwifo.

¹¹ Weo Allai mantauni dohongno Yesus Kristusi meiri kawuru we munu amang, tuti inontarai siai maneи wiro niari munu amang siai bei we biaung munu sauwi kaha, mae na Kristusi terai.

¹² Inontarai ebaung munu

sau munu amang nini sa, tarahio maneи niari munufoi na emasi, ete maneи niari na peraki, ete maneи siai aha mani na kamiei ne harga dedai, amani etairiri kaiwo wetaraifo na mai we jemati-foi. Tarahio maneи siai kontai enariri na ai ete ninoi memasa ete na ai nukahai. Nana mani ewuwu kaiwo we jemati-foi na mai kaha.

¹³ Fianai aino enari nanai, na rahida Kristusi daraberahi nai aha ma foi ambori wati kariri mansiari-mansiari fi niari fo ki, we finanai masi ete bireri e. Weo rahida bonani mani, Kristusi da tuti ne adiafoi we titua inontaraine tane fi tanari fo nayai we masi ete bireri e.

¹⁴ Masino fi enari munu nai nanai, maneи nengfo adiafoi kaso tuparai mani, wenani ambori sobu fiembaitafo ki.

¹⁵ Mae fi niari fo adiafoi kesoia mani, sobu dadirafo paria, we ne fieai ahang kaha fefe. Ne tarai toyari inontaraio kiaharai weru adia rorong foi, kuteai kontai adia kasoi, wape ne fi minohi tutira fo kai nai werui.

¹⁶ Mewaitawana kahai we Sempaisi ne Munu di mea, tuti Allai Nuaninu Mirarebana foi niayai na meawa ne? Nana mani ne tarai toyari ne Munu Minohi Nai foi di mea.

¹⁷ Mandoni dino niari Allai ne Munu Minohi Nai foi wioru na fi kerira niariri foi mani, Allai ambori miung wenani wioru ki. Weo Allai ne Munu Minohi Nai foi mani mirarebanai, tuti meaino sahu mea we ne Munune.

¹⁸ Dohonao metatofa bera mantaung mea fe. Mandoni

dino enetituai wei mani sewai na inontarai euremireafo mani, todoni kontaio niariri we webonggoi na inontarai euremireafo, ambori sobu awai tarai fo na Allai.

¹⁹ Weo awaio inontaraine etaparandini foi mani, na Allai urengreafo mani, awai nani webonggoi paria. Weo na ne Kaiwofo rabuang bei dotu tono:

"Inontarai esawai fosa ene awai nani,

Allai niariri toyari wai tepari we tefusa nai aha."*

²⁰ Tuti rabuang bei dotu toni-nai kontai:

"Sempaisi deitawanai we inontarai esawai fosa enemittiuaitafo mani wiro wifiea kaha ki."*

²¹ Ampafe tonana mani, dohonao mane boi aromu tuti inontarai ro riati foi fanai. Weo fio metawi wea fo, Allai dohonai kawuru we mea.

²² Allai dohongno fiani kontai we fiata mea, amani yau Paulusi, Apolosi, Petrusi, Allai dohong amea kiai we amefata mea. Kontai metarang ete, memarareha, finanai ambori kia mai we mea. Tuti nunei nini, fio na rabuang bonini, tuti ne ambori kawariai aha ma fo, fi fuba nani kiai niariri we mea, tuti dohong finani kiai we fiata mea naya.

²³ Tuti mea mani, Kristusi dino ne mea ne, tuti Kristusi mani, Allai andino neni ne.

4

Paulusi, mano yufi we Kristusi foi, denggoasa am-bori eboi earomifo fanai, tuti etato mano ewewafoniai wesa fosa, tuti etohong kariri fi maio i tuti Apolosi unarifo

¹ Ampafe todoni kontaio amea mani, mewati amea we inontaraio amewewoming we Kristusi di amea. Ameaino Allai yoaso ne Kaiwo dediwara fo we amewuwuaifa ne.

² Ampafe fi reantenang we Wyoming tonana nesa mani, todoni kontaio erufi na mai, wiro ewawu weru fi eru fo kaha.

³ We yau mani, manei na mea ete mandoni kontai ki, enetituai fieai kariri yau, toyari deyo irufi we Kristusi na mai kaha, wiro enehutituai we wenani kaha. Tuti yau kontaio wiro ikutu kaiwo kariri mantaung yau ete nehu fi iru fo kaha kontai.

⁴ Weo na enehurorongnei iwaitawanaifa we na fifiani kontaio wiro inari sarafiea kaha. Tonanai ki, wape finanai wiro deinawiai we inontarai imararebanai di yau kaha. Weo Sempaisi meiri andino ne mambiriu we kitu kaiwo kariri yau ne.

⁵ Tonana mani wiro mesahera mehutu kaiwo kariri inontarai fanai, toyari kariri ene fi eru fo mai ete bereri. Weo wiro ne rahida kaharai, ampare metamang ao Sempaisi daraberahi ma akawuru wo. Weo rahida bonani mani fianai aino inontaraine enari worawai na mamantiti fo kontaio ambori deinawiaia wati

* 3:19 Ayupi 5:13 * 3:20 Masmuri 94:11

parai ki. I kontai ambori sefa fianai aino kaiwasa enemtituitaifa na enemiro-rongfoia kasau ki. Rahida bonani faini dino ambori Allai dohong fiembaitai we mansiari-mansiari ki.

⁶ Doroi meaine, fianai aino imaduaraia nanai, yeo imadurai kariri yau tuti Apolosi tonanai, ambori mesobu aunau kariri fianai aino beng sewa fo, ambori meruai inontarainesa karea fanai. Imadu kariri auru tonanai we ambori auwekasinai we mea ambori mewaitawang kariri kaiwo rabuangno dotu deyo,

“Merutawang te kaiwo rabuangno wataia ninai,

wiro menari seru weai konta fanai.”

Ambori na tonanane wiro boi aromu tuti manei mae wahu tawang mano wei foi fanai.

⁷ Weo mandoni dino yuai mea metadai sewa inontarai siai ne? Mewaitawanai we fifiani kontai aino meneng wa, finanai Allai dino dohonai we mea ne. Ampafe we fiane meboi mearomi we fi mesobua wa ninai? Menari toyari mesobu finanai na mantaung mea mene mebiriuwa fenanai.

⁸ Mene pari wefieai ahang kaha, fifiani kontaio mesobuaia mai ampa, mae amea mani bereri. Tuti mewemananu ampa mae amea mani bereri! Wape taraia fino, ambori amea kontai ameru wang mananu fo kontai ria meafe.

⁹ Weo enehutituaif weaia mani, mano amewerasuli

ne amea mani, Allai dohong amea ametawawa sewa weru inontarai siai nesa kiai. Amene tarai toyario inontaraio ene fiea kahaio esobu aiboi marareha fosa. Ea mani, ambori inontarai emung funonsa na rapangan na kaiwasa earomireafo. Kaiwasa na doni kontai era ma esai amea, inontarai nunei esai amea tuti we-waifosa kontai esai amea.

¹⁰ Todonie, inontarai esahu amea we amewebonggoi we amewuwu Kristusi fo, wape mea mani meteyo inontarai mesawai di mea? Tuti amefanahang, mae meteyo meaino mewemambiriune, tuti kaiwasa etato mea mae esahu tawang amea.

¹¹ Paria sobu rahida nini kontaio, amewawisi tuti amearomitataha. Amesansung ansung karira. Inontarai enari kanggani amea paria tuti amene pari katai we ameminohi nayai.

¹² Amerurai paria we amerufi we fi ameneng. Inontarai eteikanggani amea wape amemoansa. Tuti enari kanggani amea wape ametawang amea.

¹³ Eteibera amea, wape ametohong kaiwo mai fo wesa. Paria sobu rahida bonini kontaio inontaraine ewati amea toyari amene tarai toyari aikahia kerira.

¹⁴ Isoi kaiwone we mea mau ninai, wiro we ambori yohong mamaya mea naya kaha, mae we yeretawang mea nayai, toyari nehu arikang terai enehuwawu meawa.

¹⁵ Weo tarahio meweinon-

tarai Kristen i wa, mesobu mantaunau bitoya pari ampa, wiro atoafonsosa kaha, wape manea efau mesahusa we mene wawa kaha. Imeiri yau kawuru, yauno na Kristus Yesusi iwewawa we mea ne, weo yauno ika Kaiwo Mahikai kariri Kristusi fo ma iwuwwui we mea ne.

¹⁶ Ampafe yutanai na tapapa paria we mea we metohong kariri yohonane.

¹⁷ Nanai wedaya yemi Timotiusi dontai we mea mau. Timotiusi nini mani, ne tarai toyari nehu arikang teraio enehuwawuti dine. Tuti i mani arikangno taro-soi dine, weo daria Kristusi na mai paria. I ambori da mau we deretawang mea we metohong kariri nehu yohong toa ne na Kristusi Yesusifo, amani kariri fio yeunawai na doni kontai na jemati iraoa foa fo.

¹⁸ Maneiru teai na mea ewaitarahio wiro ira aha mau we iwati mea ahang kahaia finanai, ampafe eboi earomi paria.

¹⁹ Wape masino Sempaisi yoa weaifa mani, waroi ahang kahai mae ambori ira we mea mau rai. Na rahida bonani ambori iwatio fianai aino inontarai eboi earomi nanisa enari wa ki, we tarai ene mambiriuk we enari fieai kariri emadurafo ete manta eboromi fiabai funoma ne?

²⁰ Imadu tonanai weo Allai deinawi ne Mananufo na manei mani, wiro watioai na kaiwoariri arora wenani medura fo kaha, mae na mambiriuo wenani niari fo.

²¹ Ampafe ne doni aino menemioa ne, meteo ambori ira mau we yeunau mea na tapapa, ete na kaiwo manang fo tuti enehuwawu mea re?

5

Paulusi medu kariri inon-tarai Kristenio meninawa foi we jematifosa ehatai werui

¹ Tarahuo kaiwasa bitoya emadurai paria weo na mea manei niari maninawa kerira foi, amani kia tamang ne wiwing fui foi sahui we ne wiwing tuti dena riati, nana mani fikerira paria. Maninawa tonanane kaiwasa etaroanso Sempaisi kaha fosa kontai ki wiro enari tonana kaha.

² Mewaitawang fisarawai tonanane ampa, wape meboi mearomi nendai. Ne mai mani, menemirorong fitu-ayai paria we ne tonanane tuti metata mano niari maninawa tonana foi weru mea.

³ Mewaitawanai weo nehu tarainei mani tarai niayai na ninai waroi weru mea, wape enehurorongfuisi mani niayai kefang ria mea na nana wa. Nanai doni ikutu kaiwo kariri mano niari maninawa kerira tonana foi ampa, yeyo; Na Seng Yesus Kristusi wonongne, todoni kontaio inontarai tonana nei sobu aibooifo!

⁴ Ampafe mefanduhi mea mani, mewaitawanai we yau kontai na enehuro-rongnei ifanduhi yau ria mea, ampafe na tane Seng Yesusi ne mambiriufu tuti ne wonongfo,

5 metawing inontarai nani to Saminseni warang rorong foa, ambori enerorong kerira wesasari foi sobu ne karirafo, pariao daraberahi weru ne sasarifo, ambori nuaninufoi sobu mai ki, na rahida Sengnei daraberahi nai ma foi.

6 Meboromiwai fiebai funomai mani, beng kaha. Mewaitawana kahai e, kariri kaiwo netawewai dotu tofino, "Ragi kutu fuba kahai, wape wedaya tepungno fiati foi dautai sentenang." Nana mani inontarai manei dohong sasari, mae kia karirafo we mea na jematiwai kiai.

7 Na rahida fubao esahui we rahida Paska foi mani, inontarai Yahudi fosa ehabi ragifo kiai weru ene munufo, tuti emung domba antung fo. Tonanai kontai mehabibi inontarai dohong maninawa foi weru mea, ambori mewaworu aha tuti mene taraiwai toyari roti weragi kaha. Weo tarai, mene tarai kariri roti weragi kaha nani, tuti memararebanai. Weo Kristusi andino ne tarai wedomba antung Paska foi emuni wekorbani we tata ampa.

8 Ampafe mera ma toyari tatohonsua tane rahida fuba nani na tamararebanai. Tatohong suari na roti we-woruo deinawi kariri taen-emirorongno mirarebanai tuti wetarai fo. Dohonao tanari suari na roti memo weragi foi fe, amani ragio deinawi kariri taenemiroong kerira wesasari foi fe.

9 Na nehu kaiwo anatu raminde yenatuaifafong we mea mau wa, yeikaririai

kawuru we mea ampa we wiro mefarao mandoni kontaio niari sasari maninawa fo fanai.

10 Fianai aino imadurai tonana ne, wiro imadu kariri inontarai siai weru jematiwai kaha tuti mano wiro etaroanso Allai kaha fosa kaha. Ea mani efau enari sasari toyari emaninawa funomai, ete euremi fiabai we rafoi, ete etatofa we ehamananapi, ete esomi we aririwang. Inontarai eweKristeni kaha nani saino wiro yeretawang mea we mehatai werusa kaha, weo masino merurai we mehatai weru inontarai tonana fosa mani, ne tarai toyari menayai na nunei aha kaha.

11 Mae mano imadu karirisa weo mehatai werusa nesa mani, inontaraio eteyo ea mani eroaso Kristusi disa tuti ahusa we tane doroi na jematiwai disa, wape enari maninawa kerira foi, euremi fiabai we rafoi, esomi we aririwang, etairiri inontarai, emayeru biriu, ete etatofa we ehamananapi. Inontarai eweKristeni tonana nesa mani, dohonao mekahefansa fanai.

12-13 Weo taraie inontarai siao eroaso kaha fosa mani, nehu mambiriufeai we ikutu kaiwo karirisa kaha. Allai meiri andino ne mambiri tonana ne. Wape we mene inontaraio na jematiwai mani, todoni fino mantaung mea mehutu kaiwo karirisa kahai nina? Mene pari mambiri tonana e? Todoni kontaio mehutu kaiwo karirisa! Na Sempaisi ne Kaiwofo, rabuang bei dotu

deyo,

"Inontaraio enari fi karira fo, metatasa weru mea."*

6

Paulusi deunau inontarai Kristenifosa we wiro etinggai ene doroifosa we mangkutu kaiwo eweKristeni kaha fosa fanai

¹ We fiani e, manei na mea wekaiwo we ne doroi inontarai Kristeni manei, dinggairi to mangkutu kaiwo wiro deroanso Allai kaha foi nina? We fiani e, wiro dinggairi tono ne doroi emararebana fosa ambori ehutu kaiwo kariri suru kahai nina?

² Mewaitawana kahai we Allai ne inontarai emararebana nesa mani ambori esobu mambiriu we ehutu kaiwo kariri nufi ne rai e? Ampafe masino mesobu mambiriu we menari tonana mani, we fiane menemiti-tuai wiro mewemambiriu we mehutu kaiwo kariri kaiwo wiro maraba tonana kaha fo nina?

³ Mewaitawanai we we-wainesa kontaio tane mambiriu we ambori tahutu kaiwo karirisa. Tonana mani kaiwo arora na nunei mani, wiro fi maraba fine kaha.

⁴ Ampafe masino kai-woariri tonana feai kawaria mani, we fiane meha kaiwo nanai we mangkutu kaiwo etaroanso Allai kaha fosa wei ne? Ea mani ene pari mambiriu na jematiwai we ehutu kaiwo kariri mea.

⁵ Metohong mamaya paria. Tofino! Masino tane

doroi Kristen wasa maneua ewekaiwo wesa mani, manei na mea wiro sewai we kiutu kaiwo karirisa kahai e? Wiro bireri sea kaha fe, todoni kontaio maneiru teai na mea esawai tonana rai!

⁶ Wape menari tonana kaha, mae manei wekaiwo we ne doroifoi mani, doaria dinggai ne doroifoi to mangkutu kaiwo deroanso Allai kaha foi aha nina. Tuti niari tonanai na kaiwasa eroaso Kristusi kaha fosa earomireafo.

⁷ Meweaiteta we mea fo teraio deinawiai we mene mambiriu feai aha kaha tuti metawai ampa. Wape ne beng sewa mani, manei niari ne karirafeai we mea, ete sofa mea we kiamanana mene fifo mani, menemboru terai.

⁸ Wape meaino metoari aha menari inontarai siai tonanai, amani menari karirafeai wesa tuti metofasa. Tuti fininai tera kaha mae, menari we mene doroi inontarai Kristen wasa.

⁹ Mewaitawanai kahai e, weo inontarai eharira fosa mani, wiro esobu katai na Allai ne Mananu rorong fo kaha? Dohonao menemiti-tuai sarawa fe! Inontarai emaninawa funoma fosa, mano esomi we aririwang fosa, mano eriraua mae enayai ria wiwing ete mang siai nariai aha fosa, mang mano meninawa we mang siai tuti wiwingno meninawa we wiwing siai fosa,

¹⁰ mano ehamananapi fosa, mano euremi fiabai we ra fosa, mano emayeru

* 5:12-13 Ulangan 13:5, 17:7

biriu fosa, mano efaraise we etairiri kaiwasa siai fosa, mano etatofa we ehamananapi fosa, inontarai ninisa kiai wiro esobu katai na Allai ne Mananu rorong fo kaha.

¹¹ Tuti inontarai maneiru teai na mea, raminde nanai mene tarai tonana. Wape ninaia mani Allai yuairurang meara memararebanai na urengreafo ampa, tuti wedaya mea mebeng riati ampa. Finanai kiai tane Dai Allai niariri na Seng Yesus Kristusi wonongfo, tuti na Allai Nuaninufoi ne mambiriufu.

Paulus deretawansa we ewaitawang wedua ene taraifoi weru sasari maninawafoi

¹² Inontarai manea eteyo Allai feriri tata weru aiboi tasobui weo fikarira tanariri fo, donio emadu eteyo, "Inari fifiani kontai, ne bengfo ete karirafo, finanai mai we yau kontai." Wape wiro finani kiai kia mai kaha. Tuti eteyo, "Inari fifiani kontaio, mai we yau." Wape we mantaung yau mani, imaya we itua nehu tarainei we niari maino finani kiai kaha.

¹³ Tuti emadu kontai eteyo, "Fiangne mani we taeneminei, tuti taeneminei we fi tatani nei." Wape fi ani nani tuti taeneminei, Allai niaria wioru rai. Allai wiro niari tane tarainei we tanari maninawa kerira foi nai kaha, mae we Sempaisi terai. Tane tarainei mani, Sempaisi ne

fi dine, tuti Sempaisi niai na tane tarainei.

¹⁴ Allai duwi Seng Yesusia suwi aha na marareha rorong fo. Tuti Allai nani kontaio, na ne mambiriufu, ambori duwi tata tasuwi na marareha rorong foi aha ki.

¹⁵ Doroi meaine, mewaitawanai we mene taraiwai mani, Kristusi ne taraifoi weai aine, amani meweboyari riati. Tonana mani masi we tatohong Kristusi ne tarai nani weai we ambori weboyari ria wiwing diru fosa rai e? Todoni kontaio bereri rai!

¹⁶ Mewaitawanai we mandoni dino niai ria wiwing diru manei mani, wenani weboyari riati, amani une taraifo weboyaria finana. Weo Sempaisi medu deyo,

"Wiwing manei tuti mang manei, urirau mani uweboyari."*

¹⁷ Wape mandoni dino weboyari ria Sempaisi mani, Sempaisi Nuaninufoi tuti inontaraifoi nuaninufoi uweboyari.

¹⁸ Mehatai weru maninawafoi, mewawu mea weruai. Weo sasari fuba nariri na nunei mani karira paria, wape sasari maninawa nei dino kia karira pari sewa ne we tane tarainei. Mandoni dino niari sasari tonana foi mani, wedaya ne taraifoi sodai karirafo paria.

¹⁹ Mewaitawanai ampa, we mene taraiwai mani, Allai Nuaninu Mirarebana foi ne Munu Minohi Nai dine, tovari Munu Omi we Allai nai

* **6:16** Kejadian 2:24

dine. Allai mantauni dino do-hong Nuaninu nani we mea ne. Tuti mene taraiwai mani, mene fi dine kaha, mae Allai dino neni ne.

²⁰ Weo Allai wiori kutu meara futuayai ampa. Ampafe menari sua mene taraiwai we metaparanding Allai nai.

7

Paulusi medu kariri fio jematifosa emadurai wei kariri tariraufu

¹ Fi imadurai aha mau nina mani, kariri fianai aino mesoi na mene kaiwo anatu fe we yau ma ne. Ampafe imadu mau yeyo, tarai, mang manei dena ria wiwing manei kaha mani, nanai denteng.

² Wape inontaraine wea mani etawansa kaha, mae enemirorongfoi sau we enari ne karirafo toyari maninawafo, ampafe ne mahikai mani eriraua, ambori mangfoi deitawang te ne wiwingfoi tuti wiwingfoi kontai deitawang te ne mangfoi.

³ Mangfoi todoni kontaio meineng we dohong ne taraifoi we ne wiwingfoi, tuti wiwingfoi kontai tonanai we ne mangfoi.

⁴ Wiwingfoi wiro meiri wemambiriu we ne taraifoi kaha, mae ne mangfoi kontai. Tonanai kontai we mangfoi, wiro meiri wemambiriu we ne taraifoi kaha, mae ne wiwingfoi kontai.

⁵ Dohonao ukatai wawera uru we uwemambewangfo waroi fanai. Masino ureo

ambori une rahida we uwenadi pampang we Sempaisi mani, yo, ukatai wawera uru tourai tonanai. Wape mayea mani ukahefang suru aha, ambori Saminseni sobu katai we wedaya unari sasarifea kaha. Weo tarahio wiro mewemambiriu we metawang meara waroi tonana kaha.

⁶ Fianai aino imadurai tonina ne, wiro yemi mea we ambori mehatai wawera mea kaha, mae manta imadurai we mea terai tonana, masino metohong kariria mani, mahikai.

⁷ Tarai we ifaraise paria we yeyo todoni mani kaiwasanesa erirau kahai kariri yau. Yeo imadu tonanai wape, iwaitawanai we mambiriuo Allai dohonai we mansiari-mansiari fo masi kaha, amani manei sobu mambiriufo we na minohifo rirau, tuti manei aha mani sobuai we na minohifo rirau kaha. Manei Allai dohong mambiriu toninai wei, manei aha mani sobuafo siai.

⁸ Ampafe we mano wiro merirau kaha wa mea, tuti wiwinawa mea mani, yeunau mea yeyo ne mahikai mani, wiro merirau kahai, kariri yau.

⁹ Wape masino metawang mea na metohong we wiwing ete mang wa kaha mani, meriraua. Weo meriraune mahikai sewa weru merirau kahai wape menemirorong niunung mea we metohong we mang ete wiwing aha fo.

¹⁰ Tuti we mano meriraua wa mea mani, imadu we mea tonina, wape wiro

nehu kaiwo fine kaha mae Sempaisi dino dohong kaiwo nina ne. Amani, wiwingno riraua foi, dohonao dira ne mangfoi fanai.

¹¹ Wape masino diraria mani, dohonao rirau siai ahang fanai, ete daraberahi we ne mangfoi aha reto. Tuti mang manei wiro dira ne wiwingfoi fanai.

¹² Mae we mano siai wa mea mani nehu aunaufi nina, wiro Sempaisi kaha. Masino mang manei yoasoia, wape ne wiwing dautia foi wiro yoasoia kaha, mae ne wiwingfoi yoa we minohi riati pampang, nana mani wenani dohonao dira wiwingfoi fanai.

¹³ Tuti wiwingno yoasoia manei, ne mangno dautia foi yoasoia kaha, mae mangfoi yoa we minohi riati pampang, nana mani wiro wiwingfoi dirari fanai.

¹⁴ Weo mangno yoasoia kaha foi, Allai detioi we mirarebanai weo weboyari ria ne wiwingno mirarebanaia foi, we yoasoia fefe. Tuti wiwingno yoasoia kaha foi, Allai detioi we mirarebanaai kontai, weo weboyari ria ne mangno mirarebanaia foi. Weo tonana kaha mani, une arikangfosa ahusa we arikangno ene pari Seng disa. Wape na wawafo manei yoasoai tuti niari kariri finanafo, nana mani arikangfosa emararebanai na Allai arongreafo.

¹⁵ Wape masino weyoasoia kahai nani deo dira ne mangfoi ete ne wiwingno yoasoia

foi, nana mani mang ete wiwingno roasoa wa wau, tawini niari kariri fianai aino enetituaitafoa. Weo na mano yoasoia kaha foi dirari tonanane, mang ete wiwing yoasoia foi ketai weruri, tuni ne taraifoi kesau. Wape, Allai sahu tata we na tariraufo taminohi ruhiae na mai.

¹⁶ Weo wiwingno roasoia wa wau, todoni fino boitawanai we wiro foriri nemu mangwai kahai nina, amani fatari we yoaso Kristusifo kaha e? Tonanai kontai we mangno roasoia wa wau, todoni fino boitawanai we wiro foriri nemu wiwingwai kontai tonana kahai nina?

Meminohi kariri todoni reantenang Allai sahu meara fo

¹⁷ Fianai aino mesobuai na Allai na reantenang fo, amani na rahida meroaso Kristusi kaharai fo, dohonao merurai karerai we meriwang ne tonanane fanai. Weo Sengnei dohongno manea we merirau, manea bereri, manea mewewoming, manea mewewoming kaha. Ne nanai kiai metararatai na mai. Kaiwo imadurai tonina ne, wiro we mea tera kaha, mae kaiwo ninai imadurai we jematinai kiai sentenang we todoni kontaio ambori etohong kaririai.

¹⁸ Ampafe masino manei na reantenang Allai sahui we yoaso Yesusi mani, wenani weYahudi tuti wesunatia mani, dohonao yurai we weYahudi ahang kaha fe. Tonanai kontai we mano

weYahudi kaha foi, dohonao yurai we wesunati ambori weYahudi finana fe.

¹⁹ Weo manei wesunati ambori weYahudi, ete bireri ete, wiro wefiea kaha. Fi fuba sewa mani, ohong kariri te Allai ne Kaiwofo.

²⁰ Ampafe todoni kontaio mansiari-mansiari na minohifo titua kariri fianai aino sobuaia fo na mai, tuti dohonao yurai kareraifa we yi-wang fi tonana ne fe.

²¹ Masino na reantenang Allai sahu wau tuti roaso Yesusi fo, rahida nanai wau wewoming mani, dohonao aromukuayai we ne tonanane fanai, mae munohi wewoming pampang to (tonanai ki, wape masino wobu rang we tawingno wewomingfo mani, rurai we bohong kaririai na mai).

²² Weo woming manei Sempaisi sahui ambori yoaso Yesusi mani, tarahai atorai na nunei mani wewoming pampang, wape na tarai, inontarai wenani wiro we-woming we sasarifoi ahang kaha, mae kesau ampa we weboyari ria Sempaisi. Tuti inontarai wiro wewoming kaha, rahida Sempaisi sahui we yoasoi mani, rahida nani kontai i wewoming, amani wewoming we Kristusi.

²³ Allai wiori mea ampa tuti biaikutu meara futuayai ampa. Ampafe dohonao metohong mene taraiwaia wewoming we inontarai manei fanai.

²⁴ Doroi meaine, na rahida reantenang Allai sahu mea

we meroaso Yesusi fo, rahida nanai memäsi kahai. Manea mewewoming, manea bireri, manea meweYahudi, manea bireri, tuti fi siai wei fo. Ampafe na todoni feai kontaio, na meminohifo, mansiari-mansiari wau munohi kariri fianai aino wobuai na Allaia nanai.

Aunau we mano erirau kaharai fosa; we denteng mani erirau fanai, mae bereri mani eriraua

²⁵ Kaiwo yeo imadurai aha mau nina mani, yeo imadu kariri mano manta wasa, amani mano erirau kaharai wasa. Ea mani wiro isobu kaiwofeai ria Sempaisi karirisa kaha. Tonanai ki wape, na Sempaisi aro yau fo, yuai yau we inontaraio yoasoi di yau, ampafe kariri riraufo yohong kaiwo aunau kaririai toninai.

²⁶ Enehutituai we dadira fubao tasodairi na nufi nina, ampafe ne mahikai mani, meminohi kariri fianai aino mesobuaifara wa.

²⁷ Masino mane wau riraua mani, dohonao bira nemu wiwingwai fe. Mae mano rirau kaha wai mani, dohonao wera we wiwing fanai.

²⁸ Tonanai ki wape mano merirau kahawa mea, amani bariboi ete kadawingwa mea, masino manei rirau mani, ne tonanane wiro niari sasari kaha. Wape anta imadu tonanane mani, yeo ambori mekaharai weru dadirafo. Weo na fuinina mani mano erirau nesa ambori esobu dadira bitoya rai.

²⁹ Doroi meaine! Fianai aino imadurai nina mani, enehutituai tonina: Tane rahidafeai fau ahang kaha. Ampafe na ninai to fongna mani, mano riraua foi, niari toyario ne pari wiwing.

³⁰ Tuti mano saia deidu foi niari toyari wiro sai kaha, mano firaise foi niari toyari firaise kaha, mano wiori fi foi niari toyari wiori finani we mantauni kaha,

³¹ mano urewa na fi nunei, niari toyari wiro enetituai kariri fi nunei ahang kaha. Weo waroi ahang kahai mae, nuo tawatiao nini ambori niai ki.

³² Yohong weai we mearomikuayai we fi nunei fanai. Mano rirau kaha nei mani ambori enetituai terai we fio na Sempaisi, ampafe yurai te we na fi niari fo Sempaisi eneoi.

³³ Wape mano riraua foi mani enetituai we fi nunei, amani yurai we niari kariri fianai aino wiwingfoi eneo fo.

³⁴ Tuti nanai dohoni urewara wedaya enerorong-foi weboyari we Sempaisi kaha. Tonanai kontai we wiwingfosa. Wiwing mano rirau kaha foi ete kadawing sowaworua foi, i mani ambori enetituai terai we fio na Sempaisi, weo enetituai we ambori mesi, na ne taraifoi tuti na nuaninufoi, na Allai arongreaflo. Wape wiwingno riraua foi mani, enetituai bitoya we fi nunei, weo yurai we ambori ne mangfoi eneoi.

³⁵ Fianai aino imadu kariri kiai tonana foi, wiro we yei

wedua mea weru meriraufokaha, mae imadu we mene bengfo terai, ambori na meminohi toa fo memasi tuti ambori meraria Sempaisi na menemirorong boyari.

³⁶ Wape masino bariboa manei enetituai we wiro niari mai turura kaha we ne wiwing da wei foi, tuti katu mani ambori wiwing nani wewiwing tawa, ete wiro sawani wei ahang kaha, ampafe enetituai we todoni mani urirau, nana mani, niari kariri fianai aino enetituaitai tonana foa. Weo na tonanafo wiro niari fi sasarifo kaha.

³⁷ Wape mano rirau kaha foi enetituai na mantauni enerorong ketui foi kiutuai we wiro rirau kaha, tuti wemambiriw we sawani wiro dohong sasari kaha, inontarai nani kontai niari ne bengfo.

³⁸ Ampafe tanang tofino, manei rirau mani beng, mae rirau kaha mani, nanai beng sewa aha.

³⁹ Wiwingno riraua foi mani wiro kesau kaha, weo weboyari pampang ria ne mangfoi fo rai. Mae masino mangfoi mireha weruia mani, wiwingfoi kesau finanaia. Ampafe eneo mang manei we dauti aha mani towea kaha. Kutu na fino rirau kariri fianai aino Sempaisi dawi wea fo, amani dau mangno yoaso Yesusi manei.

⁴⁰ Wape we yau mani, wiwing nani rirau ahang kaha mani, piraise sewa rai. Mantaung yau ene-

hutituaitai tonana. Wape enehutituaitai we fianai aino imadurai ninai, Sempaisi Nuaninufoi dino sensoni yau we enehutituai tonana ne.

8

Kaiwo kariri fiangno ohonai we aririwangfoi, tatani ete nana fanai

¹ Ninaifa mani, yeo imadu kariri fiangno inontaraine etohonai we aririwangfoi fo. Meteyo, "Tawaitawanai weo tata kiai tasewaia tahai ampa." Wape awai tonana nei wedaya inontarainesa enemirorong dedai. Mae taenemiwawufo aino do-hong inontarai ewemambiriu tuti etoaria mutu.

² Mano enetituai we deyo deitawang maino fifiani konta foi, wenani dei funomai weo wiro deitawanaia mai kaharai.

³ Wape mano enewawu Allai tarai foi, Allai deroanso wenani.

⁴ Ampafe kariri fiangno ohonai we aririwangfoia fo mani, tawaitawanai we aririwang nanisa, deinawi fio wetarai kaha tuti anture watioi kaha fo. Weo tawaitawanai ampa we Allai mani mansiari kawuru, wiro seng siai manei ahang kaha.

⁵ Tarai, seng tarai kaha foi bitoya paria. Bitoya pariao inontaraifosa esahusa we ene seng we esomi wesa, manea na rorafaisi tuti manea kontai na nunei.

⁶ Tonanai ki wape, we tata mani, tane Allai mansiari kawuru, amani andino tasahui we Dai ne. Andino

niari fifuba nini kiai ne, tuti taminohi tatarang nina mani we meiri kawuru. Tuti tane Sengnei kontai mansiari, amani Seng Yesus Kristusi. Na Seng Kristusi nini dino Allai niari fifuba nini kiai ne, tuti andino wedaya mani taminohi tatarang nina.

⁷ Kaiwone tonanai, wape inontarai taroasoa ne tata, manea ewaitawanai mai tonana kaha. Manea raminde nanai esomi we aririwangfoi, ampafe paria ninai enemittuitai eteyo, fiangno ohonai we aririwangfoi we omi wei nai fo mani, aririwangfoi ne fiang fine. Ampafe etani aha mani enumiruainso na enemirorong ketui fuisi toyari enari sasari, weo eroasoafu mutubaru kaharai fefe.

⁸ Wape tawaitawanai we wiro fiangne aino wedaya tawebayari ria Allai ne kaha. Ampafe tatang ete bireri teao wiro finanai kia fieai we tata kaha.

⁹ Tonanai ki, wape metanansiau kontai, we dohonao na meroasoia mutu tonana fo, wedaya menari fio ambori ne tarai wewaitepari we tipa tane doroi eroasoai turura kaha fosa, we enari sasarifo fe.

¹⁰ Weo enehutituai tonina, tarahai mene doroio yoasoai mutu kaharai manei, amani mano deitawang rang Kristusi na mai kaharai foi, deti mano mewaitawanai na mai wa mea meminohi metampi na munu kaiwasa esomi we aririwang nai foi, tuti na tonanane wedayari dang fiang tonana fo kontai.

Tuti na tonanane, enerorong ketui fuisi disani toyari do-hong sasari fenanai, weo na enerorong ketui foi enetituai ang fiang tonana mani, sasari fine.

¹¹ Nana mani na tonanane, mano meroasoia mutu wa mea mewedaya mano yoasoia mutu kaharai foi, amani mene doroi mano Kristusi mireha wei konta foi, sodai karira pari fo.

¹² Masino menari fisarawai tonana feai we mene doroi eroasoia mutu kaharai fosa, tuti mewedaya enemirorong ketui foi wekahai, nana mani metohong sasari we Kristusi.

¹³ Ampafe we yau mani, yang funomai wiro kia sasari we yau kaha mae, masino fiang yang fo wedaya nehu doroifoi sawai to sasari rorong foi mani, wiro yangno andowa taraifoi ahang kaha, ambori iwedaya nehu doroifoi sawai to sasari rorong foi fanai.

9

*Paulusi medu tutiri kariri
werasulifo tuti kariri ne mam-
biriu na werasuli nana*

¹ Tofino, yau mani, rasuli di yau kaha e, ete ikasau na Sengnei kaha e, tuti wiro iwati Yesusi, tane Sengfoi, na ure-hureane kaharai e? Bereri kontai kai! Weo tarai iwati Yesusi tuti yuai yau we ne rasuli ampa. Weo na fio iru we Sempaisi fo, wedaya meroasoai ampa.

² Masino inontarai siai etato yau we iwerasuli wesa kahai kontai ki, wape iwaitawanai we mea mani meroa

we yau tonana rai. Weo meroasoai ampa, ambori mewefiainaawiai kariri yau we mandoni kontai, we yau mani, Sempaisi ne rasuli di yau.

³ Masino inontarai maneiru teai na nana wa esahufora yau mani, nehu kaiwo imadu tutu yau finina.

⁴ Tofino, rasuline amea mani, wiro amene mambiriufeari we amesobu mereha unung tuti fiang ria mea na fi ameru ne kaha e?

⁵ Tuti tofino, amene mambiriufeari we amerau wiwing Kristeni tuti ameriasa na rang rorong ameraoa fo kaha e? Weo rasuli siai fosa, toyari Seng Yesusi ne tahatuifosa tuti Petrusi enari tonanaia. Ampafe amea mani siai werusa re?

⁶ Ete tarahi menemitituai meteyo, na rasulinesa kiai, yau tuti Barnabasi aumeiri auruino wiro ausobu fiang ria jematine fanai, mae aurufi siai fo we ambori ausobu fiang demoyarai we auru fo ne?

⁷ Tofino, afai mamuna nesa etontai we emamuna mani, mantaunsa ebai berasa we etontai emamuna fo rai e? Tuti mano niari romifoi wiro dangno fisanang nana kaha e? Tonanai kontai we mano dehung sapi ka ne uifoi, ikontai ambori dunung ui nani konta kaha e?

⁸ Fianai aino imadurai tonina ne, kaiwo inontaraine emadurai tera fine kaha, mae Hukumio Allai dohonai we Musai foi kontaio dotu tonanai.

⁹ Weo na Sengnei ne Kai-wone soi toninai:

“Sapiro fiata inontarai yufi na romifoi fo mani*, dampi kontai, wiro kibu wedua borongfo fanai.”*

Kaiwo dotu tonanane, sapifo dino Allai urengfo nayai nai ne ne?

¹⁰ Ete kaiwo nanai dotu we tata re? Tarai kaiwo nanai dotu we tata. Weo mano yufi na romi patibu foi tuti mano diri patibufoi weru nenggaingfoi, urufi tonanafo todoni kontaio unemitawanai we ambori usobu fianai aino unari nanai weai ki.

¹¹ Ne tarai toyari aibongno ikafari na romifoi tifu webong ampa. Tonanai kontai Kaiwo Mahikai fo amehafarerawai we mea ampa tuti meroaso Kristusi ampa. Nanai deinawiai weo todoni kontai amene mambiriufeai we amesobu fieai ria mea, weo amewuwu Kaiwo Mahikai fo we mea fefe. Ampafe masino amesobu fieai ria mea we mefata amea nayai, toyari fiang ete fi siai wei fo, nana mani amenari marabafo karerai we mea re?

¹² Masino mangfata siai ene mambiriwe etutang mea we fi tonana fo, nana mani amea kontaio amene mambiriufu fuba sewa aha we ametutang mea we fi tonana fo kontai.

Wape wiro amenari ne tonanafo kaha. Na dadira doni kontai amesodaira fo ametawang amea terai, wiro ametutang we fi toyari fiang na mea kaha. Amenari

tonanai weo dohonao na fi ametutang weai ria mea nanai wedua mea weru meroaso Kristusi ne Kaiwo Mahikai fo fe.

¹³ Mewaitawanai ampa, weo mano erufi na Allai ne Munufoi sa mani, esobu ene fiangfo na fi eru na ne Munufoi nanai. Tuti mano erufi na mesbaa nunung korbani we Allai nai foi mani, esobu fi korbani nanai kuteai we ene fiangfo tonanai kontai.

¹⁴ Tonanai kontai na fianai aino amenari nina. Sempaisi kiutuai ampa we mano amewuwu Kaiwo Mahikai fo amea mani, todoni kontaio amesobu amene fiangfo na inontaraio amewuwu Kaiwo Mahikai fo wesa nanisa.

¹⁵ Tonanai ki, wape nehu haki we isobu fi ria mea wa mani, wiro yohong kariri kutea kaharai. Tuti fianai aino isoi tonina ne, wiro enehurorong we ambori mefata yau toyari isobu doi ria mea kaha. Weo fio enehukandoria fo mani, paria ninai iwuwu Kaiwo Mahikai fo arora, wiro yutang mea we fieai ete doi kaha. Mae mebai yau weo iwuwu Kaiwo Mahikai fo we meafo mani, fi enehukandoria fo nanai nai weru yau, tuti enehutituai nana mani ne mahikai sewa we yau mani, imerehara.

¹⁶ Wape na iwuwu Kaiwo Mahikai fo ninai, nehu fieai we iboiwawa arohu wea kaha. Weo finanai Allai dino demi yau inari ne, ambori todoni kontai iwuwu teri. Mae iwuwu Kaiwo Mahikai

* 9:9 Amani, ‘sapiro sahariroya patibu we taraifoi tifating weru nenggaingfoi’.

* 9:9 Ulangan 25:4

fo kaha mani, isobu ne karirafo paria.

¹⁷ Weo masino mantaung yauno yawiaw we iwuwu Kaiwo Mahikai fo tonana ne, nana mani enehutawanai we ambori isobu fiembaitafo na fi inari nanai. Wape iwuwu Kaiwo Mahikai fo nanai, wiro na mantaung yau nehu awiafo tera kaha, mae finanai fio Allai sahu yau weai we inariri ne. Ampafe imaya ete imarira teaio, todoni kontai inariri.

¹⁸ Tonana mani, fiembaitai fianai aino isobua ne? Fi Allai dohonai we fiembaitai we yau mani, demi yau we iwuwu ne Kaiwo Mahikai fo arora, wiro isobu fieai na inontarai manei we fiembaitai we yau kaha.

¹⁹ Yau mani woming di yau kaha tuti inontarai manei ne yau kaha. Tonanai ki, wape inari yaua iweoming we kaiwasanei kiai ampa, ambori na tonanane ika kaiwasa bitoya we Kristusi.

²⁰ Ampafe we inontarai Yahudi fosa mani, inari yau toyari Yahudi, ambori na tonanane ikasa we eroaso Kristusi. We mano etohong kariri Hukumio Allai dohonai we Musai fo na mai fosa mani, inari yau kontai toyarisa we yohong kaririai na mai kontai (wape tarai to, Hukumi nanai wiro wemambiriu we yu yau ahang kaha). Inari tonanafo ambori ika inontarai nanisa we eroaso Kristusi.

²¹ Tuti we Yahudi kaha fosa mani, inari yau toyarisa, amani inari toyari wiro yohong kariri Hukumi Musai

foi kaha, ambori na tonanafo ikasa we eroaso Kristusi. (Wape na inari tonanafo, dohonao manei deitarahio yohong kariri Allai ne Kaiwofo kaha fe, yau yohong kaririai na mai, amani kariri Kristusi ne Kaiwofo.)

²² Tonanai kontai we mano ene eroasoafu mutu kaharai fosa, inari yau toyarisa, amani wiro inari fio tarahai dohonsa etawai tono sasari rorong fo kaha. Ambori na tonanane ifatasa we eroaso Kristusi. Ampafe, tanang tofino, we mandoni kontai, na eminohi toa fo, inari yau toyarisa, ambori na rang todoni kontaio inari fo, wedaya inontarai maneiru teai nasa eroaso Kristusi.

²³ Fi inariri kiai tonana foi, inariri we Kaiwo Mahikai na Allai fo, ambori efau eroasoai, tuti yau kontai ambori isobu moanafo riasa kontai.

²⁴ Mewaitawanai ampa, weo kaiwasa bitoyao emitoto pisa fosa mani, mansiari kawuru andino sobu fiembaitafo ne. Ampafe mandoni wau kontaio rurai we muto na mai, ambori wobu fiembaitafo.

²⁵ Inontarai emitoto pisa fosa, tuti inontaraio ewawoai na fi siai wei fo konta fosa, mansiari-mansiari yurai we sobu aunau kariri fianai aino ehutuai kariri todoni ewawoai toa fo. Mano enari tonana fosa, enemirorong we ambori esobu fiembaitafo, amani fiembaitaio katu mani woru fo. Wape tata mani tarurai we tasobu fiembaitaio wiro woru na wea kaha fo.

²⁶ Tonana mani irurai we

imito na mai, wiro toyari manei mito funoma kaha. Tuti irurai toyari mano ewawoai na etuhung fosa, yau kontaio wiro ituhung funoma kaha.

²⁷ Ampafe irurai paria we itawang nehu tarainei tuti yeunauwi na tapapa paria, inariri wewoming we yau we dohong kariri fiani aino yawi wea fo, paria dohong karirai na mai. Inari tonanai we imatai dohonao irurai paria we iwuwu Kaiwo Mahikai fo we inontarai siai, wape mantaung yau wiro isobu fiembaitafo ria Allaifo kaha fe.

10

Paulusi deunau jematifoi kariri fi karira fafongfa Yahudifosa esodairia foi, na fi karira enaririfo

¹ Ampafe, doroi meaine! Yeo todoni kontaio wiro meserawawera kariri fianai aino raminde tane werengfosa era ria Musai fo esobuaia fo na rahida ewawu weru nu Mesiri foi. Aisiyang kafafe foi wiwiainsa tuti era kutu rawanangfoi na katai sirahia foi.

² Ne tarai kariri tata, we na tawebaptisifo taweboyari ria Kristusi tuti tarariati, ea kontai, na fianai esodairai nanai, amani na kafafe wiwiainsa foi tuti na era kutu rawanangfoi, deinawiai we ea kiai eweboyari ria Musai tuti era riati.

³ Ea kiai Allai mantauni dohong fiang masih fo wesa we etang,

⁴ tuti dohong mereha masih fo kontai we etunung, amani mereha deda na kamiei mirarebanai weririasa foi. Kamiei nani mani Kristusi mantauni dine.

⁵ Tonanai ki, wape ne efau-fosa Allai firaise wesa kaha, nanai wedaya emarareha na rang rabuang tuti ene taraifoi wiatai na rang rorong era naya fo na katai sirahiai wekamamiei nani.

⁶ Finanai we fiainawiai we tata, we deretawang tata ambori fi kerira enariri tonana foi wiro tatothong wei we tanariri fanai.

⁷ Ambori wiro tata kontai, tasomi we aririwang kariri tane riria Israelifosa manea fi enaria fo fanai. Kariri kaiwo rabuang bei dotu deyo,

“Ainanaya kaiwasafosa eminohi etampi etunung tuti emahai we esomi we ariri-wangfoi.”*

⁸ Dohonao tanari toyari efau nasa we emaninawa funoma fo fanai. Weo na emaninawa funomai nanai wedaya ewe-23.000 emarareha na rahida boyari.

⁹ Tata kontai dohonao tateyo tatitua we Sempaisi karirisa fanai, weo mano enari tonanai wedaya tawai emamuna ehararisa tuti emararehara.

¹⁰ Tuti wiro tahutu Sengnei na taenemirorongne kariri manea nasa fo fanai, weo enari tonanafo wedaya we-waio kia marareha foi miunsa.

* **10:7** Keluaran 32:6

¹¹ Fi kiaio esodairi nani we fiainawiai we tata kiai, tuti finanai esoi kaririai kontai ambori wefiainawiai we tata tuti deretawang tata, amani mano tanayai na nufi rerai we kiai nai fe nini tata.

¹² Ampafe mandoni wauno enemutituai we boaria mutua mani, wenani wau bonautsiau ambori wiro tawa fanai.

¹³ Wiro meiri wau wodai fi weanggari wau tonana fo kaha, mae inontaraine tata kiai, fi weanggari tata we tanari sasarifoi bitoya tasodairi tonanai. Tuti Allai dohong kariri ne Kaiwofo na mai, ampafe wiro sua fi weanggari tata fo fuba sewa tane mambiriufo kaharai. Wape na rabuang bo mane wobu fi weanggari wau we tawa foi mani, rabuang bonani kontai Allai ambori dohong rang we wau, ampafe wemambiriw we tawang wau na ne tonanafo ambori boaria mutu ki.

Meweboyari ria Allai terai, wiro ria aririwangfo konta fanai

¹⁴ Ampafe doroi enehuwawu meawa meaine, todoni kontaio wiro mesomi we aririwangfo fanai.

¹⁵ Imadu we mea mau ninai, imadu we mea kariri inontarai esawai, weo iwaitawanai we mesawai fefe. Ampafe fianai aino imadurai we mea mau ninai menemitiuai kaririai.

¹⁶ Rahida tatumung angguri na perjamuangfo we taaromio kariri Kristus ne rikao tiwowu we tata na aitabafoi nanai, tatohong

mahikai we Allai tuti tatunumi ruhiai. Nanai deinawiai weo tata mani Kristus ne inontarai di tata, inontaraio feriri tata na ne mararehafoi. Tutti na tababau rotifo tutti tatang ruhiai nanai, taaromio kariri Kristusi we mireha na aitabafoi nanai.

¹⁷ Rotifo boyari kawuru andino tatani ne, amani kariri Kristusi ne taraiifo. Finanai deinawiai we tata tafau, wape taweboyari na Kristusi.

¹⁸ Mewati inontarai Yahudi fosa re? Amani mano etohong fi we korbani we Allai na mesbafoi tutti etani fosa, tutti na tonanafo eweboyari ria Allai tutti esomi wei.

¹⁹ Metafu fianai aino imadurai we mea mau ninai e? Fiang ohonai wekorbani we aririwangfoi, ete aririwangfoi mantauni, finanai wiro wifiea kaha.

²⁰ Tonanai ki, wape fianai aino mano esomi we aririwangfoi, korbani etohonai we aririwang esomi wei foia mani, tarai ampa we finanai etohonai we nuaninu karira fosa, wiro we Allai kaha. Tuti imaya we meweboyari ria nuaninu karira nanisa kaha.

²¹ Mea kontai, wiro metnung Sempaisi ne angguri mirarebana foi tutti metnung nuaninu karira fosa ene fifo konta kaha. Tuti wiro metang Sempaisi ne rotifo tutti nuaninu karira fosa ene fiangfo konta kaha. Ampafe todoni e metampi tutti metuning ria inontarai na ene fio esomi we nuaninu karira fosa, akawuru wori meteyo mesomi we Allai?

²² Ete memaya we tanari

Sempaisi enerorongfoi pirahai na fisiaio taenemirorong dohong wea fo ne? Ete tarahai taenemituai weo tawemambiriuwewari e?

Aunau kariri todoni ang fiangno ohonai we aririwangfosara fo

²³ Inontarai manea eteyo Allai feriri tata weru aiboi tasobui weo fikarira tanariri fo, donio emadu eteyo, "Inari fifiani kontai, ne bengfo ete karirafo, finanai mai kontai." Wape wiro finani kiai kia mai kaha. Tuti eteyo, "Inari fifiani kontaio, mai." Wape wiro finani kiai fiata wawera tata kaha.

²⁴ Dohonao mansiari-mansiari wau rurai terai we mantaung wau fanai mae, rurai we fata inontarai siai kontai.

²⁵ Andowa tarai doni kontai meworiri na kondiro-rafoi, metani ki. Tuti menemiwawera weai mani, dohonao metutang berahai we finanai etohonai kawuru we aririwangfo ete bereri e, ambori wiro metani na mearomikuayai na mene-mirorong ketui wai kaha.

²⁶ Weo,

"Nunei tuti fi kiai niyai nai foi mani Sempaisi ne fi dine."^{*}

²⁷ Masino inontarai yoasoa kaha manei wenoti mane wau we bampi riati, tuti roa we ne noti nani, nana mani fianai aino meinenaamai we murang fo bangna. Wiro aromukuayai na enemuro-rong ketuo denteng wai tuti wiro butang wawerahaifa

we kia fiang nanai na doni ma fo fanai, toyari etohonai kawuru we aririwangfosa ete bereri e.

²⁸ Wape masino manei deikarirai we wau deyo, "Fiang ninai fiangno ohonai kawuru we aririwangfoia fine," nana mani wiro bang fanai, weo enemutituai kariri mano deikarirai nani ne yoasoafu tuti enerorong ketui foi.

²⁹ Imadu tonanafo, wiro we wauno enemurorong ketui wea ne kaha, mae we mano deikarirai we wau wai enerorong ketui foi terai. Weo we tata mani tatani ete bereri e, wiro wefiea kaha.

Mae, tarahio inontarai manei medu deyo, "Na Kristusi ikasau we inari fibeng funomai. Tonana mani we fianie inontarai siai enerorong ketui foi wedaya wiro inari fi beng fo funomai kariri iroasoane kahai nina?"

³⁰ Tuti deyo, "Masino ifiai Allai yohong mahikai wei we fiangfeai, tuti yang fiang nanai, we fianie inontarai siai dinggai yau we fiang yang fo nina? Weo fiang nanai yohong mahikai tutirai we Sempaisi ampa." Tarahai manei medu tonana.

³¹ Ampafe yeo toninai, metampi ete metunung, ete fifiani aino menari wa, finanai kiai menari na mai, ambori inontarai siai eta-paranding Allai.

³² Metitua we fi menari wa ambori mewedaya inontarai siai etawai tono sasari rorong fo fanai, amani we in-

* **10:26** Masmuri 24:1

ontarai Yahudi fosa ete we in-
ontarai Yahudi kaha fosa, ete
we Allai ne jematifosa re.

³³ Na fi tonana ne mururai
we menari kariri yau, weo
yau mani, irurai we na fi mai
inari fo, wedaya kawasafoi
kiai efaraise. Weo wiros
irurai we isera we finehu kaha,
mae fi isera wea mani am-
bori mandoni kontaio sobu
mai, amani sobu faririfo ria
Allai.

11

¹ Ampafe metohong kariri
inari toa ne. Weo yau kontaio
yohong kariri Kristusi niari
toa fo fefe.

*Kaiwo kariri wiwingnesa
fi enari kariri ene koangfoi na
rahida ewenadi*

² Ifiai mea weo na fifiani
kontai mearomio yau tuti
metohong kariri nehu kaiwo
aunau kariri koang jematio
yohonaifa we mea wa fefe.

³ Wape yevo mewaitawang
fieai kontai aha, amani mano
wenunggamiei we mangnesa
kiai mani Kristusi. Tuti mano
wenunggamiei we wiwing-
foi mani ne mangfoi. Kon-
tai mano wenunggamiei we
Kristusi mani Allai.

⁴ Mang manei wenadi
ete medu Kaiwo Sempaisi
dohonai wei fo na kaiwasa
bitoya foi earomireafo tuti
sensang wedua nungfo mani,
wenani dohong mamaya
mani wenunggamiei wei foi,
amani Kristusi.

⁵ Tonanai kontai we wi-
wingfoi, masino wenadi
ete medu Kaiwo Sempaisi
dohonai wei fo na kaiwasa
bitoya foi earomireafo, wape

sensang wedua nungfo
kaha mani, wiwing nani
dohong mamaya mano we-
nunggamiei wei foi, amani
ne mangfoi. Niari tonana
mani karira paria, ne tarai
toyari dei nungfoa fenana.

⁶ Weo wiwing manei
na ne tonanane wiros
we sensang wedua nungfo
kaha mani, todoni kontaio
kepang pariaia tawawa.
Wape we wiwingnesa manei
dei nungfo ete kepangna
tawawa mani, finanai kia
mamaya wei paria. Ampafe
ne mahikai mani sensang
wedua nungfo terai.

⁷ Wape mangnesa mani
esansang wedua enumifo
fanai. Weo mangnesa mani
eteinawi kariri Allai man-
tauni tuti ne sambewaraio
dadai fo. Wape wiwingfoi
mani Allai dohonsa we ene
mangfoi ene sambewaraio
dadai fo.

⁸ Weo mangnei wiros
Allai niariri we wiwingnei kaha,
mae niari wiwingnei we
mangfoi.

⁹ Tuti mangnei mani wiros
Allai niariri we wiwingfoi
kaha, mae andino wedaya
Allai niari wiwingfoi wei ne.

¹⁰ Ampafe nanai wedaya
wiwingfoi todoni kontaio
etabung wedua enumifo,
weo finanai wefainawiai
kariri mano wenunggamiei
wei foi, amani ne mangfoi.
Kontai weo wewai ewati
meu fosa ewaitawanai we
wiwingfoi deto ne mangfoi
na mai.

¹¹ Tonanai ki, wape mano
taroaso Sempaisine tata

mani, tawaitawanai wiro wiwingfoi siai tuti mangfoi siai kaha.

¹² Weo kariri reantennang pari fo, wiwingfoi Allai samui na mangfoi, tuti mayea mani mangnei saubaununggamiei na wiwingfoi. Tuti fininai kiai na Allai ma.

¹³ Mantaung mea menemitiuai kaririai, wiwing manei wenadi we Allai na kaiwasa bitoya foi arongreafo, wape wiro sensang wedua nungfo kahai tonana mani, mai ete bireri e?

¹⁴ Kariri fianai aino tata kiai tawaitawanaia fo, amani kariri tane koangnei mani, mangnesa etua enumifo dawariroi mani, mai kaha mae kia mamaya wei paria.

¹⁵ Wape we wiwingnesa enumirandaungfo dawariroi mani, kia sambewaraio dedai wesa. Weo enumirandaungfo dewariroi tonana mani, Allai niari we wedua enumikamieifo.

¹⁶ Masino manei yoa we kaiwo nina kaha mani, fio yeo yeyoaifa mani, yau tuti Allai ne jematinei kiai wiro amemadu kaiwo siai feai ahang kaha, weo fininai aino kariri tane koangnei tanari ne.

Fisarawaio jematifosa enari na perjamuangfoi

¹⁷ Kariri fio yeyo imadurai aha mau nina ne mani, wiro ifiai mea kuteai konta kaha. Weo mefanduhi mea we mewenadi mani, fi menari na nana fo kia mai kaha mae kia karira bitoya paria.

¹⁸ Weo ne fuba sewa ne mani, na mefanduhi mea we mewenadi tonana, mewebayari kaha, amani manea siaia, manea kontai siaia. Kaiwo tarahuoi tonina ne, enehutituai tarahai kaiwo tarai fine.

¹⁹ Tarai ampa weo mewebayari kahai tonanai, ambori waitawanai na mai we mandoni meaino metohong kariri ne maifo tuti Allai eneo mea.

²⁰ Na rabuang bo mefanduhi mea we mearomio Seng Yesusifo na metunung angguri tuti metang rotifoi nanai, wiro menari na mai tuti tarai kaha.

²¹ Weo metang perjamuangfoi nanai, wiro metamangna metatorai na mai kaha, mae mansiari-mansiari wau biriu we mantaung wau ka fiangfo siai. Wedaya manea esobu fiang kaha ambori ewawisi, wape manea kontai awa emayeru we etunung angguri bitoya fefe.

²² We fianie menari tonanai nina? Mene pari munu we metampi tuti metunung nai e? Ne mahikai mani metampi na mene munufo akawuruwo, ambori mera wa we metang perjamuangfoi ki. Ete fianai aino menari tonana fo, merurai we mene-mirireu Allai ne jematifoi tuti metohong mamaya inontarai ene pari fi na mea fosa re? Na toninane yeyo imadu fiani we mea aha mau? Ifiai mea ete bereri e? Todoni kontaio ifiai mea kaha!

²³ Weo fianai aino isobuaria Sempaisi mantauni fo,

finanai yeunauwai we mea ampa, amani na diru bo Seng Yesusi manei dewayani fo, kia rotifo

²⁴ Tuti dohong mahikai tutirai we Allai, mayeai fiobabau rotifo tuti medu deyo, "Nehu tarainei dinini, nehu tarai nini dino yohoni we mea ne; menari kariri finanai pampang we mearomio yau."

²⁵ Tonanai kontai we anggurifo, etampia kaifo kia nofio esoni angguri nai foi, medu deyo, "Angguri nini mani Allai ne Kaiwo Arerai Waworuo tebhuhiri na nehu rikanei dine, amani rikao tiwowu we mea nei. Metunumi. Menari fininai pampang we mearomio yau."

²⁶ Weo rahida bodoni kontaio metang ne rotifo tuti metunung ne anggurifo tonana mani, metainawi kariri Sempaisi ne mirehafo finanai, paria daraberahi nai aha ma fo.

²⁷ Ampafe mandoni dino dang rotifo tuti dunung anggurifo na enerorong mesi kaha mani, wenani dohong sasari we Sempaisi, amani Sengno dohong ne taraifoi tuti ne rikafoi we feriri inontaraine tata foi.

²⁸ Ampafe mansiri-mansiri wiro da wa dang rotifo tuti dunung anggurifo kaharai mae, titua kariri mantauni akawuru wo, weo niari finanai na masi ete bireri e.

²⁹ Weo mandoni dino dang rotifo tuti dunung anggurifo funomai, amani wiro enetituai sauarai we finanai

deinawi kariri Sempaisi ne taraifoi kaha mani, wenani ne tarai toyari dang tuti dunung Sempaisi ne aiboifo.

³⁰ Ne tonanane wedaya maneiru teai na mea emaninang ete efanahang, tuti manea kontai emarareha.

³¹ Wape wiro tatang rotifo tuti tatumung anggurifo kaharai mae, titua kariri tata akawuru wo, nana mani tasobu aiboifo ria Allai kaha.

³² Wape Allai dohong aibofeai we tata mani, finanai we deunau tuti fiata tata, ambori wiro tasobuo aibooi meinenaamai we bioi nunei nai foi kaha.

³³ Ampafe doroi meaine, masino mefanduhi mea we metang rotifo tuti metunung anggurifo mani, metamang wawera mea, wiro manea metampi fafong weru manea fanai.

³⁴ Masino mane wowisi mani, bampi na nemu munufoi akawuru wo, ambori mefanduhi mea metang rotifo tutu metunung anggurifo na mai, tuti na tonanane wiro kia aiboifo we mea kaha.

Kariri fisiasi wei fo mani, kio yontai mau wo, ambori yeisaharai we mea ki.

12

Paulusi medu kariri Fi Maio Nuaninu Mirarebanai dohonai we inontarai taroaso Yesusi ne tata ambori tabiriu we tarufi wei (robong 12-14)

¹ Doroi meaine, fianai aino yeo imadu kaririai aha mau nina mani, kariri Fi Maio Allai Nuaninufoi dohonai arora we mano taroaso Yesusi ne

tata. Fi Mai nanai irurai we ambori wiro meserawawera kariri ne wetaraifo fanai.

² Mewaitawanafa weo raminde metaroanso Allai kaharai fo mani, metau funomai we aririwangno ene pari anseng fosa we mera riassa.

³ Nanai wedaya yeo yeikaririai we mea, ambori mewaitawanai weo Allai Nuaninufoi sensoni manei mani, todoni kontao wenani wiro deikanggani Yesusi, to-yari deyo, "Karira we Yesusi," tonana kaha rai. Tonanai kontai we mandoni dino Allai Nuaninufoi sensoni kahai, wenani wiro biriu we deyo, "Yesusi mani Seng dine," tonana kaha.

⁴ Fi Maio Allai dohona fo masi kai kaha, wape finanai na mansiari, amani Nuaninu Mirarebana foi.

⁵ Fi bitoya inontaraine tanari we tafata Sempaisi naya fo masi kai kaha, wape finanai kai we tafata Seng mansiari, amani Seng Yesusi.

⁶ Tuti mambiriuo tata kiai tasobuai we tarufi we Sempaisi fo bitoya, wape mano dohong mambiriu tonana foi kiai, na Seng mansiari, amani Allai.

⁷ Mae we mansiari-mansiari na tata, Nuaninu Mirarebana foi sensoni tata tuti dohong ne Fi Mai fo we tafata mano tararia Kristusi ne tata kiai.

⁸ We manei mani, Nuaninu Mirarebana foi dohong mambiriu wei we medu mani, ne kaiwofo sewai paria. Tuti we manei siai mani Nuaninu Mirarebanai nani kontai dohong awai

wei ambori deitawang kariri Allai ne Kaiwofo na mai.

⁹ Nuaninu Mirarebanai siari nani kontai dohong mambiriu we inontarai manei siai aha ambori yoasoai na mutu ambori Allai niari fi wemambiriu paria. Mae we manei siai aha mani Nuaninu nani dohong Fi Mai wei ambori wemambiriu we niari kaiwasa ebeng weru ene maninangfo.

¹⁰ Mae we manea siai aha mani, dohong Fi Mai siai kontai wesa amani, manei sobu mambiriu we niari fitantumafo, manei aha mani wenabi ambori medu kariri Allai ne dawiaio deinawiai weia fo. Manei siai kontai aha mani sobu mambiriu we deitawang kariri fianai aino na Allai Nuaninufoi tuti doni aino na nuaninu kerira foi fo. Manei siai aha mani sobu mambiriu we medu kaiwo aisei fo, tuti manei siai kontai sobu mambiriu we deisaha kariri kaiwo aisei nanai.

¹¹ Fi fuba nanai kai Nuaninu Mirarebana foi mesiri dino dohong Fi Mai tonana fo we inontarai nanisa esobua ne. Dohonai tonanai we mansiari-mansiarifo kariri Nuaninufoi ne dawiafo terai.

Kaiwasa na Kristusi ne jematinei mani, ne tarai toyari Yesusi ne tarai dine, amani weboyari wape ne ureng, warang, aweng tuti fi siai wei fo

¹² Tane tarainei mani, boyari, wape ne aweng, warang, ureng tuti ne tarai siai wei fo. Tane tarainei bitoya tonanai, wape weboyari kawuru, amani ahui we

tane tarai. Ampafe Kristusi ne tarai tonanai kontai.

¹³ Tata kiai, amani Yahudinesa, kontai Yahudi kaha nesa, mano ewewomingnesa, kontai mano bereri nesa, tata kiai tasobu baptisifo na Nuaninu Mirarebana foi ampa tuti sensoni tata kiai kontai ampa, ampafe taweboyari na Kristusi, amani tataino Kristusi ne taraifoi di tata.

¹⁴ Tane tarainei mani wiro werobong beyari tonana kaha, ete wewarang tera kaha, mae weureng, weaweng tuti ne tarai siai wei fo.

¹⁵ Masino taaweminei medu deyo, "Yau mani warang di yau kaha, ampafe ikontai na fino ne tarainei kaha," wape anture taaweminei mani wiro tane tarainei weai aine kaha e?

¹⁶ Tuti masino tataramindaungnei deyo, "Yau mani ureng di yau kaha, ampafe wiro ikontai na ne tarainei kaha." Nanai kontai wiro tarai we tataramindaungnei mani wiro kiontai na ne tarainei kaha?

¹⁷ Weo masino tane tarainei sentenang weureng terai, nana mani ambori tarao fi todoni? Ete tane tarainei sentenang wetarang, nana mani niunafi todoni?

¹⁸ Wape tawatioai we Allai samu tane taraineia mesi tonanai, amani tauremine na ne kataifo, tataramine na ne katai, tuti siai wei fo nayai na ne kataifoa masi, finanai niari kariri ne dawiafo.

¹⁹ Weo tane tarainei masino weureng terai, nana

mani tasahui we tane tarai dine todoni?

²⁰ Ampafe tane tarainei mani boyari, wape ne tarai bitoya, toyari weureng, wetarang, tuti ne siai wei fo.

²¹ Ampafe wiro tau reminei dohonao medu we tawaraminei deyo, "Iwepararu wau kaha," fe, tuti tanumikamieinei do honao medu we taawemine deyo, "Iwepararu wau kaha."

²² Wiro tonana kaha, wape todoni kontaio na tane tarainei, doni aino finahangfo, ne nanai aino tawepararurai sewa ne.

²³ Tuti tane tarainei ne tata torai turura kaha fo, nanai tauremifo nayai nai sewa aha, tuti tane tarainei neo kia mamaya fo, amani tane mamayafo, tawaitawang weduari pari sewa aha we tasansung weduarai na mai, ambori wiro kia mamaya we tata kaha.

²⁴ Mae tane tarainei ne mai we watioai funoma fo wiro tauremifo nayai nai karera kaha. Wape Allai niari tane taraineia mesi tonanai, ambori tane tarainei ne tata torai turura kaha fo, niariri we ambori tauremifo nayai nai sewa.

²⁵ Ambori na tonanane tane tarainei sentenang wiro ato babauri kaha mae weboyer, mae fiata wawerahi.

²⁶ Masino na tane tarainei sentenang, weai sodai dadirafo mani, tane taraifoi sentenang sodai dadira. Mae masino weai sobu fiai mani, tane taraifoi sentenang mirarising riati kontai.

²⁷ Mea kiai na jematiwai mani, Kristusi ne taraifoi di mea. Tuti mansiari-mansiari na mea mene tarai wewarang, aweng, ureng tuti ne tarai siai wei fo di mea.

²⁸ Tonanai kontai na Kris-tusi ne jematinei, Allai yuai mansiari-mansiari kawuru we erufi wei ampa, reantenang mani yuai manea we ewerasuli, sua aha mani manea we ewenabi, sua aha mani manea we ewemantau-nau. Manea kontai yuaisa we enari fitantumafo, manea kontai esobu mambiriu we enari inontarai emaninang fosa ebeng, manea we efata inontarai siai, manea we ewenunggamie i we inon-tarai siai, manea kontai we emadu kaiwo aisei fo.

²⁹ Ea kiai wiro ewerasuli tera kaha, ete nabi, ete mantaunau tera kaha. Tuti wiro esobu mambiriu kiai we enari fitantumafo kaha.

³⁰ Ete we enari inontarai emaninang fosa ebeng kaha, ete we emadu na kaiwo aisei fo, ete we eteisaha kariri kaiwo aisei nana kaha.

³¹ Ampafe merurai paria we mesobu fi dedai sewa fo na Fi Mai kiaio Sempaisi dohonai na Nuaninu Mi-rarebana foi fo.

Tuti ninaifa mani, yeo yeinawiaifa we mea, kariri rang beng pari fo.

13

Rang kariri enemiwawufo

¹ Masino imadu na kaiwo fuba nufi nini kiai, tuti na wewaifosa ene kaiwofo kontai ki, wape enehuwawu kaha mani, iwefiea kaha, tuti kaiwo fuba imaduri nani kiai

ne tarai toyari fikainotu dotu terai, wiro wefiea kaha.

² Masino isobu mambiriu we iwenabi ambori imadu kaiwo Allai dohonai we yau we imadura fo, tuti isawai tuti iwaitawang fi werorong fo kiai, tuti nehu iroasoane fuba paria, donio wedaya yeia uai bei tifatingna suanai na katai siai ki, wape enehuwawu kaha mani, iwefiea kahai kontai.

³ Tuti masino yohongno fianai aino iminohi tutira nea kai we mano ene pari fi fosa, tuti yohong nehu taraineia adia kasoi kontai ki weo iraria Seng Yesusi fefe, wape enehuwawu kaha mani, finanai kiai kia fiea we yau kahai kontai.

⁴ Inontarai enewawu foi mani, sawani tuti enerorong denteng we inontarai siai. Wiro deimameatai kaha, bioi arong kaha, tuti tewa kaha.

⁵ Enerorong sopuaya kaha, deti terai we mantauni kaha, kesou funoma kaha, tuti manei dohong sarawai wei mani, wiro yutawang ne kasoufo we wenani na enerorongfoi kaha.

⁶ Inontarai enewawu nei mani, enerireu ne karirafo mae piraise we fi wetarai fo.

⁷ Sawani pampang we fifiani kontai sobua fo, yoaso inontarai ene bengfo, enetawanaia mutu we ne bengfo, tuti sawani na dadira rorong fo pampang.

⁸ Taenemiwawune werea na wea kaha. Wape mano ewenabi emadu kaiwo Allai dohonai wesa fosa, kaiwo nanai werea ki, tuti mano

emadu kaiwo aisei fosa ambori efotou emadufo ki, kontai fi kiaio inontarainesa ewaitawana ne mani ambori werea ki.

⁹ Weo tane tawaitawanane wiro mai kaha, tuti tamadu kaiwo Allai dohonai we tamadura fo wiro mai pari kaharai.

¹⁰ Wape rabuang bo ne masia fo kawaria mani, ambori ne masi kahai nanai niai ki.

¹¹ Raminde iwearikang marareha fo, imadu kariri arikang marareha, nuhuruang kariri arikang marareha, tuti enehutituai kariri arikang marareha. Ninaia mani ifabai ampa, amparefnehuo iwearikang marareha nanai ikabioai ampa.

¹² Weo ninaifa mani, tane tarai toyari wedeti ureng na kasinai, wape kasau we deti urengfo naria kaha. Tonanai kontai we tata, we tawati Allai fo wiro kasau pari we tawatiao kaharai. Wape ambori tawatiao pari na tauremine ki. Na ninaifa mani wiro yeroanso Allai na mai pari kaharai, wape rahidafo mai wori yeroansoi na mai ki, kariri Allai deroanso yau na mai fo.

¹³ Ampafe ninaifa mani fi betoru tanari, amani taroaso Allai, taenemitawania mutu, tuti taenemiwawu inontarai siai. Na fi betoru ninai, ne fuba pari mani taenemiwawufo.

14

*Kaiwoariri kariri Fi Maio
Allai Nuaninufoi dohona fo*

¹ Meruraifa we menemi wawu inontarai siai tuti merurai kontai we mesobu Fi Maio Allai Nuaninufoi dohona fo, reantenang mani mambiriuo Allai Nuaninufoi dohonai we madu kaiwo Allai dohonai we madurai we inontarainesa fo, amani wenabifoi.

² Weo inontarai mano medu na kaiwo aiseio Allai Nuaninufoi dohona fo mani, wenani wiro medu we inontarainesa kaha, mae medu we Allai. Weo kaiwo medura fo inontaraine manei wiro deitawana kaha, mae Nuaninu Mirarebana foi dino wedayari medu kaiwo nana ne tuti Allai meiri andino deitawana ne.

³ Wape mano medu kaiwo Allai dohonai we medura fo mani, medurai we inontarainesa, ambori na kaiwo nanai esobu mambiriu, enemirorong mitu aha, tuti ambori enumiruainso Allai ne bengfo.

⁴ Mano medu na kaiwo aisei fo, wenani wedaya mambiriu we mantauni terai, wape mano medu kaiwo Allai dohonai we medura fo, fiata jematifoi we ewemambiriu.

⁵ Masino mea kiai memadu na kaiwo aiseio Nuaninu Mirarebana foi dohona fo mani, enehutituai nanai mahikai paria we mea. Wape ne mahikai pari sewa aha mani, mesobu Fi Mai na Nuaninu Mirarebana foi we memadu kaiwo Allai dohonai we memadura fo. Weo mano medu kaiwo Allai dohonai we medura fo mani, wenani dedai sewa mano medu na kaiwo aisei fo. Mae masino mano medu na kaiwo aisei

nani deisaha kariri kaiwo medura fo we jematifoi, ambori esobu mambiriu naya mani, wenani kontai Allai detori we dedai kontai.

⁶ Ampafe doroi meaine, masino ira we mea mau tuti imadu na kaiwo aisei fo we mea, nana mani kaiwo nanai wedaya fiani we mea rai? Wiro wefiea kaha. Mae masino imadu fianai aino Allai dohonai we imadura fo, ete yeisaha fi kariri Allai fo, ete yeisaharai we mea kariri fi dadiwa Allai deinawiai we yau fo, ete yeunau mea tea reto, nana mani mesobu maifo.

⁷ Weo ne tarai toyari fi anggengno boi ete bui we dotu foi, toyari suling tuti musikio esahui we kecapiro-foi. Fianggeng nani ne pari anseng, wape masino mano biui foi ete bioi foi, wiro biui ete bioi kariri rarung bei we dotu toa fo kaha mani, ambori waitawang rarungfoi todoni ki?

⁸ Tuti toyari songgerinei, masino afai mamuna manei biui funomi, wiro biui kariri emamunafo kaha mani, nana mani afai mamuna fosa wiro emainenang we emamuna kaha.

⁹ Tonanai kontai we mano memadu kaiwo aisei na jematiwai mea, masino memadu na kaiwo kaiwasa ewaitawana kaha fo mani, etafu kaiwofo todoni? Nana mani kaiwo memadurai nanai toyari wanang siai terai, wiro tafu dotu toa fo kaha.

¹⁰ Na nunei kaiwo bitoya paria, wape na kaiwo fuba nani kiai mano emadura

fosa etafu wawera ene kaiwo emadura fo na mai.

¹¹ Wape masino mane medu we yau tuti itafu ne kaiwofo kaha, nana mani mano medu we yau nani inontarai aisei dine we yau, tuti i deti yau kontai weinontarai aisei di yau.

¹² Tonanai kontai we mea. Mea mani iwaitawanai we metawiai paria we mesobu Fi Maio Allai dohonai na Nuaninu Mirarebana foi fo. Ampafe fi reantenang pari mani, menemirorongwai dohong we mesobu Fi Maio Allai dohonai we mefata jematiwai nai wai, ambori etoaria mutu aha.

¹³ Tonana mani mano medu na kaiwo aiseio wiro waitawana kaha foi mani, dutang Sempaisi ambori dohong mambiriu wei we deisaha kariri fianai aino medurai nanai, ambori fiata jematifoi kontai.

¹⁴ Weo masino iwenadi na kaiwo aisei wiro waitawana kaha fo, nana mani nuhuani-nunei dino medu ne, wape fianai aino imadurai nanai wiro enehutituai kariria kaha.

¹⁵ Tonana mani, inari todoni ki? Fi inari mani, iwenadi na nuhuainunei, amani na kaiwo aisei fo, wape iwenadi kontai na enehutituitane, nana mani na kaiwo aitawana ne. Irohi na nuhuainunei, wape irohi kontai na enehutituitane.

¹⁶ Weo masino mane wenadi butang Allai, fiai tuti bo-hong mahikai na numuaninuwai terai, tuti manea siai wiro etafu kaiwo na Nuaninu Mirarebana foi nana kaha,

nana mani todonie wenanisa eroa tuba nemu nadiwai ete eteyo, "Tarai, antu!" Weo wiro ewaitawang kaiwo fi-anai aino butang Allai wea fo kaha fefe.

¹⁷ Masino nemu nadi bo-hong mahikai we Allai nani denteng todoni ki, wape nadi nani kia fieai we inontarai siaio etaramioai nanisa ka-haia.

¹⁸ Yohong mahikai we Allai weo imadu na kaiwo aiseio Nuaninu Mirarebana foi do-hona fo bitoya sewa mea kiai.

¹⁹ Wape na jematifosa efanduhisa we esomi we Sempaisifo mani, imaya we imadu kaiwo bitoya na kaiwo aisei fo kaha, mae ifaraise we imadu kaiwo rabuang beiru teai we yeunau jematifoi nai, wape kaiwo nanai ewaitawanai.

²⁰ Doroi meaine! Kariri fi toninane mani, menemitituai kariri inontaraio yoasoai na mai, wiro menemitituai kariri arikang marareha aha fanai. Wape kariri ne karirafo mani, mene tarai toyari arikang mararehao deitawang niari ne karirafo kaha foi.

²¹ Na Allai ne Hukumi do-honai we Musai foi arawang bei dotu tonina, Sempaisi medu deyo,

"Yau ambori imadu na inon-tarai mano emadu na kaiwo aisei fosa
tuti inontarai aisei fosa
eboromifo

we nehu inontarai
Yahudi nesa ki.

Tonanai ki,

wape emaya we etarami yau kaha."*

²² Ampafe madu na kaiwo aiseio Nuaninu Mirarebana foi dohona fo mani, wefia-inawiai we inontarai eroaso Kristusi kaha fosa, wiro we inontarai eroasoa fosa kaha. Mae madu kaiwo ariri Al-lai dohonai we madura fo mani, wefia-inawiai we inon-tarai eroasoa fosa, wiro we inontarai eroasoa kaha fosa kaha.

²³ Ampafe masino je-matiwa mea mefanduhi mea we mewenadi, tuti na nadi rorong wai memadu na kaiwo aiseio Nuaninu Mirarebana foi dohona fo, tuti inontarai siaio wiro ewaitawang kariri kaiwo tonana fo kaha manea emi-nohi kontai na nanai, ete inontarai eroasoa kaha fo manea esuai kontai afui, etarami memadu tonanai, nana mani enemitiuai todoni we mea rai e? Todoni kontai enemitiuai eteyo, "Mewefiauwou ampa!"

²⁴ Wape masino mea kiai memadu kaiwo Allai dohonai we memaduarai we jematiwasa fo, ainanaya inontarai siaio ewaitawana kaha ete mano eroaso kaha fosa era ma nanisa etaramioai, nana mani fio memadurai nanai deinawi ene sasarifo, tuti wedayasa etaroanso ene sasarifo. Etaramio kaiwo nanai eteyo, "Tarai, inontarai sasari di yau."

²⁵ Tuti kaiwo nanai wedaya mano etaramio kaiwo nana fosa, fio etadiwarai na enemirorongfoi am-

* **14:21** Yesayai 28:11-12

bori kawariai, wedaya etawai aweu etisangkapa eawemibukafo esomi we Allai tuti emadu eteyo, "Antu! Allai tarai niai rahang mea!"

Na rahida jematifosa efanduhisa we ewenadi fo todoni kontai eweboyari, wiro enari funomai fanai

²⁶ Ampafe doroi meaine tonana mani todoni ki? Mefanduhi mea we mesomi we Sempaisi mani, manea merohi rarung fiai fo, manea metaunau, manea meteisaha kariri fi dadiwa Allai deinawiai we mea fo, manea memadu na kaiwo aiseio Nuaninu Mirarebana foi dohona fo, tuti manea meteisaha kariri kaiwo aisei nanai. Finanai kai menari we mefata jematiwai ambori eroasoafu mutu.

²⁷ Masino manea eteo emadu na kaiwo aiseio Nuaninu Mirarebana foi dohona fo, nana mani dohonao jematifoi sentenang medu fanai, mae uwemandu ete mantoru teai ansitoruno itoriwang sitoru we itomadu. Tuti todoni kontaio manei deisaha kariri kaiwo itomadurai nanai.

²⁸ Wape manei we deisaha kariri kaiwo itomadurai nana kaha mani, mano itomadu na kaiwo aisei fo nani sitoru todoni kontaio wiro itomadu para fanai. Mae itomadu mani itomadu terai we Allai na itoenemirorong.

²⁹ Mae kariri nabio itomadu kaiwo Allai dohonai we itomadurai we jematifosa mani, todoni mani uwemandu ete mantoru teai ansitoruno itomadu kaririai, mae ne fiaufoi etaramioai

tuti enemitituai sauarai kaririai, we tarai na Allai ete bereri e.

³⁰ Tuti masino inontarai siaio minohi na nanai foi sobu fi dadiwa Allai deinawiai wei we deisaharai fo, nana mani mano medu fafong foi, todoni kontaio fiotou medufo.

³¹ Na tonanane mea kiai, amani mansiari-mansiari wau wobu rahida we modu kaiwo Allai dohonai we modurai nanai, ambori jematiwai kiai mesobu auna tuti mene meroasoafu mutu aha.

³² We mano esobu Fi Mai na Nuaninu Mirarebana we ewenabi, amani emadu kaiwo Allai dohonai wesa fo mani, ewemambiri kontai we etitua we kaiwo emadurai nanai.

³³ Weo Allai dawiai we fiea kawariai funomai kaha, mae kawariai na mai tuti kariri ne rahidafo. Na jematine tafanduhi tata we tasomi we Allai fo tonanai kontai, amani Allai dawiai we wiro tatohong funoma kaha. Finanai mai kariri fianai aino kawariai na jemati bodoni kontaia fo.

³⁴ Kontai, na mefanduhi mea we mewenadi wa mani, wiwingwasa etohong kaiwo fanai mae enemboru terai. Weo na Allai ne Hukumi dohonai we Musai foi dohong kaiwoarerai we wiwingfosa ambori etato ene mangfosa tuti etaramididausa terai.

³⁵ Masino eteo ewaitawang kariri fiea mani, finanai etutang ene mangfosa kaririai na ene munufo. Weo wiwing manei medu fieai na jematifoi efanduhisa nanai mani, dohong mamaya paria.

³⁶ We fiani e maneiru teai

na inontarai Korintusi wa mea memaya we metohong kariri finana kahai nina? Mewaitarahi meaino reantenang pari mewuwu Kaiwo Mahikai fo ne? Ete mewaitarahio Kaiwo Mahikai fo madurai terai we mea re?

³⁷ Masino mane enemutiu tuati wenabio modu kaiwo Allai dohonai we modura wa di wau mani, ete numuruanisoai weowobu Fi Mai siai fearia Allai Nuaninufoi mani, wenani wau todoni kontaio roa weai we fianai aino anta isoi nanai mani, Sempaisi dino medura ne.

³⁸ Wape mane iwi dohong kariri kaiwone kaha mani, metaramioi fanai.

³⁹ Ampafe nehu doroi meaine, merurai we mesobu Fi Maio memadu kaiwo Allai dohonai we memadura fo. Tuti dohona mesua inontarai mano emadu kaiwo aisei fosa fo fanai.

⁴⁰ Wape finanai kai menari na funoma kaha mae menari kaririai na mai.

15

Kaiwo kariri Kristusi suwi na marareha rorong foi ahafo

¹ Doroi meaine, kaiwo imadurai aha nina mani, yeo mearamio kariri Kaiwo Mahikai na Allai kariri Kristusio raminde ikoramai we meara nanai. Kaiwo nanai mesoniaia mutu na mene-mirorongwai tuti meroaso Kristusi na mai ampa.

² Na meroaso Kaiwo Mahikai kariri Kristusio ikoramai we meara nanai mesobu faririfo ampa, masino merutanawai mutu pampang tonanai. Bereri

mani, meroaso afo kia fieai we mea kaha.

³ Weo fianai aino isobuai kawurua fo, finanai imadurai we mea we fio fuba sewa fine, amani Kristusi mireha we tane sasarinei ampa, mai kariri fianai ainofafongfa dotu na Allai ne Kaiwofoa fo.

⁴ Esarai tuti rahida bo botoru foi mani Allai duwiri na marareha rorong foi aha, kariri fianai aino dotu na Sempaisi ne Kaiwofo kontaia fo.

⁵ Tutidario Petrusi, mayeai we ne inontarai ewesuraya mandu fosa aha.

⁶ Mayeai dario ne inontarai erariati fosa kiparai beyari, inontarai nanisa adareti ewepiarung wering sea (500+). Inontarai nanisa bitoya etarang paria sobu nina ne, mae maneiru teai ansaino emarareha ampa.

⁷ Mayeai aha mani dario Yakobusi tuti tourai aha mani we ne rasulifosa kiparai beyari.

⁸ Tuti wefuiai pari mani dario yau kontai, amani tefu yau na tantuma we iwerasuli wei. Rabuang bonani iwi nehu tarai kariri rasuli wei fosa kaha, wape yau mani nehu tarai toyari arikangno ne rahida mai we saubaununggamiai kaha. Weo Yesusi tefu yau tuti yuai yau we iwerasuli na tantuma na dario yau tonana fo.

⁹ Weo na Seng Yesusi ne rasulinesa kiai, yau mani ne rasulio itawawa sewa di yau, tuti imasi we ahu yau we rasuli kaha, weo raminde iroaso Yesusi kaharai fo inari

kanggani Allai ne jemotineia fefe.

¹⁰ Wape Allai dohong ne bengfo arora we yau wedaya nehu tarai tonina. Tuti Allai ne bengno dohonai arora nanai isobuai na mai tuti wetarai ampa. Weo na rasuline amea kiai mani, yauno irurai pari tuti ne Kaiwo Mahikai ne sewa ne. Wape tonanafo wiro na nehu mambiriune inari finana kaha, mae na Allai ne bengno dohonai arora we yau fo aino weriria yau mani inari tonanane.

¹¹ Ampafe Kaiwo Mahikai ne mesobuai ria mandoni kontai ki, na yau ete na rasuli siai fosa te, nanai wiro wefiea kaha. Fi fuba sewa mani, fianai aino amewuwuai we meara nanai, meroasoai.

Kaiwo kariri inontaraine tasuwi na marareha rorong foi aha fo

¹² Ampafe masino amewuwuai we Kristusi suwi na marareha rorong foi ampa, tonana mani we fianie na mea manea eteyo inontarai emarareha nesa wiro esuwi na marareha rorong foi kahai nina?

¹³ Weo masino tarai we inontarai emarareha nesa esuwi ahang kaha, nana mani Kristusi kontaio wiro Allai duwiri na marareha rorong foi ahang kahai kontai.

¹⁴ Tuti masino Kristusi wiro suwi na marareha rorong foi kaha, nana mani kaiwo amewuwua ne, amewuwuai funomai tuti mene meroasoawa meroasoai funomai kontai. Weo wiro wefiea kahai konta fefe.

¹⁵ Wiro nanai tera kaha mae, tonana mani, kasau ampa we fianai aino amemadurai kariri fi Allai niari fo nanai wiro mai kaha. Weo amewuwuai we Allai duwi Kristusi suwi na marareha rorong fi ampa fefe. Wape masino tarai we Allai duwi inontarai emarareha fosa kaha mani, tonana mani duwi Kristusi kahai kontai.

¹⁶ Weo masino inontarai emarareha fosa esuwi kaha mani, nana mani Kristusi kontai wiro suwi na marareha rorong foi kahai kontai.

¹⁷ Tuti masino Kristusi wiro suwi kaha mani, fianai aino meroasoai kariri fo kia fieai we mea kaha, tuti nana mani menayai na sasari rorong fe nendai.

¹⁸ Finanai deinawiai kontai we inontarai eroaso Kristusio emararehara fosa kontai eworu ampa.

¹⁹ Masino taenemitawanai we fianai aino Kristusi niari we tatane werea terai na nunei, nana mani na inontarai nunei kiai mani tataino taenemirorong fituayai sewa ne.

²⁰ Wape wiro tonana kaha mae ne wetarai mani, Kristusi suwi na marareha rorong fe ampa. Finanai wefiainawiai fafong we inontarai emarareha nesa kontai ambori Allai duwisa na marareha rorong foi kontai ki.

²¹ Weo inontarai manei wedaya mararehanei ma sinsung nufi nina. Tonanai kontai we na inontarai manei kontai, Allai duwi inontaraine tata na marareha

rorong foi.

²² Weo toyarifafongfa Adami wedayara inontaraine tamarareha weo taweboyari riati fefe, tonai kontai we tasuwi na marareha rorong foi ahang fo, weo taweboyari ria Kristusi fefe.

²³ Wape mansiari-mansiari kariri ne rahidafo; reantennang mani Kristusi, i mani Allai duwiri kawuru ampa. Mayeai ne inontarai feriri tata ne tata aha ki, amani na rahida da aha ma foi.

²⁴ Ne nanaia mani, mayeai Sengnei kife nunei. Rahida bonani Kristusi ambori kirai kobu ne aitetafosa kiai, amani mananu na doni konta fosa tuti mambiriu na doni konta fo, ainanaya dohong ne mambiriu wemananu fo we tane Dai Allai.

²⁵ Weo todoni kontaio Kristusi yu wang mananu fo paria saha tawang ne aitetafosa kiai na awengfo.

²⁶ Ne aiteta wefuiai pari krai kobui mani, mararehafoi.

²⁷ Weo rabuang bei dotu toyari:

“Saha tawang fi kiai na doni konta foi na awengfo.”*

Fio ahuai we fi kiai na doni konta foi nani mani, kasau ampa we wirow Allai mantauni konta kaha, we andino dohong Kristusi wemananu we fi kiai nani kiai ne.

²⁸ Allai niariri tonanaia mani, mayeai Kristusi mantauni disangkapa awebukafo we Allai, mano niariri wemananu we fi kiai na doni

konta foi. Ampafe Allai mantauni ambori wemananu we fi fuba nani kiai.

²⁹ Masino inontarai emarareha nesa Allai duwisa na marareha rorong foi ahang kaha, nana mani we fianie inontarai manea ewebaptisi we eriwangno inontarai mano emararehara fesa nina? Masino inontarai emarareha nesa esuwi ahang kaha mani enari ene koang nanai we fianie?

³⁰ Tuti masino tonana kaha mani, we fianie rahida neungne amemainenang we amesodai dadirafo, tarahai pariao amemarareha kontai, na amewuwu Kristusi ne ninai?

³¹ Doroi meaine, rahida neungne nehu fi iru ne, amani iwuwu Kristusi fo, wedaya kaiwasa enari kanggani yau pariao adareti imereha. Yo, finanai tarai! Wape fi siai yeoai nini tarai kontai! Amani enehukandorio mea, weo na nehu fi iru nani kontai, amani iwuwu Kristusi we mea fo, meroaso tane Seng Kristus Yesusi tuti merariati ampa.

³² Masino enari kanggani yau, amani enari yau parari toyari yapa andowa memuna na bendari Efesusi nini mani, tuti isodai finanai weo irurai we fi nunei ete fi inontaraine enemittiuaita fo teraifa mani, kia fianie we yau rai? Weo inari tonanai mae inontaraine ambori tasuwi na marareha rorong foi ahang kaha, nana mani kia fieai we yau kahai arorawa. Ampafe masino mansuwi-

* 15:27 Masmuri 8:6

suwi kaha mani,
“Tatampi tuti tatumung tamararising,

weo aha tea mani tamarehara ninai mae.”*

³³ Dohonao metua inontaraio enari ne karira fosa etofa wawera mea fe, weo mandoni dino firao inontarai niari ne karirafu mani, ambori ne bengfo nai werui mae dohong kariri wenani ne karira niari fo ki! Toyarine, mefarao mano eteyo wiro mansuwi-suwi kaha fosa mani, tourai aha mae mene tarai toyari ea kontai.

³⁴ Metarabera mea we menemitiuai kariri ne maifo aha tuti menari sasari aha fanai. Weo na mea manea wiro etaroanso Allai kaha, ampafe memamaya tuti ne tonanane.

Paulusi medu na fyiwan-soafo kariri tane tarainei we suwi na marareha rorong foi aha fo

³⁵ Tarahio manea etutang berahai eteyo, “Na todoni wori Allai duwi inontarai emarareha fosa esuwi na marareha rorong foi aha fo? Tuti Allai duwisa mani ene tarai todoni?”

³⁶ Oh! Mano metutang tonanane mea mani mewebonggoi paria! Mewait-awanaifa weo aibongno tanami foi mani, fitatahueri ne tarai toyari mirehara, akawuru wori kiabauraifa we sifu ki.

³⁷ Tuti aibong tanami nani, patibu bong ete aibong siai wei foi kontai ki, wape wiro sifu tuti robong sentenang

nani kaha, mae ne bongfoi terai andino sifu ne.

³⁸ Tuti Allai mantauni niari aibong sifu nani robongfoi mesi we aibongfoi kariri ne dawiafo. Weo aibong tifu nei kiai, Allai niari ne robongfoi siai kariri ne dawiafo.

³⁹ Fi kiai darang nei ne taraifoi wiro mesi kiai kaha. Inontaraine ene taraifoi siai, andowanesa ene taraifoi siai, romufosa kontai ene taraifoi siai, tuti diangfosa kontai tonana.

⁴⁰ Tonanai kontai we fi na rorafaisi tuti na nunei. Fi na rorafaisi ne taraifoi mesi kariri fi na nunei kaha. Fi na rorafaisi ne mehikaifo siai weru fi na nunei nengfo.

⁴¹ Wofoi ne mehikaifo siai weru embaifoi. Awahafoi kontai ne mehikaifo siai kontai weru wofoi tuti embaifoi. Tuti awahafosa kontai bei ne mehikaifo siai kontai weru bei.

⁴² Tonanai kontai we inontarai emararehao Allai duwisa weru marareha rorong foi aha fosa. Ene tarai arai na kamirei rorong foi mani, ene tarai misuhia wekahofara dine. Wape ene tarai Allai duwiri aha foi mani, ene tarai wiro misuhi kaha dine.

⁴³ Rahida bo tane tarainei saukaha kamirei rorong foi mani kerira tuti finahang; wape rahida bo Allai duwiri suwi aha fo mani dedai sambewarai tuti wemambiriu.

⁴⁴ Tane tarai arai nani mani tane tarai tamui na kahofa dine, wape tane tarai suwi aha foi mani tane tarai darang na Nuanim Mirarebana foi dine.

* 15:32 Yesayai 22:13

Ampafe kariri na nufi ni-nai tane tarai bei ne, tonanai kontai we ambori tane tarai bei na rorafaisi kontai aha.

⁴⁵ Kariri kaiwofeai dotu deyo,

"Inontarai mano reantenang foi, amani Adami, i mani Allai niariria weinontarai,"*

wape Adami mano wefuiā foi mani, amani Kristusi, i mani nuaninuo wedaya kai-wasa etarang dine.

⁴⁶ Fio da reantenang fo mani fi na nunei fine wiro fi rorafaisi kaha. Wape ne da wefuiā ma fo aino fi na rorafaisi ne.

⁴⁷ Inontarai mano reantenang foi mani Allai samui na kahofa. Wape mano mandu foi, amani Kristusi, i mani na rorafaisi.

⁴⁸ Inontarai nunesa mani ene tarai toyari Adami mano reantenang foi, amani Allai samusa na kahofa tuti emararehara rai, wape inontarai eroasoa nesa mani, ene tarai toyari Kristusi we etarang we fitaiwariafa.

⁴⁹ Tata kontai tonanai, amani na ninai tane tarai toyari Adamio Allai samui na kahofa foi, ampafe ambori tane tarai kariri inontarai mano na rorafaisi foi ki, amani Kristusi.

⁵⁰ Doroi meaine! Fio yeo imaduraifa we mewaitawana ne mani tonina, tane tarai na rika tuti tarai nini mani wiro suai to Allai ne weMananu rorong fo kaha, tuti tane tarai misuhi nei wiro suai to numainu nana kaha.

⁵¹ Metarami ma! Yeikariri fio dadiwa feai kontai we mea we mewaitawanai, amani wiro tamararehara tahai kaha, wape Sempaisi ambori yiwang tatara tahai ki.

⁵² Fininai ambori kawariai na tantuma, na rahida tatarami songgeri wefuiā pari foi dotu fo. Weo na rahida bo songgerifoi dotu nanai, Allai ambori duwi inontarai emarareha fosa aha na ene taraio wiro misuhi ahang kaha foi, tuti tata kiai Allai yiwang tane tarainei kiai aha.

⁵³ Weo tane taraio misuhi nini, todoni kontaio Allai yi-wani na tane tarai weworuuo wiro misuhi na wea kaha foi, tuti tane tarai na nunei yi-wani na tane tarai na rorafaisi.

⁵⁴ Tane taraio misuhi nini yiwanai na tane tarai wiro misuhi na wea kaha foi, tuti tane taraio na nunei yiwanai na tane tarai na rorafaisia mani, na rahida bonani fi-anai aino dotu na Sempaisi ne Kaiwofo wetaraia finanai, amani kaiwo dotu tonina:

"Mararehafoi, Allai ki-raikobui ampa!"*

⁵⁵ "Eeh! Mararehane waune, nemu mambiriufei doni?

Mararehane waune, nemu momufei doni?"*

⁵⁶ Mararehafoi ne memufoi mani sasarifoi dine, amani inontarainesa kiai tane sasari wedaya tamarareha ki. Na tatohong sasari nani tasobu aiboi marareha foi

* 15:45 Kejadian 2:7

* 15:54 Yesayai 25:8

* 15:55 Hosea 13:14

weo tatapa Allai ne Hukumi-foi fefe.

⁵⁷ Wape tatohong mahikai we Allai, weo wiro tasodai fi tonana fo ahang kaha, we taharaikobu fi kiai nani na tane Seng Yesus Kristusi ampa!

⁵⁸ Ampafe, doroi enehuwawu meawa mea, tonana mani todoni kontao metoaria mutu, wiro metau towana-tonina fanai. Metawing mene taraiwai sentenang we Sempaisi we merufi wei! Ampafe metoaria mutu weo mewaitawanai we fi kiaio menari we Sempaisi fo, finanai ambori wetarai ki.

16

Kaiwo kariri todoni jematisosa etohong fi we efata jemati na Yerusalemifo

¹ Fio yeo imadurai aha nina mani, kariri doio meteo metohonai we mefata tane doroio inontarai Kristen fosa naya fo. Kariri finanai yeo menari kariri fianai aino yeyoai we jemati kiai na Galatia fosa enari kariria fo.

² Amani rahida bo reantenang foi na ari minggu neungne, mansiari-mansiari wau na fianai aino wobuaia fo, ru bera weaia watai na nemu munuwai. Dohonao metamang paria ira mau wori mefanduhi finanaifa fanai.

³ Kio ira mau wori yenatu inontarai maneiru teao meroasosa wasa tuti inari kaiwo anatu bei kaririai we eha doi mefanduhiae nanai to Yerusalemia ki.

⁴ Masino wati kaririai maia mani yauno yontai tuti etontai kontai ria yau ki.

Paulusi deisaha kariri todoni deyo dontai to bendari Korintusi fo

⁵ Yeo yontai mau iwati mea ki, wape enehurorong we yontai riria nu Makedonia foi to Korintusi mau.

⁶ Yontai mau isobu mea mani, tarahai inayai tourai ria mea na nanai akawuru wo, tarahio paria dannunanangfo ne diru neung fo kai. Mayeai mefata yau yontai pari to katai siai yontai wea fo aha.

⁷ Weo imaya we yontai mau ituambawa mea tourai tonanai mae yontai weru mea ahang kaha. Enehutawanai paria we Sempaisi eneo mani inayai waroi ria mea na nanai akawuru wo.

⁸ Enehutiuai tonanai, wape na ninaifa mani inayai na bendari Efesusi ninai paria rahida ohonsua rahida Pentakosta foi.

⁹ Weo na ninai isobu rang bitoya tafifai we yau we inari fi fuba fo, finanai wedaya isodai dadira bitoya kontai ki na inontarai efau, wape enehutiuai towea kaha, weo fi iru ne mani wetarai bitoya.

Timotiusi tutu Apolosi

¹⁰ Masino Timotiusi dontai mau niayai rahang mea mani, metamang wei na mai ambori wiro niuruainso weansarai fanai. Weo i mani ne tarai kariri yau yufi we Sempaisi kontai.

¹¹ Dohonao mane wahu tawani fanai. Mae mefatari ambori dontai na mai kariri ne rang rorong dontai wea fo, paria daraberahi aha ma sobu yau na mai. Weo yemang wei tuti doroi siai wei fosa kontai.

¹² Mae kariri tane doroi Apolosi mani, yenggoari paria we dontai ria doroi mano siai fosa we etontai mau etuambawa mea. Wape niuruainso wiro mai we dontai mau kaharai, ampare kio sobu rahida mai wei mani ambori dontai mau ki.

Kaiwo arerai wefuiai

¹³ Metanansiau! Metoaria mutu na mene meroasoawa. Todoni kontaio mewemambiriu we metapa fifiani kontai, dohonao mewewiwing fanai.

¹⁴ Fifianai aino menari fo, menari na menemiwawu.

¹⁵ Yeyo menari fieai kontai, amani kariri Stefanusi. Mewaitawanai ampa weo i tuti ne munu rorong fo mani, ansaino reantenang pari eweKristeni na nu Akhaya wai ne. Ea etohong ene taraifoi paria we eruvi we efata Allai ne inontarai emararebana nesa. Ampafe, doroi meaine, yenggoa mea kontai,

¹⁶ todoni kontaio metaramididau inontarai tonana nesa, tuti mandoni kontaio yufi paria riasa tonana fo, na fi eru we Sempaisi fo.

¹⁷ Ifaraise paria we Stefanusi, Fortunatusi tuti Akhaikusi we itora ma ne. Itoru mani, itone tarai toyari

itoriwang mea we itofata yau na ninai.

¹⁸ Weo itonari yau ifaraise tuti enehurorongnei we-mambiriu aha, kariri mea kontai we itowedaya mea menemirorongwai wemambiriu aha wa. Inontarai tonana nesa mani atosa kontai.

Etanatu mahikai we jemati Korintusi

¹⁹ Jemati na nu Asia nesa etanatu mahikai we mea. Akwilai tuti Persekilai, kontai jemati efanduhisa na une munufoi, etanatu mahikaifeai na efaraise paria we mea kontai.

²⁰ Tane doroi enayai na nina nesa kiai etanatu mahikai kontai we mea. Metanatu mahikai wawera mea na menemirorong mesi toyari inontarai Kristen.

²¹ Yenatu mahikaifeai kontai we mea, mantaung yau isoi na warahu nehu ne terai amani; Mahikai na yau, Paulusi.

²² Mandoni dino enewawu Sempaisi kaha mani, wenani sodai ne karirafo weruai! Maranatha! Sengwa wau, ro ahera ma!

²³ Kadono Seng Yesusi dohong ne bengfo arora we mea.

²⁴ Enehuwawu mea kiai na Kristus Yesusi. Antu.

Kaiwo Bo Boru Paulusi Soi We Jemati Na Korintusi

Kaiwo dedung we 2 Korintusi

Na rabuang bo Paulusi soi kaiwo anatu nei we jemati na Korintusi fo, eweboyari riati kaha. Manea etairiri Paulusi tuti eteiayari eteyo wiro rasuli dine kaha. Ampafe Paulusi denatu Titusi dontai tono bendari Korintusia, kia ne kaiwo tapapa paria wesa. Mayeai daraberahi sobu Paulusi na Makedonia aha, deisaharai wei kariri jemati na Korintusi efau fosa etaraberasa weru eteiayari fo tuti earomioi aha. Mae manea eteiayari pampang.

Donio Paulusi soi suratinei wesa. Soi deisaharai wesa kariri ne fi yu we Kristusi fo. Deyo enewawusa paria tuti todoni piraise weo etaraberasa weru eteiayari fo. Akawuru wori dutansa ambori efanduhi doi we etohonai we ene doroi ene pari fi na Yudea fosa. Tuti na wefuiai aha mani, deyo todoni kontai Yesusi ne rasuli dine, tuti na kaiwo tapapa deretawang maneiru teao ewerasuli wetarai kaha fosa na wanai.

Kaiwo na suratinei deto kutuui toninai:

1:1-11 Kaiwofafong.

*1:12-7:16 Paulusi deisaha
kariri ne enetituai
we dontai wesa fo,
deiriri kariri todoni
wiuwu Kristusi ne Kaiwo
Mahikai fo, tuti dutansa*

ambori eweboyari riati aha.

*8:1-9:15 Dohong kaiwoariri kariri etohong
doi we efata mano ene
pari fi na Yudea fosa nai.*

*10:1-13:10 Paulusi medu
kariri mantauni, wetarai
wersuali we Yesusi
dine, tuti deretawang
inontaraio eteiaya ne
mambiriuo werasuli fo.*

13:11-14 Kaiwo kife.

Mahikaifea

*1 Weo doroi Allai ne
jematiwa mea na bendari Korintusi
tuti Allai ne inontarai
memararebana wa mea kiai
tantenang na nu Akhaya wai.*

Kaiwo anatu ninai na yau Paulusi, na Seng Allai ne dawiafo terai yuai yau we Yesus Kristusi ne rasuli, tuti na tane doroi Timotiusi kontai.

*2 Kadono tane Dai Allai tuti
Seng Yesus Kristusi urohong
une bengfo arora we mea
tuti urohong mea menumiruainso ne maifo.*

*Allai dohong tata taene-
mirorong mitubaru na dadira
rorong tasodaira ne*

*3 Tafiai Allai, mano tane
Seng Yesus Kristusi tamanai.
I mani Dai mano aroai
sewa dine tuti Allaio dohong
inontaraine taenemirorong
mitubaru foi dine.*

*4 Andino dohong amene-
mirorongnei mitubaru aha
na dadira amesodairi fi kiai
ne, ambori na amenemiro-
rong mitubaru amesobuai
ria Allai tonana fo, amea
kontai amefata inontaraio
enemirorong fituaya fosa*

kontai ao enemirorongfoi mitubaru aha.

⁵ Weo dadira bitoya Kristusi sodairia foi, amea kontai amesodairi, ampafe na tonanane kontai, Kristusi, mano dohong inontarai enemirorong mitubaru foi, dohong amenemirorongnei mitubaru fuba aha.

⁶ Amesodai dadirafo mani, finanai werang we amefata mea menemirorongwai mitubaru aha tuti amborimekaharai weru ne karirafo ki. Tutti Allai fiata amea amenemirorongnei mitubaru aha mani, finanai we ambori menemirorongwai mitubaru aha kontai ki, wedaya metawang mea na dadira rorong toyari dadira amesodairi nini.

⁷ Tutti amenemitawanai paria we metoaria mutu, wiro amenemiwawera we mea kaha, weo amewaitawanai we mesodai dadirafo kariri ameara fo, tonanai kontai Kristusi dohong menemirorongwai mitubaru kariri niari we ameara fo.

⁸ Doroi meaine, ametohong weai paria we dohonao meserawawera kariri dadi-rao raminde amesodairi na nu Asia fi wani fe. Dadira nani fiabai tuti miraba paria, wedaya amenemirorongnei fituayai, wiro amenemitawanai we ametarang ahang kaha.

⁹ Tarai, amenumiruainso toyari aiboi marareha fo watai wawu amea ampa. Wape finanai amesodairai ambori amenemitawang amene mambiriune fanai, mae amenemitawang te

Allai mano duwi inontarai emarareha foi ne mambiri- ufo.

¹⁰ Andino feriri amea weru dadira fuba amesodairi nani, donio amemarareha ahang kaha, kontai andino feriri amea tonana rai. Andino amenemitawani teri we ambori feriri amea weru ne karirafo pampang ki,

¹¹ mai kariri mefata amea na mene nadi mewenadi we amea wai. Na tonanane kaiwasa bitoya metutang tutu amea we Allai, ambori Allai mioang amea, donio mefau mefiai Allai metohong mahikaifeai wei ki.

Paulusi deisaharai we fiouki ne rahida dontai to Korintusia fo

¹² Fio dohong amea ameboi amearomi weai fa mani, na amenemirorong ketui nei, amewaitawanai we fi kiai amenari na nunei nini, reantenang mani na todoni ameweboyari ria mea fo, finanai amenari na amemararebanai tuti na amenemirorong mesio Allai dohoni foi, wiro na awai nunei kaha, wape kariri Allai ne bengno dohonai arora fo.

¹³⁻¹⁴ Weo fianai aino amesi we mea mau ne, amesi kariri fio mawa we metatorai tuti metafura fo. Ninaia mani, metafu fio ametawi wea fo kutea terai, wape enehutawanai we ambori metafuraia mai pari ki. Na tonanane, na rahida bo Seng Yesusi daraberahi nai aha ma foi, ambori meboi mearomifo we amea ki, kariri amea kontai ameboi amearomine we mea fo.

¹⁵ Na iroasoai tonanafo wedaya raminde enehutituai we yontai mau ituambawa mea weberu, ambori moanafo mesobu weberu beyari.

¹⁶ Enehutituai we yeyo, na yontai to Makedoniafo, yontai mau ituambawa mea akawuru wo, ambori yontai pari to Makedonia ki, tuti yarabera yau na nu Makedonia foi aha ma mani, ituambawa mea nariai aha, ambori mefata yau yontai pari to nu Yudea foi aha.

¹⁷ Reantenangfo enehutituai tonanai, akawuru wori enehutituai siai aha. Ampafe imadu tonana mani, menemitituai we enehutituai sauara kaha e? Ete rahida enehutituai kariri fi inari fo, enehutituai na mantaung yau e? Doni katu mani imadu yeyo, "Yo," mayea mani imadu aha yeyo, "Bereri."

¹⁸ Wape, mai kariri Allai we dohong kariri fi medura fo, amene kaiwo amewuwuai we mea fo nani wiro amemadurai na amenemirorong boru kaha, amani ameteyo "Yo," tuti "Bereri." Wiro tonana kaha.

¹⁹ Weo Jesus Kristusi Allai ne Kaisungfoi mani, wiro we enerorong soriru we fiea dine kaha. Mae Yesusi nani dino, yau Paulusi, Silasi, tuti Timotiusi, antowuwui we mea ne, tuti I mani, ne enetituitafo wiro yiwani kaha. I wiro medu deyo, "Yo," tuti "Bereri," kaha, mae deyo, "Yo," pampang.

²⁰ Weo andino Allai ne

kaiwo derera fo kai kawariai nai ne, na Kristusi Allai medu deyo, "Yo," finanaia. Nanai wedaya tataparanding Allai, tamadu na Jesus Kristusi wonongfo tateyo, "Antu."

²¹ Allai meiri andino niari amea tuti mea tatoaria mutu na Kristusi ne. I kontai andino diri tata wei tera ne,

²² yuai tata kawurua we ne tata, tuti sensoni taen-emirorongnei na Nuaninu Mirarebana foi, wefiainawi-ai ambori tawaitawanai we dohongno fianai aino dereri kiaia foi we tata ki.

²³ Raminde nanai wiro yontai to Korintusi aha mau kaha, weo imaya we menemirorong fituaya kahai na metarami nehu kaiwo tapapa paria we mea fo fanai, amani kaiwo isua mea na tapapa kariri mano anta dohong sasari kerirara foi nani.* Imadurai tonina ne, itofa kaha, weo Allai deitawang enehurorongnei.

²⁴ Wiro ametanggoa mea kariri mene meroasoawa kaha, weo meroaso Kristusia mutu ampa. Manta ameteyo amerufi ria mea ambori memararising paria aha.

2

¹ Nanai wedaya na rabuang bonani ikutuai we wiro yontai we mea mau kaha, weo nana mani wedaya menemirorongwai fituaya ahang fefe.

² Weo masino yohong mene-mirorongwai fituayai, nana mani mandoni dino sona enehurorongnei mitubaru aha ne? Manea siai esona

* 1:23 1 Korintusi 5:1

enehurorongnei kaha, mae mea terai, mano inari menemirorongwai fituayai nani mea.

³ Ampafe raminde nanai isoi kaiwo anatu nanai we mea mau ambori rahidao yontai mau ituambawa mea mani, wiro metohong enehurorongnei fituaya kaha, mae metohong enehurorongnei mirising tuti mitubaru, weo finanai mai we menari tonana. Weo iroasoai we masino imirising mani, mea kontai mefaraise.

⁴ Isoi kaiwo nanai we meafo, isoi na enehurorong fituayai tuti miraba pariao isai, wiro we inari mea mesai kaha, wape we ambori mewaitawanai we enehuwawu mea fuba paria.

Todoni kontaio oiai mano dohong sarawafoi

⁵ Kariri inontaraio anta dohong sasari foi nani, tarai, i niari yau isai, wape ne fuba sewa aha mani, niari mea menemirorongwai sawai mesai paria, we ne sasari anta niariri tonana fo. Ete tarahio imadu tonana mani, imadu tapapa karerai, ambori tarao nehu kaiwone tapapa karera fanai mani, imadu yevo wedaya maneiruteai na mea terai menemirorong sawai.

⁶ Na mea mefau metohong aiboi wei ampa, tuti aiboi sodairi nani, demoyara to.

⁷ Mae ninaifa mani, fio menari wei mani, meteiai ne sarawafo tuti menari enerorongfoi mitubaru aha, ambori wiro enerorong fituayai karera fanai.

⁸⁻⁹ Weo raminde nanai isoi kaiwo anatu kariri metohong aiboi wei nanaifa we mea mau we ititua kariri mea we metohong kariri kaiwo yohonai we mea wa kiai ete bereri e. Ampafe ninaia mani, yutang mea paria we ambori meteinawiaifa wei aha we tarai menemiwawuti.

¹⁰ Weo masino meteiai inontaraio dohong sarawai we mea waia mani, yau kontai yeiai wenani. Tuti, tarai anta dohong sarawa mani, yeiairi ampa. Fianai aino yeiairai tonana mani, yeiairai na Kris-tusi urengreafu, tuti nanai we mene bengwa.

¹¹ Inari tonanaifa fo, ambori Saminseni sobu rang we weanggari tata pariao wedaya tata tatawa fanai, we wiro taserawawera ne enetituitaifo kaha.

Paulusi weansarai we Titusi na Troasi

¹² Rahida bo yontaia sobu bendari Troasi we iwuwu Kaiwo Mahikai kariri Kris-tusi naya fo, iwatioai we Sempaisi fiai rang we yau we irufi na wanai.

¹³ Wape enehurorongnei mesi pari kaha, weo isobu tane doroi Titusi na wana kaha. Enehutawanai dontai weru mea to Troasi kontai, kia kaiwo kariri todoni mesobu nehu kaiwo anatu anta nani. Ampafe yontai, yohong mahikaifeai we inontarai na wana fosa tuti yontai to Makedonia aha ma.

Na Kristusi Allai niari Paulusi weniunsai mampori we kaiwasanei

¹⁴ Wape yohong mahikai we Allai, weo na amewebo-yari ria Kristusi fo, tefu amea we ne fi tuti kia amea pam-pang we amerariati na ne rang rorong etaparandini we inong wemambiriu foi. Allai kia amea tonanai we ambori na amea, kaiwo kariri Kris-tusi fo dafai wariae to doni kontai toyari finiunsai mam-pori we ne niunsaifoi sefarai to katai doni konta fo.

¹⁵ We amea mani, amene tarai toyari finiunsai mam-porio Kristusi niunumi we Allai foi. Toyari finiunsai mampori fo ameha kaiwo kariri Kristusi we mano ambori feririsa fosa, kontai we mano ambori esobu ne karira fosa.

¹⁶ We mano ambori eworu fosa amene tarai toyari finiunsai piro toyari fi mirehara weo ametairirai wesa kariri ambori eworu fo, mae we mano ambori esobu mai fosa amenunsai mampori wesa, weo kaiwo amewuwuai wedayasa etarang. Tuti mandoni dino mesi we niari fi-nana na mantauni ne mambirufo ne?

¹⁷ Wiro amene tarai kariri inontarai siai bitoyao etairiri Allai ne Kaiwofo toyari fianggeng etawayanai we es-era we ra naya fo kaha. Mae amea mani, amewuwuai na Kristusi wonongfo, tuti na amenemirorong mesi na Allai arongreafo, weo Allai demi ne inontaraine amea we amenari tonanai.

3

Korintusifosa ene tarai kariri fiainawiai todoni

Paulusi itoru itowerasuli wetarai we Kristusi

¹ Amemadu toninafo, tarahio menemitituai meteyo amefiai bera mantaung amea ahang fe, wiro tonana kaha. Ete, toyari inontarai siai fosa, amea kontai ametohong weai we amesobu surati fiai amea bei tonanai, surati nani soi we mea ete na mea ma e? Wape wiro tonana kaha.

² Meaino mene tarai wekaiwo anatu deinawiai we amea mani rasuli di amea fo, weo meroaso amene kaiwo amewuwuai we meara fo. Finanai toia mutu na amen-emirorongnei tuti mandoni kontai ewatioai tuti etatorai.

³ Ne tarai kariri amene kaiwo amewuwua fo webong kawuru ampa, amani webong paria na mea. Na tonanane metainawiai we mea mani mene tarai wekaiwo anatu Kristusi soi di mea, tuti kaiwo anatu nani wiro soi na dawati kaha, mae na Allai mano darang foi Nuaninufoi, kontai wiro soi na kamiei timba toyari Hukumio soi we Musai foi kaha, mae soi na inontaraine taenemirorongnei.

⁴ Amemadu kariri amea tonanai weo na Kristusi ameroaso Allai tarai.

⁵ Wiro ametohong fieai we fiainawiai we mantaung amea amewemambiriu we amenari finana kaha, wape Allai dino dohong mambiriu we ameane.

⁶ Andino niari amea amewemambiriu we amewemangfata we Kaiwo Arerai Waworu bei. Kaiwo Arerai nani weneung na Allai

Nuaninunei, wiro na Hukumifo kaha. Weo Hukumi nani wedaya mararehafoi wape Nuaninufoi dohong tata tatarang wefitawafa.

Allai ne Kaiwo Arerai Waworu nei mahikai sewa Kaiwo Areraio Musa soi fo

⁷ Fafongfa Allai dohong ne Hukumifo we Musai, amani ne Kaiwo Areraio biui na kamieifo, tuti Kaiwo Arerai Mamo nani kia marareha we inontarainesa we inontarai manei wiro wemambiriu we dohong kariria na mai kaha. Kaiwo nanai Allai dohoni na ne sambewaraio dadai fo, wedaya Musai urengfo sambewarai. Tuti sambewarai nani adareti de niai wape ne sambewarafoi wedaya inontarai Israeli fosa euremifoa wiro ewemambiriu we ewati Musai urengfo nariai ahang kaha.

⁸ Tonana mani todoni kontaio Kaiwo Arerai Waworuo Allai Nuaninufoi dohoni foi da na sambewaraio dadai sewa aha.

⁹ Masino Kaiwo Arerai Mamo kia aiboi we inontarai foi sambewarai tonanai, nana mani Kaiwo Arerai Waworuo wedaya inontarai enemirorong mesi na Allai urengreafu aha fo ne sambewaraio dadai fo fuba sewa aha.

¹⁰ Weo tarai we fianai ainofafongfa sambewaraifa fo, titua weai na sambewaraio dadai sewao fuinini mani, wedayaria sambewarai ahang kahai ampa.

¹¹ Weo masino Kaiwo Areraio woru fo sambewarai tonanaia, nana mani Kaiwo Areraio wiro woru na wea kaha

fo ne sambewaraio dadai fo fiabai sewa aha.

¹² Amenemitanawai tonanai paria ampare wiro amematai we amemadu kariri finana kaha.

¹³ Wiro amene tarai kariri Musai we tebung wedua urengfo na ansung aburung ambori inontarai Israeli fosa wiro esaiteo Sempaisi ne sambewaraio adareti de niai weru urengfo nana kaha.

¹⁴ Wape enemituaitafo rahaibu ampa, weo paria rahida bonini kontaio fi tebung wedua Israeli fosa nani tebung weduasa pam-pang ne, na rabuang bo etato Kaiwo Areraio fafong foi fo. Etaramioai mae esobuai kaha. Weo fi tebung weduarai nani niai terai na taweboyari ria Kristusi fo.

¹⁵ Paria ninai kontaio na etato Kaiwo Musai soi fo, fi weduarai nani tebung wedua enemirorongfo rai.

¹⁶ Wape na doni kontaio manei enerorongfoi tiwera we Sempaisi mani, fi tebung weduari nani Sempaisi yuaisi weruri.

¹⁷ Weo Sempaisi mani Allai Nuaninufoi diarana ne, tuti Nuaninufoi niayai na mandoni mani, wenani kesaua.

¹⁸ Tuti ninaia mani, mano taroaso ne tata, tahasau weru fi tebung wedua tau-remi fo, tuti Seng Yesusi ne sambewaraio dadai fo keiwewa na tauremine. Sempaisi, amani Allai Nuaninufoi, yiwang tata tane tarai kariri mantauni ne taraifoi, na ne sambewaraio keiwewa pari aha foi.

4

*Ra Waidani, amani Kaiwo
Mahikai fo, nayai na babeu
tamui na kahofafo*

¹ Tonana mani, na Allai ne aro amea ne, dohong amea amewuwu ne Kaiwo Arerai Woworu ne, ampare wiro amenemirorong fituaya kaha.

² Ampafe amehurumitare fio mamunggasai tuti fio kia mamaya fo, amepampamu kaha, tuti wiro amebariwera Allai ne Kaiwofo kaha. Mae na ametaikariri kaiwo wetarai fo ao kasaua fo, amenemitawanai we kaiwasane kiai, na enemirorong ketui foi mani ewatioai we amemasi na Allai urengreafao.

³ Masino Kaiwo Mahikai kariri Yesusio amewuwua fo, wiro manea etafura kaha, toyari fi tabung wedua euremifo, nana mani mano ambori eworufo ansaino etafura kahai tonana ne.

⁴ Weo inontarai wiro eroaso kaha fosaine, inontarai nanisa Saminseni, mano weseng we fui karira nini, kiobu enemittuitafo ampa toyari niaris euremifafara. Ampafe wedayasa wiro ewati Kaiwo Mahikai fo ne sambewarafo ahang kaha, amani Kaiwo Mahikai kariri Kristusi ne sambewaraio dadai fo. Andino wefainawiaio kasau kariri Allai ne.

⁵ Weo kaiwo amehoramai ninai wiro kariri amea kaha, wape kariri Yesus Kristusi we weSengfo. Tuti amemadurai

we amea mani, amewewom-ing terai we mea, kariri ne dawiafo.

⁶ Weo Allai medu deyo,
“Na mamantiti rorong fo,
Sambewarafo kawariai
ma!”*

Allai nani kontai Andino niari ne sambewaraia nani dansairai na taenemiro- rongfi ne, ambori nano ne sambewarai nani tawait- awang kariri Allai ne sambe- waraio dadai fo dansairai na Kristusi urengfe fo.

⁷ Wape amea mani, amene tarai kariri babeu mesi ka- haio Allai samui na kahofa, mae na amene tarai wemam- biriukahai nini ameha ra dedai pari feai, amani Kaiwo Mahikai kariri Kristusi fo. Ambori na tonanane kasau we mambiriukabai niai na amea nini na Allai ma, wiro na amea kaha.

⁸ Dadira bitoya na fifiani kontai yua amea paria, wape amemangganggung kaha. Fi bitoya wedaya amea ame- sera wera amenari fi todoni, wape amenemirorongnei fituayai kaha.

⁹ Inontarai enari kanggani amea wape Allai sawing amea kaha. Eboi ameara ametawai, wape ameworu kaha.

¹⁰ Yesusi sodai dadira pariao mirehara, tuti fi tonana fo amesobuai pam- pang kontai na rahida neungne amemainenang we amemareha toyari I. Amesobu dadira tonana mani, ambori inontarai siai ewatioai we Yesusi darang na

* **4:6** Kejadian 1:3

amea tuti wedaya ametarang na tarai.

¹¹ Weo na ameminohi na nufi ninai, mararehafoi wiro waroi weru amea kaha, mae inontarai erurai we emung amea pampang we amewuwu Yesusi fefe. Ambori na tonanane, inontarai siai ewati we Yesusi darang na amene taraio ambori wioru nini ki.

¹² Ampafe na tonanane, amewuwu Kristusi fo tarahai wedaya amemarareha, wape amehutuai we amesodai tonanai kontai, ambori werang we metarang we fitawafa.

¹³ Na Kaiwofo weai dotu tonina:

"Iroasoai, ampafe imadu."*
Na ameroasoai tonana fo kontai, wedaya amemadu kontai.

¹⁴ Weo amewaitawanai we Allai mano duwi Seng Yesussia suwi na marareha rorong foia foi, ambori duwi amea kontai ria Yesusi tuti kia mea tuti amea awa tatoari na arongreafoa ki.

¹⁵ Fi amesodairi kiai nini kia beng we mea rai, ambori Allai ne beng dohonai arora we inontaraine tatara fo, kaiwasa eroasoai bitoya ahang fosa esobuai fuba aha tuti wedaya etohong mahikai we Allai tuti etaparandini.

Taenemirorongnei fituaya kaha, weo na taroasoai terai we Yesusi taureminei niayai terai na fi maio tasobua rai fo

¹⁶ Nanai wedaya wiro amenemirorong fituayai na wea kaha. Rahida neungne

amene tarainei sodai ne kari-
rafo, tuti firurung pampang
we wioru ki, wape rahida
yiwang rahida amenumian-
inunei Allai yiwani weworu
pampang aha.

¹⁷ Weo fi amesodaira ne
maraba paria, wape ambori
wedaya amesobu mirising
fuba tuti sambewarai dedaio
watai we numainufo. Tuti
watioai na mirising fiabai
nanai mani, dadira amesodairai
nanai wiro ene waroi kaha tuti seiayai.

¹⁸ Ampafe wiro ameuremifo
nayai na fio watioai na
tauremi fo kaha, mae na fio
watioai kaha fo. Weo ne
watioa fo mani watai waroi
kaha, wape ne watioa kaha
fo aino watai wefitawafa ne.

5

¹ Weo tawaitawanai we
tane yawanei, amani tane
taraio na nufi nini, mitota
mani, Allai mantauni ambori
meinenang munu bei na
Waidani we tata ki, amani
munuo wiatai wenumainu,
munuo wiro inontaraine
enariri kaha.

² Taminohi na yawa
tasobui na nufi nini, taen-
emirorongnei disang tata
tasai tuti tapapirahai weo
taenemirorong dohong we
tasansung tane tarai na
munu waworu tasobui na
Waidani foi.

³ Weo tasansung tata na
tane munu waworu na
Waidani foi mani, wiro tane
tarainei niai arora ahang
kaha.

⁴ Tarai we taminohi na
yawa na nunei nini, taen-

* **4:13** Masmuri 116:10

emirorongnei disang tata tasai tuti tapapirahai we ne maraba tasoduatu ne. Tanumiruainso tonanafo, wiro taenemirorong we tahatai weru tane tarai nunei nini ambori tanai arora kaha, mae tatohong weai we tasansung tane tarai weworu na munu Waidani nani. Ambori tane tarai weworu Waidani nani yiwangno tane taraio mireha nei aha.

⁵ Allai mantauni dino meineng tata we finana ne, tuti dohong Nuaninu Mirarebana foi we fiainawiai we tata kariri fi kiaio meinenamei we tata nani, deinawiai we todoni kontaio dohona rai.

⁶ Finanai wedaya amene-mirorong wemambiriu pampang. Amewaitawanai we ameminohi na amene tarai na nufi nini, amenayai waroi weru munuo ambori ameminohi nai ria Sempaisi fo.

⁷ Weo ameminohi ni-nai amenemitawang te ameroaso amene Mananu Yesusi ne, wiro amene-mitawang fianai aino amewatioa fo kaha.

⁸ Nanai wedaya amene-mirorong wemambiriu tui amefaraise paria we ameteyo ametawing amene tarai nini, ambori ameminohi na amene kataifoi wani ria Sempaisi.

⁹ Ampafe amerurai paria we ambori Seng Yesusi eneo amea, na amenayai na nunei nini ete ametawera werui.

¹⁰ Weo tata kiai todoni kontaio ambori tatoari na Kristusi arongreafo, na rahida kitu kaiwo kariri tata fo, ambori mansiari-mansiari sobu

fiembaitafo kariri fianai aino niaria na nufi nini, niari ne bengfo ete niari ne karirafo ne.

Allai niari inontaraine tata tabeng riati aha na Kristus Yesusi

¹¹ Amewaitawanai todoni kontaio tamatai Sempaisi, amani tasomi wei na tarai tuti maifo. Ampafe nanai wedaya, amerurai paria we ambori amewiwiang mandoni kontai wei. Allai deitawang amenemirorongnei tarai tonanai tui enehutawanai we mea kontai mewaitawang amea tonanai kontai, na mene-mirorong ketui wai.

¹² Na toninafo, wiro amefiai bera amea we mea ahang kaha. Wape ameteyo ametohong rang beng fo we mea we meboi mearomi tui amea. Ambori na tonanane mewaitawang todoni memadu we inontaraio eboi earomi we fi watiao fo, amani fio kariri Hukumi Musai soi fo, wiro kariri fio niayai na taenemirorongnei, amani taroasoafu, kaha.

¹³ Masino eteyo amewefiauwou ampa, nana mani amewefiauwou na euremifo we amerurai paria we ameraria Allai, wape masino amemadu na amenemituitaitaio mai fo mani, finanai we mene bengwa.

¹⁴ Weo Kristusi enewawufo aino wedaya amenari tonanafo, weo amewaitawanai we manei mireha we inontarainesa kiai ampa, tuti finanai deinawiai we inontaraine tata tamarareha

kai ampa, amani tanai na mamantiti rorong fe fo.

¹⁵ Tuti Kristusi mireha we kaiwasanei kiai, ambori mano eminohi etarang fosa wiro etarang we etohong kariri mantaunsa ene etawiafo aha kaha, mae we etohong kariri Kristusi ne dawiafo terai, amani Kristusio mireha tuti suwi wesa aha fo.

¹⁶ Ampafe ninai to fongna mani, wiro ametitua we manei kariri todoni inontarai nunei sa etituasa kariri ene fi toa fo ahang kaha. Tarai raminde ametitua Kristusi toyari inontarai batang tonanai, wape ninaia mani, ametitua tonana ahang kaha.

¹⁷ Ampafe, mandoni dino weboyari ria Kristusi mani, wenani Kristusi niariri we-woru ampa. Ne mamofo nai ampa, mae ne waworufo da kawuru ma ne.

¹⁸ Finanai kai Allai dino niari ne. Na Kristusi, Allai niari tatara tawebboyari riati aha, tuti demi tata we tanari finanai, amani we tafata inontarai siai ambori esobu beng nanai kontai.

¹⁹ Amewuwuawai we na Kristusi, Allai niari inontaraine tawebboyari riati ampa tuti wiro deto we sasari tanariri foi ahang kaha. Tuti kaiwo kariri tawebboyari riati aha nanai Allai yoaso amea we amewuwuawai tonana kontai.

²⁰ Ampafe amea mani, Kristusi ne inontarai demi amea we ameriwani amemadu ne kaiwofo di amea, ne tarai toyari Allai medu na amea dutanai paria

we mea we mera weia. Na Kristusi wonongfo, ametanggowa mea we meweboyaria Allai aha.

²¹ Weo Kristusi dohong sasarifea kaha, wape Allai niariri sodua tane sasarinei kiai, ambori na Kristusi nani taenemirorong mesi na Allai arongreafki.

6

¹ Amea mani Allai ne mani-wowiri amerufi wei di amea, ampafe ametanggoa mea we wiro metua Allai ne bengno dohonai arora we mea wa na ne Kaiwo Arerai Warowu wa, pariao nai weru mea funoma fanai.

² Weo medu toninaia deyo, "Na rabuang bo enehurorong denteng foi, tarahuwau,
tuti rahida bo ifariri kaiwasafoi, ifata wau."*

Mewati ma, rabuang bonini mani, rabuang bo enerorong denteng foi dine. Rahida bonini mani rahida deyo feriri mea foi dine.

Na fifianai kontai Paulusi etainawiai we Kristusi ne mangfata mesi disa

³ Na fifiani kontaio, amerurai we ambori amewedua inontarai weru eraria Kristusi fo fanai, ambori kaiwasa wiro eteibera fi ameru we Kristusi fo kaha.

⁴ Mae ametainawiai na fifiani kontai we Allai ne mangfata amerufi wei na mai di amea. Ametainawiai tonanai na dadira todoni fieai kontaio, ametawang amea pam-pang naya fo,

* ^{6:2} Yesayai 49:8

5 kontai na rabuang bo inontarai eruba amea fo, esoa amea to aitamu rorong fe fo, eroya amea fo, amerufi mamboni paria fo, wiro ametena naria kaha fo, tuti amene pari fi ametang fo,

6 na amenemirorong mirebabana fo, na amewaitawanafo, na ametawang amea fo, tuti amenemirorong denteng fo. Na fi tonanane kiai ametainawiai we amea mani Allai ne mangfata di amea. Kontai na Nuaninu Mirarebana foi sensoni amea fo, tuti na amenemiwawu na amenemirorong mesi fo,

7 kontai na amewuwu kaiwo wetarai fo, tuti na Allai ne mambiriufi fo. Ametainawiai tonanai kontai na todoni amerutawang Allai ne enerorong mesi fo na amewarami dowej nei tuti na amewarami domoya nei, wefimamuna we amea. Ambori na ameminohi na amenemirorong mesi tonana ne amemainenang we ameharaikobu ne karirafo nano amenemirorong mesi nani.

8 Kontai na inontarai etato amea tuti esahu tawang amea kanta fo, na etairiri amea tuti efiai amea fo, na amemadu na tarai wape esahu amea we ametatofa fo,

9 na amewe amewonomi we kaiwasa bitoya foi wape esahu tawang amea kanta fo, na adareti amemarareha wape ametarang nendai fo, na eruba amea wape amemareha kaha fo,

10 na enari ameara amene-

mirorongnei fituayai wape amemararising pampang fo, na amene tarai toyari inontarai ne pari fi wape amewedaya kaiwasa bitoya ene fi fo, tuti na amene sobu fieai ahang kaha mae amene maino fifiani konta fo.

11 Doroi inontarai Korintusi wa meaine, fifiani kontaio amemaduraia kasau we mea ampa, wiro ametadiwa fieai we mea kaha. Mewati todoni amenemiwawu mea ampa.

12 Wiro amehafe anemirorongnei we mea kaha, manta meaino mehafe menemirorongwai we ameane.

13 Ninaifa mani yeyo imadu we mea toyari imadu we nehu arikang terai, amani yeyo, mefai menemirorongwai kontai we amea.

Paulusi deretawansa we ewebayari ria inontarai eroaso kaha fosa fanai

14 Dohonao meweboyari ria inontaraio wiro eroaso Yesusi kaha fosa fanai, finanai masih kaha. Weo ne masifo weboyari ria ne karirafo rai e? Tuti sambeWARAFO weboyari kontai ria mamantitifo rai e?

15 Kristusi weboyari ria Beliali* rai e? Ete inontarai yoaso Kristusi nei tuti inontarai yoaso kaha foi umasi na uroasofo rai e?

16 Tuti Sempaisi ne Munu Omi Wei Nai foi weboyari ria aririwangfosa rai e? Weo tata mani Allai Mano Darang foi ne Munu di tata. Toyari

* 6:15 Beliali, nana mani deinawio Saminseni dine.

Allai mantauni medu ria ne
nabi fafong fosa deyo,
“Yau ambori iminohi ra-
hansa
tuti inayai riasa,
tuti esahu Yau we ene Seng
Allai,
tuti isahusa we nehu in-
ontarai.”*

17 “Allai deyo,
‘Ampafe, mera to boriae weru
inontaraio etaroanso
Yau kahai nanisa
tuti mehatai werusa.
Wiro mewaramikeha dis-
anso fi werarika fo
fanai,
ambori ika mea ma.*

18 Yau ambori iweDai we mea
tuti mea kontai nehu
arikang di mea ki,
ambori isahu mea
we nehu kaisung tuti
kamitung.’
Sengno weMananufaisi ne
kaiwo finanai.”*

7

¹ Doroi enehuwawu
meawa meaine, na ne Kaiwo
Arerai Waworu ne Allai
dererai tonanai we tata
ampa. Ampafe todoni kontai
taruairurang tatara tam-
rarebanai weru fio kia rarika
we tane tarainei tuti we
tanumianinunei fo, amani
tahatai weru fi werarika
tonana fo kiai. Todoni
kontao tamararebanai na
taminohi na nufi ninai weo
tasomi we Allai na mai fefe.

*Paulusi piraise paria, weo
Titusi dontai na Korintusi ma
deisaharai we Korintusifosa
etohong we eweboyari riati
aha*

* **6:16** Imamati 26:12; Yeremiai 32:38
7:8, 14

² Metohong katai we amea
na menemirorongwai. Weo
wiro ametohong sarafieai
we manei na wea kaha rai,
amewedaya manei dohong
karirafea kaha rai, tuti wiro
ametofa manei na weai we
ameha ne rafo weruri kaha.

³ Imadu tonanafo wiro ene-
hurorong we yinggai mea we
menari sarawa kaha. Weo,
kariri fianai aino imadurai
kawurua fo, we amenemi-
wawu mea paria tuti mea
mani mene katai na amen-
emirorongnei ampa, ampare
tatarang ete tamarareha mae
tawemaniwowiri pampang.

⁴ Iroaso mea paria tuti
enehurorongnei dedai we
mea paria. Amesodai dadira
bitoya ki, wape metohong
enehurorongnei mitubaru
tuti mirising paria.

⁵ Rabuang bo amesi
ameawemi na nu Makedonia
nei kontaio, wiro amesobu
rahida kuteai we amem-
nohi uka kaha. Dadirafu
nayai woru amea, inontarai
na boriei weru jematinei
emamuna we amea, na
amenemirorongfuisi kia
matai we amea kontai.

⁶ Wape Allai Mano niari
inontarai enemirorong
fituaya fosara enemirorong-
foi mitubaru ahang foi,
niari amenemirorongnei
mitubaru aha kontai weo
Titusi dontai ma fefe.

⁷ Amenemirorongnei mi-
tubaru tonanafo, wiro na
dontai ma fo tera kaha, mae
na deikaririai we amea we
todoni metohoni enerorong
mitubaru fo. Deikaririai

* **6:17** Yesayai 52:11 * **6:18** 2 Samueli

kontai we metohong weai paria we mesobu yau aha fo, we metatua mea paria we fianai aino raminde menari fo, tuti nina mani memainenang we memadu tuti yau na menemiwawu yau fo. Fininai kai dohong yau imirising paria aha.

⁸ Tarahai kaiwo anatu tapapao raminde yenatuai we mea mau nanai dohong menemirorongwai fituayai, wape wiro yetua wea kaha. Tarai we rabuang bonani yetua kuteai we mea weo iwatioai we menemirorongwai fituayai kuteai, mae wiro ene waroi kaha.

⁹ Wape ninaia mani ifaraise ampa, wiro we menemirorong fituaya wa kaha, mae we na menemirorong fituayai nanai wedaya metarabera mea weru mene metohong toa warawa. Weo menemirorong fituayai nanai Allai dawi weai tonanai. Ampafe wiro amewedaya mea mesobu dadirafea kaha.

¹⁰ Weo taenemirorong fituayai kariri Allai ne dawiafo tonanane wedaya tatarabera tata weru tane sasarinei tuti kia faririfo we tata. Tuti mandoni kontai wiro detua we fi tonana fo kaha. Wape taenemirorong fituayaio kariri nunei ne dawiafo kia mararehafo we tata, amani taminohi na mamantiti rorong fo.

¹¹ Into mewati kariri todoni menemirorongfoi fituayai kariri Allai ne dawiafo ne! Finanai wedaya

mea merurai na mamboni paria we meruairurang mene taraiwai tuti menari ne wetaraifo, menemirireu sasario inontarai nani niari fo, mematai Sempaisi, menemirorong dawi we mesobu yau, mefaraise paria we fi merurai wea wa, tuti memainenang we metohong aiboifo we mano dohong sarawa foi. Na fininai kai meteinawiai ampa we menari fisarawafea kaha.

¹² Ampafe isoi surati nani we mea mau fo, wiro mano anta dohong sarawai nani dino wedaya isoi ne kaha, ete we mano sodai dadirafo na fi sarawai tonana foi kaha. Mae isoi surati nani fo we ambori mewaitawanaia kasau we memainenang we mefata amea na Allai arongreafao.

¹³ Nanai wedaya amenemirorongnei mitubaru aha.

Tuti wiro amenemirorongnei mitubaru tera kaha, mae amemirising kontai sewa aha we amewatio Titusi we mirisingfo, weo mea kiai metohoni enerorongfoi mitubaru aha fefe.

¹⁴ Tarai we raminde Titusi dontai we mea kaharai mae yeparanding mea paria wei, tuti wiro metohong mamaya yau kaha. Toyari fikiaio raminde amewuwuai we mea fo mani kaiwo wetarai fine, tonanai kontai metainawiai we Titusi we fi bengno amemadurai wei na amefiai mea fo, wetarai tonanai kontai.

¹⁵ Ninaia mani enewawu mea pari aha, weo aroai kariri todoni raminde mea kiai wiwiaing mea mani

metaramididauwi fo tuti kariri todoni metamang wei na mai tuti metatori na mematai fo.

¹⁶ Ifaraise paria weo iroaso mea na fifiani konta fefe.

8

Paulusi dutansa we efanduhi doi we efata ene doroi esobu dadirafo na Yerusalemifo

¹ Doroi Korintusiwa meaine, ninaia mani ameteyo ameteikaririai we mea ambori mewaitawang kariri Allai ne bengno dohonai arora we jematinesa na nu Makedonia nei ne.

² Ea esobu dadira fuba paria. Wape na dadira fuba esodairi nani, emirising paria donio ene pari fi arorawa tonanai ki, wape na ewarami takahetuai paria fo etohong doi kontai we efata inontarai siai.

³ Yeyo imadu kaririaifa kontai we fianai aino etohonai nanai, etohonai kariri fiani aino esobua fo, tuti etohonaia sewa ne esobuafo nanai kontai. Wiro manei demisa kaha, mae mantaung saino enemittiuai tonanane,

⁴ tuti etanggoa amea paria we ea kontaio efata Yesusi ne inontarai emararebana fosa na nu Yudea foi na fianai aino esobua fo.

⁵ Tuti fi etohona fo, fuba sewa ne amenemittiuaitafo. Reantanang mani etohong ene taraifoi we Sempaisi we etohong kariri ne dawiafo, mayeai we amea kontai. Enari tonanafo, enari kariri Allai ne dawiafo.

⁶ Nanai wedaya ametutang we Titusi we daraberahi

to Korintusi we mea aha mau. Weo andino anta fiata mea na mefanduhi doi we metanatui we mefata tane doroi na Yudea fosa. Ampafe ametutani we fiata mea menariri kiai ao meinenan, mai kariri mene menemiro-rong denteng fo.

⁷ Na fifiani kontaio mene fong pari; na meroasoaf, na memadufo, na mewaitawang fi mai fo, na merurai tarai fo, tuti na menemiwawu amea fo. Ampafe yutang mea we todoni kontaio mene foniai na fi beng ninai kontai.

⁸ Imadu tonanafo wiro yere we mea we metohong kariri nanai kaha. Mae imadu kariri inontarai Makedonia nesa we todoni enemiwawu fuba tonana fo ambori iwati mea kontai we menemiwawu inontarai siai fosa na metohong doi we mefatasa nai mani fuba todoni.

⁹ Weo mewaitawanai na mai ampa we tane Seng Yesus Kristusi todoni dohong ne bengfo arora fuba paria we tata fo ampa. Weo I ne ra bitoya paria, wape sawing ne fi fuba nani kiai, mae niariria ne pari fi, ambori na ne pari fi nanai wedaya tata tane ra bitoya na Allai arongreafo.

¹⁰ Kariri dojo fanduhiai we fata inontarai naya fo, enehutituaitane toninai, amani denteng sewa we mea we metohong kariri mene menemittiuaitafo. Tarai defuina bofafongna foi meaino reantenang pari mefanduhi doi we mefatasa tuti nanai tera kaha, mae meaino reantenang pari we menemittiuai

we menari finana ne.

¹¹ Ampafe ninaia mani, metawina fanai mae menaria kiai ki na fi mesobuai demoyara fo. Todoni kontai menari fininai na menemirorong mirising, kariri raminde nanai memirising we menemititua kariria fo.

¹² Weo masino fi metohonai nanai na menemirorong mesi mani, Allai ambori demang we finanai. Weo Allai demang we fianai aino metohonai na fio mesobua fo, wiro fi sewao mesobua fo kaha.

¹³ Wiro yawiai we iwedaya mesodua ne marabafeai na mene pari fi arora wa, mae inontarai siai fosa etawing ene marabafo kiai tuti esobu sayayafo kaha, manta enehutituaitai ne beng sewa ne mani, tata kiai tamasi.

¹⁴ Na ninaifa mani, mene fi mesobuai sewa wa, metohonai we fiata fio esobua kaha fo, ambori na rahida siai wori, fianai aino esobuai sewa fo fiata fio mesobua kaha fo, ambori na tonanane memasi na fi mesobua fo.

¹⁵ Toyari soi na kaiwofo:
“Mano fianduhi bitoya foi,
wiro ne fia bitoya karera
kaha,
tuti mano fianduhi katui foi,
wiro ne pari fi kaha.”*

*Paulusi denatu Titusi itoru
tono Korintusi we itofata je-
matifoi efanduhi ene doi eto-
hona fo nanai*

¹⁶ Ametohong mahikai paria we Allai, weo niari Titusi enerorong boyari ria

amea, amani niariri yurai paria kariri amea we fiata meawa.

¹⁷ Weo wiro yoa we fianai aino ametutani wea fo tera kaha, wape mantauni kiutuai terai we da we mea mau, tuti de yurai paria we fiata mea ki.

¹⁸ Tuti wiro meiri kahai, mae ametemio tane doroi manei riati, doroi nani mani jematinei kiai etatori kontai weo fianai aino niari fo, amani wiwu Kaiwo Mahikai na Allai kariri Kristus fo.

¹⁹ Tonanai tera kaha mae, inontarai nini mani, jematinesa etiriri we kionta amea na amene rang rorong ne na rahida ameha fi mefanduhiai we tane doroifosa fo nanai. Fi mai metohona fo nanai, ameha ametohonai ambori Sempaisi mantauni wonongfo dadai sambewarai nayai, tuti ambori deinawiai we taenemirorong dohong we tafatasa tonana.

²⁰ Amenemitituitane we ametemi tane doroi nani dontai ria Titusi ne mani, weo ametanansiau weai paria ambori wiro inontarai manei dinggai amea we amenari sarafieai na fi fubao fanduhiai tonina nei kaha.

²¹ Amerurai we amenari fio mai pari fo terai, tuti nanai wiro mai na Allai urengreafra tera kaha, mae na inontaraine earomireafra kontai.

²² Amea kontai ametanatu tane doroi siai manei kontai ria Titusi suru. Inontarai nini ametitua wei we beiru teai ampa tuti amewatioia mani, inontarai ureng maya paria

* **8:15** Keluaran 16:18

dine. Tuti ninaifa mani yurai paria we fiata mea we yoaso mea fo fuba paria, we fi metohonai tonana fo.

²³ Mae we Titusi mani, nehu maniwowirio yufi ria yau dine we aufata mea. Tuti tane doroi manduo urontai riati ne suru mani, inontaraio jematinei kiai etemi suru di suru tuti uminohi toa fo wedaya Kristusi wonongfo sambewarai dedai aha.

²⁴ Ampafe amene-mitawanai we meteinawi menemiwawuwa we sitoru, ambori jematinei kiai ewaitawanai we menemiwawu sitoru tuti ewatioai we fianai aino ametaparandinai kariri mea fo wetarai.

9

Paulusi dutang we jemati na Korintusi fosa emainenang fi etohonai we efata jemati na Yerusalemifo

¹ Kariri fianai aino metohonai we mefata inontarai emararebanai na Yerusalemifo, wiro yeyo imadu kaririai we mea ahang kaha.

² Weo iwaitawanai we memirising we mefata tane doroifosa, tuti yeparanding mea kaririai we inontarai na nu Makedonia nei ampa. Yeikaririai wesa, we na defuina bo da wa foi paria ninai, doroio na nu Akhaya wai mea memainenang kawuru ampa we mefanduhi doi we mefata tonanai ampa. Tuti mene memirising we menari finana fo wedaya bitoya na sa efaraise we enari tonanai kontai ampa.

³ Wape yemi doroine sitoru mau ninai ambori fianai aino ametaparandinai kariri mea fo dohonao manta kaiwo ariri arora tera fanai, wape todoni kontaio memainenang finanai kawurua watai. Weo imadurai wesa kawuru ampa we memainenang we mefata tonanai ampa.

⁴ Imameataifa we masino rahida bo yontai mau wai inontarai Makedonia manea etontai ria yau, tuti ewatioai we wiro memainenang finana kaharai, nana mani amemamaya paria. Tuti mea kontai nana mani memamaya sewa aha. Weo imadurai kawurua we mea mani ameroaso mea ampa.

⁵ Nanai wedaya nuhuru-ainsoai mai we yemi doro nini sitoru we meafafong mau, we itomainenang fio metarerai we metohona wa. Inari tonanafo we ambori rahida bo ira mau wai mani, fi metohonai nanai mainenang kawurua. Ambori na tonanane deinawiaia kasau we fianai aino metohonai tonana fo, metohonai na mewarami takahetuai funomai, wiro manei denggoa mea wea kaha.

Tatohonai na tawarami rirora ne mani, Allai mioang tata rai

⁶ Mearomio fininai! Inontaraio kifa aibong bitoya kaha foi, ambori fi detingna fo kontai bitoya kaha. Wape mano kifa aibong bitoya foi, ambori fi detingna fo kontai bitoya ki.

⁷ Mansiari-mansiari wau bohong fifo kariri fianai aino kutuai na enemurorongwai,

wiro morira ete numurua
ainso toyari manei denggoa
wau we bohona fanai. Weo
Allai enewawu mano dohong
fi na enerorong mirising foi.

⁸Tuti Allai ne mambiriw we
dohong ne bengfo fuba funo-
mai we mea, ambori fifiani
kontaio mene pari na wea
kaha, tuti awa mesobuaf
fuba we metohong ne bengfo
fuba pari aha.

⁹Kariri kaiwo dotu na
Kaiwo Mararebana fo kariri
Allai deyo,

"I deto funong fi we inontarai
ene pari fi fosa,
ne enerorong denteng fo
nayai wefitawafa."^{*}

¹⁰Allai andino meinanang
aibong we mangkafa aibong
foi tuti fiang we tata, I kontai
ambori meinanang aibong
bitoya pari aha we mea tuti
mioang mene aibong meha-
farai na menemirorong mesi
foi nanai ambori wetaraifo
fuba sewa aha ki.

¹¹Na tonanane na fifiani kon-
taio Allai mioang mea nayai
fuba paria, ambori mewe-
mambiriw we metohong fi
na mewarami takahetuai
funoma wa. Tuti fi meto-
honai tonanai ma ametatora
fo wedaya inontarai efau
etohong mahikai we Allai ki.

¹²Weo fi bengno menari ni-
nai, wiro we dohong Allai ne
inontarai emararebana fosa
esobu fi demoyara tera kaha,
wape kontai we ambori we-
daya kaiwasa bitoya etohong
mahikai fuba paria we Allai
fo.

¹³Tuti na fibengno meteinaw-

iai nanai, inontarai efau
ambori etaparanding Allai,
weo ewati mene metohong
kariri Kaiwo Mahikai kariri
Kristusi, mano merariati
foi. Kontai efiai Allai we
mewarami takahetuaio
metato fi we ea tuti we
mandoni kanta fo.

¹⁴Ampafe ea kontai ambori
etutang tuti mea na enemiro-
rongno enemiwawu mea foi,
we Allai dohong ne bengfo
arora we mea fuba paria fefe.

¹⁵Todoni kontaio tatohong
mahikai we Allai we ne
bengno tatatoafonsoa kahaio
dohonai we tata fo!

10

*Paulusi medu na tapapa
kariri todoni ne mambiriuf
we werasuli we Kristusifo*

¹Ninaifa mani yau Paulusi,
yeo yutang mea we fieaifa.
Inontarai manea etei we yau
eteoyo, iwemambiriw paria
tuti nehu kaiwofo tapapa
na inayai waroi weru mea
fo, wape ikefang meara
mani iwewiwing tuti nehu
kaiwofo fanahang arorawa.
Wape na Kristusi mano
enerorong denteng tuti ne
kaiwo manang foi wonongfo,

²yutang mea paria we
dohonao meteiaya yau we
iwerasuli ne tonana wedaya
nehu kaiwofo tapapa we
mea na rahida yontai we
mea mau fo fe. Weo todoni
kontaio imadu na tapapa
we mano eteyo amea mani
ameminohofo kariri fi nunei
fosa rai.

* 9:9 Masmuri 112:9

³ Tarai we amea ameminohi na nunei ne, wape wiro amerurai na mamuna rorong nini kariri fi nunei kaha.

⁴ Weo amene fimamuna ameha na fi amerurai tutirai ninai, wiro fimamuna nunei fine kaha, mae Allai ne mambiriufu aino wefimamuna we ameane. Na fimamuna nanai ameharai kobu aitetafosa ene katai enariria mitubaru we etadiwa tuti emamuna nai foi.

⁵ Fianai aino inontarai enemirorong dedai fosa emadurai funomai we etapa Allai ne kaiwo wetarai fo, finanai ameharai kobuai, amenaria wifieai ahang kaha. Tuti ene katai etaparandini we mitubaru wesa, ebaunia dedai we ambori ewedaya inontaraifosa etaroanso Allai kaha foi, ametotawi ao misuhi. Inontarai emitituaitafo kiai ameru aitamuosa tuti amenarisa etohong kariri Kristusi ne dawiafo terai.

⁶ Tuti masino metohong kaririai na maia mani, amemainenang we ametohong aiboifo we mano etohong kariri amene kaiwofo kaha fosa ki.

⁷ Todoni kontaio mewaitawang kariri fianai aino mewatioai na meuremifea nanai! Masino manei yoasoai we i mani Kristusi ne inontarai dine, nana mani todoni kontai enetituaitai we amea kontaio Kristusi ne inontarai di amea kariri i.

⁸ Weo masino iboiwawa arohune karerai kontai mae, wiro imamaya weai kaha. Weo fio iboiwawa arohune weai ne mani, todoni Sem-

paisi dohong ne mambiriufu we amea we amebaung mene meroasoawa, tuti wiro we amenari mea meworu kaha.

⁹ Dohonao menemituai we na itoi nehu kaiwo anatu yenatuai we mea wa nini irurai we inari mea mematai fe.

¹⁰ Weo inontarai manei medu deyo, "Paulusi ne kaiwo anatu ne maraba tuti tapapa, wape dontai ma niayai rahang tata mani, inontaraifoi mantauni finahang tuti ne kaiwofo wifiea kaha!"

¹¹ Wape todoni kontai mano medu tonana foi, deitawanai we masino ametoari na meuremireawa mani, fianai aino amesoi tapapa na amene kaiwo anatu fe ninai ne, ametohong kaririai kontai na tapapa na rahida amenai ria mea wa ki.

¹² Tarai we wiro amebiriu we ameha amene tarainei ete ametitua amea we amemasi kariri inontaraio etaparanding berasa fosa kaha. Weo etitua berasa we efiai mantaunsa tuti ewati karirisa tonanai mani, ewebonggoi paria.

¹³ Wape amea mani wiro tonana kaha. Ameboi amearomi mani ametitua kariri fi ametaparanding amea wea fo, ambori ametaparanding amea terai we katai Allai dohonai we amerufi naya fo, amani na ameha ne Kaiwo Mahikai fo. Tuti katai nani mani, mea kontai.

¹⁴ Tuti amene mambiriufu we ametaunau mea toninai, weo ameha Kaiwofo we

mea mau nanai, wiro waroi karerai ete na boriai weru amene katai amerufi nai fo kaha, weo tarai amesobu mea tuti amewuwu Kaiwo Mahikai kariri Kristusi nanai we mea ampa.

¹⁵ Kontai wiro ameboi amearomi we fi inontarai siai enari na katai wiro amerufi naya fo kaha. Mae amenemitarwanai we na mene meroaso Kristusi fo mutu aha mani, amene fi ameru na mea bitoya sewa kontai aha ki.

¹⁶ Pariao na tonanane amesobu rang kontai we amewuwu Kaiwo Mahikai fo na nu siaio waroi na wanai weru mea. Weo amemaya we ameboi amearomine we amerufi na inontarai siai ene katai erufi nai fea kaha, mae na katai mantaung amea amerufi naya tera fo.

¹⁷ Wape toyari na Kaiwo Mararebana fo weai dotu deyo,

"Mandoni dino bioi arong we fiea mani,
wenani bioi arong we
Sempaisi terai."*

¹⁸ Weo wiro na tafiai bera mantaung tata tera fo deinawiai we Sempaisi yoa we tata ne kaha, mae na Sempaisi mantauni fiai tata fo.

11

Paulusi medu na tapapa kariri rasuli tarai kaha fosa najemati Korintusi foi

¹ Inari yau toyari iwebonggoi, amani yeyo imadu ifiae bera yau, ampare yutang mea we metawang mea we

nehu inari tonana fo. Mae iwaitawanai we metawang mea tonanai we yau ampa.

² Yohong we mea paria, kariri Allai mantauni dohong we meafo tuti ikasou mano erurai we eha mea weru yau fo. Mea mani yauno yere mea ampa we merau mang manei, amani Kristusi, we ambori yohong mea toyario kadawing sowaworua mi rarebanai wei.

³ Wape imameatai paria we dohonao manea ewawori mea eha mea weru mene meroaso Kristusi na mai tuti na menemirorong mesi foi fe, ne tarai toyari Hawaifafongfa we awaifoi sofari we sawai na ne kaiwo sewai karira fo nana fe.

⁴ Weo iwati mea mani mefaraise we metamang we mano era mau we etaunau kariri Yesusi manei siai, wiro Yesusi mano amewuwui we mea foi kaha. Tuti memainenang kontai we mesobu nuaninu siai weru mano raminde mesobui foi, amani Allai Nuaninufoi. Kontai mefaraise we mesobu kaiwo mahikai siai fo weru Kaiwo Mahikaio mesobuai ria ameara fo.

⁵ Wape we yau mani, nuhruainso wiro iwerasuline itawawa weru inontarai mesahusa we mene rasulio ewemambiri sewa nanisa kaha.

⁶ Tarahio na imadufo mani isawai turura kaha, wape na waitawang fi wetarai fo mani isawai paria. Finanai na fifiani kontaio ametainawiaia kasau we mea ampa na kaiwo amemadura ne tuti na ameminohi toa ne.

* **10:17** Yeremiai 9:24

7 Na rabuang bo iwuwu Kaiwo Mahikai kariri Kristusi we mea fo, wiro yutang mea we mebai yau kaha. Na tonanane inari nehu taraineia tewawa, ambori inari mea metadai. Ampafe inari tonanaifa mani inari sarawaifa ne?

8 Rabuang bo irufi we mea nanai, jemati siaifo ansaino ebai yaune. Ampafe ne tarai toyari yewa jemati na katai siasi, we isobu doi riasa we ifata mea.

9 Tuti masino rabuang bognani nehu pari fi, wape wiro yohong marabafeai we mane wau we fata yau kaha, weo fianai aino nehu pari wea fo isobuai mai ria doroio era na nu Makedonia mau fosampa. Yeitawang weduarai na fifiani kontai, ambori wiro iwedaya mesobu marabafeai we yau fanai, tuti irurai we iwaitawang weduarai pampang tonanai.

10 Ifafora na Kristusi ne Kaiwo wetarai nayai na yau ne, we mandoni kontai na nu Akhaya wai wiro kiutu wedua yau na iboi arohune kariri todoni wiro iwedaya mea we mebai yau we iwuwu Kaiwo Mahikai fo we mea fo kaha.

11 We fianie imadu tonanai we yevo, wiro iwedaya mea mesobu marabafeai we yau fanai wei ne? Weo enehuwawu mea kahai e? Bereri! Allai deitawanai we enehuwawu mea!

12 Fianai aino inari ninai, amani irufi we Kristusi na yutang we doi we fiembaitai we yau kaha ne, inari pampang ki, ambori rasuli siaio

wetarai kaha wasa esobu rang we etaparandinsa kariri amea fanai, ambori wiro ewemambiriu we eteyo emasi kariri amea na erufifo tutu esobu doi nayai kaha.

13 Inontarai tonana nesa mani rasuli tarai disa kaha. Ea mani inontaraio erufi na mai kahai, amani etofa wawera kaiwasafosa enarisa to-yari Kristusi ne rasuli saine.

14 Inontarai tonana nesa, wiro tapapuhung wesa kaha, weo Saminseni mantauni kontaio tetofa niari ne taraifoi we wewaio sambewara dine!

15 Ampafe Saminseni ne mangfatafosa eweanggari we enarisa we etohong kariri Allai ne dawiafo na enemironing mesi fo mani, finanai tapapuhung wea fanai weo fi waworu fine kaha. Inontarai tonana nesa ambori esobu ene fiembaitafo kariri fi karira fianai aino enari nanaki.

Paulusi bioi arong kariri todoni werasulifo wedayari sodai dadirafo

16 Yeyo imadu riwanai aha, dohona mane enemutitua itai we iwebonggoi fe. Wape masino mea kontai menemitiuai tonanai we yau mani, meroa we yau metawang mea we yau kontai we iboi arohu kuteai toyari inontarai siai wasa.

17 Fio yeyo imadurai aha nina mani, yeyo ifiai bera yau tuti iboi arohu wea ne. Wape imadu tonanafo wiro imadu kariri Sempaisi medufo kaha. Mae imadu terai kariri inontarai webonggoi.

¹⁸ Kaiwasa bitoya efiai berasa kariri fi nunei, eta-parandinsa we fi enari na mantaunsa ene mambiriufu, ampare yau kontai yeyo yeparanding yau kuteai kontai.

¹⁹ Oh, menari mea toyari inontarai mesawai paria di mea fenana, donio mefaraise we metawang mea we inontaraio ewebonggoi fosa nnai.

²⁰ Weo mesawai, donio metawang mea kontai we inontarai eharirao enari mea toyari womingfosa, we mano eru mea we eha mene ra wasa, we mano etaparandinsa we inontarai etadai sewa mea disa fosa, tuti we mano ehandio mea fosa.

²¹ Tofino! Amea mani wiro amenari ne karirafeai tonana we mea kaha! Tarahai amene mambiriune demoyara kahai we amenari mea tonanai e? Oh, imamaya paria weo wiro amenari mea tonana kaha!

Wape toyari inontarai siai wasa eboi earomi we fiea mani, yau kontai inari yau we iwemambiriuw iboi arohu weai kontai. O tarai, imadu toyari inontarai webonggoi paria manei finanai.

²² Eweinontarai Iberani disa e? Ha! Yau kontai Iberani di yau! Inontarai Israeli disa e? Yau kontai Israeli di yau! Abrahami ne riria disa e? Yau kontai ne riria di yau!

²³ Kristusi ne mangfata disa e? Wape yau mani Kristusi ne mangfata isewasa

di yau! (Eh! Tarai, imadu toninane toyari inontarai wefiauwou.) Weo yau mani, irufi we Kristusi mamboni sewa, inontarai esoa yau to aitamufoi bitoya sewa, eruba yau maraba sewa na wai rubata fo, tuti bitoya paria mararehafoi dawawu yau.

²⁴ We bering inontarai Yahudi fosa eraruba yau fo, amani we beyari mani eruba yau we boyari konta reti piaru.

²⁵ Webetoru Romafosa eboi yau na aitatohi, webeyari kaiwasa eru kamieio yau. Webetoru yeisui na rawanangrau na wa defai, tuti webeyari yewohi na ai-wowongfo na rawanangrau rahida bei diru bei.

²⁶ Bitoya paria ira iwuwu Kaiwo Mahikai fo, tuti na rang rorong nanai isodai fi karira bitoya kontai wedaya adareti imereha. Nana mani isodai foafoi, inontarai eharira fosa etawa yau, nehu inontarai amene nu boyari fosa, amani Yahudifosa, emamuna we yau, inontarai Yahudi kaha fosa kontai emamuna we yau. Isodai ne karira tonanafo na bendarifo, na airorongfo, tuti na rawanangrau. Tuti isodai finanai na doroi Kristeni tarai kaha fosa ewaramifo kontai.

²⁷ Irufi mamboni tuti maraba paria, tuti rahida neungne adareti yena naria kaha, weifa mani iwawisi tuti arohutataha, kaharifoi ming yau, nehu ansung demoyara kahai adareti nehu tarainei niai arora tuti

yenunanang.

²⁸ Fi bitoya isodairi tonana foi tera kaha, mae rahida neungne nuhuruuinso maraba kontai we todoni yewawu jematiniei kiai fo.

²⁹ Mandoni di finahang mae wiro ifanahang riati kahai ne? Masino manei sawai to sasari rorong foi mani, yau kontai enehurorongnei fituayai wei.

³⁰ Ampafe masino awa iboi arohu we fiaeifa mani, iboi arohu we fio deinawiai we iwemambiri kaha fo.

³¹ Allai, amani tane Seng Yesus tamanai, deitawanai we itofa kaha. Tafiai wonongfo wefitawafa.

³² Rahida bo inayai na bendaru Damsiki fo, Mananuo Aretasi ne gubernuri mano wenunggamie i na nana foi, demi ne afai mamuna fosa we ewaitawang wedua bendarifoi we etafu yau.

³³ Wape nehu maniwowirifosa etu yau na nawang bei, na kamirei bei na wore kamie i foi to kofafo aweu. Ampafe ikaharai weru warangfoa.

12

Kaiwo kariri fio Allai deinawiai we Paulusi we detioafo

¹ Tarai we taboi taaromine kia fieai we manei kahai kontai. Wape yeo iboi arohune kutea aha we fi Sempaisi deinawiai we yau we iwatioa fo tuti yeitawana fo.

² Na kaiwo bonini imadu kariri mantaung yau wape toyari imadu kariri manei siai. Amani, yeroanso

inontarai manei, inontarai nani mani inontarai daria Kristusi dine, defuina suraya boa dawa fo Allai yuaisi to katai dedai na Waidani. (Yeitawana kahai we ne taraiifo dino Allai yuaisi tonanaifa ete nuaninufoi e, Allai mantauni dino deitawanaifa ne.)

³⁻⁴ Imadurai aha we, yeitawanai we inontarai nani Allai yuaisi to ne katai mirising pari foi. (Yuai ne taraiifo ete nuaninufoi, Allai mantauni dino deitawanaifa ne.) Na wanai inontarai nani tarao fio mahikaio inontarainesa wiro ebiri we emadura kaha fo tuti Allai wiro yoa weai we inontaraine emadura kahai kontai.

⁵ Inontarai nani dino yeo iboi arohu wei ne, wiro iboi arohu parai kariri mantaung yau kaha. Kariri yau mani, fio deinawi nehu ifanahangne aino yeo iboi arohu wea ne.

⁶ Mae masino yeo iboi arohu we fieai konta mani, wiro iweinontarai borong beinseng kaha, weo fi wetarai fo aino imaduraifa ne. Wape itawang yau, ambori wiro manei deto yau we isewa fianai aino deti inaria fo ete tarao imaduraia fo fanai.

⁷ Wape ambori wiro enehurorong dedai tuti borohu fiabai we fi mahikai sewa fubao anta Allai deinawiai we yau nanai fanai mani, Allai sua isodai fi maraba feai na nehu tarainei, ne tarai to yari ababo we disang yau, amani fi karirao Saminseni demi ma we niari kanggani

yau nai. Ambori wiro enehurorong dedai fanai.

⁸ Webetoru yutang Sempaisi we ambori yuai fi isodairi tonana foi weru yau.

⁹ Wape yo a we yau deyo, "Wodai pirahawai tonanai ki, wape nehu beng yohonai arora we wau fo demoyarai we wau. Weo na nemu funahangwa, nehu mambiriufu kasau tuti mesi na wau wa." Nanai wedaya todoni kontaio ifaraise sewa we iboi arohu we nehu ifanahangfo, ambori Kristusi deitawang wedua yau na ne mambiriufu.

¹⁰ Ampafe ifaraise tuti nehu ifanahangne. Ifaraise we na iraria Kristusi fo wedaya inontarai eteibera yau, isobu dadira, etawi yau we emung yau, tuti isodai dadira karira pari fo. Weo ifanahang mani, nanai iwemambiri tarai.

Paulusi enetituai we inontarai Korintusi fosa

¹¹ Tarai we inari toyari inontarai webonggoi, wape meaino menari yau nehu tarai tonana ne. Wape ne antu mani, mefiae yau. Weo iwefiae kahai ki, wape titua weai na mano mesahusa we mene rasulio ewemambiri sewa nanisa mani, wiro esewa yau kaha.

¹² Fio deinawio inontarai we werasuli tarai fi dine mani, amani fiainawiai, fitantuma tuti fieai na Allai ne mambiriufu, finani kiai inari rahang mea na itawang yau na rahida inayai ria mea fo.

¹³ Weo na fi kiaio inari we jemati siai fosa, finanai inari kontai we mea ampa. Wiro inari ta fieai we mea kaha. Fio tarahio inari tara mani, na iwuwu Kaiwo Mahikai ne, wiro yutang mea we mesodua ne maraba kuteai na mefata yau na doifea kaha. Tarahio menemitituai we tarai inari sarawai tonanai e? Oh, bereri paria!

¹⁴ Ninaifa mani imainenang we yontai aha mau ituambawa mea webetoru fininai. Tuti iwedaya mea mesodai marabafea kaha rai. Weo fi yawi wea fo mani, fi meminohi tutira wa kaha, mae inontarai tarai mea ambori menemiwawu yau. Weo wiro arikangne ansaino esera we emainenang doi we wawafosa kaha, mae wawafosa ansaino esera we doi we arikangfosa ne.

¹⁵ Nanai wedaya iparaise we fifiani kontaio itawini kiai we mea, awa nehu tarainei kontai itawini we mea kontai. Masino enehuwawu mea tonana mani, we fiane menemiwawu yau mayeai nina?

¹⁶ Meroa weai ampa we wiro inari marabafeai we mea kaha. Tonanai ki wape emadu eteyo inontarai borong beinseng di yau tuti ifarao mea we itofa mea ika mene doiwa.

¹⁷ Tofino, inontarai mano raminde yemi sitoru itorontai mau wa sitoru, yemi sitoru we itoha mene doifeai we yau e? Bereri kontai!

¹⁸ Tarai we raminde yemi Titusi dontai mau suambawa mea tuti yemi tane doroi

manei dontai riati kontai. Rahida bonani Titusi kia fieai ria mea re? Mewaitanai we auru mani, aurufi wea fo masi na auenemirorong mesi nei tuti aurohong toa fo masi kontai.

¹⁹ Tarahai pariao ni-nai menemitituai we itoi finini kiai we ambori amemadu tutu amea na meuremireawa, we todoni rasuli tarai di amea fo ne? Bereri, mae na Allai urengreafu amemadurai terai we inontarai ameweboyari ria Kristusi di amea. Tuti fio amenariri nei kiai mani we mea, amani doroi amene-miwawu mea wa mea, we ambori mene meroasoawa mutu aha.

²⁰ Weo imameataifa we rahida bo yontai mau itu-ambawa mea wai mani, dohonao isobu mea we wiros mene tarai kariri fianai aino enehutawana fo kaha fe. Tuti mea kontai wiros mewati yau we nehu tarai kariri fio menemitawanai weai nanai konta kaha fe. Imamea we dohonao mesawa mea, menemirorong pirahai we mea, mehasisou mea, mehatate mea, meteibera inontarai, metairiri kaiwo mai kaha, menemirorong dedai tuti memamuna funomai.

²¹ Imameatai we dohonao rahida bo ira mau wai, Allai niari yaua itawawa na mearamireawa, tuti isai we inontarai bitoya na mea raminde nanai enari sasarifo, wiros etaraberasa tuti efotou enari ene sasarifo nanai kaha, amani ene werarikafo, ene maninawafo, tuti ene

epaingfo. Weo isobu fikarira tonanai na nehu arikangno irufi wesa fosa mani, wedaya yau imamaya tuti fi iru fo.

13

Paulusi ne kaiwo arerai wefui afo

¹ Yontai aha mau we itu-ambawa mea ninaifa mani, yontai webetoru we mea finanai. Mearomioaifa, na Kaiwofo dotu deyo,

“Sasarifea mani, sasari nanai inontarai mandu ete mantoruo itowati tera fo itoroa tubarai reto, ambori kaiwo nani ayaranane fe.”*

² Raminde yontai weberu mau fo, isua mea we mano enari sasari fosa ampa. Ninaifara mani, na inayai waroi weru mea ninai kontaio, isua mea nariai aha. Rahida bo yontai mau wai mani, mano raminde etohong sasari fosa konta mano siai fosa wiros ekaharai weru aiboi yohonai wesa fo kaha.

³ Metutang we mesobu fiainawiaio deinawiai we Kristusi tarai medu na yau. Mewati mea! Ira mau mani, ambori mewatioai kasaua we Kristusi wiros finahang niari fi na mea kaha, mae wemambiri paria na mea.*

⁴ Tarai we rahida bo epahui na aitabafoi ne mani, finahang. Wape na Allai ne mambiriupo darang aha. Amea kontai amefanahang

* 13:1 Ulangan 19:15 * 13:3 Rasuli 13:6-11

toyari raminde nanai Kristusi finahangfo, wape Allai ne mambiriuo wedaya ameweboyari ria Kristusi ambori amewemambiri we amerufi na mea.

⁵ Metitua bera mantaung mea we na meminohi toa wa, we meroaso Kristusi tarai ete bireri e? Todoni kontaio mewaitawanai we Kristus Yesusi niayai na mea, mae meroasoa tarai kaha mani, bereri.*

⁶ Tuti enehutawanai we mewati amea mani, kasau we mea ampa weo inontarai ameroasoi tuti Kristusi ne rasuli tarai di amea.

⁷ Ninaia mani amewe-nadi we Allai ambori wiro metohong sarawa kaha. Amenari tonanafo, wiro ambori deinawiai we amea mani rasuli tarai di amea fo kaha, mae ambori menari ne wetaraio Allai dawi wea fo, masino manea etitua amea we rasuli tarai di amea kahai ki.

⁸ Weo wiro amenari fieai we dapa ne wetaraifo kaha, mae fi amenari fo mani we fi wetarai fo terai.

⁹ Masino amefanahang mae mewemambiri mani, amefaraise, tuti amewenadi we Allai kontai ambori niari meara memasi.

¹⁰ Nanai wedaya isoi kaiwo anatu ninai na rabuang bo inayai waroi weru mea foi nina. Ambori na tonanane, yontai mau mani, iru nehu mambiriuo Sempaisi dohonai we yau ne we inari mea na tapapa fanai. Weo mambiriu nanai Sempaisi dohonai we ibaung mea

nayai, wiro we itota meara meworu naya kaha.

Paulusi dohong mahikai

¹¹ Doroi meaine, wefuiaine mani, todoni kontaio memirising to, merurai we ambori memasi na Allai urengreafu, metaramio nehu aunaune, menemirorong boyari, tuti meminohi na mai. Tuti Allai mano enemiwawufo tuti ne maifo weneung nai foi weriria mea.

¹² Metohong mahikai wawera mea na mai Weinontarai Kristen.

¹³ Allai ne inontarai emararebana nesa kiai na nianai etohong mahikai kontai we mea.

¹⁴ Kadono Seng Jesus Kristusi dohong ne bengfo arora we mea, Allai enewawu mea, tuti Nuaninu Mirarebana foi weriria mea kiai.

* **13:5** Matiusi 7:15-20

Kaiwo Anatu Na Paulusi We Jemati Na Galatia

Kaiwo dedung we Galatia

Kaiwo anatu ne Paulusi soi weo jemati na nu Galatia fosa. Ea mani inontarai Yahudi disa kaha tuti raminde nanai esomi we sengno tarai kaha fosa. Wape rahidao Paulusi dontai ao wiuwu Yesus Kristusi wesa fo, manea eroasoai, ampare ansaino ewejemati na nu Galatia foi.

Paulusi dontai werusara nana mani, inontarai siai etontai to Galatiafoi tuti etaunau fi siai we jematifosa. Eteyo eroaso Seng Yesusi terai mani demoyara kaha, mae todoni kontai etohong kariri Allai ne Hukumi dohonai we Musai foi, tuti ewesunati kariri Yahudi ene Hukumi nani. Eteyo na etohong kariri nana fo Allai feririsa ki.

Wape Paulusi tarao etaunau tonana fo mani, kesoua dang wawerahi, weo kaiwo aunau nanai sarawai paria. Na ne surati nini medu we jematifosa deyo, na taroaso Seng Yesus Kristusi tera fo, Allai feriri tata weru tane sasarine, wiro na tatohong kariri Hukumi Musai foi na mai fo kaha. Ne tarai toyari medu wesa deyo, "Raminde nanai yau mani nehu tarai tonanai. Iweinontarai Yahudi, ampare iroasoai weo na yohong kariri Hukumi Musai foi Allai feriri yau

weru nehu sasarine. Wape enehutituai sarawai paria! Na ninaifa mani iwaitawanai weo na iroaso Seng Yesusi tuti irariati tera fo Allai feriri yau. Anta yohong kariri Hukumi Musai foi kia fieai we yau kaha." Ampafe denggoasa weo ewesunati fanai mae eroaso Yesusi terai tuti erariati.

Kontai deyo taroaso Yesusi fo mani wedaya tamasi na Allai urengreafo ampare na tonanane Allai sahu tata we Abrahami ne riria di tata. Tutu na tonanane tasobuo fi mai fo ria Allai, amani fi maio dererai we Abrahami we dohoni weia fo.

Kaiwo na suratinei deto kutowai tonina:

1:1-10 Kaiwo fafong.

1:11-2:21 Paulusi medu kariri wang tuti fi yuo sobuai na Seng Kristusi fo.

Wangno Paulusi sobuai we Yesusi ne rasuli fo nanai, wiro sobuai na inontarainesa kaha, tuti Kaiwo Mahikai kiorama fo wiro kaiwo na nunei fine kaha, mae finani kiai sobuai na Seng Yesusi terai.

3:1-4:31 Paulusi deunau inontarai eroasoa fosa na Galatia.

Tata kiai, Yahudi ete Yahudi kaha te, tamarrarebanai na Allai arongreafo, wiro na tatohong kariri Allai ne Hukumi dohonai we Musai fo na mai fo kaha, mae na taroaso Yesusi, mano feriri tata foi, terai.

5:1-6:10 Paulusi deretawansa.

Deyo, tawewoming we Allai ne Hukumi dohonai we Musai fo ahang fanai, weo Yesusi sawing tata weru tarurai we tamarebanai na tatohong kariri Hukumi nani. Wape tatohong karira funomai kahai kontai. Mae tatohong kariri Nuaninu Mirarebana foi wiwiang tata fo.

6:11-18 Kaiwo kife.

1-3 Doroi mea kiai na jemati na nu Galatia wai mea. Yau Paulusi, tuti tane doroi Kristenio enayai na ninai ria yau nesa, amenemitawanai kadono tane Dai Allai tuti Seng Yesus Kristusi, urohong une bengfo arora we mea tuti uwedaya mea menumiruainso ne maifo.

Wiro inontaraine saino ewedaya iwerasuline kaha, ete ansaino eruai yau iwerasuline kaha, mae Yesus Kristusi tuti Dai Allai, mano duwi Yesusi na marareha rorong foi, uruino uruai yau iwerasuli we Kristusi ne.

4 Na Kristusi dohong kariri tane Dai Allai ne dawiafo, dohong ne taraifoi mireha we tane sasarinei, ambori takaharai weru rabuang bo fui kerira nini.

5 Sambewaraio dadai feai we Dai Allai we fitawafa! Antu.

Kaiwo Mahikai ne beyari kawuru

6 Doroi meaine, metohong yau ipapuhing paria! Weo Allai sahu mea yuai mea we ne inontarai, weo Kristusi dohong ne bengfo arora

we mea ampa. Wape nina mani mesahera metarabera mea mekurumitare Allai, tuti metohong kariri kaiwo wetarai kahaio mesahuai we kaiwo mahikai siai fo.

7 Wape kaiwo nanai wiro kaiwo mahikai fo aine kaha. Manta inontarai ewuwua fosa ebariwawera Kaiwo Mahikai kariri Kristusi fo we mea, ambori ewedaya mea meserawawerahai paria tuti metau we ene kaiwo sarawai nanai.

8 Wape yeisaharai we mea, mandoni dino wiuwu kaiwo mahikai siai feai weru Kaiwo Mahikai amewuwuai nana, masino wenani na amea mane, ete na wewai na rorafaisi mane te, mano niari tonana foi, wenani sobu aiboi maraba pari fo wefitawafa.

9 Raminde ametaisaharai kawuru ampa, tuti yeisaharai nariai aha nina, weo, mandoni dino wiuwu kaiwo siai feai weru Kaiwo Mahikaio mesobuai ria amea kawurua wa mani, todoni kontaio sobu aiboi maraba pari fo wefitawafa.

10 Ampafe tofino! Na fianai imadurai tonana fo, deinawiai we isera we inontarai efiai yau e? Bereri! Fi yawi wea mani, we ambori Allai di fiai yau ne. Ete tarahio meteyo manta irurai we yohong kariri fi inontaraine etawi wea fo tera ne? Wape masino inari kariri fi inontarai eparaise wea fo mani, wiro Kristusi ne woming di yau kaha.

Paulusi deisaha kariri todoni werasulifo, amani

Kristusi andi yuaisi ne, wiro na inontarai nunesa kaha

¹¹ Doroi meaine, todoni kontaio yeikaririaifa we mea ambori mewaitawanai, weo Kaiwo Mahikai iwuwuai kariri Yesusi we feriri inontaraine tata fo, wiro da na inontarai nunesa ma kaha.

¹² Kontai Kaiwo Mahikai nanai isobuai ria inontarai manei kaha, tuti wiro inontarai manei dino deunauwai we yaune kaha. Tonana kaha, mae Yesus Kristusi mantauni andino deinawi parai we yau ne.

¹³ Metarami kariri nehu iminohi toa fo ampa, na raminde iroaso Kristusi kaharai fo. Raminde nanai iweagama Yahudi, amani iroasoai we Allai feriri yau na fi beng inariri na yohong kariri ne Hukum Musai soi fo. Metaramioai kontai we irurai we yohong kariri agama Yahudi foi na mai paria fo, wedaya inari kanggani Allai ne jematio eroaso Kristusi fosa tuti irurai paria we inarisara eworu.

¹⁴ Watioai na ohong kariri agama Yahudi foi fo mani, isewa Yahudi bitoyao amemai fosa. Tuti ifaraise paria we yohong kariri koang Yahudio weriria na amene werengfosa ma foi.

¹⁵ Wape na Allai ne beng dohonai arora we yau fo, diri yau kawurua na wiro itaubau nuhu kaharai fo, tuti kariri ne dawiafo sahu yau we irufi wei.

¹⁶ Tuti deinawi ne Kaisungfoi we yau ambori, Kaiwo Mahikai kariri todoni Kaisungfoi feriri kaiwasane

nani, iwuwuai we inontarai Yahudi kaha fosa. Rabuang bonani wiro ira wa yutang inontarai manei kariri finana kaha.

¹⁷ Kontai wiro ira wa yutang mano ewerasuli kawurua fosa, na Yerusalem, we etaunau kariri Yesusi ne rang waworu ne we yau kaha. Wape na siari nanai ira to nu Arapi foi, tuti ambori yarabera yau to Damsiki aha.

¹⁸ Defuina botoru aha mani, yautai to Yerusalem we iru na fino Petrusi warangfo. Inayai na nanai riati rahida suraya ring.

¹⁹ Na nanai wiro isobu rasuli siai manei kaha, mae Yakobusio Seng Yesusi ne tahatuifoi mesiri.

²⁰ Fianai isoi ninai, kaiwo tarai fine, Allai deitawanai we itofa kaha.

²¹ Mayeai yontai to nu Siria foi tuti nu Kilikia foi.

²² Paria sobu nanai jemati Kristen na nu Yudea foi wiro ewati yau kaharai.

²³ Etaramioai teraifa we inontarai eteisaharai wesa eteyo, "Inontarai raminde niari kanggani inontarai taroaso Kristusi ne tata fi, ninaia mani wiuwuo Kaiwo Mahikai kariri Kristusi fo, kaiwo raminde yurai we niaria woru nanaia fo."

²⁴ Ampafe etaparanding Allai we yau.

2

Seng Yesusi ne rasulifosa na Yerusalem eroatuba we Kaiwo Mahikai Paulusi deunau foi

¹ We defuina suraya boa aha mani, yarabera yau ria Barnabasi to bendari Yerusalem aha. Ika Titus i dontai kontai.

² Ira wa fo weo na fiainaw-iaifeai Allai deinawiai we yau we todoni kontaio yontai to bendari Yerusalem aha. Isobu Yerusalem, mano ewenunggamie i we mano eroaso Yesusi na wana fosa, amefanduhi amea siai tuti yeisaharai wesa kariri Yesusi ne Kaiwo Mahikai fo ikoramai we inontarai Yahudi kaha fosara fo. Arohukuayai imatai weo maneiru teai na wana fosa tarahi eteiaya nehu aunaufoi, pariao fianai aino raminde nanai irurai tutiraia fo na iwuwu Yesusi ne Kaiwo Mahikai fo we Yahudi kaha fosa fo, wiro wefiea kaha, donio imadu we mano ewenunggamie i fosa terai.

³ Titus i dontai ria yau nini, inontarai Yunani dine, wiro inontarai Yahudi dine kaha. Tonanai ki wape wiro enumiruainso we ewesunati kariri Hukumi Musai deyoa fo kaha.

⁴ Tarai inontarai manea etanggoarai paria we dohong kariri sunatifoi toyari Hukumi Musai deyoa fo. Inontarai nanisa mani inontaraio etadiwa ma ehontai tata tuti enari ea we tane doroi na Yesusi disa. Mae epampamu, weo na mamunggasai esera we ewaitawang kariri todoni Kristus Yesusi sawing tata ambori tawaworu tuti tahasau weru tatohong kariri Hukumi Musai foi. Erurai we ambori ewedaya tata tatohong kariri

Hukumi Musai soi foi aha tuti tatohong sunatifoi, ambori na tonanane tawewoming we Hukumi nani kariri fafongno taroaso Yesusi kaharai fo aha.

⁵ Wape amesu to fui kuteai wesa kaha, amerurai pampang we ambori Kaiwo Mahikai kariri Yesusi fo, amani kaiwo wetarai mesobuai nanai, tuanaia mutu na menemirorongwai.

⁶ Tuti we mano na jematifoi atosa we inontarai fuba fosa, wiro etanggoa yau we yeunau fi waworu fea kaha. (Tarahai eweinontarai fuba disa, wape we yau mani mano atosa fosa ete mano bereri fosa, emasikaburu, manei sewa manei kaha, weo we Allai mani tamasi kiai, i wiro deto inontarai kariri ene tarai todoni fo kaha.)

⁷ Inontarai atosa nanisa, wiro emadu tuba fieai we nehu aunaufo kaha, mae eroa weaifa we Allai yoaso yau we iwuwu Kaiwo Mahikai kariri Yesusi fo we inontarai Yahudi kaha fosa, kariri Petrusi we Allai yoasoi we wiuwu Kaiwo Mahikai nanai we inontarai Yahudi fosa fo.

⁸ Weo Allai dino dohong mambiri we Petrusi we werasuli we Yahudifosa ne ambori wiuwu Yesusi wesa, i kontai dohong mambiri we yau we iwerasuli we Yahudi kaha fosa ambori ika ne kaiwo nanai wesa.

⁹ Yakobusi, Petrusi, Yohanesi, mano itoweaisiyang we jematifosa foi, itowatioai terai we Allai dohong ne bengfo arora we yau, we iwerasuli tonanafo. Ampafe

itoramang we yau na mai
tuti itoru na warahune tuti
Barnabasi warangfo, we
fiainawiai we amewebo-
yari tonanai. Ainanaya
ameroa ruhiae we auru mani
auka Kaiwo Mahikai kariri
Yesusi fo, aura wa aurufi
we kaiwasa Yahudi kaha
fosa, mae itoruno itorufi we
Yahudifosa.

¹⁰ Mantao fio itorutang
wea mani, todoni kontaio
amewati we inontarai ene
pari fi fosa kontai. Tuti
finanai kontai enehurorong
dohong weai we amenariri
konta fo.

*Paulusi deisaha kariri
todoni sua Petrusi we fis-
arawai niari fo*

¹¹ Rahida bo Petrusi dontai
to Antiokia ma foi, isuari
parai na urengreafo, weo
niari fi sarawa fefe.

¹² Na reantenangfo mani,
niari ne bengfo, amani wiro
deti we mano eroaso fosa
Yahudi ete Yahudi kahai,
tuti minohi dampi ria mano
Yahudi kaha fosa kontai.
Wape Yakobusi ne inontarai
demisa fosa era ma sobu
kataifoi mani, Petrusi niari
we ketai weru inontarai
Yahudi kaha fosa tuti miaya
we fianduhi riasa ahang
kaha, weo mitai mano
etawiai we ohong kariri te
Hukumi Musai soi foi tuti
sunatifoi sa fefe.

¹³ Doroi Yahudi wei fosa
kontai etaperemi sobaurai
kariri Petrusi tonanai. Ewait-
awanai we koang kariri
sunatifoi denteng kaha,
wape enari kaririai kontai,
ampafe ewedaya Barnabasi

kontai sau wesa we niari
kontai tonanai riasa.

¹⁴ Iwatioai we wiro enari
kariri Kaiwo Mahikai we-
tarai ne kahai nana ne,
isua Petrusi na euremireafo,
yeo, "Wau mani inontarai
Yahudi di wau, wape kutu
ninai mau mani munohi to-
yari inontarai Yahudi ahang
kaha. Ampafe todoni fino
na ninai rurai we bonggoa
inontarai ewe Yahudi kaha
fosa we enari kariri koangno
Yahudi nei nina?"

*Inontarai Yahudi tuti
Yahudi kaha fosa, Allai
feririsa we eroaso te Kris-
tusi, wiro we etohong kariri
Hukumi Musai fofi kaha*

¹⁵ Kariri tataubau tanumi
ma fo mani, tarai we Petrusi
tuti yau mani inontarai
Yahudi di auru, wiro inon-
tarai wesasario ewaitawang
kariri Hukumifoi kaha fosa
di auru kaha.

¹⁶ Tonanai ki wape auwait-
awanai we inontaraine
ebeng ria Allai aha fo mani,
wiro na etohong kariri Allai
ne Hukumi dohonai we Mu-
sai fofi kaha, mae na eroaso
Yesusi Kristusi fo terai.
Ampafe auru kontai auroaso
Kristus Yesusi ambori na
auroaso Kristusi nanai wed-
daya aubeng ria Allai, wiro
na aurohong kariri Hukumi
Musai fo kaha. Weo na ohong
kariri Hukumi Musai fofi
mani, mandoni kontaio wiro
denteng ria Allai ahang kaha.

¹⁷ Ampafe Yahudi mano
amewe Kristenia ne amea,
ameroasoai we amebeng ria
Allai aha fo, na ameroaso
Kristusi fo, wiro na ameto-
hong kariri Hukumi Musai

foi ahang kaha. Weo na tonanafo kasau we amea ampa, kariri amea kontai amewesasari toyari Yahudi kahaio ewaitawang kariri Hukumifoi kaha fosa. Tonana mani Kristusi dino wedaya sasari nani we amea fo ne? Bereri kontai!

¹⁸ Masino itawingno nehuo yohong kariri Hukumi Musai foi nania, wape tourai aha yarabera yau ambori irurai we inari kariri Hukumi nani aha, nana mani inari sasari paria.

¹⁹ Hukumi Musai foi wedaya inontarai mano etohong karira kaha fosa emarareha ki. Ampafe ne tarai kariri Hukumi nani wedaya yau imerehara. Ninaia mani ikasau weru Hukumifoi tuti iminohi yarang we ambori Allai piraise ria yau.

²⁰ Ampafe, raminde nanai epahu Kristusi na aitabafoi, we Allai mani deti we epahu yau na aitabafoi riati. Ampafe ninaia mani, wiro mantaung yau iminohi yarang toninane kaha, mae Kristusi dino darang na yaune. Tuti nehuo iminohi yarang ninai, iminohi yarang we iroaso Allai ne Kaisungno enewawu yau foi tuti dohong ne taraifoia mireha we yau fo.

²¹ Allai wedaya tata tamasi na arongreafo ampa, na ne bengno dohonai arora we tata fo, amani na Kristusi mireha we tata fo. Masino manei denteng ria Allai fo na dohong kariri Hukumi Musai foi, nana mani Kristusi

ne mirehafoi wifiea ahang kaha. Wape tonana kaha! Ampafe yeiaya ne bengno dohonai arora we yau nana kaha.

3

Tabeng ria Allai fo na taroaso Kristusi, wiro na tatohong kariri Hukumi Musai foi kaha

¹ Doroi inontarai Galatia wa meaine! Mewebonggoi paria! Fiani dino dari riwang mea ne, doni metohong kariri aunau wetarai fo ahang kahai nina? Weo Yesus Kristusi ne mireha na aitaba foi yeikaririai kasau kawuru we mea ampa.

² Into, meteikaririai we yau kariri fininai; mesobu Nuaninu Mirarebana foia fo mani, na meroaso Kristusifo na rahida metarami Kaiwo Mahikai foi, ete na metohong kariri Hukumi Musai foi e? Tarai ampa, mesobui weo metarami Kaiwo Mahikai fo tuti meroaso Kristusifo.

³ Todonie mewebonggoi tonanai nina? Reantenang meroaso Yesusi fo, Nuaninu Mirarebana foi dohong mea mewaworu ampa. Wape todoni fino metawing ne nanai aha we mene-mitawangno mantaung mea mene mambiriufu aha ninai?

⁴ Fi kiaio mesodairia nani, ambori wifiea kahaia ne? Wiro tonana kaha!

⁵ Allai dohong Nuaninufoi we mea ampa tuti niari fitantuma bitoya na mea ampa. Allai niari finanafo we metohong kariri Hukumi Musai foi ete we metarami Kaiwo

Mahikai fo tuti meroaso Kris-tusifo ne?

⁶ Mearomio Abrahami na fafongfa, kariri fianai dotu na Allai ne Kaiwone tonina: "Abrahami yoaso Allai tuti na ne yoasoai nanai, Allai detori we inon-tarai enerorong mesi dine."*

⁷ Ampafe mewaitawang finina, mano eroaso Kristusifo ansaino Abrahami ne riria disa tera ne.

⁸ Na fafongfa Allai enetitua-tai ampa we ambori niari inontarai Yahudi kaha fosa ebeng riati aha na eroasoa fo. Nanai wedaya na Kaiwo Mararebana fo, Allai medu Kaiwo Mahikai fo fafong we Abrahami, deyo,

"Na wau ambori imoangno kaiwasa fuba nunei kiai ki."*

⁹ Abrahami inontarai yoaso Allai dine, ampafe Allai mioani. Tonanai kontai we inontarai eroasoa nesa kiai, we ambori Allai mioansa ria Abrahami ki.

¹⁰ Inontarai enemitawang Hukumi Musai fosa mani, inontarai nanisa esodai ne karirafo weruai. Weo na Kaiwo Mararebana fo dotu deyo,

"Inontaraio dohong kariri fi-anai aino dotu na buku Hukumi Musai foi na mai kaha mani, sodai ne karirafo weruai."*

¹¹ Ampafe kasau ampa we wiros Allai deto manei den-teng riati aha na dohong kariri Hukumi Musai foi

nani kaha, weo kaiwofo dotu tofino:

"Inontarai mano mesi dine, minohi darang na ne yoasoafao."*

¹² Wape mano yurai we mesi na Allai arongreafo na dohong kariri Hukumi Musai foi mani, enetawang te na fi mantauni niari fo terai, wiros na yoaso Kristusi fo kaha. Mae na Kaiwofo dotu deyo, "Mandoni dino enetawang na dohong kariri Hukumi Musai foi we ambori wedayari mesi na Allai aron-greafo mani, i minohi darang nano ne dohong kaririai na mai pari fo."*

Mae mandoni kontai wiros wemambiriw we niari kaririai na mai kaha.

¹³ Tata kiai tamai we tasobu aibooi karira paria fo na Allai, weo tato-hong kariri ne Hukumifoi na mai kaha fefe. Tonanai ki wape Kristus feriri tata, amani kia aiboi kerira pari nani weru tata tuti mantauni sodairi. Na tonanane Kristusi feriri tata ambori takaharai weru aiboi mararehao Hukumifoi deinawi foi. Weo Kaiwofo dotu kariri Kristusi ne sobu aiboi we tata foi, deyo,

"Mandoni kontaio sawai mireha na aifoi mani, wenani sodai ne karira pari foi."*

Ampafe na rahidao Kristusi sawai mireha na aio aitaba foi, yiwang tata we sodai ai-boio tasobuai na Allai fo.

* 3:6 Kejadian 15:6 * 3:8 Kejadian 12:3 * 3:10 Ulangan 27:26 * 3:11

Habakuki 2:4 * 3:12 Imamat 18:5 * 3:13 Ulangan 21:23

¹⁴ Kristus Yesusi feriri tata tonanai, ambori na i, moangno Allai deretawanai we Abrahamia fo, inontarai Yahudi kaha fosa esobuai kontai. Na tonanane mano taroasoai we Kristusi feriri tata ne, tasobu Nuaninu Mirarebanaio Allai dereraia fo.

Allai ne Hukumi dohonai we Musai fo wiro wedaya kaiwo Allai dererai we Abrahamia fo nai kaha

¹⁵ Doroi meaine! Fio yeo imadurai aha ninai, iriwansoai na fio tasobuai na rahida neungfe ne. Amani tonina: masino manea eroa ruhiae we fiae tuti ene eroa ruhiae nanai enari na surati bei, ehamang kaririai tuti ewecapi na maia. Nana mani mandoni kontaio wiro wemambiriw we deiaya ne kaiwo arerai tonana fo kaha ete medu tuba weai ahang kaha.

¹⁶ Allai ne dererafo, mantauni dino niari ne, tuti dohonai we Abrahami tuti ne ririafoi ne. Mewati! Na Kaiwo Mararebana fo, wiro soi deyo, "...tuti we Abrahami ne ririafosa," nana mani we ne ririafoi sentenang. Wiro soi tonana kaha, mae soi deyo, "...tuti we ne ririafoi." Ampafe we ne riria mansiari, amani Kristusi.

¹⁷ Fi imadurai nani mani tonina: Allai ne Kaiwo Arerai nanai niari kawurua wecapi tuti watai ampa. Paria defuina piaura weru awa piareya sura (430) akawuru wori arahio dohong ne Hukumifoi ria Musai fo aha ki. Wape Hukumi nanai wiro wemambiriw we deiaya ne kaiwo derera fafong fo ete

fiating ne kaiwo dereraio niariria wiatai nani kaha. Bereri mae, ne Kaiwo Arerai we Abrahami nani todoni kontai wetarai ki.

¹⁸ Weo masino Abrahami ne ririafosa todoni kontaio etohong kariri Allai ne Hukumi dohonai we Musai foi na mai ambori esobu moang nanai mani, finanai wiro weneung na kaiwo derera fo ahang kaha mae na Hukumifoi terai. Wape tonana kaha mae, Allai dohong ne bengfo arora we Abrahami, amani mioani tuti ne ririafosa na ne kaiwo derera fo.

¹⁹ Tonana mani we fianie, Allai dohong Hukumi nani we Musai e? Hukumifoi dohoni we ambori na Hukumi nani deinawiai kasau we inontaraine tata weo tatohong roaing Hukumifoi. Ampafe Hukumi nani wemambiriw paria sobu Kristusi, amani Abrahami ne ririao Allai dereai weia foi. Tuti Hukumifoi mani Allai demi we-waifosa etohoni we Musai, tuti Musai nani doa rahang Allai tuti inontarainesa we dohong ne Hukumifoi we kaiwasafoi.

²⁰ Ampafe rabuang bo Allai dohong ne Hukumi we kaiwasa ne mani, dohoni ria mano doa rahangna manei, wape rabuang bo dohong ne kaiwo arera fo we Abrahami fo, wiro sera we medurai ria inontarai manei kaha, mae mantauni dino medurai terai we Abrahami ne.

²¹ Ampafe tonana mani, Hukumio Allai dohonai we Musai foi nani wiro dapa Allai ne kaiwo dererai we

Abrahamia foi kaha. Mae yoa weai paria. Weo masino Hukumifoi wemambiriw we feriri inontarainesa mani, inontaraine emasi ria Allai aha fo na etohong kariri te Hukumifoi, wiro na eroasoaf kaha.

²² Wape kariri soi na Kaiwo Mararebana fo deyo: Inontarainesa enayai kai na sasari rorong foi, ne tarai kariri enayai na aitamu rorong. Ampafe fianai aino Allai dererai we dohonai we inontarainesa na eroaso Yesus Kristusi fo, mano eroasoai nanisa ambori esobuai.

²³ Fafongfa, na rabuang bo tataroanso Kristusi kaharai fo, tarurai we tatoohong kariri Allai ne Hukumifoi, tuti Hukumi nani yutawang tata ambori ne tarai kariri tanayai na ne aitamu rorong fo, tuti tonanai pariao rahidao tataroanso Kristusi tuti taroasoi.

²⁴ Ampafe Hukumifoi deitawang wedua tata pariao Kristusi da ma tuti Hukumi nani kontai wiwiang tata ambori tabeng ria Allai aha na taroaso Kristusi fo.

²⁵ Wape rabuang boninia mani, rabuang bo taroaso Kristusia dine, ampafe Hukumifoi wiro deitawang wedua tata aha kaha.

Tawewoming we Hukumifoi aha kaha, mae Allai niari tata we ne arikang di tata

²⁶ We mea kiai mani Allai yuai mea we ne arikang ampa, weo meroaso Kristus Yesusi fefe.

²⁷ Weo mewebaptisi na Kristusi wonongfo ambori

meweinontarai merariati di mea, tuti meweboyari riati ampa.

²⁸ Na ne toninane memasi kiai na Allai urengreaf. Weo Yahudi ete, Yunani ete, woming ete woming kahai, mang ete wiwing, mea memasi kiai. Weo na Kristus Yesusi mea kiai meweboyari.

²⁹ Tuti masino Kristusi ne mea kiai, nana mani deinawai we Abrahami ne riria di mea. Tuti tonana mani mene mambiriw we mesobu fianai aino Allai dererai we Abrahami ne riria nania fo.

4

¹⁻² Imadu mau yeo, rabuang bo arikangne ne mambiriw we sobu fio watai na tamang ne kaiwo arera foa foi, wiro fiabaia ne defuina mai we sobu finana kaharai mani, inontarai siaio tamang yoasoi manei andino deitawang wedua finanai, paria arikang nani fiabai ne defuina mai. Tamanai ne fi minohi tutira fo kiai ne fi fine, wape ketui ampafe ne tarai mai kariri woming manei terai.

³ Tonanai kontai we tata, tane tarai kariri arikang nani. Rabuang bo wiro tafabai kaharai fo, amani taroaso Kristusi kaharai fo mani, tane tarai kariri arikang nani kontai, toyarine tane tarai kariri woming we tatoohong kariri nunei ne hukumi karira tuti ne koangnei kiai.

⁴ Wape tete rahida Allai derera fo maia fo, demi Kaisungfoi to nunei meu. Kaisung nani, wiwing manei

minohi tutiri tuti weinontarai Yahudi ambori dohong kariri Allai ne Hukumi dohonai we Musai foi.

⁵ Demi tonanai meu fo ambori feriri inontarainesa weru Hukumi Musai foi ne mambiriufu, ambori tata kontaio Allai sahu tata we mantauni ne arikang.

⁶ Tuti sahu mea we ne arikang nanai wedaya mani demi ne Kaisungfoi Nuaninufoi meu, sensoni taenemiro-rongnei, tuti Nuaninufoi medu na taborominei we Allai deyo, "Daie,* Daiwo!"

⁷ Ampafe mea mani, wiro mewewoming we nunei ne hukumi karira tuti ne koangnei ahang kaha, mae Allai ne arikang di mea. Tutti Allai sahu mea we ne arikang nanai doni dohongno fianai aino meinenamai we ne arikangfosa we mea ninai.

Paulusi arokuayai we inontarai Galatia fosa

⁸ Fafong nanai wiro metaroanso Allai kaha, ampafe mesomi we sengno wetarai kaha fo, amani mewewoming wesa.

⁹⁻¹⁰ Wape ninaia mani metaroanso Allai ampa, ete mai sewa mani, madurai we Allai deroanso mea ampa. Ampafe we fianie metarabera mea we fi kerira wetarai kaha foi tuti koang nunei nina, amani metohonsua rahidao kariri koang Yahudi foi mani esomi wea fo, amani rahida, embai tuti defuina etatorai tuti esomi wea fo. Wape koang nani wiro wemambiri we

feriri mea kaha, ampafe we fianie metarabera mea we mewewoming we koang fafong nani aha wei ne?

¹¹ Arohukuayai we mea, imameatai we dohonao fianai aino irurai we mea wea fo wefiea kaha fe.

¹² Doroi meaine! Yutang mea paria, we ambori mene tarai kariri yau na metohong toa wa. Weo yau kontai nehu tarai kariri mea ampa, amani Yahudi di yau wape wiro irutawangno Hukumi Musai foi ahang kaha. Raminde nanai menarisua yau na mai paria.

¹³ Enehutituai mearomiporoha kaharai, kariri fianai aino wedaya yau na reantenang yontai to mene kataiwai mau iwuwu Kaiwo Mahikai fo we mea fo. Fi wedaya mani rabuang bonanai imaninang.

¹⁴ Na rahida nanai, nehu maninang nani miraba paria we mea, wape wiro mene-mirorongwai kerira we yau kaha, mae metamang we yau na mai, toyari metamang we Allai ne wewai manei, ete toyari metamang we Kristus Yesusi mantauni.

¹⁵ Rahida bonani mefaraise paria we ne mai mesobuai nanai. Wape ninaia mani, mene mafaraise nana aidoni ampa? Iwaitawanai we rahida nanai masino meteyo mafating meuremiwa we metohonai we yau, we fiainawiai kariri menemiwawu fuba we yau wa mani, metamang ahang

* **4:6** Na Yahudi ene kaiwo Iberani mani, Abba, nana mani, Dai.

kaha mae metohong kariri-aia finanai.

¹⁶ Wape tofino, ninaia mani menemitiuai we iweaiteta we mea weo yeinawi ne wetaraifo we mea fo ne?

¹⁷ Inontarai siai fosa erurai paria we eha we mene-mirorongwai ambori sau wesa, wape enemirorong mesi kaha. Weo emaya we taweboyer aha fanai, ambori mefaraise riasa tuti merurai paria we mera riasa.

¹⁸ Masino merurai paria tonana mani, mahikai, wape merurai te we fi beng feai, tuti merurai na fi beng nanai pampang, dohonao menari terai na rahida inayai na nanai ria mea fo tera fanai.

¹⁹ Nahu arikang bohiwa meaine! Ninaia mani metohong yau arohukuayai paria we mea, amani isodai dadirafo ne tarai toyari wiwinsanaio sodai dadirafo, na rahida bo deyo minohi fo. Dadira nanai isodairai pariao Kristusi ne niari toa fo wati parai na mene metohong toa wa kontai.

²⁰ Enehurorongnei dohong weai paria we inayai rahang mea ambori imadu na rawahufui fanahang we mea aha, weo iserawawera fianai aino yeo inari we mea aha ne!

Hagari tuti Sarai uwe-fiainawiai kariri todoni taweinontarai na Hukumi-foi di tata aha kaha, mae taweinontaraio tasobu Allai ne Arerafo di tata

²¹ Doroi mano meteo metohong kariri Allai ne Hukumine meaine, metarami kariri nehu kaiwone wo! Yeyo imadurai kariri fianai aino tarai dotu na Hukumi Musai foi nani ne.

²² Na kaiwoariri nanai deisaharai weo Abrahami ne kaisung mandu. Arikangfo suru manei inana mani woming dine, wonong fino Hagari, tuti manei aha mani inana mani wiwing kesau dine, wiro woming dine kaha, wonong fino Sarai.

²³ Arikang mano na wiwing woming foi, saubaunung kariri inontaraifo ene etawiafo. Wape arikang mano na wiwing mano kesau foi mani, saubaunung kariri Allai dererai we Abrahami nania fo.

²⁴ Wiwing nini suru mani uneta we kaiwo arerai beru amani, Hagari neta we kaiwo arerai na uai Sinai fo, amani Allai ne Hukumio dohonai we Musai fo, tuti ne arikangfosa etaubau enumi we arikangno woming.

²⁵ Ampafe Hagari mani neta we uai Sinai na nu Arapi foi dine. Iwefiainawiai kariri bendari Yerusalem fuinini tuti ne kaiwasao ninaia mani ewewoming we Hukumi Musai foia fosa.

²⁶ Wape Sarai mani yi-wanso Yerusalem na ro-rafaisi, amani Yerusalemio kesau foi, wiro wewoming we Hukumi Musai foi kaha. I mani tainamifo dine.

²⁷ Weo na Kaiwofo dotu deyo,

“Wiwingno kurawahi, bawing na ea kaha wa

waune,
puraise to!

Mano wiro numurainso
amamuina pirahai we
bawing kaha wa wau,
puraise tuti mukai to!

Weo wiwing mano munohi
koburuwa wau,
ambori nemu arikang
bitoya sewa weru
wiwing mano ne
mangfoi.”*

²⁸Doroi meaine! Mea mani Allai ne arikangno metaubau menumi kariri Allai ne kaiwo derera foa di mea. Na tonanane, mene tarai kariri Isaki.

²⁹Rabuang bonani arikang mano saubaunung kariri inontarai ne dawiafo, niari kanggani mano saubaunung kariri Allai Nuaninufoi ne mambiriufoi. Rabuang bonini tonanai kontai.

³⁰Wape fianai aino dotu na Kaiwo Mararebana fo ne? Na kaiwofo dotu tonina:

“Bata wiwing womingwai
tuti ne arikangwai,
weo arikang nani wiro
sobu fio wawafoi
minohi tutira fo ria
arikang mano saubaunung
na wiwing mano
kesau foi kaha rai.”*

³¹Ampafe doroi meaine!
Tata mani wiro arikang na
wiwing woming foi nani di
tata kaha, mae arikang na
wiwing kesau foi di tata.

5

*Yesusi sawing tata
tahasau weru Hukumifoi*

* 4:27 Yesaya 51:4 * 4:30 Kejadian 21:10

*ampa, ampafe metoaria mutu
na mehasau nanai*

¹ Ninaia mani Kristusi feriri tata ambori tahasau weru marabao Hukumi Musai foi dapa tata wea fo ampa. Ampafe metoaria mutu na mene mehasau nanai, wiro metarabera mea we mewewoming we Hukumifoi aha fanai.

² Mearomioaifa! Yau Paulusi yeretawang mea tonina! Amani metawai we memasi na Allai arongreafo na mewesunati kariri ne Hukumifoi mani, Kristusi wefieai we mea ahang kaha.

³ Yeretawanai tonanai aha we mandoni kontai, weo mandoni dino dawiai we wesunati mani, todoni kontaio niari kariri fi kiai na Hukumi Musai foi na mai kontai.

⁴ Mano merurai we mebeng ria Allai na metohong kariri ne Hukumifoi mea, mene meweboyari ria Kristusifo futuayaia finana. Tuti na tonanane mehurumitare fi bengno Allai dohonai arora we meara nanai.

⁵ Wape we amea mani, ametamang tuti amene-mitawanai we na Allai Nuaninufoi ne fiata amea we ameroaso Kristusi fo, Allai deiai amea we amemasi na urengreafo aha.

⁶ Weo tawebboyari ria Kristusi mani, tawesunati ete bereri teaio, wiro wefieai ahang kaha. Mae fi fuba pari sewa ne mani, taroaso Kristusi, tuti taroasoai nanai tateinawiai na taenemi-wawu inontarai siai fo.

⁷ Raminde nanai mururai we metohong kariri Allai ne dawiafo na mai paria, ne tarai toyari we ewawoai we emitio pisa, mea kontai memito tonanai na mai paria. Wape ninaia mani, mandoni dino wedua meara memito na mai ahang kaha nina, amani metohong kariri kaiwo wetarai fo ahang kaha?

⁸ Aunau kerirao wedaya mea tonana fo, wiro da na Allai mano sahu mea kawurua foi kaha.

⁹ Weo, "Ragi kutu fuba kahai ki, wedaya tepungno fiati foi dautai sentenang." Tuti ene kaiwo karira fo ne tarai toyari ragi.

¹⁰ Tonanai ki wape iroasoai we wiro menemitiuituai siai kaha rai, weo tawebonyari ria Kristusi ampa. Tuti mandoni kontaio enari kanggani mene menemitiuitafo tonana mani, ambori Allai dohong aibooifo wesa ki.

¹¹ Doroi meaine, manea eteyo yauno yeunau inontarai we enari koang sunati foi kariri Hukumi Musainani. Wape masino inari tonana mani, we fianie paria sobu ninai inontarai eweaiteta we yau tuti enari kanggani yau ninai? Ampafe masino yeunau tonana mani, kaiwo iwuwuai kariri Kris-tusi we mireha na aitabafoi wiro wedaya aiteta kaha.

¹² Tuti kariri mano enari kanggani mene menemitiuitafo tonana fo, ne mahikai sewa mani, wiro ewesunati tera kaha mae, ehutu ene

pongfo beyari kontai.

¹³ Doroi meaine! Allai sahu mea kawuru ampa we inontarai mehasau. Wape dohonao mene mehasau nanai, wedaya mea we menari kariri fi karirao menemirorong wesasari wai dohong wea fo fanai. Mae mehasau nanai todoni kontai wedaya mea we menemiwawu wawera mea tuti mafata wawera mea.

¹⁴ Allai ne Hukumifoi sentenang weneung na kaiwo rabuang beyari ninai amani: "Todoni kontaio enemuwawu inontarai siai kariri enemuwawu bera mantaung wau wa."*

¹⁵ Wape masino meharari wawera mea mani, metanansiau we ambori mewedaya wawera mea kiai mesodai ne karirafo ruhiae pariao meworu ki.

Fio Allai Nuaninufoi dawi wea fo, tuti fio inontaraine etawi weai na enemirorong wesasari fo

¹⁶ Ampafe yeyo imadu fininai we mea, todoni kontai metawing mene taraiwai we Allai Nuaninunei wiwiaing te mea, tuti ambori wiro metohong kariri fi karirao menemirorong wesasari wai dohong we menari fo kaha.

¹⁷ Weo menemirorong wesasari wai fi dawi wea fo masi kariri Allai Nuaninufoi ne dawi wea fo kaha, tonanai kontai we fio Allai Nuaninufoi dawi wea fo, masi kariri fio menemirorong wesasari wai dawi wea fo kaha. Mae

* **5:14** Imamati 19:18

fi beru nanai urapa wawera-haifa. Nana mani metohong kariri fi menemirorong do-hong we menari fo kaha.

¹⁸ Tonanai kontai masino Allai Nuaninufoi wiwiaing mea mani, wiro Hukumifo ne mambiriufeai we wedaya mea kaha.

¹⁹ Fi karirao inontarai en-emirorong wesasari foi dawi wea fo wati parai na fianai aino enari fo, amani enari maninawa kerira foi toyari etohong we wiwing ete mang siasi, fi werarika fo, tuti enari emaninawa siai fo, mae ema-maya weai kuteai kaha.

²⁰ Esomi we aririwang, eha rawang, enemirireu waw-era, esawasa, enemirorong pirahai we inontarai, ehasou fuba funomai, ewati we mantaunsa terai, eweboyari kaha tuti etoa rahana kaha.

²¹ Eteimameatai, emayeru biri, efaraise we enari muniara kerira, tuti enari fi siai wei fo. We fi tonina ne, yeretawang mea aha, kariri raminde yeretawang mea weai kawurua fo. Inontaraio enari ne tonana fosa mani, Allai wiro yoa wesa we eminohi na ne Mananu rorong fo kaha.

²² Mae fi maio Allai Nu-aninufoi wedayarai fa mani, taenemiwawu wawera tata, tamararising, tanumiru-ainso Allai ne maifo na taen-emirorongnei, tatawang tata tuti tawarami rirora funomai we inontarai, taenemirorong denteng we inontarai, tuti tato'hong kariri fi bengno tateyo tanari fo na mai.

²³ Tamanang tuti tawe-mambiriuw we tawaitawang wedua tata. Finanai kiai wiro hukumi bei deiweduara kaha.

²⁴ Inontarai mano Kris-tus Yesusi yuaisa we ne inontaraia fosa, esarai ene enemirorong wesasari foi tuti fi karirao dawi wea fo ampa, ne tarai kariri epahui na aitabafoi kontai.

²⁵ Allai Nuaninufoi niari tata tawaworu ampa, tuti wi-wiang tata, ampare todoni kontaio tarariati.

²⁶ Wiro taenemirorong dedai fanai, tuti wiro taw-e-daya tata ambori tamamuna wawera tata fanai, tuti taenemirorongnei pirahai wawera tata fanai.

6

*Dohonao mewarami tafa
we mefata wawera meafe*

¹ Doroi meaine, masino manei obui we dohong sasarifea, nana mani mano Nuaniu Mirarebana foi sensoni meara wa mea, mewiwiang wenani to rang wetarai foi aha. Menari finanai na memanang, wape metanansiau we do-honao mantaung mea kontai metawai we sasari tonanafo fe.

² Todoni kontaio merurai we mefata wawera mea na mene maraba mesodaira wa, ambori na tonanane meto-hong kariri Kristusi ne Huku-mifoi.

³ Masino manei deyo i mani inontarai fuba dine, wape wiro inontarai tonana dine kaha, wenani sofa berahi.

⁴ Mansiari-mansiari deti bera mantauni we ne niari toa fo, niari beng ete bireri e? Ampafe niari beng mani, bioi arong nanai. Wape dohonao titua weai na inontarai siai ene enari toa fo fanai.

⁵ Weo todoni kontaio mansiari-mansiari sodua ne niari toa fo.

⁶ Mantei dino sobu aunaau kariri Kristusi ne Kaiwofo, todoni kontaio fi kutu fianai aino Allai dohonai wei fo mani ambori detorai we ne mantaunaufoi kontai.

⁷ Dohonao metofa bera mea we Allai fe. Weo Allai mani wiro tameikanggani kaha. Fianai aino tatanang fo, nanai aino ambori tatetinaifa ne.

⁸ Masino manei sanangfi kariri mantauni enerorong wesasari foi ne karira niari toa fo mani, ambori detingno mararehafoi na ne karira niari toai nanai ki. Wape mano sanangfi kariri Allai Nuaninufoi ne wiwiaingfo mani, ambori deting numanufo na Allai Nuaninu nani ki.

⁹ Ampafe dohonao tawarami tafa we tanari ne bengfo fanai, ambori rahida bei tateting fi tanari nanai ki.

¹⁰ Ampafe tasobu rahida we tatarang nina mani, tarurai we tanari ne bengfo we kaiwasanei kiai, reantenang pari mani we tane doroi eroasoa nesa.

Wefuiai Paulusi deretawang jematifoi kariri sunatifoi, tuti dohong mahikai wesa

¹¹ Meuremifo nayai na kaiwo mantaung yau isoi

terai na hurupi babai turehi nina.

¹² Inontaraio esera we ewewonomi fiabai na nunei mani, inontarai nani saino erurai we etanggoa mea menari kariri sunatifoi ne. Enari tonanafo we ambori inontarai Yahudi fosa wiro enari kangganisa we kaiwo kariri Kristusi ne aitabafoi fanai. Weo enemitituai eroaso Kristusi we feririsa terai na mireha na aitabafoi, tuti ewesunati kaha mani, Yahudifosa enari kangganisa rai.

¹³ Wape inontarai mano etohong kariri sunatifoi sa kontaio, wiro etohong kariri Hukumi Musai foi na mai kaha. Mae etawiai we mewesunati, ambori eboi earomi we ewedaya menari kariri ene kaiwofo nanai.

¹⁴ Wape yau mani, imaya we iboi arohu we fiea kaha, mae we tane Seng Yesus Kristusi, mano mireha na aitabafoia foi, terai. Weo mireha na aitabafoi, yau kontai imereha na aitabafoi riati, doni enehurorong dohong we fi nunei ahang kahai, tuti nunei kontai dohong fieai we yau ahang kaha.

¹⁵ Tawesunati ete bireri kontaio totea kaha. Fio fuba sewa ne mani, tawaworu na Kristusi.

¹⁶ We mano etohong kariri fi fuba sewa nani fosa kiai, tuti Allai ne inontarai Israelio enemitituai tonana konta fosa, enehutawanai kadono Allai ambori wedayasa enumiruainso ne maifo tuti enewawufo.

¹⁷ Wefuiia mani, do-

honao mane wedaya yau
arohukuayai aha fe, weo
mewaitawanai na pesai fari
bitoya mewatioai na nehu
tarainei deinawiai we yau
mani Kristusi ne inontarai di
yau.

¹⁸ Doroi meaine, kadono
tane Sengno Yesus Kristusi
dohong ne bengfo arora we
menumianinuwai. Antu!

Kaiwo Anatu Na Paulusi We Jemati Na Efesusi

Kaiwo dedung we Efesusi

Kaiwo anatu ne Paulusi soi denatuai we jemati na Efesusi, na rahida wiatai na aitamu rorong foi we yoaso Kristusifo. Tarahio kaiwone soi na bendari Roma. Kaiwo ninai soi denatuai we deretawansa kariri todoni Allai ne dawiafo we nunei tuti rorafaisi we weboyari na Kristusi tuti Kristusi wenunggamiei wesa fo (1:10). Kontai we deisaharai we Allai ne inontarainesa kiai we ambori ewaitawanai tuti etohong kariri Allai ne dawiaio dedai mirarebana fo nani, amani ne dawiai we fianduhi ne inontarainesa kiai na Yesus Kristusifo.

Na kaiwo reantenang na kaiwo anatu ninai Paulusi deisaharai kariri todoni inontaraine eweboyari ria Kristusi nanai kawariai toa fo. Raminde nanai inontarai Yahudi fosa eroaso Allai tuti eteyo etohong kariri I na mai, na reantenangfo pariao rahida bonini. Wape eteiaya Yesusi weSeng na Allai dine. Wiro emaya we eroasoai we Yesusi mani Kristusi dine tuti Mananuo Allai dereria foi dine kaha. Wape ninaia mani Yahudi manea eroaso Yesusi weSeng tonanai, ampare ato kariri mano eweYahudi fosa ete mano eweYahudi kaha fosa ahang kaha, weo ninaia mani ewejematifoi kiai, amani mano eroaso

Yesusi weSengno da na Allai we weMananu ne.

Ampafe deisaha kariri todoni Allai diri ne inontaraine tata fo, kariri todoni Allai, na Yesusi Kristusi, ne Kaisungfoi, deiai tane sasarinei tuti niari tata tahasau weru sasari rorong foi fo, tuti todoni Allai dohong Nuaninu Mirarebana foi meu we fiainawiai kariri ne dererai nani fo.

Kaiwo sua aha na kaiwo anatu ne mani, medurai we mano etato ne kaiwo nesa we ambori eminohifo eweboyari, ambori ene eweboyari we inontaraio eroaso Kristusifo kawariai na mai. Ambori watioaia kasau we Allai ne inontaraine ene eweboyarifo, we eweboyari na Kristusi fefe. Na kaiwo neta weafo Paulusi medu kariri finanai. Soi deyo: to-yari inontarai, we jematinei mani ne taraifoi dine, wape Kristusi dino wenunggamiei wei ne. Ete toyari munu kamieifoi wekamieie reantenang foi mani Kristusi dine, ete toyari wiwing mandirau manei we Kristusi mani mangfoi dine.

Paulusi soi kaiwone nina fo, enerorongfoi fituayai paria, we aro Allai ne warang rirora funomaio deinawiai na Kristusi we inontaraine tata fo. Ampafe deinawiai na ne kaiwone we enerorongfoi wiwua sopai na dohong mahikai tuti fiai Sempaisi fo. Fi kiaio Paulusi niuruainsoai we medurai tonanafo, detioai na todoni Kristusi dohong ne taraifoi mireha we tata fo, todoni deiai tane sasarinei fo, todoni

enerorong denteng we tata fo
tuti todoni mirarebanaf.

Kaiwo na suratinei deto kutuai toninai:

1:1-2 Kaiwo fafong.

1:1-3:21 Allai ne awiafo we
inontaraio taweboyari
ria Kristusi ne tata.

1:3-23 Allai mioang tata
paria weo taweboyari
ria Kristusi.

2:1-3:13 Allai niari
tata tawaworu, tuti
wedaya Yahudi tuti
Yahudi kaha fosa
eweboyari.

3:14-21 Paulusi dutang
we Sempaisi, am-
bori tawaitawang
kariri Kristusi we
enewawufo fuba we
tata fo.

4:1-6:9 Taminohi na mai
tuti tatohong beng kariri
inontarai Kristen.

4:1-16 Taminohi na mai
tuti taweboyari.

4:17-5:21 Tafotou tanari
karira tuti tanari ne
bengfo terai.

5:22-6:9 Kaiwo aunau
fea.

6:10-20 Inontarai Kristen
nesa ene tarai kariri rai
mamuna fosa tuti ene fi-
mamunafo.

6:21-24 Kaiwo kife.

Mahikaifeai

¹ Weo Allai ne inontarai
memararebanai, amani
inontarai meraria Kristus
Yesusi na mai wa mea, na
bendari Efesusi. Kaiwo
anatu ne na yau Paulusi,
Kristus Yesusi ne rasuli kariri
Allai ne dawiafo.

² Kadono tane Dai Allai tuti
Seng Jesus Kristusi, urohong
une bengfo arora we mea

tuti urohong mea menumiru-
ainso ne maifo.

*Na taweboyari ria Kristus
Yesusi, Allai mioang tata na
moangno mararebana fo na
rorafaisi*

³ Tafiai Allai mano tane
Seng Jesus Kristusi tamana, weo
na mano ewemambiru
tuti eru mananufo na roranei
sa euremireafo, mioang tata
na moangno mararebana fo
kiai tantenang, weo taweboyari
ria Kristusifo.

⁴ Moanai tasobuai nana
mani, aininai. Wiro Allai
niari nunei kaharai mae,
diri tata kawuru ampa am-
bori taweboyari ria Kristus
Yesusi. Diri tata tonanafo we
ambori tamararebanai tuti
ambori tamai na arongreafo.

⁵ Allai enewawufo wedaya
doni kiutuai kawurua we
yuai tata we ne arikang terai
na Jesus Kristusi, tuti nanai
aino dawi weai tuti piraise
paria we niari ne.

⁶ Ampafe tafiai Allai, weo
na ne sambewaraio dedai fo
dohong ne bengfo arora we
tata, tuti dohonai fuba paria,
weo taweboyari ria Mano
enewawuti foi.

⁷ Weo na Kristusi ne
rikafoi, Allai feriri tata
tahasau, na ninai tuti to
fong aha, tuti warasaya
tane sasarifoi, mai kariri ne
bengno dohonai arora we
tata tantenang.

⁸ Dohong ne bengfo fuba
we tata tonanai na ne awaifo
tuti ne enetituaitafo kai.

⁹ Na mantauni ne daw-
iafo terai, Allai piraise we
deinawiai we tata fianai
aino enetituaitai we niari

fo, amani fiofafong nanai dediwara fo. Kiutuai we fi enetituitaitai we niari nanai, ambori niari kaririai na Kristusi.

¹⁰ Fi deyo niariri nani mani, fianduhi finini kiai we boyari, amani ne na rorafaisi kontai na nunei, tuti Kristusi andino wenunggamiae we finani kiai ne. Tuji tete ne rahidafo mai mani, finanai ambori Allai niari ki.

¹¹ Fi kiaio Allai niariri foi niariri kariri ne dawiafo tuti kariri fianai aino medura fo. Na reantenang pari fo diri tata kawuru ampa, weo dawai we ambori yuai tata we ne inontarai, na taweboyari ria Kristusi fo.

¹² Dawiai we ambori mano na reantenangfo taene-mitawang Kristusi ne tata, todoni kontai tafiai Allai we ne sambewaraio dadai fo.

¹³ Mea kontai, na Kristusi, Allai sahu mea we ne inontarai di mea ampa, na rahida metarami ne Kaiwo wetarai fo tuti meroasoia fo, amani Kaiwo Mahikai kia fariri we mea fo. Meroaso Kristus ampare Allai dohongno Nuaninu Mirarebana foi we meara, kariri fafongfa dereraia fo. Nuaninu tasobui nani wefiainawiai kariri todoni tata mani Allai ne tata fo.

¹⁴ Nuaninu Mirarebana foi Allai dohoni we tata ambori na tonanane deinawiai tarai weo na rahida wana mani, dohongno fi kiaio dererai ampa we tata ki, na rahidao feriri ne inontaraine tata weru nunei. Tafiai Allai we ne sambewaraio dadai fo!

Paulusi ne nadio fiai Allai

we fi niari we jemati fo i fo

¹⁵ Nanai wedaya, na reantenang tarahuai we meroaso Seng Yesusi tuti menemiwawu Allai ne inontarai emararebana fesa fo nanai,

¹⁶ wi ro ifotou yohong mahikai we Allai we mea kaha, mae na yutanai we Allai fo, yutang tuti mea pampang.

¹⁷ Yutanai we ambori Allai, amani tane Seng Yesus Kristusi tamanai, tuti tane Daio dedai sambewara foi, dohong Nuaninufoi we mea. Nuaninu nani ambori dohong mea mesawai tuti deinawi Allai kasau we mea ambori metaroani na mai ki.

¹⁸ Yutanai kontai we Allai fiai menemituuitawara kasau, ambori mewaitawang fio menemitanai we mesobuai ria Allai mano sahu mea fo na mai. Ambori mewaitawang kariri todoni moana fuba Allai meinena mai we ne inontarai emararebana nesara fo,

¹⁹ tuti ne mambiriuo fuba paria we mano taroaso Kristusi ne tata. Allai ne mambiri nanai ne tarai toyari mambiriuo fuba

²⁰ niariri we Kristusi fo, amani ne mambiriuo duwiria suwi na marareha rorong foi aha fo, tuti dohong kadera mananu dedai foi wei we minohi riati na rorafaisi fo.

²¹ Kristusi ne wang mananu nanai dedai sewa wang mananu fuba na doni konta fo, na nunei tuti na rorafaisi, mananu mandoni konta foi, mano ewenunggamiae na doni konta fosa, mandoni

kontaio inontarai etatori foi, tuti mandoni kontaio sobu mambiri tonana foi, na rabuang bonini ete rabuang bo da aha ma foi.

²² Tuti fi fuba nini kiai, Allai wedaya ambori Kristus saha tawani na awengfo kiai na ne mambiriufu, tuti yuaisi ao wenunggamiei we fifiani kontai. Yuaisi kontai wenunggamiei we jematinsei kiai.

²³ Weo jematifoi mani Kristus ne Taraifoi dine, andino wedaya jematifoi mesi, tuti wedaya finini kiai mesi.

2

*Allai niari tata tawaworu
tutti tatarang tarai na Kristus
Yesusi*

¹ Mea mani, raminde nanai meroaso Yesusi kaharai fo ampafe mehatai waroi weru Allai, ne tarai toyari memarareha ampa, weo metarang na mene sasari rorong fo tuti metohong roaing Sempaisi ne Kaiwofo.

² Rabuang bo menayai na sasari rorong fo nani mani, metohong kariri nunei ne niari toa ne, tuti meraria Saminseni, mano wemananu we yuo nuaninu karira kiai na roranei ne. I mani nuaninu kerirao pariao rahida fuinini kontai wewora mano etohong kariri Allai kaha fosa enemirorongfoini fo.

³ Raminde nanai tata kiai kontai tane tarai toyaris, amani tato hong kariri fi karirao taenemirorong wesasari nei dohong wea fo, tuti kariri fi karirao tato hong wea fo tuti taenemitituaitafo.

Rabuang bonani tata mani, inontaraio tamasi we tasodai Allai ne kasou fuba fo di tata, mai kariri inontarai siai fosa.

⁴ Wape Allai, mano aroa fuba funoma foi, na enewawu funomai nanai, enewawu tata fuba paria,

⁵ donio na rabuang bo tane tato hong roaingno Allai fo wedaya toyari tamarareha na sasari rorong foi tonana fo, niari tata tatarang aha ria Kristus. Ampafe tawatioai we na Allai ne beng dohonai arora fo terai, feriri mea tonanai.

⁶ Tuti na taweboyari ria Kristus Yesusi fo, Allai duwi tata riati aha, tuti dohong tata taminohi riati na ne Mananufo na rorafaisi, na mano ewemambiri tuti eru mananufo na rorafai sa earomireafo.

⁷ Allai niari tonanafo ambori na rabuang bo da aha ma fo, inontaraine ewati todoni Allai dohong ne bengfo arora fo fuba tonanafo. Ne beng nanai deinawiai na enerorongfoi denteng we tata fo, na Kristus Yesusifo.

⁸⁻⁹ Weo Allai dohong ne bengfo arora we tata nanai wedaya feriri mea na meroaso Yesusi fo. Fariri mesobui nani, wiro fio merurai na mantaung meara mesobua fine kaha. Mae Allai fi dohonai arora we mea fine. Ampafe mandoni kontaio wiro fiai bera mantauni we finana fanai.

¹⁰ Weo tata mani Allai dino samu tata na mai ne, tuti niari tata na Kristus Yesusi we ambori tanari fi

beng fo, amani fi bengno meinena mai kawuru we tata we tanaria fo.

Kristusi fianduhi tata tawebboyari

¹¹ Tonana mani, mearomio kariri mea we raminde nanai mene tarai toa fo, amani na jematiwai meaino Yahudi kaha di mea fo. Inontarai Yahudi fosa esahu mantaunsa we inontarai ewesunati disa, esahu mea we inontarai karirao mewesunati kaha di mea. (Wape ea mani ewesunati na ene tarai terai, kariri ene koangfo, wiro na enemirorongfo tuti na tarai kaha.)

¹² Mearomioai weo rabuang bonani mani, mene pari Kristusi, tuti mea mani wiro Allai sahu mea we ne inontarai Israeli kaha, mae inontarai aisei di mea, amani mehontai kontai na Allai ne Kaiwo Areraio dererai we ne inontarai Israeli fosa fo kaha. Meminohi na nunei nina mani, wiro mesomi we Allai kaha tuti menemitawang fieai kaha.

¹³ Wape ninaia mani, na meweboyari ria Kristus Yesusi ne, mano raminde nanai mehatai waroi weru Allai ne mea, ninaia mani na Yesusi ne rikafoi wedaya mehefang Allai ampa.

¹⁴ Weo Kristusi mantauni dino dohong ne maifo we tata ne. Andino fianduhi inontarai Yahudi nesa tuti Yahudi kaha nesara eweboyari. Wore dedaio wedusa nei, amani wore wedaya eweaiteta wesa foi, Kristusi kifikangguni ampa.

¹⁵ Allai ne Hukumio dohonai we Musai foi tuti ne

fi biriu weai we inontaraine enari kariria fo, na Kristusi sawing ne taraifoi mireha fo dufi sayaraia nai ampa. Niari tonanai ambori inontarai ewerabuang boru nanisa eweboyari tuti eminohi ruhiae na mai, eweinontarai waworuo eweboyari ria Kristusi.

¹⁶ Tuti na ne mararehafoi na aitabafoi, fianduhi inontarai ewerabuang boru nanisa tuti kiasara eweboyari ria Allai ambori emasi na Allai aha, ampafe wiro eweaitata ahang kaha.

¹⁷ Tuti na ne da ma fo wiuwu Kaiwo Mahikai kariri ne mai nani we mea, mano meweinontarai Yahudi kahaio raminde nanai menayai waroi weru Allaifo mea, kontai we Yahudio ehefania fosa.

¹⁸ Weo na Kristusi, tata kiai, inontarai Yahudi tuti Yahudi kaha fosa, Nuaninu Mirarebana foi terai werang we tara to Dai Allai arong-greaflo.

¹⁹ Ampafe mea mani wiro inontarai aisei ete inontarai boriei di mea ahang kaha. Mae ninaia mani, mea kiai, Allai ne inontarai di mea kontai ria ne inontarai Yahudi fosa ampa, tuti yuai mea we ne inontarai na ne munu rorong fo ampa.

²⁰ Mano tarasoane tata, Allai biaung tata wemunu, ne tarai kariri manei biaung munu bei. Rasulifosa tuti nabifosa ewekamiai amangno biaung munufoi sauwi, tuti Kristus Yesusi mantauni dino wekamie reantenang ne.

²¹ Na Kristusi mani, samu tata wemunu boyari, amani taweboyari, tuti biaung tata tawemunu mirarebanao mesi we Sempaisi minohi nai ne.

²² Tuti na meweboyari ria Kristusi fo, mea kontai, Allai biaung mea ria inontarai siai fosara mewemunu we Allai; tuti na munu nani Allai niayai nai, amani Nuaninufoi niai nai.

3

Paulusi fi niari we Yahudi kaha fosa fo

¹ Nanai doni, yau Paulusi mano iwatai na aitamu rorong fe ninai we iwuwu Kaiwo Mahikai kariri Seng Kristusi we Yahudi kaha ne mea ne, yutang tuti mea we Allai pampang.

² Tarai we metaramioiai kawuru ampa kariri todoni Allai dohongno fi beng irufi wei ninai we yau, amani iwuwu kaiwo kariri todoni dohong ne bengfo arora we inontarai meweYahudi kaha wa mea.

³ Nana mani kaiwo werorong Allai dediwara fine, mae mantauni deinawiai kasau we yau na fibengno iwatatioiaia (tuti mewaitawanai weo itoi kuteai kariri nanai ampa).

⁴ Ampafe, na rahidao metato fio itoi nina mani, metafurai na mai tuti mewaitawang kariri todoni iwaitawang kaiwo werorong dediwara nanai na mai fo, amani kaiwo kariri Kristusi nanai.

⁵ Nafafongfa, Allai enetituitafo tuti ne dawiafo

wiro deinawiai funomai we inontarainesa kaha, wape dediwari na kaiwo werorong. Wape na fuinina mani deinawiai kasaua na Nuaninu Mirarebana foi, deinawiai we ne rasuli tuti ne nabi emamararebana nesa.

⁶ Tonana mani, kaiwo werorong dediwara fo mani ainina; amani na Kristus Yesusi ne Kaiwo Mahikai fo, amani ne kaiwo kariri feriri inontaraine tata na ne mararehafoi, wedaya inontarai Yahudi kaha fosa efanduhisa ria inontarai Israeli fosa eweboyari, tuti Allai sahusa ruhiae we ne inontarai terai disa. Tuti na eweboyari na Kristusi nanai, Allai ne kaiwo derera fo esobuai ruhiae, amani na eroaso Kristus Yesusi.

⁷ Na ne mambiriu fuba foi, Allai dohong ne bengfo arora we yau, amani yuai yau we mangfata we iwuwu Kaiwo Mahikai fo nanai.

⁸ Na Allai ne inontarainesa kiai ne, yauno ikatui pari sewa di yau. Tonanai ki, wape Allai dohongno ne bengfo arora we yau, amani mioang yau ambori iwemambiriu we iwuwu ne Kaiwo Mahikai fo we Yahudi kaha fosa, ambori yeisaharai wesa kariri Kristusi ne mioanaio wiro kai na wea kaha foi.

⁹ Tuti diri yau we ambori yeisaharai we mandoni kontai, kariri Allai, mano niari rorafaisi tuti nunei, ne kaiwofafongfa dediwara na kaiwo werorong nanai, amani kariri todoni niari Yahudi tuti Yahudi kaha fosa eweboyari na Kristusi fo.

¹⁰ Allai niari tonanafo, ambori na fuinini mani, mano ewemambiriutu eru mananufo na roranei sa, ewaitawang we Allai sewai paria. Tuti ne awai fuba nani ewatiaoai na wedaya Kristusi ne jematinei eweboyari fo.

¹¹ Allai niari finanafo kariri ne enetituaitaio wiro werea na ea kaha foi, amani enetituataio niariri na tane Seng Yesus Kristusia fo.

¹² Na taroaso Kristusi tuti taweboyari riati fo, rang kassisau we tata we takahefang Allai na tamatai kaha.

¹³ Ampafe yutang mea mau we dohonao menemirorong fituayai we dadirao isodairai na aitamu rorong ne nina fe, weo na dadira isodairi nini mani kia moang paria we mea ki.

Paulusi ne nadio dutang we jemati Efesusi fo

¹⁴ Na tonanane wedaya yisangkapa awehubuka na Dai arongreane.

¹⁵ Dai nani dino weDai we munu rorong bodoni kontai, na rorafaisi tuti na nunei sentenang.

¹⁶ Iwenadi we kadono Allai mioang mea na ne ra mararebanai na rorafaisi fo, dohong ne mambiriufuba foi we mea, na Nuaninuo niayai na menemirorongwai,

¹⁷ ambori na meroaso Kristusi fo, Kristusi niayai tarai na menemirorongwai. Iwenadi wei ambori mene meminohi toa wa weneung na menemiwawuwa, tuti Allai enewawufo wiwiang mea pampang.

¹⁸ Iwenadi we Allai, kadono mea tuti Allai ne inontarai emararebanai siai fosa, mea ruhiae mewaitawang kariri todoni Kristusi enewawu tata fo. Enewawu tata fo fuba paria watitanang wea kaha, ne dauroi tuti dadai fo kontai titua afonsoa kaha.

¹⁹ Na inontaraine enemitituaitafo, wiro manei tefu ne enewawu nanai na mai kaha. Yutanai we kadono metaroano Kristusi enewawufo nanai na mai, ambori fi kiai na Allai, wiatai kiai na menemirorongwai kontai.

²⁰ Allai ne mambiriuo nayai na tata fo fuba paria. Tuti na ne mambiriu nanai, niari fi bitoya paria, bitoya sewa fianai aino tatutang wea fo ete taenemittiuaita fo.

²¹ Todoni kontaio na jematei, tataparanding Allai pampang we fitawafa, na Kristus Yesusi. Sambewaraio dadai feai we Allai we fitawafa! Antu.

4

Kaiwo kariri jematifoi we eweboyari, tuti kariri esobu Allai ne bengfo we efata wawerasa naya fo

¹ Nanai wedaya yau, inontaraio iwatai na aitamu rorong feninai we ifata Sempaisi ne, yutanai paria we todoni kontaio menari ne maifo, meminohi memasi kariri todoni Allai suhu mea we ne arikangna fo.

² Todoni kontaio menemirorong tewawa, memanang, tuti metawang mea. Menari sua wawera mea

na metawang mea tuti na menemiwawu wawera mea.

³ Merurai we mewaitawang wedua fio Nuaninu Mirarebana foi niari we mea fo, amani dohong meara meweboyarifo. Mewaitawang weduarai na wiro mehasisou mea kahai mae meminohi na mai.

⁴ Weo, mano taroaso Kristusi ne tata ne mani, tane tarai boyari, tuti Nuaninuo niai na tatane mani, mansiri. Tonanai kontai we Allai sahu mea we menemitawang fi be-yari.

⁵ Seng mansiri kawuru, taroasoafu boyari, baptisan boyari.

⁶ Tuti Allai mansiari kawuru kontai, andino weDai we kaiwasa fuba nini kiai ne. I mani weSeng we nunei sentenang, tuti yu fi na finani kiai, tuti ne mambiriufu na finanai kai kontai.

⁷ Wape mansiari-mansiari na tata tasobu fi bengfo kariri fianai aino Kristusi detorai mai tata fo ampa.

⁸ Aiwedaya mani na Kaiwofo soi kariri Kristusi tonina:

“Rabuang bo dautai to katai dedai foi fo,
kia inontarai aitamuosa fo bitoya,
tuti dohong fi beng bitoya we inontarainesa.”*

⁹ Kaiwo anta dotu deyo, “dautai to katai dedai foi” mani, todoni? Kaiwo nanai deinawiai weo reantenangfo

biari kawuru pari to kofa na nunei nini.

¹⁰ Mano biari nani, andino dautai pari sobu katai dedai sewa weru rora bodoni konta foi, ampare na doni kontai na rorafaisi tuti na nunei sentenang niayai kontai na nanai.

¹¹ Andino dohong fi bengfo we inontarainesa, amani yuai manea we rasuli, manea we nabi, manea kontai we ewuwu ne Kaiwo Mahikai fo we kaiwasa etaramioai kaharai fosa, tuti mane siai kontai ewenunggamie we ewaitawang wedua jematifoi tuti etaunausa.

¹² Niari finanane we ambori fiata Allai ne inontaraifosa we erufi we Sempaisi tuti ebaung Kristusi ne Taraifoi awa mitubaru, amani jematifoi,

¹³ paria tata kiai tawebayari na tane taroasoane tuti na tataroanso Allai ne Kaisungfo fo. Tuti wiro tawearikang marareha na taroasoane ahang kaha, mae rahida yiwang rahida tane tanari toa fo awa paria mai kariri Kristusi tuti fi kiai niai nai fo niai na tata kontai.

¹⁴ Ampafe na tafabai na ne tonanane wiro tane tarai kariri arikang marareha ahang kaha, amani arikangno ene eroasoafu tupa dawohi, ne tarai toyari aisananahangno supa dewohi andeisafoi suhiri tuti wanangfoi kiari towantanina, toyari aunau bitoya wetarai kaha foi we eta riati fo. Inontarai eharira fosa esawai, tuti erurai we epampamu tata na ene au-

* 4:8 Masmuri 68:18

nauo wetarai kahai tonana fo, wape taroaso ene aunau karira nanai funomai ahang kaha.

¹⁵ Mae tarutawang te ne wetaraifo na taenemiwawufo, ambori na fifiani kontaio rahida yiwang rahida ambori tane tarai kariri Kristusi aha, mano wenunggamiei we tata foi.

¹⁶ Na ne wenunggamiei nanai, ne Taraifoi sentenang, amani ne jematifoi saniao mei nai tuti weboyari nai, ne tarai toyari nunggamieifoi wewarang, aweng, tuti ne tarai siai wei foi sani nai meu fo. Tuti ne Tarai nani etohong kariri fianai aino enari fo na mai, amani awengfo we da nai, warangfo we yufi, tuti ne siai wei fo tonanai kontai. Ambori ne Taraifoi sentenang, amani ne jematifoi, tifu na mai, fiabai tuti wemambiriu na enemiwawufo.

Kaiwo kariri todoni jematifoi eriwang eminohi toa foa waworu aha na Kristusi

¹⁷ Ampafe na Sengnei wonongne yenggoa mea paria we fininai: Wiro menari kariri inontaraio etaroanso Allai kaha fosa aha fanai, weo ene enemitituatafo kia fieai kaha.

¹⁸ Ea mani enemitituatafo mamantiti ampa, ewaitawang fieai kariri Allai kaha. Ehatai borai weru Allai ne arangfo weo ewaitawang ne wetaraifo kaha. Eserawerahaifa weo enumikamiei mutubaru fefe.

¹⁹ Ene pari mamaya ampa, ampafe etohong ene taraifo

funomai kariri ene epaingfoa tuti emaninawa funoma fo, tuti rahida neungne etohong we enari finanai bitoya sewa aha.

²⁰ Wape mea mani, metaroangno Kristus Yesusi na rang tonana ne kaha.

²¹ Weo tarai, metarami kaiwo kariri i ampa, tuti mesobu ne aunaufo, amani aunauo wetarai tasobuai na Yesusi fo.

²² Mesobu aunau kariri todoni kontaio metawing mene tarai memo wai tuti ne niari toa wa, amani mene taraio raminde menemirorong wesasari wai wedayari kerirawa wai.

²³ Mesobu aunau kariri todoni kontaio metohong menemirorongwai tuti menemitituaitawara ambori Allai yiwangna waworu aha.

²⁴ Tuti weo meminohi Weinontarai weworu weo Allai samu mea ambori mene tarai kariri mantauni, amani memasi na urengreafo tuti memararebanai.

²⁵ Ampafe todoni kontaio mehabi pari mene metatofa wawera mea wa, mae memadu kaiwo tarai fo, weo tata kiai mani Kristusi ne Taraifoi di tata.

²⁶ Mehasou mani wiro menari sasari fanai.* Dohonao mehasou pariao kameai weroa nai ahang fe,

²⁷ tuti dohonao metohong rangfeai we Saminseni weanggari mea fanai.

²⁸ Mano kiamananapi foi wiro kiamananapi aha fanai, mae yurai we yufi na mai na mantauni warangfo ambori

* 4:26 Masmuri 4:4

meinenang we fiata mano
ene pari fi fosa.

²⁹ Memadu mani dohonao
memadu kaiwo karira fo
fanai. Mae memadu kaiwo
biaungno inontaraifosa en-
emirorongfo tuti fiatasa fo.
Kaiwo tonana ne ambori
kia ne bengfo we mano
etaramioa fosa ki.

³⁰ Tuti dohonao mewedaya
Allai Nuaninu Mirarebana
foi enerorongfoi fituayai we
mea fanai. Weo Nuaninu
nani ne tarai wesegelei kesi
tetaha wedua tata, deinawiai
weo Allai ne inontarai di tata,
tuti ambori rahida wanai
feriri tata weru nunei.

³¹ Mehabi pari mene men-
emirorong pirahai wawera
mea wai, menemitituai mea
wai, tuti mehassisou mea
wai. Mene mesawa mea
wa, meteibabera mea wa,
menemirireu mea wa, tuti
fi karira siai menari wa, ne
nanai kiai mehabioai kontai
weru mea.

³² Mae menemirorong
denteng we mea tuti men-
emiwawu wawera mea,
tuti meteiae wawera mene
menari sarawa wa, mai
kariri Allai deiae mene
menari sarawa wa na Kris-
tusifo.

5

*Minohi we arikang enayai
na sambewarai rorong fo*

¹ Mea mani Allai ne
arikangno enewawu mea
paria di mea. Ampafe
merurai we metohong kariri
ne niarifo.

² Todoni kontaio memino-
hiwa menemiwawu, kariri
Kritusi we enewawu tata
fo tuti dohong ne taraifoi

mireha we tata, amani weko-
rbanio niunsai mamporio
Allai eneoai.

³ Wape na mea mani,
dohonao maninawafo kuteai
kontaio wiro menariri fanai,
tuti dohonao menari funong
fi karira funoma fo, ete
meuremi fiabai we fianggeng
fe. Mehatai weru fi tonana
ne, weo finini kiai wiro
mai weo Allai ne inon-
tarai emararebana nesa we
enariri kaha.

⁴ Tonanai kontai we kaiwo
karira fo, kaiwo kikay-
ataio ne karira fo kontaio
memadura fanai. Weo nanai
mai we mea kaha. Mae
metohong mahikai terai we
Allai.

⁵ Weo mewaitawang fini-
nai na mai, inontarai mano
emaninawa funoma fosa,
ete enari fi karira fosa, ete
euremi fiabai we fianggeng
fosa, ene enari tonanafo masi
kariri esomi we aririwangfoi.
Inontarai tonana nesa wiro
esobu katai na Allai tuti
Kristusi une Mananu rorong
fo kaha.

⁶ Dohonao manei so-
fawawera mea na ne kaiwo
wetarai kaha fo fe. Weo fi
karira tonana ne aino we-
daya Allai kesou inontaraio
wiro etaramioi kaha fosa ne.

⁷ Ampafe inontarai to-
nana nesa mani dohonao
mefaraosa fanai.

⁸ Weo raminde nana
mani menayai na mamantiti
rorong fo, wape ninaia
mani Sempaisi dohong mea
menayai na sambewarane
ampa. Ampafe todoni kontaio
meminohi we arikang
enayai na sambewarai ro-
rong fo,

9-10 tuti metitua we metaroang fianai aino Sempaisi eneoa fo. Weo na meminohi na sambewarafo mani webong na fi beng kiai fo, na fi masi fo, tuti na wetaraifo.

11 Dohonao mehontai menari fi mai kahaio inontarai enayai na mamantiti rorong fosa enari fo fe. Weo fi tonana ne wiro kia fiea kaha, mae ne beng sewa ne mani, merurai ambori fi karira enari fo wiro dadiwa ahang kaha mae wati parai.

12 Weo fi inontarai etaramididau Allai kaha fosa enari worawai tonana fo, madurai terai ki wape tamamaya paria.

13-14 Wape fi kiai sambewara fo dansairi mani ambori wati parai ki. Tuti sambewara nanai yiwangno fi kiai na mamantitifo ambori mirarebanai tuti wia na sambewara nani kontai ki. Nanai wedaya kaiwofeai dotu tono:

“Mano bena ne wau, boabari wau,
tuti wuwi na marareha rorong foi meai!

Tuti Kristusi ambori sambewarai na wau ki.”

15 Ampafe metanansiau paria kariri todoni meminohi toa fo. Dohonao menari toyari inontaraio ewebonggoi fosa fanai, mae menari toyari inontaraio esawai fosa.

16 Mene rahida mesobua wa meruruai we menari kaririai na mai, we fuinina mani ne karirane da woruai bitoya paria.

17 Tonana mani dohonao mewebonggoi fanai, mae merurai we mewaitawang Sempaisi ne dawiafo.

18 Dohonao metunung ye memayeru fanai, weo nana mani memayerufo yu mea wedaya menari fi karira funomai, mae todoni kontaio Allai Nuaninufoi niayai woru mea ambori na tonanane Kristusi yu mea.*

19 Mebaung mene meroasoawa na memadu na kaiwoariri masmuri fo, na rarung fiai fo, tuti rarung siaio we Sempaisi fo. Todoni kontaio na menemirorong mirising merohi rarung fiai fo we Sempaisi,

20 metohong mahikai we Dai Allai pampang na fifiani kontai na tane Seng Yesus Kristusi wonongfo.

21 Tutti na mesomi we Kristusi fo, todoni kontaio metaramididau wawera mea.

Kaiwoariri we mambewangne

22 Wiwingne mea, mesomi we mene mangnesa kariri mesomi we Kristusi fo.

23 Weo mangnesa ewenunggamiei we wiwingne mea, kariri Kristusi we wenunggamiei we mano taroasoi tuti mantauni dino we Mananu Mampariri we ne Taraifoi, amani jematifoi ne.

24 Ne tarai kariri jematifoi we somi we Kristusifo, tonanai kontai we wiwingnesa na fifiani kontaio esomi we ene mangfosa.

* 5:18 Botio Fi Rasulifosa Enari robong 2, reantenangne mani 2:38.

²⁵ Mangne mea, menemimewawu mene wiwingnesa, kariri Kristusi enewawu mano taroasoi ne tata fo, tuti dohong ne taraifoi mireha we jematifoi fo.

²⁶ Kristusi niari tonanafo ambori yuairurang jematineia mirarebanai, tuti niari tonanai na ne jematinei dohong kariri ne Kaiwofo tuti na mereha baptisi foi.

²⁷ Tuti na tonanane Kristus kia jematinei, amani mano taroasoi ne tata, we mantauni neni, amani jematio mirarebanai tuti mehikai, dohong sarawa kaha, tuti werarika kahai kontai, ambori mesi we sobui.

²⁸ Tonanai kontai mangfosa todoni kontaio enemiwawu ene wiwingfosa mai kariri enemiwawu bera mantaunsa ene taraifoi fo. Mantei di enewawu ne wiwingfoi mani, wenani enewawu bera mantauni kontai.

²⁹ Weo manei wiro enerireu mantauni ne taraifoi kaha rai, mae dewawuti tuti deitawang weduari, kariri Kristusi we dewawu tuti deitawang wedua jematifoi fo.

³⁰ Niari tonanai weo tata mani Kristusi ne Taraifi di tata fefe.

³¹ Toyari na Kaiwofo dotu deyo,

“Aiwedaya mani, mang
manei ambori doa siai
weru ne wawafo suru,
tuti weboyari ria ne wi-
wingfoi,
tuti une tarai boyari fi-
nanaia.”*

³² Kaiwo nanai ne netaweafo werorong paria. Wape fio enehutituai weaifa ne mani kariri Kristusi tuti ne jematifoi fo.

³³ Wape kaiwo nanai reng we mea kontai amani, todoni kontaio mangne wau enemuwawu nemu wiwingwai mai kariri enemuwawu mantaung wauwa, tuti wiwingwa wau kontaio boto nemu mangwai.

6

*Kaiwo kariri arikangfosa
tuti ene wawafosa*

¹ Arikangne mea, na Sempaisi wonongfo, metaramididau mene wawafo suru tuti metohong kariri une kaiwofo, weo nanai masi we menari ne.

² Metato mene wawa mang foi tuti wawa wiwing foi! Na Allai ne Hukumifoi kiai ne mani, hukumi bonani mani hukumio reantenangno Allai dererai tutira fine.

³ Amani dererai deyo,
“Ambori munohi na mai
tuti munohi waroi
na nunei.”*

⁴ Wawawa mea, dohonao menari mene arikangwasa enemirorong fituayai fanai. Mae metahunsa na mai, metohong kaiwo ariri mai fo wesa tuti metaunausa na Sempaisi ne aunaufo.

*Woming tuti mano we-
woming weifoi*

⁵ Doroi mewewoming wa mea, metohong kariri mano mewewoming wesa na nufi

* 5:31 Kejadian 2:24 * 6:3 Ulangan 5:16

nini ene kaiwofo. Metohong kaririai na metatosa, na mematai wesa, tuti na menemirorong mesi, ne tarai toyari menari we Kristusi mantauni.

⁶Dohonao metohong kariri ene kaiwofo tonanai na rabuang bo ewati mea foi tera fanai, we mesera terai we efiai mea fanai. Mae menari finanai we Kristusi ne womingno metohong kariri Allai ne dawiafo na menemirorong mesi di mea.

⁷Todoni kontaio mefatasa na menemirorong mirising, ne tarai toyari fi menari nanai we merufi we Sempaisi, wiro we inontarai manei kaha.

⁸We mewaitawanai ampa we mandoni kontai, woming-fosa ete mano ehasau fosa, ea kiai ambori esobu fiembaitafo ria Sempaisi we fi bengno enari fo ki.

⁹Tuti doroi mano mene woming wa mea! Todoni kontai menari sua mene womingfosa kontai tonanai. Dohonao mehararufansa fanai. Weo mewaitawanai we mea tuti mene womingwasa, mea kiai mewewoming ruhiae we mansiari, mano wenunggamiai wesa tuti wenunggamiai we mea kontai, amani mano minohi na Waidani foi. I mani wiro deto we inontarainesa manei dedai sewa manei na taminohi toa fo kaha.

Allai ne fimamuna mai fo

¹⁰Wefuiane mani, todoni kontaio mewemambiri na Sempaisi ne mambiriuo tuti ne tapapa fuba foi.

¹¹Mesansung mea na ansung mamunao Allai dohonai we mea wa kiai, ambori metoaria mutu we metirapa Saminseni ne karirao enetituai we niari fo, amani Saminsenio wemananu we mano eharira fosa.

¹²Weo na mamuna nini wiro tatapa inontarai nunei kaha, mae tatapa mano ewemananuo atisa kaha fosa, mano ewenunggemie na mamantiti fosa, tuti mano ewemambiri we eru rabuang bo kerira nini. Tuti tatapa nuaninu eharirao ewerai mamunao enayai na rorafi nini ene mambiriuo.

¹³Ampafe nina mani, mesansungno Allai ne fimamunafo kai, ambori tete rahida karira fo mani, mewemambiri we metoa we metapa mano eharira nanisa kiai. Tuti ambori merurai na mamuna rorong foi werea naya fo mani, metoara papayai, wiro mefanahang kaha.

¹⁴Todoni kontaio metoaria mutu! Aunau wetarai fo, menari we aikapuru we sotawang na menemirabuangwa ambori mehasau we merurai na mamuna rorong fo, tuti menemirorong mesi na Allai arongreafo nanai, ne tarai kariri ansungno besi wedua mearomiwa kontai.

¹⁵Memainenang pampang we mewuwu Kaiwo Mahikaio dohong inontarai taminohi na mai fo, metatarai toyari sapatu na meawemiwa.

¹⁶Sewa ne nanai kiai, merutawang mene meroa-

soai we Sempaisi wa mutu we perisai*, ambori Saminseni ne ato weadia fo defai tiri fanai.

¹⁷ Meha faririo Sempaisi niari we meara fo we mene sapewi mitubaru wedua menumiwa, tuti meru Nuaninu Mirarebana foi ne sondufoi, amani Allai ne Kaiwofo.

¹⁸ Tuti na todoni feai kontao mewenadi pampang we Allai kariri Nuaninu Mirarebana foi wiwiang mea fo, metutani we fiata mea na fifiani kontai. Todoni kontao na mewenadi tonana ne memainenang, metamang, tuti metanansiau. Mewenadi pampang kontai we Allai ne inontarai emararebana na Kristusi nesa kiai.

¹⁹ Tuti mewenadi we yau kontai, ambori na rabuang bodoni kontao ifoai boroju we imadu fo mani, Allai dohong kaiwo mai fo we yau ambori iwemambiriu we yeisaharai kasau kariri ne Kaiwo Mahikaio dadiwa nanai.

²⁰ Weo Kaiwo Mahikai nanai wedaya nehu tarai weinontarai fuba Allai demi yau we iriwani imadurai, tuti wedaya kontai iwatai na aitamu rorong fenina. Mewenadi we ambori imadurai Kaiwo Mahikai fo mani, imadurai na imatai kahai, mae imadurai kariri todoni imadurafo.

*Paulusi denatu mahikai
we kife ne suratinei*

²¹ Tihikusi, tane doroi taenemiawuti tuti mangfatao dohong kariri fio Sempaisi

demi we niari fo na mai foi, ambori deikaririo fifiani kontai kariri yau we mea ki, ambori mewaitawang kariri nehu tarai toa ne tuti fianai aino inari ne.

²² Nanai wedaya yemi dontai mau we deikaririai we mea kariri amenayai toa ne, tuti ambori menemirorongwai mitubaru aha.

²³ Kadono Dai Allai tuti Seng Yesus Kristusi uwedaya doroiwasa kiai meminohi na mai, tuti menemiwawu wawera mea, tuti meroaso Kristusi pampang.

²⁴ Kadono Allai dohong ne bengfo arora we mano taenemiawawu tane Seng Yesus Kristusi na taenemiawawuo woru na wea kaha fo.

* **6:16** Ete foti.

Kaiwo Anatu Na Paulusi Weo Jemati Na Filipi

Kaiwo dedung we Filipi

Jemati Filipi mani jemati reantenang Paulusi biauni na nu fuba Eropa foi dine. Bendari Filipi mani wia na nu Makedonia foi. Kaiwo anatu we jemati Filipi nini Paulusi soi na rahida wiatai na aitamu rorong fe fo.

Fi bitoya paria wedaya Paulus soi kaiwo anatu ninai, amani deo dohong mahikai we jematifoi we fio etanatuai wei fo. Deunausa kontai we ambori ewemambiriу tuti etawansa na dadira rorong fo. Denggewasa kontai we enemirorong tewawa kariri Yesusi, wiro enemirorong dedai fanai tuti wiro ewati we mantaunsa tera fanai. Deikaririai wesa kontai we deyo, na Allai enerorong denteng foi terai andino wedayasa eweboyari ria Kristusi weo eroasoi fefe, wiro na etohong kariri Allai ne Hukumifo na mai fo kaha. Kontai Paulusi soi kariri fianai aino inontarai eweboyari ria Kristusi fosa esobuai ria Allai fo, amani dohonsa emirising tuti wedaya enumiruainso ne maifo.

Kaiwo anatu ninai medu kariri mirisingfo, todoni enemirorong mitubaru fo, eweboyarifo tuti kariri todoni inontarai Kristeni nesa etawansa na eroaso

Kristusi fo tuti todoni eminohi weinontarai Kristeni fo. Tuti na kaiwo anatu ne kontai deinawi kariri todoni Paulusi enewawu jematifoi fo.

Kaiwo anatu ne deto kuttuai tonina:

1:1-11 Kaiwo reantenang fo.

1:12-26 Kaiwo kariri fianai aino Paulusi sodaira fo.

1:27-2:18 Todoni eminohi weinontarai Kristeni fo.

2:19-30 Kaiwo kariri deo demi Timotiusi tuti Epafroditusi we ura we jematifoi.

3:1-4:9 Paulusi deretawansa we etanansiau we inontarai emai kaha fosa fo.

4:10-20 Paulusi tuti ne maniwowirifosa etanatu mahikai we jematifoi.

4:21-23 Kaiwo kafe.

Paulusi urohong mahikai we jemati na bendari Filipi

¹Weo inontarai memararebanai na Kristus Yesusia wa mea na bendari Filipi, kontai mano mewenunggamiei we jemati wa mea tuti mano mewemangfata jemati wa mea.

Kaiwo anatu ninai na yau Paulusi, tuti Timotiusi, Kristus Yesusi ne womingne auru.

²Auenemitawanaifa, kadono tane Dai Allai tuti Seng Yesus Kristusi urohong une bengfo arora we mea tuti urohong mea menumiruainso une maifo.

*Paulusi dutang tuti jemati-
foi we Allai tuti fiai Allai*

³Na rahida yutang tuti mea we Allai mani, ifiai tuti

yohong mahikai pampang wei.

⁴ Na enehurorong mirising paria yutang tuti mea kiai pampang.

⁵ Yohong mahikai we Allai tonanai, we rahida reantenang metaramio Kaiwo Mahikai kariri Kristusi ne ria antoru fo paria sobu rahida bonini, mefata yau, merurai ria yau mewuwu Sempaisi ne Kaiwone.

⁶ Tuti yeitawanai Allai niari fi beng paria na mea tuti na menemirorongwai, iroasoai we niari tonanai na mea paria sobu werea naya fo, amani rahida Kristus Yesusi daraberahi nai aha ma fo.

⁷ Todoni kontaio enehutiuai we mea tonanai kiai, weo arohuporo mea kaha, mene tarai toyari raori ikase na rahukanangne. Weo Allai dohong ne bengfo arora we mea kiai, tuti we yau kontai. Dohong ne bengfo arora we yau tonanai na rabuang bo iwatai na aitamu rorong fe ninai, kontai na rabuang bo na borai ikahiwa tuti ne Kaiwo Mahikai kariri Kristusi fo tuti yoa imadu tutirai.

⁸ Allai deitawanai todoni enehuwawu mea paria, wiro arohuporo mea na wea kaha, mai kariri Kristus Yesusi mantauni enewawu mea.

⁹ Nahu fi yutang tuti mea we Allai dinini: Kadono menemiwawu wawera mea fuba sewa aha, tuti menemiwawu kariri aunau wetarai fo na mai aha tuti na mewaitawang ne bengfo.

¹⁰ Ambori na ne tonanane mewaitawang kariri ne beng

pari fo, ambori menemiroongwai mirarebanai tuti metohong sarawa kaha paria rahida Kristusi daraberahi aha ma foi.

¹¹ Kadono Yesus Kristusi ne mahikaifo nai woru mea ambori menemirorongwai mesi, ambori kaiwasanei kiai efiai Seng Allai tuti etaparandini.

Dadirao Paulusi sodaira fo wedaya kaiwasa bitoya etarami Kaiwo Mahikai kariri Kristusi

¹² Doroio bohine meaine, yeo mewaitawanai na mai weo fianai aino isodairai ninaid wedaya Kaiwo Mahikai ne wawu to fong, wiro su to fui kaha, tuti inontarai efau aha etaramioai.

¹³ Ampafe kasau we mano ewaitawang wedua yau na munu Kaisari nei tuti kaiwasa na bendarinei kiai ampa, weo eru yau ma iwatai na aitamu rorong fe ninai weo iwuwu Kristusi fefe.

¹⁴ Kontai fi isodairai tonana ne wedaya dorio eroaso Sempaisi na bendari ninisa etairiri Seng Allai ne Kaiwofo na mambiri aha tuti na wiro ematai kaha.

¹⁵ Tarai, manea etaiririai na enemirorong pirahai we yau, tuti weo eweaiteta we yau. Wape manea kontai etaiririai na enemirorong denteng.

¹⁶ Mano etaiririai Kristusi na enemirorong mesi nanisa mani, inontaraio enemiwawu yau disa. Tuti ewaitawanaifa we Allai wedaya yau iwatai na aitamu rorong fe ninai ambori ikahiwa tuti

ne Kaiwo Mahikai kariri Kristusi fo.

¹⁷ Mano siai ehoramaifa na enemirorong mesi kaha fosa, esera we ambori ewewonomi terai. Tuti na enari tonanane, enemitawanaifa we ambori ewedaya yau isodai dadira na aitamu rorong ne pari aha.

¹⁸ Wape towea kaha. Weo ehoramai na enemirorong mesi ete seyewa kontai ki, wape todoni kontaio Kristusi andino ewuwui ne. Ampafe imirising paria.

Yo, tuti todoni kontaio imirising pampang ki.

¹⁹ Weo iwaitawanaifa we na mene nadi metutang tuti yau we Allai wai, tuti Nuaninu Mirarebanaio Yesus Kristusi demi ma foi ne fiatane, fiani isodairaiifa wedaya yau ikaharai ki.

²⁰ Fio yawi weai paria tuti enehutawanaifa mani, wiro imamaya tuti Kristusi na dadira rorong isodairai ninai kaha. Mae kariri reantennangfo paria sobu ninaifa ne, enehutawanaifa we na doni kontaio iwemambiri, wiro imatai kaha we imadu tuti ne Kaiwone, ambori na fianai aino isodairai ninai, wedayara imereha ete yarang te, wape ambori Kristusi kaiwasa etaparandini.

²¹ Weo we yau mani, iminohi yarang pampang mani, mahikai paria, we nana mani iruai Kristusi wonongne pampang. Wape masino etohong aiboi marareha we yau ambori imereha mani, finana mai sewa we yau, weo nana mani, ira iminohi riati.

²² Masino iminohi yarang na nufi ninai mani, irufi bitoya wei aha, tuti wetarai bitoya ki. Ampafe yiri ne doni? Isera wawerahai!

²³ Ninai dadira paria we yau, ampafe yeo yohong kariri ne doni? Enehurorong dohong weai paria we itauberahai weru nuneia iminohi ria Kristusi, weo we mantaung yau terai mani, nanai aino beng sewa ne.

²⁴ Wape denteng sewa we mea mani iminohi na nunei we ifata mea.

²⁵ Iroasoaitonanai, ampafe iwaitawanaifa we todoni kontaio ambori iminohi ria mea kiai we ifata mea, ambori mewemambiri aha na meroaso Sempaisi fo tuti memirising pari aha.

²⁶ Ampafe memararising paria na Kristus Yesusi, weo fiata yau yarabera yau we mea mau iweboyari ria mea aha.

Paulusi deretawang jetatifo we eroasoia mutu

²⁷ Fi fuba pari mani, meminohiwa metohong kariri fianai aino dotu na Kaiwo Mahikai fo kariri Kristusi fo na mai. Ambori ira mau mani iwati mene meroasoai nanai, ete ira mau kaha mani, tarahuoaifa weo metoaria mutu meweboyari tuti meruraifa we fi beyari, amani metapa inontarai eteiaya Kristusi fosa tuti meroaso Kaiwo Mahikai foa mutu.

²⁸ Wiro mematai mano etapa mea fosa fanai. Weo na memataisa kaha tonana ne meteinawiai we ambori esobu karirafo, wape mea

mani, Allai mantauni feriri
mea ki.

²⁹ Weo Seng Allai, na
ne bengfo, diri mea weo
meroaso Kristusi tuti mer-
ariati, nanai tera kaha mae,
we mesodai dadirafo kontai
wei.

³⁰ Weo mea kontai, ninaia
mani mehontaifa na fianai
aino isodaira ne, amani fio
raminde mewatioai we iso-
dairaia fo, tuti metaramioai
isodairai pampang ninai.

2

*Paulusi deunausa we
eweboyari tuti enemirorong
tewawa kariri Kristusi*

¹ Tawebboyari ria Kristusi
ambori taenemirorongnei
wemambiriu aha. Enewawu
tata ambori tanumiruaing ne
maifo. Nuaninu Mirarebana
nei weriria tata, tuti Kristusi
aro tata paria, i wemanang
we tata kiai.

² Tonana mani merurai we
metohong enehurorongnei
mirising na fininai: amani
meweboyari na menemi-
wawu wawera mea wa, na
menemituitawa, tuti na fi
beyario metohong wea wa.

³ Dohonao mesera we
mewonomi na fi menari
wa fanai ete menari fi na
menemirorongwai dedai fe.
Mae menemirorong tewawa
tuti metato inontarai siai we
ansaino etadai sewa ne.

⁴ Tuti dohonao mewati
terai we mea fe, mae mewati
we inontarai siai kontai.

⁵ Na meminohi wau, todoni
kontaio menemirorong
kariri Kristus Yesusi, weo,

⁶ I fiebai dedai mai toyari Al-
lai,

kontai Allai mantauni
dine,
wape deto ne dedai nana
kaha,
tuti yutawana kaha.

⁷ Mae sawing ne dedai nanai,
niariri ne tarai toyari
woming manei
tuti weinontarai batang
kariri inontaraine
tata.

⁸ Na minohi toyari inontarai
batang nanai,
su enerorongfoia
tewawa
tuti dohong kariri te
fianai aino Allai demi
we niari fo paria
mireha,
tuti mireha sawai na
aitaba.

⁹ Nanai aino doni Allai yuaisi
dedai sewa
tuti dohong wang man-
anu fuba pari fo wei.

¹⁰ Ambori na Yesusi
wonongfo,
kaiwasa fuba na ro-
rafaisi tuti na nunei,
kontai mano na kofa ro-
rong wausa,
etisangkapa eawemibukafo
na arongreafo kiai tuti
etatori,

¹¹ tuti emadurai na
eboromifo we Yesus
Kristusi mani Seng
dine,
tuti na tonanane eta-
paranding Dai Allai.

*Mene tarai toyari awahao
denggararu na rorafaisi we
sambewa nunei*

¹² Ampafe, nehu mani-
wowiri enehuwawu meawa
meaine, mea mani inon-
tarai metarami kaiwo di
mea. Na rahida iminohi
ria mea wa, nehu kaiwo

imadura fo, metaramioiai
tuti metohong kaririai ampa.
Wape fuinina mani iminohi
waroi weru mea, ampefe
todoni kontaio metohong
kaririai na mai pari aha.
Menari tonanai we Kristusi
feriri mea ampa, ampefe
merurai we metohong kariri
ne Kaiwofo na mematai tuti
na mesomi we Allai.

¹³ Weo Allai mantauni dino
dohong mea mewemambiriu
tuti memaya we metohong
kariri ne maio eneo a fo ne.

¹⁴ Fiani kontai meru fo,
meru na menemirorong
mirising, wiro menemiwawa-
era wea fanai tuti mesawa
mea fanai.

¹⁵ Menari tonanane ambori
na meminohifo mene-
mirorong mirarebanai tuti
metohong sarawa kaha. Weo
meminohi rahang inontarai
sasario eminohi na maman-
titi rorong fo, wape mea mani
Allai ne arikangno metohong
sarawa kaha di mea. Tuti na
fianai aino menari fo, ewatiao
we mene tarai toyari awahao
denggararu na rorafaisi,

¹⁶ weo meha Kaiwo Kia
Arang fo wesa. Menari
tonana mani, isobu rang
we iboi arohu tuti mea, na
rahida Kristusi daraberahi
nai aha ma foi. Tuti finanai
deinawiaifa we wiro irurai
funoma kaha, mae fi irurai
tutirai nanai wetarai ampa.

¹⁷ Tarahai emung yaua
imereha ki. Imainenang
we imereha we mea ambori
meroaso Kristusi tuti
merariati na mai pari aha.
Ampefe ne tarai kariri imami
manei sara angurifeai na
korbani etohoni we Allai foi

ambori korbani nani mesi,
tonanai kontai na imerehane
iwedaya mene fi meru we
Allai na meroasoafu masi
kontai, tuti na tonanane
nehu rikanei ne tarai kariri
angguri imamifi sara kor-
bani nai nani. Tonanai ki,
wape iparaise tuti imirisng
kontai ria mea.

¹⁸ Mea kontai mefaraise
tonanai tuti memirisng ria
yau.

Timotiusi tuti Epafroditusi

¹⁹ Enehutawanai we na
Seng Yesusi ne wiwiaingne,
yenatu Timotiusi ahera we
mea mau, ambori tarahuo
kaiwo na i kariri mene
meroasoawa mani ifaraise.

²⁰ Wiro manei siai enerorong
kariri yau kaha, mae Timotiusi
meiri kawuru andino enetituai
tarai kariri mene maife ne.

²¹ Weo mano wei nesa kiai
mani enemituai terai we
mantaunsa, wiro we fi Yesus
Kristusi dawi wea fo kaha.

²² Wape mewaitawanai
we Timotiusi mani inontarai
taroasoi dine, weo i yurai
paria we deiriri Sengnei ne
Kaiwo Mahikai ne ria yau,
ne tarai toyari kaisungno
meinenang we fiata tamanai.

²³ Nanai doni ene-
hutawanaifa we masino
iwaitawanai kariri todoni
parentane ehutu kaiwo we
yaune mani, ambori isahera
yenatui we mea mau.

²⁴ Tuti iroasoifa kontai we
na Sengnei ne wiwiaingne,
mantaung yau kontaio waroi
kahai mae, ambori yontai we
mea mau we ituambawa mea
ki.

²⁵ Mae nehu doroi
Epafroditusio metanatui

dontai ma we fiata yau nei mani, todoni kontaio yenatui we mea aha mau. Fiata yau kawuru ampa na fianai aino irurai tutira ne, tuti yurai paria ria yau.

²⁶ Aro mea paria tuti weansarai we mea, weo deitawanai we mearomikuayai wei paria weo metaramioi we meninangne fefe.

²⁷ Tarai we meninang paria adareti mireha. Wape Allai aroi, kontai wiro aroi tera kaha, mae aro yau kontai ambori enehurorongnei wiro futuayai kareraifa fanai.

²⁸ Nanai aino doni irurai we yenatui ahera we mea mau, ambori mewatioia mani mefaraise aha, tuti yau kontai iweansarai ahang kaha.

²⁹ Metamang wei na Sempaisi wonongfo na mene-mirorong mirising paria, tuti inontarai toyari Epafroditusi nesa mani metatosa,

³⁰ weo deiriri Kristusi wonongne wedayari adareti mireha, wape wiro enetituai we ne tarai bo neng foi kaha, mae enetituaitafo mani weo yiwang mea we fiata yau.

3

Paulusi medu kariri aunau wetarai fo

¹ Ampafe, doroi meaine, todoni kontaio memirising na Sengnei. Wiro nuhuruainso maraba kaha we isoi riwang fianai aino isoi kawuru we meara wa. Weo kaiwo nanai wemambiriu we wedua mea weru ne karirafo.

² Metanansiau we inon-taraio etawiai we inontarai eraria Kristusi nesa mani ewesunati. Inontarai etawiai tonana nesa mani inontaraio enari fi karira saine, tuti emasi we ahusa we fiawera. Metanansiau wesa.

³ Ea mani ewesunati na ene taraifoi terai tuti eroasoai weo sunatifoi andino feririsa ne. Wape tata mani, tawesunati ete, tawesunati kaha mae, Nuaninu Mirarebanai sensoni tata tuti wiwiaing tata we tasomi we Allai na tarai. Nana mani ne tarai kariri tataino tasobu sunati tarai foi ne. Tatoari terai na fio Kristus Yesusi niari we tata fo, ampare wiro taroasoai we na fi toyari sunatifoi dino kia maifo we tata fong kaha.

⁴ Masino manea eroasoai we na fi mai enari fo, toyari sunati ete fisiasi wei fo, aino feririsa ki, nana mani yau isewa aha. Weo yauno yohong kariri fi tonana fo na mai sewa ne.

⁵ Weo itaubau nuhu Weinontarai Israeli. Iweriria na werengno Benyamini ma tuti inontarai Iberani tarai di yau. Nehu rahida indeatorua mani, iwasunati. Tuti Hukumio Allai dohonai we Musai fo, inari kaririai na mai pariao iweFarisi di yau.

⁶ Yohong kariri Hukumi Musai soi fo na mai nanai pariao wedaya irurai we imungtati mano eraria Kristusi nesa, weo eroasoai we andino kia mai wesa ne, wiro na Hukumi Musai soi fo ahang kaha. Tuti titua na ohong kariri Hukumi Yahudi nei mani, yau imasi paria

wiro yohong sarawa kaha.

⁷ Wape fio raminde nanai ifaraiserai tuti isahuai we kia mai we yau fo, itawinai ampa weo wifieai we yau ahang kahai, weo ninaia mani iroaso Kristusi fefe.

⁸ Wiro finanai tera kaha mae, fiani kontai mantaung yau inari we ambori imararebana fo mani, wiro wifieai ahang kaha. Weo fi isobuai aha nina mani, fi mai sewa fine, amani yeroanso nehu Seng Kristus Yesusi. Kristusi wedaya itawing pari fi fuba nani kiai. Finani ne tarai toyari fi piro ikabioi weru yau, ambori isobu Kristusi

⁹ tuti iweboyari riati terai. Weo na inari kariri Hukumi Musai soi fo nanai, wiro wedaya imararebanai kaha, we ibiriu we imararebanai na fi mantaung yau inariri fo kaha, mae na iroaso Kristusi fo. Nana mani, Allai dohong yau imararebanai tonana ne weo iroaso Kristusi tera fefe.

¹⁰ Fio yawi wea ne mani, yeroanso Kristusi, tuti yeo nuhuruainso ne mambiriuo wedayari suwi na marareha rorong fo aha ma fo. Yawiae we iweboyari riati, na fi raminde nanai sodaira fo mani, yau kontai imainenang we isodairai kariri i, tuti masino irufi wei nanai wedaya emung yau imereha, imainenang we imereha wei kontai, toyari i mireha we yau ampa.

¹¹ Tuti na tonanane enehutawanai yau kontai isuwi na marareha rorong foi aha ki.

Merurai pampang we mesobu fio inontarai Kristenine esera weafo

¹² Imadu tonanafo wiro yeo isobu finanai ampa kaha tuti wiro imasi toyari Kristusi kaharai. Wape irurai pampang we isobu fio Kristus Yesusi meinenaamaia fo, amani weo yeroansoi na mai pari aha. Weo finanai wedaya tefu yau tuti yuai yau we ne inontarai.

¹³ Doroi bohine meaine, yeitawanai kontai we wiro imasi kariri Kristusi kaharai. Wape fi beyario inari mani, kuruhutare fianai aino raminde nanai inaria fo. Tuti irurai terai we iwati to fong weo isobu fianai aino nayai na arohureafe wanai.

¹⁴ Nehu tarai toyari wemito we fiwewonong, imito tonanai pampang we ambori isobu fiembaitafo, amani iminohi na Waidani. Weo nanai aino Allai sahu yau na Kristus Yesusi wea ne.

¹⁵ Mano taroaso Kristusi na mai ne tata mani taenemittuui tonanai kontai, amani tahirumitare fi siaio raminde nanai taroasoai we ambori feriri tata ne. Wape maneui na mea enemutituui siai fea mani, ambori Allai mantauni deinawiai kasau we wau ki.

¹⁶ Wape meuremi nayai na fi yeoyai mau ninai fa na mai, amani: Fianai aino tasobuai kawurua fo, tarurai we tathong kaririai na mai pampang.

¹⁷ Doroi bohine meaine, mea kiai metohong kariri inari toa ne, tuti meuremifo nayai na mano enari ne

bengfo kariri yau fosa kontai, ambori menari kariri enarifo.

¹⁸ Weo kaiwasa siai bitoya eweaiteta we Kristusi tuti etapa kaiwo kariri mireha na aitabafoi. Imadurai bitoya karirisa we mea kawuru ampa, wape imadu riwanai aha mau ninai, na enehuorong fituayai paria wedaya urehukuru deda.

¹⁹ Mano tonana nesa mani ambori esuo rande karira fo ki. Weo erurai esera terai we fi karirao kia mirising wesa fo tuti finani dawi enemirongfoia weboyari weaia. Tuti emamaya kaririai kaha, mae eboi earomifo weai. Enemittiuai we fi nunei terai.

²⁰ Wape tata mani inontarai Waidani di tata, tuti rahida neungne tatamang paria we tane Mamparirifoi, amani Seng Yesus Kristusi, we daraberahi na katai nani aha ma fo.

²¹ Andino ambori yiwangno tane tarai kerira misuhi nini, awa dedai sambewarai kariri ne tarai bo neng foi. Niari tonanai na ne mambiriu fuba fo, amani ne mambiriu wedayari yuo fianggeng fuba nini kiai ne.

4

¹ Doroi enehuwawu mea tuti yohong weai paria we iwati mea wa meaine, meaino metohong enehuorong dedai tuti imirising ne. Ampafe, nehu maniwiri meaine, toyari fi anta itoia nanai, metoaria mutu na Sengnei.

Kaiwo aunau wefuiai

² Weo rarowini Eyodai tuti Sintikei muru, yenggewa muru we muenemirorong boyari aha, kariri inontaraio muroaso Sengnei.

³ Tuti weo nehu maniwowirio rufi tarai ria yau wa wau, yutang wau kontai we fata suru ambori uweboyari aha. Weo ururai ria yau paria we antowuwu Allai ne Kaiwo Mahikai fo fefe, ne tarai kariri Kelemensi tuti kaiwasa siai wei fosa kontai we efata yau tuti erufi ria yau fo. Ewonomife watai na Buku fuba soi kariri inontaraio ambori esobu Waidani fesa nai foi ampa.

⁴ Rahida neungne memirising pampang na Sengnei. Tuti yei aha mau yeyo memirising tonanai.

⁵ Todoni kontaio meteinawai we kaiwasa bitoya wai kiai we inontarai memanang di mea. Weo Sengnei kefang we da ma to.

⁶ Na fiani kontaio dohonao wedaya meweansarai fe, mae mewenadi tuti metutanai terai we Allai. Fianai aino menemittiuai wea wa, memadu kaririai we Allai pampang tuti metohong mahikai wei.

⁷ Ampafe Allai dohong mea menumiruainso ne maifo, amani ne maio wiro inontaraine taenemittiuai afonsoa kaha fo, ambori ne mai nanai dewawu mene-mirongwai tuti menemittiuaitaiwa na Kristus Yesusi.

⁸ Ampafe tonana mani, doroi meaine, menemittiuai terai we fi wetarai fo, we fi wewonong fo, we fi mai fo, we fi mararebana fo,

we fi mahikaio dohong tata tamirising wea fo, fio tasahuai we fibeng fo, fi masi pari fo, tuti fi kaiwasa etatorai we fibeng fo. Finani kiai terai aino merutawanai tuti menemituuai kariria ne.

⁹ Metohong kariri aunau mesobuai ria yau kawurua nanai, amani ne imadurai we mea fo ete na fianai aino mewati yau inari we mea fo. Tuti Allai mano ne maifo weneung nai foi, ambori weriria mea ki.

Paulusi dohong mahikai wesa we fi etohonai wei fo

¹⁰ Imirising paria na Sengnei, weo waroi beyari arahio mewati we yau aha ma ninai. Imadu tonanafo wiyo deinawiai we anta mearomiporo yau kaha, weo iwaitawanai we mearomio yau to, wape wiyo mesobu rang we metohong kariria kaha.

¹¹ Imadu toninai mau ne, wiyo deinawiai we isobu dadira na nehu fi iwepararura fong kaha. Weo isobu aunau bitoya na fi iru ne ampa, we fianai aino isobua fo, fuba ete katui te, finanai we yau nuhuruainso demoyarai.

¹² Kariri todoni tane fifo tuti kariri todoni tane pari fifo nuhuruainsoai kawuru ampa. Na dadira rorong todoni feai kontaio itantuma wea kaha. Nehu fi bitoya ete nehu pari fi, imamosi ete ikahari, isobu aunau kawuru ampa ambori imirising nai.

¹³ Weo na fifiani kontai, iwemambiriu we isodai nanai kai, weo Kristusi

dohong mambiriu we yaua fefe.

¹⁴ Tonanai mae, fianai aino menari we yau ma ninai mahikai kontai, weo mefata yau na nehu dadira rorong ne ampa.

¹⁵ Inontarai Filipi wa meaine, mantaung mea mewaitawanai na mai ampa, weo na rabuang bo reantenang pari iwuwu Kaiwo Mahikai kariri Kristusi fo we mea nai wai, yontai weru mea na nu Makedonia wai mani, wiyo jemati siai bei fiata yau na fi iwepararura fong kaha, mae memeiri mea kawurua.

¹⁶ Kontai rabuang bo inayai na bendari Tesalonika foi mani, meaino we beiru teai metanatu we mefata yau ne.

¹⁷ Imadu tonanafo wiyo yawiai we ambori metohong fi we yau kaha. Mae yeo ambori mesobu fiembaitafo we riwangno fi menari we yau nana fo.

¹⁸ Isobu fio metohonai kai we yau fe ampa, tuti enehutituuai weaia mani fuba paria. Fianai aino metanatua ria Epafroditusi ma ne, isobuai ampa. Ampafe fio iwepararura fo, isobuaia mai ampa. Fio metohoni kiai nini, ne tarai we fio niunsai mampori na korbanio nunumi we Allai foi tuti demang weai na enerorong mirising fo.

¹⁹ Allai mano isomi wei nei, na Kristus Yesusi dohongno fianai aino mewepararura fo we mea ki. Tuti finanai dohong aroratai we mea fo fuba

paria.

²⁰ Sambewaraio dadai feai
we Dai Allai we fitawafa.
Antu.

Paulusi denatu mahikai

²¹ Meteikaririai we
Seng Allai ne inontaraio
emararebanai na Kristus
Yesusi wasa, weo yenatu
mahikai wesa. Tuti doroi
enayai ria yau na nina nesa
etanatu mahikai we mea
kontai.

²² Allai ne inontarai
emararebanai fuba enayai
na bendarifi ninisa kiai,
reantenang pari mani mano
enayai na munu Kaisari nesa,
etanatu mahikai we mea
kontai.

²³ Kadono Seng Kristus
Yesusi ne bengfo weriria
menumianinuwai kiai.

Kaiwo Anatu Na Paulusi We Jemati Na Kolose

Kaiwo dedung we Kolose

Kaiwo anatu ne na Paulusi, denatuai we jemati na Kolese. Kolese mani bendari bei na nu Asia Katui foi. Bendari nini wiatai na bendari Efesusi do wanang murang foi.

Jemati Kolose nini wiro Paulusi dino biauni ne kaha, mae inontarai siai manei. Wape Paulusi niuruainsoai we todoni kontai ne mambiriu tonanai we dohong kaiwo anatu we jemati na Kolose nini. Weo tarao kaiwo we na jematifoi mantau-nau manea etaunau aunau sarawa fo paria. Mantau-nau nanisa enumikamieit mitubaru tuti ene aunaufo eteyo, oyo aroanso Allai tuti obu faririfo na mai mani, "Todoni kontaio inontaraine tasomi we nuaninu kerirao wemambiriu we yu nunei foi, ohong kariri sunatifo na mai, nai we fi tane wori wea fo tuti fi siai wei fo kontai."

Nanai wedaya Paulusi soi surati nini, we deisaha kariri aunau wetarai fo tuti we dapa aunau sarawaio mantau-nau mai kaha fosa etaunauwai nanai. Fi weneung na kaiwone mani, Paulusi deisaharai wesa deyo, Yesus Kristusi ne mambiriu we feriri tata na mai, tuti aunau siai wei fo kiai mani manta wedaya inontarai ehatai weru Kristusi terai. Na Kristusi Allai niari nunei,

tuti na Kristusi nani kontai Allai feriri nunei. Ampafe manta na tawebboyari ria Kristusi fo terai, inontaraine tata taenemitawanaia mutu we ambori Allai feriri tata ki.

Kontai Paulusi deisaha kariri todoni inontarai Kristen ne eminohi toa fo na aunau dedai mirarebanai nani fo.

Kaiwo anatu ne tarahi Tikhikusi dino kia to Kolosea ne, mano fiatari na rang rorong nana mani Onesimus, Filemoni ne womingno Paulusi demi daraberahi wei aha foi.

Kaiwone deto kutuai tonina:

1:1-8 Kaiwo reantenang.

1:9-2:19 Kaiwo kariri todoni Kristusi ne dohong toa fo tuti fianai aino niari we inontaraine tata fo.

2:20-4:6 Inontarai Kristen ne eminohi Weinontarai ewaworu na Kristusifo.

4:7-18 Kaiwo kafe.

Paulusi denatu mahikai

1-2 Weo doroi jemati Kolose wa mea, amani inontaraio memararebanai tuti meraria Kristusi na mai wa mea.

Kaiwo anatu ne na yau Paulusi, Kristus Yesusi ne rasuline yau, kariri Allai ne dawiafo. Tutu kaiwo anatu ninai na tane doroi Timotiusi kontai. Kadono tane Dai Allai dohong ne bengfo arora we mea tuti wedaya mea menu-miruainso ne maifo.

Paulusi dohong mahikai we Sempaisi we jemati Kolose

³ Na rahida neung antowenadi antorutang tuti mea we Allai, tane Seng Yesus Kristusi tamanafa,

antorohong mahikai wei pampang we mea.

⁴ Weo antotaramioai kawuru ampa kariri todoni meroaso Kristus Yesusi tuti menemiwawu Allai ne inontarai emararebana wasa fo.

⁵ Meroasoai tuti menemiwawu tonanai, weo menemitawang fianai Allai meinena mai na rorafaisi we mea fo fefe. Finanai metaramioai kawuru ampa, na kaiwo wetarai mesobua fo, amani Kaiwo Mahikai wetaraio metaramioa fo.

⁶ Kaiwo Mahikai nanai dafai wariai to nunei sentenang tuti kia moang we inontarai etaramioai tuti eroasoai nanisa. Ne tarai kariri mea we mesobu moangfo na raminde metaramioai tuti mewaitawang kariri Allai ne bengno dohonai arora fo, amani ne bengno wetarai fo.

⁷ Kaiwo Mahikai nanai metaramioai ria Epafrasi, antone maniwowiri antoene-miwawuti tuti yufi ria antoru foi. I mani Kristusi ne mangfatao yufi na masi we fiata mea.

⁸ Tuti andino deikaririai we antoru we menemiwawu wawera mea paria na Allai Nuaninu nei ne mambiriupo.

⁹ Nanai wedaya, na reantenang antotaramioai kariri mea fo antorutang tuti mea pampang we Allai, paria sobu rahida bonini wiro antofotou antorutanai tonanai kaha. Antorutang we Allai we Nuaninufoi wedaya mea mewaitawanai tuti mesawai, ambori mewaitawang fianai aino Allai dawi wea fo na mai.

¹⁰ Tuti antowenadi tonanai ambori na tonanane memi-

nohi metarang na mai kariri fianai aino Sengnei dawi wea fo tuti meha enerorongfoi. Ampafe na fifiani kontaio menari ne bengfo, tuti mene mewaitawang kariri Allai fo fuba pampang.

¹¹ Kontai ambori Allai na ne mambiriudadai tuti sambewara fo, dohong menemirorongwai mitubaru, ambori metawang mea na dadira rorong mesodaira fo kai, na menemirorong mirising.

¹² Tuti metohong mahikai we Dai Allai kontai na ne tonanafo. Dai nani dino dohong mea memai we mesobu fianai aino meinena mai we ne inontarai emararebana fosa mano enai na Kristusi ne sambewarafo.

¹³ Weo yuai tata weru memantiti rorong fo ne mambiriupo tuti kia tata to ne Kaisungno enewawuti foi ne weMananufo ampa, ambori na ninaia yu tata tuti taminohi na ne mananufo pampang ampa.

¹⁴ Na ne Kaisung nani tasobu faririfo, nana mani feriri tane sasarifoi.

Kristusi dedai mantaung

¹⁵ Na Kristusi mani tawati Seng Allaia kasau. I kontai mano reantenang pari dine, dedai sewa fi fuba Sempaisi niariri kiai nei.

¹⁶ Weo na I, Allai niari fi fuba niayai na rorafaisi tuti nufi nini, fi watiao fo tuti fi watiao kaha fo, kontai mananufosa, mano ewemambiriupo fosa, tuti mano eru kaiwasanei fosa kiai. Fi kiai

ne Kristusi andi niariri tuti niariri we mantauni.

¹⁷ Wiro nunei tuti rorafaisi kaharai mae, Kristusi ne fafong kawurua, tuti finini kiai weboyari na warangfo.

¹⁸ Tuti andino wenunggamiei we ne Tarainei, amani ne jematinei tata. I mani mano reantenang pari foi dine, mano dedai sewa, tuti andino reantenang pari suwi na marareha rorong foi ne, ambori meiri dedai sewa na fi fuba nini kiai.

¹⁹ Weo Allai piraise we sami ne Kaisungfoi ambori mantauni tuti fi kiai niai nai foi watioai we niayai kiai na Kristusi kontai.

²⁰ Tuti na I Allai mantauni meduraia futuayai we niari finini kiai weboyari riati aha, amani fi kiai na rorafaisi tuti na nunei. Niari finanai na Kristusi ne rikao tiwowu na aitabafoi.

²¹ Raminde nanai mehatai waroi weru Allai. Meweaiteta wei we mene metohong toa wa tuti menemitituaitawa karira.

²² Wape ninaia mani, na Kaisungfoi ne mararehafo, Allai niari mea mewebonyari riati ahangfa. Na ne tonanane wedaya metoari na arongreafo na memararebanai, wiro fisarawa kuteai watioai na mea kaha.

²³ Wape todoni kontaio meroasoai pampang, metoaria mutu na meroasoawa. Dohonao mene-miwawera we fianai aino na rahida mesobu Kaiwo Mahikai fe nanai mene-mitawanaia fo fanai, Kaiwo metaramioai nanai dafai

wariai we inontarainesa kiai na nunei sentenang ampa. Tuti we Kaiwo nanai kontai, Sempaisi yuai yau we iwemangfata we iwuwuai.

*Fio Paulusi niari we jemati-
foi*

²⁴ Ninaia mani, dadirao isodairaifa we ifata mea ne, wedaya yau ifaraise paria. Weo dadira rorong isodairi tonina nei, masi kariri fianai aino Kristusi dawi weai we isodairai na nehu tarainei fo, ambori ifata ne Taraifoi, amani ne jematinei.

²⁵ Allai demi yau iwemangfata we ne jematinei, we ambori ifata mea. Todoni kontaio iwuwu fi kiaio niai na Allai ne Kaiwofo,

²⁶ amani Kaiwo defuina yiwang defuinao da wa fo dediwarai we inontarainesa, wape ninaia mani deinawiaia kasau we ne inontarai emararebana fosa ampa.

²⁷ Allai dawiai we ambori ne mano emararebana nanisa eha ne Kaiwofo tono kaiwasa Yahudi kaha wa mea, ambori mea kontai mewaitawangno ne Kaiwo sambewarai dadaio dadiwa nanai. Tuti ne kaiwo dadiwa nana mani, aininai: Kristusi niayai na menemirorongwai, tuti nanai dohong mea menemitawanaai we mehontai na ne katai dedai sambewara foi.

²⁸ Kristusi nani dino amewuwui we inontarainesa kiai ne. Ametaretawansa tuti ametaunausa na kaiwo sewai paria. Amenari tonanafo mani, we ambori

amehasa we Allai na enemirrorong mesi, weo eweboyari ria Kristusi kawurua fefe.

²⁹ Nanai wedaya irurai paria tuti irufi na mamboni, na mambiriuo isobua ne, amani mambiriuo Kristusi dohonai na ne mananufo ma nayai na nehu taraife ninai.

2

¹ Weo yawiaifa we ambori mewaitawanaifa we irurai katui kahai we mea, tuti we mano na Laodikia fosa, tuti we kaiwasa bitoya foi kiaio wiro etaroanso yau kaha fosa.

² Inari tonana fo we ambori enemirrorongfoi mitubaru tuti eweboyari na enemiawusa fo, ambori ewaitawanai tarai tuti mesi, ambori etaroano Allai ne fio mirarebanajo anta dediwaro fo, amani Kristusi.

³ Weo na Kristusi nani dino deinawi Allai ne deitawanafu tuti ne awaio dediwarai na I kiai ne.

⁴ Fininai yeikaririaifa, ambori wiro manei sofa wawera mea na ne kaiwo deiriria mahikai fo fanai.

⁵ Weo masino inayai waroi weru mea, wape enehurorongnei niyai ria meawa, tuti ifaraise kontai we iwati menemirrorong boyari wa tuti meroasoia mutu we Kristusi wa.

Fio nari we ambori nayai na Kristusi ne maifo

⁶ Tonana mani, doroi meaine, meroaso Kristus Yesusi we mene Seng ampa. Ampafe todoni kontaio meweririati,

⁷ mewenewa nai, tuti metohoni we aiwong basarai we mebaungno mene meminohi toa wa nai. Todoni kontaio meroasoia mutu, kariri au-nauo mesobuaia wa. Tuti metohong mahikai pampang wei.

⁸ Metanansiau dohonao manei weanggari mea na ne kaiwo wetarai kaha fo awa menemirrorongwai sau we ne kaiwo masih kahai nana fe. Kaiwo nanai wiro na Kristusi kaha, mae inontaraine ene kaiwo emadura fine tuti na nunei ne hukumi karira tuti ne koangnei fine.

⁹ Metarami kaiwo kerira tonana fo fanai, weo fi kiai niai na Seng Allai mani samiriao niyai kontai na Kristusi, amani watioai na rahida weinontarai batang niyai na nufi ne, we I mani Seng dine, mai kariri Seng Allai.

¹⁰ Kristusi andino wenunggamiei we mano eru wang mananu fe na nunei tuti rorafaisi kiai ne. Tuti na meweboyari ria Kristusi nanai, Allai sami mea ambori fi kiai niai na Kristusi fo mani niai na mea kontai, amani niari mene meminohi toa wara tarai tuti mai pari ampa.

¹¹ Na meweboyari ria Kristusi nanai kontai mewesunati ampa, amani na metawing mene menemirrorong wesasari waia, wape wiro na sunatio inontaraine enariri foi kaha, mae na sunatio Kristusi niariri foi.

¹² Weo memarareha ria Kristusi ampa na mewe-baptisifo, tuti mesuwi aha riati na meroaso Allai ne

mambiriufo, amani mano duwi Kristusi na marareha rorong foi aha ma fo.

¹³ Raminde nanai, na Allai urengreafu, memararehara, weo menari sasari fefe, tuti wiro mewesunati kariri koang Yahudi foi kaha fefe. Wape raminde nanai kontai Allai duwi mea ria Kristusia ambori metarang aha. Yuairurang tane sasarifi ampa,

¹⁴ tuti fitoi na Hukumifoi, amani fio dapa tata tuti dinggai tata we sasari tanariri foi, Allai yabang kutui ampa. Piahui na aitabafoi, kebioi weru tata ampa.

¹⁵ Na aitaba nani Kristusi niari mano eru wang mananufe na nunei tuti rorafaisi kiai ne ene mambiriufei ahang kaha. Na ne mambiriufu kiraikobu ene mambiriufoa ewefieai ahang kaha tuti kaiwasa bitoya esaitesa we ewemambiriuhang kaha fo.

¹⁶ Ampafe dohonao metua inontarai siai etinggai mea we metohong sarawai na fi metang fo ete metunung fo fanai, ete we rahida fuba ohonsuara fo, ete embai waworu fo, ete rahida Sabati fo fanai.

¹⁷ Weo ne ohong kaririai nanai kai mani, manta wenuaninu arora kariri fianai aino ambori da ma fo, wape ne wetarai kariri finana ne mani, Kristusi.

¹⁸ Ampafe dohonao metua meara mano eparaise enari anggari we enemirorong tewawa tuti esomi we wewai fosa, ewedaya mea metawai

na ne mai mesobua fo fanai. Inontarainanisa mani, inontaraio esomi we fio sea na rorafaisi meu ewatiaoa fo tuti eboi earomi eteyo ansaino ewaitawanaia mai sewa mano siai fosa ne, wape ene enemittiuaitafo wiro wifiea kaha.

¹⁹ Mano tonana nesa mani, eweboyari ria wenunggamieifoi ahang kaha. Mae Kristusi andino wenunggamiei we ne Tarainei, amani ne jematinei. Weo yutawang tata tawebayari na ne Tarainei, mai kariri niaefo yutawang taraifo, tuti Allai wedayari fiabai tuti wemambiriuhang kaha.

²⁰ Masino memarareharia Kristusi weru nunei ne hukumi karira tuti ne koangnei mani, we fianie na meminohiwa mene tarai toyari inontarai nuneisa nina? We fianie mesomi we kaiwo inontaraine esomi weai tonina fe nina?

²¹ Eteyo, “Wiro meru finana fanai! Metang fiwana fanai! Mewaramifo tatahao finina fanai!”

²² Kaiwo etohonai tonana fo kariri fio wiro watai we numainu kaha fo. Finana mani manta kaiwo ariri tuti au-nauo inontarai nuneisa enari fine.

²³ Finanai taraie atioa mani, sewai paria, weo mano etohong kariria fosa atisa mani inontarai esomi paria disa, tuti toyari finanai mai kontai paria, we wedayara inontarai enemirorong tewawa (mae tarai kaha), tuti ehurung ene taraifoi na tapapa, wiro enari funong fio etohong wea fo kaha. Wape

finanai wiro kia mai kaha
tuti fiata kutea kahaia, na
erutawang ene taraifoi weru
sasario enemirorongfoi do-
hong wea fo.

3

*Mehatai weru menari
sasarifo tuti metohong fio
mararebanafo*

¹ Mesuwi ria Kristusi we
metarang waworu ampa,
ampafe mewati te we fi na
rorafaisi, kataio Kristusi
minohi na Allai warang
domoya fe fo.

² Menemituui we fio na
rorafaisi nanai terai wiro fi
nunei fanai.

³ Weo memarareha ampa
tuti mesuwi aha ne, tuti
ninaia mani metarang wa-
woru aha ria Kristusi na
Allai. Metarang waworu
nanai dadiwa, wiro wati para
kaharai.

⁴ Na rahida Kristusi, mano
tatarang nai nei, daraberahi
aha ma mani, mea kontai
mehawariai riati na ne sam-
bewaraio dedai fo.

⁵ Ampafe mehabi pari
fi karirao menemirorong
wesasari wai dohong wea
fo, toyari maninawafo, fi kia
rarika fo, meamamirirora
we menari maninawa fo, tuti
meuremi fiabai we ra fo, weo
uremi fiabai we ra mani, fi
karirao ne tarai toyari omi
we aririwang.

⁶ Fi tonana fo aino wedaya
Allai kesou inontarainesa
paria rai.

⁷ Raminde ne tonanafo
dawi mea fo, tuti mea kontai

anta metohong kariri ne
tonanafo.

⁸ Wape ninaia mani,
todoni kontai mehabi pari
ne karira nanai weru mea,
amanu mehasisou mea fanai,
menemirorong kerira we
mea fanai, meteibabera
mea fanai, tuti dohonao
kaiwo werarika fo ete kaiwo
karira fo, kuteai kawariai na
meboromiwa fanai.

⁹ Wiro metatofa wawera
mea fanai, weo ninaia mani,
mene tarai memo wai tuti ne
niari toa wa metawinai ampa
tuti mewaworu ampa.

¹⁰ Tuti mesobuo minohi
toaio waworu fo ampa, tuti
Allai, mano niari inontaraine
tata, yiwang mea mewaworu
pampang, ampare mene
tarai kariri mantauni tuti
metaroansoi na mai.

¹¹ Ne tonanafo wedaya
inontarainesa kiai emasi
ampa, wiro Yahudifosa siai
weru Yahudi kaha fosa
ahang kaha, ete inontarai
ewesunati fosa siai weru
mano ewesunati kaha fosa
ahang kaha. Tuti inontarai
aisei nesa* wiro siai weru
inontarai emamuna fosa†
ahang kaha, womingfosa
wiro siai weru Wyoming kaha
fosa ahang kaha. Weo na
inontarai nanisa manei ne
sewa fea kaha. Mae Kristusi
meiri kawuru andino sewa fi
siai doni konta fo tuti andino
weboyari ria tata kiai ne.

¹² Allai enewawu mea
paria tuti diri mea we ne
inontarai terai tuti ambori
memararebanai. Ampafe
todoni kontaio mearomio
inontarai, menemirorong

* **3:11** Ete inontarai Barbar fosa. † **3:11** Ete inontarai Skiti fosa.

denteng we inontarai, metu menemirorongwaia tewawa, memanang, tuti metawang mea we inontarai siai.

¹³ Dohonao merirora funoma fanai, mae mea kiai metawang menemirorong-waia mutu, masino manei niari sarafiea mani meteiai wawera mea. Sempaisi na enerorong mirising deiai mene sasariwai, ampare mea kontaio meteiai wawera mea tonanai.

¹⁴ Tuti neo sewa nanai kiai mani, menemiwawu wawera mea fo, metohonai ne foniai, weo menemiwawu wawera mea nanai dawi ruhi meara meweboyari na mai.

¹⁵ Seng Kristusi mani mano wedaya mea meminohi na maifo dine. Tawini ambori yu wemananu na menemirorongwai pampang. Weo Allai sahu mea we meweboyari, ambori menayai na Kristusi ne mai nanai. Tuti metohong mahikai we Allai pampang.

¹⁶ Kristusi ne Kaiwofo, todoni kontaio tuanaia mutu na menemirorongwai, ambori mesawai na metaunau wawera mea tuti mesua wawera mea we menari ne bengfo, tuti merohi rarung masmuri fo, rarung fiai fo, tuti rarung siaio we Sempaisi fo, tuti metohong mahikai we Allai na menemirorongwai.

¹⁷ Fi kiaio menari fo ete memadura fo, finanai menari ete memadurai na Seng Yesusi wonongfo, tuti metohong mahikai we Dai Allai na wonongfo kontai.

Paulusi deunau kariri na munu rorong fo toafo

¹⁸ Wiwingne mea, mesomi we mene mangnesa, weo nanai mai we inontarai Kristenai ne.

¹⁹ Mangne mea, menemiwawu mene wiwingnesa, wiro metapapasa fanai.

²⁰ Arikangne mea, metaramididau mene wawafo suru tuti na fifiani kontai metohong kariri une kaiwofo, weo ne tonanane aino Allai eneoa ne.

²¹ Wawa mang wa mea, dohonao menari mene arikangwasara enemirorong pirahai we mea fanai, weo menari tonana mani enemirorong fituayai.

²² Doroi mewewomingwa mea, metohong kariri mano mewewoming wesa na nufi nini ene kaiwofo. Dohonao metohong kariri ene kaiwofo tonanai na rabuang bo ewati mea foi tera fanai, we mesera terai we efiai mea fanai, mae metaramididausa na menemirorong mesi tuti na mesomi we Sempaisi.

²³ Fi fianai aino etemi mea weai we menari fo, todoni kontaio menari na menemirorong mesi, menari toyari Sempaisi dino merufi wei fo, wiro inontarai batang manei kaha.

²⁴ Weo mearomioaifa we ambori mesobu fiembaitafo weo fi meru fo ria Sempaisi ki, fianai aino Sempaisi meinenamai we ne inontaraifosa fo, finanai aino ambori dohonai we mea ne. Weo mano merufi wei tera foi mani Seng Kristus meiri.

²⁵ Tuti mandoni dino dohong sarawa mani, ambori sobu aiboifo we fi sarawai

niari nanai, weo Sempaisi wiro deto we inontarainesa manei siai weru manei ahang kaha.

4

¹ Doroi mano meru mene womingwa mea, todoni kontaio menari sua mene womingwasa na mai tuti metohong fi beng fo tuti masifo wesa. Mearomioaifa weo mea kontai merufi we mene wenunggamiaio yu mea foi na rorafaisi kontai.

Kaiwoariri kariri tawenadi tuti kariri todoni tanari sua mano eroaso kaharai fosa

² Todoni kontaio mewenadi pampang, tuti metanansiau weduarai tuti metohong mahikai we Allai.

³ Mewenadi kontai we amea ambori Allai dohong rang we amea we kaiwo amemadura ne, ambori amewuwu Kaiwo dadiwara nanai kariri Kristusi tuti todoni dohong rang we inontarainesa kiai ne esobu faririfo. Kaiwo nanai wedaya iwatai na aitamu rorong fe nina.

⁴ Mewenadi we yau ambori kaiwo nanai imaduraia kasau, weo finanai aino masih we inari ne.

⁵ Todoni kontai na metohong toa wa, mesawai na menari sua inontarao eroaso Kristusi kaha fosa, tuti dohonao metua rahidafo nai funoma fanai, mae merurai we metainawi kariri mene meroasoawa wesa na mai.

⁶ Todoni kontaio kaiwo memadura wa, memadu kaiwo mararebanaio kia samberawafo we inontarai

siai, toyari fiangno indawani na ai ambori miaing, ambori mewaitawang kariri todoni meroao inontarai ene kaiwofo na maifo.

Kaiwo kafe

⁷ Tihikusi, tane doroi taenemiawuti nei, ambori deikariri maino fifiani kontai kariri yau fo we mea ki. I mani mangfatao dohong kariri fio Sempaisi demi we niari fo na mai foi, tuti inontaraio yufi na mai we Sempaisi ria amea dine.

⁸ Yemi dontai we mea mau nina mani, we deikariri kariri amenai toa ne we mea ambori mewaitawanai tuti ambori fiata mea menemiroongwai mitubaru aha.

⁹ Onesimus kontaio ambori dontai ria Tikhikusi mau rai, i mani mene inontarai manei dine. Onesimus nini mani doroio taenemiawuti dine, tuti inontarai ameroasoi kontai, dohong kariri Sempaisi ne Kaiwofo na mai. Uruino ambori uraikaririai we mea kariri fi kiaio amesobuai na nina ne ki.

¹⁰ Aristarkusi mano wiatai na aitamu rorong fe ria yau nini denatu mahikai we mea. Tonanai kontai we Markusi, Barnabasi ne arurarafoi. (Mesobu kaiwoariri kawuru ampa kariri i, we dontai mau mani, metamang wei na mai.)

¹¹ Yesusi mano wonongno Yustusi konta nei denatu mahikai kontai we mea. Na inontarai Yahudi eroaso Seng Yesusia nesa mani, inontarai mantoru nini sitoru terai itoruno itorufi ria yau, ametohong kariri

fianai aino Allai demi amea wea fo ne, amani antowuwu ne weMananu Rorong fo. Itofata yau na mai paria.

¹² Epafrasi denatu mahikai kontai we mea. I kontao mene jemati manei dine, tuti Kristus Yesusi ne woming dine. Dutang tuti mea pampang paria we Allai, dutang Allai we ambori dohong mea metoaria mutu na mene meroasoawa tuti mewemambiri, ambori metohong kariri Allai ne dawiafo na mai.

¹³ Iwati terai we yufi mamboni paria we mea tuti we inontarai na Laodikia fosa tuti Hierapolis fosa.

¹⁴ Dokteri Lukasio tane maniwowiri taenemiwawuti foi tuti Demasi uranatu mahikai we mea kontai.

¹⁵ Meteikaririai kontai we mene doroi inontarai Kristen na Laodikia wasa, tuti we Nimfai tuti we jematio ewenadi na ne munuwai sa, weo yenatu mahikai wesa kiai.

¹⁶ Kaiwo anatu yenatuai mau ninai metatoraia mani, merurai we ambori jemati na Laodikia fosa etatorai kontai. Tonanai kontai we kaiwo anatu yenatuai we jemati na Laodikia fosa, merurai kontai we ambori mesobuai we metatorai kontai.

¹⁷ Meteikaririai we Arkhipusi toninai, “Todoni kontai nari kariri fianai aino wobuai we nari wa kai we fata Sempaisi.”

¹⁸ Mahikaifeai na yau Paulusi. Kaiwo mahikai ninai imesiri yauno isoi na mantaung yau warahune.

Mearomio yau na inayai na aitamu rorong fe nina!

Kadono Sempaisi dohong ne bengfo arora we mea kiai.

Kaiwo Anatu Bo Reantenang Na Paulusi We Jemati Na Tesalonika

Kaiwo dedung we 1 Tesonika

Bendari Tesalonika, fafongfa mani, andino webendari fuba we nu Makedonia foi ne, tuti kataio mano na parenta Roma foi eminohi nai we eru nu Makedonia foi sentenang. Tarahio ne inontarai enayai nai fosa ewe-200.000 rai. Maneiru eweYahudi wape ne fiaufoi mani inontarai Yahudi kaha saine, amani mano esomi we aririwang tuti seng wetarai kaha.

Na bendari Filipi Paulusi, Silasi, tuti Timotiusi itorontai to Tesalonika tuti na wanai itowuwu Kaiwo Mahikai fo wesa ampefe maneiru teai eroaso Yesusi (Rasuli 17:1-9). Wape waroi ahang kahai mae Paulusi itosobu dadira ria Yahudifosa tuti inontaraio eroaso kaha fosa, enari kanggani sitoru. Ampefe mano eroaso fosa etanatu sitoru to katai siai bei aha (Rasuli 17:10).

Wape Paulusi enerorong we detisa aha weo enemamea wesa paria, dohonao eroasoafu tupa dawohi fe. De dontai wesa wape fi weduari, ampefe demi Timotiusi dontai to Tesalonika aha we suambawasa (1 Tes. 3:1-2). Mayeai Timotiusi daraberahi, kia kaiwo karirisa we Paulusi aha, deisaharai we

mano eroasoai na Tesalonika fosa esodai dadira ria kaiwasa siai fosa we eraria Yesusi fefe. Tonanai ki wape ene eroasoafu mutubarufo rai. Ampefe Paulusi soi kaiwo anatu nini we ambori ewaitawang todoni mirising karirisa, todoni arosa, tuti enerorong dohong we detisa aha.

Inontarai Tesalonika fosa arahio eroaso Yesusi ampefe Paulusi soi kontai kariri todoni eminohi toa fo weo eweinontarai Kristen fefe (4:1-12). Eserawawerahai kontai kariri fianai aino mano emarareha fosa esobua fo, amani Yesusi daraberahi kaharai, ambori eworu ete esuwi aha kontai ki. Ampefe soi kontai kariri rahidao Seng Yesusi daraberahi ma foi tuti rahida mansuwi-suwi foi (4:13-5:11).

Kaiwo na suratinei deto kutuai toninai:

1:1-3:13 Kaiwo kariri Paulusi tuti inontarai Tesalonika mano eroaso Kristusi fosa.

1:1-10 Paulusi dohong mahikai we Allai we inontarai Tesalonika fosa eroasoafu mutu fefe.

2:1-12 Paulusi soi kariri minohi toa fo na mai, na rahida minohi rahansa fo.

2:13-3:13 Paulusi soi kariri yurai paria we deti euremifo aha.

4:1-5:28 Paulusi ne aunau dohonai wesa fo.

4:1-12 Fi kariri todoni inontarai Kristen fosa eminohi toa fo.

4:13-5:11 Aunau kariri mansuwi-suwifo tuti

rahida Seng Yesusi
daraberahi nai ma foi.
5:12-22 Kaiwo aunau
kariri todoni mano
eroasoa fosa ewebo-
yarifo.

5:23-28 Kaiwo kafe.

Mahikaifeai

¹ Weo doroi mea na je-
mati Tesalonika, amani inon-
tarao mesomi we Dai Allai
tuti Seng Yesus Kristusi wa
mea.

Kaiwo anatu ninai na
antoru, amani yau Paulusi,
Silasi tuti Timotiusi. An-
toenemitawanaifa kadono
Allai dohong ne bengfo arora
we mea tuti dohong mea
menumiruainso ne maifo.

*Paulusi itofiai Allai we je-
mati Tesalonika fosa ene eroa-
soafo*

²⁻³ Antorohong mahikai we
Allai we mea kiai. Na rahida
neungne antoaromi mea
kiai na antone nadi rorong
ne. Antowenadi we tane
Dai Allai mani, antorutang
tuti mea pampang. Weo
antoaromioai pampang
kariri todoni metainawiai
na metohong toa wa we
meroaso Kristusifo, tuti
todoni menari fiani kontai
weo mefata inontarai siai fo,
weo menemiwawusa fefe.
Kontai antoaromioai kariri
todoni metawang meara
mutu we menemitawang
tane Seng Yesus Kristusi we
ambori daraberahi aha ma
fo.

⁴ Doroi meaine, Allai
enewawu mea. Antowait-
awanaifa weo Allai diri
mea tuti sahu mea we ne
inontarai ampa.

5 Antowitzawang tonanai
weo wiro na kaiwoariri
arora antowuwu Kaiwo
Mahikai fo we mea kaha,
mae antowuwuai na Allai
Nuaninufoi ne mambirufo,
tuti kaiwo nanai antoroasai
tarai na antoenemirorongne.
Finanai mewaitawanaifa
ampa, weo mewati terai
kariri antorohong toa ne tuti
kariri fianai aino antonari
we mea na rahida antonai
rahang mea nanai.

⁶ Kontai metohong kariri
antorohong toa ne ampa, tuti
kariri Seng Yesusi dohong
toa fo ampa. Donio mesodai
dadira bitoya tonanai ki,
wape Allai Nuaninunei do-
hong mea memararising we
metohong kariri ne Kaiwo
antoraiririai we mea fo.

⁷ Na tonanane, mewekasi-
nai we inontarai eroasoai
fubao enai na nu Makedonia
foi sentenang tuti na nu
Akhaya foi, amani ewati mea
tonanafo, ewaitawanai we
todoni eroasoaf.

⁸ Weo na fianai aino
menari nanai, wedaya kai-
wasa bitoya na nu Makedo-
niai foi tuti na nu Akhaya
foi etaramio Kaiwo Mahikai
fo kariri Kristusi. Nanai
tera kaha, mae kaiwoariri
kariri todoni meroaso Allaifo
dafai wariae kawuru to katai
doni kontai. Ampafe na
doni kontai antoraoa fo, wiro
antomadu fieai kariri mea
we kaiwasa nanisa ahang
kaha,

⁹ weo kaiwasa antoraoa
nanisa kiai emaduraia fuba
kariri todoni metamang
we antoru na maifo, na
rahida antora we mea mau
nani. Emadu kariri todoni

metawing aririwangno raminde mesomi wesa we mene sengfo, mae mera we Seng Allai, mano wetarai tuti mireha na wea kaha foi, we mesomi wei fo.

¹⁰ Emadurai kontai kariri todoni metamang we Yesusi we daraberahi na rorafaisi aha ma fo. Amani Yesusi Allai ne Kaisungno duwiri na marareha rorong foi kawuruua fo. Yesusi nani dino feriri tata weru aiboi ambori tasodairi ria Seng Allai fo.

2

Paulusi soi kariri fi niari na bendari Tesalonika fo

¹ Doroi meaine, mantaung mea mewaitawanai ampa, weo rahida antorontai we mea mau antorufi we mea wai nani, fi antoru fo wetarai fuba pari ampa.

² Mewaitawanaifa weo wiro antorontai we mea to bendari Tesalonika kaharai mae, kaiwasa na bendari Filipi fossa enari kanggani tuti etei kanggani antoru. Antosodai ne tonanafo ki, wape Allai fiata antoru donio na dadira rorongno kaiwasa enari we antoru fo kontao antowemambiriu we antowuwu ne Kaiwo Mahikai fo we mea.

³ Weo kaiwo antorurai antomadurai we meroasoai nanai, wiro fi sarawa fea kaha, tuti wiro antomadurai we ambori antosobu fi we antoru kaha, ete antorurai we antopampamu mea kaha.

⁴ Kontai antosera we kaiwasa ambori enemio antoru kaha. Wape antomadu kariri fianai aino Allai eneoa fo terai. Weo Allai deitawang

taenemirorongfuisi tuti detio antomai na urengreafu we yoaso antoru we antowuwu ne Kaiwo Mahikai fo ampa.

⁵ Mantaung mea mewaitawanaifa ampa, weo wiro antoborom i wemereha we mea kaha, ete antoradiwa fieai na antoenemirorongnei we mea kaha, amani fi toyari antosera we ra ete doi we antoru. Allai mantauni deitawang ne tonanane.

⁶ Tuti wiro antosera we inontarai etaparanding antoru kaha, nanafo wiro na mea ete inontarai siai.

⁷ Tarai, weo Kristusi ne rasilu di antoru, ampare tofino antomai kontai we antorutang we fieai ria mea toyari doi ete fiang. Wape wiro antomaya we antowedayara mea mesobu maraba kaha. Rahida antonai rahang mea tonanaifa ne, antomanang we mea, antonari mea toyari wiwing manei niari sua ne arikangfoi na mai beyari.

⁸ Antoenemiwawu mea fuba paria, ampefe wiro antorairiri te Kaiwo Mahikai fo titou we mea kaha, mae na antoenemirorong mirising antomainenang we antonari fifiani kontai we antofata mea nayai.

⁹ Weo doroi meaine, mearomiaoifa nendai, kariri todoni antorufi pampang fo. Diru rahida antorurai mambiriu we antosobu fiang siai, na rahida antowuwu Kaiwo Mahikai na Allai we mea fo. Ambori wiro antowedaya mane wobu maraba we antoru fanai.

¹⁰ Mewati terai, na rahida antonai rahang mano meroa-

soa wa mea, kariri todoni antoenemirorongnei mi-rarebanai, antomasi, tuti todoni antonari sarafiea kaha fo. Allai deitawanai kontai.

¹¹ Mewaitawanaifa todoni antonari sua mea toyario wawa mang manei niari sua ne arikangfosa,

¹² amani antoranggewa mea ambori menemiro-rongwai mitubaru, tuti antomadurai na tapapa we mea pampang ambori meto-honafo mai kariri todoni Al-lai ne inontaraine tatohong toa fo, weo na tonanane Allai firable we mea. Weo Allai sahu mea kawuru ampa, we meminohi na ne weMananu fo tuti na ne sambewaraio dadai fo.

¹³ Fi siaio wedaya antorohong mahikai we Al-lai pampang kontaifa ne mani, rahida antohorang Kaiwo Mahikai we mea fo metafu na mai paria, amani metafurai tarai we Allai ne Kaiwo Mahikai medura fine, wiro inontaraine amene kaiwo amemadura fine kaha. Kaiwo wetarai nanai we-mambiri na mano meroa-soa ne menemirorongfuisi.

¹⁴ Doroi meaine, mene tarai kariri Allai ne jemati na nu Yudeao eroaso Kristus Yesusi fosa. Ea mani esodai dadira ria ene inontarai Yahudi siai fosa. Mea kontai tonanai, amani mesodai dadirafo ria inontaraio mene nu boyari fosa we meroaso Yesusi fefe, ne tarai kariri Allai ne jemati na Yudea fosa we esodai dadirafo ria ene inontarai Yahudi fosa fo.

¹⁵ Inontarai Yahudi nani

saino emung Seng Yesusi, tuti na fafongfa emung nabifosa, kontai etata antoru weru ene kataifoi. Mandoni kontaio emamuna wei, tuti Allai wirosobua kahaia.

¹⁶ Erurai we etamuna saya antoru, ambori wirosantuwu kaiwo kariri todoni Allai feriri inontarai siai konta fo we Yahudi kaha fosa fanai. Ampafe ene enari tonana ne, wedaya enari sasari bitoya karerai ampa, paria wedaya Allai dohong aiboi maraba paria wesa.

Paulusi deisaharai todoni dawiai we dontai suambawa inontarai Tesalonika fosa nariai aha

¹⁷ Wape doroi bohiwa meaine, antohatai weru mea tourai, paria antonai waroi weru mea toninai ki, wape antoenemirorongnei dohong we antosobu mea aha. Donio antorurai paria we antorarabera antoru antowati mea aha.

¹⁸ Antorurai tonanai we antorontai mau, tuti yau Paulusi, iruraifa tonanai we beiru tea ampa. Wape Saminseni niari wedua antoru donio antorontai mau kaha.

¹⁹ Antoenemirorongnei dohong weai tonanai, weo tarai, meroaso Kristusi wa wedaya antoenemirorongnei tuti antomararising. Weo rahidao tane Seng Jesus Kristusi daraberahi aha ma we fianduhi tata, tatoari na arongreafu mani, mea na jemati Tesalonika wa meaino mewedaya antoboi antoaromine.

²⁰ Tarai, meaino metohona mani, antoboi antoaromi tuti antomararising ne.

3

Paulusi medu kariri rahi-dao denatu Timotiusi dontai wesa fo

¹ Antoenemirorong we antosobu mea ahera ne wedaya antoramang ahang kaha mae antohutuai we aunayai na bendari Atena mae,

² auranatu aune doroi Timotiusi we mea mau nanai. Timutiusi nini mani Allai ne mangfata manei dine, i yufi kontai ria auru we antowuwu Kaiwo Mahikai kariri Kristusi fo. Auranatui mau we fiata mea, ambori meparaise tuti mewemam-biriu we meroaso kanggunai.

³ Ambori na tonana ne, na dadira rorong tasodaira ne, manei na mea wiru su to fui kaha. Mantaung mea mewaitawanaifa ampa weo dadira rorong tasodairi nani, Allai yoa weai ampa we tasodairi.

⁴ Rahida antonayai ria mea na nana wa, antorairiri kaririai we mea ampa, we ambori tasodai dadira ria inontarai siai ki. Tuti mantaung mea mewaitawanaifa ampa we finanai tarai kaririai ampa.

⁵ Aino wedaya yemang aha kaha mae yenatu Timotiusi we mea mau ninai, weo yohong weai paria we yeitawang kariri todoni mene meroasoawa. Weo imameataifa dohonao Saminseni weanggari mea sofa mea metau wei fe. Nana

mani fi antorurai tutira ne tupa dawohi.

Kaiwo mahikai Timotiusi kia aha ma kariri todoni jemati na Tesalonika fosa eroaso fo

⁶ Wape arahio Timotiusi daraberahi kawuru ria mea we auru ma ninai. I kia kaiwo mahikai kariri mene meroasoawa, tuti todoni menemirorong inontarai siai wa. Deisaharai kontai kariri todoni mearomio antoru na menemirorong mirising tuti metohong we mewati antoru ne, ne tarai kariri antoru kontai antorohong weai paria we antowati meawa.

⁷ Ampafe donio, doroi meaine, na dadira rorong ne tuti na enari kanggani antoru ne, wiru wedaya antoenemirorongnei fituaya kaha, mae antomirising. Weo kaiwo mahikai antotaramioai kariri meawa tuti kariri todoni meroaso Kristusi wa dohong antoenemirorongnei mitubaru aha.

⁸ Kaiwo ninai dohong antouremi tafa na yai tuti antomirising paria, weo meroaso kanggunai tuti metoaria mutu na Sengnei fefe.

⁹ Antowaitawang kariri antofaraise toa ne ahang kaha na antorohong mahikai we Allai ne, tutira fino mirising antonumiruainsoai kariri mea na Allai arongreafe ne.

¹⁰ Diru rahida antorutang we Allai paria, we antosobu rahida we antorontai mau antowati meuremiwa aha, ambori antofata mea na

mene meroasoawa, ambori meroasoai na mai pari aha.

¹¹ Ninaia mani, kadono tane Dai Allai mantauni tuti tane Seng Yesusi uro-hong rang we antoru we antorontai antosobu mea aha.

¹² Kadono Sempaisi wedaya mea menemiwawu wawera mea fuba aha tuti menemiwawu inontarai siai fuba aha, ne tarai toyari antoenemiwawu mea ne.

¹³ Na tonanane Sempaisi dohong menemiroongwai mitubaru, ambori na Dai Allai arongreafo memararebanai tuti wiro metohong sarawa kaha, na rahida tane Seng Yesusi tuti ne wewai mararebanai rabuangfoi daraberahi nai ma fo.

4

Fi kariri inontarai eroasoa fosa todoni eminohi toa fo

¹ Doroi meaine, kaiwo bitoya itoi kaririai kai ampa, wape yeo itoi fieai kontai aha. Na Seng Yesusi wonongne, antorutang mea na tapapa tuti antoranggewa mea, we merurai mambiriu aha we metohong kariri aunauo raminde nanai mesobuaria antoru, kariri todoni meminohi toa wa, ambori Allai firaise we mea. Tarai antowaitawanai we meminohi toa wa tonanai ampa, wape antoranggewa mea weo metohong kaririai na mai pari aha.

² Weo mewaitawang kariri kaiwo ametemi mea wea fe na Seng Yesusi ne mambiri-ufu ampa.

³ Weo fi Allai dawi weaifa we menari ne mani, menemirorongwai mirarebanai tuti mehatai weru maninawafoi kiai.

⁴ Nana mani mansiari-mansiari wau rurai we borara nemu taraiwai weru maninawafoi, boitawang weduari ambori murarebanai.

⁵ Dohonao maninawafoi tebung wedua uremuwara ambori amamuwa rirora funoma weaifa, kariri mano etaroanso Allai kaha fosa enarifo fe.

⁶ Tuti na fi tonina ne dohonao manei niari sasarifeai we ne doroi uroasoai ruhia foi fe, toyari enerorong dohong we ne doroi ne wiwingfoi ete ne mangfoi. Weo Sempaisi ambori dohong aiboi we inontarai enari sassari tonana nesa ki, kariri fianai aino raminde antoraretawang mea weai ananai.

⁷ Allai sahu tatane wiro we tamaninawa kaha, mae we tamararebanai tuti taminohi na mai.

⁸ Ampefe mandoni dino deiaya kaiwo aunau nina mani, wiro deiaya inontaraine antoru kaha, mae deiaya Allai mano dohong Nuaninu Mirarebana foi we meawai wa.

⁹ Yo, tuti kariri todoni menemiwawu mene doroifosa fo, tarahio yeunau mea weai ahang kaha, weo mantaung mea mesobu aunau ria Allai kawuru ampa, kariri todoni menemiwawu wawera meawa.

¹⁰ Kasau ampa, we menemiwawu mene doroi eroasoa wasa kiai na nu Makedonia wai ampa. Tonanai ki, wape

antoreyo antoranggewa mea aha we metohong kariri fini-nai na mai paria aha.

¹¹ Ne mai mani merurai we meminohi na mai ria inontarai siai, tuti wiro mesoro kaiwo fanai. Meuremi maya we merufi we mesobu fiang ete doi we fiata mea nai. Menari tonanai kariri fianai aino raminde antomadurai kawuru we meara wa.

¹² Ampafe na tonana ne, wiro menemitawang inontarai siai we efata mea kaha, tuti inontarai eroaso Allai kaha fosa ewati meminohi toa fo nanai etato mea.

Fi kariri mano eroasoai emararehara fosa esobuai na rahida mansuwi-suwi fo

¹³ Doroi meaine, antorohong weai paria, we dohonao meserawawera kariri fifianai aino mene doroio emararehara fosa esobua fo, ambori wiro menemirorong fituayai tuti mesai metaidu karera fe kariri inontarai siaio wiro enemitawang mansuwi-suwi kaha foi fe.

¹⁴ Weo tata mani taroasoai we Yesusi mireha tuti suwi kawuru ampa. Aino wedaya taroasoai kontai we Allai ambori duwi kaiwasa fuba eroaso Kristusi tuti emararehara fosa, we kiasara eminohi riati.

¹⁵ Kariri ne nanaifa mani, antoraikaririai we mea mau, we Sengnei mantauni ne aunau medura ne toninai, na rahida Seng Yesusi daraberahi ma foi mani, mano tatarang ne tata wiro tanefafong tasobu Yesusi weru mano emarareha fosa kaha.

¹⁶ Weo na rahida bonani Seng Yesusi mantauni biari na rorafaisi meu, tuti sahu na raofuifoi fiabai paria, kontai wewai mano dedai foi sahu, tuti manei biui Allai ne songgerifoi. Tuti inontarai eroaso fosa, mano emararehara fosa, Allai duwisa etoa fafong.

¹⁷ Akawuru wori, mano taminohi tatarang paria sobu rahida bonani, tahontaisa, Sengnei yuai tata ruhiae na kafafe rorong fo we tasobui na rorafaisi. Ainanaya taminohi riati wenumainu.

¹⁸ Ampafe metaunau wawera mea na kaiwo nanai ambori menemirorongwai mitubaru.

5

Mainenang we rahida Sengnei daraberahi aha ma fo

¹ Doroi bohine meaine, tarahio wiro isoi kaririai we mea aha mau kaha kariri rahida bodoni andino Sengnei daraberahi nai aha ma fo.

² Weo mantaung mea mewaitawanai ampa, weo rahida Sengnei daraberahi nai aha ma foi, da tantuma toyari we da we kiamananapi na diru rabuang, ampafe manei wiro deitawana kaha.

³ Inontarai eroaso kaha fosa enemittiuaitaifa weo eminohi na mai ampa, wiro esobu dadirafeai ete mamunafeai ahang kaha. Wape na rahida bonani faini esodai ne karirafo tuti eworu na tantuma ki. Finanai esodairai na tantuma paria,

ne tarai toyari wiwinsanai amainafoi pirahai tantuma we deyo minohi. Tuti manei wiro kiaharai weru ne karira nana kaha.

⁴ Wape doroi mea mani wiro inontarai menayai na manantiti rorong fo di mea kaha, weo metaroanso Sempaisi fefe. Ambori rahida Sempaisi da aha ma foi, wiro mesoi mea kaha, ne tarai toyari mananapio da tantuma ma fe.

⁵ Mea kiai mani inontaraio menayai na Kristusi ne sambewara rorong fo di mea. Tuti tata mani wiro inontaraio tanayai na mamantiti rorong ne di tata kaha, ete arikang mamantiti di tata kaha, weo inontarai eroasoa kaha fosa ansaino enai na mamantiti rorong fo ne.

⁶ Ampafe dohonao tatena kariri inontarai siai nanisa fe. Mae todoni kontaio tamainenang tatamang tuti tabiriu we tateiaya ne kari-rafo.

⁷ Weo diru wori kaiwasa etena ki, tuti mano emayeru biriu nesa kontai diru wori etunung ye emayeru ki, wiro emainenang etanansiau kaha.

⁸ Wape tata mani inontaraio tanayai na rahidafo di tata, amani na sambewarai rorong fo. Ampafe tateiaya ne mai kaha fo. Taroaso Sempaisi mutu tuti taenemimawu inontarai siai, ambori tawemambiriw we tatoaria mutu. Nana mani tane tarai toyari afai mamunaao sensuni na ansung besi ambori doaria mutu ma mamuna rorong fo. Kontai

toyari afai mamuna foi we sata ne sapewi besi foi we weduari fo, tata kontai taenemita wanaia mutu we Allai ambori feriri tata ki. Fininai ne tarai toyari sapewi besi we wedua tata weru ne mai kaha fo.

⁹ Weo Allai wiro yuai tata we ambori tasobu aiboifo kaha, mae we feriri tata na tane Seng Yesus Kristusi.

¹⁰ I mireha we tata ambori na rahida daraberahi nai aha ma fo mani, rabuang bonani tamarareha kawurua ete, tatarang te, taminohi riati.

¹¹ Ampafe metaunau wawera mea tuti mefata wawera mea, kariri fianai aino menari kawurua nanai, ambori menemirorong mitubaru aha.

Kaiwo aunau wefuiiai

¹² Doroi meaine, antorutang mea we metato mano erurai paria we erufi bitoya we mea fosa, amani ewiwiaing mea na Sempaisi tuti esua mea we menari fi mai fo.

¹³ Metatosa we inontaraio atosa disa, tuti menemimawusa paria weo fi eru we mea wa. Meminohi na mai tuti meweboyari.

¹⁴ Antoranggewa mea kontai we, mesua mano ewata etena funoma fosa ambori erufi, metaunau mano enemimameata fosa ambori enemitawanai, tuti mefata inontaraio eroasoa mutu kaha fosa. Memanang we mandoni kontai.

¹⁵ Metanansiau, manei dapa mane wau mani, bapai ahang fanai, mae meruraifa

we menari ne bengfo we mea
tuti we mandoni kontai.

¹⁶⁻¹⁸ Inontarai meweboyaria Kristus Yesusi di mea, donio na todoni feai kontai memararising pampang, tuti mewenadi pampang. Na fifiani kontai metohong mahikai we Sempaisi pampang, weo nanai aino Allai dawi weaifa ria mea we menari ne.

¹⁹ Dohonao meteiaya fio Nuaninu Mirarebanai foi niari fo fe.

²⁰ Dohonao mesahu tawang kaiwo Nuaninu Mirarebana nei dohonai we mea wa fe.

²¹ Kaiwoariri fuba metaramioa fo, metitua weaifa, we kaiwofo tarai na Allai ete bireri e. Ambori ne wetarai na Allaifo aino merutawanai.

²² Mehatai weru fi mai kaha fo kiai.

Kaiwo kafe

²³ Kadono Allai mantauni, mano dohong tata tanumiruainso ne maifo, niari mene-mirorongwai mirarebanai.

Kadono deitawang wedua mea paria, ambori na fi menemirorong dohong wea fo, fi menemitituaita fo, tuti fi menari fo, wiro manei dohong sarawa kaha, pariao rahida tane Seng Yesus Kristusi daraberahi aha ma fo.

²⁴ Allai niari kariri finana rai, weo i sahu mea kawuru ampa we merariati fefe, tuti fianai aino medura fo dohong karirai.

²⁵ Doroi meaine, mewenadi we antoru kontai.

²⁶ Metaikaririai we tane doroiwasa we antoenemi-wawusa tuti antoranatu ene mahikaifea.

²⁷ Na Sempaisi wonongne, yutang mea na tapapa we metato kaiwo anatu nini we tane dorio eroasoa wasa kiai.

²⁸ Kadono tane Seng Yesus Kristusi dohong ne bengfo arora we mea.

Kaiwo Anatu Bo Boru Na Paulusi We Jemati Na Tesononika

Kaiwo dedung we 2 Tesononika

Inontarai eroasoai kawurua na bendari Tesalonika fosa enemiwawera weaifa kariri rahida Seng Yesusi daraberahi nai aha ma foi. Maneiru teai na sa enemitituai eteyo rahida Sengnei daraberahi nai ma fi kiawariai ampa, wape Sengnei mantauni mani ewatiao kaharai. Maneiru teai kontai aha mani eteyo rahidafoi kefang ampa, ampefe emaya we erufi ahang kaha, mae eminohi etamang wei terai.

Ampefe Paulusi, Silasi, Timotiusi itosoi kaiwo anatu nei we ambori na dadira rorong esodaira fo etoaria mutu na Sengnei. Deunausa kariri rahida Sengnei daraberahi nai ma foi, tuti deretawansa ambori eroasoia mutu, eminohi na mai tuti eru ene fi na mai.

Kaiwo na suratinei deto kutuui toninai:

1:1-2 Kaiwo reantenang.

1:3-2:17 Aunau kariri Seng Yesusi daraberahi ma fo tuti dohong aiboi we inontarai eroaso kaha fosa fo.

1:3-12 Paulusi dohong kaiwo we fiata mano eroaso fosa etoaria mutu na Sengnei, weo esobu dadira bitoya na mano eroaso kaha fosa fefe.

2:1-12 Aunau kariri mano kerira pari foi ne dariafo.

2:13-17 Aunau kariri todoni Allai diri mano eroaso fosa we ne inontaraifosa.

3:1-18 Kaiwo kafe.

3:1-5 Paulusi dutang mano eroaso fosa we etutang tutiri we Sempaisi.

3:6-15 Aunau kariri mano emaya we erufi ahang kaha fosa.

3:16-18 Paulusi dohong mahikai wesa tuti kife ne kaiwo anatu nei.

Mahikaifeai

¹ Weo doroi mea na jemati Tesalonika, amani inontaraio mesomi we tane Dai Allai tuti Seng Yesus Kristusi wa mea.

Kaiwo anatu ninai na antoru, amani yau Paulusi, Silasi tuti Timotiusi.

² Antoenemitaawanaifa kadono tane Dai Allai tuti Seng Yesus Kristusi urohong une bengfo arora we mea tuti urohong mea menumiruainso une maifo.

Paulusi itofiai Allai we jemati Tesalonika fosa eminohi toa fo tuti itowenadi wesa

³ Doroi meaine, antoro-hong mahikai we Allai pampang we mene metohong toa wa. Tutti todoni kontaio antonari tonanai, weo meroaso Kristusi na mai pari aha tuti menemiwawu wawera mea wa fuba pari aha fefe.

⁴ Ampafe rahida anto-tuambawa Allai ne jemati siai fosa mani, antomadurai

karirio mea wesa. Antora-paranding mea wesa, kariri mene meroasoia mutu tutu metawang meara mutu na Sengnei fo, na dadira rorong mesodaira fo tuti na fi kaiwasa enari kanggianai we mea fo.

⁵ Fianai aino mesodairai nanai deinawiai weo Allai mani, kiutu kaiwo na mai. Weo meroasoai ampefe mesodai dadira bitoya. Nanai wedaya Allai suhu mea we memai we meminohi na ne Mananufo.

⁶ Allai mani mano kiutu kaiwo na mai dine. Ampafe dadirao inontarai siai enari we mea nanai, Allai ambori niari wesa kontai tonanai ki,

⁷ tuti yuai mea weru dadira rorong mesodaira fo, tonanai kontai we antoru. Finanai kawariai na rahida Seng Yesusi biari na rorafaisi meu, na adia rorongno denggararu foi, tuti ne wewai rabuangno ewemambiriu fosa fo.

⁸ Biari meu yu aiboiso inontarai etaroanso Allai kaha tuti etohong kariri Kaiwo Mahikai kariri tane Seng Yesusi kaha fosa.

⁹ Inontarai nanisa ambori esodai aiboifoa eworu we fitawafa, tuti sosa to boriei weru urengreafu tuti weru ne mambiriu sambewara fo.

¹⁰ Finanai ambori kawariai na rahida daraberahi nai ma foi, ambori ne inontarai emararebana fosa, amani kaiwasa eroasoi fosa, etaparandini tuti esomi wei. Mea kontaio mehontaiosa na rabuang bonani rai, weo meroaso Kaiwo Mahikai

antowuwuai we meara fo fefe.

¹¹ Nanai wedaya antorutang tutu mea pampang we Allai ambori deti mea memai na arongreafu we merariati tuti we metohong kariri ne dawiafo. Antorutani kontai ambori fi masio menemiti-tuai we menari fo, tuti fianai aino menari nano mene meroasoawa mani, Allai dohong ne mambiriufo we mea ambori menariri na mai.

¹² Antorutang tonanai ambori na fi menari nanai wedaya kaiwasa etaparanding tane Seng Yesusi, tuti Yesusi deparanding mea paria, mai kariri todoni tane Seng Allai tuti Seng Yesus Kristusi uro-hong bengfo paria we meara fo.

2

Kaiwo kariri rahida Sengnei da ma fo tuti kariri mano kerira pari foi

¹ Doroi meaine, kariri rahida tane Seng Jesus Kristusi daraberahi we fianduhitata we tawebayari riati foi ne mani, yeretawanai paria,

² dohonao memamea wea fe, ete mesahera mene-mittuai sarawai kariria fe. Tarahio maneua eteyo esobu kaiwoaririfea na Sempaisi, deinawio rahida Sengnei daraberahi nai ma fe kawariai ampa. Ete tarahio eteyo antosoi kaiwoariri ete kaiwo anatu bei kaririai weo Yesusi daraberahi kawuru ma ne. Dohonao mematai ete memameatai we metaramio kaiwo nana fe. Weo kaiwo toyari nanai wiros tarai kaha tuti antosoi tonanai kaha.

³ Todoni kontaio dohonao meroaso kaiwo kaiwasa epampamu wasa emadura wa fe. Weo rahida bonani da ma kaharai mae, finnai kawariai akawuru wo. Amani kaiwasa bitoya foi eteiaya Allai, tuti inontarai mano kerira pari foi, amani Saminseni ne inontarai yufi wei foi, ambori kiawariai ki. I mani ambori wioru rai.

⁴ Na enerorong dedai dapa Allai tuti bioi wawa arong we andino fiabai sewa seng fubao inontaraine esomi wesa kiai fosa. Kontai da to Seng Allai ne Munufoi* rorongfoi, minohi nai, mae medu we kaiwasa bitoya foi deyo i mani Allai dine.

⁵ Mearomioaifa we finnai kiai imadurai we mea kawuru na raminde inayai na nanai ria mea wa ampa.

⁶ Tuti mewaitawang kariri fiani dino wedua mano kerira pari foi ampefe kiawaria kahai ninai. Kio rahida bo Allai dereria foi wori, mano kerira pari foi ambo kiawariai ki.

⁷ Kiawariai tonanai kaharai mae, Saminseni, mano ambori dohong ne mambiri- ufo wei foi, na mamunggasai niari ne fi kerira na nunei nendai. Wape mano weduari foi, weduari pari akawuru wori i tiwera ki,

⁸ tuti na kutu nanai mano kerira pari foi dariai. Wape Seng Yesusi da ma mani ambori miuni na numandai firarami foi tuti na ne sambe waraio da tutiri ma foi ki.

⁹ Mano kerira pari foi am-

bori kiawariai na Saminseni ne mambiriufoi, tuti niari fitantuma kerira bitoya we sofa inontarainesa nayai ambori ehiri ewarami wei.

¹⁰ Niari fikarira bitoya be yari weo pempamu inontarai mano todoni kontaio esobu ne karirafo ki. Inontarai nanisa esobu ne karirafo we eteiaya kaiwo wetarai na Allai fo, amani kaiwo ambori feririsa weru ene sasarifo fo.

¹¹ Ampafe Allai wedayasa ambori eserawaweraha paria, donio eroaso fi wetarai kaha foi.

¹² Nanai wedaya kaiwasa nanisa ambori esodai aiboofo ria Allai, weo eroaso kaiwo wetarai fo kaha tuti efaraise enari sasari pampang.

Allai diri mea we mesobu ne maifo

¹³ Wape, doroi bohio Sengnei enewawu mea wa meaine, todoni kontai antorohong mahikai we Allai pampang we mea, weo na reantenangfo diri mea kawuru ampa we feriri mea. Feriri mea tonanai na Nuaninu Mirarebana nei yuairurang meara memararebanai tuti na meroaso ne Kaiwo Mahikai fo fefe.

¹⁴ Na ne tonanane kontai, Allai sahu mea na ne Kaiwo Mahikai antohoramai we mea fo ne, ambori mea kontaio mehontai tane Seng Yesus Kristusi foi na ne sambewaraio dedai fo ki.

¹⁵ Tonana mani, doroi meaine, metoaria mutu tuti merutawang aunaou metaramioai ria antoru

* ^{2:4} Nana mani Seng ne Munufoi na Yerusalem, katai Yahudifosa esomi wei nai foi.

kawurua nanai, amani au-nauo antomadurai na antoborominei, tuti ne antosoi na antowaramine.

16-17 Kadono tane Seng Yesus Kristusi mantauni tuti Dai Allai unari mene-mirimorongwai mirising tuti mitubaru, tuti wedaya mea mewemambiri ambori, na kaiwo memadura fo tuti na fianai aino menari fo, menari te ne bengfo. Weo Allai enewawu tata tuti dohong beng we tata ambori tatoaria mutu tuti taenemitawang ne bengfo we fitawafa.

3

*Paulusi dutang jemati
Tesalonika fosa we ewenadi
wei*

¹ Doroi meaine, kaiwo bitoya itoi kaririai kai ampa, wape yutang mea we metutang tuti antoru we Sempaisi ambori ne Kaiwone anseung kahai mae dafai wariaifa we kaiwasanei kiai tuti esobuai na mai tuti esomi weai, kariri raminde nanai mesobuaia fo.

² Tuti metutanai kontai we wiwiang antoru, ambori antokaharai weru inontarai emamuna tuti eharira fosa ewarami rorong fo. Weo kaiwasanei ne fiaufoi wiro eroaso Seng Yesus Kristusi kaha ampefe emamuna we mano taroasoa ne tata.

³ Wape Sengnei, fi medura fo mani dohong kaririai ki, ampefe wiro sawing warang weru tata kaha. I ambori dohong menemirorongwai mitubaru tuti dewawu mea weru Saminseni.

⁴ Tuti antoroasoai paria weo fianai aino antorau-nauwai mau ninai metohong kaririai pampang rai.

⁵ Kadono Sengnei wi-wiaing mea pariao mewaitawanai na mai todoni Allai enewawu mea fo, tuti ambori metawang meara mutu na dadira rorong fo, ne tarai kariri Kristusi sawania mitu na dadira rorong raminde sodaira fo.

*Paulusi suasa ambori
ewata etena funoma fanai*

⁶ Doroi meaine, na Seng Yesus Kristusi wonongne, antoraretawang mea weo mehatai weruru inontarai mano ewata etena funomai tuti wiro etohong kariri aunauo antoraunauwai we mea wa kaha fosa.

⁷ Weo mantaung mea mewaitawanai ampa, ne mai mani, metohong kariri antorohong toa ne. Nana mani wiro antowata antorena funoma kaha na rahida antonayai na nanai ria mea wa.

⁸ Tuti manei dohong fiea antorang mani, antorang funoma kaha, mae fi nanai antobaitai. Kontai diru rahida antorurai paria we antorufi siai fo we fiata antoru, weo antomaya we antowedaya manei na mea urewa we antoru na fiang kaha.

⁹ Antonari tonanafo wiro deinawiai we antone pari mambiriufeai we antorutang mea we mefata antoru kaha, weo todoni kontaio antone mambiri we antorutang mea tonanai. Wape antore

antonari tonanai we fiainawai
ai we mea ambori mewata
metena funoma fanai.

¹⁰ Weo na rahida antonayai na nanai ria mea wa,
antomadu kaiwofeai tonina,
“Mandoni dino wiata dena
funomai mani, wiro dampi
fanai.”

¹¹ Antomadu tonanai we
antotaramioai we manea na
mea ewata etena funomai,
wiro enari sobu fiae kaha,
mae manei ne kaiwofea mani
esoro ma we eneng.

¹² Inontarai tonana nesa
antoraretawansa tuti antoraunausa na Seng Yesus
Kristusi wonongne we erufi
na mai, tuti esera we fi etang
siai.

¹³ Wape doroi mea mani
dohonao meuremiwa marira
we metohong kariri ne
bengwa ahang kaha fe.

¹⁴ Masino manei deiaya
kaiwo ninai tuti dohong
kariria kaha mani, metanansiau
we inontarai tonana nei
tutti dohonao mefaraoi fe.
Menari tonanai wei ambori
mimaya.

¹⁵ Wape dohonao menariri
toyari mene aiteta fanai, mae
metaretawani toyari mene
doroi.

Kaiwo kafe

¹⁶ Sengnei mani ne maine
weneung nai. Kadono mantauni
wedaya menumiruainso ne maifo pampang
na fifiani kontai. Kadono
Sengnei weriria mea kiai.

¹⁷ Mahikaifeai we mea, na
yau Paulusi. Mahikaio yenatua
tonina ne, mantaung yau
isoi ne. Fininai we fiainawai
na nehu kaiwo anatu ne
kai, ambori mewaitawanai

we kaiwo anatu nanai manei
soi siai kaha, mae mantaung
yauno isoi ne.

¹⁸ Kadono tane Seng Yesus
Kristusi dohong ne bengfo
arora we mea kiai.

Kaiwo Anatu Bo Reantenang Na Paulusi We Timotiusi

Kaiwo dedung we 1 Timotiusi

Timotiusi mani bariboa dine, yufi we Sempaisi ria rasul Paulusi, amani deiriri Sempaisi ne Kaiwo Mahikai fo we kaiwasanei. Tamana mani inontarai Yunani dine, mae inana mani inontarai Yahudi dine. Mae Paulusi sahu Timotiusi we ne arikang terai na Seng Kristusi wonongfo.

Paulusi tuti Timotiusi urontai to bendari Efesusi, na wanai demi Timotiusi niayai ria jematifoi we data inontaraio etaunau kaiwo mai kaha fosa. Mae mantauni dontai pari to nu Macedonia foi. Akawuru wori Paulusi enetituai we tarahio sobu rang we daraberahi to Efesusi ahera kaha, donio soi kaiwo anatu nini we Timotiusi.

Na ne kaiwo anatu nei deretawang Timotiusi we ambori yufi we Seng Yesusi na mai pampang (1:3, 18). Kontai denggewari we ambori medu wedua inontaraio etaunau fi wetarai kaha fosa (1:2-11, 4:1-6). Weo na Efesusi mani maneiru teai etaunau fi siai weru Kaiwo Mahikai foi. Etaunau kariri Hukumi Musa soi fo, wape etaunau fi wetarai kaha (1:7-8). Eteyo tanari kariri fi bitoya, toyari tarirau fanai, tuti tatang fiang tane wori

wea fo fanai, ambori Sempaisi feriri tata ki. Paulusi dere we Timotiusi ambori suasa paria.

Kontai Paulusi deunau Timotiusi kariri todoni mano ewenunggamiei we Kristusi ne jematifoi etohong toa fo, amani etohong beng tuti emararebanai, wiro enari sarawafea kaha. Tuti deunauwi kariri todoni yufi we Yesus Kristusi tuti fiata inontarai Kristen fosa kontai.

Kaiwo na suratinei deto kuntuai toninai:

1:1-2 Kaiwo reantenang.

1:3-20 Paulusi dere we Timotiusi ambori sua mantaunau fi mai kaha na Efesusi fosa.

2:1-3:16 Paulus deunau Timotiusi kariri todoni eminohi toa fo weo eweinontarai Kristen f.

4:1-16 Paulusi dere we Timotiusi ambori meduaia aunau wetarai kaha fo tuti yufi na mai.

5:1-6:2 Paulusi deunau kariri todoni mano taroasoa ne tata tanari we tane doroi fosa fo.

6:2-21 Paulusi deretawang Timotiusi ambori niari kariri Sengnei ne Kaiwo wetarai fo na mai.

Paulusi dohong mahikai we Timotiusi na Efesusi

1-2 Weo nehu kaisung bohi Timotiusi, mano isahu wau we nehu arikang terai na Sengnei weo roaso Yesusi mai kariri iroasoine.

Kaiwo anatu ninai na yau Paulusi, rasuli we Kristus Yesusi. Mano yuai yau we iwerasuli mani Allai, mano feriri tata foi, tuti Kristus

Yesusi mano taenemitawani foi.

Kadono Dai Allai tuti Kris-tus Yesusi, tane Sengfoi, uro-hong une bengfo arora we wau, uenemiwawu wau, tuti urohong wau numuruainso une maifo.

Paulusi deretawang Tim-otiusi we sua mantaunau kaiwo wetarai kaha fosa

³ Timotiuse, yutang wau paria weo nayai pampang na bendari Efesusi wai, kariri fianai aino raminde ira to nu Makedonia foi mani, yeretawang wau weaia fo. Ambori wua inontarai maneiru teai na nanisa, mano esafai kaiwo aunau wetarai kaha wasa. Modusa we efotourai weru fi enari wa. Wuasa ambori etaunau fi mai kaha fo ahang fanai,

⁴ tuti ambori efotou ehabi ene rahidawa funomai we etairiri fiami wetarai kaha fo, tuti riria wiro werea na wea kaha fo. Weo finanai kiai etairiri wei mani wedayasa esawasa tuti dohong wedua Allai ne fi niari fo, amani feriri tata na taroaso Yesusi fo.

⁵ Modusa tonanane mani weo ambori jematiwai kiai enemiwawu wawerasa na enemirorong mesi, na ene-mirorong ketuio mai, tuti na eroaso kanggung Yesusi na mai.

⁶ Manea na mantaunau kaiwo wetarai kaha wasa wiro enemiwawu wawerasa toyari nanai ahang kaha, tuti era siai etohong kariri kaiwo mai kaha fo.

⁷ Ebiriw we ewemantau-nau Hukumi Musai soi fo wape kaiwo emadurai tuti

eboromi tawanai we kaiwo tarai nanai mantaunsa eser-awa eru na wa amangwau beyari.

⁸ Tarai, tawaitawanaifa weo Hukumi Musai soi fo, taru tawanai na mai mani, kaiwofo beng.

⁹ Todoni kontaio tawait-awanaifa weo Kaiwo nanai Allai wiro dohonai we mano emai fosa kaha. Mae dohonai we inontaraio etohong kariri ne Kaiwofo kaha fosa, tuti mano eteiaya Allai fosa, mano esomi we Allai kaha fosa, mano etohong sasari pampang fosa, mano ene pari seng fosa, tuti mano emung ene wawa fosa, mano emung funong inontarai fosa,

¹⁰ mano emaninawa fosa tuti mang mano emaninawa wawerasa fosa, mano eha inontarai we etawayansa we ewewoming fosa, mano etatofa tuti mano epampamu kaiwo fosa, tuti mandoni kontaio enari fi mai kaha fosa. Fi tonana ne kiai siai weruo kaiwo aunau wetarai fo.

¹¹ Kaiwo aunau tarai ninai mai kariri Kaiwo Mahikaio beng sewa na Seng Allai mano tataparadini foi, tuti Kaiwo nanai yoasoao yau we yeiriria ne, amani kariri todoni feriri tata ne.

Paulusi dohong mahikai we Allai we enewawufo

¹² Yohong mahikai we tane Seng Kristus Yesusi weo deti yaua mani imai we irufi wei, donio yuai yau, dohong mambiriw we yau we

yeiriri ne Kaiwofo tuti ifata kaiwasanei.

¹³ Raminde nana mani yau inontaraio yeiberahi di yau, inari kanggani tuti isansuma funomai. Tonanai wape Yesusi aro yau paria tuti deiai nehu sasari nanai, weo rabuang bonanai wiro iroasoa kaha, ampare fi inari nanai iserawawerahai we fi sarawa fine.

¹⁴ Wape tane Sengnei dohong beng we yau fuba sewa, wedaya yau iroasoi tuti enehuwawu inontarai siai na Kristus Yesusi.

¹⁵ Kristus Yesusi da to nunei ma weo feriri inontarai sasari ne tata weru tane sasarinei. Kaiwo ninai wetarai, ampare meroasoaia mutu dohonao menemiwawera wea fe. Tuti na inontarai sasari rabuangnei kiai mani yauno yohong sasari fiabai sewa ne.

¹⁶ Tonanai wape Kristus Yesusi aro yau, ambori deinawiai we inontarai siai weo i sawani pampang we inontarai ewesasari fosa. Yauno yohong sasari fiabai sewa ne, wape enewawu yau ambori inontarai siai ewatioai tuti ambori eroasoi kontai, ampare eminohi na numainufo tuti esobu Waidani ki.

¹⁷ Tafiae Allai Mananuo werea na wea kaha foi, meiri andino tatatori tuti tataparandini pampang, i wiro mireha na wea kahai tuti tawatiao kaha, kontai meiri kawuru andi weSengne. Antu!

¹⁸ Ampafe nehu kaisung bohi Timotiuse, kaiwo anta yemi wau weiai nanai,

amani kariri todoni wua mantaunau kaiwo wetarai kaha fosa fo, bohong kaririai. Weo nehu kaiwone mai kariri fianai aino raminde nanai Allai medurai na mano ewenunggamie we jemati fosa kariri waua fo, amani fianai aino ru wei fo. Ru tawanaia mutu, ambori fiata wau rurai ambori birapa mantaunau kaiwo mai kaha wasa, kariri rai mamuna manei yurai we data ne aitetafosa fo.

¹⁹ Rurai we roaso Kristusi tuti bohong kariri ne Kaiwofo terai, tuti na enemurorong ketuio mai na tapapa boiaya ne karirawa. Weo manea wiro etohong kariri enemirorong mirarebana foi ahang kaha tuti etau we auna wetarai kaha fo, ampare inontarai nanisa eroasoafou woru ampa.

²⁰ Uwemandu na inontarai tonana nesa, uwonomi fino Himeneusi tuti Aleksanderi. Inontarai ninsuru yeiaya suru to boriei weru inontarai eroaso fosa, to Saminseni warang rorong fo, ambori na tonana ne usobu aunau we wiro ureibera Allai ahang kaha.

2

Fi kariri todoni tawenadi we Allaifo

¹ Timotiuse, fi reantenang pari mani, yenggoa wau we bounau jematiwasa we ewenadi we Allai, etutani paria, etutang tuti inontarai siai wei, tuti etohong mahikai wei. Finanai enari we kaiwasanei kiai.

² Kontai ewenadi tuti mananunesa tuti kaiwasa fuba eru wang mananu fosa, ambori na fifiani kontaio tasobu dadirafea kaha, mae taminohi na mai, ambori tasomi we Allai tuti taenemirongnei mirarebanai.

³ Ewenadi tonanai aino beng ne, tuti Allai tane Mamparirifoi eneoai.

⁴ I dawiai paria we kaiwasanei kiai ewaitawang kariri ne Kaiwo Mahikai feririsa fo tuti ekaharai weru ne karirafo.

⁵ Weo Seng mansiari kawuru, amani Allai, tuti Mano Doa Rahanai we kia inontaraine tata we Allai foi ne mansiari kawuru kontai, amani Kristus Yesusi, mano da ma weinontarai batang.

⁶ I dohong ne taraiifoia mireha we feriri inontaraine tata kiai weru tane sasarinei. Na fi niari tonana ne, deinawiai na ne rahida mai, weo Allai dawiai we feriri tata kiai.

⁷ Aiwedaya mani Sempaisi yuai yau we iwerasuli we Yahudi kaha fosa, ambori iwuwu Kaiwo Mahikai ne wesa tuti yeunausa we aunau wetarai kariri Yesusi fo ambori eroasoai. Fianai aino imadurai ninai wetarai wiro itofa kaha.

⁸ Ampafe imaya we na doni kontai, mangnesa ewenadi we Allai tuti ewenadi na enemirong mirarebanai, wiro ehasou tuti esawasa fanai.

⁹ Kontai we wiwingnesa dohonao enari we ambori mangfosa euremi nai na sa fe. Imaya we emarandinsa mayeai ki tuti esansunsa na ansung mai tuti enari

enumiwa na mai tuti fimarandingno mai. Dohonao esansunsa tuti emarandinsa esera weo ambori mangfosa enemirorong sau wesa fe.

¹⁰ Mae enari fi mai we kaiwasa siai fo, we finanai mai we wiwingno eteyo esomi we Seng Allai fosa enari fo.

¹¹ Tuti rabuang bo jematifosa efanduhisa we ewenadi fo, tuti mangfosa etoa etau nau fo mani, wiwingwasa etatosa, enemboru etaramididau terai.

¹² Wiro iroa we na nadi rorong foi wiwingnesa etau nau ete eboromio mangnesa kaha. Mae enemboru etaramididawai terai.

¹³ Imadu tonanane weo Adami dino Allai niariri reantenang ne, akawuru wori Hawai ki.

¹⁴ Kontai wiro Adami dino Saminseni sofari ne kaha, mae Hawai, ampafe donio sawai tono sasari rorong foi.

¹⁵ Tonanai wape wiwingnesao etahungno ene arikangfosa na mai, eroaso mutu, enemiwatu inontarai siai tuti enemirorong mirarebanai pampang, wiwing tonana nesa ansaino Allai feririsa ki.

3

Mano ewenunggamiei we jemati fosa todoni eminohi toa fo

¹ Kaiwo imadurai ninai tarai, amani mandoni saino etawiai we ewenunggamiei we jemati mani, nana mani enari fi dadai fo tuti mai fo.

² Ampafe mano ewenunggamiei we jemati ne mani, enari siarawa kahai

ambori manei biriu we dinggaisa kaha, erau wiwing mansia, etawansa wiro etohong funoma kaha, ebiriu we eteiaya fi mai kaha fo tuti enemittuai wea kaha, tuti etitua we kaiwo emadura fo, wiro emadu funoma kaha. Kontai eparaise etamang we inontarai siai na ene munufo, tuti esawai we etaunau kaiwasa.

³ Etunung biriu ye kaha tuti emamuna funoma kaha, mae emanang. Ebiriu we esawa inontarai kaha, kontai euremi fiabai we doi kaha.

⁴ Ewaitawang enari sua ene munu rorong fo na mai, tuti etaunau ene arikangfosa we etaramididausa tuti etatosa.

⁵ Weo manei deitawang niari sua ne munu rorong fo na mai kaha mani, todoni niari sua Allai ne jematine na mai ki?

⁶ Mano ewenunggamiei we jematinei mani wiro inontarai arahio eroasoai tituaita kaha, weo nana mani tarahio eboi earomi tuti fi eru nanai, ampare wedaya Allai dohong aiboi wesa kariri fafongfa dohong aiboi we Saminseni fo.

⁷ Ea kontai inontaraio mano eroaso kaha fosa etatosa kontai, weo ewewonomi tonana kaha mani, ambori kaiwasa siai fosa eteiberasa, ampare etawai to Saminseni warang rorong fo aha.

Todoni mangfata jemati fosa eminohi toafo

⁸ Tonanai kontai we mangfata jemati nesa, ea mani

inontaraio emai ampare kaiwasa etatosa, etaperemi sobaura kahai, tuti etunung biriu ye kahai, kontai ewarami mai, wiro euremi fiebai we ra kaha.

⁹ Mae na nemirorong ketui mirarebana fo erutawang aunauo Allai deinawiai we inontarai Kristen ne tata kawurua foi we taroasoi, aunaunai nanai fafongfa tataroana kaha.

¹⁰ Kontai, wiro ruaisa we eru wang mangfata fo kaharai mae, titua wesa akawuru wo, paria etohong fisarawafea kaha mani, ambori ruaisa we ewemangfata ki.

¹¹ Ene wiwingfosa* kontaio wiwingno emai ampare kaiwasa etatosa, wiro era etairiri kaiwasa kaha. Etawansa ambori ebiriu we eteiaya fi mai kaha fo, tuti na fifiani kontai kaiwasa eroasosa.

¹² Mangfata jemati nesa mani ene wiwing mansia. Ewaitawangno enari sua ene arikangfosa tuti ene munu rorong fo na mai.

¹³ Inontarai mano efata jemati na mahikai fosa, omi wesa tuti na tonanane ambori ewemambiri we emadu kariri ene eroaso Yesus Kristusi fo na ematai kaha.

Kaiwo tarai tuti dedaio taroasoa ne

¹⁴ Enehutawanai we waroi ahang kaha mae yontai mau ituambawa wau rai. Tonanai ki wape isoi kaiwo anatu ninai kontai we wau mau

* **3:11** Ete tarahio 'mangfata wiwing fosa'.

¹⁵ ambori yontai ahera mau kaha mani, boitawanai kawurua kariri todoni Sengnei ne inontaraine tata taminohi toa fo. Weo mano taroaso Yesusi ne tata mani tane tarai toyari Allai, Mano minohi wenumainu foi, ne munu rorong di tata, nana mani Allai ne jemati di tata. Ampafe tatoa tuti ne Kaiwonea mutu, ne tarai toyari dirio doari pepayai tuti munu bei.

¹⁶ Tarai webeyari aunaau kariri Yesusi nei. Aunau nani mani dedai tuti mirarebanai, ne tarai toyario fi dadiwa, pariao na fui ninai arahio Allai deinawi pari we tata: Biari meu weinontarai batang.

Wewaifosa ewatiodi.

Nuaninu Mirarebanai deinawi we I mi-
rarebanai.

Ewuwui we kaiwasa na nu
siai.

Eroasoi na nunei sentenang.
Tuti to rorafaisi Allai yuaisi,
na sambewaraio dadai
fo.

4

*Paulusi ne kaiwo kariri au-
nau mai kaha fo*

¹ Yeikaririaifa weo Nuaninu Mirarebana nei deinawiaia kasau ampa weo na rahidao werea naya fe niani, inontarai manea ambori etawingno ene eroasoafoki, weo nuaninu eharira fosa epampamusam amparefetaraberata weru ne maifo we etohong kariri Saminseni ne aunau kerira foi.

² Aunau karira nani, inontarai eweanggario etaperemi

sobaurai we fiwaradi fosa, ansaino etaunauaifa ne. Ea enemituuitafo tuti enemiroong ketui fo woru ampa.

³ Etaunau kaiwasa weo erirau fanai, tuti etang funong fiang fanai. Manamo fiangnei kiai mani Allai niariri we tatani, amparefetaraoanso ne aunaau mai fea ne, tawenadi tutirai tatoohong mahikai we Allai, nana mani fiangofo mai we ang.

⁴ Weo fi fuba Allai niariri nei kiai mani denteng, wiro fi kuteai ahuai we karira kaha, weo fiani aino obuai fa, wenadi tutirai we ohong mahikai we Allaifo mani, finanai beng.

⁵ Mae fiangnei kiai mi-
rarebanai, weo Allai ne Kaiwofo tuti nadi ohoni foi, mioana fefe.

*Paulusi deunau Timotiusi
we yufi na mai*

⁶ Timotiusi, aunaau imadurai kiai we wau nanai, bounauwi we boretawang tane doroi eroasoa wasa, weo nana mani wau wemangfata Kristus Yesusio ru fi na mai. Na tonanane dohong mambiri we wau we boa sau na ne Kaiwofo tuti ru tawangno ne aunaau mai fo, toyari fianai aino nari kariri kawuru mau wa.

⁷ Kotai weru aiririai fiamio wiro mai kaha fo, amani fiamio wedua inontarai esomi we Allai fo, mae rurai pam-pang we womi we Allai terai.

⁸ Weo tarurai we ambori tane tarainei wemambiriwo mani mahikai. Wape ne mahikai sewa ne mani, taruraifa terai we tasomi we Allai

pampang, weo nanai kia mai we tata na rahida tatarang ninai tuti na rahida da aha ma fo, amani numainufo.

⁹ Kaiwo ninai wetarai, am-pafe meroasoia mutu do-honao menemiwera wea fe.

¹⁰ Tateyo tasomi we Allai, nanai wedaya tarurai pam-pang tuti tarufi pampang, weo taenemitawang Allai, Mano minohi wenumainu foi. Andino we Mampariri we kaiwasanei kiai ne, reantenang pari mani we inontarai eroasoa nesa.

¹¹ Bounau ne nanaifa kiai tuti bemi mano eroasoa wasa we etohong kaririaifa.

¹² Dohonao manei sahu tawang wau fanai, we we-bariboi fefe. Mae ruraifa we wekasinai we inontarai eroasoa wasa, amani boinawi ne bengwa wesa, na kaiwo ariri modura wa, na bohong toa wa, na enemuwawu inontarai siai wa, na roaso Kristusi wa tuti bohong sarawa kaha, ambori ewa-tioa mani etohong kaririai.

¹³ Kontai na rahida bodoni kontai mefanduhi mea naya fo kiai, boto Allai ne Kaiwone na mai wesa, koramai wesa tuti bounausa, paria rahida bo ira aha mau foi.

¹⁴ Aromuo rahida bo mano ewenunggamiei we jemati fosa eruai ewaramia wasau wau, emoang wau we ru wang mangfata fo. Rabuang bonani inontaraio emadu kaiwo arerai Seng Allai dohonai wesa fosa emadu kariri mambiriuo Nuaninu Mirarebana foi dohoni we wau wai. Finanai dohonao

aromuporo bohong kariria fe.

¹⁵ Fianai aino imadurai we wau mau ninai, rurai we bohong kaririai na enemuro-rong mesi, ambori mandoni kontaio deti nemu roasoai na mai wawu to fong pampang wa.

¹⁶ Bonansiau kariri todoni munohi toa wa, tuti aunau bounauwi wai, bohong kaririai pampang. Ambori na fi nari nanai, Allai feriri wau tuti inontarai siaio etaramio nemu aunau wasa.

5

Fio inontarai taroasoa ne tanari we tane doroifosa ne

¹ Kariri mano eroasoa wasa mani, mano ewewawa wasa etohong sarawai mani, wiro rawamufui tapapa karesa fanai, mae wuasa na rawamufui fanahang, narisa toyari nemu wawa terai. Kontai narisua mano ewebariboi wasa we nemu tahatui saine,

² tuti wiwingno ebaba fafong wasa we inamu saine. Kadawingwasa narisa toyari roromuwing terai na enemurorong mesi.

³ Bounausa ambori enarisua wiwinao eamamifui kaburu wasa tuti efataswa.

⁴ Wape wiwina manei ne arikang ete ne tufung manea mani, ansaino bohong kai-woariri reantenang wesa we euremifo nai na ene inontarai nani we etohonsuari. Weo na ne tonanane aino ebai ene wawa ete etufumifoi ne mahikai dohonai kawuru wesara fo tuti Seng Allai

eneoane, tuti etohong kariri ne Kaiwofo.

⁵ Wiwinao anture amafui kaburu wiro ne obu manei we dehumu kaha foi, enetawang te Seng Allai diru rahida wenadi pampang wei we dohong awawu wei.

⁶ Wape wiwina sera we minohi mirising pampang foi mani, minohi ureng barika wape ne kawa dawiti kawuru ampa.

⁷ Ampafe bounau fiainawai ninai we jematiwasa ambori inontarai siai wiro esobu fisarawaifeai na sa fanai.

⁸ Wape inontarai manei niarisua ne terafosa kaha, pari sewa aha mani ne munu rorong foi kaha, nana mani inontarai nanifefora ne yoasoaf, tuti kerira sewa inontarai eroasoa kaha fosa.

⁹ Bounausa we wiwinao ambori eha kariri ewonomifo we efatasa fo mani, ene tarai toninai, amani ene defuina piatoru to yai, raminde nanai erirau webeyari,

¹⁰ ewewonomi we wiwingno enari fi mai toyario etahung ene arikangfosa na mai paria ebaba, eparaise etamang we inontarai siai, efata* inontarai emararebanaio eroasoa fosa, efata mano esobu dadira fosa, tuti erurai paria, ememirorong dohong we enari fi mai fo.

¹¹ Wiwinao wiro ewewiwinggutung kaharai fosa mani wiro eha kariri ewonomifo we efatasa fo fanai. Ene mangfosa

emereha ampa ampafe tarahai ete etohong kaiwo arerai we Sempaisi ambori eminohi wewiwina pampang, ewenadi tuti erufi wei terai. Wape waroi ahang kaha mae tarahi euremiwa nai na mangfosa ampafe enemirorong dohong we erirau aha, ampafe etawingno kaiwo arerai etohonai we Sempaisi nani.

¹² Ampafe etohong sarawai tuti wedaya esobu aiboi, weo etohong kariri areraio etohnia foi kaha.

¹³ Kontai waroi ahang kaha mae euremifo marira we erufi, mae rahida neungne emei funong ene rahidafo na esuayai etari mai munu bong. Ne karira sewa aha mani, etairiri kaiwasa siai tuti esoro inontarai siai ene kaiwo, tuti emadu funong fio mai we madura kaha fo.

¹⁴ Nanai wedaya mani yeyo wiwinao ewewiwinggutung kaha fosa mani, erirau aha, esobu arikang tuti enari sua ene munu rorong fo, ambori tane aitetafosa wiro esobu rang we eteibera tawonomine fanai.

¹⁵ Imadu toninai weo wiwina manea era sarawai eraria Saminseni kawuru ampa.

¹⁶ Wape wiwing yoaso Kris-tusi manei, ne terafu manea ewewiwina mani, fiata wiwina nanisa, wiro suasa we jematifosa etahunsa fanai. Ambori jematifosa ewati terai we wiwina eamamifui kaburu fosa.

* **5:10** Toyari 'yurairurang eawemifo' kariri ene koang.

¹⁷Inontarai ewenunggamieie we jemati fosa, amani mano enarisua tuti efata ene jematifosa na mai mani, todoni kontaio jematifosa etatosa tuti etohong fi demoyarai fa we ebaisa nayai, reantenang pari mani we mano erurai paria we ehorang Sengnei ne Kaiwofo tuti etaunau fosa.

¹⁸Weo na Sengnei ne Kaiwone soi toninai:
“Sapiro fiata inontarai yufi na romifoi fo mani[†],
dampi kontai, wiro kibu wedua borongfo fanai.”*

Kontai,
“Inontaraio yufi foi mani,
todoni kontaio ambori
sobu ne fiembaitafo.”*

Mano ewenunggamieie we jemati eruvi we mea fosa kontai ne tarai tonana. Fianai aino mesobua fo toyari doi ete, ansung ete, nana mani metohonai kontai we mebai ea nayai.

¹⁹Manei dinggai mano wenunggamieie we jemati fosa manei we dohong sarawai mani, dohonao wukahera roasoifa fe, mae tarahio uwemandu ete sewa weru nana te, ansaino ewati terai we wenani dohong sarawaifa reto.

²⁰Nana mani mano dohong sarawai nani wuari na jemati euremireafo. Nari tonanai mani ambori mano wei fosa ewati teraifa na euremireafo ambori wiro etohong sarawaifa kaha.

²¹Na Allai, Kristus Yesusi, tuti ne wewai rabuangno diriria

foi euremireafo, ewaitawang kaiwo imadurai we wau mau nanai, tuti yeretawang wau, na awemukikehawa paria sobu numurandaungwa, we bohong kariri fifianai aino arahi imadurai we wau mau nanai. Dohonao boti doyari fe, mae boa rahana, wiro tau towana tau toninai fe.

²²Dohonao rirora funomai we ruai waramuwara wasau manei we ruaisi we wenunggamieie we jematiwasa fe. Weo inontarai nani dohong sarawa mani, ambori wau kontai wodai sasari nani. Ampafe boitawang nemu tarai bo nemu wai, ambori wiro bohong sarawa fanai.

²³Bunung mereka tera fanai, mae bunung anguri kutea kontai we fiata enemuwai, ambori werawang we fiata wau, weo wea mani moninang fefe.

²⁴Dohonao wukahera ruai manei we wenunggamieie fanai, weo inontarai manea etohong wora sasari bitoya, sasari nani paria waroi ambori atioai ki. Mae manea kontai sasari etohoni foi etohong pari, ampafe wiro utang beraha kaharai mae atioai kawurua.

²⁵Tonanai kontai weo mano enari mai fosa. Manea fibeng enari fo enari parai, ampafe watiaoai weriwang beyari, wape manea kontai fibeng enari fo wiro enari para kaha. Wape ene bengfo ambori waitawanai ki.

[†] **5:18** Amani, ‘sapiro sahariroya patibu we taraifoi tifating weru nenggaingfoi’.

* **5:18** Ulangan 25:4 * **5:18** Lukasi 10:7

6

¹ Inontarai Kristenio ewe-womung nesa mani, todoni kontaio etato mano erufi wesa fosa na mai, ambori inontarai nanisa wiro esahuberia Seng Allai wonongfo fanai ete tane aunaufo fanai.

² Tonanai kontai we woming mano erufi we inontarai eweKristeni fosa, dohonao womingfosa esahutawansa fe, we eteyo ene mano ewenunggamie wesa fosa inontarai eroasoai karirisa disa fefe. Nana fanai, mae todoni kontaio enarisuasa na mai pari aha. Weo mano ewenunggamie fosa mani inontarai eroasoai kontai karirisa, tuti womingfosa enemiwawusa fefe.

Paulusi medu kariri mano etaunau fi mai kaha fosa tuti kariri doi ete ra

Kaiwo fuba yohonai we wau mau ninai, modurai tuti bounau inontarai eroasoa wasa, ambori etohong kaririai.

³ Mandoni dino sifai kaiwo aunau wetarai kaha feai, tuti wiro yo we aunauo wetarai da na Yesus Kristusi ma fo, amani aunauo dedai tuti mirebanai fo kaha mani,

⁴ inontarai tonana nei mani borong fiebai funomai, wape webonggoi. Enetituitafo seyewa ampa, sera we kaiwo, tuti piraise sawa we kaiwo netawea fo. Nana mani wedaya inontarai enemituaita mai kaha tuti etohong kariri ne bengfo ahang kaha, enemirongpirahai we inontarai siai, eweboyari ria inontarai

siai kaha, etairiri kaiwasa, etinggaisa we fi mai kaha,

⁵ eweaiteta wesa pariao werea na weai ahang kaha, tuti enemittitafo woru ampa. Ewaitarahio esomi te we Allai mani ambori ene fianggeng tuti doi bitoya ki.

⁶ Wape manei somi te we Allai tuti nuruainso fi sobua fo demoyarai wei mani, inontarai nani sobu mai paria, tuti fi sobua fo denteng sewa ra ete doi.

⁷ Weo rahida tataubau tanumi to nufi ma ne, wiro taha sobu fi kutea kaha, tuti rahida bo tamarareha foi kontai taha sobu fi kuteai ria tata ahang kaha.

⁸ Ampafe tasobu fiangfeai tuti ansungfeaia mani demoyara to.

⁹ Wape inontarai mano sera we ra foi mani, Samisseni ambori wedayari we niari maino fi kerira doni kontai ki. Fi kerira fuba enetituita kiai nani, ne tarai wewaitepario mantauni dapai we saukahari aha. Ampafe wedayari sodai ne kariraf.

¹⁰ Weo na enerorong dohong karerai we doi fo, wedaya kia maino ne karira doni kontai. Inontarai manea kontaio esera terai we doi pariao etohong kariri aunau taroasoa ne ahang kaha, mae era siai donio enemirorongfoi fituayai.

Paulusi deretawang Timotiusi we yurai na ne fi yu fo pampang

¹¹ Wape wau Allai ne inontarai di wau, wowu nemu taraiwai weru fi fuba nani

kiai. Rurai ambori weinontaraio moi na Seng Allai urengreafu, womi we Allai, roaso Kristusi, enemuwawu inontarai, tawang wau na dadira rorong fo, tuti monang we inontarai siai.

¹² Rurai paria we bohong kariri Kristusi ne aunauwa na mai, ambori wobu nemu fiembaitafo, amani numainu. Toyari wemei bari we sobu fiembaitai, i yurai we mei na mai paria ampafe wewonong we sobu fiembaitai nani. Weo Allai sahu wau we ambori wobu numainu nanai, amani na rabuang bo moduraia futuayai na kaiwasa bitoya foi euremireafo we wau mani roria Kristusi.

¹³ Na Seng Allai mano dohong anseng we fifuba nini kiai foi arongreafu, tuti na Kristus Yesusi arongreafu, amani Kristusi mano medu kaiwo wetarai fo we Pontius Pilatusi foi, yawi wau paria we nari kariri fininai.

¹⁴ Bohong kariri fianai aino imaduri kiai we wau nanai na mai we beyari, wiro bohong sarawa kaha, paria rahida Seng Jesus Kristusi daraberahi aha ma foi, ambori wiro manei deibera wau fanai.

¹⁵ Rahida bo daraberahi nai aha ma nani, Allai mantauni dino kiutuaifa kariri mantauni ne dawiafu. Seng Allai nani mani mesiri kawuru andino weMananune, Dedai tuti Mirarebanai, weMananu we mananu nunei kiai tuti Seng dedai we seng nunei kiai.

¹⁶ Meiri kawurua andino

wiro mireha na wea kaha, minohi na dansairaio mandoni kontaio da kefani kaha. Inontaraine tata manei kontaio wiro detioi kaharai, kontai inontaraine tata mani tawatiao kaha. Meiri kawurua andino omi wei tuti weMananu wefitawafa. Antu!

¹⁷ Boretawang inontarai ene ra na nunei bitoya wasa weo wiro enemirorong dedai fanai tuti enemitawangno fi ambori wohera tuti raima soi foi fanai, toyari ra ete doi. Mae enemitawang te Allai, mano dohong fianggeng fuba nini kiai na enerorong denteng we tane funomi tuti taparaiseri foi.

¹⁸ Boretawansa we enari beng, enemirorong denteng funomai, tuti ewarami takahetuai we efata funong kaiwasa na ene rafo.

¹⁹ Na ne tonanafo efanduhi ra mai wesa na Allai, we rahida da ma wanai. Tutina fi tonana ne ambori esobu katai mai na Waidani, amani eminohi wenumainu.

²⁰ Timotiuse, kaiwo wetaraio Allai yoaso wau weo bounauwaifa wa mani, boraratai na mai, ambori manei wiro deunau riwanai we kaiwo siai fanai. Dohonao taramuo kaiwasao emadu funong kaiwo wedaya inontarai esomi we Allai kaha fo fanai. Weo ea mani inontaraio esawa tuti kaiwo wetarai kaha fo, ekahiwa tutirai we kaiwo wetarai fine.

²¹ Weo inontarai manea eteyoifa we etau we kaiwoariri fuba nani kawuru ampa, ampafe etawera era siai weru Sengnei ne aunau

taroasoia foi.
Kadono Sengnei dohong ne
bengfo arora we mea.

Kaiwo Anatu Bo Boru Na Paulusi We Timotiusi

Kaiwo dedung we 2 Timotiusi

Na kaiwo anatu weberu we Timotiusi ne, Paulusi deretawani we ambori wiuwu kaiwo kariri Seng Yesus Kristusi na mai tuti yu Allai ne Kaiwo Mahikai fo na mai. Deunauwi kontai kariri todoni yufi pampang wemantaunau fo tuti inontarao wiuwu Kaiwo Mahikai na Allai fo, masino awa sodai dadirafo tuti enari kangganifo.

Paulusi deretawanai kontai we ambori wiro kiontai inontarai esawa funomai we kaiwo mai kaha fosa fe. Kaiwo awa weai tonana ne wiro kia fiea kaha, mae kia karira terai we kaiwasa etaramioa fosa.

We finanai kai Paulusi deretawang Timotiusi we ambori dohong kariri mantawi ne dohonafo, amani kariri yoaso Kristusi fo, todoni enewawu inontarai siai fo, tuti todoni sawani na dadira rorong fe fo tuti dadirao sodairi na rahida enari kanggani fo.

Rabuang bo Paulusi denatu kaiwo nina ne mani, wiatai na aitamu rorong fo na bendari Roma, demang we sobu aiboifo finana. Na kaiwo anatu Paulusi soi ne kai nai na Sengnei ne Kaiwone, kaiwo nina mani tarahai ne kaiwo fui pari fine. **Kaiwo na suratinei deto
kutuai toninai:**

1:1-2 Kaiwo reantenang.

1:3-4:8 Paulusi fiai Allai we Timotiusi ne yoasofo tuti deretawang Timotiusi ambori yufi we Sempaisi na mai pampang.

4:9-18 Paulusi dutang we Timotiusi we dontai wei.

4:19-22 Kaiwo kafe.

*Paulusi dohong mahikai
we Timotiusi na Efesusi*

1-2 Weo nehu kaisung bohi Timotiusi, mano enehuwawu wauwa wau.

Kaiwo anatu ninai na yau Paulusi, rasuli we Kristus Yesusi. Na Seng Allai ne dawiafo, yuai yau we iwerasuli, ambori yeisaharai we kaiwasanei kariri Seng Allai ne kaiwofafongfa dereaia fo, amani kariri tasobu arangfo na Kristus Yesusifo.

Kadono Dai Allai tuti Kristus Yesusi, tane Sengfoi, urohong une bengfo arora we wau, uenemiwawu wau, tuti urohong wau numuruainso une maifo.

Paulusi fiai Allai we Timotiusi tuti deretawani we yoasoia mutu

³ Yohong mahikai we Seng Allai, mano isomi wei foi na enehurorong ketui mirarebanai, toyarifafongfa nehu werengfosa esomi weia fo. Yohong mahikai wei we yeitawanaifa weo roria Kristusi tarai fefe. Iwenadi wei pampang tuti arohuporo wau kaha, mae diru rahida yutang tuti wau pampang we Allai.

⁴ Arohuo enemurorong fituayai tuti wai na rahida bo

tukatake turu wai. Ampafe enehurorongnei dawiai paria we isobu wau ahera, ambori na tonanane enehurorongnei mirising.

⁵ Arohuaifa weo roaso Kris-tus Yesusi tarai tuti roriati, ne tarai kariri todoni tufumu Loisi tuti inamu Eunikei uroasoi tuti urariati fo. Ampafe iroasoifa weo wau kontai roasoai mai kariri suru pampang.

⁶ Ampafe yeretawang wau we rurai pampang tuti mambiriuo Allai dohoni we waua wai. Mambiriu nani wobui na rahida bo iruai warahua wasau wau we imoang wau we rufi nai wai.

⁷ Weo Nuaninu Mi-rarebanai Allai dohoni we tata nei, wiro dohong tata tamatai ete tamamaya kaha, mae wedaya tata tawemambiriu we tarariati, tuti taenemiawu fuba, tuti tabiriu we tateiaya fi mai kaha fo tuti taenemitituai wea kaha.

⁸ Ampafe dohonao mu-maya we boiriri kariri tane Seng Yesusi we inontarai sia fe. Kontai dohonao mumaya tuti yau weo iwa na aitamu rorong nei fe, we yeiriri Jesusifo. Wape wobu dadira toyari yau weo boiriri ne Kaiwo Mahikai fo mani, na Allai ne mambiriuo tawang wau na dadira rorong nanai.

⁹ Allai feriri tata kawuru ampa weru tane sasarinei tuti sahu tata we taminohi we ne inontarai mararebanai terai. Niari tonanafo, wiro titua kaririai na tane beng tatohona fo kaha, mae kariri mantauni ne enetituaitai

we niari fo, tuti kariri ne bengno dohonai arora fo. Ne enewawufo fuba sewa we tata, donio na siario wiro niari nunei kaha fo, enetituaitai kawurua we dohong Kristus Yesusi we feriri tata.

¹⁰ Tuti na ninaifara mani, Allai deinawi ne enewawu nani we tata, amani na Kristus Yesusi tane Mananu Mampariri da we tata ma nei. Andino kirai kobu mararehafoi ne mambiriuo, tuti na ne Kaiwo Mahikai fo deinawiai we tata todoni taminohi tatarang we numainufo tuti ambori tasobu Waidani.

¹¹ Tuti Sempaisi yuai yau we iwerasuli ambori iwuwu Kaiwo Mahikai ne tuti ye-nau kaririai.

¹² Nanai wedaya iwa na aitamu rorong ne tuti isodai dadira fuba nini kiai ninai. Wape imamaya kaha, weo iwaitawanai na mai mandoni dino iroasoi fo. Iro-ssoaifa we Kaiwo Mahikaio yuai yau we iwuwuaifa fo, i wemambiriu we derara Kaiwo Mahikai nanai, paria sobu rahida bo daraberahi aha ma foi, ampafe manei wiro deunau riwanai we kaiwo siai kaha.

¹³ Kaiwo aunau maio imadurai we waua fo, bounauwai pampang. Nari finanai na roaso Kris-tus Yesusi mutu tuti enemuwawu inontarai.

¹⁴ Kaiwo Mahikaio Sem-paisi dohonaifa we wau we wuwuaifa wa, bounauwai na mai ambori manei wiro deunau riwanai we kaiwo siai fanai. Bohong tonanane na mambiriuo Nuaninu

Mirarebanaio niai na tata nei.

¹⁵ Boitawanaifa weo inontarai eroasoai na nu Asia nei, mano efata yau nesa kiai, esu to fui weru yau ampa. Figeliusi tuti Hermogenesi uru tonanai kontai.

¹⁶ Wape Onesiforusi ne wing ne arikang ansaino webeiru teai mau wa etohong enehurorongnei mirising ne. Kadono Sengnei deinawi ne aroafo wesa. Weo iwa na aitamu rorong ne tonanai ki, wape wiro mimaya tuti yau kaha.

¹⁷ Wiro nanai tera kaha mae, rabuang bo dontai ma sobu bendari Roma nei mani, yurai paria sera we yau paria sobu yau we medu ria yau na ninai.

¹⁸ Kontai boitawanaifa weo na Efesusi i fiata yau bitoya paria. Ampafe kadono Sengnei deinawi ne aroafo wei, na rahida bo fianduhi inontarai fuba nunei we dirisa fo.

2

Mano yufi we Yesusi mani ne tarai toyari rai mamuna yufi na mai

¹ Timotiuse, nehu kaisungwa wau, Kristus Yesusi dohong beng we wau, ampafe tawing nemu taraiwai wei ambori dohong ne mambiriwau we wau, ambori ro riati pampang.

² Sengnei ne Kaiwo Mahikai taramuoai kawuru ria yau na kaiwasa bitoya foi euremireafea nanai, wau kontai ruai inontarai roasosa manea we etairiri kaiwo nanai. Inontarai roasosa

nanisa mani bounausa tuti roasosa ambori ea kontai esawai we etaunau inontarai siai maneia.

³ Wodai dadirafea toyari amea nina we boiriri Kristus Yesusi mani, tawang wauwa mutu na dadira rorong nanai, ne tarai toyari rai mamunao sodai dadira foa mani sawania mitu na ne dadira rorong fo.

⁴ Tuti rai mamuna manei yufi mani, sawing pari fi deyo niari siai fo, mae yurai paria we dohong kariri ne komandan-dangfoi fi demi we niari fo na mai terai, ambori komandan-gfoi yoasoi tuti piraise wei. Tonanai kontai we wau, dohonao uremu nayai towana toninai we fi siai fanai, mae uremu nayai terai na fi Kristusi dawiai we ru fo terai na mai, ambori Kristusi yoaso wau tuti piraise we wau.

⁵ Kontai we inontarai emei bari we fiembaitafea, emei na mai kariri fiainawiai we mei toa fo mani, ambori esobu fiembaitai nanai. Tonanai kontai we wau, tawang wau tuti rurai we bohong kariri fianai aino Kristusi dawi wea fo na mai ambori wobu fiembaitafo ki.

⁶ Mano etohong romi fosa kontai tonanai, mano yurai mambiriwo andino ambori deting fi sanang fo reantenangne. Wau kontai tonana, rurai mambiriwau tuti Yesusi wonongfo mani, ambori fiembaitafo wobua rai.

⁷ Enemutituai sauaraifa kariri kaiwo netawea imadurai nanai, weo Sengnei ambori dohong awai tuti

mambiriw we wau we ambori boitawanai.

⁸ Aromuo ninai pampang. Kaiwo Mahikaio imadura fo mani, kaiwo kariri Yesus Kristusi, mano weriria na Mananu Dauti ma. Andino suwi na marareha rorong foi tuti weMampariri ne. Sengnei ne Kaiwo Mahikai nanai yeiririai pampang,

⁹ donio wedaya isodai dadirane pariao eru aitamu warahu awehu ne tarai toyario inontarai memuna ete weming inontarai. Enari tonanai we ambori Sengnei ne Kaiwone iwuwuai ahang fanai. Manamo todoni kontai Sengnei ne Kaiwo Mahikai ne manei wemambiriw we yu aitamuoa kaha.

¹⁰ Nanai aino wedaya itawang yaua mutu na fifiani kontai aino isodaira ne ambori inontarai Seng Allai dirisa kawuru we feririsa na Kristus Yesusia fosa etaramio ne Kaiwofo, eroasoai tuti eminohi wenumainu ria Allai na ne sambewaraio dadai fo.

¹¹ Kaiwo isoi ninai wetarai, amani,

Tatawing ne karirafo mani, ne tarai toyari tamareha ria Kristusi, na rabuang bo mireha we tata foi.

Suwi na marareha rorong foi aha, ampare tata kontai ne tarai toyari tasuwi riati, amani taminohi na ne bengfo aha.

¹² Na dadira rorong fo tatawang tata,

ambori na rahida I weMananufo mani, tata kontai taru wang mananu fo riati.

Mae tafaforai mani, gefora tata kontai ki.

¹³ Tatawing taroasoai wei fo ki, wape i wiro sawing tata kaha, we wiro aroporo ne kaiwo arera fo na wea kaha.

Paulusi deretawang Timotiusi we yufi we Kristusi na mai tuti deiaya aunau mai kaha fo

¹⁴ Boretawang inontarai-wasa pampang we etohong kariri fi isoi nanai. Na Allai urengreafou bounausa ambori wiro esawa we kaiwo netawea fo fanai. Weo nanai wiro kia fiea kaha, mae kia te ne karirafo we mano etaramioa fosa.

¹⁵ Rurai paria ambori Seng Allai piraise ria wau tuti yoaso wau Weinontarai mosi we rufi wei. Nana mani mumaya tuti fi nari wa kaha. Mae bounauwai na mai aunau wetarai na Allai fo.

¹⁶ Kotai weru kaiwo mai kaha fo, amani kaiwoaririo wedua inontarai esomi we Allai, weo inontarai emadu tonana nesa wedaya ambori inontarai esomi we Allai ahang kaha.

¹⁷ Ene aunaufo dang sawarai ne tarai toyari fimaninang ang. Himeneusi tuti Filetusi uru uwefainawai kariri inontarai tonana nesa,

¹⁸ weo utawera ura siai weru Sengne ne aunau wetarai taroasoa fo. Mae

etaunau kaiwofeai siai weru Sengne ne Kaiwone, amani kariri mansuwi-suwifo. Eteyo Allai duwi inontaraine kiai na marareha rorong fo kawuru ampa, ampare tamarereha ki wape wiro rahida mansuwi-suwi fei ahang kaha. Aunau nani wedaya inontarai manea eroaso Yesusi ahang kaha.

¹⁹ Wape Seng Allai wiro aroporo ne Kaiwo Arera fo kaha, amani sawing mano taroasoi ne tata kaha. Ne Kaiwo Arera nanai ne tarai toyari kamirangno soa mitu, mandoni kontai wiro biatari kaha. Na ne Kaiwofo rabuang bei dotu toninai:

“Sengnei deroanso ne inontaraifosa,”*

tuti rabuang bei aha dotu deyo,

“Mandoni dino deyo i mani Sengnei ne inontarai dine,

nana mani todoni kontaio daraberahi weru ne karira niari fo.”

²⁰ Na inontarai ne ra bitoya ne munu fiabai bei mani ne fianggeng bitoya, toyari rewanguai, morimori, babeu, tuti fisiasi. Fianggeng nanai, weaifa nari na peraki tuti emasi, amani we nari fi mai pari naya fo, wape weai kontai nari na ai tuti kahofa ura, amani we nari fi mayea fo nayai ete ohonaifa we fi werarika fo.

²¹ Ampafe inontarai manei masino fiotourai weru ne sasarifo tuti ketai weru aunau mai kaha fo, nana mani ne tarai toyari fianggeng

mai nari na emasi na munu anta nani. Toyari finanai, i mesi we yufi we Allai, mirarebanai, tuti meinenan we niari fi fuba doni kontai wei.

²² Kotai weru fi mai kahaio bariboaifesa enemirorong dohong we enari wa. Mae ruraifa we bohong kariri Seng Allai ne dawiafo, amani roaso te ne Kaiwofo, enemuwawu inontarai, munohi na mai ria inontarai siai, tuti enemurorongwai mirarebanai. Bohong kariri nanai kiai ria mano emitawang Sempaisi na enemirorong mirarebanai we wiwiainsa fosa.

²³ Dohonao kontai inontaraio esawa we kaiwo fosa fanai. Ewebonggoi, ewaitawang sobu fiea kaha, tuti boitawanaifa weo ne tonanane wiro kia maifea kaha mae wedaya moroaterai.

²⁴ Inontarai yufi we Sengnei mani, wiro sawa funong inontarai kaha, mae enerorong denteng we inontarai fuba nini kiai, sewai we deunau inontarai na mai tuti kesou funoma kaha.

²⁵ I mani todoni kontaio ne kaiwo manang, deunau inontarai mano eteiaya ne kaiwo fosa, ambori tarahio Allai dohong rang wesa na ne tonanane, we etarabera weru sasari etohoni foi, tuti etaroanso Kaiwo wetarai na Seng Allai fo,

²⁶ ambori ekaharai weru Saminseni warang rorong fo. Weo Saminseni tefusa ampa, toyari etaukaha na ne wai

* **2:19** Bilangan 16:5

tepari fo, ambori wedayasa etohong kariri ne dawiafo.

3

Na rahida werea naya feni-nai mano etaunau fi mai kaha fosa eharira pari aha

¹ Aromuaifa! Na rahidao werea naya feninai ambori tawati inontarai enari fi karira bitoya paria.

² Amani, inontarainesa ambori ewati we ene tarai bo eneng foi terai ki, eu-remi fiebai we doi, enemirorong dedai tuti eboi earomi. Eparaise we etairiri kaiwasa, tuti etapa ene wawafosa. Ewaitawang etohong mahikai we fi beng esobua fo kaha tuti etohong katai we Allai na enemirorongfoi kaha.

³ Enemiwawu rireuwai, emaya we eteiiai fi sarawaio inontarai siai enari wesa fo kaha, tuti efaraise we etohong inontarai siai fosa ewonomi karira. Eteiaya fi karira fo kaha, emamuna, enemirireu ne bengfo,

⁴ tuti etawayang funong kaiwasa. Enemifunonsa, eboromi fiebai funomai, tuti efaraise we etohong kariri fi etawi wea fo weru fi Allai dawia fo.

⁵ Ea mani, watisa esomi we Allai ampa, wape na fino enari fo mani kasau ampa we enemirorong mesi we Allai kaha, mae esomi na eboromirawa arora. Kotai weru inontarai tonana nesa.

⁶ Ea mani, epampamu esuai to munu siai fo ambori eha we wiwing eroasoa

dawohi fosa enemirorongfoi. Wiwing nanisa enari sasari bitoya ampa, tuti enari kariri te fi enemirorong dohong wea fo pampang.

⁷ Efaraise we esobu aunau pampang, manamo emaya we eroaso Kaiwo wetarai na Allai fo kaha.

⁸ Toyari na fafongfa inontarai mandu uwonomi fino Yanesi tuti Yambresi urapa Musai fo,* tonanai kontai inontarai ninisa etapa Kaiwo wetarai ne. Enemittuitafo woru ampa, tuti eroasofo tupa dawohi ampa, ampare Allai kontai deiaya ea.

⁹ Wape eruraia todoni kontai, esobu fiae kaha, weo toyari fafongfa Yanesi tuti Yambresi umadu kaiwo wetarai kahai, wape waroi kahai mae inontaraifosa ewaitawanai we uwebonggoi paria. Mantaunau mai kaha nesa toyarine, waroi ahang kaha mae inontarainesa kiai ewaitawanai we etaunau fi wetarai kaha tuti ewebonggoi paria.

Paulusi medu kariri todoni yufi tuti minohi toa fo tuti deretawang Timotiusi we dohong kariri

¹⁰ Wape Timotiuse wau mani boitawanai ampa, weo yau wiru nehu tarai kariri inontarai nanisa kaha. Boitawanai na mai kariri nehu aunaufe ampa, kariri iminohi toa fo, tuti kariri fianai aino irurai wea fo. Boti terai na uremuwa kariri todoni iroaso Yesusi fo, tuti kariri itawang yau fo paria, wiru ikasou funoma kaha,

* 3:8 Keluaran 7:11

kariri todoni enehuwawu inontarai siai fo, tuti todoni itawang yau na dadira rong fo ampa.

¹¹ Boti yau kawuru we emung yau fo ampa weo yeiriri Yesusi wonongfo fefe, tuti isodai ne dadirafo ampa, tuti kariri fi fuba isodairi kiai na bendari Antioquia, Ikonium, tuti na Listra fo. Boitawanai we erurai pampang tonanai we emung yau we yeiriri wonongfe nanai, wape Sempaisi sawing yau kaha, ampare ikaharai weru mararehafoi.

¹² Antu paria we mandoni dino deyo somi te we Allai tuti minohi weboyari ria Kristus Yesusi mani, ambori sodai dadirafo, amani to-yario kaiwasa siai eteiberahi, enari kanggan tuti emuni.

¹³ Wape inontarai eharira fosa tuti mano enari anggari we ebeng fosa, ambori eharira sewa aha ki. Etatofa inontarai siai pampang, ea kontai ambori inontarai siai etatofasa ki.

¹⁴ Wape Timotiuse wau, rutawang Kaiwoariri wetarai ne, amani Kaiwo antoraunauwai kawuru we wauwa wa, tuti roasoai tantenang na maia wa. Weo boitawanai kawuru kariri antoru ampa, amani mano antoraunau Kaiwo nanai we wauwa.*

¹⁵ Na kotuifa, boroanso Sengnei ne Kaiwone kawuru ampa. Kaiwo nanai kia mai we wau tuti deinawiai we wau rang todoni kaharai

weru nemu sasariwai tuti wobu mai nano Sempaisi, amani na taroaso Kristus Yesusi fo.

¹⁶ Sengnei ne Kaiwone kiai Allai dohonai we mano esoi kariria fosa, amani Nuaninu Mirarebana foi sensonisa ampare esoi ne Kaiwo Mararebana fo na mai. Ampafe Kaiwo nanai mai we deunau tata kariri ne wetaraifo. Tanari sarawa mani Kaiwo nanai sua tata ambori tatarabera tata aha. Kontai deinawi we tata rang todoni ambori tamai na Allai urengreaflo.

¹⁷ Mandoni dino yufi we Al-lai fo mani, yu Kaiwo nanai, ampare meineng tuti we-mambiriw we niari fi beng fo kiai.

4

¹ Kristus Yesusi ambori daraberahi aha ma we weM-ananu tuti weo kiutu kaiwo weo inontarai fuba minohi darang nei tuti inontarai fuba mirehara foi ne, ambori deto tatesa kiai, amani mano ambori esobu mai fosa siai tuti mano ambori esobu ne karira fosa siai. Nanai wedaya yau yeretawang wau paria na Allai tuti Kristus Yesusi uaromireafo we nari toninai.

² Amani, boiriri Sengnei ne Kaiwowa pampang, wape maneal eparaise we etarami wau ete ehobu etarami we wau mani, dohonaoufouhi wau fe, mae boiririai pampang. Manea etohong sarawa mani wuasa tuti boikaririai wesa kariri fi etohong sarawai nanai.

* **3:14** Mano itoraunauwi mani, tufung Loisi, inang Eunikei, tuti Paulusi. Tarahai inontarai siai kontai.

Bounausa we etohong kariri ne maifo aha. Tawang wau we bounau inontaraiwasa na mai.

³ Weo rahidafi kefang ampa we inontarainesa ambori emaya we etarami Sengnei ne Kaiwo tarai fo ahang kaha, mae etohong kariri te fianai aino enemiro-rong dohong wea fo, ampare efanduhi mantaunau bitoya we etaunau fi efaraise we etaramioa fo wesa.

⁴ Ehabu etaramifo we Kaiwo wetarai fo mae efobibi etaramifo terai we airirai fiami.

⁵ Tonanai ki, wape wau mani boitawangno nemu tarai bo nemu waia mitu, na fi todoni kontai. Tawang wau na dadira rorong fo, boiriri ne Kaiwo Mahikai fo we inontarai eroasoa kaha fosa, tuti nari kariri fianai aino inontarai ewewoming we Allai fosa enari fo na mai.

⁶ Weo yau mani ninaya ma nehu rahida imereha naya fe kefang ampa. Paria rahida bonini nehu tarainei yohoni we Sengnei we inari te fi dawi wea fo na mai ampa. Tuti we beiru teai aha mani ambori ira weru nunei ki.

⁷ Iruraifa paria we yohong kariri Sengnei ne Kaiwo Mahikai fo na mai ampa, tuti fi Sengnei yuai yau we inari nanai, irurai we inari na mai, toyari wemito we fi wewonong, yau kontai imito paria werea naya fe ampa. Fi fuba nani kiai inari we Kristusi na mai paria, wiro iwati towana iwati tonina kaha.

⁸ Ampafe ninaia mani,

Sengnei, mano Mangkutu Kaiwo na mai foi, ambori dohong fiembaitafo we yau ki, amani deinawiaifa we imararebanai na urengreaflo. Fiembaitai nani isobui na rahida bo mansuwi-suwi foi. Kontai wiro imeiri yauno ambori isobu fiembaitai tonana nei kaha, mae finanai dohoni we kaiwasanei kiai, amani mano enemiawuti tuti etamang wei paria we daraberahi ahera aha ma fo.

Kaiwoariri Paulusi medurrai we Timotiusi terai we dohong kaririai

⁹ Ruraifa we bontai ahera we yau ma.

¹⁰ Weo Demasi fianggeng nunei wewora enerorongfoi, ampare su to fui weru yau tuti dontai to Tesalonika ampa. Krekesi dontai yufi we jematifosa na nu Galatiara, tuti Titusi kontai dontai to Dalmatiara.

¹¹ Mae sea Lukasi meiri andino niayai na ninai ria yaune. Ampafe boti Markusi we murontai ma, we i denteng we fiata yau na fi iru ne kontai.

¹² Yemi Tikhikusi we dontai kawuru to Efesusi ampa.

¹³ Bontai ma mani ka nehu ansung maninggapoio wiatai na fino Karpusi ne munufoi na bendari Troasi. Ka nehu bukufo kontai, reantenang mani notesifo.

¹⁴ Aleksanderi mano niari fi na tembaga foi, i niari fi karira we yau paria, wape Sengnei ambori biaiti ki, ambori dohong aiboi wei ki.

¹⁵ Wau kontai bonansiau wei, weo i dapa kaiwoariri tatairiria ne fefe.

¹⁶ Na rahida bo reante-nang imaduai fi etinggai yau wea fo na mano ehutu kaiwo na bendari Roma nei earomireafo mani, wiro manei doatuwa yau kaha, mae ea kiai ewawu weru yau. Kadono Allai deiai ene sarawai nanai.

¹⁷ Tonanai ki wape Sengnei weriria yau tuti dohong mambiriw we yau, ampare iwemambiriw we imadu kariri ne Kaiwo Mahikai foa kai na mai, ambori inontarai Yahudi kaha fosa etaramioaifa. Tuti ikaharai weru mararehafoi.

¹⁸ Ampafe yeitawanai weo Sempaisi dewawu yau ambori ikaharai weru mano eteyo emung yau fo ki. Tuti i ambori kia yau na mai to ne Mananu rorong fo na Waidani. Sambewaraio Dadai feai wei we fitaiwafa. Antu!

*Paulusi denatu mahikai
tuti kife ne kaiwofo*

¹⁹ Yenatu mahikaifea we Persekilai tuti Akwilai uru, kontai we Onesiforusi ne wingfoi tuti ne arikangsa.

²⁰ Erastusi mani niayai na bendari Korintusi fo, tuti Trofimusi kontai meninang na bendari Miletusi ampare yontai weruri ma ninai.

²¹ Ruraifa we bontai ahera ma na danunanangfoi ne diru neungfo kaha fo. Ebulusi, Pudensi, Linusi, tuti Klaudiai, kontai doroi enayai na nina nesa, etanatu mahikai we wau.

²² Kadono Sengnei weriria wau tuti dohong ne bengfo arora we mea kiai.

Kaiwo Anatu Na Paulusi We Titusi

Kaiwo dedung we Titusi

Titusi mani wiro inontarai Yahudi dine kaha, wape yoaso Yesusi ampa. Paulusi sahui we ne maniwowiri dine, we urufi ruhiae we Kristusi fefe, tuti na fi yu fo mani wemangfata we Paulusi.

Kaiwo anatu nini Paulusi soi we Titusi na nu Kreta foi. Na kaiwo anatu bonini Paulusi deretawang Titusi kariri inontaraio ete ewenunggamiei we jemati fosa, amani kariri todoni etohong toa fo. Na nanai kontai inontarai maneа etaunau aunau sarawa feai. Ampefe Paulusi deunauwi we todoni deunau kaiwasa na jemati Kreta foi tuti todoni eminohi Weinontarai Kristen tarai fo.

Kaiwo na suratinei deto kutuai toninai:

1:1-4 Kaiwo reantenang.

1:5-16 Kaiwo kariri mano erufi na jemati fosa.

2:1-15 Aunau we nari kariri ne bengfo.

3:1-11 Kaiwo kariri inontarai Kristen nesa eminohi toa fo.

3:12-15 Kaiwo kafe.

Paulusi dohong mahikai we Titusi na nu Kreta

¹ Weo nehu kaisung bohi Titusi wau. Kaiwo anatu ninai na yau Paulusi, woming we Allai tuti rasuli we Kristus Yesusi. Seng Allai diri yau tuti denatu yau we ifata ne inontarai dirisa kawurua fosa,

ambori eroasoifa. Tuti iwiwiainsa we ewaitawang au nau wetarai fo, ambori esomi te we Allai,

² tuti enemitawanai we ambori esobu numainufo ki. Numainu nani Allai mano wiro sofa na wea kaha foi, dererai waroi kawuru na siario wiro niari nunei kaha fo, we ambori esobui ki.

³ Allai tane Mamparirifoi, tete ne rahida diriria foi, deinawi ne Kaiwo Mahikai nani we tata. Kaiwo nani yoasaoao yau tuti demi yau we iwuwuaifa.

⁴ Tituse wau mani isahu wau we nehu arikang terai fa, weo roaso Kristus Yesusi wa mai kariri iroasoine. Kadono Dai Allai tuti Kristus Yesusi, tane Mamparirifoi, urohong une bengfo arora we wau tuti urohong wau numuruainso une maifo.

Paulusi deretawang Titusi kariri fi yu na nu Kreta foi

⁵ Rahidao yontai weru nu Kreta wai mani yemi wau nayai, weo ambori fianai aino raminde tunari tara wa, nari pariaia mai. Kontai we ambori ruai maneа ewenunggamiei we jemati na bendariwa kai na nuwai, toyari yeretawang wau kawurua fo.

⁶ Mano ewenunggamiei we jemati nesa mani, inontaraio etohong sarawa kaha, erau wiwing mansia, ene arikang-fosa eroaso Kristus kawurua, ampefe inontarai siai wiro etinggaisa we enari fi mai kaha fe ete we etarami ene wawafosa kaha fe.

⁷ Inontarai ewenunggamiei nesa mani, Allai yoasosa we

ewaitawang wedua ne jematiifo, amparefe wiro etohong sarawa kaha, enemirorong dedai kaha, ete ehasou funoma kaha, etunung biriu ye kaha, emamuna funoma kaha, tuti euremi fiebai we doi ete ra kaha.

⁸ Mae eparaise etamang we inontarai siai na ene munufo, eparaise we ne bengfo, ebiriu we eteiaya fi mai kaha fo, emai, emararebanai, tuti etohong funoma kaha.

⁹ Erutawang kaiwo wetarai foa mutu, amani kaiwo aunau tato hona fo, ambori ewemambiri kontai we etaretawang inontarai siai we etohong kariri aunau wetarai nani, tuti esua mano eteiayara fosa.

¹⁰ Weo inontarai bitoya eteiaya kaiwo mai fo ampa tuti esafai kaiwo wetarai kaha fo tuti epampamu kaiwasa we eroaso kaiwo emadura fo. Inontaraio ebiriu paria we enari tonana nesa mani, efau na Yahudio eroaso Kristusia fosa.

¹¹ Inontarai tonana nesa mani awa kobu eboromifo wiruai, ambori efotou epampamu kaiwasofo. Weo na ene aunau mai kahai nani, wedaya munu rorong bitoya eroaso kaiwo wetarai fo ahang kaha tuti esodai ne karirafo. Tuti esafai aunau mai kaha nani we esera we ra terai.

¹² Nabi manei na nu Kreta foi medu karirisai kontai kawuru ampa, deyo, "Inontarai Kreta nesa mani, etatofa biriu, eharira paria, ewasiouisa funomai amani euremi marira we erufi, tuti

etananggoing biriu."

¹³ Kaiwo nabifi medura fo wetarai, wiro sofa kaha. Ampafe wua mano esafai kaiwo wetarai kaha fosa na kaiwo tapapa ambori eroaso te kaiwo wetarai foa mutu,

¹⁴ tuti ambori wiro eta we Yahudifosa ene kaiwo pondoaia fo tuti ene fiami wetarai kaha fo fanai, ete ambori eroaso kaiwo inontarai mano eteiaya kaiwo wetarai fosa emadura fo fanai.

¹⁵ Weo inontarai enemirorong mirarebana fosa mani, fifiani kontai aino enari fo mararebanai. Wape we inontarai mano enemirorong wesasari fosa tuti eroaso Kris-tusi kaha fosa mani, enari fifiani kontao mararebanai kaha. Weo enemirorong ketui foi tuti enemitituaitafo woru ampa.

¹⁶ Emadu eteyo ea mani inontarai eroasoai tuti etaroanso Allai saine, wape na fi enari fo tawaitawanai we etaroansoi kaha. Allai enerireu inontarai tonana nesa, weo wiro emaya we etaramididauwi kaha, tuti wiro ewemambiri we enari fi beng fo kaha fefe.

2

Aunau we nari kariri ne bengfo ambori inontarai siai eteibera Allai kaha

¹ Tonanai ki, wape Titusi wau mani, todoni kontao bounau te kaiwo aunau wetarai fo we jematiwasa.

² Amani bounau mano eweinonggutung wasa ambori etawansa wiro etohong funoma kaha, ebiriu we eteiaya fi mai kaha fo,

emai ambori inontarai siai etatosa, eroasoai na mai aunau wetarai na Allai fo, enemiwawu kaiwasa na mai, tuti etawansa na fianai aino esodaira fo.

³⁻⁴ Tonanai kontai we winggutungwasa, bounausa ambori eminohi esomi we Sempaisi. Dohonao etairiri kaiwasa fanai, tuti euremi fiebai we ye fanai. Mae esawai we etaunau mano ewewiwinggutung kaha fosa we enari fi beng fo. Etaunausa we enemiwawu ene mangfosa tuti ene arikang-fosa,

⁵ kontai ebiriu we eteiaya fi mai kaha fo, etohong sarawa kaha mae emai, erufi na ene munufo na mai, efata inontarai siai, tuti etato ene mangfosa. Ambori na enari tonana ne, inontarai eroasoa kaha fosa wiro eteibera Allai ne Kaiwofo kaha.

⁶ Tonanai kontai we bariboiwasa, boretarwansa ambori ebiriu we eteiaya fi mai kaha fo.

⁷ Na fifiani kontai wau wekasinali wesa na fi beng nari fo. Bounausa mani, bounau na tarai tuti na enemurorong mesi.

⁸ Bounau te kaiwo wetarai fo, ambori inontarai eroasoa kahaio eteiaya wau fosa, esobu rang we eteibera tata kaha, ampare ne tonanane wedaya emamaya, weo wiro esobu fi sarawa feai we eteibera tata naya kaha fefe.

⁹ Tonanai kontai we womingwasa, bounausa we etato mano ewewoming wesa wasa na fifiani kontai, tuti erurai we etohong kariri

ene kaiwofo na enemirorong mirising. Wiro etapasa fanai, ¹⁰ ete ewarami sayeru fanai. Mae etainawiai we ea mani ewarami mai. Etohong tonanane mani, inontarainesa kiai etato tane kaiwo aunau kariri Allai, tane Mamparirifoi, tuti eteyo kaiwo nanai mani kaiwo beng fine.

¹¹ Bounau mano eroasoa wasa we etohong tonanai, weo Allai deinawi todoni dohong beng kawuru we inontaraine tata kiai ampa, amani feriri tata ambori takaharai weru sasarifoi.

¹² Allai enewawu tata tuti deunau tata we ambori tawaramipa ne karirafo tuti tatohong kariri fi nunei kaha. Tuti deunau tata we taminohi na nu fininai tabiriu we tateiaya fi mai kaha fo, taenemirorong mesi tuti tasomi we Allai terai.

¹³ Tuti taenemitawanaia mutu tatamang we rahida fiabai mirarevana foi, rahi-dao tane Mampariri Yesus Kristusi, amani Allai Mano Fiabai foi, daraberahi to nunei na sambewara dadai rorong fo aha ma fo.

¹⁴ I dohong ne tarafol mireha we feriri tata kiai weru sasari kerira tanariri nei kiai, yuairurang tata ambori tamararebanai, tuti yuai tata we ne arikang terai. Ampafe tabiriu we tatohong fi beng fo terai.

¹⁵ Bounau mano eroasoa wasa kariri fianai aino anta imadurai nanai kai. Bounausa, boretarwansa, tuti wuasa, kariri wangno ru wa. Dohonao manea esahutawang wau fe, weo

Allai andino yuai wau we bounausa ne.

3

*Kaiwo kariri inontarai
Kristeni nesa eminohi toafo*

¹ Boretawang jematiwasa ambori esomi tuti etaramididau mano ewenunggamiei we parenta wasa tuti mano eru wang mananu wasa. Kontai bounausa we emaine-nang we enari fi beng fo.

² Boikaririai wesa we etohong inontarai siai ewonomi karira fanai, tuti ebiriu we esawasa fanai, mae enari suasa na mai. Tuti eboi earomi fanai, mae etato inontarai siai.

³ Weo tata kontai raminde tararia Kristusi kaha fa mani, tawebonggoi paria, tanari funomai, tuti taroaso fi wetarai kaha fo. Fi mai kaha fo aino tafaraiserai tuti taenemirorong dohong weai we tanari tera fo, kontai taenemituai te ne karirafo, taenemirorongfoi pirahai we kaiwasa, taenemirireu inontarai siai tuti inontarai siai enemirireu tata.

⁴ Tanari tonanai wape, Allai tane Mamparirifoi deinawi ne enewawufo tuti ne mahikaifo we tata, amani feriri tatara.

⁵ Feriri tata tonanane, wiro titua na tane bengfo kaha, mae na mantauni ne aro tata fo. Tuti feriri tata na Nuaninu Mirarebana foi ne mambiriufo, tuti yuairurang tata, wedaya tatawing ne karirafo, tuti yiwang taene-miroronge aha weworu.

⁶ Yesus Kristusi tane Mamparirifoi fi niari fo wedaya

Allai dohong Nuaninu Mi-rarebana nei funomai we tata.

⁷ Dohong beng we tata ambori fi kiai dohonai we ne arikangfosa dohonai we tata kontai, tuti tabeng riati aha. Niari tonana ambori tasobu rang weo taenemitawanaifa we tasobu numainufo.

⁸ Kaiwoariri imadurai nanai tarai. Ampafe yutang wau paria we bounauwai mambiriuk we inontarai eroaso Allaia fosa ambori erurai mambiriuk we enari fi beng fo. Weo nanai aino bengne tuti kia mai we inontaraife tatane.

⁹ Wape kotai weru kaiwoariri kia mai kaha fo, amani kaiwoariri inontarai esawasa wea fo, ete riria wiro werea na wea kaha fo, ete kaiwo funomai kariri Yahudifosa ene koang tuti Kaiwo Musai soi fo. Mano esawa we kaiwo tonana ne mani ewebonggoi paria. Fi fuba nani kiai wiro fiata sobu inontarainesa kahai tuti kia mai wesa kahai.

¹⁰ Mano wedaya kaiwasa na jemati fosa ao eweboyari ahang kaha foi mani, wuari. Wape wuari reantenangfo taraoa kahai, weberufo aha tarao wau kaha mani, boiayari tuti wiro mefanduhi mea riati ahang fanai.

¹¹ Inontarai niari tonana nei mani, boitawanai we da sarawai ampa, tuti sefang na sasari. Sasari niariri tonana nei deinawiai ampa we dohong sarawai na Allai urengreafao.

¹² Na rahida bo yenatu Artemasi ete Tikhikusi we dontai mauo sobu wau foi mani, ruraifa we wukahera bontai we yau to bendari Nikopolisima. Weo imadurai futuayai we danunanangfoi ne diru neungfo mani, inayai na nana rai.

¹³ Rahida bo Zenasi mano deitawang hukumi na mai foi tuti Apolosi urontai nai wai mani, ruraifa we fata suru na fi uka ria suru na une rang rorong fo, ambori usobu dadi-rafea fanai.

¹⁴ Bounau tane inontarai eroasoa wasa ambori erurai we eru fi mai fo we efata inontarai siaio ene pari fi fosa ambori inontarai ene pari fi nanisa wiro esobu dadira na ene munu rorong fo kaha. Na tonanane esobu aunau we ehabi ene rahidafo funoma kaha.

¹⁵ Doroi amenai ruhiae na nina nesa, etanatu mahikaifeai we wau. Tuti boikaririai we tane mani-wowiri taroasoai ruhia wasa, mano enemiwawu amea wasa, weo ametanatu mahikai wesa kontai.

Kadono Sengnei dohong ne bengfo arora we mea kiai.

Kaiwo Anatu Na Paulusi We Filemoni

*Kaiwo dedung we surati
we Filemoni*

Suratinei rasul Paulusi soi na rabuang bo wia na aitamu rorong foi. Soi we ne maniwowiri manei, wonong fino Filemoni, tarahio minohi na bendari Kolose.

Filemon nini yoaso Yesusi ampa, tuti inontaraio ne wafonai we jematifoi dine kontai. Ne woming erufi wei fosa tarahai maneiru teai, tuti na ne woming nanisa manei wonong fino Onesimus. Wyoming nini wewu werui to katai siai ampa. Nana mani, na hukumi Kaisari Roma foi Filemoni miaya reti, dohong aiboi marareha we Onesimus ki.

Wape waitawang na rang todoni Onesimus sobu Paulusi na aitamu rorong fo tuti Paulusi deiriri Kaiwo Mahikai kariri Yesusi fo wei, ampefe yoaso Yesusi tuti dariati. Ampefe Paulusi deo denatui daraberahi we ne mano yufi wei foi aha, amani Filemoni. Nanai wedaya soi suratinei we Filemoni we medu sauaraei wei, ambori todoni kontao sobu Onesimus na mai aha, toyari ne doroi uroaso Yesusi ruhiae, wiwo we ne woming teraio deiai ne sarawafoa dine kaha.

Kaiwone deto kutuai toninai:

- 1-3 Paulusi dohong mahikaifeai we Filemoni.
- 4-7 Filemoni yoaso Yesusi tarai.
- 8-22 Paulusi dutang we Filemoni kariri Onesimus.
- 23-25 Kaiwo Kafe.

Mahikaifeai

1-2 Weo Filemone wau, mano auenemewawu wau tuti aune maniwowirio rufiria auru wa wau. Kontai we aune doroio Afiai, we aune maniwowiri Arkhipusio torurai ruhiae tuti Yesus Kristusi wonongfe nei, tuti weo jematio mefanduhi mea na nemu munuwai mea.

Kaiwo anatu ninai na yau Paulusi, inontaraio iwatai na aitamu rorong ne weo iwuwu Yesus Kristusi ne yau, tuti na tane doroio Timotiusi.

3 Aunemitawanai kadono tane Dai Allai tuti Seng Yesus Kristusi urohong une bengfo arora we mea tuti uwedaya mea menumiruainso une maifo.

*Paulusi fiai Allai we
Filemoni enewawufo tuti
yoasoaf*

4 Yutang tuti wau we Allai mani, ifiai, yohong mahikai pampang wei.

5 Weo tarahuoaifa we roaso Seng Yesusi tarai tuti enemuawawu Allai ne inontarai emararebana wasa kiai fefe.

6 Yutang we Allai ambori na boiriri kariri nemu roasoawa we kaiwasa bitoya fi wa, na tonanane boitawang na mai kariri fi beng kiai tasobuai na Kristusi.

7 Doroi bohi Filemone, bohong yau imirising paria tuti iwemambiriu kontai, weo enemuwawu Allai ne inontarai emararebana wasa tuti fatasa ampare emararisng tuti enimiorongwai mitubaru.

Paulusi dutang tuti Onesimus we Filemoni

8 Ampafe nanai wedaya ye yutang wau we nari fieai, amani fio masi we nari wa. Tuti na Kristusi wonongfo iwemambiriu we yemi wau nari fiani aino yeo nari fo kontai.

9 Tonanai ki wape tuene-miwawu turu, ampare wiro yemi wau na kaiwo tapapa kaha, mae yutanai teraifa. Aromuo yau, bohong kariri nehu kaiwone, we iwewawa ampa tuti iwatai na aitamu rorong fe ninai weo yeiriri Kristus Yesusi wonongne.

10 Ampafe yeo yutang fieai we wau kariri nemu womingno Onesimusi, inontaraio isahui we nehu kaisung na Kristusi nei. Weo na aitamu rorong fe ninai yeiriri Kristus wei ampare arahio yoaso.

11 Raminde nanai inontarai nini wewu weru wau, kia fieai we wau kaha, wape ninaia mani kia mai paria, wiro we wau tera kaha mae we yau kontai.

12 Yenatu nemu womingno wewu weru wau nei aha mau tuti yutang wau we wobui na mai aha. Enehuwawuti paria, manamo yemi daraberahi we wau aha mau ne.

13 Imaya kairi we dontai weru yau kaha, mae yeo niayai ria yau na ninai we yi-wang wau we fiata yau, na rahida iwatai na aitamu rorong fe ninai we yeiriri Kaiwo Mahikai fo fefe.

14 Tonanai wape yeo yutang wau akawuru wo, weo roa ete bireri e? Weo imaya we iwedaya wau nari fi na enemurorong mesi kaha fanai, mae yeo ambori fi mai nari fo mani nari na enemurorong mirising.

15 Enehutituitai we tarahio Onesimus ketai tourai weru wau ne, we ambori Sempaisi dohoni we wau aha mau ambori muweboyari we fitawafa.

16 Weo i daraberahi we wau mau, wiro wewoming we wau teraifa karirifafong nanai ahang kaha, mae ninaia mani wahui we nemu doroi muroaso Kristusi ruhia dine ampa. Enehuwawuti paria wape wauno enemuwawuti sewa ne, weo wobui wewoming we wau aha, tuti we doroiodaria Yesusi tarai manei dine kontai.

17 Ampefe wahu yau we nemu maniwowirio turufi ruhiae we Sengnei mani, tonana mani ka Onesimusi aha mau, wahui we nemu doroi kariri wahu yau we nemu doroi nina.

18 Masino dohong sarafieai we wau ete kia nemu fiea mani, bohonai tau we yau ma ambori ibaitai ki.

19 Ambori boitawanai we yohong kariri nehu kaiwo arerai nina mani, mantaung yau isoi na warahunei ton-

inai we wau, *Yau Paulusi, yauno ambori ibai fianai aino dohong sarawai nanai we wau ki.* (Wape imaya we yeikaririai we wau ahang kahai, we wau kontai wobu fi beng bitoya ria yau kawuru ampa, amani na yeiriri Kaiwo Mahikai fo we wau tuti yeunau wauwa roaso Kristusiwa.)

²⁰ Ampafe doroi bohi Filemone, nari kariri fianai aino yeyoai mau nina, amani bomang we Onesimus na mai aha. Na tonanane nari yau imirising pari aha weo ro ria Seng Kristusi na mai.

²¹ Yenatu kaiwo ninai we wau mau ne, iroasoifa we bohong kariri fio yutang wau weai nina rai. Tuti iroasoifa we nari fi mai sewa aha weru fi yutang wea fo ki.

²² Kontai moinenang rorong bei na nemu munuwai we yau. Weo enehutawanaifa we Allai yoa we mene nadi metutang tuti yau wai kiai, tuti wiwiaing yau ira to boriei weru aitamu rorong nei, ambori yontai mau ki.

Paulusi etanatu mahikai we Filemoni

²³ Epafrasi denatu mahikai we wau. I kontai wiatai na aitamu rorong fe ria yau weo wiuwu Kristus Yesusi ne Kaiwofo fefe.

²⁴ Nehu maniwowirio erufi ria yau nesa kontai, amani Markusi, Aristarkusi, Demasi, tuti Lukasi etanatu mahikai kontai we wau.

²⁵ Kadono Seng Jesus Kristus dohong ne bengfo arora we mea kiai.

Mahikaifea.

Kaiwo Soi We Iberani

Kaiwo dedung we Iberani

Kaiwo anatu we inontarai Iberani nini, mano soi nei denatui we Yahudi eweKris-teni manea, amani inontarai Kristenio esodai dadira pampang paria wedaya adareti eroaso Kristusi ahang kahai ki. Mano soi kaiwo anatu ni-nai, yurai we dohong kaiwo wesa pampang we ambori eroasoa fo mutu. Nanai wedaya soi kariri Yesusi Kristusi we I mani deinawi kariri Al-lai na masi.

Mano soi suratinei medu kariri fi betoru wesa mani; Reantenang mani, kariri Yesusi we I mani Allai ne Kaisung dine-Kaisungno werea na ea kaha. Kaisung nini deinawi ne dohong kariri Dai ne dawiafo na mai, na sawania mutu sodai dadi-rafo. We Allai ne Kaisung dine tonanafo, Yesusi nini dedai sewa nabio na Kaiwo Arerai Mamo fosa kiai. I kontai dedai sewa wewaifosa tuti Musai mantauni kontai.

Beru mani, Allai deinawai we Yesusi mani weImami werea na ea kaha dine tuti dedai sewa imamio na Kaiwo Arerai Mamo fosa kiai.

Betoru mani, medurai we na Yesusi, mano eroaso-i fosa ekaharai weru sasarifo, mataifo tuti weru mararehafoi. Na weimami Dedai Mirarebana fo nanai feriri inontaraine tata na tarai. Fariri nani wiro obui na fi nunung we korbani fo tuti fi siaio nari kariri agama Yahudi foi fo kaha. Fi nari

tonana fo, manta deinawi kariri fariri taraio obui na Yesusi nani terai, wiro fi siai feai konta kaha.

Na medu deisaha kariri mano eroasoao ewe-ewonomi na Kaiwo Arerai Mamoa fo nani sa fo, mano soi kaiwo anatu fe nini deyo medurai we mano etato kaiwo anatu nesa we ambori etawa kaha, mae etohong kariri ene eroasoa fo nanaia mutu. Na robong 12 foi, dohong kaiwo wesa we etawansara mutu na dadira rorong esodairai nanai paria werea naya fo, na ewati terai we Yesusi. Deretawansa we etawansa na dadira esodaira fo tuti na inontarai enari kangganisa fo nanai.

Kife ne kaiwo anatu ne na dohong kaiwo aunau fo wesa tuti deretawansa do-honao etaramio fi siai kia enemirorongfo wedaya wiro etaramio Yesusi ahang kaha fe.

Kaiwo anatu ne deto kutua tonina:

1:1-3 Kaiwo reantenang fo mani, kariri Kristusi we I mani, deinawi kariri Al-lai na mai na ne taraifoi.
1:4-2:18 Kristusi dedai sewa wewaifosa.

3:1-4:13 Kristusi dedai sewa Musai tuti Yosuai.

4:14-7:28 Fi mai tuti dadai sewa Kristusi niari we weimamifo.

8:1-9:28 Fi mai tuti dadai sewa na Kristusi ne Ar-erafo.

10:1-39 Fi mai tuti dadai se-wao na Kristusi wekor-banifo.

11:1-12:29 Kaiwo kariri imamifo we fio todoni kontai ohong kariria fo.

13:1-25 Kaiwo aunau tuti kaiwo kafe.

Allai medu na ne Kaisungfoi

1 Na fafongfa, Allai medu bitoya na ne nabifosa we tane werengno Israeli fafong fasa, tuti medu wesa na rang bitoya.

2 Wape rahida wefuiai ninai Allai medu na ne Kaisungfoi we tata. Kaisung nani, Allai mantauni yuaisi weArikangno ambori ne mambiriw we sobu fi kiaio tamang neng fo. Na I kontai, Allai niari nunei tuti rorafaisi sentenang.

3 Kaisung nani ne tarai toyari sambewarai we tawatipa Allai ne sambewarai dadai fo tuti wefainawiaia kasau kariri Allaio tarai foi, tuti andino derara fi kiai na rorafaisi tuti nunei na ne kaiwo wemambiriw fo ne. Yuairurang tane sasarineia kiai na ne rikafoia mani, minohi na Mananufaisi warang domoya fo, na katai dedai mantaung foi.

4 Dedai sewa wewaifosa kiai, dedai kariri wangno sobua fo, weo wang nanai dadai pari sewa weru we-waifo ene wangfo.

Allai ne Kaisungfoi dedai sewa weru wewaifosa

5 Weo Allai wirosahu we-waifosa we ne kaisung disa kaha. Wiro medu we manei nasa deyo,

“Wauno nehu Kaisung di Waune!

Rahida bonini iweDai we Wau.”*

Kontai wirosedu kariri we-wai manei deyo,

“Iambori sahu Yau we ne Dai, Tuti isahui we nehu Kaisungfo ne,”* kaha.

6 Kontai, rabuang bo kia ne Kaisung mansiari foi to nunei meu ne, medu deyo,

“Wewainesa kiai, todoni kontaio esomi wei.”*

7 Mae kariri wewaifosa mani, medu deyo,

“Allai niari ne wewaifosa ene tarai toyari numandai, tuti niarisawa ne mangfata ene tarai toyari adia denggararu.”*

8 Mae we Kaisungfoi mani Al-lai medu deyo,

“Allai Wau, nemu kadera mananu wai wiatai we fitawafa, tuti Wau wemananu na nemurorong mesi.

9 Wau mani enemuone maifo tuti enemurireu ne karirafo;

nanai wedaya Allai, mano wahui we nemu Allai dine foi, diri wau yuai wau dedai sewa nemu mani-wowirio meweboyari fosa,

tuti deinawi finanai na yuairurang nemu taraiwai na maningno kia mirising fo.”*

10 Tuti medu we ne Kaisungfoi kontai deyo,

“Sengne Wau, na reantenang pari fo nari nunei amangneia mitu,

* **1:5** Masmuri 2:7 * **1:5** 2 Samueli 7:14; 1 Tawarikh 17:13 * **1:6** Ulangan 32:43 * **1:7** Masmuri 104:4 * **1:9** Masmuri 45:6-7

tuti rorafaisi mani
waramu wawua fine.

¹¹ Finanai kiai ambori woru,
wape Wau mani munohi
pampang.

Finanai kiai ambori memo
toyari ansung.

¹² Nunei sentenang am-
bori wukoyer toyari
wukoya ansung boriei
fo,

tuti toyari mane iyiwang
ansungfo tonanai kon-
tai riwani na nu siai
bei aha.

Wape Wau mani riwang Wau
na ea kaha,

tuti nemu rahida wiro
werea na ea kaha.”*

¹³ Tuti Allai wiro medu we
wewaifosa na weai kawurua
deyo,

“Munohi na warahu domoya
ne,

paria inari nemu aiteta
wausa etawai aweu
awemu doa sausa.”*

¹⁴ Tonana mani, wewaifosa
mani fiani saine? Ea kiai
mani nuaninuo efata Allai,
tuti Allai demisa we efata in-
ontaraio ambori esobu fariri
fosa saine.

2

*Uarai we dohonao tara
weru fariri tasobuai na Kris-
tusi fo fanai*

¹ Tonana mani, todoni
kontaio tarurai tarai we
tarutawang Kristusi ne au-
nauo tataramioai kawurua
fo, ambori tara weru tane
taroasoai nana kaha.

² Weo Allai ne Kaiwo Arerai
Mamo wewaifosa emadurai
we tane werengno Israeli

fosa na fafongfa, wetarai tuti
todoni kontai ohong kaririai.
Tuti mandoni dino dohong
kariria kaha mani sodai
aiboifo, masi kariri fisawarai
niari nai.

³ Tonana mani, todoni we
fariri fiabaio tasobuia foi
ne? Nana mani faririo Allai
ne Kaisungfoi mantauni do-
hon. Reantenang mani fariri
nani Seng Yesusi deiririaia,
tuti mano etaramioai terai
ria Sengfoi sa etaiririai we
tata ampa. Ampafe, tato hong
kariri fariri nani kaha mani
tarai tasodai aiboi fuba pari
sewa aha foi ki!

⁴ Allai kontai yoa tuba
fariri Yesusi dohoni nani,
tuti deinawiai tonanai na
fainawiai tuti fitantuma
bitoya paria, tuti na deto Fi
Mai Nuaninu Mirarebana foi
dohona fo, amani Fi Maio
detorai kariri mantauni ne
awiafo.*

*Yesusi da ma weinontarai
batang toyari tata, ambori fiai
rang we tasobu faririfo*

⁵ Wiro wewaifosa ansaino
esobu mambiri ria Allai we
eru wang mananu fo na nu
weworu da aha ma foi kaha,
amanu nu weworu tamadu
kariri nini.

⁶ Mae mambiri nanai
Allai dohoni we inon-
tarainesa, amani kaiwasanei
kiai, weo na kaiwofo mane i
yoa tubarai tonina:

“Inontarainei mani fianang
dine,
doni aromuoi nina,
ete arikang inontaraifosa
mani mandoni disa,

* 1:12 Masmuri 102:25-27

* 1:13 Masmuri 110:1 * 2:4 Kariri Fi Maio
Nuaninu Mirarebana foi dohona fo mani, boto kariri finana kiai na 1 Korintusi
12.

doni uremufo nayai nasa
nina?

Wiro ewefiea kaha.

⁷ Nari inontarainei tewawa
weru wewaifosa we
rahida kuteai,

Mae akawuru wori bo-
hongno sambewaraio
dedai tuti wang omi
wea fo wei.

⁸ Kontai nariri sobu
mambiriufo we yufio
na doni konta foi.”*

Masino kaiwofo dotu we
Allai niari inontaraine ewe-
mambiri we esodua fifuba
niai na nunei nini kiai, nana
mani deinawiai we fifiani
kontaio ewemambiri we
eru, wiro wea bireri kaha.
Tonanai ki, wape na ninai
wiro tawatio inontaraine ene
mambiri tonana fo kaha rai.

⁹ Wape ne tawatioa ne mani,
tawatio Yesusi, andino Al-
lai niariri tewawa weru we-
waifosa waroi kuteai, wape
ninaia mani yu wang man-
anufo na sambewaraio dedai
fo. Yesusi nani yu wang
dedai fiabai foi weo sodai
mararehafoi ampa, ambori
na Allai ne bengno dohonai
arora fo, sodai mararehafoi
we inontaraine tata kiai kon-
tai.

¹⁰ Allai niari finini kiai tuti
niariri we mantauni. Allai
ne enetituaitafo mani, we
fiai rang we ne arikangne
tata ambori tasobu ne sam-
bewarai dedai fo. Ampafe
wetarai paria wei we niari
tane Mamparirifoi sodai
dadira ambori mesi paria.
Na sodai dadira tonana fo
mani, Yesusi weMamparirio
mesi paria we feriri tata dine.

¹¹ Yesusi yuairurang
inontaraine tatara tam-
rarebanai weru tane
sasarinei ampa, tuti mano
niari tata tamararebana ne
tata, tata kiai tane wawa
mansiasi. Nanai wedaya
Yesusi wiro mimaya we sahu
tata we ne doroi kaha.

¹² Yesusi medu deyo,
“Yau ambori ikorang wono-
muwai we nehu
doroinesa,
tuti ifiai wonomuwai
na rahida bo mano
esomi we Wau fosa
efanduhisa fo.”*

¹³ Medu aha deyo,
“Yau ambori iroaso te Al-
lai.”*
Tuti medu nariai aha deyo,
“Yau ninai,
tuti arikangno Allai Wau
bohonsa we Yau nesa
ansainina.”*

¹⁴ Weo inontarai sahusa
we arikang nanisa mani,
arikang batangno ambori
tamarareha tataine, ampare
Yesusi mantauni niari ne
taraiifo kariri tata tuti mi-
nohi Weinontarai batang
kariri tata. Ambori na
ne mararehafoi kiraikobu
mano wemambiri we
mararehafoi, amani Samin-
seni.

¹⁵ Tuti na tonanane niari
tata takaharai weru tane
tawewoming we marareha
foi, weo paria nanai Samin-
seni wewora tata na tamatai
marareha foi.

¹⁶ Weo tarai, we wiro we-
waifo saino Yesusi urengfo
nayai nasa fo kaha, mae
Abrahami ne ririane tata.

* 2:8 Masmuri 8:4-6

* 2:12 Masmuri 22:22

* 2:13 Yesayai 8:17

* 2:13

¹⁷ Nanai wedaya, na fifiani kontaio niari ne taraifoia ne tarai kariri ne doroifosa, ambori na tonanane weImami Fubao enewawufo fuba tuti dohong kariri Allai na mai, ambori dohong ne taraifo feriri kaiwasanei kiai weru ene sasarinei.

¹⁸ Weo Yesusi sodai dadira na rahida Saminseni denggoari we sawa fo, manamo wiro sawa kaha. Ampafe i kontai wemambiriu we fiata mano esodai dadirao ambori wedayasa etawa fosa kontai ki.

3

Yesusi dedai sewa Musai

¹ Tonana mani, doroi memararebanaio Allai sahu mea na katai dedai fo kontai wa mea, menemitituai sauurai kariri mano weRasuli tuti weImami Fuba foi, amani Yesusi mano taroa wei foi dine.

² Yesusi nini dohong kariri fianai aino Allai mano diriri foi, fi demi weai we niari fo na mai, mai kariri Musai we dohong kariri fio Allai demi we niari na ne inontarai Israeli fosa kiai, amani ahusa we Allai ne Munu rorong fosa.

³ Tonanai, wape Yesusi todoni kontaio sobu sambe-waraio dedai fo fuba sewa weru Musai, weo mano biaung munu bei andino sobu fiai fuba sewa munu biauni nani.

⁴ Tarai we mununei kiai mani, inontaraine ansaino ebauni ne. Wape mano biaungno fianggeng fuba nini kiai mani, Allai mantauni.

⁵ Musai dohong kariri we-mangfata na Allai ne Munu rorong fo kiai na mai tuti medu kariri fio Allai ambori meduraifa fo na rahida da ma fo.

⁶ Wape Kristusi dohong kariri fianai aino yu fo na mai, amani wekaisungno wenunggamiei we Allai ne Munufoi fo. Tuti tataino ne Munu di tata, masino tarutawangno tane taroaso Yesusi na tamatai kaha tuti taenemitawani pampang.

Roasoa kaha mani obu ne karirafo

⁷ Ampafe kariri fianai aino Nuaninu Mirarebana fi medurai fa deyo,

“Rahida bonini kontai, metarami ne rawafufoi mani,

⁸ dohonao menumikamieiwai mitubaru fe, kariri mene wereng Israeli fosa na fafongfa na rabuang bo etapa Allai tuti etitua we ne mananufo na katai mananai sarahiae fo fe.”

⁹ Allai deyo,

“Na wanai mene werengfosa we defuina piarua ewati te fianai aino inari wesara fo tonanai ki,

wape etapa yau tuti etitua we nehu mananue.

¹⁰ Nanai wedaya ikasou mano rabuang bonani sa tuti imadu yeyo, ‘Ea mani enemirorong-foi da siarawai pam-pang,

tuti wiro etaroang
nehu rangne
kaha.'

¹¹ Ampafe ikasou tuti ifafora,
wiro esuai afui we emi-
nohi ukai na mai ria
Yau kaha."*

¹² Doroi meaine! Metanansiau,
ambori dohonao obuaifa we na mea manei enerongfoi kerira tuti yoaso
Allai kahai mae kurutare
Allai Mano Darang foi fe.

¹³ Wape todoni kontaio metaunau wawera mea pampang, rahida neungne mebaung mea na kaiwo mai fo, tuti menari tonanai na kutu taminohi na rabuang bo ahui we 'Rahida Nini' faini fo. Ambori na tonanane wiro sasarinei sofa wawera mane waua wedaya bapa Allai kaha.

¹⁴ Tata kiai mani Kristusi ne maniwowirio tarurai ruhia di tata, masino paria werea naya fo tarutawang tane taroasoao tasobuai na reantenang foa nanai.

¹⁵ Toyari kaiwoariri anta deyo,

"Rahida bonini kontai,
metarami ne rawa-
fuifoi mani,
dohonao menumikamiei-
wai mitubaru fe,
kariri mene wereng Is-
raeli fosa na fafongfa
na rabuang bo etapa
Allai fo."*

¹⁶ Mandoni saino etaramio Allai rawafuifoi tonanai, mae etapai ne? Tofino, inontarai nanisa mani, kaiwasa fuba raminde Musai kiasa era weru nu Mesiri foi saine kaha e?

¹⁷ Tuti we mandoni saino Allai kesou defuina piaru fo ne? Mano Allai kesousa tonana fo mani, mano enari sasari fosa, mano etau na katai mananai sarahiai foi.

¹⁸ Tuti mandoni saino gefora weduasa deyo wiro esuai afui we eminohi ukai na mai riati kaha ne? Mano Allai geforasa tonana fosa mani, inontarai mano etohong kariri Allai kaha tuti eroasoa kaha fo saine.

¹⁹ Ampafe ninaifa mani, kasau ampa weo Allai wiro yoa wesa we esuai afui eminohi ukai na mai riati kaha, weo eroasoa kaha fefe.

4

*Allai dohong ne rahida bei
we ne inontaraine tata ambori
ne maifo tasobuai nai*

¹ Allai ne kaiwo dererai nanai, kariri yoa we tasuai tono ne maifo taminohi ukai riati fo, kaiwo dererai nanai nayai pampang paria sobu rahida bonini kontai. Ampafe metanansiau weduarai paria, ambori dohonao manei na tata wiro sobu ne mai nana kaha fe.

² Weo Kaiwo Mahikai kariri todoni obu ne mai tuti minohi ukai riati fo nanai,* ewuwucai kontai kawuru we tata ampa, mai kariri we tane werengno Israeli fosa na fafongfara fo. Tonanai ki wape we tane werengfosa na fafongfa mani, kaiwo nanai wiro wefieai wesa kaha, weo etaramioai tonanai mae wiro eroasoi kaha.

³ Ninaia mani, mano taroasoai ne tata tasuai to Allai

* 3:11 Masmuri 95:7-11

* 3:15 Masmuri 95:7-8

* 4:2 Ulangan 28:1-14

ne maifo taminohi ukai riati ampa, mae tane werengfosa esuai to wana kaha. Nanai masih kariri fianai aino Allai medurai tonina ne:

“Ikasou tuti ifafora,

wiro esuai afui we emi-nohi ukai na mai ria Yau kaha.”*

Tarai, na reantenang pari fo Allai niari nunei kiai ampa, tuti fiotou niari fi fo mae minohi ukai na mai pariao nini.

⁴ Weo kariri rahida itu foi mani, na ne kaiwofo Allai medu kaririai tonina:

“Allai niari fifuba nini kiai tonanai,

tuti rahida bo itu foi mani minohi ukai na mai.”*

⁵ Tuti na kaiwo anta nanai, tatatorai we medu kontai toninai:

“Wiro esuai afui we emi-nohi ukai na mai ria Yau kaha.”*

⁶ Tonana mani kasau ampa we inontarai manea ambori esuai to ne mai minohi ukai riati nana ne, wape mano esobu Kaiwo Mahikai kariri todoni obu ne mai tuti minohi ukai riati fo fafongna fosa mani wiro esuai afui kaha, weo wiro etohong kariri Allai kaha tuti eroasoa kaha fefe.

⁷ Nanai wedaya dei kutu rahida bei, andino ahui we ‘Rahida Nini’, werahida we inontarai esuai to ne minohi uka fo. Defuina yiwang defuina akawuru wori Allai medu na Dauti kariri rahida

nani, na kaiwo anta dotua nanai amani:

“Rahida bonini kontai, metarami ne rawa-fuifoi mani, dohonao menumikamieiwai mitubaru fe.”*

⁸ Weo masino Yosuai kia inontarai nanisara esuai to ne mai minohi ukai nani reti, na fui mani Allai wiro medu kariri rahida siai bei ahang kahai ki.

⁹ Ampafe pariao ninai Allai meineng rahida bei we ambori tasuai to ne mai minohi uka foi, ne tarai toyari I we raminde minohi ukai na ne rahida Sabati foi.

¹⁰ Weo mandoni kontaio suai to Allai ne mai minohi ukai nani mani, wenani fiotourai na fi yu fo tuti wiro yufi ahang kaha,* kariri Allai we fiotourai na fi niari fea fo.

¹¹ Ampafe, tarurai paria we tasuai to ne mai minohi ukai nana, ambori wiro manei na tata sawai we dohong kariri inontarai Israeli fafong fasa fe, we wiro etohong kariri Allai tuti eroasoa kaha fo.

¹² Weo Allai ne Kaiwone darang tuti wemambiriu, tuti reisa sewa sonduo reisa doru foi; disang mani berorong paria, paria wedaya kiatate numianinunei weru ansegnei, berorong pariao neina soriruhia fo tuti neina rorong fo. Wemambiriu kontai we titua kariri taenemituaitafo tuti taenemirorongfuisi.†

¹³ Inontarainesa kiai, mansiari kontaio wiro dediwa

* 4:3 Masmuri 95:11 * 4:4 Kejadian 2:2 * 4:5 Masmuri 95:11 * 4:7

Masmuri 95:7-8 * 4:10 Fi yu fo nanai mani, etohong korbani pampang tuti sunatifo, tuti fi erurai we emasi nai kariri Allai ne Kaiwo Arerai Mamo foi. † 4:12 Ninaia mani, Allai medu we tata na ne Kaiwofo, amani Kristusi, toyari dotu na Iberani 1:1-2.

weru Allai urengreafu kaha,
weo finini kiai kehabi tuti
tifai kiai na urengreafu.
Andino ambori tata kiai
tateiai kariri fianai aino
tanari ne wei fo ne.

Yesusi weImami Fuba dine

¹⁴ Ninaia mani tane Imami
Fuba dedai manei.[‡] I mani da
maino rorafaisi ampa, amani
Yesusi, Allai ne Kaisungfoi.
Tonana mani tarurai we
tarutawang tane taroasoane
na mutu, amani tane taroasoao
taroa weaia fo.

¹⁵ Weo Imami Fuba taneni
nini, wiro ne tarai kariri
imami fafong fosa kaha,
weo I kiontai niuruainso
fianai aino tanumiruainsoai
weinontarai batang na tane
tafanahangfo, amani na
tawemambiri we tateiaia
sasarine kaha. Mae tane
Imami Fuba nini mani siai
paria, tuti ne tarai kariri
tata weo raminde nanai, na
fifiani kontai, sobu fi sofa
we sawa fo bitoya paria, mai
kariri tata na fuinini, wape I
wiro niari sasari kaha.

¹⁶ Ampafe, todoni kontaio
na tamatai kaha tara kefang
we Allai, mano dohong ne
bengfo arora foi, to ne kadera
mananu foi refongfo, ambori
aro tata tuti tasobu ne beng
dohonai arora we tata fo,
ampafe finanai fiata tata na
rahida tasobu dadirafo.

5

¹ Tuti kariri imami fuba
fosa mani, imami fuba mandoni
kontai iriri nano inontaraine
tata, ruaisi we yiwang inontarainesa kiai na

fi kariri omi we Allai fo, we
kia inontaraine ene fi eto-
honai we Allai fo, tuti we do-
hong korbani we kaiwasanei
ne sasari nani we Allai.

² Imami nani deitawang
kariri inontaraio eserawaw-
eraha fosa tuti era sarawa
fosa ene enari toa fo, tuti
na kaiwo manang niari
suasa, weo mantauni kontai
inontarai batang dine tuti
finahang na fifiani kontai.

³ Finanai wedaya todoni
kontaio niunung korbani
we feriri mantauni ne
sasarifo kontai, wiro we
inontaraifosa ene sasarifo
tera kaha.

⁴ Tuti mandoni kontaio,
wiro yuai bera mantauni we
weimami fuba tonana kaha,
mae Allai andino sahui tuti
yuasi we yuwang dedai nana
ne, mai kariri Haruni na
fafongfa.

⁵ Tonanai kontai, Kristusi
wiro yuai bera mantaunia
weImami Fuba na dadai
sambewara fo tonana kaha,
wape Mano medu wei foi
andino yuaisina kaiwo medu
wei fo deyo,

“Wauno nehu Kaisung di
Waune!

Rahida bonini iweDai we
Wau.”*

⁶ Kariri medu na katai siai
kontai deyo,

“Wau mani imami di wau we
fitawafa,
kariri wang imami
Melkisedeki fo.”*

⁷ Na Yesusi minohi weinon-
tarai batang kariri inontaraine
tata fo, wenadi
tutti dutanai paria na saia

[‡] 4:14 Ato kariri imami fuba fosa na Imamat 16. * 5:5 Masmuri 2:7 * 5:6
Masmuri 110:4; Kejadian 14:18-24

bibe tuti urehurufo towowu we. Mano wemambiri we feriri weru mararehafoi, tuti na dohong kariri Allai na enerorong tewawa fo, Allai tarao ne nadifo.

⁸ Allai ne Kaisung dine tonanai, wape na dadirao sodaira fo sobu aunau nayai we dohong kariri Allai na mai,

⁹ tuti na tonanafo mesi ampa, ambori weMampariri pariao fitawafa dine, we feriri mandoni kontaio dohong kariri ne dawiafo.

¹⁰Tuti Allai sahui weImami Fuba, kariri wang imami Melkisedeki fo.

*Kaiwo aretawanai we
ambori tatawai weru taroaso
Kristusi nei fanai*

¹¹ Kariri fi tonana ne, fi bitoya paria yevo imadu kariri, wape dadira paria we yeisaharaia kasau, weo mene metafu kaiwo wa ahera kaha.

¹² Tarai, ato weai na defuina ne mani, mewemantaunau ampa. Wape tonana kahai mae metohong we mesobu aunau ria inontarai siai kariri kaiwo reantenang na Allai ne Kaiwofo, amani kaiwo masi we inontarai arahio yoasoa foi sobu aunau kariria fo terai. Metohong we ui nendai, wiro fiang mutubaru kaha,

¹³ weo mandoni dino dunung ui pampang mani, wiro deitawang ete tefu aunau kariri todoni minohi weinontarai enerorong mesi na Allai arongreafio kaha, weo wearikang marareha nendai fefe.

¹⁴ Wape fiang mutubaru ne mani we inontaraio efabaia fosa, amani mano etawansa na etaunau mantaunsa pampang we todoni etitua kariri doni aino bengfo tuti doni aino karirafo.

6

¹ Ampafe, doroi meaine, tara to fong na fi kariri taroasoai kariri Kristusi ne. Aunauo we mano arahio eweKristeni fosa todoni kontaio etaunaua fo, wiro tataunauai pampang fanai, mae tasoi tata we aunauo ne sua aha fo, amani aunauo masi we inontarai eroasoafu mutua fosa esobua fo. Weo, toyari inontaraio ebaung munu bei ethong munu ne kamiei reantenang fo kai we ebaungno munufoi nai fo, tata kontai tanari tonanai na taroasoanei ampa. Tonana mani wiro tataunau aunau reantenang fo pampang aha fanai, amani aunau kariri tatarabera tata weru tanari fieai wedaya mararehafoi fo, tuti kaiwo reantenang kariri todoni taroaso Allai foi,

² aunau kariri baptisangfo, ete todoni taruai tawaraminea wasau inontarai we tamoansa fo, aunau kariri mansuwi-suwifo, tuti kariri aiboio watai we numainufo. Ampafe wiro tamadu pampang kariri finanai ahang fanai, mae toyari inontarai efabaia fo tamadu kariri Kristusi ne aunau masi we inontarai efabai fosa ewaitawana fo.

³ Tuti Allai yoa wea mani, todoni kontaio tanari tonana

rai!

⁴ Weo inontaraio raminde esobu Yesusi ne sambe-warafoa*, enumiruainso Mano minohi na Waidani foi ne bengfoa, tuti esobu Nuaninu Mirarebana foi mantaunia fosa,

⁵ tuti enumiruainso Allai ne Kaiwo Mahikai fo ne bengfo, tuti ewati Allai ne mambiriuo dohonai na rahida da aha ma fo,

⁶ wape mayeai etawai, ehu-rumitare Allai aha, inontarai nanisa todoni kontaio wiro rangfeai kahai arorawa we etaraberasa weru sasarifo tuti esobu ne bengfo ahang kaha. Weo inontarai nanisa na enari tonanafo epahu riwang Allai ne Kaisungfoi wesa na aitabafoi nariai aha tuti etohong mamaya Yesusi wonongfo paria na kaiwasa bitoya foi euremireafo.

⁷ Weo kahofa sinsung mereka metangno ming pampang aweu foi tuti wedaya fitantanangfo tifu beng we mano etanangfi fosa, nana mani kahofa nanai sobu Allai ne moanafo.

⁸ Wape kahofao tifu wona amafui tuti ninoio weababo fo, nana mani kahofa nanai wifieai ahang kahai tuti ke-fang paria we Allai deikang-ganai tuti ambori niunumi na adiafoia wioru ki.

⁹ Wape doroio enehuwawu mea wa meaine, amemadu we mea tonanai ki, wape ameroaso mea, we ambori mesodai fi beng sewa fi anta nani kiai, amani fio obuai ria faririfo.

¹⁰ Weo Allai mani medu tarai, wiro sofa kaha. I wiro aroporo fianai aino raminde menari wei fo, tuti menemiwawuo meteinawiai wei na mefata ne inontarai emararebana fosara fo, kariri fianai aino menari pampang paria sobu ninai.

¹¹ Tuti ametohong weai paria, we mansiari-mansiari wau, boinawiaifa we ru-rai tarai tonanai na fianai aino enemutawana fo paria werea naya fo we ambori wobu fi enemutawanai nai.

¹² Wiro amemaya we meuremi marira na fi tonana fo kaha, mae todoni kontaio metohong kariri mano esobu fianai aino Allai dereraia nana fosa, na eroasofo tuti enemitawanai etamang weai na etawansa fo.

Allai ne Kaiwo Arera fo wiro yiwang na ea kaha

¹³ Weo rahida bo Allai dererai we Abrahami fo, fefora na mantauni wonongfo, weo wiro manei dedai sewari we fefora nai kaha fefe.

¹⁴ Fefora deyo,

“Tarai antu,
we Yau ambori imoang
wau fuba paria
tuti inari wau bawing
separai bitoya aha
ki.”*

¹⁵ Abrahami sawani demang saerawai we kaiwo nanai tuti na tonanane sobu fianai aino Allai dererai wei tonana fo.

¹⁶ Weo inontaraine efafora mani, efafora na mano dedai sewari foi wonongfo, tuti ne fefora tonana fo ne tarai we fio wemambiriuk paria we

* **6:14** Kejadian 22:17

yoa tuba ne kaiwofo wetarai,
tuti kife kaiwo dapa wai
tonanafo.

¹⁷ Nanai wedaya, Allai
deyo medurai na kasau we
mano ambori eweriria na
Abrahamio esobu ne kaiwo
derera fosa, we ambori
eroasoai, we ne kaiwo derera
fo wiro yiwang funoma kaha.
Nanai wedaya dohong kaiwo
derera fo tonanai, mae gefora
tutirai.

¹⁸ Na dohong ne kaiwo
derera fo tuti na gefora tutirai
fo,* Allai wiro sofa kaha.
Na fi beru tonana fo Allai
wiro wemambiri we sofa
kutea konta kaha. Ambori
na tonanane, Allai dohong
taenemirorongnei mirising
tuti wemambiri fuba aha,
amani mano tawawu weru
nu kerira nini tono Allai
ambori tarutawanaia mutu
na fi meinena mai we tata na
rahida da aha ma fo ki.

¹⁹ Taenemitawanai nanai
ne tarai toyari kamutuo
oari sea aweu pepayai tuti
tarutawanaia mutu nai tuti
wedaya tanumianinunei
niyai na mai. Taenemita-
wanai nanai kontai sea
tono Rorongno Mirarebana
Pari foi na Sempaisi ne
Munufoi na Waidani ambori
ireu aburung foi wiro wedua
tata aha kaha.

²⁰ Yesusi dera rang da foni
tata to katai nani ampa, tuti
suai to wanai we yiwang tata
ampa. I weImami Fuba we
fitawafa, mai kariri wang
imami Melkisedeki fo.

7

Melkisedeki, Imami Fuba

dine

¹ Weo Melkisedeki nini
mani Mananu Salemi dine,
tuti Allai, mano Dedai
Mantaung foi, ne imami
dine. Na rahida Abrahami
daraberahi na mamuna ro-
rongno memunara kiraikobu
mananufosa fo, Melkisedeki
da wa sobui tuti mioani,

² tuti Abrahami dohongno
perpuluhangno kiari foi wei.
Wangno Melkisedeki ninai,
reantenang mani, neta we
Mananu Enerorong Mesi,
tuti Mananu Salemi kontai,
amani *Mananu Kia Mai* dine.

³ I mani, ne pari inana tuti
ne pari tamana kontai, wiro
bia na riria bei kahai kontai,
wiro saubaunung kaha tuti
wiro mireha na wea kaha. Ne
tarai kariri Allai ne Kaisung-
foi, weimami pampang we
fitawafa.

⁴ Mewati! Inontarai nini
fiabai paria, doni Abrahami
tane wawafoi, dohongno per-
puluhang na fi beng pari de-
warai weru mananufosa fo
wei nina.

⁵ Kariri Hukumi Musai soi
foi mani, Lewi ne ririao es-
obu wang imami fo, ansaino
ene mambiri tonanai we
efanduhi perpuluhangfo ria
inontarai Israeli mano wei
fosa ne, amani ene dorofosa,
masino ene doroi nanisa kon-
tai Abrahami ne riria disa ki.

⁶ Melkisedeki inontaraio
wiro weriria na Lewi dine
kaha, tonanai ki mae kia
perpuluhangfo ria Abrahami
tuti mioani, amani mioang
mano sobu Allai ne kaiwo
derera fo.

⁷ Tarai we wiro faforawa
kaha, weo mano dedai

sewa mioangno mano tewawa, ampare tawatioai we Melkisedeki dedai sewa Abrahami.

⁸ Kontai kasau we Melkisedeki dedai sewa imamio eweriria na Lewi fosa. Weo na ninai inontarai batangno ambori emarareha fosa ansaino esobu perpuluhangfo, mae na wanai Melkisedeki, mano sobu perpuluhangfo ria Abrahami foi, kariri Kaiwofo deyoa fo, inontaraio darang pampang dine.

⁹ Ampafe madurai kontai toninai, Lewi imamio ne mambiriu we sobu perpuluhangfo, wape dohong perpuluhangfo kontai we Melkisedeki ampa, amani ria ne werengno Abrahami, amani na rahida Abrahami dohongno perpuluhangfo we Melkisedeki fo.

¹⁰ Weo rabuang bonani, Lewi wiro saubaunung kaharai, wape ne tarai toyari niayai na Abrahami ampa, na rahida Melkisedeki sobu Abrahami fo nanai.

Kristusi mani Imami Dedai dine toyari Melkisedeki, tuti dedai sewa imami Haruni

¹¹ Na rahida Allai dohong ne Hukumifo we inontarai Yahudi fosa, yuai Lewi ne ririafosa we eru wang imami fo, ambori ewiwiwaing inontarai Israeli fosa ambori etohong kariri ne Hukumifo na mai. Wape fio imami nanisa eru fo mani, wiro demoyarai we wedaya inontarainesa emasi kaha, weo ea kontai inontarai batang disa

fefe. Tonana mani todoni kontaio imami siai manei kiawariai aha ma, amani mano weimami fo kariri wang imami Melkisedeki fo, wiro manei na Lewi ne ririafoi, toyari Haruni, kaha.

¹² I mani wiro na Lewifosa kaha, ampare Lewi ene wang imami fo riwang to inontarai siai aha tonana mani, Hukumifo kontai riwani nariai aha.

¹³ Weo imami mano madu kariri nini mani wiro na riria Lewi kaha, mae na riria siai, tuti na riria siai nini wiro manei fiata na mesbaohong korbani nai we Allai foi ka-harai.

¹⁴ Weo tawaitawanai ampa, we tane Sengnei weriria na riria Yehudai ma tuti kariri riria nani mani, Musai wiro medu sobu kaiwo kuteai kariri manei we weimami kaha.

¹⁵ Tuti kasau paria aha kariri todoni Hukumi Musai foi riwanai siai ampa, weo imami siai manei kiawariai aha, amani imami kariri Melkisedekifo.

¹⁶ Wenani weimamifo wiro kariri fianai aino hukumi bei dererai kariri ne ririafoi kaha, mae kariri mambiriu darangno wiro woru na ea kaha fo.

¹⁷ Weo na Kaiwofo dotu kariri I deyo,

“Wau mani imami di Wau we fitawafa,
kariri wang imami
Melkisedeki fo.”*

¹⁸ Ampafe, nina mani Hukumiofafong foi oiayari ampa, weo wemambiriu

* 7:17 Masmuri 110:7

kaha tuti wefieai ahang kaha fefe.

¹⁹ Weo Hukumio Allai dohoni ria Musai nani, wiro kia masifeai we manei konta kahaia, nanai wedaya ni-naifa mani Sempaisi deinawi rang waworufo beng sewa we taenemitaawanai nai feai, rang nani fiata tata ambori tahefang we Allai.

²⁰ Tuti Yesusi weimamifo wiro funomai tonana kaha, mae Allai gefora tutirai. Imamio wei fossa raminde ruaisa fo, wiro ruaisa na kaiwo fafora feai tonana kaha,

²¹ wape Mano nini, Allai yuaisi na gefora tutirai, na rabuang bo medu wei deyo, "Sempaisi gefora kawuru ampa,

tuti wiro yiwang kaiwo medurai nanai ahang kaha,

'Wau mani imami di wau we fitawafa.' ^{*}"

²² Allai gefora tonanai wedaya Yesusi wefiainaawiaio wemambiriu paria we tata kariri todoni kaiwo areraio beng sewa fo wetarai.

²³ Tuti fi siai konta mani, imami mano wei fossa mani efau, weo ea kiai mansiari-mansiari mireha ampare wiro manei yu wang nanai pampang kaha.

²⁴ Wape Yesusi mani darang we fitawafa, ampare wiro fieai weduari na yu wang imami fo we fitawafa fo kaha.

²⁵ Nanai wedaya Yesusi nini wemambiriu we feriri inontaraine tata na mai paria, amani mano na I

tara tahefang we Allai, weo darang pampang we ambori doa rahana i na tata tuti Allai.

²⁶ Weo Imami Fuba tonana nei dino mesi we fiata tata ne, amani imamio mirarebanai, dohong sarawa kaha, wesasari kaha, siai paria weru inontarai ewesasari fossa, tuti dedai sewa rora bodoni kontai.

²⁷ I mani wiro ne tarai kariri imami fuba wei fossa kaha, weo ea mani rahida neungne enari korbanifo we mantaunsa ene sasarifoi, akawuru wori we kaiwasa bitoya foi ene sasarifoi ki. Weo I mani niari korbanii beyari kawuru we fitawafa, na rabuang bo wekorbanii mantauni ne taraifoi fo.

²⁸ Weo kariri Hukumi Musai soi foi mani, kiutuai we yuai inontarai batangno efanahang fossa weimami fuba, wape na fui faforao Allai meduri foi mani, kiutuai we yuaio Kaisungfoi weImami Fuba, niariria mirarebanai ao mesi we fitawafa.

8

Yesusi weImami Fuba we Kaiwo Arerai Waworufo

¹ Kaiwo tamadurai kai ninai, weneung tonina: tane Imami Fuba dedai tonana dine, andino minohi na warang domoya fo ria Mananuo minohi na kadera mananu foi na Waidani,

² tuti yu wang Imami Fuba fo na Rorong Mirarebanai sewa foi, amani na Sempaisi ne Munu wiatai wenumainu foi. Munu nani Sempaisi

* 7:21 Masmuri 110:7

mantauni andino niariri ne,
wiro inontaraine manei dino
niariri ne kaha.

³ Weo imami fuba nei kiai mani, ruaisi we kia inontaraine ene fi etohonai we Allai fo, tuti we dohong korbanii we kaiwasa ene sasarifoi nani we Allai. Tonanai kontai we tane Imami Fuba Dedai foi; todoni kontaio ne fieai we dohonai we korbanii.

⁴ Masino niayai na nunei mani, todoni kontaio wiro weimami kaha, weo imami manea kawuru ampa we etohongno korbanifo kariri fianai dotu na Kaiwo Musai soi fo.

⁵ Fianai enari we eweimami fo, finanai enariri na munuo wefiaiawiai tuti wenuaninu kariri fio na Waidani fo. Finanai Allai deikaririai kawuru we Musai ampa, na rahida Musai niari Sempaisi ne Warumai Tendao Omi Nai fi fo. Allai medu toninai we Musai deyo,

“Aromuoifa, we finanai kai nari kariri fiaiawiaio yeisa-harai we wau na uaifoi nanai.”*

⁶ Wape ninaifa mani Yesusi ne fi yu weimami fo dedai sewao fi imami batang fosa eru fo, tuti I mani Mano Doa Rahanaina Kaiwo Arerai Waworuo Allai dohoni we yuti foi dine, tuti Kaiwo Arerai Waworuo nani mani dedai sewao bo raminde dohoni we Musai foi, weo weneung na Allai ne dereraio mai sewa fo fefe.

⁷ Weo Kaiwo Arerai reantenang fo masi fea reti, wiro obu kataifeai nariai aha

we Kaiwo Arerai weberu fo ahang kaha.

⁸ Wape bo reantenang foi wiro masi kaha, weo Allai sobu fisarawafeai na ne inontarainesa, tuti medu deyo, “Sengne Yau yeyoai, Tarai we rahidafo ambori da ma ki, Yau ambori inari Kaiwo Arerai Waworu fo ria riria Israeli fosa, tuti ria riria Yehudai.

⁹ Kaiwo Arerai nanai wiro kariri kaiwo areraio yohonai ria ene werengfosa, na rahida iru na ewaramifo iwiwiainsa era to boriei weru nu Mesiri foi fo kaha. Weo wiro etohong kariri nehu kaiwo arerai nanai pampang kaha, ampare wiro enehutituai wesa ahang kaha.

¹⁰ Wape ninaifa mani, nehu Kaiwo Arerai yohonai aha ria inontarai Israeli fosa*, na rahida da aha ma fo ainina; Seng Allaine Yau imadu yeyo,

Yau ambori yohongno nehu hukumine na enumikamieifoi, tuti isoi na enimiro-rongfo.

Yau mani, ambori ene Seng di Yau, tuti ea kontai isahusa we nehu inontarai.

¹¹ Tuti wiro etaunau ene warareng ruhi fosa, ete ene terafosa ahang kaha, na eteyo, ‘Todoni kontaio metaroanso Sempaisifo,’

* 8:5 Keluaran 25:40 * 8:10 Roma 11:11-22

Weo ea kiai, katui fuba
ambori etaroano Yau
ampa.

12 Weo Yau ambori yeinawi
nehu enehuwawufo
we ene sarawafo,
tuti ene sasarifo, wiro
arohuoai ahang
kaha.”*

13 Na medu kariri Kaiwo
Arera fo sahui we Kaiwo
Arera Waworu dine nana
mani, niari Kaiwo Arera
reantenang foi memo ampa,
amani da ahang kaha. Tuti
fianai aino memoa tuti da
ahang kahai nanai, finanai
kefang we wioru fo ampa.

9

*Kaiwo kariri omi we Al-
laifo na ne Munufoi na nunei*

1 Kaiwo Arerai reantenang
fo, amani bo Musai dohoni
we Yahudifosa fo mani, ne
kaiwo we etohong kaririai na
mai feai, kariri todoni esomi
we Allai fo, tuti neo munu
mirarebanai we omi wei nai
fo kontai, amani munu inon-
tarai nunei sa enariri foi.

2 Eruai ene munu esomi we
Allai nai nani, munuo ahui
we Allai ne Warumai Tendao
Omi Nai fi dine, tuti ne rorong
boru. Rorong bo fong
pari foi mani wonong fino
Rorong Mirarebanai. Pelita
aweng foi tuti meja bei tuti
rotio ohonai we Sempaisi fo
watai na nanai.

3 Na taba bo boru foi ku-
rufuifo, obu rorong bei aha,
amani rorong nani wonong
fino Rorong Mirarebanai
Pari.

4 Na rorong nani, fi watai
nai foi mani, mesbao nariri
na emasi we nunung finunsai
mampori nai foi bei, tuti Bu-
ruao Kaiwo Arera foi, burua
nani fati na emasi sentenang.
Na burua nani, botoli ema-
sio oni fiang manna nai foi,
Haruni ne aitatohi wereroria
foi*, tuti kamiei aburungno
oi kaiwo arerai rabuang sura
fo naya fo, watai nai.

5 Na buruafoi ayai mani,
aririwangno esahui we
Kerupi mano urainawi Allai
ne sambewaraio dadai fo
uroa nai. Uwaramipemafo
forerawai na burua nu-
wowong fo ayai, amani
kataio ahui we Katai Fariri
Sasari foi. Wape fininai kai,
wiro maduria wearirawang
we bong na nina kaha.

6 Fi kiai nanai etanai
na Allai ne Warumaifoi
tonanaia mani, imamifosa
rahida neungne esuai to
rorong bo fong foi we enari
ene fi eweimami wea fo nai.

7 Mae mano suai to rorong
bo boru foi mani imami fuba
foi mesiri andino defuina bei
mani suai webeyari tonanai
afui ne. Tuti suai afui nanai,
kiao andowa ne rikafo we do-
honai we korbani we Allai,
we mantauni tuti we kaiwasa
ene sasario enariri na ewait-
awana kaha fo.

8 Na tonanafo, Nuaninu
Mirarebana foi deinawiaia
kasau, we Warumai Tendao
Omi Nai foi, amani Warumai
fafong na nunei nani fo
wiata nendai mani, rang
we tasuai tono Sengnei ne
Warumai tarai foi wiro tifai

we inontaraine tata kaha.

⁹ Fininai fiywansoai ete wefiainawiai we deunau mano taminohi na rabuang bonini ne tata. Amani deinawiai weo mano tasomi we Allai ne tata, wiro tasobu taenemirorong katui nei mirarebanai tuti mai na Allai arongreafo na tatohong fieai we Allai na ne Munufoi kaha, ete wiro tasobu taenemirorong katui nei mirarebanai na tamung andowa wekorbani wei fo kaha. Finanai wiro wemambiriu we wedaya taenemirorong katui nei mirarebana kaha.

¹⁰ Weo fi nari tonana fo, manta we fiangfo, fiunungfo, tuti fio nari we ruai rurang inontarai fo. Finanai kai mani, fio ohong kaririai na boriei arora fine tuti ohong kaririai paria rahida Allai niari fi waworu aha fo terai.

Na Kaiwo Arera Waworu ne mani Kristusi weImami Fubao doa rahana dine

¹¹ Ninaia mani Kristusi da kawuru weImami Fuba ma ne, amani da kariri fi bengno wataia fo. Da weImami Fuba nano Allai ne Warumai dedai mirarebanai sewa tuti mesi sewa foi. Warumai nani wiro inontarai batang ne saino enariri fo kaha, nana mani warumai nani wiro na nuo Allai samui nini kaha.

¹² Tuti wiro suai to Warumai rorong foi na kia kambing ne rikafoi tuti sapi ne rikafoi kaha. Mae suai tono Rorong Mirarebanai Sewa nani webeyari kawuru we fitawafa, suai afui na dohong mantauni ne rikafoi, ne rikao tiwowu we feriri inontarainesa we fitawafa.

¹³ Weo rika na sapi mang foi tuti kambingfoi kontai kangganang na sapi antung nunumi we korbani foi, imamifosa ehafarai we inontarai ewerarika kariri hukumi agama foi sa we ambori emararebanai, amani emararebanai na ene tarai boriei fo.

¹⁴ Na andowa ne rikafoi ohoni we ruai rurang inontarai ewerarika tonana fosara mani, tonana mani Kristusi ne rikafoi sewa aha. Weo na Nuaninuo wioru na ea kaha foi, Kristusi dohong ne taraifoi wekorbani we Allai, wekorbanio mirarebanai paria dine. Ne rika nani yuairurang taenemirorong katui ne weru fi tanario wedaya marareha fo, ambori tatohong kariri Allai, mano darang foi, ne dawiafo.

¹⁵ Ai wedaya mani, Kristusi na Kaiwo Arera Waworu Allai dohoni we yuti foi mani andino we Mano Doa Rahanai dine, ambori na tonana fo mano Allai sahusara fosa esobu fi dererai wesa nanai, amani fio watai we numainufo. Weo Kristusi mireha kawuru we feriri inontaraine tata weru sasario tanariri na rabuang bo tarurai we tatohong kariri Kaiwo Arera reantenang foi ampa.

¹⁶ Tuti kaiwo arera feai ne tarai kariri surat warisang. Weo masino obu manei niari surat warisang bei akawuru wori mireha, todoni kontaio mano sobu ne rafo kariri surat warisang nani dohong fiainawiai kariri weniaru surat warisang nani we mirehara fo.

¹⁷ Weo masino weniari surat warisang nani minohi darang mani, surati warisangno niariri nani wemambiriu kaharai. Surati nani mano sobui foi ne mambiriu we dohong kariri na rabuang bo weniari warisangfoi mirehara fo terai.

¹⁸ Nanai doni Kaiwo Arerai reantenang fo, todoni kontaio wemambiriu na rikafo, amani Musai miung andowa manei mirehara ambori Kaiwo Arera fo da.*

¹⁹ Weo Musai deiriri Hukumifoi ne kaiwo kiai we inontaraifosa kiai we etohong kaririaia mani, kia rikafeai na sapifoai tuti na kambingfoi, fia tamuai na merehafeai. Mayeai kia nuawuru berika feai kontai ninoi hisopi feai, yorang na rika nani tuti kifatitaiyai to bukuo Hukumi foi nanai tuti to inontaraifosa ehai.

²⁰ Mae medu wesa deyo, "Rika nini mani, rikao dohong Allai ne Kaiwo Areraio demi mea metohong kariria nei wemambiriu tuti da fine."

²¹ Tuti niari tonanai kontai aha we Sempaisi ne Warumaifoi tuti we fianggengno wepahewai na nadifo kiai.

²² Tuti tarai to, kariri Hukumi Musai foi, adareti fi kiai ne, todoni kontai mirarebanai na ruai ruramai na rikafeai terai, tuti rika tiwowu kaha mani, wiro sasarinei kontai Sempaisi deiayari kaha.

²³ Ampafe, Sempaisi ne Warumai tuti fianggeng kiai

na rorongfo mani, wefainawiai kariri Sempaisi ne Munufoi na Waidani. Ne Munu na nunei foi tuti ne fianggengfo todoni kontai ruai rurami ao mirarebanai na sapi tuti kambing ne rikafo tonanafo. Wape fi na Waidani mantauni mani, todoni kontai ruai ruramai ao mararebanai na fi tonana kaha, mae na korbanio denteng sewa foi.

²⁴ Weo Kristusi wiro suai to Rorong Mirarebanaio inontaraine enariri we fiainawiai kariri Rorong Mirarebanai tarai foi kaha, wape suai to Waidani mantauni we doari na Allai arongreafo we dutani we tane masifo.

²⁵ Imami fuba foi defuina neungne suai tono Rorong Mirarebana Pari foi na Sempaisi ne Munufoi na nunei, kia mantauni ne rikafo kaha mae kia andowa ne rikafo. Wape Kristusi wiro suai to Waidani we dohong mantauni ne taraifoi wekorbani pampang tonanai kariri Imami Fuba fo kaha.

²⁶ Weo masino tonana mani, sodai dadirafo pampang na reantenang nunei tibaura fo paria rahida bonini kontai. Wiro tonana kaha, mae webeyari kawuru deinawi ne taraifoi na nunei werea naya feninai, we dohong mantauni ne taraifoi wekorbani we dufisaya sasarinei kiai.

²⁷ Kariri fianai Allai kiutuaia fo, we inontaraine emarareha webeyari kawuru, tuti mayeai kiutu

* **9:18** Tuti Kaiwo Arerai Waworu nei mani da na rika kontai, amani Kristus ne rikafoi.

kaiwo karirisa,

²⁸ tonanai kontai we Kristusi, I webeyari kawuru wekorbani ne taraifoi we sodua kaiwasa bitoya nei ne sasarifoi. Tuti I ambori deinawi ne taraifoi na nunei Weberu fo aha, wape wiro we sodua sasarifoi ahang kaha, mae we dohongno faririfo we mano etamang wei fosa.

10

Yesus Kristusi wekorbanio mesi wefitawafa

¹ Allai ne Hukumi dohonai we Musai fo, ne tarai kariri nuaninu terai, wenuaninu deinawi kariri fibengno rabuang bonani ambori da aha ma fo, amani fibengno tasobuai na Kristusi. Na Hukumifo tawatiaoia kasau kaha mae tawati te ne nuaninufoi, wiro fibeng tarai nana kaha. Defuina neungfo inontaraio ehahefang Allai we esomi wei fosa, etohong ene korbanio mesi kariri defuinafafongna fo tutifuina yiwang fuina enari finanai pampang. Wape Hukumifo wiro wemambiriu we dohonsa enemirorong mesi na Allai arongreafo na etohong ene korbani nanai kaha.

² Weo masino inontarai esomi we Allai tonana fosa, korbani etohonai tonana fo yuai ruransa kai webeyari ao emararebanai weru ene sasarifoi mani, wiro enemittuai we ewesasari ahang kaha, tuti korbani nani demoyarai wefitawafa, ambori wiro etohong korbani tonana fo we Allai ahang kaha.

³ Wape kasau ampa, we korbani etohonai na defuina neungfo tonana fo, toyari deretawang inontarainesa pampang kariri sasarifoi.

⁴ Weo na todoni feai kontaio sapi tuti kambing ne rikafo wiro demoyarai we yuai rurang sasarinei kaha.

⁵⁻⁶ Nanai wedaya rahida Kristusi suai to nunei ma ne, medu we Allai deyo,

“Wiro bawi we andowa wekorbani tuti fio ohonai we omi we Wau naya fo kaha, korbani nunumi foi tuti korbani ohonai we yuai rurang sasarieoi enemuoa kaha.

Wape nari nehu tarainei tuti moinenami wefio ohonai we Wau ne.

⁷ Ainanaya imadu yeyo, ‘Tarai, Dai Allaie Yau nina!

Ira ma we yohong kariri nemu awiawa, Kariri fianai aino dotu kariri Yau na Buku Mirerebana foa fo.”*

⁸ Anta Kristusi medu deyo, “Andowa wekorbani tuti fio ohonai we omi we Wau naya fo, korbani nunumi foi, tuti korbani ohonai we yuai rurang sasarieoi mani, bawi we fi tonana fo kaha tuti enemuoa kaha.” Korbani tonana foi nariri kariri Kaiwo Allai dohonai we Musai fo ki, wape Kristusi medu tonanai.

⁹ Mayeai medu aha deyo, “Tarai, Yau nina, ira ma we yohong kariri nemu awiawa.” Ampafe dufisaya ne reantenangfo tuti yiwang na ne weberufo.

* **10:7** Masmuri 40:6-8

¹⁰ Tuti na Yesus Kristusi do-hong kariri Allai ne dawiafo tonanaia fo, amani dohong ne taraifoi wekorbani we tata fo, wedaya tata tamarebanai, tuti finanai niari webeyari kawuru we tata we fitawafa.

¹¹ Kontai rahida yiwang rahida, imamifosa kiai etoari eru fi eru fo pampang, rahida neungfo etohong korbanifo masi tonanai pampang, korbanio wiro wemambiriu we dufirurang sasarifo na wea kaha fo.

¹² Wape imami Kristusi nini mani, dohong korbanifo webeyari kawuru terai we tane sasarinei we fitawafa. Mayeai minohi na Allai warang domoya fo.

¹³ Tuti paria ninaifa mani, demang terai we rahida Allai niari Kristusi ne aitetafosara saha tawansa kiai na awengfo.

¹⁴ Weo na korbani beyari kawuru fo terai mae, Kristusi niari inontaraine tata tamasi we fitawafa, amani mano niari tatara tamarebania na tata.

¹⁵ Nuaninu Mirarebana foi kontai medu tuba kariri finanai we tata. Reantenangne mani medu tonina,

¹⁶ "Nehu Kaiwo Areraio yohonai riasa na rahida da aha ma fo, ainina:

Sempaisi Yau imadu yevo,
Yau ambori yohongno nehu hukumine na ene-mirorongfo
tuti isoi na enu-mikamieifo."

¹⁷ Akawuru wori medu aha deyo,

"Ene sasarifo tuti ene sarawaio enariri fo, wiro arohuoai ahang kaha."*

¹⁸ Ampafe sasarifoi tuti fisarawafo Allai deiairia kiaia mani, wiro wepararu ohong korbani we sasarifi ahang kaha.

Tasu to fui na tane taroaso Kristusi ne fanai, mae tatawang tata tuti tararia Kristusi ne rang meinena-mia nei

¹⁹ Ampafe doroi meaine, kariri Imami Fuba foi suai to Rorong Mirarebana Pari foi, kia andowa ne rikafoi, tata kontai, Yesusi ne rikafoi wedaya ambori ninaia mani rang tafai we tasuai to Rorong Mirarebana Pari foi tonanai kontai, amani tara kefang Allai na tamatai kaha.

²⁰ Weo fiai rang waworu bei we tata tuti rang nani dohong tata tatarang. Rang nani ireu aburungno wedua Rorong Mirarebana Pari foia dine, wape ninaia mani tifai we tata ampa, amani na mantauni ne taraifoi.

²¹ Tuti tane Imami Fuba dedai manei, andino wenunggamiei na Sempaisi ne Munufoi ne.

²² Ampafe tara ma tara kefang we Allaia na taen-emirorongno mesi tuti taroasoia mutu, weo Sempaisi yuairurang taenemirorongneia mirarebanai weru taenemirorong ketuio kerira

* **10:16** Yeremiai 31:33 * **10:17** Yeremiai 31:34

foi ampa tuti yuairurang tane taraineia mirarebanai na mereha mirarebana foi ampa.

²³ Tarutawanaia mutu na fio taenemitawanaio taroa weai nanai, weo Mano dererai nani mani, dohong kaririai na mai.

²⁴ Tuti todoni kontaio, tau-remifo nayai na tata ambori taboromio tata we ambori taenemiwawu tata tuti tanari fi beng fo.

²⁵ Tuti todoni kontaio tafanduhi tata pampang we tawenadifo, dohonao tahatai weru tafanduhi tata we nadifoi fe, kariri inontarai maneiru teaio enari tonana fosa fe. Wape tataunau wawera tata tatohong tata taenemirorongne wemambiru aha, tarurai paria we tanari tonanai sewa aha, weo tawatioai we Sempaisi ne Rahidafoi kikeu ampa.

²⁶ Weo masino tawaitawang kariri ne wetaraifo tuti tatohong kaririai ampa, wape taenemikahirai we tanari sasari pampang aha mani, wiro korbanifeai we yiwang tane sasari nanai ahang kaha.

²⁷ Mae ne tasobua mani, tatamang terai we Sempaisi ne kiutu kaiwo fo, amani tatamang na tamatai we tasodai Adia denggararu fo fuba paria fo, adiao kaso mano etapai tonana fosa foi.

²⁸ Masino inontarai manei na fafongfa deiaya Kaiwo Musai soi fo tuti inontarai mandu ete mantoru ewati terifosa eroa tubarai we tarai

niari sarawai tonanai, nana mani wenani wiro oiai ne sarawafo ahang kahai, mae sobu aiboi marareha fo terai.

²⁹ Tonana mani, menemitituai weai ki, kariri todoni aiboi marabao Sempaisi dohonai we mano sahatitawang Allai ne Kaisung-foi tuti deibera rikao Allai dereri foi we werarika fo, rikao na Kaiwo Arera Waworu foi we yuairurami wemirarebanaia, tuti deibera Nuaninu Mirarebanaio dohong ne bengfo we tata foi. Ee! Inontarai tonana nei todoni kontai mesi we sodai aiboi maraba pari sewa aha weru mano anta deiaya Kaiwo Musai soi foi.

³⁰ Weo tataroang Mano medu ampa deyo,

“Ohong aiboifo we mano niari sarawa foi mani, Yau nehu mambiru we inari tonana ne, Yauno ambori ibai berao mano niari sarawa foi tonana ne.”*

Kontai medu kariri mantauni deyo,

“Sempaisi ambori kiutu kaiwo kariri ne inontaraifosa ki.”*

³¹ Tarai to, matai paria we tawai to Allai Mano Darang foi warang aiboife fo.

³² Wape mearomi kariri fafong nana fo, amani na reantenangfo rahida meroaso Kristusi tuti mesobu sambewarafoa fo, merurai tuti metawang mea na dadirao maraba paria mesodaira fo.

³³ Rabuang bonani, wea mani kaiwasa eteibera mea

enari kanggani mea na kai-wasa bitoya foi euremireafo. Weai kontai aha mani, mea kontaio mehontai mesodai dadirafo ria mano enari kangganisa tonana fosa.

³⁴ Tarai we menemirorong mesi ria mano ewatai na aitamu rorong fo we eroaso Kristusi tuti mearomiosa, tuti rabuang bo mene rafo inontarai etawara fo nanai, mesodai nanai na menemirorong mirising, weo mewaitawanai we mantaung mea mesobu mene ra siaio beng sewa fea ne, amani rao watai wenumainufo.

³⁵ Na rabuang bonani mani, mene meroasoafu mutu paria. Ampafe dohonao mehabi meroasoawa fanai, weo mene fiembaitafo fuba paria demang we mea fo.

³⁶ Weo todoni kontaio metawang mea, ambori menari kariri Allai ne dawiafo kaia mani, na tonanane mesobu fianai aino dereraia fo.

³⁷ Weo katu, rahidafo waroi ahang kaha,
“Mano da ma foi,

katu mani teba tuti wiro fiouhi da ma fo ahang kaha.

³⁸ Wape nehu inontarai enerorong mesi fosa, ambori eminohi etarang na eroasoafu, wape masino na ea, manea esu to fui mani, wenanisa wiro enehuosa kaha.”*

³⁹ Wape tata mani, wiro inontaraio tasu to fui weru taroaso Kristusi tuti taworu

di tata kaha, mae inontaraio taroasoai tuti feriri tata we fitawafa di tata.

11

Roasoanei

¹ Roasoanei mani, fifiani dine? Taroasoanei mani, weneung na fio taenemitawanaifa na Allai fo, nana mani taenemiwawera we fi taenemitawana fo kaha, tuti tawaitawanaia mutu we fio tawatioai na tauremine kaharai fo.

² Weo na roasoai tonana fo Allai medurai we eneo inontarai enayai na rabuang bofafong paria fosa nani sa.

³ Na taroasoafu tawaitawanai we rorafaisi tuti nunei sentenang, Allai niariri na ne Kaiwofo, ampafe fianai aino tawatioai ninai, finanai da na fio tawatioa kaha fo.

Habeli, Henoki tuti Noaki itone itoroasoafu

⁴ Habeli tonanai kontai, na roasoafu dohong korbani denteng sewa Kaini ne korbanifoi. Na ne yoasoafu nanai, Allai sahui we inontarai enerorong mesi, tuti eneo ne korbanifoi. Tutu Habeli mireha ampa, wape na yoasoai nanai, ne tarai toyari medu paria sobu rahida bonini we tata.

⁵ Na roasoafu kontai, Henoki minohi darang mae Allai yuaisi to rorafaisi wiro sodai mararehafo kaha.* Wiro esobui kaha, weo Allai yuasia fefe. Weo wiro sodai finana kaharai mae, Allai medu kariri kawuru

* 10:38 Habakuki 2:3-4 * 11:5 Kejadian 5:24

ampa, deyo, "Henoki kia enehurorongnei."

⁶ Tuti roaso Allai kaha mani, todoni kontaio Allai enoa kaha. Weo mandoni dino de da we Allai mani, todoni kontaio yoasoai we Allai mani niaya ne, tuti dohong fiembaitafo we mano sera wei na taraifo.

⁷ Na roasoaf kontai, Noaki dohong kariri kaiwo Allai deretawanai wei fo, amani samu wa fiabai paria rowei we fiata ne munu rorong fosa we ekaharai weru aibooi Allai ambori bioi nunei nai foi. Finanai wiro kawariaia Noaki detioa kaharai, wape yoasoai, ampare na somi wei fo dohong kaririai. Na tonanafo Noaki tuti ne munu rorong fosa ekaharai weru aibooifo, tuti nunei sodai aiboi nani weo ea eroasoai kariri i kaha fefe. Tuti Noaki, na ne roasoaf nanai, Allai sahui we inontarai enerorong mesidine.

Abrahami ne yoasoaf

⁸ Na roasoaf kontai, Abrahami dohong kariri Allai ne kaiwofo, na rabuang bo Allai sahui tuti demi we da to Kanaani, kataio dererai we dohoni wei foi. Abrahami serawawera katai da wei foi, wape dohong kariri fianai Allai deyoai nanai.

⁹ Na roasoaf kontai niayai Weinontarai aisei na kataio Allai dererai weia foi. Tuti minohi na munu tenda foi, tonanai kontai we Isaki tuti Yakupi suru, weo uru kontai usobu kaiwo dererai nanai na Allai kontai ria Abrahami.

¹⁰ Abrahami dohong kariri fi Allai deyoa fo tonanai, weo

deti to fong demang we bendario biauni sau amangno mitubaru foi, amani bo Allai andi enetituaiti tuti niariri foi.

¹¹ Na roasoaf kontai, Abrahami mani, weinonggutung ampa tuti Sarai kontai kirawahi tonanai ki, wape sobu mambiriu ria Allai we sobu riria na Sarai. Weo Abrahami yoasoai we Allai dohong kariri ne kaiwo derera fo rai.

¹² Ampafe na inontaraio weinonggutungna adareti kahofa diri tawania foi, riria bitoya paria etaubau enumifo. Weo na Abrahami mani, ne ririafoi wiro ato afonsoi kaha, bitoyafo toyari awaha rora faisi tuti ninuaing nafareng rausi.

¹³ Inontarai nanisa kiai na ene rahida etarang eminohi na nunei fo, eroasoai pariao emarareha. Eroaso Allai ne derera fo tonanai wape mantaunsa esobu fio Allai derera wesa tonana fo kaha. Fi na kaiwo derera fo esayorai na waroi terai tuti etamang weai paria. Tuti eteisaha kontai kariri mantaunsa we ea mani eweinontarai aisei tuti inontarai eminohi sawai arora na nunei disa.

¹⁴ Weo mano emadu tonana fosa, eteinawiai we enemirorongfoi dohong weai paria we esera we nu weworuuo esahui we ene katai dine.

¹⁵ Enemituai tonanafo wiro earomio ene nuo raminde era weruri ma foi kaha, weo masino enemirorong tonana mani, ene rang bitoya we etaraberasa to katai nani aha.

¹⁶ Wape wiro nana kaha. Mae fio enemirorong dohong weaifa mani, we esobu nuo denteng sewa aha foi, amani Waidani. Aiwedaya mani, Allai wiro mimaya we esahui we ene Allai tuti ene Seng dine fo kaha, weo meinenanang bendari bei kawuru we ea ampa.

¹⁷⁻¹⁸ Na roasoaf, Abrahami kiutuai we miungno ne kaisung mansiari foi we dohoni wekorbani we Allai, na rabuang bo Allai medu wei we titua kariri ne yoasoafe fo. Abrahami nini dino sobu kaiwo Allai dererai kawuru ampa we deyo,

“Na nemu kaisungno Isaki dino ato nemu riria bitoya foi nai ki.”*

Tonanai ki wape dohong kariri kaiwofo, ampare deyo miung Isaki we dohoni wekorbani we Allai.

¹⁹ Weo Abrahami enetituai deyo, Allai ne mambiriw we duwi inontarai emarareha fosa weru marareha rorong foi aha rai. Ampafe na tonanafo ne tarai toyari sobu ne arikangno Isaki nano marareha rorong fo aha.

Isaki, Yakupi tuti Yusupi itone itoroasoaf

²⁰ Na roasoaf Isaki deti to fong, ampare mioang antungno Yakupi tuti Esauwi uru kaririai.

²¹ Na roasoaf, rahida Yakupi de mireha nai foi, mioang Yusupi ne arikangfo suru mansiari-mansiari, tuti somi we Allai na sauo ne aitatohi nunggamieci foi.

²² Na roasoaf, rerai we rahida Yusupi mireha nai foi, medu kariri rahida inontarai Israeli fosa era to borai weru nu Mesiri foi fo tuti deretawansa we ambori eha neinafo kontai weru kataifoi.

Musai ne yoasoaf

²³ Na roasoaf, Musai ne wawafo suru umatai we urapa mananu Firauni ne kaiwofo kaha, mae uradiwa Musai na rahida saubaunung fo paria sobu ne embai botoru fo, weo uwatio Musai denteng fefe.

²⁴ Na roasoaf, Musai awa fiabaifo mani, deiayarai we esahui we Firauni antuwings-foi ne kaisung dine fo.

²⁵ Mae kiutuai we sodai dadirafo ria Allai ne inontarai Israeli fosa, weru minohi piraise tourai na sasari rorong foi ria inontarai sasari fosa fo.

²⁶ Enetituaitaifa we sobu dadirafo ria mananu Firauni we dohong kariri Kristusi, Mananu Mamparirio ambori kiawariai foi, mani, nanai beng sewa weru ra fubao na nu Mesiri foi fo. Weo Musai wiro enetituai we ra nunei kaha, mae we fiembaitai ambori sobuai na Waidani fo.

²⁷ Na roasoaf, da weru nu Mesiri foi fo, tuti mananu Firauni kesoua tonanai, wape mitai kutea kaha. Mae sawania mutu na fi niari fo, weo toyari deti Allai, Mano atioi na wea kaha foi fefe.

²⁸ Na roasoaf dohonsuao Paskafoi tuti domba ne rikafoi kiaria dufui na inontarai Israeli fosa ene rahutu borong fo, ambori wewaio

miung arikang reantenang
fosa foi, wiro miung arikang
Israeli fosa konta fanai.

Inontarai siai fosa ene eroasoafō

²⁹ Na roasoafō, inontarai Israeli fosa era kutu Rawanang Berika foi toyari era na katai sirahiai. Wape inontarai Mesirio eteyo emito riasa awaru fosa, etaisuia.

³⁰ Na roasoafō, inontarai Israeli fosa era wari bendari Yeriho foi werahida itu fo, wore kamiei na bendari foi misuhi aweu wiatai na kahofa nuwowong fo.

³¹ Na roasoafō kontai, Rahapi wiwing diru foi, fiata inontarai Israeli manduo uradiwara uwati kariri bendari Yeriho foi suru na mai fo, wedaya inontarai Israeli fosa emuni ria inontarai eroasoa kaha fosa na bendarifo kaha.

³² Tuti imadu fiani aha, weo yevo imadu kariri inontarai siaio eroasoai tonanai konta fosa, manamo nehu rahidafea demoyara kaha. Weo wiro imadu kariri Gidioni kaharai, Baraki kaharai, Simsoni kaharai, Yeftai kaharai, Dauti kaharai, Samueli kaharai, tuti nabifosa kaharai.

³³ Weo na eroasoafō kontai, eharaikobu mananufosa, eru kaiwasa na wetaraifo, esobu fianai aino Allai dereraia fo,

tuti ehobu singa eboromifo.

³⁴ Tuti manea ehabisa tono adia rorong fo

wape wiro adiafoi kasaosa kaha, ekaharai weru sondu rengfo.

Efanahang wape Allai niarisa ewemambiriu, tuti ewemambiriu na mamuna rorong fo doni eharaikobu rai mamuna na mananu siai fo.

³⁵ Na roasoafō kontai, wiwingfosa esobu ene inontarai emararehara fosa aha, weo Allai duwisa nariai aha fefe. Wape manea siai kontai inontarai enari kangganisara emarareha weo ene eroasoafō, tuti emaya we ekaharai weru ne karira nanai kaha, weo enemitawanai we ambori Allai duwisa aha we esobu ne beng sewa fo fefe.

³⁶ Manea kontai inontarai eteiberasa, erarubasa na wai weababo, mae manea siai eworasa na wai besi tuti esoasa to aitamu rorong fo.

³⁷ Inontarai eru kamieio sara emarareha, manea kontai ehikasara efutuayai na gergaji, tuti manea emunsa na sondu. Eminohifo na mai kaha, enari domba tuti kambing rerawa karira fo we esansunsa nayai, ene pari fi arorawa, inontaraifosa eta-hatawansa tuti enari kangganisa.

³⁸ Era saiworuai na katai mananai sarahiai fo tuti na uai rabuang, na kamiei kamirei fo tuti na winsaburung. Wape, tarai to, nunei wiro mesi wesa kaha.

³⁹ Inontarai nanisa kiai, na Kaiwo mararebana fo fiaisa we ene eroasoafō tonanai, wape ea kiai wiro esobu fio Allai dereraia fo kaha weo finanai kawariai na Kristusi fefe.

⁴⁰ Weo Allai meineng fio beng sewa feai we tata kawuru ampa, ambori ewe-boyari ria tata mani tata ruhiaio tasobu ne maifo.

12

Metawang mea na meroaso Kristusi fo na dadira rorong fo, weo na tonanane Dai Allai niari sua ne arikangne tatane

¹ Nina mani mano fafongfa eroasoai nani sa bitoya paria etoa wari tata eteinawi kariri roasoai na mai ne. Tonana mani tatawing fi marabao tasoduata ne tuti sasario miawa arora we wewora tata nei, tuti tatawang tata we tamito na wawoaoi Sempaisi demi tata we tawawoai nai foi.

² Na tanari finana fo, tauremifo nayai terai na Yesusi, andino tane taroasoane weneung nai tuti mano dewawu tane taroasoai nanai pariao tasobu ne mai fo. Yesusi sawania mutu na dadira rorong fo na sodua aitabafoi fo, deitawanai we mireha na aitabafoi mani, fio kia mamaya paria fine. Tonanai ki wape eneaya ne nanai, weo enetituai terai we mirising ambori sobuai na rei dowana fo. Tuti ninaia mani minohi na Allai, Mano minohi na ne kadera mananu foi, warang domoya foi ampa.

³⁻⁴ Mearomio Yesusi nini pampang, weo sawania mutu sodai inontarai sasari ne ene etapaifo pariao mireha. Na mene merurai

we metapa sasarifoi nanai, wiro merurai ao emung mea memarareha konta kaharai. Ampafe mearomioi pampang ambori wiro mefahanhang tuti menemirorongfoi fituaya fanai.

⁵ Tuti dohonao mearomiporo Allai ne kaiwo dohonai we ne arikangne mea fo, amani kaiwo ambori dohong menemirorong mitubaru aha fo, na medu deyo,

*“Nehu kaisungne waune,
dohonao wahufora Sem-
paisi ne aunau maraba
fo fe,
tuti dohonao enemuro-
rongwai fituaya fe,
na rabuang bo Sem-
paisi sua wau fo fe,*

⁶ weo Sempaisi dohong aunau maraba feai we mano enewawuti foi, tuti dohong aiboi we mandoni dino yoa wei we ne arikangfo, we ambori deunauwi nai.”*

⁷ Mesodai dadirafea mani, metawang mea weai. Todoni kontai menemitituai we Allai yuba mea tonana fo mani we deunau mea finana, tuti nana mani deinawiai we niari mea toyari ne arikang finanai. Weo arikang mandoni dino wiro ne wawafoi yubati kaha ne?

⁸ Allai yuba ne arikangfosa kiai we deunausa, mandoni kontai. Wape masino wiro yuba mea ete dohong aiboi we mea kaha mani, nana mani deinawiai we mea mani arikang ninoi di mea,

* 12:6 Amsali 3:11-12

amani wiro ne kaisung tera di mea kaha.

⁹ Kontai, tane wawa na nuneisa, etaunau tata na aiboi tonana fo mani tasomi wesa. Tonana mani, fi fuba sewa aha mani, todoni kontaio tatohong kariri tane Dai, Mano niari tanumianinune kiai foi, ambori tatarang tuti taminohi na mai.

¹⁰ Weo tane dai na nuneisa, eruba tata we etaunau tata na rahidafo wiro waroi kaha, kariri fianai aino enumiruainso bengfo. Wape Dai na rorafaisi, deunau tata we tane bengfo, ambori tamararebanai toyari I mirearabanafo.

¹¹ Tarai we rabuang bo tasobu aunau na aiboi tonana fo, wiro dohong tata tafaraise kaha, mae dohong tata tapapirahai. Wape mayea mani, aiboi tonana fo wedaya ne wetaraifo we mano Sempaisi deunauwi tonana foi ki, nanai wetarai na enerorong mesi fo tuti na minohi na mai fo.

¹² Ampafe mewarami marira fanai, tuti menari meawemibuka rirora wara mutu, ambori meroasoawa mutu.

¹³ Tuti na meraria Sempaisi fo menari rangno masikaburuwa we meawemiwa we mera nai, ambori mano enewawerahai toyari aweng soberaha foi wiro tindohia fanai, mae denteng aha.

Tarurai we taminohi tamararebanai, tuti wiro tateiaya Allai fanai

¹⁴ Merurai we na meminohi toa wa, meminohi

na mai ria inontaraifosa kiai, tuti merurai we ne mararebanafo terai, weo mandoni kontai mirarebana kaha mani, wiro deti Sempaisi kahai ki.

¹⁵ Mewaitawang weduarai we dohonao manei na mea ketai weru Allai ne bengno dohonai arora we tata fo fanai, ambori wiro manei ne tarai toyari aio memu sifu rahang mea, da mau kia dadirafo tuti wedaya mano bitoya wei fosa esobu ne karirafo fanai.

¹⁶ Mewaitawang weduarai we dohonao manei na mea meninawa fe, ete ne tarai kariri Esawi we deto fi masih kaha fo fe, amani dewayangno ne hak wearikang fuba fo we fiang rewanguai bei fo, fanai.*

¹⁷ Weo mewaitawanai we na fui, na rahida bo deyo sobu moanafo ria tamangno Isakifo, tamang deiayari. Weo masino yuraia sai kontai we sobuai, manamo wiro sobu rangfeai we yiwang ne sarawai nanai ahang kaha.

¹⁸ Mea mani toyari Allai ne inontarai Israelifafong fosa kaha. Mesobu rang mamo toyari ea kaha. Weo wiro mera to fio waramia ru feai kariri inontarai Israelifafongfa sa kaha. Ea mani era we fio waramia rufo amani, uai Sinai tuti ne adiao denggararu foi, esodai mamantitifo tuti dedukafoi,

¹⁹ songgerifoi dotufo, tuti rawafuio fiabai paria foi. Rabuang bonani etaramio rawafui nani fo, dohonsa

* **12:16** Kejadian 25:29-34

ematai paria wedaya etutanai paria we rawafui nani wiro medu wesa ahang fanai.

²⁰ Weo eneinafo toyari mrosung weru sa na etaramio kaiwo rawafuifoi medurai wesa we etohong kariria fo kaha, amani rawafui medu deyo,

“Fifiani kontai,

inontarai ete andowa ete,

manei warang ete ne taraifoi disanso uai nini mani, wenani ru kamieie oia mireha.”*

²¹ Tuti fio ewatioai nanai kia matai paria, wedaya Musai medu deyo,

“Imatai paria wedaya nehu weai mutu ahang kaha.”*

²² Wape mea mani, mesobu rang waworu bei, mera kawuru to uai Sioni, to Allai Mano Darang foi ne bendarifoi, amani Yerusalemio Waidani, tuti mera kawuru to ne wewaio ato afonsoi kaha foi efaunduhisa na mararisng paria,

²³ tuti to Allai ne arikang fuba fosa ene efanduhisa wejemati fo, amani mano ewonomifo toi kawuru na Waidania fosa, tuti to Allai, Mano kiutu kaiwo kariri kaiwasanei kiai foi, tuti to inontarai emararebana fosa enumianinufo, amani nuaninuo Allai niarisara emasia fosa.

²⁴ Tuti mera to Yesusi, Mano Doa Rahanai na Kaiwo Arera Waworu ne, tuti to ne

rika kafatitai foi, amani rikao deinawio rang waworuo denteng sewa ne, wiro toyari Habeli ne rikao sahu we aiboifo kaha.*

²⁵ Ampafe metanansiau weduarai, ambori dohonao meteiaya Mano medu tonana foi fe. Weo masino mano eteiaya Allai we medu wesa tonanai na nunei fosa wiro ekaharai weru aiboifo kaha, nana mani mano Allai medu we tata na rorafaisi meu ne tata, masino tahuromitare ne kaiwofo mani, na todoni feai kontaio wiro takaharai weru ne aiboifo kaha rai.

²⁶ Rabuang bonani mani, rawafuifoi wedaya nunei rirora paria, wape ninaia mani dererai deyo,

“Beyari aha mani, wiro inari nunei terai rirora kaha, mae rorafaisi kontai.”*

²⁷ Kaiwo rabuang dotu tono ‘webeyari aha’ fo, dotu we nunei sentenang, amani nuo Allai samui nini ambori niariri rirora tuti warapari. Ambori na tonanane, fio wiro rirora kaha foi andino wiataia mutu.

²⁸ Ampafe tatohong mahikai we Sempaisi, weo tašobuo nuo wiro rirora kaha foi riati fefe amani tasobu kataifeai na Allai ne Mananu Rorong foi. Todoni kontaio tatohong mahikai wei tuti tasomi wei na mai, amani na tatatori tuti tamatai, kariri ne Allai eneoifo.

* **12:20** Keluaran 19:12-13 * **12:21** Ulangan 9:19 * **12:24** Ne arti mani, Habeli ne rikafoi sahu tutirai we ambori mano miuni foi sobu aiboi kerira foi, wape Yesusi ne rikafoi toyari sahu dutang we Allai deiai tane sasarinei. * **12:26** Hagai 2:6

²⁹ Weo tane Allai tasomi wei nei mani, ne tarai toyari adiao keso fifiani konta fo.

13

Kaiwo aunau wefuiāi

¹ Mene menemiwawu wawera mea we mewedoroi wa, metawawutai na mai pampang.

² Dohonao mearomiporo metamang we inontarai aisei na mene munuwa fe. Weo na nari tonanafo inontarai maneiru teai ewaitawana kahai mae etamang we wewaifosa na ene munufo ampa.

³ Mearomio mene doroi eroasoao enayai na aitamu fosa, mearomiosa toyari mantaung mea kontai inontarai menayai na aitamu di mea. Tuti mearomio mano inontarai enari kangganisa fosa, mearomiosa toyari mea kontai mesodai ne tonanane kontai.

⁴ Mea kiai, todoni kontaio metato mene meriraufu we fi mararebanai, wiro metohong siarawa fanai. Inontarai mano meninawa funoma foi tuti mano niai ria wiwing siai foi ambori Allai kiutu kaiwo kariri ki.

⁵ Dohonao menemirorong dohong we doi ete ra karera fanai, mae fianai aino wobua wa demoyarai we wau to tuti puraise we finanai. Weo Allai medu deyo,

"Na todoni feai kontaio wiro itua wau na wea kaha, tuti na fifiani kontaio itawing wau na wea kaha."*

⁶ Nanai wedaya tamadu na tanumiruainso mambiriutateyo,
"Sengnei andi fiata yau nei, ambori wiro imatai kaha.

Fianai aino inontaraine enari we yau ne?"*

⁷ Mearomio mano ewenunggamelie we mea, mano emadu Allai ne Kaiwofo we meara fosa. Mewati kariri fi maio esobua fo na eminohi toa fo, tuti metohong kariri ene eroasoafu.

⁸ Yesus Kristusi wiro yiwanu na ea kaha, na fafongfa, rahida ninai tuti we fitawafa.

⁹ Dohonao aunau aisei feai kia menemirorongwai wedaya mera sarawa fe. Weo ne bengne mani, taenemirorongnei mitubaru na Allai ne bengfo, wiro na fi kariri todoni fiang tatang fo kaha. Weo mano etohong kariri fio kariri fiang tatang fo nanai, toyari Yahudio raminde esahu fiangfeai we werarika kariri ene eroasoafu, wiro kia mai feai wesa kaha.

¹⁰ Tane mesba mesi bei we ohong korbanifo nai we Allai, tuti imami efata na mesba na Warumai na nunei fafong fosa wiro etang korbani watai nai foi kaha.*

* **13:5** Ulangan 31:6 * **13:6** Masmuri 118:6-7 * **13:10** Ne arti tofino: Tata tane fi denteng sewa weruo koang na agama Yahudi foi. Weo imamio erufi na Allai ne Warumaifoi fafongfa, amani emungno andowa na mesba ohongno korbani nai foi we ebai kaiwasafai ne sasarinei, todoni kontai wiro etang fieai nano korbani omi nai foi fanai. Wape tata mani tateyo tane korbani ohoni we Allai ne mani denteng sewa, amani Yesusi mireha we feriri tata weru tane sasarinei. Tata kiai, mansiari-mansiari tasobu fariri na Yesusi ne mirehafoi.

¹¹ Weo andowā ne rikafoi imami fuba foi kiari to Rorong Mirarebana Pari foi afui we dohoni we korbani yuairurang inontarai ene sasarinei, wape ne taraifoi niunumi na munue dereung boriei fo.

¹² Nanai kontai doni, Yesusi sodai dadirafo na munuefo ne rahutu dereung boriei fo we niari inontarainesa emararebanai na mantauni ne rikafoi.

¹³ Ampafe tara wei to munue dereung boriei foa tuti tasodai mamayao inontaraifo eteiberahi fo kontai riati.

¹⁴ Weo na nufi ninai, tane katai taminohi tawang naya fea kaha, mae tasera we bendario ambori da ma foi.

¹⁵ Ampafe na taweboyaria Yesusi ne, todoni kontaio tafiai Allai pampang. Finanai ne tarai wekorbanio tanari wei, amani na taboromine tateisaha wonongfo weSeng dine.

¹⁶ Tuti dohonao mearomiporo menari ne bengfo tuti mefata inontarai siai na mene fifo fe, weo korbani tonana foi dino Allai eneoan.

¹⁷ Metohong kariri mano ewenunggamie i we mea fo ene kaiwofo tuti metatosa. Weo ewaitawang wedua mea pampang fefe, tuti ansaino todoni kontai emadu tuti fi eru fo nanai na Allai arongreaf. Metohong kariri ene kaiwofo na mai, ambori eru fi na enemirorong piraise, tuti ene fi eru fo wiwo maraba wesa fanai, weo bereri mani finanai kia maifeai we mea kaha.

¹⁸ Metutang tuti amea pampang, weo ameroasoai we amenemirorong katui nei mesi, tuti na fifiani kontaio ametohong weai we amenari ne maifo.

¹⁹ Fio sewa aha mani, yeunau mea we metutang tuti amea tonanai, ambori ahera Allai kia yau we mea aha mau.

Nadi tuti kaiwo kafe fo

²⁰ Na tane Seng Yesusi ne mirehafoi, ne rikafoi wedaya Allai ne Kaiwo Arera Waworu foi wetarai, amani Kaiwo Areraio watai wefitawafa. Allai duwiri nano marareha rorong fo, tuti yuaisi we Mantahung Dedai Mirarebanai we ne dombane tata. Kadono Allai nani kontai, amani Mano wedaya tata tanumiruainso ne maifoi,

²¹ meinengang mea na ne bengfo kiai we metohong kariri ne dawiafo. Tuti na Yesus Kristusi, niari fianai dawi wea fo na tata. Todoni kontaio tataparanding Kris-tusi we fitawafa. Antu.

²² Doroi meaine, yenggowa mea we ambori kaiwo aunau yenatuai we mea mau ninai tanang ki, wape metamang weai na menemirorong mirising.

²³ Ambori mewaitawanai, tane doroi Timotiusi etawini to borai weru aitamu rorong fo ampa. Ambori da ahera to ninai ma mani, auru ruhiae aura mau we autuambawa mea ki.

²⁴ Meteikaririai we mene mano ewenunggamie i we mea wasa tuti we Allai ne inontaraio enayai na nana

wasa kiai, yenatu mahikai
wesa. Tane doroio eroasoai
kontai fosa na Italia, etanatu
mahikai we mea.

²⁵ Kadono Allai ne bengno
dohonai arora fo weriria mea
kiai.

Kaiwo Anatu Na Yakobusi

*Kaiwo dedung we
Yakobusi*

Kaiwo anatu ne Yakobusi soi denatua we Allai ne inontarai eroaso Yesusio enayai wariai na nunei sentenang fosa. Na kaiwo anatu ne, soi kariri fi bitoya wesa na kaiwo netawea fo, we fainawiai wesa tuti we deunausa nayai. Amani deunau kariri inontarai Kristenine eminohi toa fo tuti fianai aino enari fo. Ampafe soi wesa, kariri todoni mano ene fi fosa tuti mano ene pari fi fosa fianai aino esodaira fo, kariri todoni enari ne bengfe fo, enemituai sarawa kaha fo, kariri roasoai tuti ohong kariria fo, kariri kaiwo ariri maduri foi, kariri awaifo, tuti kariri mano enemirong dedai fosa. Yakobusi kontai deretawanai we wirottingai inontarai fanai, wirottingai etatofa fanai, tuti etawansa, tuti etutang tutisa we Allai.

Na kaiwo anatu nini Yakobusi deretawanai kontai paria we na eminohi Weinontarai Kristenai fo, todoni kontaio eteinawi ene eroasofo na etohong toa fo.

Kaiwone deto kutuai tonianai:

- 1:1 Kaiwo reantenang.
- 1:2-8 Roasoia mutu na dadira rorong fo tuti utang Sempaisi we dohong awaifo.
- 1:9-11 Fi kariri mano ene fi fosa tuti mano ene pari fi fosa fianai aino esodaira fo.

- 1:12-18 Fi weanggari ambori tau wei fo.
- 1:19-27 Taramioai tuti ohong kaririai.
- 2:1-13 Wiro iri inontarai kariri ene fifo fanai.
- 2:14-26 Roasoai tuti ohong kaririai.
- 3:1-18 Sasari tataperem-inei wedayari.
- 4:1-5;6 Inontarai Kristenai tuti finunei.
- 5:7-20 Kaiwo arerai we ohong kaririai.

Mahikaifea

¹ Weo doroi bohio mea kiai, amani inontaraio meweriria na Israeli rabuang suraya boruo menayai wariai na nunei sentenang wa mea.

Yau Yakobusi, Allai tuti Seng Jesus Kristusi une womingne yau, yenatu mahikaifeai we mea kiai.

Meroasoia mutu na dadira rorong fo tuti metutang we Sempaisi we ambori dohong mea mesawai

² Doroi bohi, masino mesodai maino dadirafo mani, dohonao menemirorongwai fituaya fe, mae memararising pampang.

³ Weo mewaitawanaifa we meroasoia mutu na dadira rorong mesodairi nani, wedaya metawang mea.

⁴ Meruraifa we ambori mene metawang mea nanai wedaya memasi tuti mebiru na fiani kontai.

⁵ Masino manei na mea wirottingai sewai kaha mani, todoni kontai dutang Allai ambori dohong awaifo wei, weo Allai mani warang takahetuai funomai ampafe

fianai aino utang wea fo dohonai arora, wiro enetituaitefa kaha.

⁶ Wape manei dutani mani, yoasoai we fi dutang weai nanai sobua rai, wiro enerorong soriru fanai. Weo mano enerorong soriru nei mani, ne tarai toyari andeisa rawanangrausi. Wanangfoi siai todoni mani, andeisafoi dipu kontai tonanai.

⁷⁻⁸ Inontarai tonana nei mani enerorong boyari kaha, ampare wiro meduraia futuayai kariri fianai aino niari fo kaha. Nana mani dohonao enetituai kontai we sobu fieai ria Sempaisi fe.

Fi kariri mano ene pari fi fosa tuti mano ene fifosa

⁹ Doroi Kristeni mano mene pari fi wa mea, memfraise, we Allai yuai mea ampa.

¹⁰ Tuti inontarai mene fi wa mea, memararising kontai, weo Allai dohong mea meminohi na katai tawawa fo. Weo inontarai ene fi fosa ambori eworu toyari ainari rai.

¹¹ Wofi dautai piao robongfoi mani, reraungfoi siamorang, ampare ainarifoi mirurang tuti ne mianafo nai. Tonanai kontai we inontarai ene fi fosa. Erurai tuti ene fifoa tonanai, wape ambori eworu.

Fi weanggari tata we ambori tatawai

¹² Mandoni dino sawani na fi dadira sodaira fo mani, wenani Allai mioani. Weo sawani kawuru na ne tonananea mani ambori sobu fiembaitafo, amani

sobu numainu Seng Allai dereri we inontarai mano enemiwawuti fosa fo.

¹³ Manei sobu fio weanggariri we ambori dohong sarawaifa fo mani, dohonao deyo, "Allai dino weanggari yau ne," fe. Weo Allai mani wiro enerorong dohong we niari fi karira fea kaha, tuti wiro weanggari manei na wea kaha.

¹⁴ Mae manei sobu fi weanggariri tonana fea mani, enerorong dohong we niari fi kerira fo andi wedayari ne, ne tarai kariri keri sofa we diang.

¹⁵ Ampafe dohong kariri enerorong kerira nania mani, wedaya sasarifoi tuti weboyari ria sasarifoi pam-pang mani, ambori wedaya mararehafoi.

¹⁶ Doroi enehuwawu mea wa meaine, dohonao mene-mitituai sarawa fe, weo Allai wiro weanggari manei kaha.

¹⁷ Fiani kontai aino tasobua fo, amani fi bengfo tuti maifo, biari kiai na rorafaisi meu, amani na Allai, mano niari sambewarai na rorafaisi foi. I mani Allai, mano wiro yiwanai na wea kaha, tuti fianai aino meduraia fo wiro yiwang ahang kaha.

¹⁸ Na mantauni ne dawiafo, yuai tata we ne arikang tuti yiwang taenemiro-rongnei weworu, amani na taroaso ne Kaiwo wetarai fo. Niari tonanai we tatafo, weo nano fi kiai niariri na nufi nini mani, tataino diri tata reantenangne.

Taramioai tuti ohong kaririai

¹⁹ Doroi enehuwawu mea wa meaine, meru kaiwo fininaia mutu, amani we mandoni wau kontai ki, wukahera we taramudidau kaiwoariri, wape dohonao wukahera we modu tuti kosou fanai.

²⁰ Weo mandoni dino kesou mani wiro dohong kariri ne maio Allai eneoa fo kaha.

²¹ Ampafe fi kerira tuti fi memunao menariri pampang foi mani, mehabioi weru mea. Mae na menemirorong tewawa meru Allai ne Kaiwo sanamai na menemirorongwai, weo Kaiwo nanai wemambiriu we kia mea mekaharai weru ne karirafo.

²² Todoni kontai metohong kariri fianai aino Allai medura fo, dohonao metaramioai tera fe. Weo metaramioai wape metohong kariria kaha mani, mepampamu bera mantauing mea aha.

²³ Inontarai mano tarao Allai ne Kaiwofo wape wiro dohong kariria kaha foi mani, ne tarai toyari wedoari deti ureng na kasinai.

²⁴ Deti urengfo na maia kai, wape da weru kasinaifoia mani aroporo urengfo we ne tarai toa foa.

²⁵ Wape Allai ne Hukumio kia kaiwasafai weru mamantiti rorong foi fo, manei detori na mai tuti dohong kaririaifa pampang, wiro taraoai terai mae aroporohai ahang kaha, wenani Allai mioani na fianai aino niari fo.

²⁶ Mandoni dino deyo i mani inontarai somi we Sempaisi dine, wape wiro deitawang taperengfoi kaha mani, wenani sofa berahi aha tuti ne yoasoafu wiro wefiea kaha.

²⁷ Inontarai somi na tarai we Dai Allai tuti mesi na urengreafu ne mani, fiata arikang awata tuti wiwina esodai dadira fosa, tuti i kontai derara ne taraifoi weru fi kerira nunei.

2

Dohonao metiri inontarai kariri ene fifo fe

¹ Doroi meaine, mea mani inontarai meroaso Yesus Kristusi tane Sengno sambe-warai dadai sewa foi, di mea, tonana mani wiro metiri inontarai toyari manei dedai sewai manei siai fanai.

² Weo masino inontarai ne ra bitoya manei, sata araha rea keiwewa na warakehafoi tuti sensuni na ansungno mehikai, da to mene katai mefanduhi mea nai wai mau, mayeai inontarai ne pari fi manei, sensuni na ansung karira, da kontai mau,

³ nana mani mano ne ra bitoya tuti sensuni na ansung mehikai foi andino metatori sewa ne. Weo memadu wei meteyo, "Daie, munohi na kaderao denteng nini," wape mano ne pari fi foi mani memadu wei meteyo, "Boari na wanai ete munohi na nang wowong nina."

⁴ Menari tonana mani, metitua mene doroifosa, we manea etadai sewa mano wei fosa, tuti deinawiai we menemituitawa kerira.

⁵ Nehu doroi enehuwawu mea wa meaine, metarami ma. Inontarai ene pari fi na nuneisa mani, Allai dirisa we ambori titua kariri ene eroasoafu mani, sahusa we inontarai ene fi disa. Inontarai nanisa ambori Allai yuaisa we ne inontarai terai weo eminohi riati na ne weMananufo, kariri ne kaiwo dererai we mano enemiwawutia fosa.

⁶ Manamo metoari aha meteikanggani mano ene pari fi fosa aha. Wape mano ene ra bitoya fosa enari kanggani mea. Ansaino etinggai mea tuti eha mea to mangkutu kaiwo fosa ne.

⁷ Eaino eteibera wonongno dedai mirarebana foi, amani Yesusi mano ne mea foi.

⁸ Mananufaisi dohong kaiwoariri we tatohong kaririai na Buku Mirarebana foi, amani,

“Menemiwawu inontarai siai kariri menemiwawu bera mantaung mea wa.”*

Metohong kariri kaiwo nana mani menari ne wetaraifo finana.

⁹ Mae metiri inontarai toyari manei dedai sewa manei siai, amani metato manea wape manea bereri, nana mani metohong sasari, tuti Allai ne Hukumi dohonai we Musai nanai deinawiai we metohong sara ne Hukumifoi.

¹⁰ Tuti mandoni dino dohong kariri Allai ne Hukumifoi kiai, wape enefunomi na rabuang bei mani, wenani dohong sara Hukumifoi sentenang kontai.

¹¹ Weo na Hukumifoi Allai medu deyo,

“Wiro metena ria wiwing ete mang siai fanai,” tuti Hukumi siari nani kontai andino deyo,

“Wiro memung inontarai fanai.”*

Ampafe masino wiro metena ria wiwing siai kaha, wape memung inontarai mani, metohong sara ne Hukumifoi sentenang kontai.

¹² Ampafe fianai aino memadura fo tuti menari fo, metitua weai. Weo Allai kiutu kaiwo kariri mea rai, kariri ne Kaiwo kia kaiwasafai weru mamantiti rorong foi fo.

¹³ Weo mandoni dino wiro deinawi ne aroafu we inontarai siai kaha mani, na rahida wanai Allai kontai deinawi ne aroafu wei kaha. Wape mandoni dino aro inontarai siai mani Allai wiro dohong aiboifo wei kaha.

Roasoai tuti ohong kaririai

¹⁴ Nehu doroi meaine, manei medu deyo i mani inontarai yoasoa dine, wape wiro deinawi kaririai na ne dohong toa fo kaha, nana mani ne yoasoafu kia fiani wei rai? Manei yoasoai tonana mani Allai wiro feriri kaha.

¹⁵ Tarahio mene doroi manei, ne pari ansung demoyarai we sensuni nayai tuti fiang demoyarai we dang na rahida neungfo kaha.

¹⁶ Wape memadu wei meteyo, “Wau ro mau wa. Nemu mahikai wonsung

* 2:8 Imamati 19:18

* 2:11 Keluaran 20:14; Ulangan 5:18

waua monikapoi feai tuti mahikai bampi fea." Wape wiro metohong fi dohong weai nana kaha, nana mani we fiani e memadu tonanai wei nina?

¹⁷ Tonanai kontai na taroasoaf, wiro tatohong kariria kaha mani, tane taroasoai nanai wefiea kaha kontai.

¹⁸ Tarahio manei boyo, "Yau mani, iroasoai teraifa mani demoyarai," tuti manei wau aha mani boyo, "Yau mani, yohong te ne bengfoa mani demoyarai." Wape imadu mau yeyo, meteinawaii na kaiwoariri arora kariri mene meroasoawa, ambori yeinawi nehu iroasoane na yohong toa ne we mea.

¹⁹ Kontai meroasoai we Allai mansiari kawuru. Mahikai! Wape metarami ma, inggiranesa eroasoai tonanai kontai, tuti ematai paria. Mano meroasoai wape wiro metohong beng kaha mani, mebeng sewa inggrifosa kaha, weo ea eroasoai kontai, wape etohong kariria kaha.

²⁰ Inontarai inggowui wa meaine, tarahio meteyo yeinawiaifa we mea we mewati terai weo roasoifa wape ohong kariri ne bengfo kaha mani, roasoai tonana nei wefiea kahai.

²¹ Mewati tane werengno Abrahami e? Rahida bo deo miung ne kaisungno Isaki na mesba wowongfo kariri kaiwo arerai Allai deyoai wei fo, na fi niari nanai Allai detori we denteng riati aha.

²² Na fianai aino Abrahami niari nanai, deinawiaia kasau ampa, we roasoaf mani, wiro kaiwo madurai arora fine kaha, mae fio ohong kariria fine. Ampefe na finiarifo mani ne yoasoaf mai.

²³ Finanai mai kariri Sengnei ne Kaiwo rabuang bo dotu deyo,

"Abrahami yoaso Allai,

tuti na yoasoai nanai Allai detori we inontarai mesi dine."*

Ampafe sahui we ne maniwowiri.

²⁴ Ampafe kasau ampa, we inontarainesa ebeng ria Allai aha fo, wiro na eroasoai tera fo kaha, mae na fi bengno enari fo.

²⁵ Kontai mewati Rahapi e? I wiwing diru dine, wape Allai detori we denteng riati, we fianai aino niari fo, amani inontarai Israeli manduo ura wa uwati kariri bendari Yerihfo foi, Rahapi dino dediwa suru na ne munufoi, tuti fiata suru uwawu to katai siai aha fo.

²⁶ Ampafe, kariri tane tarainei weo anseng bireri weia mani, mireha. Tonanai kontai we taroasoaf, wiro tatohong kaririai na fibeng tanari fo kaha mani, taroasoai nanai ne tarai toyari mireha, wiro wefiea kaha.

3

Sasari tatapereminei wedayari

¹ Doroi meaine, dohonao na mea bitoya merurai we mewemantaunau jemati fe.

* **2:23** Kejadian 15:6

Weo mewaitawanaifa we mano tawemantaunaune tata mani, Allai kiutu kaiwo we tata fo maraba sewa.

² Tata kiai, wea mani tato-hong sarawai. Wape mano wiro medu sara kaiwoariri kaha foi, i mani inontarai mesi dine, amani inontaraio sawang ne taraifoia mitu dine.

³ Mewati kudanei e, oyo autai nai tuti ambori iruwi we da kariri tatawiafo mani, tabuhi wai na borongfoi ambori wai nani dino iruwi nai we da kariri tatawiafo ne.

⁴ Kaparinei kontai tonanai. Kaparifoi watioi we fiebai tonanai tuti wanangfei mani suruoi paria, wape na ne bo irua foi mano siruwi foi siruwi defai na mimoya kariri ne dawiafo.

⁵ Tonanai kontai we tatapereminei, i ketui paria wape deparanding tata karira be-yari. Mewati adia urengnei, ketui tonanai ki wape enang dininio kesoia kiai nai.

⁶ Tatapereminei mani ne tarai kariri adia. I wedaya sasari we tane tarainei sentenang. Fi na tane tarainei kiai mani andino kerira sewa ne. Ampafe kaiwo tamadurai na tatapereminei, ne tarai kariri adia na Soroha rorong foi. Saminseni andi wedaya tatapereminei denggararu tonanai, ambori kia karira we tata na rahida taminohi na nunei ninai.

⁷ Andowa aweng boa foi tuti ne fiafa na arong foi, romu tuti diangnei, aunauwi wori finahang ki, tuti inontaraine etaunauwia finahang ampa.

⁸ Wape tatapereminei mani mandoni kontaio we-mambiriu we deunauwia finahang we medu sua kaiwo kaha. I memuna, mandoni kontaio wiro taraoi kaha, ne tarai toyari fimemu we memu kaiwasanei.

⁹ Tamadu nai tato-hong mahikai we Sempaisi, tane Dai Allai, tuti tataperemi siari nani kontai andino takaherawai tuti tateikanggani inontarai siai Allai niarisa kariri mantaunifo ne.

¹⁰ Ampafe kaiwo fiai fo tuti kaiwo kaherawa fo kawariai ruhiae na tatapereminei. Doroi meaine, finanai kerira paria.

¹¹ Weo waya ureng boyari deda mandieie mani, wiro dowej memisi tuti dowej pirandima kaha.

¹² Tonana kontai we ai urung nei, wiro webong saituni kaha, tuti anggurinei wiro webong urung kaha. Ampefe waya ureng deda mandieie meuai foi, wiro dedao mereha memisi ahang kaha.

Awai kia mai we tata ne mani biari na Allai meu

¹³ Masino na mea maneideyo i mani sewai tuti deitawang Allai ne rangfoi, nana mani todoni kontaio deinawiaifa na dohong toa fo, amani niari fi masi fo tuti ne bengfo na enerorong tewawao weneung na ne awaifo.

¹⁴ Wape masino mene-mirorong pirahai we inontarai siai tuti mewati we mene tarai bo meneng wai terai we ambori meweme-wonomi mani, dohonao

meboi mearomiwa meteyo mesawai fe. Weo na tonanane mebari wera kaiwo wetarai fo.

¹⁵ Mano deyo sewai tonana nei mani, wiro sobu awai nani na rorafaisi meu kaha, mae na nunei ma, tuti awai nani da na Allai Nuaninufoi kaha, mae da na Saminseni ma.

¹⁶ Weo na doni kontai inontarai enemirorong pirahai wesa tuti ewati wesa terai esera we ambori ewewonomi, na nanai kontai ambori inontarai esawasa tuti emamuna waweresa, tuti enari maino fi karira fo.

¹⁷ Wape mandoni dino sobu awai na rorafaisi meu mani, reantenang pari mani wenani mesi wiro seyewa kaha, piraise we kia mangfo, deti we inontarai siai, tuti taradidau kaiwo. Enewawu fuba tuti niari ne bengfo. Doa rahana, wiro enetituai we maneи dedai sewa maneи siai kaha, tuti wiro tapereng sobaura kaha.

¹⁸ Inontaraio eminohi na mai tuti efata inontarai siai we eminohi ruhiae na mai, nana mani inontarai emasi disa, tuti etohong kariri Allai ne dawiafo.

4

Mewemaniwowiri we finunei fanai mae metato Allai

¹ Fifiani wedaya mea mesawa mea tuti memamuna wawera mea ne? Finanai dariai na fi karira menemituaiti na menemirorongwai, amani finanai dawi mea pampang we menari ne karirafo.

² Metohong paria we mesobu fieai, wape finanai mesobua kaha, wedaya memung wawera mea. Tuti menemtitou we inontarai ene fi na menemirorong kerira, wape wiro mesobu fi metawi weai nana kaha. Mewawa mea tuti memamuna wawera mea. Mesobu fi metawi wea fo kaha, weo metutang Allai kaha fefe.

³ Kontai tarahio metutani kawuru ampa, wape mesobua kaha, weo fio metutang weai nanai, wiro na menemirorong mesi kaha, wape we mantaung mea mefaraiseraifa fine.

⁴ Toyari wiwingno enerorong wiro dohong we ne mangfoi titou ahang kaha tuti dohong sarawai ria mang siai, mea kontai menemirorong dohong te we Allai ahang kaha, mae metohong we finunei. Mewaitawanai kahai we mewemaniwowiri we finunei mani, wedaya meweaiteta we Allaifo ne? Ampafe mandoni dino de wemaniwowiri we finunei mani, wenani weaiteta we Allai kontai.

⁵ Dohonao meteyo kaiwo dotu na Sengnei ne Kaiwone sofa fe. Weo Nuaninu Denteng Allai dohoni niayai na tane tarainei dawiae paria we tenemiwawu te Allai tuti tasomi terai wei.

⁶ Tonanai ki wape Allai dohong beng fuba sewa we tata. Ampafe doni na Kaiwo Mahikai ne medurai deyo, "Allai dapа mano enemirorong dedai nesa,

mae dohong beng we
mano enemirorong
tewawa nesa.”*

⁷ Ampafe tonana mani metato Allai tuti metapa Saminseni, ambori mito weru mea ki.

⁸ Mehefang Allai, ambori Allai kontaio kefang mea. Mano menari sasari wa mea, meruai mewaramiwara mararebanai weru sasari menariri wai, tuti mano menemirorong boru wa mea mani meruai mene-mirorongwai kontai ambori mirarebanai.

⁹ Metatua bera mene taraiwai, mesai tuti metaidu, todoni kontai meriwang memiriwa na mesai tuti memirisingwa na mene-mirorong fituayai.

¹⁰ Metu menemirorong-waia tewawa na Sempaisi arongreafu, ambori yuai mea metadai ki.

Wiro meteibera mene doroifosa fanai

¹¹ Doroi meaine, wiro meteibabera mea fanai. Mandoni dino deibera ne doroifoi ete dei we i we dohong sarawai, nana mani ne tarai toyari wenani deibera Allai ne Hukuminei tuti deyo Hukuminei sarawai, weo Hukumi nani deyo todoni kontai enewawu ne doroifoi. Nana mani mene tarai wemangkutu kaiwo we Allai ne Hukumifoi, toyari meteyo fibeng kaha fine. Masino meteibera Allai ne Hukuminei tonana mani, wiro metohong kariri Hukumifoi kaha.

¹² Wape mansiari kawuru andino ne mambiri we

dohong Hukumifi we inontaraine tatane, tuti andino wemangkutu kaiwo we tatane. Mano nani mani Allai dine, andino wemambiri we feriri tata tuti kebi tata to Soroha rorong foi ne. Ampefe mene mambiri fiani feaifa ne, meteibera tuti mehutu kaiwo we mene doroifesa nina?

Dohonao mearomiporo Sengnei tuti meboi mearomi tuti fi menari wafe

¹³ Mano memadu meteyo, “Rahida nini ete aha te, ambori torontai to bendari bowani ete bei siai aha, tonayai defuina bei teai we towaworifi torawayanai, we tosera we doi nayai.” Metarami ma.

¹⁴ Fifianai aino aha mesobua fo mewaitawana kahai arorawa. Mene tarai todoni rai? Mene tarai toyario kawario kameai mani watioi tonana mae touraia mani niaia.

¹⁵ Ampafe memadu tonina, “Masino Sengnei eneoa mani, taminohi tatarang tuti tanari fio tate tanari fo.”

¹⁶ Manamo wiro memadu tonana kaha, mae mene-mirorong dedai paria tuti meboi mearomiwa tuti fi menari fo. Kaiwo fuba meboi mearomiwa naya mani, kerira paria.

¹⁷ Ampafe mandoni dino deitawanaifa we ne bengfo todoni kontai niari, wape wiro niari kariria kaha mani, inontarai nani dohong sasari finanai.

5

*Kaiwo aunau we mano ene
ra bitoya fosa*

¹ Mano mene ra bitoya wa meaine, metaramio nehu kaiwo finina. Mesai metaidufafong we dadira bitoya ambori mesodairi foi.

² Mene rafi misuhia kiai ampa. Tuti mene ansungfe kantantini kiutuwi kiai ampa.

³ Mene ra emasi tuti peraki fi raima soi kiai ampa. Raima nani we fiainawiai kariri fianai aino mesodaira fo ki, amani todoni Allai kebi mea tono rawanang adia rorong fo ambori keso mene taraiwai kiai. Weo nunei ne rahida werea naya fe kefang ampa, wape mefanduhi ra bitoya terai. Ampefe mene rawai niai ki tuti mesodai karira bitoya ki.

⁴ Mewati ma! Mano erufi we mea na mene romiwai ebibe esahu weo wirowebaisa kaha fefe. Esai tuti esahu we manei fiatasa, tuti erawamifui nani, mananu Seng Allai taraoi ampa.

⁵ Mefanduhi ra bitoya na nunei we mefaraiseri tuti memiang mene taraiwai nai. Nana mani mene tarai toyari sapio ahumia ne tarai fiabai we ambori ani. Mea kontaio tonana, amani na mene ra nani memainenang mea we mesobu ne karirafo.

⁶ Mano etohong sarawa kaha fosa meru aiboiosa tuti memunsa, wape wirowebai fefe. Mea kontaio tonana, amani na mene ra nani memainenang mea we mesobu ne karirafo.

*Metawang mea na dadira
rorong mesodaira fo weo*

*metamang we rahida Sengnei
daraberahi nai ma fo*

⁷ Ampafe doroi meaine, metamang tuti metawang mea pariao Sengnei daraberahi aha ma. Metawang mea kariri inontarai mandohong romi nei, i mani sanang aibong na romifoi, mae na wemunudang mani sawani demang pariao we wemetang aha ambori fi sanang fo tifu na mai tuti wetarai.

⁸ Mea kontai tonanai, metamang tuti metawang mea, metoaria mutu, weo Sengnei ne rahida daraberahi nai ma fo kefang ampa.

⁹ Doroi mea, dohonao menemitituai ete meteibera mea fanai. Weo menari tonana mani Allai dohong aiboi we mea rai. Mearomioaifa we Mangkutu Kaiwofi kefang we da ma ne, meineng kawuru ampa.

¹⁰ Doroi meaine, mearomio kariri Allai ne nabio fafongfa emadu na wonong fesara fo. Ea esodai dadirafo tonanai ki, wape etawansa. Ampafe menarisa we fiainawiai we metohong karirisa.

¹¹ Tarai to, ea mani tatatosa paria, we etawansa fefe. Metaramio Ayupi kontai we sawani na dadira rorong sodairi foi ampa, tuti mewaitawanai kontai kariri fianai aino sobuai ria Seng Allai fo ampa. Weo Sengnei mani aroa sewa tuti enerorong denteng.

¹² Doroi meaine, ne reantenang pari metohong

kaririai konta mani, dohonao mefaftora na finunei ete na fi rorafaisi fe, ete na fifiani konta fe. Mae fi meteyoai nanai antu mani meroa terai meteyo yo, mae antu kaha mani meroa meteyo bireri. Ambori Allai dohong aibooifo we mea fanai.

¹³ Masino manei na mea sodai dadira mani, dutang we Allai, mae manei firaise mani wenani yohi fiai Allai.

¹⁴ Manei na mea meninang mani sahu mano ewenunggamieie we jemati fosa, ambori etutang tutiri we Allai tuti episowi na maning na Sempaisi wonongfo.

¹⁵ Masino eroasoai tarai mani, mano meninang nani ambori denteng ki, weo Sengnei waraira ne maninangfoi. Tuti niari sasari mani Sengnei waraira ne sasarifoi kontai ki.

¹⁶ Ampafe mea kiai meteiai wawera mene sasariwai, tuti metutang tuti wawera mea ambori mebeng. Mano enemirorong mesi fosa mani, ene nadifoi wemambiriu paria tuti Allai yoa wei rai.

¹⁷ Mewati Eliai. I mani inontarai batang dine kariri tata, wape yoasoia mutu dutanai we ambori metang ming fanai, tuti metangfoi wiro ming kahai defuina botoru aburungfeai kaririai.

¹⁸ Mayeai dutang Sempaisi nariai aha, ainanaya metangfoi miung aha, ampafe ninoi tuti fitantanangfoi tetifu aha.*

¹⁹ Nehu doroi meaine,

masino manei na mea wiro da kariri Sengnei ne Kaiwo wetarai ne ahang kaha, mayeai mano yoasoa manei fiatari daraberahi we Kris-tusi aha,

²⁰ nana mani mearomio ninai, amani mandoni dino wedaya inontarai sasari manei daraberahi weru ne rang sarawa foi mani, wenani feriri inontaraifoi weru marareha rorong fo tuti wedaya sasari bitoya niaririri foi niai.

Mahikaifeai.

* 5:18 1 Mananufosa 17:1-18:45

Kaiwo Anatu Reantenang Na Petrusi

Kaiwo dedung we 1 Petrusi

Kaiwo anatu ne rasul Petrusi andi soi ne, amani Yesus Kristusi ne inontarai suraya mandu fosa manei dine. Kaiwone soi we inontarai Kristeni eminohi na katai esahui we nu Asia Katui. Na rabuang bo Petrusi soi kaiwo feninai, katai esahui we nu Asia Katui nini, wiro ne tarai kariri nu Asia na fui nini kaha. Weo rabuang bonani mani deinawite nu bei na nu Roma foi, wape wiro Indonesia, Malaysia, Cina, tuti siai wei fo kaha. Rabuang bonani mani mano eroaso Kristusi fosa esobu dadira paria.

Nanai wedaya Petrusi soi wesa ambori esodai dadira maraba kontai mae enemironing mitubaru. Soi wesa kariri Kaiwo Mahikai kariri Yesus Kristusi fo, mano mirehara, suwi aha, tuti ambori da aha ma foi, ambori emitawania mutu. Esodai dadira paria we erariati mae, etawansa tuti eroasoai we waroi ahang kaha mae Allai mioansa paria, na rahida Seng Kristusi daraberahi aha ma foi.

Deretawansa kontai ambori eminohi mai kariri inontarai emararebanao eraria Kristusi fosa.

Kaiwone deto kutuai tonina:

1:1-2 Kaiwofafong.

1:3-12 Yesusi feriri inontaraine tata weru tane sasarine.

1:13-2:12 Todoni kontai taminohi na masi, weo Allai ne inontarai di tata fefe.

2:13-4:19 Taenemiro rongnei mitubaru na dadira rorongno tasodaira ne.

5:1-11 Inontarai Kristeni nesa todoni kontai enemirorong tewawa tuti efata wawerasa na mai.

5:12-14 Kaiwo kafe.

Mahikaifea

1-2 Weo doroi Kristenio Allai ne inontarai diri mea wa mea kiai, amani mano menai taterai weinontarai aisei na nu Pontusi, Galatia, Kapadokia, Asia Katui, tuti Bitinia wa mea. Dai Allai diri mea we ne inontaraifo, kariri fianai aino enetituaitaitai kawuru na fafongfara fo, tuti Allai Nuaninufoi niari mea memararebanai wei ampa, ambori metohong kariri Yesus Kristusi tuti yuairurang mea na ne rikafoi.

Kaiwone na yau Petrusi, Yesus Kristusi ne rasuline yau.

Kadono Allai dohong ne bengfo arora we mea paria tuti wedaya mea menumiruainso ne maifo paria.

Dai Allai yiwang tata ambori tatarang tawaworu aha, donio taenemitarawanai mutu

³Moanafeai we Allai, mano tane Seng Yesus Kristusi tamanai. Ne aroafo fuba we tata paria, wedaya niari riwang tata aha toyari tataubau tanumi riwanaia tawaworu na Yesus Kristusi na suwi na marareha rorong

foi aha fo. Na toninane do-hong tata taenemita-wanaia mutu.

⁴ Taenemita-wanai we tasobu moanaio Allai meine-namia foi, amani moanaio suanai na Waidani foi we mea. Moanai nani wiro kerira na ea kaha, piro na ea kaha, tuti siamorang na ea kaha.

⁵ Moanai nani kiai we mea, weo na meroasoafu Allai deitawang wedua mea na ne mambiriufu paria mesobu faririo meinena mi we meara foi ki. Fariri nani ambori deinawi na rahida kife nunei nai foi ki.

⁶ Ampafe, nanai wedaya memararising paria. Tarai, tarhai menemirorong fi-tuayai we mesodai maino dadira bitoya we rahida kutea tonanai ki, wape mefaraise kontai.

⁷ Dadira bitoya mesodairi nani mani, we ambori deinawiai we mene mero-asoafu tarai tuti mitubaru. Mewaitawanai we emasinei mani, nunumi na adiafoi we ambori obu emasi tarai dine. Tuti emasi tarai kontai mae ambori wioru ki. Wape mene meroasoawa dadai sewa emasinei, ampafe na dadira mesodairi wai ambori wedaya meroasoawa mutu. Na tonanane, Allai fiai mea tuti deparanding mea, kontai yuai mea metadai na rahida Yesus Kristusi daraberahi nai aha ma fo.

⁸ Wiro mewatioi na ea kaha rai, mae menemiwawuti ampa. Tuti ninaya mani wiro mewatioi kaha, wape mero-aso. Nanai wedaya mefaraise tuti menumiruainso mirising

dedaio era wera kaiwo we madurai kariri foi.

⁹ Weo Allai niari mea mesobu fi meroasoai wea fo, amani feriri menu-mianin-uwai ki.

¹⁰ Kariri fariri Allai dohoni nani foi, nabi fafong fosa erurai paria we ewaitawang kaririai. Emadu fafong kariri Allai ne bengno ambori dohonai arora we mea fo.

¹¹ Esera weai ambori ewaitawang kariri todoni tuti kidoni faririo Kristusi Nuaninufoi medurai na ea fo kawariai ki. Rabuang bonani Kristusi Nuaninufoi medu wesa deinawio dadi-rao todoni kontaio Kristusi, Mananu Mampariri foi, sodairi foi tuti kariri ne dedai sambewaraio ambori da ma fo.

¹² We nabi nanisa, Allai deikaririai wesa we fiana aino emadurai tonana fo, wiro reng we mantaunsa kaha, mae we mea na rabuang bonini ne mea; amani fio na ninai metarami parai ria mano ewuwu Kaiwo Mahikai kariri Yesus Kristusi fosa fo. Emadu finanai we meafo, emadurai na Nuaninu Mirarebanai Allai denatui na rorafaisi meu fo ne mambiriufu. Fi nanai kai, wewaifosa kontai etohong weai paria we ewaitawang kaririai.

Allai sahu tata we tamarebanai na taminohifo

¹³ Ampafe todoni kontaio memainenang na menemiti-tuaitawa. Metitua meminohi toa wa tuti menemita-wang te Allai ne bengno dohonai arora we mea fo na rabuang

bo Yesus Kristusi da aha ma fo.

¹⁴ Mea mani Allai ne arikangno metohong kariri ne dawiafo tera di mea, ambori wiro metohong kariri menemirorong kerira raminde menariri na rabuang bo menayai na mamantiti rorong fo nani foi kaha.

¹⁵ Mae todoni kontaio na meminohifo memararebanai, kariri Allai mano sahu mea foi mani mirarebanai.

¹⁶ Weo na kaiwofo dotu deyo,

“Todoni kontaio memararebanai
weo Yau mani imararebanai

¹⁷ Na meminohi toa ne, todoni kontaio metitua kariri menayai tourai na nunei fo, toyari menayai weinontarai aisei na nufi nini, tuti metato Allai tuti mesomi wei terai na mematai. Weo mewenadi wei mani mesahui we Dai, tuti andi kiutu kaiwo na mai kariri inontarainesa, kariri mansiari-mansiari fi niari fo tuti wiro deto maneи dedai sewa maneи siai kaha fefe.

¹⁸ Weo mewaitawanai we Allai feriri mea weru meminohi toaio wifiea kaha fo, kariri fianai aino mesobuaria mene werengfosara fo. Wape wiori kutu mea weru mene meminohi toai nanai, wiro biaitai na fio ambori woru fea kaha, toyari emasi ete peraki kaha,

¹⁹ mae biaitai na fio ne harga dedai paria, amani na Kristusi mantauni ne rikafoi, ne tarai toyari domba antungno mirarebanai, wiro ne wea karira kaha foi.

²⁰ Kristusi nini, Allai niari nunei kaharai mae, diriri kawurua. Tuti rahida wefuiai ninai arahio da to nunei we mea ma.

²¹ Na Kristusi nini meroaso Allai, mano duwiri suwi na marareha rorong foi aha fo tuti yuasia dedai sambewara foi. Ampafe meroaso te Allai tuti menemitawang te I.

²² Tonanai, na metohong kariri kaiwo wetarai fo mewarami-ira mene sasariwai awao memararebanai ampa, ambori menemiwawu mene doroio meroasoai ruhia fosa na mai. Ampafe todoni kontaio mene miawu wawera mea na menemirorong mesi tuti na tarai aha.

²³ Menemiwawu mea tonanai, weo Allai ne Kaiwo darang tuti watai wenu mainu fo wedaya meara ne tarai toyari metaubau menumi riwanaia mewaworu ampa. Wape wiro metaubau menumi weinontaraio ambori mireha foi kaha, mae weinontaraio metarang pampang.

²⁴ Weo ne Kaiwofo dotu deyo,

“Inontarainesa kiai ne tarai toyari ninoi,
tuti ene sambewarai eta parandina fo ne tarai toyari ninoi ne ainari; Ninoifoi siamorang tuti ne ainarifoi mirurang,

²⁵ wape Sempaisi ne Kaiwofo watai wenu mainu.”*
Kaiwo nanai aino Kaiwo Mahikai fo ewuwuai kawuru we meara fo.

* 1:16 Imamati 11:44-45, 19:2 * 1:25 Yesayah 40:6-8

2

¹ Ampafe, weo metaubau menumiwa mewaworu aha mani, mehabi ne karirawa kai weru mea, wiro menemirireu inontarai fanai, metatofa biriu fanai, tuti metaperemi sobaura fanai. Wiro menemirorong pirahai we inontaraio esobu ne maifo fanai, tuti metairiri inontarai fanai.

² Todoni kontai mene tarai toyari arikang marareha awefang barika foi, tuti metohong we ui mai tuti mirarebana na Allai fo. Ambori na tonanane mefabai tuti memutubaru na mene meroasoawa, amani na fariri mesobua fo.

³ Weo menumiruainso Sempaisi denteng we mea fo ampa.

Yesus Kristusi ne tarai wekamiei reantenango darang, tuti ne inontarai eroaso fosa ewekamiei samusa nai fo

⁴ Ampafe mera we Sempaisi ma. I mani ahui we *Kamieio Darang*, kamieio inontaraine eteiyari we eteyo wifiea kaha fefe, wape kamiei nani Allai diriri wekamiei dedai wewonong.

⁵ Mea kontai mene tarai toyari kamieio darangno Allai samusa we biaung munu omi wei foi nai. Na tonanane mene tarai weimami mirarebanaio meminohi merufi terai we Allai, tuti na Yesusi Kristusi metohong korbani we Allai, amani korbani kia Allai enerorongfoi fo.

⁶ Weo na Kaiwo Mararebana fo dotu deyo,
“Mewati ma, yirio kamiei weharga dedai bei, kamiei nani yohoni wiatai na Sioni wekamiei reantenang, tuti mandoni dino yoasoi mani, wiro mimaya na wea kaha.”*

⁷ Ampafe we mano meroaso wa mea kamiei nani weharga paria. Wape we mano eroaso ka fosa mani, “Kamieio mano enari munu fosa eteiyariai foi, ninaia mani andino wekamiei reantenang,”*

⁸ tuti,
“Kamiei nani dino wedaya inontarai esodairi ne, tuti dohonsa etawai.”*

Esodairi tonanai weo eroaso Kaiwo Mahikai fo kaha fefe. Tuti ne tonanane Allai samusa we ambori ene tarai tonanai kawuru ampa.

⁹ Wape mea mani inontaraio Allai diri mea kawurua di mea, imamio mefata Mananufaisi di mea, kaiwasao memararebana di mea, Allai mantauni ne inontarai di mea. Allai diri mea tuti sahu mea weru mamantiti rorong fo we mesuai to sambewaraio fiabai foi rorongfo. Allai sahu mea tonanafo we ambori mewuwu kaiwo kariri fi fubao niariri we mea foi.

¹⁰ “Fafongfa Allai ne inontarai di mea kaha, wape ninaia mani ne inontarai di mea ampa.

* 2:6 Yesayai 28:16

* 2:7 Masmuri 118:22

* 2:8 Yesayai 8:14

Fafongfa aro mea kaha,
wape ninaia mani, aro
mea ampa.”*

¹¹ Doroio enehuwawu mea wa meaine! Mea mani inontarai aisei tuti inontarai meminohi sauai na nunei di mea. Ampafe yutang mea paria we mehatai weru sasario menemirorong dohong we menari wa, amani fi karirao memuna we menumianinuwai wa.

¹² Todoni kontaio mene metohong toa wa mai na menayai rahang inontarai etaroanso Allai ete Yesusi kaha fosa wa, ambori masino eteibera mea Weinontarai menari ne karirafo di mea mani, na mene metohong toai beng ete mai nanai, etato mea tuti ambori etaparanding Allai na rahida daraberahi nai aha ma foi.

*Mesomi we mananufosa
tuti mambaisengfosa*

¹³ Na Sempaisi wonongne yutang mea we mesomi we mano ewenunggamie eru mea na nunei sa. Amani we Kaisari mano yu wang mananu dadai foi,

¹⁴ ete we gubernuri mano Kaisari deinawissa we etohong aiboifo we mano enari ne karira fosa tuti we efiai mano enari ne beng fosa.

¹⁵ Weo Allai ne dawiafo mani deyo, ambori na ne beng menari fo nanai mehobu inontarai ewebonggoi fosa eboromio emadu funoma foi.

¹⁶ Todoni kontaio meminohi Weinontaraio mehasau weru sasarifoi, wape dohona

mene mehasau tonana fo metohonai we metabung wedua ne karira menari fo fanai. Mae meminohifo menari kariri todoni inontarai mewewoming we Allai di mea fo.

¹⁷ Mandoni kontaio metatori, menemiawu mene doroi inontarai Kristen fosa, mematai we Allai, tuti metato mananu nunei sa.

*Kristusi ne dadira sodaira
fo wefainawiai we ohong
kariria ne*

¹⁸ Doroio inontarai etafu mea eru mea we mewewoming wesa wa mea, mesomi we mano eru mea wasa na metatosa. Wiro we mano enemirorong denteng tuti ene kaiwo manang fosa tera kaha, mae we mano ene kaiwo tapapa fosa kontai.

¹⁹ Weo inontaraio dohong sarafiea kaha, wape sobu dadira mani, masino sawani na dadira rorongno sodairi nani foi, weo deroangno Allai ne awiafo na mai, Allai ambori mioani ki.

²⁰ Wape mesobu aiboifo we menari sarafieai tuti metawang mea na aiboi mesodairi nani kontai mae, mesobu fiea kaha. Wape masino mesodai dadira we menari ne bengfo, tuti metawang mea na dadira mesodairai nana mani, Allai deto finaai we fi mai fine.

²¹ Allai suhu meara we ambori mesodai ne tonanafo kontai. Weo Kristusi mantauni sodai dadirafo we mea ampa tuti na tonanane dohong fiainawiaifa we mea, ambori metohong kariri fianai aino niaria nanai.

* **2:10** Hosea 2:23

22 "Wiro niari sasarifeai na wea kaha,
tuti obu kaiwo sofa feai
na borongfo kahai
kontai."*

23 Inontarai eteiberahi fo,
wiro deiberafa kaha. Sodai
dadirafo, wiro kiarufansa
kaha. Mae sawing ne taraifoi
we Allai, Mano kiutu kaiwo
na mai foi.

24 Kristusi mantauni sodai
dadirafo na aitabafoi we
tane sasarinei na ne taraifoi,
ambori tamarareha weru
sasarifoi ne mambiriufu, tuti
tatarang aha na tamasi na
Allai arongreafo. Na Kristusi
ne kahai fuba sodairi na
aitabafoi, niari tane tarainei
denteng weru fifiani kontai
ampa.

25 Weofafong nanai mene
tarai toyari dombao era
sarawai, wape ninaia mani
metarabera mea we Mantahungfoi,
amani mano deitawang menumianin-
uwai, ampa.

3

Kaiwo kariri todoni minohi ruhiae wemambewangfo

1 Tonanai kontai we wiwingne mea, todoni kontaio mesomi we mene mangwasa, ambori masino mene mangwa manea eroaso Sempaisi ne Kaiwo kariri Yesusi fo kaha mani, wiro memadu fieai wesa kaha, wape na mene menari toa wa wedayasa eroasoai.

2 Weo mene mang eroaso kaha wa ewati mene menari toaio mai tuti mararebana wa fefe.

3 Dohonao mene mahikaifo nayai na boriai arora terai, na fi memaranding mea naya wa, toyari menari menuwiwara mahikai, ete memaranding mene taraiwai na fi marandingno ne harga dedai tuti ansungno ne harga dedai foi fanai.

4 Mae, ne menari mani mene mahikaifo kawariai na menemirorongfuisi mandie na fiamaranding wiro siamorang na wea kaha ete nai na wea kaha fo, amani memanang tuti meminohi na mai. Mene mahikai tonina ne aino Sempaisi detora ne.

5 Weo na toninane, fafongfa wiwingno emararebanai tuti enemitawang Allai fosa emaranding ene taraifoi na fi tonana fo ambori enarisa emahikai. Tuti esomi we ene mangfosa.

6 Sarai kontaio ne tarai tonana, i somi we ne mangno Abrahami tuti sahui we ne mano fuba dine. Mea kontaio Sarai ne kamitung di mea, masino menari ne wetaraifo tuti wiro mematai mano enarikanggani mea fo kaha.

7 Tonanai kontai we mangwa mea, todoni kontaio menemitiuitafo mai we mene wiwingwasa, tuti menari suasa na mai tuti metatosa, weo ene mambiriufu wiro mai kariri mangnesa kaha, wape ea kontai ambori esobu fio Allai dohonai arora we mea fo, amani dohong mea metarang riati we fitawafa. Menari tonanai ambori fiea wedua mene nadiwai fanai.

* 2:22 Yesaya 53:9

Inontarai Kristeni ne esodai dadirafo we enari ne bengfo

⁸ Wefuiane mani, mea kiai todoni kontaio mene kaiwo boyari, menemituaitafo mai we mea, menemiwawu wawera mea toyari mambe-tahatui, mearomio inontarai siai, tuti menemirorong tewawa.

⁹ Inontarai enari ne karirafeai we mea ete eteikang-gani mea teaifa mani, wiro menari berahai wesa tonanai ahang fanai, mae todoni kontaio memoansa. Weo ne tonanane aino Allai sahu mea wea ne, ambori mesobu moanafo riati.

¹⁰ Weo kaiwofo dotu deyo,
“Mandoni dino deo minohi
darang na waroi
tuti deti ne bengfo na mi-
nohi toa fo mani,
wenani todoni kontaio
deitawang wedua ta-
perengfoi weru kaiwo
ariri karira fo,
tuti bororawafo weru
kaiwo tatofa fo.

¹¹ Kurutare ne karirafo tuti
niari ne bengfo;
todoni kontaio sera we
ne maifo tuti yurai we
sobuai.

¹² Weo Sempaisi urengfo
nayai pampang na
mano enemirorong
mesi fosa,
tuti tarangfo tifai de-
mang we ene nadifo,
wape dapa mano
enari ne karira
fosa.”*

¹³ Masino merurai we
menari ne bengfo mani,

mandoni kontaio wiro niari
ne karirafo we mea kaha.

¹⁴ Wape masino meso-
dai dadirafo we menari
masifo mani, mesobu mai
paria! Ampafe mandoni
kontaio memataiti fanai, tuti
mearomikuaya fanai.

¹⁵ Wape mesomi we Kris-
tusi tuti meroasoi we mene
Seng dine na menemiro-
rongwai. Tuti memaine-
nang pampang na rahida
neungne we meteisaharai
we mandoni kontai, andino
dutang mea we fianai aino
menemitarwanaia mutu wea
fo na mene meroasoaf.

¹⁶ Wape menari finanai
na mene kaiwo fanahang,
tuti metato inontarai siai,
tuti menemirorong katui
wai mirarebanai. Ambori
manei deikanggani mea
funomai, we meminohi na
mai Weinontarai meraria
Kristusi wa mani, wenani
ambori mimaya sua kaiwo
medurai funomai tonanai we
mea fo.

¹⁷ Weo masino mesodai
dadirafo we menari ne
bengfo tonanai, kariri Allai
ne dawiafo, nana mani fi
beng sewa paria fine. Tuti
finanai beng sewa weru
mesodai dadirafo we menari
ne karira fefo.

¹⁸ Weo Kristusi mireha
webeyari kawuru we tane
sasarinei, I mani Mano mesi
foi, mireha we inontarai
emasi kaha fosa. Niari to-
nanafo ambori wiwiaing tata
kia tata we Allai. Inontarai
emuni mirehafo na ne tarai
weinontarai batang fo, wape
suwi aha na Nuaninu Mi-

* 3:12 Masmuri 34:12-16

rarebana foi ne mambiriufoi.

¹⁹ Na Nuaninufoi ne mambiriufoi kontai da wiuwu kaiwo we nuaninu enai na aitamuo marareha rorong fo,

²⁰ amani nuaninu na inontaraio wiro etohong kariri Allai kahai na rabuang bo Noaki niari ne wafi nani fosa, amani mano eworu na mereha sufui nunei nanisa. Rabuang bonani Allai dohong aiboifo kaharai, mae sawani demang we etaraberasa, paria Noaki niari ne wafoia kiai. Mano enayai na wa rorong fo efau kaha, eweindeatoru ansaino ekaharai weru mereha sufui nunei nani ne.

²¹ Tuti merehao sufui nunei nani, ne tarai we fiywansoai kariri baptisi na mereha na fui ninai we feriri mea fo. Baptisi tonana nei, wiro menariri we ambori yuairurang rarikanei weru mene tarainei kaha, mae ne tarai we kaiwo areraio metohonai we Allai na menemirorong ketuio denteng wai. Baptisi nani feriri mea na Yesus Kristusi suwi na marareha rorong foi

²² tuti dautai to rorafaisi ampa. Ninaia mani wemananu na Allai warang domoya foi, tuti wewaifosa, mananu na doni konta fosa, tuti mambiri na doni konta fosa etisangkapa eawemibukafo kai esomi wei.

4

Inontarai eroasoa nesa mani, todoni kontaio eminohi toafo siai weru mano eroasoa kaha fosa

¹ Kristusi sodai dadirafo na ne taraifoi ampa, ampare mea kontai memainenang mene taraiwaia mitu na menemituai kariri Kristusi enetituaitafo, amani mesodai dadirafo kariri. Weo inontarai mano sodai dadirafo na ne taraifoi tonana mani, fiotourai weru sasarifoi ampa.

² Ampafe mene rahida metarang na nunei sea ninai wiro metohonai we menari kariri fi karira inontarainesa etawi wea fo fanai, mae we menari kariri fianai aino Allai dawi wea fo.

³ Weo rahida bitoya ampa na raminde nanai menari kariri fianai aino inontarai etaroanso Allai ete Yesusi kaha fosa enari fo ampa. Amani menari maninawa kerira foi, metohong kariri mene mepaingfo, memayeru pampang, menari muniara karira fo, metunung ye, tuti mesomi we aririwangno mandoni kontai wiro somi wei fanai fo.

⁴ Weo ninaia mani inontarai etaroanso Allai kaha nanisa, epapuhung we ewati menari karirisa ahang kaha fo, amani mehontai mehubaru mea na sasarifoi ahang kaha, tuti nanai wedaya eteibera mea paria.

⁵ Wape ea ambori etoari na Allai arongreafo ki, Mano meinanang kawurua we kitutu kaiwo kariri inontaraine tata foi, amani mano etarang fosa tuti emarareha fosa.

⁶ Nanai wedaya Kaiwo Mahikai fo wuwuai we inontaraio ninai emararehara fosa kontaia, ambori Allai kitutu kaiwo wesa kariri inon-

tarai nunei fosa, amani ene taraifoi mirehara, wape ambori enumianinufo etarang aha na Allai.*

*Fi Maio Allai dohona fo,
menari kaririai na wetarai*

⁷ Fi fuba nini kiai, katu mani wioru fine. Ampafe todoni kontaio menemituai mai tuti mewaitawang wedua mene taraiwai, ambori mewemambiriw we mewenadi we Sempaisi.

⁸ Fi reantenang pari foi mani, todoni kontaio menemiuwau wawera mea na tarai. Weo na menemiuwau tonana fo, mea kontai memainenang we meteiai inontarai siai ene sarawaio enari we mea fo.

⁹ Metamang wawera mea na mene munuwa, na wiro mehutu mea na menemiroongwa kaha.

¹⁰ Fi Mai Allai dohonai we mea fo,[†] mansiri-mansiri wau nari kaririai na mai we fata inontarai siai, amani mefata wawera mea kariri inontaraio metohong kariri Allai ne bengno dohonai arora we meara fo.

¹¹ Mandoni dino medu kaiwo mani, todoni kontaio enetituai we kaiwo medura fo toyari Allai mantauni medu na borongfoi. Mano fiata foi, todoni kontaio fiata na mambiriuo Allai dohona fo. Ambori na fifiani kontaio Yesus Kristusi wedaya inontarai efiai Allai. Meiri andino wemananu tuti tataparandini we fitawafa ne. Antu!

Kaiwo aunau we mano esodai dadira weo eweinontarai Kristenifo

¹² Doroi enehuwawu mea wa meaine! Mesodai dadira karira paria, wape dohona mesioi mea wea fanai, ne tarai toyari mesodai fi siai paria foi.

¹³ Mae, todoni kontaio mefaraise weo mesodai dadirofo ria Kristusi fefe. Ambori na rahida tawati Kristusi da na ne sambewaraio dadai fo ma mani, mafaraise fuba paria ki.

¹⁴ Inontaraifosa eteibera mea weo meru Kristusi wonongfo mani, memararisng paria, weo Nuaninu Dedai Sambewara foi, amani Allai Nuaninufoi, niayai na mea.

¹⁵ Dohonao mane wodai dadirafo we mung inontarai fe, ete we komananapi fe, ete nari fi karira siai fe, ete weo woro kaiwo fanai.

¹⁶ Wape masino wodai dadirafo we weKristenifo, nana mani dohona mumaya we finana fanai. Mae boparanding Allai we ka Kristusi wonongfo tonana fo.

¹⁷ Rahidafe mai ampa we Allai kiutu kaiwo kariri nunei to. Tuti Allai ne inontaraine saino kiutu kaiwo kariri fi sarawaio enari fo fafong ne. Masino tataino tane fafong Allai kiutu kaiwo kariri tata, nana mani mano wiro eroaso Kaiwo Mahikai kariri Kristusi fosa ambori etodonki?

¹⁸ Na kaiwofo dotu deyo,
“Masino dadira paria we

* ^{4:6} Atorai na 1 Korintusi robongno 15 mani, Allai dohongno ene tarai waworu fo wesa kontai ki. † ^{4:10} Nana mani Fi Mai toyari Fi Mai na 1 Korintusi 12 tuti 14.

inontarai enimiro-
rong mesi fosa esobu
faririfo,
tonana mani inontaraio
ene pari seng fosa tuti
inontarai sasari fosa
ambori esobu fiani
ki?"*

¹⁹ Ampafe, masino meso-
dai dadirafo we Allai dawiai
tonana, nana mani metaw-
ing mene taraifoi we Mano
samu mea tuti dohong kariri
ne kaiwofo na mai foi, tuti
menari ne bengfo pampang.

5

*Kaiwo aunau we mano
ewenunggamiae we jemati
fosa*

¹ We mano mewe-
nunggamieie we jematiwa
mea, yevo meuremifo nayai
na nehu kaiwo imadurai we
mea mau nina. Yau kontai
iwenunggamieie kontai we
jematinei kariri mea, tuti
mantaung yau yeti terai
na urehune we Kristusi
sodai dadirafo. Yau kontai
ambori isobu Kristusi ne
sambewarao dedai foi na
rahida Allai deinawiai we
inontarainesa foi ki. Yenggoa
mea yevo,

² mewaitawang wedua
Allai ne inontaraio enayai
na mewaramirorongwa na
mai, kariri mantahungno
deitawang wedua ne fi-
ahungfosa na mai fo.
Mewaitawang weduasa na
menemirorong mirising
kariri Allai ne dawiafo,
wiro menarisa na meuremi
marira fanai. Tuti wiro
menari we meuremi fiabai

we ra fanai, mae finanai
menari na meuremi maya.

³ Dohonao menarisa na
tapapa toyari mewemam-
baiseng we merusa fanai,
mae merurai we mewefi-
ainawiai we mano mewe-
mantahung wesa nani sa.

⁴ Ambori rahida Mantahung
Dedai pari foi da
ma mani, mesobu sapewi
mananu kia sambewara foi,
amanu sambewarai dedaio
wiro kai na ea kaha fo.

⁵ Tonanai kontai we mano
mewebariboi wa mea, me-
somu we mano ewewawara
fosa. Mea kiai todoni kon-
taio menari sua wawera mea
na menemirorong tewawa.
Weo,

"Allai dapa inontaraio ene-
mirorong dedai fosa,
wape dohong ne bengfo
arora we inontaraio
enemirorong tewawa
fosa."*

⁶ Ampafe menari meara
metawawa na Allai mano
wemambiriou foi arongreafu,
ambori tete ne rahidao
dereria foi mani, yuai meara
metadai.

⁷ Kontai fianai aino
mearomikuai wea wa,
metawinai kai we Allai, we
meiri andino deti we mea ne.

⁸ Todoni kontaio mewait-
awang wedua mene taraiwai
tuti metanansiau! Weo
Saminseni, mene aitetafoi,
da sera we inontarai ne
tarai toyari singao da wariai
mae bibe sera we fidang.

⁹ Metapai na mene meroa-
soaia mutu wa, weo mewait-
awanai we mene doroi
inontarai Kristen nesa kiai
na nunei sentenang esodai

* 4:18 Amsali 11:31 * 5:5 Amsali 3:34

dadirafa kariri mea kontai tonina.

¹⁰ Dadira mesodairai ninai
wiro mesodairai waroi kaha,
akawuru wori Allai, mano
dohong ne bengfo arora
fo tuti sahu mea we ne
sambewaraio dedai da we
fitawafa, mantauni ambori
dohong mea menumiruainso
ne bengfo aha ki. I ambori
niari mene meroasoawara
mutu aha, niari menemiro-
rongwaia mitu tuti niari mea
metawang meara mutu na
meroasoawa.

¹¹ Fiaifeai we I! Andino
wemananu we fitawafa ne!
Antu!

*Petrusi kife ne kaiwone
tuti denatu mahikai wesa*

¹² Nehu kaiwo anatu
tanang ninai, Silasi* fiata
yau soi. Silasi nini yetori we
doroi iroasoi dine. Yohong
weai paria we ifata mea
ambori menemirorongwai
mitubaru aha, tuti imadu
we mea na iroasoai paria
we fianai aino isoi ninai,
kaiwo wetarai kariri Allai
ne bengno dohonai arora
fo fine. Todoni kontaio
metoaria mutu na ne beng
nanai.

¹³ Maniwowirio jemati na
Babiloni† nesa, amani jemati
Allai dirisa kontaia fosa,
etanatu mahikai we mea;
tonanai kontai Markusi nehu
kaisungnei.

¹⁴ Metohong mahikai waw-
era mea na menemiwawu
wawera mea toyari inontarai
Kristeni.

Kadono Sempaisi wedaya
mea, mano meweboyari ria

Kristusi wa mea, menumiru-
ainso ne maifo.

* ^{5:12} Ahui kontai we Silwanusi. † ^{5:13} Babiloni mani, kaiwo neta weai we
bendari Roma.

Kaiwo Anatu Bo Boru Na Petrusi

Kaiwo dedung we 2 Petrusi

Kaiwo anatu weberu Petrusi denatuai ninai dohonai we inontarai ewe Kristen fosa kiai. Soi kaiwo anatu fe ninai, reantenang mani we dapa mantaunau tarai kaha fosa fi sarawaio etaunauwa fo. Kontai we dirapa fi karira ene aunau sarawai tonana fo wedaya inontarai enari fo. Ampafe Petrusi soi kaiwone we deunau inontarai Kristen nanisa we todoni kontao erutawang aunau wetarai kariri Allai tuti Yesus Kristusi foa mutu, amani aunauo mano ewatiao tuti etarami te Yesusi we deunafo ene kaiwo etaunauwaifa fo.

Kaiwo fuba dohong Petrusi arokuayai pari wea mani, inontarai nanisa etaunau eteyo, Kristusi wiro daraberahi to nunei aha ma kaha. Ampafe na kaiwone Petrusi deisaharai wesa, we Kristusi daraberahi to nunei ma rai, wape I miaya we inontaraine manei sodai ne karirafo kaha, ampafe fioukiri demang we ambori inontaraine esobu rahida we etaraberasa weru ene sasarifoi, akawuru wori da ma we feriri mano eroasoi fosa tuti dohong aiboi we mano eroasoi kaha fosa ki.

Kaiwone deto kutuai tonina:

1:1-2 Kaiwo mahikai tuti moanai.

1:3-21 Todoni Allai sahu ne inontarai Kristen fosa fo.

2:1-22 Kaiwo kariri mantaunau tarai kaha fosa.

3:1-18 Kaiwo kariri todoni Yesus Kristusi daraberahi aha ma fo.

Mahikaifea

¹ Weo doroi mea, mano Yesus Kristusi, amani Allai tuti tane Mamparirifoi, dohong roasoao mahikai sewa fo we mea, na ne enerorong mesi foi, mai kariri dohonai we rasuline amea kiai ne.

Kaiwo anatu ninai na yau Simon Petrusi, Yesusi Kristusi ne woming tuti ne rasuline yau.

² Kadono, na metaroangno Allai tuti Yesusi, tane Sengfoi nanai, Allai dohong ne bengfo arora we mea paria tuti wedaya mea menumiruainso ne maifo paria.

Aunau kariri todoni taminohi weinontaraio Sempaisi sahu tata tuti diri tata fo

³ Allai dohong fi kiaio tathong wea fo we tata, ambori taminohi taenemirorongnei mesi tuti tawemambiri we taweinontarai Kristen mesi fo. Niari tonanai na ne mambiri we Seng foi tuti weo tataroansoi fefe. I sahu tata we ambori tata mani ne inontarai tera di tata, tuti weo ne enerorong denteng tuti ne sambewaraio dedai fo.

⁴ Na rang tonana ne, dohong moanaio dererai we dohonai we tatara foi, amani moanaio dadai tuti mahikai pari fo. Ambori na moana nanai, wedaya mekaharai

weru menemirorong wesasari dohong we ne karira fo, amani karirao ambori wedaya nunei kerira aha tuti wioru, tuti moanai nanai wedaya ambori mene tarai kariri Allai aha.

⁵ Nanai wedaya na meroasoia mutu fo, todoni kontaio merurai mantaung we menemirorong denteng kontai, tuti na menemirorong denteng nanai ne menari konta mani merurai we mewaitawang kariri todoni metaroanso Allai,

⁶ tuti na mewaitawang tonana fo ne menari konta mani merurai we mewaitawang wedua mene taraiwai we fifiani kontai, na finanai ne menari konta mani metawang meara mutu, tuti na metawang meara mutu fo ne menari konta mani meminohi mai weinontarai Kristen.

⁷ Tuti na meminohi mai weinontarai Kristen nanai, ne menari konta mani merurai we menemiwawu mene doroio meroasoai ruhia fosa, tuti na menemiwawusafo ne menari konta mani merurai we menemiwawu mandoni kontai.

⁸ Weo masino mene tarai tonanai, tuti rahida neungne mene tarai tonanai pari aha mani, nanai wedaya mea, na metaroanso Yesus Kristusi tane Sengfoi, fianai menari wa wiro funoma kaha tuti fi meru wa wetarai ki.

⁹ Wape inontarai mano wiro ne tarai tonana foi kaha, wenani toyari weurengfafa wiro deti waroi kaha, tuti aroporohai we Allai saraira ne sasari fafong fo werui

ampa.

¹⁰ Ampafe, doroi meaine, merurai mamboni paria na metohong toa wa ambori wefiainawiai we tarai inontarai Allai diri mea tuti sahu mea di mea. Weo menari ne tonanane mani, wiro metawai ahang kaha.

¹¹ Tuti na menari tonanane, Allai ambori fiai rahutu doa arora we mea ambori werang we mesuai to Sempaisi tuti tane Mananu Mampariri Yesus Kristusi ne Mananu rorongno watai wenumainufo ki.

Amewati te ne wetaraifo na ameuremine tuti nabifafongfosa etaiririai kontai

¹² Ampafe irurai we yeo yeretitawang mea we fi kiai nani aha. Finanai mewaitawanai ampa tuti metoaria mutu na meroasoai we fi wetarai fine ampa, wape yeo yeretawang mea tonanai aha.

¹³ Na iminohi yarang feninai, enehutituai mai we yeretawang mea toninai ambori mearomioai.

¹⁴ Weo yeitawanai we waroi ahang kahai mae ambori ira weru nunei rai, mai kariri tane Sengno Yesus Kristusi deinawiaia kasau we yaua fo.

¹⁵ Ampafe irurai we ambori awao imereha kontaio fianai aino yeretawang mea weai ninai mearomioai pam-pang.

¹⁶ Rabuang bo amehorang kariri Seng Yesus Kristusi ne da ma fo tuti ne mambiriu fuba fo we mea fo, wiro ameboromifo beinseng

kariri inontarai siai fosa we etairiri fiamio wetarai kahaio mantaunsa ewuwua fo kaha. Mae ametaisaharai we mea tonanafo, kariri ne Mananuo amewati terai na ameuremine fo.

¹⁷ Weo rabuang bo Dai Allai deparandini foi mani antonayai na wanai kontai. Rabuang bonani Mananu Sambewara Dedai foi medu wei meu deyo, "Nehu Kaisungno enehuwawuti fi dinini, andino kia enehuroong fine."*

¹⁸ Mantaung antoru antaramio rawafui nani dotu na rorafaisi meu, na rahida antonayai na uai mirarebana foi na wanai riati fo.

¹⁹ Tuti ffainawiai nani wedaya Allai ne kaiwo dohonaifa nabifosa emadura fo, taroaso kanggunai pari aha. Kaiwo nanai denteng we mea we meuremifo nayai nai pampang, weo kaiwo nanai ne tarai toyari padamarangno sambewarai na mamantitifo. Metarara kaiwo nanai pariao Seng Yesusi daraberahi tuti mewati pari. Ne da aha ma fo ambori ne tarai toyari ahafoi tiabaurai, tuti toyari Amparifoi dautai sambewarai na menemirorongwai.

²⁰ Fi fuba pari we mewaitawana mani, kaiwo nabi fafong fosa esobuai we esoi na Allai ne Kaiwofo mani, wiro weneung na mantaunsa enemittiuatafo kaha.

²¹ Weo Allai ne Kaiwo dohonai we nabifosa fo, wiro inontaraine manei niariri na mantauni ne dawiafo

kaha rai. Wape Nuaninu Mirarebana foi sensonisa wedayasa emadu te kaiwo na Allai fo.

2

Mantaunau tarai kaha fosa tuti fi karira ambori esobuaf

¹ Wapefafongfa nabi wetarai kaha fosa enayai rahang inontarai Israeli fosa kontai, tonanai kontai we mea, mantaunau wetarai kaha fosa ambori era mau enayai rahang mea ki. Ambori eha aunau wetarai kaha fo na mamunggasai, amani aunau karirao kia marareha we inontarainesa foi. Tutieetiaya tane Mananuo feririsa nei, tuti na tonanane, wedaya aiboifo na tantuma we mantaunsa aha ambori eworu.

² Tuti inontarai Kristeni bitoya etau wesa tuti ene maninawa kerira foi. Tutieenari toa fo wedaya kaiwasa siai eteibera Rang Wetarai foi.

³ Mantaunaufosa euremi fiabai we doi, wedaya etairiri fiami wetarai kahaio mantaunsa enariri we esera we esobu mene ra nayai. Mano kiutu kaiwo wesa tuti dohong aiboifo wesa foi, urengfo nayai nasa waroi ampa, tuti aiboifo we miunsara eworu fo wiro damang ahang kaha.

⁴ Weo, wewai mano etohong sasari fosa wiro Allai sawinsa ekaharai weru aiboifo kaha, mae yusa sosa to fino mamantiti na kamirei Soroha rorong foi aweu

* **1:17** Matiusi 17:5; Markusi 9:7; Lukasi 9:35

enayai nai paria rahida kiutu kaiwo kariri nunei fo.

⁵ Tonanai kontai na nu bo fafong nani, Allai wiro sawini kiahrai weru ai-boifo kaha. Mae dohong foa fiabai foi meu sufoi nunei kia kaiwasa eharira fosa. Wape Noaki tuti ne inontarai itu fo, ansaino ekaharai weru aiboi nani ne. Noaki mani deiriri kariri todoni ohong kariri Allai na enemirorong mesi fo.

⁶ Tuti kariri bendari Sodomi tuti Gomorai kontai; Allai dohong adiafoi biari meu we kaso bendari nani suru, ambori wefainawiae we inontarainesa kariri fianai aino ambori inontarai etaroanso Sempaisi kaha fosa esobua fo.

⁷ Rabuang bonani Loti meiri andino kiahrai weru aiboi tonana foi ne. I inontarai enerorong mesi dine tuti enerorongfoi disani paria we inontarai sasari fosa ene karira enari fo.

⁸ Weo Loti inontarai enerorong mesi nini, minohi rahang inontarai ewesasari nanisa tuti etohoni enerorong pirahai paria. Weo rahida neungne detisa enari sasarifo pampang, tuti tarao ene karira enari fo pampang fefe.

⁹ Ampafe kasau ampa we Sempaisi deitawang kariri todoni feriri inontaraio etohong kariri ne dawia fosa weru dadira fuba esodaira foi. Tuti deitawang kariri todoni tefu inontarai sasari fosa tuti yutawansa ambori esobu aiboi paria rahida kiutu kaiwo kariri nunei nai fo.

¹⁰ Reantenang we inontarai mano enemirorong wesasario dohong we enari kariri ene epaingfo, tuti enemirireu mano Allai yuaisa we ewenunggamie we erusa na nunei fosa.

Inontarai nanisa ebiriu tuti enumi mitubaru we enari ne karirafo tonanai, doni fidarang na Waidanio emararebana fosa kontaio wiro etousa kahai, mae eteiberasa kontai nina.

¹¹ Enari tonanai, wape wewaio ewemambiriu tuti ewemananu weru inontarai karira nanisa fosa kontaio, wiro ebiriu we etinggai fidarang nanisa na kaiwo oiberaha fea na Sempaisi arongreaflo kaha.

¹² Wape inontarai nanisa esayewa paria tuti eteibera fio ewaitawana kaha fo. Ene tarai toyari andowa saubau-nung we tafuri tuti muni tera foi. Ene pari enemitituaitai, eserawawerahai paria, tuti eworu rai, mai kariri andowa emamuna fosa ki.

¹³ Fi ambori esobuai we fiembaitai na ne karira enari fo nana mani, ambori esobu dadirafo ki.

Ea mani fio enemirorongfoi dohong weai tuti enumiruainso mahikai paria wesa mani, enari ne karira pari fo, tuti nanai wiro na diru tera kaha, mae kontai kasau na rahidafo. Ea mani ene tarai toyari rarika kerira tuti toyari anang kuru saha ireu biua. Mefanduhi we metampi ruhia mani, eminohi etampi rahang mea kontai, mae enemirorong siai weo euremi nai na

mantaunsa enimirorong
karira foi dohong wea fo.

¹⁴ Fi euremifo niai nai pam-pang mani, ewati we wiwing siai esefang na maninawa foi sa, tuti wiro efotou weru enari ene sasarifo kahai paria. Inontarai mano ero-soai mitubaru kaharai fosa ewawora enimirorongfoi ambori etoari mutu ahang kaha tuti etau we sasarifo. Esawai paria na esera we fi toyari ra wesa fo. Ea mani inontaraio Allai dohong aiboi paria wesa saine.

¹⁵ Era weru rang mi-moya foi tuti era sarawaia. Era kariri rangno Beori antungno Bileami dai nafafongfa foi. Bileami nini nabi dine, dohong weai paria we sobu doi bitoya na fi kerira niariri foi.

¹⁶ Wape Allai suari we ne karira niari nanai na tapapa paria, amani ne keledaifoi, borotamu toyari andowa siai fosa mae, medu toyari in-ontarai wei, we ambori fiotourai weru ne bonggoifo.*

¹⁷ Mantaunau nanisa mani ene tarai toyari mereha urengno unumi wape sir-arangna, tuti ne tarai toyari kafafe wanang fiabai foi sipari, wiro wedaya metang kaha. Allai meineng kataio memantiti paria bei wesa ampa.

¹⁸ Weo eboromi fiabai etaparanding funong kaiwo wetarai kaha tuti eweanggari inontarai ambori etohong kariri enimirorong wesasari

fo dohong wea fo, kariri ene epaingfo. Eweanggari mano arahio ekaharai era weru etohong kariri aunau karira fo.

¹⁹ Emadu we mano etau wesa fosa, etarerai wesa am-bori eweinontarai ehasau, etohong kaiwo tonanai mae mantaunsa mani wiro ehasau kaha mae ewe-woming we fi kerira enari pampang fo. Weo fianai aino wedaya manei sawai weai mani, wenani wewoming we finanai.

²⁰ Karira paria wesa! Weo raminde nanai etaroanso tane Seng Yesus Kristusi, amani tane Mamparirifoi, donio na i ekaharai weru nunei tuti ne karirafo ampa. Wape ninaya mani etaukaha nari ne karirafo aha tuti nunei weworasa na ne kari-rafo aha, pariao kiraikobusa ampa. Nana mani esobu ne karira sewa fo aha weru nefafong esobuaia fo.

²¹ Ampafe mahikai sewa mani, wiro etaroanso rang wetarai na Allai na wea kaha. Weo etaroansoia wape mayeai ehurumitare Allai ne Kaiwo Mirarebanaio dohoni wesara fo. Ne nanai karira sewa pari aha ne.

²² Inontarai nanisa kaiwo netawéai ninai wetarai karirisa ampa, amani:

“Fiawerafoi daraberahi we dang nari ne mamutafoi aha,”*

tuti “Fiaio mirarebanaia wape daraberahi aha we riroyari na wodanafoi.”

* 2:16 Bilangan 22:4-35 * 2:22 Amsali 26:11

3

Rahida Sempaisi daraberahi nai aha ma foi

¹ Doroi enehuwawu mea wa meaine, nehu kaiwo anatu yenatua weberua fininai we mea. Na nehu kaiwo anatu beru ne yeretawang mea ambori mearomio au-nau wetarai fo tuti ambori merurai we menemitu-aitawa mai, wiro menemiti-tuai sarawa kaha.

² Yeo mearomio kaiwo raminde nabi emararebana fosa emaduraia nanai tuti kaiwo Sempaisi, tane Mam-paririfo, dohonai ria rasuli-fosa we metohong kariria fo.

³ Reantenang mani mewaitawanai we na rahida wefuiai ninai, ambori inontarai eteiberaha fosa etariai, etohong kariri enemirorong wesasari foi eteibera mea ki.

⁴ Ambori ehikaya mea eteyo, "Sempaisi dererai we ambori da ma ki, ampare andi doni? Tane werengfosa emarareha ampa tuti wiro wati fi siai fea kawaria kaha rai. Fi kiai nini mesi ne tarai kariri reantenang pari Allai niari nunei fo paria sobu ninai."

⁵ Inontarai nanisa enari we wiro earomio fi Allai niari fo kaha, amani fafong pari fo samu roranei tuti nunei na ne kaiwofo terai. Tutu na ne kaiwofo ne mambiriufu niari nunei supa meai nano rawanangfoi tuti siai weru rawanangfoi.

⁶ Na mereha nani kontai Al-lai niari nu bo fafong nania wioru, amani na mereha foa fiabai foi.

⁷ Wape rorafaisi tuti nu bonini, Allai derarati na ne kaiwo nani kontai, we ambori niunumi na adiafoi. Nina mani, rorafaisi tuti nunei Allai derarati paria sobu rahida bo daraberahi we dohong aiboifo tuti miungno inontarai enari ne karira fosa foi.

⁸ Wape doroio enehuwawu mea wa meaine, fi beyari nina mani wiro mearomi-poroha fanai, amani na Sempaisi urengreafu rahida boyari mai kariri defuina piaura wering fo (1.000), tuti defuina piaura wering fo mai kariri rahida boyari kawuru.

⁹ Manea enemituai Sempaisi sikahera dohong kariri ne kaiwo derera fo kaha, wape sikahera dohong kariria rai! Tonanai ki, wape sawani we mea, we miaya we dohonao mane wodai ne karirifo fanai, mae enerorong we ambori kaiwasa fuba nini kiai esobu rahida we etaraberasa weru ene sasarifoi.

¹⁰ Wape rahida Sempaisi da nai ma foi ne tarai toyari weda we kiamananapi. Na rahida bonani rorafaisi ambori niai, wedaya fidotu fibabai tuti fi kiai na rorafaisi adia kasoa wioru, tuti nunei tuti fi kiai niayai nai foi kontai wioru ki.

¹¹ Ampafe masino finini kiai ambori wioru tonanafo mani, mea kontai metitua kariri todoni meminohifo. Todoni kontaio meminohifo memararebanai tuti meminohifo we Allai terai,

¹² na rahida metamang tuti menemirorong dohong

we Allai ne rahidafoi fo. Na rahida bonani ambori adia kaso rorafaisi kiai, tuti ne meninggaponifo wedaya fi kiai niayai na rorafaisi wioru ki.

¹³ Wape tata mani tata-mang we rora weworu tuti nu weworu mai kariri Allai dereria foi, amani kataio Allai ne inontaraine kiai eminohi na enemirorong mesi foi.

Petrusi kife ne kaiwo anatu nei

¹⁴ Tonana mani, doroi enehuwawu mea wa meaine, na metamang we rahida bonani fo ninai, merurai na antu paria we memararebanai na Allai urengreafo. Merurai ambori Allai sobu fi sarawa kuteai na mea kaha, tuti meminohi na mai riati.

¹⁵ Menemitituaitai we Sempaisi ne sawani nanai, we rahida we mea we ambori mesobu faririfo. Paulusi, tane doroi taenemiwawuti foi soi fininai kontai we mea ampa. Soi finanafo na awaio Allai dohonai wei fo.

¹⁶ Na ne kaiwo anatu fo kai soi kariri finanai pam-pang. Tarai fi soi fo weai kontai dadira paria we tatafurai. Tuti kaiwo nanai mano eroa-soaia mutu kahai tuti ewebonggoi fosa, ebari wawer-ahai aha, mai kariri enari kanggani kaiwo siai wei fo na Kaiwo Mararebana fo konta fo. Fi enari tonana fo wedaya mantaunsa eworu.

¹⁷ Wape, doroi enehuwawu mea wa, mea mani, mewait-awang kariri finanai ampa, ampare metanansiau, do-honao inontaraio eteiaya

hukumi fosa eha we men-emirorongwai ewedaya metawai weru katai mutubaruo metoari naya fo fe.

¹⁸ Wape rahida neungne merurai we mewaitawang ne bengno Yesusi Kristusi tane Sempaisi tuti Mamparirifoi dohona fo pari aha. Todoni kontaio metaroansoi na mai pari aha. I mani todoni kontai tataparandini, na ninai tuti paria sobu fitawafa! Antu!

Kaiwo Anatu Reantenang Na Yohanesi

Kaiwo dedung we 1 Yohanesi

Na suratinei Yohanesi soi kariri fi beru we inontarai eroasoa fosa. Fi reantenang mani, soi kariri inontaraio etaunau kaiwo mai kaha fosa. Etaunau we Yesusi mani wiro Mananu Mampariri da to nunei ma Weinontarai batang kaha, mae da wenuaninu terai.

Deretawansa we wiro era riasi tuti etohong kariri ene aunaufu fanai. Weo nana mani ambori wedaya eroaso Mananu Kristusi ahang kahai ki. Yohanesi deikiririai wesa kariri todoni deti te Yesusi tuti yu teri na warangfo kontai, tuti deikiririai we Yesusi Kristusi da Weinontarai batang tarai ma.

Fi beru soi kontaifa mani, deretawanai we ambori inontarai eroasoa fosa enemiwawu wawerasa tuti eweboyari ria Allai tuti ne Kaisungno Yesusi Kristusi.

Kaiwo na suratinei deto kutuai tonina:

1:1-4 Kaiwo reantenang.

1:5-2:29 Sambewarai tuti mamantiti.

3:1-24 Arikang Allai fosa tuti arikang Saminseni fosa.

4:1-6 Ne wetaraifo tuti ne sarawafo.

4:7-21 Fi kariri todoni enemiwawu waweraha fo.

5:1-21 Inontarai yoaso Allai tarai foi ambori sobu numainufo.

Kaiwo kariri Seng Yesus Kristusi mano darang wefitawafa foi

¹ Itoi kaiwone we mea kariri mano niayai kawuru na reantenang pari foa foi, amani mano ametaramioi terai we medu, mano amewatioi terai na ameureminei, mano mantaung amea amesairi terai tuti ameru teri na amewaramine. I mani, Yesus Kristusi dine, mano ahui we Kaiwoariri deinawiai we tata todoni tatarang na tarai, amani taminohi kariri Allai ne dawiafo.

² Allai deinawi mano dohong inontaraine tata tatarang foi we amea, tuti amewatioi, ampefe amemadurai tuti amewuwuwe we mea weo mano amewatioi foi mani, mano darang ao werea na wea kaha foi dine. I mani weriria Dai Allai tuti Allai deinawi we amea.

³ Amewuwu kaiwoariri kariri mantauni, mano amewatioi tuti ametaramioi nani we mea, ambori meweboyari ria amea ki. Kontai tata mani, taweboyari ria Dai Allai tuti ne Kaisungno Yesusi Kristusi.

⁴ Kariri finanai kiai ametoi kaiwonei we mea mau, ambori taenemirorongnei mirising beyari.

Todoni kontai tamarebanai, weo Allai yuai rurang tane sasarifi ampa

⁵ Amemadurai tarai we mea kariri kaiwo ametaramioi ria Yesus Kristusia fo, amani: Allai mani Sambewara dine. Wiro mamantiti kuteai nai na I kaha, nana mani neo fi sarawa kuteai konta kaha.

⁶ Masino tamadu tateyo taweboyari riat, wape tanayai na manantiti rorong fo, nana mani taweanggari, tanari sasari pampang tuti tanari fi wetarai fo kaha.

⁷ Wape masino tanayai na sambewara rorong fo ne tarai kariri Allai we niayai na sambewara rorong fe fo, nana mani taminohi wau taweboyari, tuti Allai ne Kaisungno Yesusi yuai rurang tata weru tane sasarinei kiai na ne rikao tiwowu we tata foi.

⁸ Masino tateyo tanari sasari kaha, nana mani tatatofa bera mantaung tata tuti kaiwo wetarai na Allai fo niayai na tata kaha.

⁹ Mae tateiairai we tato-hong sasari, nana mani am-bori dohong kariri ne kaiwo arera fo we tata tuti niari ne maifo, amani deiai tane sasarinei tuti yuai rurang tata weru fi sarawai kiaio tanari fo.

¹⁰ Wape tateyo tato-hong pari sasari, nana mani toyari tateyo Allai pempamu, tuti wiro tasoni ne Kaiwofo na taenemirorongnei kaha.

2

Yesusi feriri tata ampafe tanari kariri Allai ne Kaiwofo

¹ Nehu arikang enehuwawu mea wa meaine, itoi kaiwone we mea mau we yeretawang mea am-bori menari sasari fanai. Wape masino mane nari sasari mani, tane mangfata mansiari, andino medu pampang tuti tata na Dai Allai arongreafo ne, amani

Yesus Kristusi. I mani mano mesi paria dine.

² Andino mireha we feriri tata ambori Allai deiai tane sasarinei. Tuti wiro tameiri tata kaha, mae kaiwasa fuba nunei kiai ne sasarinei kontai.

³ Tato-hong kariri Seng Allai ne kaiwo pondoia fo mani deinawiaifa we tataroani finana.

⁴ Ampafe mandoni dino medu deyo, "Yeroanso Allai," wape wiro dohong kariri ne kaiwo pondoia fo kaha mani, inontarai nani pem-pamu tuti Allai ne kaiwo wetarai medura fo niayai nai kaha.

⁵ Wape mandoni dino do-hong kariri ne kaiwo medura fo na mai mani, wenani enewawu Allai na mai, kariri Allai enewawu tata. Na tonanane tawaitawanai we taweboyari ria Allai finana.

⁶ Mandoni dino deyo weboyari ria Allai mani todoni kontaio da kariri Kristusi, mano dohong kariri fi tamurai medura fo, ne wawua sahara fo.

Taenemiawu wawera tata weo tanayai na sambe-wara rorong ne fefe

⁷ Maniwowirio enehuwawu mea wa meaine, kaiwo itoi mau we ohong kariria ninai, amani kariri menemiawu wawera mea, wiro kaiwo waworu arahio metarami tantumurai nina kaha. Mae kaiwo nanai waroia metaramioai ampa, amani na reantenang meroaso Kristusi fo.

8 Tonanai ki, wape kaiwo itoi mau ninai waworu kontai, we ne wetaraifo watioai na Kristusi mantauni tuti na mea. Weo na metohong kaririai nanai mamantitifi niai ampa tuti sambewarai tarai fi sambewarai kawuru ampa.

9 Ampafe mandoni dino deyo niayai na sambewarai rorong fo, wape enerireu ne doroifoi mani, wenani niayai na mamantiti rorong fo nendai.

10 Mae mandoni dino enewawu ne doroifoi mani, niayai na sambewarai rorong fo tuti wedayari sawai to sasari rorong fo kaha.

11 Wape mano enerireu ne doroifoi mani niayai na mantanti rorong fo tuti ne tarai toyari da na manantiti rorong fo ampafe serawera datoai, pariao sodai karira, weo deitawangno Yesusi ne au-naupo kaha fefe.

Itoi we mea weo Allai yuai rurang mene sasariwai tuti weo meteiaya Saminseni fefe

12 Itoi we nehu arikang enehuwawu mea wa mea, weo na Kristusi wonongfo, Allai deiai mene sasariwai ampa.

13 Itoi we Dai mea, weo metaroanso Yesusi, mano niayai kawuru na reantennang pari foia foi.

Itoi we bariboaiwa mea, we meharai kibu Saminseni, metoaria mutu.

Itoi we nehu arikang enehuwawu mea wa mea,

weo metaroanso Dai Al-lai ampa.

14 Itoi we Dai mea, weo metaroanso Yesusi, mano niayai kawuru na reantennang pari foia foi.

Itoi we bariboaiwa mea, weo mewemambiri na mene meroasoawa, tuti Allai ne Kai-wone nayai na menemirorong-wai, tuti meharai kibu Saminseni.

Menemirorongwai dohong we finunei fanai

15 Dohonao menemirorongwai dohong we nunei tuti fi kerira niai nai foi fanai, weo mandoni dino enewawu nunei mani, enewawu Dai kaha.

16 Weo fianggeng fuba na nunei, amani fi inontarai eharira fosa enemirorong dohong wea fo, fio euremifo nayai nai fo, tuti todoni efiai berasa tuti ene fianggengfoi, finanai kiai wiro na Dai ma kaha, mae na nunei.

17 Tutio nunei, kontai fi fuba inontaraine enemirorong dohong wea fo, ambori wioru ki. Wape inontarai mano etohong kariri Allai ne dawiafo, ea mani eminohi wenumainu.

Fi kariri Kristusi ne atitetafosa tuti ene aunau wetarai kaha fo

18 Arikang enehuwawu mea wa meaine, rahida nunei werea nai fi kikeu ampa. Tuti metaramioai kawuru ampa we inontarai mano weaiteta fuba we

Kristusi nei ambori da ma ki. Kontai ninaia mani inontarai efau eweaiteta we Kristusi era kawuru ma ne. Finanai kiai deinawiai we rahidafe kikeu ampa.

¹⁹ Mano eweaiteta we Kristusi nanisa mani, raminde nanai ehontai tata, wape ninaia mani era to boriai weru tata ampa, weo enemirorongfoi wiro weboyari ria tata tarai kaha. Eweboyari ria tata tarai fea reti wiro era to boriai weru tata kahai ki. Wape, na tonanane deinawiaia kasau we na ea mani, mansiari kontaio wiro weboyari ria tata tarai kaha.

²⁰ Wape mea mene tarai toyari ea kaha, mae mea kiai Allai sensoni mea na Nuaninu Mirarebana fi ampa, amani mesobuai ria Yesusi mano mirarebana foi. Nanai wedaya metaroanso aunau wetarai fenina na menemirorongwai.

²¹ Itoi kaiwone we mea mau ninai weo mewaitawang Allai ne kaiwo wetarai kariri Yesusi fo ampa, wiro meserawaweraha kaha. Tuti mewaitawanaifa kontai we kaiwo tatofa fo kuteai kontaio wiro obuai na aunau wetarai na Allai fo kaha.

²² Yeisaharai we mea aha, kariri mano eweaiteta we Kristusi nanisa, mano etatofa biriu nesa mani, mano eteyo Yesusi wiro Mananu Mampariri Allai dereri fi dine kaha. Inontarai tonana nesa mani eweaiteta we Kristusi, efafora Dai Allai tuti eteyo Yesus Kristusi wiro Allai ne Kaisungfi dine kaha.

²³ Weo mandoni dino fe-

fora ne Kaisungfoi mani wiro weboyari ria Dai kaha. Mae mandoni dino yoa we Yesusi mani Allai ne Kaisung dine, nana mani weboyari ria Dai Allai kontai.

²⁴ Ampafe fianai aino metaramioai na reantennangfo, kariri todoni mesobu mai we meroaso Kristusi wa, metararatai nariai na menemirorongwai. Weo kaiwo nanai nayaia mutu na menemirorongwai mani, meweboyari ria Kaisungfoi tuti ria Dai Allai.

²⁵ Tuti kaiwo dereraio mantauni deretawani we tata fo, amani taminohi tatarang wenumainu.

²⁶ Itoi kaiwo ninai kiai we mea, we yeretawang mea kariri inontarai erurai we etatofa mea, eteyo Yesusi wiro Mananu Kristusi dine fo kaha, ambori metau wesa fosa.

²⁷ Wape we mea mani, Kristusi sensoni mea na Nuaninu Mirarebana fi ampa tuti Nuaninu Mirarebanai nani niayai pampang na meawa, ampafe wepararu inontarai siai etaunau mea ahang kaha. Weo Allai ne Nuanunu Mirarebana foi deunau mea kariri fifiani kontai. Tuti ne kaiwo nanai kaiwo wetarai fine, wiro sofa kaha. Ampafe todoni kontaio metohong kaririai, amani meweboyari ria Kristusi.

Meweboyari ria Yesusi ambori memamaya na rahida daraberahi ma foi kaha

²⁸ Ampafe arikang enehuwawau mea wa meaine, meweboyari ria Kristusi

pampang, ambori daraberahi aha ma mani, wiro tamatai tatadiwa kaha, mae tatoari na arongreafo na tamamaya kaha.

²⁹ Masino mewaitawanai we Allai mani mesi, nana mani mewaitawanai kontai we mandoni dino niari ne maifo mani, Allai yiwang enerongfoia weworu ampa.

3

Allai ne arikang di mea, ampare dohonao mera ria mano eweanggari mea we menari sasari fosafe

¹ Allai enewawu tata paria, wiro tatatoafonsoa kaha. Enewawu tata tonanai doni sahu tata we ne arikang. Tuti tarai, tata mani ne arikang di tata! Wape kaiwasa nunei wiro etaroanso tata we Allai ne arikang di tata kaha, weo wiro etaroanso Allai kaha fefe.

² Ampefe maniwowirio enehuwawu mea wa meaine, na ninaifa tawaitawanai we tata mani Allai ne arikang di tata. Wape tawaitawang turu tane tarai toa fo na rahida fuiwana kaharai. Tonanai ki, wape tawaitawanaifa we Kristusi daraberahi aha ma mani, ambori tane tarai kariri mantauni ki, weo na rahida bonani tawati teri na tauremireane. Ninaia mani tawatioi kaha weo tane tarai kariri i kaharai.

³ Ampefe mandoni kontaio enemitawang ne tonanafo mani, ewaitawang weduasa ambori etohong sasari kaha, tuti enemirong mesi, mai kariri Kristusi enerongfoi wemesifo.

⁴ Mandoni niari sasari pampang ne mani, wenani dohong sara Allai neo Hukumi dohonai we Musai foi. Weo tarai we ohong sasarinei kiai, nana mani ohong sara Allai ne Hukumi-foi finana.

⁵ Mewaitawanaifa we Kristusi da ma weo feriri inontaraine tane sasarinei, tuti mantauni mani wiro dohong sasarifei kaha.

⁶ Mandoni kontaio weboyari ria Kristusi mani, wiro niari sasari pampang kaha. Mae mandoni dino niari sasarifoi pampang mani, wenani wiro deti Kristusi na wea kaha rai ete deroansoi kaha rai.

⁷ Nehu arikangwa meaine, mandoni kontaio dohonao metuati we weanggari meara ambori menari sasarifoi fe. Mandoni dino dohong kariri ne maifo mani, i mani inontarai mesi dine, ne tarai kariri Kristusi wemesi fo.

⁸ Wape mandoni dino niari sasarifoi pampang mani, wenani Saminseni ne arikang dine, weo Saminseni niari sasari na reantenangfo paria sobu nina fefe. Tuti Allai ne Kaisungno Yesusi da kawuru to nunei ma we niari kanggung fifianai aino Saminseni niari fo ao woru.

⁹ Mandoni saino Allai yiwang enemirongfoia weworu kawurua mani, wiro enari sasari pampang ahang kaha, weo ea mani ene tarai toyari tamanai, amani Dai Allai mantauni. Tuti enemirong dohong we enari te ne maifo, weo Allai ne arikang saine fefe.

¹⁰ Fininai we ambori aroansoai kariri Allai ne arikangnesa tuti Saminseni ne arikangnesa: Mandoni dino dohong kariri Allai ne maifo kaha tuti enewawu ne doroifosa kaha, nana mani Allai ne arikang dine kaha. Na tonanane tawaitawanai we mandoni dino Allai ne arikangfoi ne tuti mandoni dino Saminseni ne arikangfoi ne.

Yesusiferiri mea ampa am-pafe menemiwawu wawera mea

¹¹ Na reantenang meraria Yesusi fo, metaramio kaiwo dotu tonina: Todoni kontaio taenemiwawu wawera tata.

¹² Wiro tane tarai kariri Kaini* fanai, we i Saminseni ne arikang dine, donio miung ne tahatui tera foi ninai. Tuti we fiani niari tonana? Weo fianai aino niari fo, fi sarawa fine tuti fianai aino ne tahatuifoi niari fo fi wetarai fine, ampare enerorong pirahai wei nina.

¹³ Ampafe doroi meaine, inontarai nunesa enemirireu mea mani, dohonao mepapuhing fanai.

¹⁴ Tawaitawanifa we takaharai weru marareha rorong fe ma tanayai na numainufe ampa, weo taenemiwawu tane doroinesa fefe. Mandoni dino enewawu kaha mani, inontarai nani mararehafoi yutawani.

¹⁵ Mandoni dino enerireu ne doroifoi mani, wenani wemiung inontarai dine, tuti mewaitawanai we inontarai

tonana nei wiro sobu numainufo kaha.

¹⁶ Yesus Kristusi dohong ne taraifoia mireha we tata. Na tonina ne tawaitawang kariri todoni taenemiwawu inontarai siai fo. Ampefe tata kontai tatohong tane tarainei we tane doroifosa pariao tamareha wesa kontai ki.

¹⁷ Toyarine mano ne rabitoya mane, detio ne doroifoi ne pari fi, wape wiro aroi tuti fiatari kaha, nana mani na rang fianie deyo enewawu Allai nina?

¹⁸ Arikang enehuwawu mea wa meaine, dohonao taenemiwawu arora na taboromirawane fe. Mae todoni kontaio taenemiwawu na tatohong toa fo tuti na tarai.

Tamai we tatoari na Allai arongreaf

¹⁹⁻²⁰ Tawaitawanai we Allai ne arikang di tata tuti tanari kariri ne kaiwo wetarai fo. Tuti masino taaromio fi karira kiaio raminde nanai tanari fo tuti taenemirorong ketui fuisi dinggai tata karirai ki, wape taweansarai wea kaha, mae tanumiruainso tamai tuti tamainenang we tatoari na arongreaf. Weo Allai wemambiriu sewa taenemituuitafo kiai. Tuti fifiani kontai deitawanaifa ampa tuti dohong tata tanumiruainso ne maifo.

²¹ Maniwowirio enehuwawu mea wa meaine, masino taenemirorong ketui fuisi dinggai tata kaha,

* **3:12** Kaini mani Adami ne arikang dine, wape Saminseni wedayari miung ne tahatui Habeli (Kejadian 4:8).

nana mani tamatai kaha we takahefang we Allai.

²² Tuti fianai aino tatutani wea fo, tasobuai riati, weo tatohong kariri ne kaiwo medurai we tatohong kariria fo na mai tuti tanari te fi eneoa fo fefe.

²³ Tuti kaiwo medurai we tatohong kaririai fa nana mani, ainina: Todoni kontao taroaso ne Kaisungfoi, amani Yesus Kristusi, tuti taenemiwawu wawera tata, kariri kaiwo medurai kawuru we tatara fo.

²⁴ Mandoni dino dohong kariri te ne kaiwo pondoia fo, nana mani weboyari ria Allai tuti Allai weboyari riati. Tutti tawaitawanai weo i weboyari ria tata na finina, amani dohongno Nuaninu Mirarebana foi we deinawi kaiwo Yesusi medura fo we tata fefe.

4

Aunauo metaramioa fo, metitua weai, weo na Allai Nuaninufoi ete na Saminseni

¹ Maniwowirio enehuwawu mea wa meaine, nabi tarai kahai bitoyao etatofa we ea mani nabi disa fesa, era wariai mai katitaife kawuru mau wa etaunau fi wetarai kaha. Tonana mani dohonao meroaso funong inontarai emadu eteyo, ea mani inontarai emadu na Allai Nuaninunei disa fosa fe, mae manea emadu tonana mani metitua wesa akawuru wo, ambori mewaitawanai weo etaunau na Nuaninu Mirarebana nei ne mambiriufo ete bireri e.

² Ambori mewaitawanifa we mano etaunau na Allai

Nuaninufoi ne mambiriufosa ne mani, mewaitawanai na finina: Mandoni dino yoa deyo, "Yesus Kristusi da na Allai weinontarai batang to nunei ma," mani wenani medu na Allai Nuaninufoi ne mambiriufoi.

³ Wape mandoni dino wiryo yoa we Yesusi da na Allai weinontarai batang to nunei ma kaha mani, wenani wiromedu na Allai Nuaninufoi ne mambiriufo kaha, mae medu na Saminseni, mano weaiteta we Kristusi, ne mambiriufo. Metaramioaifa we nuaninu kerira nani ambori da ma ki, tuti ninaia mani niayai kawuru na nunei ampa.

⁴ Wape arikang enehuwawu mea wa meaine, mea mani Allai ne arikang di mea tuti meharai kobusa, metau wesa kaha, weo Nuaninu Mirarebanaio niayai na mea wai, wemambiriufewa nuaninu kerira niayai na nu finina.

⁵ Mano etaunau fi mai kaha fosa mani, nunei ne inontarai saine, ampefe emadukariri aunauo nunei tuti inontarai nunesa etaramiosa fo.

⁶ Wape tata mani Allai ne arikang di tata, tuti mandoni dino deroanso Allai mani, tarao tata. Mae mandoni dino wiryo Allai ne arikang dine kaha mani, wiryo tarao tane kaiwone kaha. Na tonana ne, tatitua nayai we tawaitawanai we kaiwo emadura fo na Nuaninu Mirarebana nei tuti wetarai, ete nano nuaninu kerira foi.

Taenemiwawu wawera

*tata weo Allai mani mano
enewawu biriu dine, tuti
enewawu tata paria*

⁷ Maniwowirio enehuwawu mea wa meaine, mera ma taenemiwawu wawera tata, weo Allai andino dohong tata taenemiwawu tonana ne, tuti taenemiwawune mani na Allai ma. Mandoni dino enewawu mani kasau ampa we Allai yiwang enerorongfoia weworu tuti deroanso Allai.

⁸ Mae mandoni dino enewawu kaha mani, deroanso Allai kaha, weo Allai mani mano enewawu biriu dine.

⁹ Na fininaifa aino Allai deinawiai we tata kariri todoni enewawu tata ne, amani demi ne Kaisung mansiari foi to nunei meu we mireha we tata, ambori tasobu numainufo riati.

¹⁰ Na toninane tawaitawang kariri todoni taenemiwawu tarai fo, amani wiro tataino tenemiwawu Allai ne kaha mae, Allai dino enewawu tata ne donio demi ne Kaisungfoi meu we dohong ne taraifo mireha we tata, ambori Allai deiai tane sasarinei kiai.

¹¹ Maniwowirio enehuwawu mea wa meaine, tawatioifa we Allai enewawu tata paria, ampefe tata toyarine taenemiwawu wawera tata.

¹² Wiro manei deti Allai kaha rai, tonanai ki wape taenemiwawu tatane mani, Allai weboyari ria tata tuti enewawufo masi na tata, nana mani taenemiwawu kariri ne dawiafo.

¹³ Tawaitawanai weo tawebboyari ria Allai tuti Allai webboyari ria tata, weo dohong Nuaninu Mirarebana fi we tata ampa fefe.

¹⁴ Tuti mantaung amea amewatioai terai tuti amewuwuaifa we kaiwasanei we Dai demi ne Kaisungfoi ma we weMananu Mampariri we feriri nunei kiai.

¹⁵ Ampafe mandoni dino yoa deyo, "Yesusi mani Allai ne Kaisung dine," nana mani Allai weboyari riati, tuti i kontai weboyari ria Allai.

¹⁶ Ampafe tawaitawanai tuti taroasoai we Allai enewawu tata.

Allai mani mano enewawu biriu dine. Inontarai mano enewawu inontarai siai foi mani weboyari ria Allai tuti Allai weboyari riati.

¹⁷ Tuti taenemiwawu wawera tata na mai ne tarai toyari Allai enewawu tata fo, ampefe na rahida ambori kiutu kaiwo we tata fo, tamatai kaha tuti tamamaya kaha we tatoari na arongreafo, weo na nunei mani taenemiwawu na mai kariri i we enewawu fo.

¹⁸ Mandoni dino enewawu inontarai siai mani, wiro mitai we sobu aiboi ria Allai kaha. Amani mano enewawu inontarai siai ne tarai kariri Allai enewawuti, wiro mitai we sobu aiboi ria Allai ahang kaha, weo deitawanai dohong kariri Allai ne dawiafo ampa, amani enewawu inontarai siai. Wape inontaraio mitai sobu aiboi ria Allai mani, kasau ampa we wenani wiro enewawu inontarai siai

kaha.

¹⁹ Taenemiwawu Allai tutu taenemiwawu wawera tata, weo Allai dino enewawu tata fafong ne.

²⁰ Masino manei medu deyo, "Yau mani enehuwawu Allai," wape enerireu ne doroifoi, wenani mani inontarai pempamu dine. Weo mandoni dino wiro enewawu ne doroio deti teri foi kaha, nana mani todoni deyo enewawu Allaio detioi kaha foi nina?

²¹ Ampafe kaiwo Allai dohonai we tato hong kariria finina: Mandoni dino enewawu Allai mani, todoni kontaio enewawu ne doroifoi.

5

Taroasoa Yesusi Kristusi ne dirasaya fi nunei

¹ Mandoni dino yoasoai we Yesusi mani Mananu Mampariri Allai dereri fi dine, wenani Allai yiwang enerorongfoia weworu. Tuti mandoni dino enewawu Dai Allai mani enewawu ne doroifosa kontai. Weo ea mani wawafoi ne arikang saine kontai.

² Ampafe taenemiwawu Allai finanai tuti tato hong kariri ne kaiwo pondoia fo. Na tonana ne tawaitawanai we taenemiwawu Allai ne arikangnesa finanai.

³ Weo taenemiwawu we Allai finina, nana mani tato hong kariri ne kaiwo pondoia fo. Tuti ne Kaiwofo

wiro maraba we tata we tato hong kaririai kaha,

⁴ weo Allai ne arikangne tata mani, tawemambiriu we taharai kou fi kerira na nufi nini kiai. Tawemambiriu tonanai na tane taroasoafao.

⁵ Mandoni dino wemambiriu we kirai kou nunei rai e? Mano biriu we niari tonana nei mani, manta inontarai yoasoai we Yesusi mani Allai ne Kaisung dine.

*Kaiwo rabuang botoruo
deinawiai we Yesus Kristusi
mani Allai ne Kaisung dine*

⁶ Allai ne Kaisungno da to nunei ma nei mani, Yesusi mano we Mananu Kristusi dine. Da ma sobu baptisifo na mereha, tuti mireha na aitabafoi, ne rika tiwowu we tata. Ampafe wiro sobu baptisifo tera kaha, mae ne rika tiwowu we feriri tata nai kontai. Finanai Nuaninu Mirarebana nei medurai we antu tarai, tuti Nuaninu Mirarebana nei mani tetofa kaha, mae medu te fi tarai fo.

⁷⁻⁸ Fi betoruo itomadu kariri Yesusi ne mani, Allai Nuaninu Mirarebana nei, Mereha webaptisi nai nei, tuti ne Rikao tiwowu nai foi.* Fi nanai itorainawi ruhiai weo Yesus Kristusi mani Allai ne Kaisung dine.

⁹ Fianai aino inontaraine emadura fo taroasoai, wape fianai aino Allai medura fo wemambiriu sewa finanai. Ampafe todoni kontai taroaso ne kaiwo medura fo kariri ne Kaisungfoi.

* **5:7-8** Tarahai ne maksuti tonina: 1. Fi Nuaninu Mirarebana foi deinawiai we tata kariri Yesusi na kaiwo medurai we tata na taenemirorongnei. 2. Kaiwo Allai medura fo na rahida Yesusi sobu baptisi fo, tuti, 3. Fio kawariai tuti fi wewaifoi medurai kariri Yesusi na ne mararehafoi tuti rahida suwi aha fo.

¹⁰ Ampafe mandoni dino yoaso Allai ne Kaisungfoi mani, yoas we kaiwo kariri Yesusi nanai na enerorongfoi. Wape mandoni dino yoaso Allai kaha mani, wenani medu toyari deyo Allai pempamu, weo wiro yoaso kaiwo Allai medurai kariri ne Kaisungno Yesus Kristusifo kaha fefe.

¹¹ Tuti ne kaiwo medura fo ainina: amani Allai dohongno numainufo we tata kawuru ampa. Tuti ne Kaisungfoi andi dohong numainu nanai we tata ne.

¹² Mandoni dino sobu Al-lai ne Kaisungfoi mani, sobu numainufo. Mae mandoni dino sobu ne Kaisungfoi kaha mani, sobu numainufo kaha.

Taroasoai we Yesus Kris-tusi mani Allai ne Kaisung dine, nana mani taminohi wenumainu rai

¹³ Itoi kaiwone we mea, mano meroasoai we Yesus Kristusi mani Allai ne Kaisung dine, ambori mewaitawanai we mesobu numainufo ampa.

¹⁴ Tawaitawanai paria we tatutang Allaifo mani, fiani kontai aino tatutani weai kariri ne dawiafo mani, taraoai.

¹⁵ Tuti masino tawaitawa-naifa we tarao tata na fianai aino tatutani wea fo mani, tawaitawanai kontai we finanai dohonai konta rai.

¹⁶ Masino mewati tane doroi inontarai Kristen manei niari sasari, wape sasari nani wiro sasario wedayari sobu numainu kaha foi, nana mani metutang tuti inontarai nani we Allai,

ambori daraberahi weru ne sasarifoi tuti sobu numainufo riati. Fininai we mano enari sasario wiro wedaya numainufo nai werusa kaha fosa. Wape sasarifei wedaya obu numainufo kahai kontai. Manei niari sasari maraba nani mani wiro yeretawang mea we metutang tutiri we Allai kaha.

¹⁷ Fi sarawai kiaio tanariri ne mani, sasari dine. Wape na sasari nanai kiai, weai wiro wedaya rawanang adia foi kaha.

¹⁸ Tawaitawanai weo mandoni dino Allai yiwang enerorongfoia weworu mani, wiro niari sasari pampang kaha, weo i dewawuti am-pafe Saminseni wemambiri we niari fi karira wei kaha.

¹⁹ Tawaitawanai weo nunei sentenang sawai to Saminseni ne mambiriufu, wape tawaitawanai we Allai ne arikang di tata ampa.

²⁰ Tawaitawanai kontai we Allai ne Kaisungfoi da kawuru to nunei ma tuti dohong awai we tata kawuru ampa, ambori tataroanso Allai mano wetarai foi. Tuti taweboyari ria mano wetarai nani tuti taweboyari kontai ria ne Kaisungno Yesus Kristusi. Yesus Kristusi nini faini dino Allai taraifoi dine tuti andi dohong numainufo we inontaraine tata ne.

²¹ Arikang enehuwawu mea wa meaine, mehatai weru omi we aririwangno inontarai eroasoa kaha fosa esomi weai we ene sengwa.

Kaiwo Anatu Bo Boru Na Yohanesi

*Kaiwo dedung we 2
Yohanesi*

Na kaiwo anatu nini Yohanesi soi we Ai manei tuti ne arikangfosa. Tarahio mano Yohanesi sahui weAi foi tuti arikangfosa mani, kaiwo neta wea fine. Amani aifo neta we jemati bei tuti arikangfosa neta we inontarai na jematifoi.

Yohanesi deretawansa kariri fi beru. Reantennang mani deretawansa we enemiwawu wawerasa. Beru mani deretawansa we etanansiau we mantaunau tarai kaha fosa tuti ene aunau wetarai kaha fo.

Kaiwo na kaiwo anatu nei deto kutuai tonina:

1-3 Kaiwo reantenang.

4-11 Enemiwawu wawera-hai tuti anansiau we au-nau wetarai kaha fo.

12-13 Kaiwo kafe.

Mahikaifea

¹ Weo Ai wau, mano Allai diri waua wa, tuti we nemu arikangwasa.

Kaiwo anatu ne na yau, mano iwewawa we mano taroaso ne tata.

Enehuawu mea paria, wiro imeiri yau enehuawu mea tonana kaha, mae inontarai fubao etaroanso kaiwo wetarai kariri Yesusi na Allai nesa kontai.

² Weo tata kiai taroaso ne Kaiwo wetarai fo tuti tarutawanaia mutu we fitawafa.

³ Yutang Dai Allai tuti ne Kaisungno Yesus Kristusi kadono urohong une bengfo arora we tata, uenemiwawu tata na uenemirorong denteng foi, tuti urohong tata tanumiruainso ne maifo. Kadono tasobuai na taroaso ne wetaraifo tuti na taenemi-wawufo.

*Menemiwawu wawera
mea tuti metanansiau we
aunau wetarai kaha fo*

⁴ Enehurorongnei mirising paria we tarahuai we nemu arikangwa manea etohong kariri Dai Allai ne kaiwo wetarai fo kariri todoni eraria Yesusi fo, amani kariri fianai aino dererai we tatohong kariria fo.

⁵ Ai enehuwawu wau wa waune, ninaifara mani, yutang wau paria we todoni kontaio taenemiwawu tata. Fianai aino yevoi nini-nai wiro kaiwo waworu arahio metarami tantumarai nina kaha. Mae kaiwo nanai waroia metaramioai ampa, amani na reantenang meroaso Kristusi fo.

⁶ Na toninane tawaitawang kariri todoni taenemiwawu tarai fo, amani tatohong kariri Allai ne kaiwo pondoaia fo. Tuti kaiwo medurai nanai metaramioai kawuru na reantenangfo ampa, amani todoni kontaio taenemiwawu wawera tata.

⁷ Inontarai epampamu fosa bitoya etariai kawuru ampa tuti era wariai to nufi sentenang mauwa. Tuti inontarai nanisa mani wiro eroasoai we Yesus Kristusi da weinontarai batang to nunei ma kaha. Inontarai tonana nesa mani inontarai

epampamu tuti eweaiteta we Kristusi.

⁸ Ampafe metanansiau we dohonao metawing mene meroasowa fe. Weo nana mani fi amerurai weai rahang mea nanai tupa dawohi. Mae merurai we ambori mesobu mene embaitafoa mai ria Allai.

⁹ Mandoni dino yutawang Kristusi ne aunaufu kaha mae da boriei werua mani, wenani weboyari ria Allai kaha. Mae mandoni dino yutawanaia mutu, nana mani weboyari ria Dai Allai kontai ne Kaisungfoi.

¹⁰ Ampafe manei da mau we deunau aunauo siai feai weru Kristusi ne aunaufu mani, dohonao metamang wei na mene munuwa fe, ete metohong mahikaifeai wei fe.

¹¹ Weo mandoni dino dohong mahikai we inontarai tonana nei mani, kiontai wenani unari fi karira niari fo.

Kaiwo kafe

¹² Yeyo yeikariri kaiwoariri bitoya we mea mau, manamo imaya we yenatuai arora na kaiwo anatu kaha. Ene hutawanai we yontai terai mau we iwati mea tuti imadu terai ria mea, ambori taenemirorongnei mirising.

¹³ Aie, nemu doroi ne arikangno* Allai dirisa nesa etanatu mahikaifeai we wau.

Mahikaifeai.

* **1:13** Ne maksuti mani, doroi na jemati na katai Yohanesi soi nai fo fosa.

Kaiwo Anatu Bo Botoru Na Yohanesi

*Kaiwo dedung we 3
Yohanesi*

Na Yohanesi ne kaiwo anatu bonini, soi we ne maniwowiri manei, wonong fino Gayusi. Gayusi nini mani inontarai ne fong na jemati bei dine.

Yohanesi fiai Gayusi we fi niari we fiata inontarai Kristenio erufi tarai we Seng Yesusi fossa. Deretawanaifa kontai we Gayusi denansiau we inontaraio wonong fino Diotrefesi foi. Weo Diotrefesi nini dawiai we wenunggamiei na jemati foi tuti niari fi sarawai we inontarai Kristenii siai fossa.

Kaiwone deto kutuai tonina:

1-4 Yohanesi dohong mahikai we Gayusi.

5-8 Yohanesi fiai Gayusi.

9-12 Yohanesi deinawi kariri Diotrefesi Weinontarai kerira dine mae fiai Demetriusi.

13-15 Kaiwo kafe.

*Yohanesi dohong mahikai
we Gayusi*

¹ Weo nehu maniwowiri Gayusi, mano enehuwawu wau tarai wa wau.

Kaiwo anatu ne na yau, mano iwewawa we mano taroaso ne tata.

² Maniwowiri enehuwawu wau wa waune, yutang Allai we kadono wobu maninangfea fanai, tuti wobu mai na fi kiai nari wa, mai kariri numuaninuwai sobu mai ria

Sempaisi ampa, amani na roasoawa.

³ Imirising paria we tane doroi maneiru teai etontai ma eteikaririai we yau kariri todoni bohong kariri ne wetaraifo na mai, tuti todoni roria Allai tarai fo.

⁴ Fio dohong yau imirising sewa ne mani, tarahuoi we nehu arikangnesa etohong kariri aunau wetarai fo tuti eraria Allaifo.

Yohanesi fiai Gayusi

⁵ Maniwowiri enehuwawu wau wa waune, bohong kariri Allai fi medura fo ampa. Amani fata tane doroi Kristenio etontai mau wasa na mai paria. Wiro boroansosa na wea kahai wape bomang wesa na mai ampa, weo eroaso Kristusi fefe.

⁶ Inontarai nanisa eteikaririai we jemati na ninai kariri enemuwawuwa. Tuti ne mai sewa ne mani, fatasa kariri Allai eneoafu, ambori era na mai.

⁷ Weo era we etairiri Seng Yesusi wonongfo, tuti wiro esobu fieai ria inontarai eroaso Yesusi kaha fossa.

⁸ Ampafe inontarai taroaso Yesusi ne tata, todoni kontaio tafata tane doroi mano etairiri Yesusi wonongfo tonana nesa, ambori na tonanane, tahontaisa na fi eru fo, amani tafatasa etairiri kaiwo wetarai na Allaifo.

Yohanesi dinggai Diotrefesi we niari fi karira fo, mae fiai Demetriusi

⁹ Isoi kaiwo ana tu feai kawuru we jemati wai ampa, manamo Diotrefesi kendipa amea beyari, weo i yurai

we deyo wenunggamiei we jematiwai fefe.

¹⁰ Ampafe yontai mau wori isefa fi karira fuba niariri wai kiai, tuti ne pempamu meduri kariri amea wai ki. Tuti wiro niari fi karira tonana ne tera kaha, mae rahidao tane doroifosa era mau wa, wiro miaya we demang wesa kaha. Mae doari aha dei wedua mano emainenang etamang wesa wasa. Tuti mandoni dino yurai we fiatasa mani, data wenani weru jematiwai kontai.

¹¹ Maniwowiri enehuwawu wau wa waune, dohonao taha kariri ne wawuawa fe, mae nari kariri ne bengfo terai. Weo mandoni dino niari ne bengfo mani, Allai ne inontarai dine, mae mano niari ne karirafu mani, wiro deroanso Allai kaha rai.

¹² Demetriusi mani kaiwasanei kiai efiai, tuti deinawiai, na todoni dohong kariri Allai ne Kaiwo wetarai fo, we i mani inontarai beng dine. Amea kontai amefiai, tuti boitawanaifa we fi amemadurai kariri i ninai kaiwo wetarai fine.

Kaiwo kafe

¹³ Yeyo yeikariri kaiwoariri bitoya we wau mau, manamo imaya we yenatuai arora na kaiwo anatu kaha.

¹⁴ Enehutawanai we wiro anseung ahang kahai mae, yontai mau, ambori tumadu terai na nanai.

¹⁵ Kadono numuruainso Sengnei ne maifo. Nemu maniwowiri na nina nesa etanatu mahikai we wau.

Boikaririai we tane maniwowiriwasa weo yenatu mahikai maisa kiai.
Mahikaifea.

Kaiwo Anatu Na Yudasi

Kaiwo dedung we Yudasi

Kaiwo anatu nei mani na Yudasi, Yakobusi ne tera manei. Tarahai Yudasi nini mani Seng Yesusi ne tahatui tera manei dine (Matiusi 13:55). Na ne kaiwo anatu neidere we mano etatorifosa ambori etanansiau paria we inontarai efaraosa etaunau fi karirao wetarai kaha fo, tuti eminohi etohong sasari pampang. Yudasi denggoasa paria ambori eroaso Kaiwo Mahikai wetarai fo tuti eroaso Yesusi na mai. Ne kaiwo anatu ninai ne tarai kariri kaiwo anatu bo boruo Petrusi soi foi.

Kaiwone dotu kutuai tonina:

- 1-2 Kaiwo reantenang, Mahikaifea.
- 3-16 Kaiwo kariri mantaunau tarai kaha fosa.
- 17-23 Yudasi deretawang jematifosa we etarara ene eroasoaf.
- 24-25 Kaiwo kafe tuti fi-aifeai we Allai.

Mahikaifea

¹ Weo inontaraio Dai Allai sahu mea tuti enewawu meara wa mea, meaino Yesusi Kristusi deitawang wedua mea wa. Kaiwo anatu nei na yau Yudasi, Jesus Kristusi ne womingne yau tuti Yakobusi ne tera di yau.

² Kadono Allai ne enerong denteng we mea fo, enewawu mea fo, tuti wedayo mea menumiruainso ne mai fo, fuba paria na mea.

Kaiwo kariri mantaunau tarai kaha fosa

³ Doroi enehuwawu mea wa meaine, reantenang mani enehurorong dohong paria we isoi kaiwo anatu feai kariri faririo tata kiai tasobuia foi, wape ninaia mani, mantaunau wetarai kaha efau ehawariai ma, ampare enehutituai siai aha tuti yeyo itoi kariri fi siai kontai. Tonana mani isoi kaiwo anatu ninai we yenggoa mea nayai, ambori merurai we metarara fianai aino meroasoai kawurua nanaia mutu. Finanai Allai dohonai webeyari we ne inontarai emararebana fosa meu.

⁴ Weo mesao mae, inontarai manea enayai saiworu mea ampa. Inontarai nani sa mani, inontarai wiro etohong kariri Allai disa kaha. Weo kaiwo kariri Allai ne beng dohonai arora we inontaraine tata fo, ebari-herahai aha, amani eteyo ohong sasari kontai ki mae towea kaha. Enari tonanafo we ambori etohong kariri ene maninawa kerira foi, tuti eteiaya Jesus Kristusi, tane Mananu tuti Seng mansiari foi. Nafafongfa nabifosa emadu kariri aiboi ambori inontarai nanisa esodairi foi ampa.

⁵ Mewaitawang kariri ne ninai kai ampa, wape yeyo yeretawang mea kariri todoni Sempaisi feriri ne inontarai Israeli fosa weru nu Mesiri foi, wape mayeai ming mano eroaso kaha fosa fo.

⁶ Mearomioai kontai kariri wewaio Allai dohong mambiriu wesa we eru wangfo, wape manea na sa wiro etohong kariria kaha mae etawing wang eru fo tuti ewawu weru ene katai eminohi naya fo to katai siai. Na tonanane Allai weworasa na wai besio wiatai we numainu foi, na katai memantiti na kahofa rorong fo. Na wanai ewatai pariao Allai dohong aiboifo wesa na rahida fuba foi.

⁷ Mearomioai kontai kariri bendari Sodomituti Gomorai kontai bendari watai ruramai na nana fo we ne inontaraifosa enari kariri we-wai nanisa fo, amani etohong kariri Allai kaha. Ea kiai enari maninawa kerira foi tuti maninawa werarika paria foi. Ea ewefiainawai kariri mano esodai aiboi fuba na Adia danggararu we fitawafa foi, weo deretawang inontarainesa kiai.*

⁸ Tuti na tonana fo kontai, mano etamiae tonana fosa, amani mantaunau tarai kaha fosa, enari ene taraifoi werarika na fi werarika fo, tuti eteiaya Allai ne mambiriufu, kontai eteibera wewai dadai sambewaraio enayai na Waidani fosa.

⁹ Wape Mikhaeli kontaio, mano wenunggamieie we wewai ebeng fosa foi, fiabai tonanai kontai mae wiro niari tonanai karirisa kaha. Rahida Saminseni, mano wenunggamieie we wewai etawaia fosa foi, urapa suru we Musai ne tarai mireha foi we mandoni dino sobui fo

mani, Mikhaeli wiro biriw we dinggai Saminseni na kaiwo oiberaha fea kaha, mae medu terai deyo, "Sengnei andino dohong aiboifo we wau ki."*

¹⁰ Wape inontarai nanisa emadu eteibera fio ewaitawana kaha fo. Tutti fianai aino enari fo, wiro enari na enemittuitai mai fo kaha, mae enari toyari andowa ne pari enetituitai. Na tonanafo esodai aiboifo ria Allai.

¹¹ Karira paria wesa to! Weo era kariri rangno Kaini dai foi fefe. Tutti emitio we esobu doifo wedaya etaukaha ne karirafo kariri Bileami. Tutti eteiaya mano ewenunggamieie wesa fo kontai kariri Korai na fafongfa, ampare Allai minsna na tantuma kariri ming Koraifo.*

¹² Rahida mefanduhi mea we metampi ruhiai na mahikaifo mani, inontarai eharira fosa eminohi etampi ria mea kontai na emamaya kutea kaha, ene tarai kariri kamieie na iya reng kia karira we wa amangfo. Enemittuai we mantaunsa terai. Ea mani ene tarai toyari kafafe wanang kiari, wape wedaya metang miung kaha. Tutti ene tarai toyari aio fikainuing niayai wape wiro webong kaha, toyario aio fating newafoi tuti mirehara disa.

¹³ Ne tarai kariri andeisa dipua wekawauwai na rawanangrausi, ea kontai

* **1:7** Kejadian 19:1-24 * **1:9** Danieli 10:13, 21, 12:1; Wahyu 12:7; Ulangan 34:6; Zakariai 3:2 * **1:11** Kejadian 4:3-8; Bilangan 16:1-35, 22:1-35

erurai tonanai we enari fi kia mamaya fo. Ene tarai kontai kariri awahafo etabera weru ene katai enayai nai fo, wedaya Allai meineng katai mamantiti kapuruya fo wesa we enayai nayai we fitawafa.

¹⁴ Kariri inontarai nanisa, inontarai manei na Adami ne ririao bo itu foi, wonong fino Henoki*,fafongfa medu fa-fong karirisa deyo,

“Mewati! Sempaisi ambori da tuti ne mano emararebana fosa bitoya paria ma ki,
¹⁵ we kiutu kaiwo kariri kaiwasanei kiai. Sempaisi ambori dohong aiboifo tau we inontarai eharira fosa we fi kerira enariri fo kiai. Tuti dohong aiboifo kontai we inontarai ewesasari nanisa we kaiwo karirao emaduri we eteiberahi fo.”

¹⁶ Inontarai nanisa ehutu inontarai siai na enemirorongfo tuti eteiberasa. Emionohifo etohong kariri te fi enemirorong wesasari fo dawi wea fo. Eboromi fiabai kariri mantaunsa tuti eboromi we mereha we inontarai we ambori esobu fi ria wenani sa.

Yudasi deretawangjemati-fosa we etarara ene eroasoafō

¹⁷ Wape doroio enehuwawu mea wa meaine, mearomi kariri fianai aino raminde tane Sengno Yesus Kristusi ne rasulifosa emaduraia fo.

¹⁸ Raminde emadurai kawuru we mea eteyo,

“Nunei rerai we werea naya fo mani, inontaraio ambori eteibera mea fosa ehawariai ki, inontaraio etohong kariri mantaunsa ene enemirorong wesasari fo dawi wea fo.”

¹⁹ Inontarai nini saino ewedaya aiteta we inontarai Kristen teni fesara eha tatesa ne. Allai Nuaninufoi wiwo sensorissa kaha, mae eminohifo etohong kariri te enemirorong wesasari fo dawi wea fo.

²⁰ Wape doroi enehuwawu mea meaine, mefata wawera mea ambori mene meroasoao mirarebana fo mutu pampang. Tuti metutang we Allai na Nuaninufoi wiwiaing mea na mene nadiva.

²¹ Metarara mene taraiwai tonanai na Allai ne enewawufo, na metamang we Yesus Kristusi tane Sengfoi, na ne aro mea fo kia mea ambori meminohi metarang wenumainufo.

²² Menemirorong denteng we mano enemirorong soriru na eroasoafō.

²³ Inontarai siai fosa, metafusa mehasa to boriei ambori ekaharai weru adiarorong enayai nai foi. We inontarai mano siai wei fosa, amani mano era ria aunau wetarai kaha anta nani sa kontai, mearomiosa, mae na mematai tuti metanansiau—weo ene sasari enari fo, ambori metaukaha ne karirafo konta fanai. Ansung etatara fo kontai menemirireuwai we finanai ne tarai toyari sinsung rarika kerira na enemirorong wesasari fo fefe.

* **1:14** Kejadian 5:18, 21-24

Kaiwo kafe

²⁴ Fiaifea we Allai mano wemambiri we deitawang wedua mea ambori wiro metawa kaha fo, tuti we-mambiri we kia mea na mirising tuti memararebanai wiro obu fi sarawa feai na mea kaha to arongrea dadai sambewara fo,

²⁵ we Allai mano mesiri kawuru, mano weMampariri we tata na Yesus Kristusi tane Sengfoi, andino dedai, sambewarai, wemananu tuti we-mambiri nafafongfa, paria sobu ninai, tuti we fitawafa! Antu.

Wahyu We Yohanesi

Kaiwo dedung we Wahyu We Yohanesi

Kaiwo anatu nei mani kariri fi fubao Yesus Kristus deinawiai we ne inontaraio wonong fino Yohanesi. Ampefe Yohanesi nani soi kaririai.

Rabuang bo soi kaiwofo mani inontarai Kristen fosa esodai dadira paria weo eroaso Seng Yesusi fefe. Na rahida bonani mani parenta Roma foi demi we kaiwasafai kiai we esomi we mananu Roma foi, mano esahui we Kaisari, ambori esahui we ene seng dine. Wape inontarai Kristen fosa wiro esomi wei kaha, mae esomi terai we Seng Yesus Kristusi, pariao parentafoi miunsa kontai. Wape Kristen manea siai fosa ematai tuti esu to fui weru ene eroasofo. Yohanesi soi kaiwo anatu nei wesa ambori ewemambiriu aha weo etoaria mutu na eroaso Yesusi fo.

Fi fuba na kaiwonei wefiainawiai ete fiatiaoai, amani fio Seng Yesus Kristusi deinawiai we Yohanesi we detioai. Na kaiwone mani soi na kaiwo netawea fea bitoya paria, ambori fio kasau kaharai fo, na rahida bo kawariaifa fo, kasau we tata ki. Finani kiai inontarai eroasoa fosa na fafong nanai ewaitawanai, wape na fui nini mani wiro kasau we tata kaha. Wape fio kasau mani, masino inontarai Kristen ne tata tasodai dadira bitoya na

nunei, tonana ki wape tasu to fui fanai, taroaso Yesusi mutu tuti tarariati pampang ki. Weo na fui wana mani Seng Yesusi ambori miungno ne aitetafosa kiai tuti wemananu riatu rai.

Kaiwo na suratinei deto kutuai tonina:

1:1-4 Kaiwo reantenang.

1:9-3:22 Fiatioai bo reantenang foi.

1:9-20 Yesusi atioai we Kaisung Inontaraio doa rahanai na pelita aweng itu fo.

2:1-3:22 Yesusi ne kaiwo medurai we jemati-fosa na bendari itu fo.

4:1-16:21 Fiatiaoai bo boru foi.

4:1-5:14 Yesusi, Domba Antungno doa rurang Allai ne kadera mananu foi na rorafaissi.

6:1-8:5 Domba Antung foi fiosabu segeli itu fo.

8:6-11:19 Wewaifosa ebui songgeri itu fo.

12:1-16:21 Fiainawiai ituo deinawiai kariri fio ambori kawaria fo.

17:1-21:8 Fiatiaoai bo botoru foi.

17:1-19:20 Yohanesi deti wiwing diru manei, wonong fino Babeli.

19:11-21:8 Yesusi kiaiawariai we mano dautai na kuda tuti kiraikobuo ne aitetafosa kiai.

21:9-22:5 Fiatiaoai bo boa foi.

Yohanesi deti kadawingno Domba Antung foi dauti fi, wonong fino Yerusalem Waworu.

22:6-21 Kaiwo Wefuiai.

Kaiwo kariri bukunei

¹ Kaiwo na bukunei mani dotu kariri fio Yesus Kristusi deinawia fo, amani fio Allai dohonai we Yesus Kristusi ambori deinawiai we ne womingnesa, kariri fianai aino katu mani kawaria fo. Ampafe Kristusi demi ne wewaifoi da we ne woming Yohanesia we deikariri fi ambori kawariai nanai wei.*

² Yohanesi deiriri kariri fifuba deti teri na urengfo nani kiai, amani kariri Allai Kaiwo medura fo tuti kariri fio Yesus Kristusi deinawiai weia fo.

³ Weo waroi ahang kahai mae fininai kiai ambori kawariai ki. Mano deto kaiwo kariri fi ambori kawaria fo ninai mani, Allai mioani ki. Tuti mano etaramioai esoniai na emirorongfoi tuti etohong kariria fosa, ea kontai Allai mioansa ki.

*Yohanesi dohong mahikaifea
we jemati itu fo*

⁴ Weo doroi mea na jemati itu na nu Asia wai mea. Yau Yohanesi yutang we Allai, mano niayai kawuru na reantenang pari foa foi, mano niayai pampang paria sobu rahida bonini, tuti niayai pampang we fitawafa foi, kadono mioang mea, amani dohong ne bengfo arora we mea tuti dohong mea menumiruainso ne maifo. Kadono Allai Nuaninu itu etoari na arongreafou, kefang

we ne kadera mananu foi fosa, emoang mea kontai.

⁵ Tuti kadono Yesus Kristusi, mano deiriri kaiwo wetarai fo na mai foi, mano reantenang suwifafong na marareha rorong fo meai, mano wemananu fuba we mananu na nunei fosa kiai foi, kadono mioang mea tonanai kontai.

Yesusi enewawu tata donio mireha we tata ambori na ne rikao tiwowu we tata fo feriri tata weru tané sasarinei.

⁶ Tuti yuai tata we ne inontarai na ne Mananu rorong fo, tuti taweimami we tarufi we tamangno Allai, amani tane tarai kariri imamifosa, tariwang Allai tamadu ne kaiwofo we kaiwasanei, tuti taha inontarai ene korbani tuti ene nadifo tatohonai we Allai. Yesusi tataparandini tuti todoni kontai andi wemananu we fitawafa ne. Antu!

⁷ Mewati, i da na kafafe rorong fo ma ki. Mandoni kontaio ambori detioi ki, mano raminde etisani fosa tuti inontarai siai kontai ambori ewatiao we da ma fo. Rabuang bonani, kaiwasa fuba nunei kiai ambori ematai tuti esaia etaidu ki. Tarai! Antu!

⁸ Seng Allai medu deyo, “Yau mani Alfa tuti Omega di yau.”[†] Yau inayai kawuru na reantenang pari foia foi, tuti inayai pampang paria sobu rahida bonini, tuti inayai pampang we fitawafa foi. Tuti yau iweMananu Fuba Sewa ne.”

* **1:1** Kaiwo ‘Wahyu’ ne mani, neta we fiainawiai. Ampafe Yesusi dohong wahyu we Yohanesi, nana mani deinawi fi ambori kawaria fo we Yohanesi detioa fo.

† **1:8** Ne tarai kariri A tuti Z na kaiwo ambe.

Yesusi demi Yohanesi we soi karirifi detiofa fo

⁹ Yau Yohanesi, mene doroi na taroasoa Kristusi ruhia ne, tuti mano isodai dadira rorong fo toyari mea, tuti toyari mea kontai itawang yau na dadira rorong nanai, weo taminohi na Yesusi ne Mananune. Ehabi yau to nu Patmosi ma iwatai nai, weo iwuwu Allai ne Kaiwo waworu ne, amani kariri todoni kaiwasa esobu fariri na eroaso Seng Yesusi, tuti kaiwo Yesusi medura fo fefe.
¹⁰ Tete Sempaisi ne Rahida dine, Nuaninu Mirarebana nei sensoni yau, ainanaya tarahuo manei medu na kuruhune, na rawafui fiabai toyario songgerifi wedotu fenana.

¹¹ Medu we yau deyo, “Finanai aino botioai ninai woi na buku bei tuti bonatuai we jemati itu ninai, amani we jemati na bendari Efesusi, jemati na Simirna, jemati na Pergamusi, jemati na Tiatira, jemati na Sardisi, jemati na Filadelfia, tuti jemati na Laodikia.”

¹² Ampafe yarabera yau iwati to kuruhufuia, we iwati we mandoni dino medu tonanai we yau ne. Ainanaya iwati katai we pelita suang nai itu, finanai enari na emasi kai.

¹³ Tuti iwati inontarai manei doa rahanai na pelita aweng itu fo, ne tarai toyari Kaisung Inontarai nei. Ansung satari foi fiabai deuroia sobu awerengfo tuti na ne ansung arong fo soru ireu aburung enariri na emasi bei.

¹⁴ Nungfoi tuti nurandaungfo bua karofari toyari kafafe bua. Urengfo suru uransairai toyari adia fiabai paria.

¹⁵ Awengfo dedori toyario besi kasoria dedori fenanai. Rawafuifoi nubuayai toyari mereha deda na dofiro.

¹⁶ Warang domoya foi yu awaha itu tuti sondu reisa kurubong tuti reisa reng bei kiawariai na borongfo. Urengfo sambewarai toyari wo rahida rabuang.

¹⁷ Na kutu iwatioi nanai, itawai aweu isangkapa avehubuka na arongreafo, nehu tarai toyari inontaraio mireha, wiro ikabera yau ahang kaha. Wape suba warang domoya foi ma yu yau, tuti medu we yau deyo, “Mutai fanai! Yau mani Reantenang Pari di yau tuti Fui Pari di yau.

¹⁸ Tuti mano *Darang Pam-pang* di yau. Raminde imere-hara, wape boti ninaia mani yarang we fitawafa. Aisu we rahutu Marareha rorong fo tuti Soroha rorong fo nayai na warahu rorong ne ampa.

¹⁹ Ampafe woi kariri fianai aino botioai nanai, amani fio kawariai kawurua fo tuti ne ambori kawariai aha fo.

²⁰ Tuti fi toyari kaiwo adiwarai kariri awaha itu botioai na warahu domoya fininai tuti pelita aweng itu fo enariri na emasifo mani, deinawi kariri fininai: Awaha itu fo yiwanso wewai itu ewaitawang wedua jemati itu fo saine. Tuti fi

pelita doa nayai itu fo mani deinawio jemati itu fo."

2

Kaiwo arerai we jemati na Efesusi

¹ Mayeai Yesusi medu we yau aha deyo, "Yohanese, woi nehu kaiwo imadura ne we wewai na jemati Efesusi foi tonina:

Mano yu awaha itu na warang domoya foi tuti da rahang pelita aweng ituo enari na emasi fo, ne kaiwo arerai we jematiwai ainina.

² Iwaitawang kariri fianai aino menari wa ampa, amani merurai merufi paria tuti metawang mea na dadira rong fe wa, tuti wiyo memaya we mewati inontarai eharira fosa euremifo kaha fo. Kontai iwaitawanai kariri todoni merurai we mewaitawang kariri inontarai epampamu we eteyo ea mani rasuli saine fosa. Eteyo emadu fieai na Sempaisi wonongfo wape mewati karirisa sauarai ambori mewaitawanai weo ea tonana kaha.

³ Iwaitawanai we wonohunei wedaya mesodai dadirafo, amani mesobu dadira bitoya na Yahudifosa weo mewuwu kariri yau fefe. Wape metawang mea pampang tuti wiyo mesu to fui kaha, mae meraria yau pampang. Finani kiai dohong yau iparaise ria mea ampa.

⁴ Tonanai ki, wape iparaise kahai we fisarawafeai kontai

menari wa, amani wiyo menemiwatu yau kariri reantenang meroaso yau fo ahang kahai.

⁵ Ampafe mearomioaifa, weo ne tonanane wedaya mehatai waroi weru yau ampa. Ampafe metarabera mea weru mene sasariwai tuti menari kariri fianai aino na reantenangfo menaria nanai. Bereri mani, ambori ira mau we ifating mene fio katai pelita doa nai wai weru katai wai ki.

⁶ Wape iwati fi beng feai kontai na mea, amani menemirireu fio Nikolasi ne inontarai erariati fosa enari fo, kariri yau kontai we enehurireuwa fo.

⁷ Mandoni dino wetarang mani, tarao kaiwo Allai Nuaninufoi medurai we jematif kiai nina. Mandoni dino doara mutu dirapa Saminseni pariao wereafo mani, ambori iroa wei we dang aibongno dohoni minohi darang wenumainu ria Allai na Waidani ki."

Kaiwo arerai we jemati na Simirna

⁸ Yesusi medu we yau Yohanesi aha ma, deyo, "Woi we wewaio na jemati na Simirna foi toninai:

Mano *Reantenang Pari* foi tuti *Fui Pari* foi, mano mireha ampa tuti suwi aha ne, ne kaiwo finina;

⁹ Iwaitawang dadira bitoya mesodaira wa tuti mene pari fi wa ampa. Wape imadurai we mea mau yeo na Sengnei mani inontarai mene fi di mea paria. Tuti iwaitawanai kontai ampa we

mesobu kaiwo kahera wai paria, ria inontarai eteyo ea mani inontarai Yahudi tarai saine fosa. Ea mani eteyo etohong kariri Musai ne Hukumifoi na mai, wape eteiaya yau Yesusi nehu Kaiwofo, amani Kaiwo kariri todoni ifariri kaiwasafo na imereha wesa fo. Emadu funomai tonanai, weo ea mani, Yahudio etohong kariri Allai ne Kaiwofo na mai saine kaha, mae Saminseni ne inontarai saine.

¹⁰ Dohonao mematai we dadirao katu wori mesodaira fo fe. Weo yeisaharai we mea, Saminseni ambori wedaya inontarai eweaiteta we mea fosa etafu manea na mea, esoasa to aitamu rorong fo ki. Tuti ambori mesodai dadirafo paria rahida sura. Niari tonanai we meafo we ambori deo wedaya metawai na mene meroasofo. Wape yevo todoni kontaio meroaso yau terai pampang, pariao masino memarareha kontai ki, tuti ambori yohongno fiembaitafo we mea ki, amani meminohi metarang we fitawafa.

¹¹ Mandoni dino wetarang mani tarao kaiwo Yesusi Nuaninufi medurai we jemati fi kiai nina. Mandoni dino doara mutu dirapa Saminseni pariao wereafo mani, wenani wiro sodai Marareha Weberu fo kaha.”

Kaiwo arerai we jemati na Pergamusi

¹² “Woi weo wewai na jemati Pergamusi toninai:

Mano Yu sondu reisa tuti reng boru foi ne kaiwo we jematiwai finina;

¹³ Iparaise we mea. Iwaitawanai we katai meminohi nai wai mani katai Saminseni wemananu nai dine. Tonanai ki, wape mesomi we yaua mutu, tuti mefafora yau kaha. Tuti mewati terai we emung Antipasi, nehu inontarai somi we yau na mai tuti deiriri wonohu wai. Mewatisa emuni na mene bendariwai, kataio Saminseni wemananu nai wai tonanai ki, wape meroasoai mutu, wiro mesu to fui kaha.

¹⁴ Tonanai ki, wape iparaise kahai we fisarawai beiru teao menari wa, amani inontarai maneiru teai na mea ene tarai kariri Bileami.* Bileami nini na fafongfa deunauo Baraki we weanggari inontarai Israeli fosa we etaukaha sasarifoi, amani etang fio esomi tutirai we aririwangfosa tuti emaninawa funomai.

¹⁵ Mano nanisa kontai etohong kariri Nikolausi tuti ne inontarai erariati fosa ene aunau karira fo.

¹⁶ Ampafe metarabera mea weru mene sasariwai. Bireri mani, waroi ahang kahai mae ambori ira mau tuti imunsa na sonduo kiawariai na borohu fenini ki.

¹⁷ Mandoni dino wetarang mani, tarao kaiwo Yesusi Nuaninufi medurai we jemati fi kiai nina. Mandoni dino doaria mutu, dirapa Saminseni pariao wereafo mani, ambori iroa wei we dang fiang mannao dadiwa

* **2:14** Bilangan 22:5, 7, 25:1-3, 31:16; Ulangan 23:4

fo, amani fiang na Waidani, tuti yohong kamiei biuao isoi wang waworu fo nai foi wei ki. Wang nanai wiro manei siai deitawana kaha, mae mano sobu kamieifoi meiri andino deitawana ne."

Kaiwo arerai we jemati na Tiatira

¹⁸ Mayeai Yesusi medu we yau aha deyo, "Woi we we-waio na jemati Tiatira foi ton-inai:

Seng Allai ne Kaisungno urengfo uransairai ne tarai toyari adia denggararu paria tuti awengfo dedori toyari besi kasoia dedori foi, ne kaiwo we jematiwai finina;

¹⁹ Iwaitawang fianai aino menari wa ampa, amani kariri menemiwawuwa, meroaso yau wa, mefata inontarai wa tuti metawang mea na dadira rorong fe wa. Tuti iwaitawanai kontai we na fui ninai fi menari wa nanai fuba pari sewa reantenang meroasoa fo.

²⁰ Tonanai ki wape iparaise kaha we fisarawafeai menari wa, amani meroa we Isebeli, wiwingno deyo i mani Al-lai ne nabi demi ma dine foi. Wiwing nani sofa wawera nehu inontarai erufi we yau nesa bitoya paria tuti de-nausa we emaninawa tuti etangno fiang etohonai we ariiwangfesara fo.

²¹ Yohong rahida wei kawuru we daraberahi weru ne sasari maninawa nani faini, manamo merira.

²² Ampefe ikafa kang-gunia meninang ambori sodai dadirafo, tuti mandoni saino enari maninawafo

riati mani, yohonsa esodai dadirafo pari riati kontai. Tuti efotou enari sasarifo kaha mani, ambori esodai aiboi yohonai tonanai wesa fo ki.

²³ Ne inontarai erariati fosa, ahusa we ne arikang-fosa, kontai imunsa weruai. Inari tonanai ambori je-matinei kiai ewaitawanai we yauno iwati bau kaiwasa enumikamieifoi tuti ene-mirorongfoi ne. Tuti ewaitawanai we yohong aiboifo we mansiari-mansiari kariri sasari enariri foi ki.

²⁴ Wape mea siai na jemati Tiatira wai, wiro metohong kariri Isebeli ne aunau kerira nani kaha, tuti wiro meru-rai we mewaitawang Samin-seni ne aunau werorong nani kaha. Fianai aino menari tonana fo demoyarai, wiro yohong kaiwoariri siai feai we metohong kaririai ahang kaha.

²⁵ Mae fianai aino mesobuai kawurua fo mani, amani mene meroasoa yau wa, merutawanaia mutu paria sobu rahida yarabera yau nai aha mau foi.

²⁶⁻²⁷ Mandoni dino doara mutu dirapa Saminseni pariao wereafo mani, tuti dohong kariri fianai aino yawi wea fo paria werea naya fo mani, ambori yohong mambiriuo wei ki, amani mambiriuo Dai na rorafaisi dohonai we yau fo. Ne tarai toyari nabi fafong fasa emadu kariri Mananu Mam-pariri foi ne mambiriuo eteyo,

'I ambori wemambiriw we yu kaiwasa na nunei fosa

kiai,
tuti disang kanggunsa na
ne aitatoihi besi foi
emangganggung
toyari isang kang-
gung awaing fe-
nanai ki.*

²⁸ Tuti yohongno awaha Am-
pari wei we fiembaitai kontai
ki.

²⁹ Mandoni dino wetarang
mani, tarao kaiwo Yesusi Nu-
aninufi medurai we jematif
kiai nina.”

3

Kaiwo arerai we jemati na Sardisi

¹ Mayeai Yesusi medu we
yau aha, deyo, “Woi we we-
wai na jemati Sardisi foi ton-
ina:

Mano Yu Allai Nuaninu
itu fo tuti Yu awaha itu
fo na warangfo, ne kaiwo
medura finina. Iwaitawang
fianai aino menari wa ampa.
Kaiwasa eteyo inontarai
metarang di mea, amani
meroaso yaua mutu. Wape
yeitawanai wiro tonanai
kaha, mae memararehara,
amani mene meroasoafu
tupa dawohi arorawa, toyari
metawera weru meroaso yau
fo tuti menemitawanai we
metohong kariri Hukumi
Musa soi foi ambori feriri
mea.

² Metoabari mea! Meru-
rai tuti mene meroasoao
adareti mareha nanai am-
bori mireha fanai, mae
darang aha. Weo iwati fio
menari wa wiro mai na Dai
Allai arongreafo kaha.

³ Ampefe mearomio kariri
fianai aino raminde nanai
mesobuai tuti metaramioai
nanai, amani kaiwo kariri
todoni ifariri mea na
meroaso yau fo, wiro na
metohong kariri Hukumi
Musai soi fo nani kaha.
Metohong kariri finanai
tuti meroaso yau terai we
ifariri mea, tuti metarabera
mea weru mene sasario
menemitawang Hukumi
Musai soi foi we feriri mea
fo. Wape metena pampang
tuti metoabari mea kaha
mani, ira tantuma mau rai,
nehu tarai toyari inontarai
da we kiamananapi, tuti wiro
mewaitawang kariri rahida
bodoni dino ira tantuma nai
tonanai mau ne kaha.

⁴ Tonanai ki, wape inon-
tarai na Sardisi wai manea
etanansiau weduarai, am-
pafe ene tarai toyari ewait-
awang wedua ene ansung
etatara fo ambori werarika
kaha, amani ewaitawang
wedua ene taraifoi weru
sasarifoi. Inontarai nanisa
mani emai, ambori eweriria
yau tuti rahida fui wanai
esansung ansung bua fo ki.

⁵ Mandoni dino doara
mutu dirapa Saminseni
pariao wereafo mani, am-
bori isansuni na ansung
bua fo toyarisa, tuti wiro
ifating wonongfo weru Buku
soi kariri inontaraio esobu
Waidani fosa nai foi kaha.
Tuti na Dai Allai tuti ne
wewaifosa earomireafo iroa
wei we i mani nehu inontarai
dine.

⁶ Mandoni dino wetarang
mani tarao kaiwo Allai Nu-

* 2:26-27 Masmuri 2:8-9

aninufi medurai we jematif
kiai nina."

*Kaiwo arerai we jemati na
Filadelfia*

⁷ Yesusi medu aha deyo,
"Woi we wewai na jemati
Filadelfia foi tonina:

Mano mirarebana foi tuti
wetarai foi, andino yu Dauti
ne aisu mananu foi ne, amani
ne mambiri fuba toyari
Mananu Dauti na fafongfa.
Fiai rahutu bei mani, wiro
manei ne mambiriufeai we
kifei ahang kaha, tuti kifei
mani manei wiro fiai ahang
kaha. Amani, rahutufoi tifai
weo tara nai to rang waworu
feai we yiwangno Hukumi
Musai soi foi. Yahudio eto-
hong kariri Hukum nanisa
kontaio wiro ewemambiriu
we ehobu rang waworu nani
ahang kaha. I mani, ne kaiwo
medura finina.

⁸ Iwaitawang fianai aino
menari wa ampa. Iwait-
awanai weo mefau kaha.
Wape metohong kariri nehu
Kaiwone tuti mefafora yau
kaha. Ampafe mewati! Ifai
rahutu bei tifai we mea
ampa, tuti rahutu nani
manei wiro wemambiriu we
kifei ahang kaha. Rahutu
nani mani ifariri mea na
meroaso yau terai fo, wiro
na metohong kariri Hukumi
Musai soi foi kaha.

⁹ Inontarai siai mano
enemitawang te erurai we
etohong kariri Hukumi
Musai soi foi we feririsa
fosa mani, eteyo ea mani
inontarai Yahudi tarai saine
tuti eteiaya yau Yesusi. Wape
inontarai nanisa epampamu
terai, weo wiro eweYahudi

na enemirorongfo kaha
mae, Saminseni neo in-
ontarai disa. Ea mani,
ambori inarisa era mau
etisangkapa eawemibukafo
na mearomireawa ki, tuti
ambori emadu eteyo, 'Tarai!
Mano meroaso te Yesusi wa
mea, Sempaisi enewawu
mea paria!

¹⁰ Metohong kariri nehu
Kaiwone na mai paria, amani
metawang mea ampa na
dadira rorong wa, ampare
yau kontai ambori yemang
wedua mea na rahida nunei
sentenang sodai dadira pari
fe nai foi ki. Rahida nani
mani kaiwasa na nunei kiai
sobu fiweanggarisafo we
etawai ki. Wape mea mani,
yemang wedua mea.

¹¹ Waroi ahang kahai
mae ira mau rai, ampare
fianai aino mesobuaia fo,
amani mene meroaso yau
wa, merutawanaia mutu,
ambori fiembaitao Allai
meinenamai we meara wa,
wiro manei kia weru mea
fanai.

¹² Mandoni dino doara
mutu dirapa Saminseni
pariao wereafo mani,
wenani ambori minohia
pepayai we fitawafa na
Waidani. Ne tarai toyario
dirio doaria pepayai tuti
munu bei, tonanai kontai,
yau ambori ikutuaifa we
minohia mutu na Allai ne
Munufoi na Waidani ki. Tuti
ambori isoi Allai wonongfo
nai, tuti Allai ne bendari
wonongfo nai kontai, amani
Yerusalem weworu foi,
bendario ambori bia nano
Allai na rorafaisi meu foi.
Tuti isoi wonohu weworu ne

na ne taraifoi kontai ki.

¹³ Mandoni dino wetarang mani tarao kaiwo Allai Nuaninufi medurai we jematiifi kiai nina."

Kaiwo arerai we jemati na Laodikia

¹⁴ Yesusi medu aha deyo, "Woi weo wewai na jemati Laodikia foi tonina:

Mano wonongno *Antu* foi, i mani mano deiriri kaiwofo na mai tuti na wetarai dine. Tuti fi fubao Allai niariri na nunei kiai ne mani weneung nai. I mani ne kaiwo arerai we jematiwai finina.

¹⁵ Iwaitawang kariri fianai aino menari wa ampa. Amani mene meroasoawa wiyo maninggapoi ete danunanang kaha, toyari meraria yau pari kaha, tuti metawing mene meroaso yau wa pari kahai kontai. Ne tonanane karira paria! Denteng mani, merurai paria we meraria yau na mai, ete bireri mani metawing yau beyari finanaia.

¹⁶ Wape wiyo menari tonana kaha, mae mene meroasoawa kifikafayai, amani menemiawera na mene meroasoawa, ete meroaso yau kuteai terai, ampare ikasou mea pariao ambori ikandi mea to boriae weru borohunei ki.

¹⁷ Memadu meteyo, 'Inontarai amene fi di amea, amesobu ra bitoyara, wiyo amene pari wefiea kaha.' Memadu tonanai wape mewaitawana kahai weo na mene meroasoawa mani, mene obu fiea kahaifa ne ne? Mekaharia

mebeng kahai, meuremiwa fafa, tuti menayai arora.

¹⁸ Ampafe yeunau mea mau we todoni mani meworio fi mai fo ria yau, amani emasio mai sewa fo we mene ra, ambori na Sempaisi arongreafo mani mene ra bitoya, tuti mewori ansung bua fo we mesansung nai ambori menayai arora tuti memamaya ahang kaha. Kontai rawangno ufi tauremine naya fo ambori metufi meuremiwa naya mani mewati aha.

¹⁹ Mandoni dino enehuwawuti fo mani, niari sarawa mani isuari tuti yohong aiboifo wei we yeunauwi nai. Ampafe isua mea, yohong aiboifo we mea tonina ne mani, merurai paria tuti metarabera mea weru mene sasariwai ambori mene meroaso yau wa wiyo kifikafayai ahang fanai.

²⁰ Mewati! Ira mau yoa na mene rahutu borong wa mae yutanai. Mandoni dino taraoai tuti fiai rahutufoi we yau mani, ambori ira wei afui tuti iminohi yampi riati tuti dampi ria yau kontai.

²¹ Mandoni dino doaria mutu dirapa Saminseni pariao wereafo mani, ambori iroa wei we minohi ria yau na nehu kadera mananu nei. Kariri yau we yoara mutu yirapa Saminseni fo, ampare iminohi ria Dai Allai na ne kadera mananu fe nina.

²² Mandoni dino wetarang mani, tarao kaiwo Yesusi Nuaninufi medurai we jematiifi kiai nina."

4

Yohanesi deti fi kariri Allai ne mananufo

¹ Mayeai iwati fieai aha, amani iwati rahutu bei na rorafaisi tifai. Ainanya tarahuo mano anta medu we yau na rawafui fiebai toyario songgerifo, medu we yau nariai aha deyo "Bautai toninai meai, we yeinawi kariri fianai aino ambori kawariai aha fo we wau."

² Na tatofang nanai kontaio, Allai Nuaninufoi sensoni yau. Ainanya iwati kadera mananu bei na Waidani tuti manei minohi nai.

³ Wenani keiwewa toyari kamieio keiwewa ne harga dedai, amani kamieio memarampoti esahui we intan, tuti kamieio berika esahui we sardisi fenanai. Tuti aewi bei doa woruwi na katai minohi nai foi. Aewi nani ne tarai kariri kamieio ne harga dedai bei, amani kamieio keiwewa, esahui we zamrud.

⁴ Na katai nani kontai iwati kadera mananu fo piareia boa tuang wariri, tuti mano eminohi naya fosa mani, mano ewewafonai ewepi-areia mana fosa. Ansung etatara fo bua karofari tuti etata sapewi mananu fo na enumifo, sapewi nanai enari na emasi kiai.

⁵ Tuti na kadera mananu foi nani iwati kaiwewa kewariai nai tuti kadidu dotu tuti nubuayai nai. Mae na arongfo, oborio itu doa danggararu naya. Obori nanai deinawi karirio Allai Nuaninu itu fo.

⁶ Tutti iwati rawanang bei mani, ne tarai toyario kasinai wiatai na arongreafao, memarampoti paria.

Mae iwati fidarang mana etoari na katai kadera mananu foi warabuka boa fo. Euremifo bitoya paria, amani bitoya na earomifo tuti bitoya na ehurumifo.

⁷ Fidarang mano reantennang foi ne tarai toyario singa, mano mandu foi ne tarai toyario sapi mang maneui, mano mantoru foi mani ureng toyario inontarai, tuti mano mana foi ne tarai toyario koroweio yera warapemafoi we sifo.

⁸ Tutti ewaramipemafo aiwonang, na ene taraifoi sentenang weureng, tuti na ewaramipema arowawahfo kontai weureng. Diru rahida erohi pampang efiai Allai. Erohi eteyo,

"Seng Allai wau, mu-
rarebanai, mu-
rarebanai, mu-
rarebanai,

Mano Wemananu Dedai
Mantaung di wau,

Mano nayai kawuru na re-
antenang pari foa foi
di wau,

Mano nayai pariao sobu
rahida bonini,

tuti Mano nayai pampang
we fitawafa di wau."

⁹ Mano fidarang mana nanisa erohi rarungfoi we efiai Allai mano minohi na ne kadera mananu foi nani, amani mano minohi wenumainufo. Etaparan-dini, esomi wei, tuti etohong

mahikai wei. Erohi efiai tonanafo,

¹⁰ mano ewewafoniai fosa, amani mano ewepiareia mana fosa, etawai aweu etisangkapa eawemibukafo na Mano Darang Wefitawafa foi arongreafo, esomi wei tuti efating ene sapewi mananu fo etohonai watai na arongreafo tuti emadu eteyo,

¹¹ “Dai Allai amene Sengne wau,

Meiri wauno mosi we amefiai waune.

Meiri wauno weMananunei.

Wauno ametaparanding wau,

Amesomi we wau tuti ametohong mahikai we waune.

Weo wauno nari fi fuba nini kiai ne.

Tuti nariri kariri nemu bawia wa ne.”

5

Buku reraungno kafaria mitu foi tuti Domba Antung foi

¹ Mayeai iwati mano minohi na ne kadera mananu foi yuo buku reraungno kafaria bei na warang domoya foi. Buku reraungfoi dowani donini sefang na kaiwoariri, tuti taha weduaria mitu na segel kesi itu (7).

² Ainanya iwati wewai wemambiriu manei medu na rawafui fiabai deyo, “Mandoni dino mesi we fioabuo segel kesi itu fo tuti fiorera buku reraungfoi ne?”

³ Wape na rorafaisi ete na nunei, ete na kofa rorong wau kontaio, manei wiro mesi we fiai kaha tuti deto

kaiwo nayai na rorongfoi kaha.

⁴ Tarahuo kaiwofo nanai isaia yeidu, weo wiro obu manei mesi we fiorera bukufoi tuti deti rorongfoi kaha fefe.

⁵ Ainanya manei na mano ewewafoniai fosa medu we yau deyo, “Wai fanai! Boti! Inontarai manei, wonong fino *Singa Na Yehudai*, ahui we *Riria Na Dauti* kontai, andino kiraikobu Saminseni. Meiri andino mesi we fiosabu segel kesi itufo tuti fiorera buku reraungfoi ne.”

⁶ Mayeai iwati Domba Antung manei doa rahana na kadera mananu foi, tuti fidarang mana fosa, tuti mano ewewafoniai fosa. Domba Antung foi iwatioi na ne taraiifo pesai fari bitoya to-yari emuni kawurua fenana. Nungkaradoi itu tuti ureng itu kontai. Nungkaradoi itu fo deinawi ne mambiriu fuba fo, tuti ureng itu fo deinawi Allai Nuaininu ituo denatuai we nunei sentenang ne.

⁷ Ainanya Domba Antung foi saha afong yuo buku reraung kafaria mitu foi ria mano minohi na kadera mananu foi warang domoya foi.

⁸ Na kutu warawa yuo buku reraungfoi nana fo, fidarang mana fosa tuti mano ewewafoniai piareia mana fosa etawai aweu etisangkapa eawemibukafo na arongreafo. Eru kecapifo tuti rewanguainofio enari na emasi fo, rewanguainofi nanai esoni finunsai mamporio deinawi Allai ne

inontarai emararebana fosa
ene nadifo.

⁹ Tutierohi rarung weworu
rowei dotu tono:

“Wau mosi we ka buku
reraung kafaria mitu
nani ne,
tuti fosabu segeli taha
weduardi nai foi ne.

Weo emung waua mureha
ampa,

tuti na nemu rika ti-
wowu nani,

bai kutu inontarai fuba
nunei kiai,

we Allai ampa,

amani inontarai na riria
bodoni kontai,

na kaiwo bodoni kontai,
tuti na nu bodoni kontai.

¹⁰ Ruai inontarai nanisa kiai
we nemu inontarai
we eminohi na nemu
Mananuwa,
tuti ambori we eweimami,
we erufi we tane Seng Al-
lai,
tuti eru nunei ki.”

¹¹ Mayeai iwati tuti
itarahuo wewai katui ahang
kaha, bitoya paria ne fiaufo
tarahio 1.000 we1.000, tuti
10.000 we10.000, wiro ato
afonso ne fiaufo kaha, etoa
wari kadera mananu foi,
tuti fidarang mana fosa, tuti
mano ewewafoniai fosa.

¹² Erohi na erawamifui fi-
abai eteyo,

“Domba Antungno emung
waua wa wau mosi,

Mosi we Allai yu wau we
weMananu,

Mosi we wobu ra we nemu,
Mosi we wobu Allai ne
awaifo,

Mosi we Allai dohong wau
wemambiriua,

Mosi we amesomi we wau,

Mosi we ametaparanding
wau,

Tuti mosi we amefiai wau.”

¹³ Ainanaya tarahuo in-
ontarai fuba nini kiai, tuti
andowa fuba nunei kiai,
amani mano na rorafaisisa,
na nuneisa, tuti na kofa
rorong wausa, erohi efiai
eteyo,

“Mano munohi na nemu
kadera mananu wai,
tuti Domba Antung wa
wau,

Muruino amefiai muru,
Muruino amesomi we muru,
Muruino ametaparanding
muru,

tuti muruino muwem-
ananu we fitawafa
ne.”

¹⁴ Fidarang mana fosa
eroatuba ene rarung-
foi eteyo, “Antu!” Tuti
mano ewewafoniai fosa
etisangkapa eawemibukafo
esomi we suru.

6

*Domba Antung foi fios-
abuo segeli wonang fafong fo
tutifio kawariai nayafo*

¹ Mayeai iwati Domba Antung
foi fiosabuo segeli itu fo
bo reantenang foi. Ainanaya
iwati fidarang mana fosa, tuti
manei nasa sahu na rawafui
fiabai toyari kadidu fenanai
deyo, “Ro ma!”

² Ampafe iwatia mani,
iwati kuda biua manei
kiawariai ma, tuti inontarai
manei dautai nai. Inontarai
manei yuo afai aburuei
na warangfo, tuti manei
dohong sapewi mananu
bei wei. Inontarai nani da
weinontarai wemambiriua

we miung woru ne aitetafosa kiai.

³ Mayeai iwatio Domba Antung foi fiosabu segeli bo boru foi aha tuti tarahuo fidarang mana fossa, manei siai medu aha deyo, "Ro ma!"

⁴ Ainanaya iwati kuda manei aha kiawariai aha ma. Kuda nani mani berika toyari abo. Mano dautai nai mani manei dohong sondu fiabai bei wei tuti dohong mambiriu wei we fiatng ne maifo weru nunei, ampafe wedaya inontarai nunesa eminohi na mai ahang kaha mae emamuna tuti emung wawerasa.

⁵ Mayeai Domba Antung foi fiosabu segeli bo botoru foi aha. Tutti tarahuo fidarang mana fossa, manei siai aha medu deyo, "Roma!" Ampafe iwati aha mani, iwati kuda niumentang manei. Mano dautai nai foi yu fititua maraba nai bei na warangfo.

⁶ Tarahuo rawafui bei medu rahanai na fidarang mana fossa, amani medu kariri aiboi kahari foi, deyo, "Pa denteng literi bei mani ne harga dedai paria, mai kariri manei yufi mani ne fiebaitai rahida bei fo, tutti pa denteng turura kaha foi kontaio literi botoru mani ne hargofo tonanai kontai. Wape ai saituni bongfoi tutti angguri bongfoi mani meiri fanai."

⁷ Mayeai Domba Antung foi fiosabu segeli bo boa foi aha. Tutti tarahuo fidarang mana fossa mano sea foi medu deyo, "Ro ma!"

⁸ Ainanaya iwati kuda manei aha wape ne tarai fidadiru toyari mirehara. Mano dautai nai foi wonong fino *Marareha*, tuti manei siai, wonong fino *Aitamu Marareha Rorong* fo, da riati na kurufuifo. Usobu mambiriu we urato kutu kaiwasa na nunei kiai we rabuang boa, tuti rabuang bei nasa mani ($\frac{1}{4}$), umunsa weruai. Kaiwasa nanisa umunsa na mamuna, na kahari tuti fimaninang fimung, tuti na andowa memuna foi.

⁹ Mayeai aha mani Domba Antung foi fiosabu nario segeli bo ring foi aha. Ainanaya iwati inontarai emarareha fossa enumian-inufo, enayai na mesba arowawahifo, amani mesba ne tarai kariri mesbao fa-fongfa enunung korbani we Allai nai foi. Ea mani mano kaiwasa emunsa weo ewuwu Seng Allai ne Kaiwo kariri Yesusi fo, tutti emadu eteyo Yesusi ene Seng dine, pariao wedaya emunsa tonana.

¹⁰ Esahu na erawamifui fiabai eteyo, "Sengno we-Mananu, murarebanai tutti tarai ne waune, kidoni wori kutu kaiwo kariri inontarai nunei fossa tutti inontaraio raminde emung amea fossa, tutti bohong aiboi fo wesa ki?"

¹¹ Ainanaya manei dohong ansung bua fo mai sa tutti medu wesa deyo, "Metawang mea metamang kuteai, pariao mene doroi tutti mene maniworiri fossa era ruhiae ma memai akawuru wo. Mene doroi tutti mene maniwowiri nanisa Allai

dirisa we ambori kaiwasa emunsara emarareha toyari raminde meara fo."

¹² Mayeai iwati Domba Antung foi fiosabu nari segeli bo wonang foi aha. Fiosabui tonana fo, mundiei fiabai bei fiorirouwai na mambiri, tuti wofaisi niumentang toyari ke fenanai, embaifo kontai berikahofi toyari rika.

¹³ Awahafaisi kontai tiafat-ing tuti tiraru to nunei aweu toyari deduka si kahutu ai-bong kendi fenanai.

¹⁴ Tuti rorafaisi kontai niai toyari riraung mintantunung wape wanangfoi siparia niai. Tuti uai tuti nufo kontaio tawera weru katai doa naya fo.

¹⁵ Ainanaya mananu fuba nunei kiai, inontarai baba fosa, mano ewenunggamie we afai mamuna fosa, mano ene fi fosa, mano ewemambiri fosa, kontai woming-fosa tuti inontarai siai wei fosa kiai, ewawua etadiwa na katai we winsaburungfo tuti manapahangfo na uai rei.

¹⁶ Mae esahu we uaifo tuti manapahangfo eteyo, "Tiru meu biritawang amea, bodiwa amea weru mano minohi na kadera mananu foi urengfo tuti weru Domba Antung foi ne kasoufo.

¹⁷ Weo rahida fuba Allai tuti Domba Antung foi urainawi une kasou fiabai fo we kaiwasa nunei foi andinini, tuti mandoni kontaio wemambiri we sodai ne tonanafo kaha."

7

Inontarai Israelio ewe-

144.000 esobu Allai ne fiainawiaifoi na ene taraifoi

¹ Mayeai iwati wewai mana, etoari na nunei rea boa ne, mae erutawang wanang urengfo kai ambori wiro siaya fanai, na rawanangrausi, ete na reirei tuti na ai rorong fo fanai.

² Ainanaya iwati wewai siai manei kiawariai na do wanang murang foi ma. Yuo Allai mano darang wefitawafa foi ne capifo na warangfo, tuti sahu na rawafui fiabai we wewai manao esobu mambiri we emei nunei na wanangfo nanisa.

³ Sahu wesa deyo, "Dohonao metawing wanangfo we mei rawanangrausi ete reireisi tuti ai rorong foi fanai, pariao amewecapi tane Seng Allai ne woming-fosa erewomifo na ne capinei akawuru wo."

⁴ Ainanaya tarahuai we kaiwasa wecapisa nanisa mani ewe-144.000, amani inontaraio dirisa na inontarai Israeli rabuangno ewesuraya boru fosa ene ririafoi saine.

⁵ Na riria Israelifo rabuang bei mani ewecapio ewe-12.000, amani:

Na Yehudai ne ririafoi ewe-12.000

Rubeni ne ririafoi ewe-12.000

Gati ne ririafoi ewe-12.000

⁶ Aseri ne ririafoi ewe-12.000

Naftali ne ririafoi ewe-12.000

Menaseri ne ririafoi ewe-12.000

⁷ Simeoni ne ririafoi ewe-12.000

Lewi ne ririafoi ewe-12.000
 Isakhari ne ririafoi ewe-
 12.000
⁸ Sebuluni ne ririafoi ewe-
 12.000
 Yusupi ne ririafoi ewe-
 12.000
 tuti Benyamini ne ririafoi
 kontai ewe-12.000.

*Kaiwasa bitoyao ato
 afonsoi kaha foi etoari na
 Allai tuti Domba Antung foi
 uaromireafo*

⁹ Mayeai iwati aha mani
 iwati kaiwasa katui ahang
 kaha, ato afonsoi kaha.
 Kaiwasa nanaisa mani inon-
 tarai fuba nunei kiai saine,
 amani inontarai na riria
 bodoni kontai, na kaiwo
 bodoni kontai, tuti na nu
 bodoni kontai. Esansunsa
 na ansung bua, etoari na
 kadera mananu foi refongfo
 tuti na Domba Antung foi
 arongreafu, tuti eru ai baya
 na ewaramifo.

¹⁰ Na erawamifui fiabai
 etaparanding Allai eteyo,

“Amefiai wau,
 amene Seng Allai,
 mano munohi na nemu
 kadera mananu wai!
 Tuti amefiai Domba Antung
 wa wau!
 Weo mumeiri muruino
 mufariri inontaraine
 amea ne!”

¹¹ Wewaifoi kiai etoa wari
 kadera mananu foi, tuti fid-
 darang mana fossa, tuti mano
 ewewafoniai ewepiareia
 mana fossa, etawai aweu
 etisangkapa eawemibukafo
 na kadera mananu refongfo
 tuti esomi we Allai eteyo,

¹² “Antu!
 Allai, amene Sengne wau,

meiri wauno amefiai
 waune
 tuti ametaparanding
 waune.
 Wauno wowai ne,
 ametohong mahikai we
 wau,
 tuti amesomi we wau.
 Wauno weMananune tuti
 wemambiriu we
 fitawafa ne.

Antu!”

¹³ Ainanaya mano ewewa-
 fonai fossa manei dutang yau
 deyo, “Mano esansung an-
 sung bua fo wanisa mani,
 mandoni saine, tuti era na
 doni ma?”

¹⁴ Ampafe iroa wei yevo,
 “Daie! Iseraweraha, wau
 boitawana ne.” Ainanaya
 medu we yau aha ma deyo,
 “Kaiwasa fuba nanisa mani
 inontaraio esodai karirafo
 paria na dadira fiabai rorong
 nanai kiai na nuwausi tuti
 era na dadira rorong nanai
 ma. Ea mani eruai ene
 ansungfo na Domba Antung
 foi ne rikafoi tuti enaria bua
 karofaria fo saine.

¹⁵ Nanai aino wedaya Allai
 yoa wesa we etoari na aron-
 gafe nina, tuti diru rahida
 ewewoming wei na ne Munu
 rorong fo. Tuti Allai, mano
 minohi na kadera mananu
 foi, ambori demang weduasa
 ki.

¹⁶ Wiro enumiruainso
 ewawisi na weai ahang
 kaha, tuti earomitataha
 na weai ahang kaha, wiro
 enumiruainso wofoi piasara
 esasora ahang kaha.

¹⁷ Weo Domba Antungno
 doa rahanai na kadera man-
 anu foi, andino ne tarai we
 mantahung we dehunsa ne.
 I ambori kiasa we etunung

mereha urengno dohong kaiwasa eminohi etarang we fitawafa foi ki, tuti Allai ambori dufi euremikurufo ki."

8

Segeli bo itu foi, Domba Antung foi fiosabui

¹ Mayeai Domba Antung foi fiosabu segeli bo itu foi nanai, rorafaisi wewui beyari paria araha ureng aburung fea.

² Ainanaya iwati wewai itu etoari na Allai arong-greafo, tuti manei dohongno songgeri itu wesa.

³ Mayeai iwatio wewai siai manei kiao nofi nunung finunsai mampori naio nariri na emasi foi, da wa doari na mesba arongfo. Tuti manei dohong finunsai mampori bitoya weia we niunung ria inontarai eroaso fosa ene nadifo na mesbafoi, na kadera mananu foi refongfo.

⁴ Ampafe riraungno finiunsai mamporio wewaifoi niunumi foi, dautai ria mano eroaso Yesusi fosa ene nadifo we Allai ayai, na nofio niunung finiunsai mamporio yuti na warangfoi.

⁵ Mayeai wewaifoi da wa kia adiafo na mesbafoi ma, soniai to nofi niunung finunsai mamporio yuti na warangfoi, tuti kifa kangguni to nuwausi aweu. Ampafe kadidufoi sarabau kahofa wau tuti kaiwewafoi keiwewari bitoya paria, tuti mundiei fiabaitureha bei fiorirouwai na mambiriu.

Wewaifosa ebui songgeri wonang foi fafong

⁶ Finanaia kaifo, wewai itufo emainenang we ebui songgeri ituo eru fo.

⁷ Ainanaya wewai mano reantenang foi biuio songgeri bo reantenang foi, mayeai na tantuma metang kamiei foi miung, metang nani miung-tuti adiafoi tuti rikafoi to nuwausi aweu, wedaya nuo ato kutuwi we betoru foi, adia kaso weai (½). Tonanai kontai we ai tifu foi, amani kutuwi we betoru foi adia kaso do weai tonanai kontai, tuti ninoi kehe foi, adia kasoi kiai.

⁸ Mayeai wewai mano mandu foi biui nari songgeri bo boru foi aha, ainanaya iwati manei so fi ne tarai toyari uai fiabai denggararu toyari adia bei to rawanang-foi aweu. Wedaya rawanang-foi ato kutuwi we betoru foi kontai dowej (½) werikara sentenang.

⁹ Tuti fi niai nai foi kontai ato kutuwi we betoru foi, dowej (½) mirehara kiai; tonanai kontai we kaparifoi kiai, ato kutuwi we betoru kontai, dowej (½) deisui ete kerira kiai.

¹⁰ Mayeai wewai mano mantoru foi biui ne songgeri yuti foi aha, ainanaya awaha fuba bei denggararu toyari antironi fenanai, sawai na rorafaisi to wayafo aweu, wedaya waya tuti mereha ureng fo na nunei ato kutuwai we betoru, dowej (½) pirandima kiai.

¹¹ Awaha nani wonong fino *Pirandima*. Ampafe dohong wayafo tuti mereha ureng fo dowej tonanai parandima

wedaya inontarai bitoya emarareha weo etunung merehafo fefe.

¹² Mayeai wewai mano mana foi biui ne songgerifoi aha, ainanaya iwati fieai bioi kobi wofoi ampefe bauri we betoru mani dowej (%) kerirawao mamantiti. Tonanai we embaifoi tuti awahafo kontai. Finanai kiai wedaya rahidafoi atori we betoru mani, dowej (%) mamantiti, tuti dirufo tonanai kontai, atori we betoru mani, dowej (%) awahafoi tuti embaifoi wiwo danggararu kaha.

¹³ Mayeai iwati aha mani, iwati romu korowei maneisifo kefang aweu kahai, mae sahu na rawafui fiabai deyo, "Karirao! Karira! Karira paria we inontarai nuwai mea, weo na rabuang bo wewai mantoru fui fo sitoru itobui itone songgeri botoru fo aha mani, mesodai karirafo paria na fi karira botoru fo ki."

9

¹ Mayeai wewai mano ring foi biui ne songgerifoi aha, tuti iwati awaha bei sawai na rorafaisi to nuwausi aweu. Manei dohongno aisufoi we awahafoi, ambori fiai Kamirei Berorong foi* nai.

² Ainanya fiai Kamirei Berorong foi tuti riraungfoi kiawariai na kamirei rorong fo ayai. Riraungfoi mintantunung toyari kafafe niumentang fenanai, awa tebung wedua wofoia sambe-warai nariai ahang kaha tuti

rorafaisi kontai memantiti beyari.

³ Tuti mansonggeri katui ahang kahai kiawariai na riraung rorong foi aweu sinsung nunei. Mansonggeri nanisa esobu mambiriwe etisang mani damirai toyari amafiahia.

⁴ Mano demisa foi, deretawansa weo wiwo emei aifoi, ninoifoi ete fitantanang siai wei foi fanai. Mae etisang te inontaraio wiwo esobu Allai ne capifoi na erewomifo kaha fosa terai.

⁵ Wape wiwo esobu mambiriwe ewedayasa emarareha kahai, mae ene memufoi wedayasa etamirai beng kaha paria embairing. Ene memuo wedayasa etamirafo ne tarai toyario amafiahia we disang manei mani damira fenanai.

⁶ Na rabuang bonani kaiwasa nanisa enimirorong dohong paria we emarareha terai, wape mararehafoi toyari niayai waroi werusa.

⁷ Mansonggerifosa ene tarai toyario kudao meinennang we memuna. Na enumifo etata fi ne tarai toyari sapewi mananu, nariri na emasi, mae euremi toyari inontarai.

⁸ Enumirandaungfo dawariroi toyari wiwing enumirandaung, tuti ederemi toyari singa dereng.

⁹ Earomifo tabung weduarai na fi ne tarai toyario ansung besi. Tuti esifo mani ewaramipemafo nubuayai

* **9:1** Amani kamireio etamu Saminseni tuti neo raifosa nai, pariao esobu aiboi na rahida Sengnei kiutu kaiwo nai foi.

toyari kuda bitoya paria
emito rifu oto mamuna
fo to mamuna rorong ne
nubuayafo nanai.

¹⁰ Eamamindaung kariri
amafiahia tuti weababo to-
nanai. Ene mambiriuo
nayai na eamamindaung
nanai, we etisang inon-
tarafosa nayai, tuti wedayasa
etamirai paria we
embai ring.

¹¹ Ene mananuo wenunggamiei wesa foi mani,
wewaio wenunggamiei we
Kamirei Berorong foi dine.
Wonongfo na kaiwo Iberani
mani esahui we Abadoni,
mae na kaiwo Yunani mani
esahui we Apolioni. (Nana
mani *Mano Niari Fi Karira*.)

¹² Fi kia karira fo ne reante-
nangfe tawera ampa. Wape
beruo ambori da aha ma ki.

¹³ Mayeai wewai mano wonang
foi biui ne songgeri yuti
foi aha. Ainanaya tarahu rawafui
bei kiawariai na mesba emasio wiatai na Allai
arongreafoi, nungkaradoi
boa fo.

¹⁴ Rawafuifoi medu we
wewai mano wonang foi
deyo, "Bisuo wewai manao
eworasa etoari na waya
fiabai Efrati foi."

¹⁵ Ampafe da wa disuo we-
wai mana fo sara, weo waroi
ampa etamang we ne diru
neungfo mai, amani emaine-
nansa terai we ene defuinafo,
embaifo, rahida tuti araha
ureng mai we era. Tuti era
weo emungno inontarai na
nuneisa, ato kutusa we betorua
mani, emung rabuang bei (%) .

¹⁶ Tarahu rawafui bei
deikaririai we yau deyo, afaia
mamunao etautai na kudafo
era ria wewai mana fosa
nanisa mani ewe-200 juta.

¹⁷ Tuti na fiainawiai iwatioa
fo mani, ihati afaia mamuna
fosa tuti kudao etautai
nai fo nanisa mani, afaifosa
esansung ansungno besia
ehai. Ansung besi etatara
fo mani arongfo barikahof
toyari adia, kahe rawanderi,
tutti baming toyari kamie
belerang. Mae kudafosa
mani, enumikamieifo toyari
singa. Adia, riraung, tuti belerang
kawariai na eboromifo
ariei.

¹⁸ Fi betoru kawariai
na kuda eboromifo ariei
nanai ne tarai we fimung,
wedaya inontarainesa kiai,
ato kutusa webetorua mani,
rabuang bei (%) na sa mi-
rarehara kiai.

¹⁹ Kudafosa ene mambiri
wedaya inontarai emarareha
nai nanai, nayai na
eboromifo tuti na eamamindaungfo.
Weo eamamindaungfo wenungkamiei
toyari tawai nungkamei, tuti
na eamamindaung nanai
enari kanggani tuti emung
inontarai nai.

²⁰ Wape kaiwasa bitoya foi,
amani ne seo emarareha
na fimung nani kaha fosa,
wiro ematai we etarabera
weru ene sasari enariri foi
kaha. Wiro efotou esomi
we arowuifoi kahai, ariri-
wangno enariri na emasi,
peraki, tembaga, kamie tuti
ai foi kaha. Fi esomi weai
tonana fo wiro weureng
we deti kahai, wetarang

we tarao kaiwo kahai, tuti weaweng we da kahai.

²¹ Ea kontai wiro etawing fi kerira enariri foi kaha, toyari emung inontarai fo, eha rawang fo, emaninawa funoma fo, tuti ehamananapifo kaha.

10

Wewai tuti buku reraungno ketui foi

¹ Mayeai iwati wewai siai manei aha. Wewai nani we-mambiri paria, biari na rorafaisi meu. Ne tarai kariri sensuni na kafafe bei, tuti aewi bei doa na nungfoi. Urengfo sambewarai toyari wo sambewarai mae awengfo ne tarai toyari aisiyang fiabai deggararu fenanai.

² Na warangfo yu buku ketuio rerawi kawurua bei. Biari meu, aweng bo domoya foi doa sau rawanangrausi mae aweng doweい foi doa sau reitahafoi.

³ Sahu na rawafui fiabai paria, ne fiabaifoi toyari singa manei bibe, tuti kadidu itu dotu tuba rawafuifoi aha, toyari eroao ne kaiwofo.

⁴ Kadidu itu fo dotu kai nanai yeo isoi kaiwo tarahuoi nanai, manamo tarahuoi rawafui bei medu we yau na rorafaisi deyo, "Wiro woi kaiwo taramuoai na kadidu itu fo nana fanai, mae taramuoai terai tuti nemuboruoaifa ra."

⁵ Ainanaya ika buku reraungfoi riati na warangfo ma tuti yani kariri deyo af. Yania mani, na borohune nuhuruainso memisi kariri aniwa ne maing, wape toni afui wori dohongno enemuwai memboni ki."

⁶ Tuti fefora na Allai wonongfo, mano darang wefitawafa foi, andino niari rorafaisi, nunei, rawanangrausi tuti fi kiai niayai nai foi. Fefora deyo, "Fianai aino Sengnei kiutuai we niari fo, finanai wiro fioukirai ahang kaha.

⁷ Wape na rahidao wewai mano itu foi biui songgeri bo itu foi mani, fianai aino Allai kiutuai kawurua we niari fo, pariao ninai dediwara nendai fo, dohong kaririai ki, kariri Kaiwo Mahikai medurai we ne womingfesara fo, amani ne nabifosa."

⁸ Mayeai rawafui anta tarahuoi medu we yau na rorafaisi nani, medu aha deyo, "Roa, ka buku reraungno tirera kawurua foi ria wewaio doa sau rawanangrausi tuti reife nani na warangfo ma."

⁹ Ampafe ira we wewaifoia yutani we dohong buku reraungfoi we yau ma. Ampafe medu we yau deyo, "Karia tuti bani. Na boromuwa numuruainso memisi toyari aniwa ne maing, wape toni afui wori dohongno enemuwai memboni ki."

¹⁰ Ainanaya ika buku reraungfoi riati na warangfo ma tuti yani kariri deyo af. Yania mani, na borohune nuhuruainso memisi kariri aniwa ne maing, wape toni afui mani wedaya enehufuisi memboni paria.

¹¹ Ampafe manei medu we yau aha deyo, "Wuwuo Allai ne kaiwo dohonai we wau ne aha, kariri fio Allai deyo ambori niari nao nunei fo, amani fio niari we kaiwasa

na riria bitoya, inontarai na kaiwo bitoya, inontarai na nu bitoya, tuti we mananu bitoya kontai."

11

Kaiwo kariri Allai ne nabi mandu demi suru fosuru

¹ Mayeai manei dohongno ai rea titua fi nai bei we yau, tuti Allai medu deyo, "Ka fititua nai nani we roa titua nehu Munufoi na Yerusalem nai tuti mesbafoi. Tuti boto kariri kaiwasa esomi nai fosa maneiru.

² Wape munu refong boriei foi mani tituati fanai, weo katai nani mani yohoni terai we inontaraio etaroanso yau kaha fosa. Inontarai nanisa ambori eru bendari mirarebanai Yerusalemia embai piarua boru tuti emei kanggani ki.

³ Tuti ambori yohong mambiriwe nehu inontarai mandu we umadu nehu kaiwo yohonai we suru ne rahida 1260 ki, ete embai piarua boru. Inontarai nani suru usansung ansung toyari ansung karungfo, amani ansungno fafongfa nabi Israeli fossa esansuna fo."

⁴ Allai ne inontarai nani ansuruino, ahu suru we ai saituni roworu fo tuti pelita aweng boruo^{*} uroa na Allai, mano weSeng we nunei sentenang, arongreafu suruine.

⁵ Masino manea eteo enari karirafeai we suru mani, ambori adia kiawariai na uboromifo ariei we kasu mano enari kanggani suru nanisa ki. Ampefe une aiteta

enari kanggani suru nanisa, adiafoi kasosa emarareha tonanai.

⁶ Inontarai nani suru Allai dohong mambiriwe suru we ureiwedua metangfoi, ambori ming kahai paria rahida umadu kariri Allai ne kaiwofo werea naya fo. Usobu mambiriwe kontai we unari merehafoia werika tuti unari kanggani nunei na fimungfoi kiai kontai. Une mambiriwe unari finanai na rahida bodoni kontai ureo unari tonanafo.

⁷ Umadu kariri Allai ne kaiwofoa kaia mani, andowa memuna manei, amani andowa memuna sewa foi kiawariai na Kamirei Berorong foi meai, tuti na mamuna rorong fo dapa suru tuti ming surua umararehara.

⁸ Tuti une taraifoi wiatai funomai na rang fiabai foi na bendari fuba foi. Bendari fuba nani kataio raminde epahu Sengneia mireha sawai nai foi dine. Bendari nani mani wonong tatawa fino Sodomi tuti Mesiri, weo Sodomi tuti Mesiri kontaio unemirireu Sengfoi.

⁹ Uwatai na nanai rahida botoru aburung feai mae, kaiwasa na nunei sentenang, amani inontarai na riria bodoni kontai, na kaiwo bodoni kontai, tuti na nu bodoni konta fosa, era ma we esai suru. Tuti eteiwedua mandoni kontai we wiro eha surua esarai suru fanai.

¹⁰ Kaiwasa na nunei sentenang enemirireu suru ampefe efaraise we umararehafo, etohong mu niara tuti etohong fi waw-

* 11:4 Zakariai 4:1-3, 11-14

erahai wesa we etohonsua une mararehafo. Weo nabi nani suru unari kanggani inontarai nunesa paria fefe.

¹¹ Wape rahida botoru aburung feai aha mani Allai dohong ansengfoi we suru aha, ampareusuwi na marareha rorong foi aha ma tuti kaiwasafoi ewati suru we uroari na earomireafo nanisa emataia etaperemi kiota eboromifo.

¹² Mayeai Allai ne nabio duwi suru nani suru, utarami rawafui bei sahu na mambiriu na rorafaisi meu deyo, "Murautai meai." Ainanaya kafafe bei sea ma soru surua, kia suru urautai to rorafaisi na une aitetafosa eu-remireafo.

¹³ Na kutu nanai kontaio, mundiai fiabai turehi bei fio, wedaya bendari fuba foi, ato kutui wesura mani, ne katai besura nanai (10) mangganggung, tuti inontarai ewe-7.000 emarareha. Inontarai siai fosa, mano emarareha na mundiaifoi kaha fosa, ematai ebeng kaha wedaya etaparanding Allai na rorafaisi.

¹⁴ Fi kia karirafo ne beru fe tawera ampa. Mae mewati ne betorufe anseung kahai mae kawariai aha ki.

Songgeri bo itu foi tuti rarungno mano ewewafonai fosa erohi foi

¹⁵ Mayeai wewai mano itu foi biui songgeri bo itu foi aha, ainanaya tarahu rawafui bitoya na rorafaisi erohi na erawamifui fiabai eteyo, "Ninaia mani, nunei kiai, tuti nu bodoni kontai na

nunei sentenang, nayai na tane Sengnei tuti ne Mananu Mampariri foi, uwarami rorong fo ampa. Tuti Sengnei ambori wemananu we yu nunei we fitawafa."

¹⁶ Tuti mano ewewafonai-ao ewepiareia mana eminohi na kadera mananu piareia boa fo, na Allai arongrea fosa etawai aweu etisangkapa eawemibukafo, esomi we Allai.

¹⁷ Efiai eteyo, "Seng Allaio we Mananu Fuba Sewa wa wau, wauno nayai pampang ne tuti nayai kawuru na re-antenang pari foa foi.

Ametohong mahikai we wau, we boinawi nemu mambiriu fuba wa ampa, tuti wemananu we ru nunei to.

¹⁸ Kaiwasa etaroanso wau kaha fosa ehasoua etang wawerasa we wau, wape rahidafe mai ampa we boinawi nemu kasouwa tuti kutu kaiwo kariri mano emarareha fosa. Tuti rahida we bohong fiembaitafo we nemu womingfosa foi andinini, amani we nemu nabifosa tuti nemu inontarai emararebana fosa kiai, tuti mano etato wonomuwai fosa, katui ete fuba.

Tuti rahida we mungno mano emei kanggani nunei foi andinini."

¹⁹ Ainanaya Sempaisi ne Munufoi na rorafaisi tifai, tuti Buruao wiatai na munu rorong foi nani, wati pari, amani ne tarai kariri buruao fafongfa Allai ne Kaiwo Arerai dohonai we Musai fo watai nai foi dine. Kaiwe-wafoi keiwewari pampang, kadidufoi sara, mundiei

fiorirouwai, tuti metang para kamiei foi miung.

12

Wiwingfoi tuti tawai naga foi

¹ Ainanaya iwati fitantuma fiabai bei na rorafaisi, fitantuma nani dohong yau ipapuhung wei paria. Amani iwati wiwing manei ne tarai fo sambewarai weo sensuni na wofoi. Awengfo doa sau embaifoi tuti sata sapewi mananu weawaha suraya boru fo na nunggamieifoi.

² Wiwing nani wearikang tuti bibe weo nuruainso amaina pirahai we minohi.

³ Mayeai iwati fitantuma siai feai na rorafaisi aha. Amani iwati tawai naga fiabai sewa manei, ne tarai toyari tawai fiabaiturehi ete toyari wanggori fubateraha manei, berikahofi toyari abo, mae nunggamieie itu, tuti nungkaradoi sura. Na nunggamieie itu fo sata sapewi mananu itu nai.

⁴ Kifa amandaungfoi na rorafaisi, kifafafating awaha bitoya tiafating to nunei meu. Neo fiaufo ato kutu awahafaisi kiai webetoru mani, fiau kariri rabuang bei (%) na rabuang botoru nanai. Tuti doari na wiwingno rerai we minohi nani arongreafao, weo demang we arikangfoi saubaunung mani soni.

⁵ Mayeai wiwingfoi minohi tuti arikangfoi, amani kaisung dine. Arikang nani andino ambori wemananu

we nunei sentenang, ne mambiri we yu nunei foi mani ne tarai toyari yuo aitatohi besi bei, amani ne mambiriufu fuba tuti yu nunei na tapapa. Nagafoi demang wei we soni tonanai, wape na tantuma wewai manei wewuri weru nagafoi, yuaisi to Allai tuti ne kadera mananu foa.

⁶ Mae wiwingfoi wewu ne tarai to katai manano wekamamieifoi, amani kataio Allai meinameni wei foi. Na katai nani etawawuti rahida 1260, ete embai piarua boru.

⁷ Tuti iwati mamuna fiabai na rorafaisi, amani Mikhaeli mano wenunggamieie we we-waifosa foi tuti ne wewaifosa emamuna we tawai naga foi tuti ne wewai erariati fosa, tuti emamuna wawerasa tonanai.

⁸ Wape emamunara mani, nagafoi tuti ne wewaifosa ewemambiri we etapa Mikhaeli tuti ne wewaifosa kaha. Ampafe ene pari katai na rorafaisi aha tuti etatasa weru rorafaisi.

⁹ Ehafa kanggung tawai naga fiabai foi aweu, amani tawai tawa na fafong faini dine, ahui we Saminseni ete inggirane, mano wiwiaing kaiwasa na nunei we era sarawai tuti enari sasari fine. Ampefe Mikhaeli tuti ne wewaifosa ehafa kangguni tuti ne wewaifosa weru rorafaisi to nunei meu.

¹⁰ Mayeai tarahu manei sahu na rawafui fiabai na rorafaisi deyo, "Rahida Allai feriri ne inontaraifosa, tuti deinawi ne mambiriufu, tuti weMananufo, tuti rahidao

Mananu Mampariri foi kontai deinawi ne mambiriufo we wemananu, ninaia mani kawariai ampa.

13 Weo mano dinggai tane doroifosa pampang, amani diru rahida dinggaisa na Allai urengreafoi, Mikhaeli tuti ne wewaifosa ehafa kangguni to nuwausi ampa.

14 Tane doroi eroaso fosa mani eharaikobu Saminseni ampa. Eharaikobui na Domba Antung foi ne rikafoi ne mambiriufoi, amani Yesus Kristusi ne rikafoi. Tuti eharaikobui na eteiairai weo Domba Antung foi ene Seng dine. Esobu dadira pariao emarareha kontai ki, wape emainenang we esodai ne nanai tuti wiro esu to fui weru ene Sengfoi kaha.

15 Ampafe rorawa wau murarising to! Tuti we mano menayai nai wa mea memararising kontai to! Wape karira we mano menayai na nuwai mea tuti na rawanangwai mea. Weo Saminseni biari kawuru to nuwai meuwa tuti kesoua dang wawerahi. Weo deitawanai we wiro sobu rahidafeai bitoya we niari ne karirafo ahang kaha."

16 Tawai naga foi detioai we ehafa kangguni to nunei meu fo nanai, dawi wiwing anta minohi tuti kaisung foi finanaya.

17 Wape wewaifosa etohongno romu korowei warapema fiabai boru we wiwingfoi, ampafe sifo weru nagafoi to katai emainenami

weia foi, amani na katai minano wekamamieie foi. Tuti na wanai Allai ambori dewawuti paria defuina botoru aburung fea.

¹⁵ Ainanaya nagafoi boroabi mereha fiabai foi na borongfo rufang wiwingfoi. Mereha nani ne tarai toyari waya we dedapa wiwingfoi weru katai niayai nai foi.

¹⁶ Wape nunei fiata wiwingfoi ne tarai toyari fiai borongfoi we song mereha nagafi boroabiriri nani kiai to kofa.

¹⁷ Tawai naga foi kesoua dang wawerahi paria we wiro miung wiwingfoi kaha fefe. Ampafe da rufang wiwingfoi ne arikang siai fosa aha, amani inontaraio etohong kariri Allai ne Kaiwofo tuti eteyo Yesusi mani ene Seng dine fosa. Da wa kiontai ne rai mamuna fosa weo emamuna wesa.

¹⁸ Tuti da wa doari na nafarengfo, kesou paria.

13

Andowa kiawariai na rawanangfoi

¹ Ainanaya iwati andowa memuna manei, kiawariai na rawanangfoi meai. Andowa nani nungkamieie itu tuti nungkaradoi sura. Na nungkaradoi sura fo sata sapewi mananu sura nai. Mae na nungkamieie itu fo soi wang deibera Allai nai fo.

² Andowa nani ne tarai toyari macan tutul.* Awereengfo toyari beruang

* 13:2 Macan tutul mani nehi fiabai memuna toyari harimau.

awereng, mae borongfo toyari singa borong. Andowa nini, tawai naga foi dohong mantauni ne mambiriufu tuti ne mananufo wei we wemananu fuba.

³ Iwati na nungkamiei itu fo bei kifari fiabai paria. Fari nani todoni kontai wedayari mireha rai, wape wiro mireha kahai tuti farifoi denteng ampa. Finanai wedaya inontarai nunesa kiai epapuhung weai paria tuti era riati.

⁴ Kaiwasafai esomi we tawai naga foi weo mambiriufu dohonai we andowafi fo, tuti esomi we andowafoi kontai. Efiai eteyo, "Mandoni kontao ne mambiriufu mai andowa nini kaha. Tuti mandoni wemambiriufu we dapai rai?"

⁵ Andowafoi sobu mambiriufu weo bioi arongfo deparanding berahi tuti deibabera Allai. Sобу mambiriufu kontai we wemananu na nunei embai piarua boru.

⁶ Fioai borong we deibera Allai tuti deikaherao wonongfo, katai dedai minohi nai foi, tuti inontarai fuba enayai na rorafaisi fosa.

⁷ Sобу mambiriufu we memuna we Allai ne inontarai emararebana fosa tuti kiraikobusa. Sобу mambiriufu kontai we yu kaiwasa nunei kiai, amani inontarai na riria bodoni kontai, na kaiwo bodoni kontai, tuti na nu bodoni kontai.

⁸ Andowa nani kaiwasa fuba nunei kiai esomi wei tantenang, amani kaiwasao wiro ewonomifo watai na Domba Antung foi, mano emuni mirehara foi, ne

Bukufoi kaha. Buku nani, nafafong pario Allai niari nunei kaharai mae, soi kawuru na Buku nani kariri inontarai esobu Waidani fosa foi.

⁹ Mandoni dino wetarang mani tarao kaiwo nina.

¹⁰ Mandoni kontao, mano eroasoai tuti mano eroasoai kaha fo, mandoni dino Allai kiutuai we eru aitamusoi mani, todoni kontai wenani ambori eru aitamusoi kaririai ki.

Tuti mandoni dino Allai kiutuai kawurua we mireha na fimamunafo mani, todoni kontai wenani ambori inontarai emuni kaririai ki. Ampefe inontarai emararebana fosa, todoni kontai etawansa na dadira esodairai ria andowafoi fo, tuti eroasoia mutu, wiro esu to fui fanai.

Andowa siai kiawariai na reitahafoi

¹¹ Mayeai iwati andowa siai manei kiawariai na reitahafoi aha. Andowa nani nungkaradoi boru, une tarai toyari domba antung nungkaradoi, wape rawafuifoi toyari tawai naga rawafuifoi.

¹² Na andowa mano reantenang foi ne mambiriufu tuti na wonongfo, wedaya kaiwasa fuba nunei kiai esomi we andowa reantenang foi, mano ne kahaifoi dentengna foi.

¹³ Niari fitantuma fiabai tuti flainawiai bitoya. Ampafe na kaiwasa bitoya foi earomireafo, niari adia bei biari na rorafaisi to nunei meu.

¹⁴ Niari fitantuma tonanai na andowa reantenang foi

14

Domba Antung foi tuti ne inontarai ewe-144.000 fosa

wonongfo tuti na ne mambiriufoi, ampefe na fitantuma nanai, weanggari kaiwasa fuba niyai na nufi nini kiai, tuti demisa enari aririwang manei ambori esomi we andowa reantenang foi nai, amani mano kifari na sondubei, wape denteng ampa.

¹⁵ Tuti sobu mambiriu kontai we niari aririwangfoia darang, medu tuti yurai, ampare miungno kaiwasa fuba eteiyari fosa.

¹⁶ Andowa mano wefisia foi denggoa kaiwasafrai kiai we esobu fiainawiai na ewarami domoya foi ete na erewomifo, amani kaiwasa nunei kiai, katui tuti fuba, mano ene fi tuti mano bireri fosa, womingfosa tuti woming kaha fosa kontai, tuti mandoni kontai, we esobu fiainawiai na ewarami domoya foi ete na erewomifo.

¹⁷ Ampefe mandoni dino wiro sobu fiainawiai nana na ne taraifoi kaha, wiro dawayangfi ete wewori fi ahang kaha. Tuti fiainawiai nani mani, wonongno andowa reantenang foi, ete angka kariri wonongfo.

¹⁸ Ampafe we waitawang kariri fi ninaifa mani, todoni kontaio obu aunaupo. Mandoni dino sewai mani, ambori deto kariri angkao deinawi kariri andowafoi nani, amani deto ruhi angkao ene nomorifo ambori sobu angka we wonongfo. Weo angka bonani mani kaiwo netawehai weo angka kariri inontarai. Ne angka mani 666.

¹ Mayeai iwati aha mani, iwati Domba Antung foi doa na uai Sioni. Tutti iwati inontarai ewe-144.000 etoari riati kontai. Inontarai nanisa na erewomifo kiai soi Domba Antung foi tuti tamang Seng Allai uwonomifo nayai.

² Tutti tarahuoi fi dotu fiabai paria na rorafaissi, nubuayai toyari mereha sabi na dofiro tutti toyari kadidu fiabai nubuayai fenanai. Fi dotu tarahuoi nani ne tarai toyari kaiwasa emei na musikio esahui we kecapifoi.

³ Ampafe iwati kaiwasa ewe-144.000 etoari na Allai arongreafao, fidarang mana fosa tuti mano ewewafoniai eminohi wari Seng Allai na ne kadera mananu fosa. Inontarai ewe-144.000 nanisa erohi rarung weworu bei, rarung nani manei siai wemambiriu we deitawani kaha. Kaiwasa ewe-144.000 nanisa mani Sengnei feririsa weru nuneia fo saine.

⁴ Ea mani, inontarai emararebanai toyari mano wiro etena ria wiwing kaha, mano wiro esomi we fieai siai kaha, tuti era ria Domba Antung foi to katai doni konta fosa. Inontarai nanisa Allai biai kutusa ampa na kaiwasa fuba nunei kiai. Ne tarai toyari inontarai etohongno fi reantenang esobuai na fi eru fo we Allai fo, ea kontai tonanai, amani mano reantenang ohonsa we Allai tuti Domba Antung foi saine.

⁵ Inontarai nanisa ewait-awang epampamu na wea kaha tuti enari sara fi kutea kahai arorawa.

*Wewai mantoru fositoru
tuti kaiwo itomadurafo*

⁶ Mayeai iwati wewai siai manei aha, iwatiao we sifo na rorafaisi. Wewai nani meine-nang we sahu tuti Allai ne Kaiwo Mahikaio, watai we numainu fo, amani ne Kaiwo Mahikai kariri Yesus Krisuti feriri kaiwasanei, sahu tutirai we kaiwasa fuba nunei kiai, amani we inontarai na riria bodoni kontai, na kaiwo bodoni kontai, tuti na nu bodoni kontai.

⁷ Wewaifoi medu na rawafui fiabai deyo, "Allai meiri andino memataiti tuti metaparandini ne. Weo rahidafe mai we kiutu kaiwo kariri nunei to. Mesomi wei, andino niari rorafaisi tuti nunei ne, rawanangrausi, tuti waya ureng fo."

⁸ Wewai mano reantenang foi medua kaia, mayeai iwati wewai mano sua ahang foi kiawariai aha ma tuti sahu deyo, "Misuh! to! Bendari fiabaio Babeli misuhi beyari ampa. Bendari nani dino raminde wedaya kaiwasa na katai doni kontai etunung ne angguri kerira foia emayeru emaninawa funomai. Amani wedayasa enari maino fikari-rafoi kiai."

⁹ Mayeai wewai manei aha, amani mano mantoru foi, kiawariai aha, tuti sahu na rawafui fiabai deyo, "Mandoni kontai esomi we andowafoi tuti ne aririwang-foi tuti esobu fiainawiafo na

rewomifo ete na ewaramifo fosa mani,

¹⁰ inontarai nanisa ambori Allai kesousa paria tuti sousa ahang kahai mae yu aiboisna mambiri paria. Ne kesou maraba fuba nanai ne tarai kariri sari angguri bitoya tono ne moki rorong foi pariao sefang paria, tuti etunumi kiai, nana mani esodai karira paria we Allai kesousa tonana fefe. Tuti ambori esodai dadirafo paria na Adiao webelerangno denggararu foi rorongfo ki, na wewai emararebana fosa earomireafo tuti na Domba Antung foi arongreafo.

¹¹ Adiao wedaya esodai dadirafe nani, wirow fefe na wea kaha. Ampafe inontaraio esomi we andowafoi ete ne aririwangfoi tuti esoi andowafoi wonongfo we fiainawiai na ene taraifo nanisa, ambori esodai dadirafo, diru rahida, pariao we fitawafa."

¹² Ampefe inontarai emararebana fosa, amani mano etohong kariri Allai ne Kaiwofo, tuti mano eroaso soia mutu, eraria Yesusi pampang, tuti wirow esu to fui kaha fosa, todoni kontai etawansa na dadira rorong esodaira fo ki.

¹³ Ainanaya itarahuo rawafui bei na rorafaisi, medu deyo, "Toi finina: Na ninai to fongna mani, mano eroaso Sempaisi fosa, emarareha mani, Allai mioansa paria." Tuti Allai Nuaninufoi yoa tubarai deyo, "Yo, tarai to! Ea ambori erufi aha ewaramitafa kaha, weo

esobu fiembaitafo na fi eru na nunei fo ki."

Allai kiutu kaiwo we nunei, ne tarai kariri mandohong romi deting ne aibong sanami fo

¹⁴ Ainanaya iwati aha mani, iwati kafafe biua bei na arohurea ne, tuti manei minohi nai. Wenani mani ne tarai kariri Kaisung Inontarai foi. Na nungkamieifoi mani satao sapewi mananu emasi bei nai, tuti yuo umbe sabiti reisa bei na warangfo.

¹⁵ Ainanaya iwati wewai manei siai aha kiawariai na Sempaisi ne Munufoi ariei tuti sahu we mano minohi na kafafe wowong foi fo na rawafuifoi fiabai deyo, "Ka nemu umbe sabiti wai we kutufi to, weo rahidafe mai ampa we kutu aibong na nuwausi ampa, we aibong na nuwausi miraia kiai ampa."

¹⁶ Ampefe mano minohi na kafafe wowong foi fiatting ne umbe sabiti foi kifari we kiutu aibong nuwausi kiai, tuti na tonanane fianduhu aibongfoi kiai kiari to ne kataia wiatai nai.

¹⁷ Ainanaya wewai manei siai aha da na Sempaisi ne Munufoi ariei. I kontai yu umbe sabiti reisa bei na warangfo.

¹⁸ Tuti wewai manei siai aha da na mesbafoi, amani wewaio yutawang adia we keso fi na mesba wowong fo. I kontai sahu na rawafuifoi fiabai we wewai mano anta yu umbe sabiti reisa foi fo

deyo, "Ka nemu umbe sabiti wai tuti kutu aibong angguri weru arirawangfo kiai, weo aibong angguri na nunei kiai mirai ampa."

¹⁹ Ampefe wewaifoi fiatting ne umbe sabiti foi kifari to nunei sentenang aweu, fianduhi aibong angguri fo kiai nai, akawurua soi tono katai fiabaio etaha kangguni nai bei. Katai etaha kanggung aibong angguri nai nani mani, kaiwo yiwansoai weo Allai ne kasoufo tuti todoni kesou inontarai nunesa paria fo.

²⁰ Aibong anggurine kiai etaha kangguni na katai etaha kanggung aibong angguri fo nai foi na bendari do borai fo, tuti rika deda nai, ne tarai toyari waya dedari. Rika nanai deda tonanai toyari wayao waroio kilometeri 300 teai, tuti berorongfo mani adareti meteri boru.*

15

Wewai itu fo tuti aiboi beitufu

¹ Mayeai iwati fitantuma fiabai bei na rorafaisi, fitantuma nani dohong yau ipapuhung wei paria. Amani iwati wewai ituo Allai demisa era ma we eboi nunei fosa na fimung itu fo. Na fimung itu nanai Allai ne kasou we inontarai na nunei fosa, kai finanaya.

² Tuti iwati fi ne tarai toyari rawanang kasinai bei, tuti adia denggararu nai. Na

* **14:20** 300 km. mani, na kaiwo Yunani mani soi '1.600 stadia'. Tuti berorongfo meteri boru mani, soi 'dedai kariri dedaio wai borongfo na kuda manei'.

rawanang kasinai foi dereungfo, iwati inontarai manea etoari nai. Inontarai nanisa mani inontaraio etirapa andowafoi, ne aririwangfoi, tuti ne angkao yiwang kariri wonongfoa fo saine. Etoa mae eru musikio esahuai we kecapifo na ewaramifo, kecapi nanai kecapio Allai dohonai wesa fine.

³ Etoa mae erohi rarung bei, amani rarungno raminde Allai ne womingno Musai yohi foi tuti Domba Antung foi yohi foi. Rarung nani dotu tonina:
 "Seng Allai wau weMananu pari sewa ne,
 fi nari wa fuba, wedaya kaiwasa epapuhung,
 tuti ehiri ewaramifo.

Wau mani weMananu we fitawafa,
 fiani kontai aino nari wa
 masi tuti wetarai.

⁴ Sengne waune, mandoni dino mitai wau kaha tuti deparanding wono- muwai kaha ne?

Weo meiri wauno mu- rarebana ne.

Kaiwasa na nu bodoni kontaio era ma esomi we wau,

We mandoni kontai deitawanai we fi masio nariri wai kiai wetarai."

⁵ Mayeai iwati aha mani, iwati rorongno Sempaisi minohi nai na ne Munufoi na rorafaisi tifai.

⁶ Ainanaya wewai ituo eha aiboi fimung beitu fosa etariai na Sempaisi ne Munufoi ariei. Ansung esansuna fo buao karofari toyari kaiwewa fenanai,

tuti na ansung esansuna fo arongfo, esoru ireu aburung enari na emasi feai.

⁷ Mayeai manei na fidarang mana fosa, dohongno rewanguai wenofi ituo enari na emasi fo we wewai itu fosa. Rewanguai wenofi nanai sefang na Allai, mano minohi na numainu foi, ne kasoufo. Aiboi nanai Allai dohonai we bioi nunei naya fine.

⁸ Tuti Seng Allai ne mambiriu fiabai foi, tuti ne sambe- waraio dadai fo, wedaya ne Munufoi sefang na riraung. Ampafe mandoni kontaio wiwo wemambiriu we suai afui kaha, paria aiboi beitu wewai itu fosa etohona fo kai.

16

Allai ne aiboi beituo bioi nunei naya fo

¹ Ainanaya tarahuo manei medu na rawafui fiabai na Allai ne Munufoi we wewai itu fosa deyo, "Mera wa mesari Allai ne kasouo watai na rewanguai wenofi fo to nuwausi aweu. Amani na ne aiboi beitu fo."

² Ainanaya wewai mano reantenang foi da wa wiowu Allai ne aiboi reantenangno meinameni na ne rewanguai wenofi yuti foi to nunei meu, we bioi nuwausi nai. Ampafe aiboi we- waifoi wiowui to reitahafoi nani wedaya mano esobu andowafoi ne capifo na ene taraifoi tuti esomi we ne aririwangfoi sa, esobu fimung, amani esodai fafororang kerira paria na ene

taraifoi tuti fafororang nani kiurunsa paria.

³ Mayeai aha mani wewai mano mandu foi da aha, tuti wiowu Allai ne aiboi bo boru foi meinenamei na ne rewangguai wenofi foi to rawanangfoi aha weu. Ampafe aiboi nanai wedaya rawanangfoi werika toyari rumang fenanai. Tuti finanai wedaya fifuba niai nai foi mirehara kiai.

⁴ Mayeai aha mani wewai mano mantoru foi, wiowu Allai ne aiboi bo botoruo meinenamei na ne rewangguai wenofi foi nani to wayafo tuti waya ureng fo aweu, wedaya wayafo tuti waya ureng fo werika kiai.

⁵ Ainanaya tarahuo wewai mano wenungkamieie we merehafo kiai foi medu deyo, "Allai wauno Murarebana ne, wauno nayaifa pampang paria sobu nina ne tuti nayai kawuru na reantenang pari foa foi di wau. Aiboi bohonai we nufi ninai masi paria.

⁶ Weo kaiwasa esodai aiboife ninisa, raminde emung nemu inontarai emararebana fosa kawuru ampa tuti nemu nabifosa ampa ampefe ene rikafo deda paria. Ampafe ea kontaio esodai nemu aiboi tonana fo, amani etunung rika nani. Tuti aiboi tonana fo masi paria we esodairai."

⁷ Ainanaya tarahuo rawafui bei na mesbafoi deyo, "Tarai! Seng Allai wauno weMananu pari sewa ne, aiboi bohongna wa wetarai tuti masi."

⁸ Mayeai wewai mano mana foi, wiowu Allai ne aiboi bo boa na ne rewangguai wenofi foi nani to wofoi aha. Wedaya wofoi meningkapoi fuba paria, tuti niunungrarafu inontaraifosa toyari adia rerafusa.

⁹ Ampefe wo meningkapoi nani, niunungrarafu ene taraifoia wekahai, wedaya eteibera mano dohong fi mung foi wonongfo, amani Allai. Esodai ne karirafo tonanai ki, wape wiro etaraberasa weru ene sasariifo kaha tuti etaparanding Allai kaha.

¹⁰ Mayeai wewai mano ring foi wiowu Allai ne aiboi na ne rewangguai wenofi foi nanai to andowafoi ne kadera mananu foia. Wedaya katai wemananu wei foi memantiti sentenang. Ampafe na mamantiti rorong nani, wedaya fimung esodairi foi damisa awao ehiri etaperemifo.

¹¹ Ampafe eteibera Allai na rorafaisi we fafororang dohonsa etamira foi tuti fimung siai wei fo. Esodai ne tonanafo, wape wiro emaya we etaraberasa weru sasari enariri foi kaha.

¹² Mayeai iwati wewai mano wonang foi aha, da wa wiowu Allai ne aiboi bo wonang na ne rewangguai wenofi foi nani to waya fubao Efrati aweu. Finanai wedaya wayafoi sirarang ambori meinengang we mananu na do wo dautai nai fosa era kutuai nai we emamuna.

¹³ Ainanaya iwati nuaninu

kerira mantoru, itone tarai toyari kidowa. Itohawariai na tawai naga foi, andowafoi tuti nabi tarai kaha foi itoboromifo ariei (nabi tarai kaha foi mani ahui kontai we andowa mano mandu foi dine*).

¹⁴ Finani sitoru mani, nuaninu kerira itonari fitantuma bitoya sitoru ne. Nuaninu kerira nani sitoru, itora wa itofanduhi mananu fuba nunei kiai we emamuna na rahida fubao Allai, Mano Wemananu pari sewa foi, kiutu kaiwo kariri nuneifo.

¹⁵ Sengnei medu deyo, "Metarami ma! Ira toyari inontarai kiamananapi mau rai. Mandoni dino denansiau weduarai tuti meinenaang pampang we deitawang ne ansungfo, ambori wiro da arora kaha tuti mimaya kaha, wenanai imoani paria."

¹⁶ Ainanaya nuaninu kerira fo sitoru, itofanduhi mananufosa na kataio na kaiwo Iberani mani esahui we Hermagedonifo.

¹⁷ Mayeai wewai mano itu foi, wiowu Allai ne aiboi meinenamei na ne rewangguai wenofi foi nani to rorafaisi meu. Ainanaya tarahuo manei suhu na rawafui fiabai na kadera mananu foi na Sempaisi ne Munufoi, deyo, "Allai ne aiboi fo kai finanaia!"

¹⁸ Mayeai kaiwewafoi keiwewari tuti kadidufoi sarabaurai, tuti mundiai fiabaiturehi bei fio. Mundiai fiabai tonana nei wiro fio na wea kaharai, na reantenang

Allai niari inontarainesa fo paria sobu rahida bonini.

¹⁹ Mundiai nani wedaya bendari fuba foi tibau webetoru tuti kaiwasa na nuo etaroanso Allai kaha ene bendarifo kontai woru. Weo Allai deti we Bendari Fuba Babeli nania tuti yu aiboio ne inontaraifosa, amani dohonsa etunung angguri deinawi kariri ne kasou fenanai na ne mokifoi.

²⁰ Nufo daisuia kai tuti uaifo musuhi.

²¹ Metang esi foi miung, metang nani ureng bei mani miraba kiro piarua sura teai. Metang ureng nani sawai meu miung kaiwasanesa. Ampafe inontarai esodai fi nanisa eteibera Allai paria, weo fimungno metang kamiee esodairi nanai, maraba paria fefe.

17

Wiwing wedaya kaiwasa enari sasari foi tuti ne andowa dautai nai foi

¹ Mayeai manei na wewai itu eo eha Allai ne aiboifo we nunei meu fosa, da ma medu deyo, "Ro ma, ambori yeinawiai we wau kariri todoni Allai dohong aiboifo we wiwing diruo wewonong foi nani, mano minohi na bendari fuba ebauni kefang we waya bitoya foi fo.

² Wiwing nani wedaya mananu fuba nunei kiai, enari sasari maninawa fo riati tuti wedaya inontarai nunesara ene tarai toyari emayeru na ne angguri kerira foi, ampafe etitua

* **16:13** Botio robongno 13:11-17.

we fi enari fo kahai, mae etawayang funongsa kontai."

³ Ainanaya Allai Nuaninufoi sensoni yau tuti iwatioai we wewaifoi kia yau to katai sirahiae wekamamiei fo. Na nanai iwati wiwing maneи, minohi sau andowa maneи kurungfo. Andowa nani berikahofi toyari abo tuti na ne taraifoi sentenang soi kaiwo tuti wang bitoyao deibera Allai nai fo. Andowa nani nungkamiei itu tuti nungkaradoi sura.

⁴ Wiwingfoi ansung sensuna fo kehe werawanderi tuti barika toyari abo. Mae mianai na emasi, kamamieio ne harga dedai, tuti fi ne tarai toyari raorio esahui we mutiarafoi.* Mae na warangfo yu moki emasi bei, moki nani sefang na fi piro kerira niari fo tuti ne maninawa poro fo.

⁵ Na rewongfoi soi wangfeai. Wang nani ne fiainawiafo wiro deisaha para kaha, wape dotu kariri ne fi karira niari fo. Wangfo dotu tonina:

BABELI FUBA!

NEUNG TANAMAI WE WIWING

DIRU KIAI

TUTI WE FI KARIRA PIRO FOI
KIAI!

⁶ Tuti iwati wiwingfoi meyeru we dunung Allai ne inontarai emararebana fosa ene rikafoi, amani mano eteyo Yesusi mani ene Seng dine fosa.

Iwatioi mani ipapuhung paria.

⁷ Ainanaya wewaifoi medu we yau deyo, "Fiani popuhung wei ne? Fi botioai nanai, amani wiwingfoi tuti ne andowa dautai nai foi, mano nungkamiei itu tuti nungkaradoi sura foi, ne fiainawiafo ambori yeikaririai we wau ki.

⁸ Andowa botioi nani, raminde nanai niayai kawuru na nunei, manamo mirehafo waroi ampa. Wape katu mani kiawarai na Kamirei Berorong foi meai, we sodai ne karirafoa wioru ki. Kaiwasa nunei ewatiodi we da aha ma fo nanai epapuhung wei paria. Weo raminde nanai niayai kawuru na nunei, tuti mireha wape ambori kiawariai aha wedayasa epapuhung tonanai. Kaiwasa nanisa mani, inontaraio reantenang pari Allai niari nunei kaharai mae wiro soi ewonomifo na ne Bukufoi kaha fo saine, amani Bukuo soi kariri mano esobu Waidani fosa foi.

⁹ Ampafe fininaifa mani, maneи sewai tuti sobu aunaufo na mai fino deitawanaifa fe. Andowafoi nungkamiei itu fo mani deinawi wiwoi ituo wiwingfoi minohi naya fo

¹⁰ tuti mananu ituo ewemananu fosa. Mananu itu nanai, ewering emarareha ampa, maneи wemananufe nendai, tuti maneи kontaio wiro kiawaria kaharai. Mano kiawaria kaharai nani da ma mani, wiro wemananu waroi kaha.

¹¹ Tuti andowa mano

* **17:4** Mutiara—Kamamieie reifofa niai na firai kamitarai doa na katai murutufoi rorongfo. Mutiara mani ne harga dedai paria.

raminde nanai niayai na nunei, wape mirehara foi tuti katu mani kiawariai aha ma foi, i mani mananu mano indeatoru dine. Tuti i mani kiontai mananu itu fosa. Tuti katu mani da we sodai ne karirafo na rawanang adia foi finina.

¹² Andowafoi nungkaradoi sura botioa fo mani, deinawi kariri mananu surao wiro eru wang mananu fo kaharai fosa. Wape ambori esobu mambiri we eru wang mananu fo araha ureng boyari, ria andowafoi ki.

¹³ Mananu sura ninisa kiai eweboyari we etohong ene mananufo tuti ene mambiri- ufo we andowafoi.

¹⁴ Ambori emamuna we Domba Antung foi, wape wiro ewemambiri we etapai kaha. Weo Domba Antung foi kiraikobusa, weo i mani Seng fuba dedai sewa seng nunei kiai dine tuti Mananu fuba dedai sewa mananu nunei kiai dine. Tuti ne inontaraifosa, mano sahusa, mano dirisara fosa, tuti mano wiro esu to fui werui kaha fosa, ea kontai emamuna riati."

¹⁵ Mayeai wewaifoi deisaharai kontai we yau aha deyo, "Mereha fuba botioi kiai na katai wiwing diru foi minohi nai foi mani, deinawi kariri inontarai fuba nunei kiai, amani inontarai na riria bodoni kontai, ete na kaiwo bodoni kontai, tuti na nu bodoni konta saine."

¹⁶ Andowafoi tuti nungkaradoi sura anta botioai nanai, ambori enimirireu wiwing diru wewonong foi. Ne fi minohi

tutira fo kai etawarai weruri tuti efating ne fiawawafoa doa arora. Etang ne taraifoi, tuti enunumi na adia.

¹⁷ Mananu sura fosa enari tonanai, weo Allai dino wedayasa ambori enimirorong dohong we enari finana fo. Ampafe enari kariri fi dawi wea fo. Amani eweboyari, etohong ene mananufo we andowafoi ambori andowafoi wemambiri we wemananu paria fianai aino Allai medura fo mai kaririai.

¹⁸ Mae wiwing botioi nani mani, deinawi kariri Babeli, bendari fubao yu mananu siai nunei sentenang foi dine."

18

Babeli misuhi

¹ Mayeai aha mani, iwati wewai siai manei biari na rorafaisi meu. Ne mambiri- ufo fuba tuti ne taraifoi sambe- warai toyari wofe nanai, we sambewa nunei.

² Sahu na rawafui fiabai deyo, "Misuh! to! Bendari fiabaio Babeli misuhi be- yari ampa! Kaiwasa wiro eminohi nai ahang kaha, mae ninaia mani, inggirafosa tuti nuanuni eharira fosa enariri we ene katai ampa, tuti romu kerira werarika foi kiai enariri kontai we ene munu."

³ Weo kaiwasa fuba nunei kiai enari maninawafo riati, ne tarai toyari etunung ne angguri deinawi kariri fikerira pari niariri foi. Mananu nunei kiai enari maninawafo riati, tuti mano ewaworifi etawayanai ahang fosa esobu ra bitoya paria

na ne maninawafoi, weo etawayang fikarira bitoya we kaiwasa na Babeli, fio ne harga dedai fine."

⁴ Ainanaya tarahu rawafui siai bei na rorafaisi medu deyo, "Nehu inontaraiwa meaine, mera weru bendariwai to borai ambori wiro mehontai na sasari ne kaiwasafu etohoni nani fanai, tuti ambori wiro mesobu ne aiboi fimung fo konta fanai.

⁵ Weo sasari enariri foi tibuka awiai sobu rorafaisi ampa, tuti Allai aroporo sasari kerira enariri tonana nei kaha.

⁶ Ampefe, mano metohong aiboi we bendari Babeli wa mea, fi kerira kiai raminde Babeli niariri we inontaraifosa wai, menari wei tonanai fuba sewa aha. Raminde nanai niari fi kerira bitoya wedaya inontarai siai esodai ne karirafo. Ampefe ninaia mani, meriwang ne dadirao niari tonana fo we mantauni aha, tuti ne metohonai wei fo weberu aha.

⁷ Fianai aino raminde sobuaia fo, amani minohi na ne mai pari fo tuti sobu fi bitoya paria, kariri finanai, ninaia mani, metohoni sodai dadirafo tuti enerorong fituayai fuba tonanai kariri ne mai sobuaia nanai. Weo deparandini berahi pam-pang, deyo, 'Yau mani wiro wiwinao urehukuru dada na wea di yau kaha, mae wiwing iwemananu di yau.'

⁸ Deparandini tonanai ampafe na rahida boyari kawuru sodai kipa fimung

karira fo beyari, amani mararehafoi, enerorongfoi fituayai tuti kaharifoi. Tuti ambori adia kasoi kiai, weo Allai mano dohong aiboifo wei foi mani, Seng Allaio wemambiri sewa dine.

⁹ Mananu fuba nunei ki-aio enari maninawafo riati tuti eparaaise na firaranding enari fenani, ewati riraung-foi we dautai nai ayai nanai, ambori esaia etaidu we bendarifoi ki.

¹⁰ Ematai ao etohong baba kahai, ampefe etoari na waroi mae emadu eteyo, 'Aro! Bendari fiabai Babeli sodai ne karirafo paria. Babeli bendari wemambiri foi, na araha ureng boyari kawuru mae wioru.'

¹¹ Mano etawayangfi na nunei sentenang nesa esai tuti enemirorongfoi fituayai wei, weo manei wiori fi etawayangna fo ahang kaha fefe.

¹² Weo Babeli wiori fi anggeng bitoya paria nasa, toyari emasi, peraki, kamiaio weharga dedai fo tuti mutiarafo, kontai ireu mahikaio biua karofari fo, ireu werawanderi fo tuti berika toyari abofoi. Kontai fianggengno enariri na aio wiro obu funomi kaha foi, fianggeng enariri na gaja uboreng foi, na aio ne harga dedai foi, na tembaga, besi tuti na kamieie mehikai foi.

¹³ Tuti ai memisi rerawa, fi-nunsai mampori fo, muri, kemenyang, angguri, maning, tepung tuti patibu, sapi tuti domba, kuda tuti oto kuda yabiti fo, tuti womingno afai

mamuna fosa etafusa fosa. Finanai kiai anta etawayanai wei, tuti etawayangno inontarai wei kontai.

¹⁴ Mano etawayangfi nanaisa, emadu we wiwing-foi, amani Babeli, eteyo, ‘Fianggeng fuba enemuro-rong dohong wei foi tuti fio puraiserai na rahida neungne, toyari bampi na mai tuti fio denteng miang nemu taraiwai nai fi, wiorua kiai ampa, tuti wobui na weai ahang kaha.’

¹⁵ Inontaraio etawayangfi we bendarifoia esobu ra bitoya nai nanisa, ambori ematai ao etohong baba kahai, etoari na waroi mae esaia etaidu we bendarifoi.

¹⁶ Emadu eteyo, ‘Aro! Bendari fiabai Babeli nini sodai ne karirao paria. Ne tarai toyari wiwingno sensuni na ireu biua karofari foi, ireu ne harga dedaio werawanderi foi tuti ireuo berika toyari abofoi. Tuti miang ne taraifoi na emasi, kamiae weharga dedai tuti mutiara.

¹⁷ Wape araha ureng boyari kawuru mae ne fianggeng fuba nani wiorua kiaia!

Inontarai mano ehai kapari fosa, inontarai etontai na kapari fosa, mano erufi na kapari fosa, tuti inontaraio eha fianggeng etontai na kaparifoi we etawayanai fosa, etoari na waroi.

¹⁸ Ewati riraungfoi dautai na bendarifoi ayai nanai, etaidu wei eteyo, ‘Bendari na doni kontaio wiro mesi bendari fiabai nini kaha.’

¹⁹ Ampafe ehafung kang-ganangso enumifo we fiainawiaifa we enemirorong-foi fituayai we bendarifoi tuti esaia etaidu wei eteyo, ‘Aro! Bendari fiabai nini sodai karirao paria. Bendari nini wedaya kaiwasa fuba etontai na kapari fosa esobu ra bitoya ampa. Wape na araha ureng boyari kawuru mae ne fianggengfoi kiai nani wiorua kiai.’

²⁰ Mano menayai na rorafaisi mea, memararising we fi sodaira fo! Tuti inontarai memararebana wa mea, rasuliwa mea, tuti nabiwa mea, memararising kontai we fi sodairai nanai! Weo Allai dohong aiboi wei, we biai karirao raminde nanai niari we meara fo.”

²¹ Mayeai wewaio wemambiri manei yuai kamie fiabai turehi bei, soi to rawanangnei meu tuti medu deyo, “Bendari fiabai Babeli waune, toyarine wau kontai Allai ambori so kanggung wau na mambiri tonanai kontai ki, ampafe wiro ati wau ahang kaha.

²² Nemu inontarai emei kecapi fosa wiro taramiosa we emei ahang kaha, mano erohi fosa, mano ebui suling fosa tuti ebui songgeri fosa, wiro taramiosa we erohi, ebui suling tuti ebui songgerifo na wea ahang kaha. Wiro obu inontarai deitawang yufi manei na nanai ahang kaha, tuti taramio kamie fiabai riroya patibu nai foi wedotu ahang kaha.

²³ Wiro ati padamarangfei

wedenggararu nai ahang kaha, tuti kaiwasa enari muniara mandirau nai ahang kaha kontai. Weo raminde nanai nemu inontarai etawayangfi wasa mani, inontaraio ewe-ewonomi paria na nunei saine. Tuti na nemu rawang kerira wai weanggari kaiwasa fuba nunei nai.

²⁴Weo Babeli wau mungno nabifesa ampa, tuti Allai ne inontarai emararebana fosa ampa. Wonong we mandoni kontai mireha tonana fo, wauno waramu rikaosa ne."

19

Kaiwasa na rorafaisi erohi eparaise we Babelio wiorufo

¹ Mayeai aha mani, tarahuoi we na rorafaisi kaiwasa bitoya erawamifuifoi nubuayai paria, esahu eteyo,

"Haleluya! Tane Seng Allai, tafiae,

weo andino feriri tata ne, andino tataparandini ne, andino wemambiriu ne!

² Tafiae, weo kiutu kaiwo na mai tuti wetarai.

Kiutuaifa ampa we dohong aiboifo we wiwing diruo fuba foi,

mano na ne maninawafo wedaya kaiwasa nunei eharira kiai ampa.

Allai miuni tonanai we biae ne inontaraifosa ene rikao raminde wiwing diru foi miunsara fo."

³ Tutu esahu aha eteyo, "Haleluya!

Weo adia kaso wiwing diru foi nani ne

riraungfoi sinu we fitawafa!"

⁴ Mano ewewafoniaio ewepi-areia mana fosa tuti fidarang mana fo, etisangkapa eawemibukafo esomi we Allai mano minohi na ne kadera mananu foi fo, tuti eteyo, "Antu! Haleluya!"

⁵ Ainanaya tarahuo rawafui bei medu na kadera mananu foi deyo, "Mefiai tane Seng Allai, mea kiai, mano mewewomming we Allai tuti mano mesomi wei ne mea, katui ete fuba!"

Domba Antung foi tuti ne muniara mandirau foi

⁶ Mayeai tarahuo fieai toyari kaiwasa bitoya paria esahu. Erawamifuifoi fiabai dotu toyari dofiro nubuayai tuti kadiu dotu fenanai. Emadu eteyo, "Haleluya!

Weo tane Seng Allaio we-mambiriu sewa ne, andino wemananu ne.

⁷ Tamararising, taparaise tuti tataparandini.

Weo rahida Domba Antung foi rirau nai fi kiaawai ampa tuti kadawing dauti fi meinenaami kontai ampa.

⁸ Allai dohong ansung mirarebanai bua karofari tuti kaiwewa fo we kadawingfoi we sensung nai."

(Ansung mirarebana nanai deinawi Allai ne inontarai emararebana fosa fi masio enari kariri ne dawiafo aine.)

⁹ Ainanaya wewaifoi medu we yau deyo, "Woi fininai, 'Mandoni dino Allai wenoti

to Domba Antung foi ne muniara mandirau foi mani, sobu moanafo riati.’ ” Mayeai medu aha deyo, “Kaiwo ninai, kaiwo tarai na Allai fine.”

¹⁰ Tarahuo kaiwofo nanai, itawai aweu isangkapa awe-hubukane na arongreafo we isomi wei. Manamo medu we yau deyo, “Nana fanai! Wiro womi we yau fanai, weo yau kontaio Allai ne woming di yau kariri wau, tuti kariri nemu doroio eraria Yesusi tuti eru ne aunaufoa mutu fosa! Mae womi we Allai terai! Weo Allai ne kai-woariri nabifesa emadura fo mani, deinawiaia kasau ampa we Yesusi mani Seng dine.”

Yesusi dautai na kuda biua manei tuti miungno andowa kerira foi

¹¹ Mayeai iwati rorafaisi tifai tuti iwati kuda biua manei tuti manei dautai nai. Mano dautai nai foi wonong fino Wetarai tuti Dohong Kariri Allai Ne Dawiafo Na Mai. I mani kiutu kaiwo na mai tuti memuna we ne aitetafosa na mai.

¹² Urengfo suru usambewarai toyari adia fiabai denggararu, tuti sata sapewi mananu bitoya na nungkamieifoi. Soi na ne taraifoi wangfeai, amani wangno wiro manei siai deitawana kaha, meiri dino deitawana ne.

¹³ Ne ansung deuroi satari foi werika sentenang, tuti mantauni wonong fino Kaiwo Allai.

¹⁴ Rai mamuna na rorafaisi sa etautai na ene kuda

ebaibua fosa tuti era riati. Rai mamuna nanisa ansung esansuna fo bua karofari tuti mirarebanai.

¹⁵ Sondu reisa bei kiawariai na borongfo ariei. Sondu nani dino memuna naia kiraikobu kaiwasa fuba na nu bodoni konta foi tuti yu kaiwasa nanisa na ne aitatohi besi foi, amani yusa na tapapa. Andino ambori sahariroya anggurio deinawi kariri Allai, mano Wemambiri Sewa foi, ne kasoufo, na katai etahariroya angguri nai foi ne.

¹⁶ Na ne ansung deuroi satari foi tuti na awedungfo, soi wang nina: *Mananu Fiabai Sewa Mananu Nunei Kiai tuti Seng Dedai Sewa seng Nunei Kiai.*

¹⁷ Ainanaya iwati wewai manei doari na wofoi, tuti sahu na rawafui fiabai we romu fuba esifo na rora amau faisa deyo, “Mefanduhi mea to ninai ma, we metampi ruhiae na fiang fubao Allai dohona nei,

¹⁸ ambori metangno mananufosa ene taraifoi tuti afai mamuna babao emarareha na mamuna rorong fosa ene taraifoi. Tuti metangno mano etautai na kuda fosa ene taraifoi, tuti kudafosa kontai, tuti kaiwasa fuba nunei kiai, katui ete fuba, woming ete woming kaha fosa!”

¹⁹ Mayeai iwati andowa kerira foi, mananu fuba nunei kiai tuti ene afai mamuna fosa, efanduhisa we emamuna we mano dautai na kuda biua foi tuti ne rai mamuna fosa.

²⁰ Wape tefu andowa kerira foi tuti ne nabi tarai kaha foi. Nabi tarai kahai nini dino, raminde niari fitantuma bitoya na andowafoi wonongfo ne. Tuti na fitantuma kerira niariri tonana foi, pempamu kaiwasa bitoyao esobu andowafoi ne fiainawiafo na ene taraifoi tuti esomi we ne aririwangfoi. Tefu surua so suru urarang to Rawanang Adiao webelerang deggararu foi aweu.

²¹ Mae mananu fuba fosa tuti ene afai mamuna fosa mani, mano dautai na kuda biua foi miunsa na sondu kewariai na borongfo ariei nani. Ampafe romufosa kiai esifo ma etananggoing rai nanisa ene taraifoia enimifo pising beyari.

20

Kristusi tuti ne inontarai feririsa fosa eru wang mananu defuina 1.000

¹ Mayeai iwati wewai manei biari na rorafaisi meu. Yu aisu Kamirei Berorong foi ne rahutufoi tuti wai besi fiabai bei na warangfo.

² Ainanaya tefu tawai naga fiabai foi—tawai kerira tawa foi—amani Saminseni, mano wemananu we inggirafosa foi, wiorahia.

³ Tuti soi to Kamirei Berorong foi aweu, mayeai kife rahutufoia tuti niari kobui na aisufoi tuti saha weduari na segeli. Ambori wiro pempamu kaiwasa na nunei ahang kaha, paria defuina piaura wering (1.000) fo kai. Wiataia defuina piaura

wering foa kaia fo, wewaifoi sawini tourai aha.

⁴ Ainanaya iwati kadera mananu fo, tuti mano eminohi naya fosa esobu mambiri we ehutu kaiwo. Iwati inontarai manea kontai enumianinufo, amani inontaraio raminde emadu kariri Yesusi tuti ewuwu Allai ne Kaiwofo wedaya kaiwasa eferangkahutu eramikanangfoa fosa. Ea mani, inontarai wiro esomi we andowa kerira foi tuti ne aririwangfoi kaha, tuti wiro esobu andowafoi ne fiainawiafo na erewomifo ete na ewaramifo kaha. Esuwi na marareha rorong foi etarang aha tuti eru wang mananu fo ria Kristusi paria defuina piaura wering (1.000).

⁵ Inontaraio esuwi na marareha rorong fo we eminohi etarang defuina piaura wering nanisa deinawi mansuwi-suwi reantenang fo finana. Wape inontarai emararehao wiro esuwi konta kaha fosa, ewatai paria defuina piaura wering foa kai akawuru wori esuwi ki.

⁶ Inontarai mano esuwi na mansuwi-suwi reantenang fe nanisa emararebanai tuti Allai mioansa paria. Weo wiro esodai Marareha Weberu foi kaha. Weo Marareha Weberu foi wiro wemambiri we kiasa kaha. Ampefe eweimami we Allai tuti Kristusi, tuti eru mananu ria Kristusi paria defuina piaura wering (1.000).

Allai miungno Saminseni tuti ne raifosa

⁷ Defuina piaura wering (1.000) foa kaifo, wewaifoi fiorehu wai besi fo weru Saminseni tuti sawini weru aitamu wiatai nai foi.

⁸ Ainanaya Saminseni kiawariai weru katai wiatai nai foi ariei, tuti da we pempamu kaiwasa na nunei sentenang amani kaiwasa na nu fubao uwonomi Gogi tuti Magogi, tuti fianduhisa we emamuna. Kaiwasa fuba fianduhu nani ato afonsoi kaha, ne tarai toyari ninuaing na nafareng.

⁹ Inontarai nanisa esinsung mai katai na nunei sentenang pariao era wa esoru katai Allai ne inontaraifosa eminohi nai foi, amani bendario enewawuti foi, we emamuna wei. Manamo Allai su adia bei na rorafaisi meu kasosara ehaia.

¹⁰ Mae Saminseni, amani mano pempampusa foi, wewai manei soi to Rawanang Adia foi, amani adiao belerang denggararu foi. Katai nani dino raminde wewaifoi so andowa kerira foi tuti ne nabi tarai kaha foia unayai nai ne. Na katai nani esodai dadira fiabai paria fo nai, diru rahida we fitawafa.

Aiboi wefuiai pario Allai dohonai we inontarai eharira fosa

¹¹ Mayeai iwati kadera mananu fiabai biua bei, tuti Seng Allai minohi nai. Na arongreafo, rorafaisi tuti nunei unai na tantuma tuti wiro watioi na weai ahang kaha.

¹²⁻¹³ Tuti iwati inontarai emarareha fosa, katui ete fuba, etoari na arongreafo. Inontarai emarareha na

rawanang fosa, mano enayai na Mararehafoi tuti na Aitamu Marareha Rorong foi, inontarai nanisa kiai, era wa etoari na Allai arongreafo we kiutu kaiwo karirisa. Mayeai iwati manei fiai buku soi kariri inontarai ene enari toa fo naya fo. Tuti fiai buku siai bei kontai amani, Bukuo soi kariri mano esobu Waidani fosa nai foi. Ainanaya Allai dohong aiboifo we inontarai emarareha fosa kariri fianai aino soi na bukufoi kariri ene etohong toa fo nanai.

¹⁴ Mayeai wewaifoi so Mararehafoi tuti Aitamu Marareha Rorong foi to Rawanang Adia foi aweu. Rawanang Adia nini mani Marareha Weberu foi dine.

¹⁵ Mandoni dino wonongfo watai na Buku soi kariri mano esobu Waidani fosa foi kaha mani, wenani kontai Allai soi to Rawanang Adia foi.

21

Nu weworu

¹ Mayeai iwati Rora Weworu bei aha, tuti nuneio weworu bei aha. Weo nunei bo reantenang foi niai ampa. Rawanangfo kontai bireri ampa.

² Tuti iwati Bendari Mirebanai, amani bendari Yerusalem weworu foi, Allai suki na rorafaisi meu. Bendari nani ne tarai toyari kadawing mandirauo mireandinia meinenaing we ne mangfoi.

³ Tuti tarahu manei sahu na kadera mananu foi deyo,

“Ninaia mani katai Allai minohi nai fi wiatai rahang inontarainesa ampa. Tuti minohi riasa, ambori yuaisa we ne inontaraifosa. Allai mantauni ambori weririasa tuti weSeng wesa.

⁴ Ambori dufi euremiku-rufo weru euremifo, wiro esodai mararehafoi ahang kaha, esai ahang kaha, etaidu ahang kaha, tuti enumiruainso emaninang na weai ahang kaha. Weo fi kiaio mamo foi niai ampa.”

⁵ Ainanaya mano minohi na kadera mananu foi medu deyo, “Boti ma! Ninaia mani inari fi fuba nini kiai we-woru!” Tuti medu tubarai aha deyo, “Woi fianai aino imadurai we wau mau nanai, weo kaiwo nanai tarai tuti masi we meroasoai.”

⁶ Mayeai medu we yau aha deyo, “Kai ampa! Yau mani, Alfa tuti Omega di yau, yau kontaio Reantenang Pari tuti Fui Pari di yau. Mandoni dino arongtataha mani, ambori yohong merehafo dunung ki, tuti mereha nanai yohong aroratai na waya urengno dohong kaiwasa eminohi etarang we fitawafa foi.

⁷ Mandoni dino doara mutu dirapa Saminseni mani, wenani sobu finanai kai ria yau ki, tuti ambori iruaisi we nehu kaisung tuti iweSeng wei ki.

⁸ Wape mano ematai we enari ne mai fosa, mano eroasoa kaha fosa, mano enari sasari kerira fosa, mano emung inontarai fosa, mano emaninawa funoma

fosa, mano eha rawang fosa, mano esomi we seng tarai kaha fosa, mano etatofa biriu fosa, kaiwasa kerira fuba nani kiai ambori iso sa to Rawanang Adia webelerang denggararu foi aweu. Rawanang Adia nani mani, Marareha Weberu foi dinani.”

Yerusalem i weworu foi

⁹ Ainanaya wewai wefuiari pari foi, na wewai ituo eru rewanguai wenofi beitu sefang na Allai ne aiboi beitu fo, da ma medu we yau deyo, “Ro ma, ambori tura wa yeinawio Kadawing Mandirau foi we wau, amani Domba Antung foi ne wiwingno ambori dauti foi we wau.”

¹⁰ Ampafe Allai Nuaninufoi sensoni yau tuti wewaifoi kia yau to uai fiabai dedai beia. Na wanai deinawi Bendari Mirarebanai we yau, amani Yerusalem. Bendari nani biari na rorafaisi na Allai arongreafao meu.

¹¹ Allai ne sambewaraio dadai fo wedaya bendarifoi keiwewa toyari kamieio keiwewa ne harga dedai esahui we intani, tuti memarampoti toyari kasinai.

¹² Bendarifoi ne taba kamieio dawariri foi fiabai tuti dedai, tuti ne rahutu suraya boru, wewai ewesuraya mandu ewaitawang weduarai na rahutu suraya boru nanai, amani mansiari-mansiari deitawang wedua rahutu bei. Tuti esoi inontarai Israeli fosa ewonomifo kariri ene riria suraya boru fo maino

rahutu suraya boru fo, amani
rahutu bei riria bei, rahutu
bei aha mani riria bei.

¹³ Rahutu suraya boru
nanai, botoru arong to do
wanang murang foi, botoru
arong to do wanampui foi,
botoru aha mani arong to
do wanansai foi, tuti botoru
arong to do wanamba foi.

¹⁴ Taba kamiei foi ebauni
sau kamiei suraya boru.
Na kamiei suraya boru
nanai, esoi Domba Antung
foi ne rasuli suraya mandu
fosa ewonomifo nayai,
amani mansiari-mansiari
wonongfo na kamiei bei.

¹⁵ Wewai medu we yau
nani, yu aititua enariri na
emasi bei we titua bendari-
foi, ne taba dawariri foi tuti
ne rahutufo, nayai.

¹⁶ Bendarifoi wiatafo we-
aburuniai, amani deuroifo
masi kariri tebafoi. Ampafe
tituatia mani ne deuroifo
deuroio stadia 12.000, amani
kilometeri 2.200, tonanai
kontai we ne tebafoi tuti ne
dedaifo.

¹⁷ Mayeai titua taba kamiei
foi aha mani, kehubang hasta
144, amani meteri piatorua
wonang (66). Weo wewaifoi
ne tituafu kariri todoni inon-
taraine etituafi fo.

¹⁸ Taba kamiei nani enariri
na kamiei keiwewa ne harga
dedai esahui we intani,
mae bendarifoi mantauni
na emasi denteng pari foi.
Emasi nani memarampoti
toyari kasinai.

¹⁹ Kamiei ebaung tabafoi
sauwi foi mani, na ka-
mamieio keiwewa tuti ne
harga dedai ureng suraya

boru.

Amani kamiei ureng bo re-
antenang foi mani, na kamiei
intani memarampoti,

bo boru foi na kamieio
kehe rawanang esahui
we nilami,

bo botoru foi na kamiei
kehe rawanang tuti kehe
ai reraung esahui we mi-
rahi,

bo boa foi na kamieio kehe
ai reraung esahui we
zamrudi.

²⁰ Mae kamiei bo ring foi na
kamiei berika tuti biua
esahui we unami,

bo wonang foi na kamiei
berika esahui we sardisi,
bo itu foi na kamiei be-
mining emasi esahui we
ratna cempaka,

bo indeatoru foi na kamiei
kehe adareti toyari man-
soari aibong, esahui we
berili,

bo indeata foi na kamiei
bemining esahui we
topasi,

bo sura foi na kamiei kehe
bemining esahui we
krisopasi,

bo suraya boyari foi na
kamiei kehe toyari
rawanang baba esahui
we lazuardi,

mae kamiei bo suraya boru
foi na kamieio kehea
werawanderi foi esahui
we kecubung.

²¹ Rahutu suraya boru fo na
mutiara suraya boru, ampafe
rahutu bei mani na mutiara
fiabai bei, rahutu bei aha
mani tonanai kontai. Mae
bendarifoi ne rang fuba fo
mani na emasio denteng pari

fo, emasi nani memarampoti toyari kasinai.

²² Seng Allai mano Wemambiri Sewa foi tuti Domba Antung foi uminohi na bendarifoi, ampare iwati Seng Allai ne Munufoi na bendarifoi kaha, weo Munu nani bireri ampa.

²³ Bendari nani wiro wofoi ete embaifoi sambewari kaha, tonanai ki wape wiro memantiti na wea kaha, weo Allai ne sambewaraio dadai fo aino sambewari ne, tuti Domba Antung foi andino ne tarai wepadamarang sambewari konta ne.

²⁴ Kaiwasa na doni kontai na nunei, ambori era na sambewaraio na bendarifoi nani ki, tuti mananufosa kontai ambori eha ene rafoi to bendarifoi ki.

²⁵ Rahutu to bendarifoi afui nani wiro kafei na wea kaha, mae tifai pampang na rahida neungne, weo katai nani wiro diru na weai ahang kaha fefe.

²⁶ Kaiwasa fuba nunei kiai ambori era wafui we etaparanding Allai tuti Domba Antung foi tuti esomi we suru nai.

²⁷ Wape mano enari fi kia mamaya fosa, ete mano epampamu fosa, ete tanang tofino mano enari fi werarika fo, inontarai nanisa wiro esuai to bendarifoi afui kaha. Mae mano esuai afui fosa mani, mano ewonomifo watai kawuru na Domba Antung foi ne Bukuo soi kariri mano esobu Waidani fosa foi.

¹ Mayeai wewaifoi deinawi waya rowei we yau, wayao ne merehafoi manei dumumi mani minohi darang wenumainu dine. Wayafoi memarampotia wati tauremi nai toyari kasinai fenanai, tuti deda na kadera mananuo Allai tuti Domba Antung foi uminohi naya fo ariei.

² Deda ariei mani deda riria rang fiabai foi rabuang tahi fo na bendarifoi. Aio bongfoi kaiwasa etani mani eminohi etarang we numainufoi, doa na wayafoi eneung dowani tuti donini. Defuina bei mani webong we besuraya beru, amani embai bei mani webong we beyari. Mae reraungfoi kaiwasa na nunei kiai ehari we enari ene maninangfoi nai.

³ Ampafe fiani kontai aino Allai deikangganiaia fo, wiro nayai na bendarifoi kaha. Allai tuti Domba Antung foi ambori une kadera mananu foi wiatai na bendarifoi, tuti Allai ne womingfosa ambori efatari ki.

⁴ Ewati te Allai urengfo tuti soi wonongfo na erewomifo ki.

⁵ Katai nani wiro diru na weai ahang kaha tuti wiro etohong we wofoi tuti padamarangfoi we sambewasa ahang kaha. Weo Seng Allai mantauni andino ne tarai we wo tuti padamarang we sambewasa ne. Tuti ambori eru wang mananu fo we fitawafa.

6 Ainanaya wewaifoi medu we yau deyo, "Kaiwo fuba taramuo i kiai nini, kaiwo tarai fine tuti masi we meroasoai. Seng Allai mano sensoni ne nabifosa na Nuaninu Mirarebana foi, demi ne wewaine yau kawuru ma we yeinawiai we wau kariri fianai aino katu wo kawaria fo, ambori woi kaririai we ne womingfosa."

7 Yesusi medu deyo, "Metarami ma! Yemang ahang kahai mae ira ahera mau. Mandoni dino dohong kariri kaiwo fuba dotu na buku fi nini mani, sobu moanafo."

8 Tuti fi fuba nini kiai, yau Yohanesi, tarahu terai na tarahune tuti iwati terai na urehune kontai. Tarahuoi tuti iwati fi fuba nini kaifo, itau aweu isangkapa awehubuka na wewaio deinawi finanai we yau foi arongreafao we isomi wei.

9 Manamo medu we yau deyo, "Nana fanai! Weo yau kontaio Allai ne woming di yau kariri wau, tuti kariri nemu dorolio ewenabi fosa tuti kariri kaiwasa fubao etohong kariri kaiwo areraio watai na buku fi nini. Ampefe womi te we Allai."

10 Ainanaya medu we yau aha deyo, "Wiro bodiwa kaiwo watai na buku fi nini fanai, weo rahidafe kikeu ampa, we fininai ambori kawariaifa.

11 Mandoni dino niari ne karirafo mani, niari pampangna, tuti mandoni dino niari fi werarika fo mani,

tawing wenani niari pampang kontaia.

Mandoni dino niari fi mai fo mani, wenani todoni kontai dohong kaririai pam-pang.

Kontai mandoni dino mi-rarebana mani, wenani todoni kontaio mirarebanai pam-pang."

12 Yesusi medu deyo, "Metarami ma! Yemang ahang kahai mae ira ahera mau, ira tuti fiembaitane we yohonai we mansiari-mansiari kariri fi niari fo.

13 Yau mani *Alfa* tutu *Omega* di yau, yau kontaio *Reantenang Pari* tuti *Fui Pari* di yau.

14 Mano eruai ene an-sungfo ambori mararebana fosa mani, esobu moanafo ria Allai. Ea mani ambori Allai yoa wesa we etangno aibong na aio dohong kai-wasa eminohi etarang we numainu foi ki, tuti esuayai na rahutu fiabai foi to ben-darifoi afui ki.

15 Wape inontarai mano emasi we ahusa we fiawera fosa, amani mano eha rawang fosa, emaninawa funoma fosa, emung inon-tarai fosa, esomi we seng tarai kaha fosa, epampamu na kaiwo emadura fo tuti na etohong toa fosa, kaiwasa fuba nani kiai enayai na borieifo.

16 Yau, Yesusi, yenatu nehu wewaifi we mea meu wa, we deisaha kariri fi fuba nini we jematiwai kiai ampa. Yau mani *Riria Na Dauti* di yau,

tuti yau mani awaha *Am-pario* denggarau fiabai foi di yau."

¹⁷ Allai Nuaninufoi tuti Domba Antung foi ne Kadawing Mandirau foi umadu we Seng Yesusi ureyo, "Ro ma!" Tuti mandoni kontaio tarao kaiwone mani todoni kontai medu deyo, "Ro ma!" Mandoni dino arongtataha tuti mandoni dino miaya mani da ma kia mereha wedaya kaiwasa eminohi etarang we fitawafa fo we dunung. Mereha nanai kia arorataifa, wiro biaita kaha.

Kaiwo arera wefuiuai pari kariri kaiwo na bukunei

¹⁸ Yau Yohanesi yeretawanainaahera mau! Antu! Seng Yesuse, ro ahera ma!

manei medu seru kaiwofeai siai weru kaiwo nina mani, Allai ambori dohong seru aiboi fimungno watai na ne buku fiembaitaio deretawanai na buku fininai wei kontai ki, amani wiro sobu katai we minohi na bendari mi rarebana foi kaha, tuti dang aibongno manei dani mani wedayari minohi darang we numainufoi kaha foi.

¹⁹ Tuti manei medu ta weaifa ete gefora weaifa mani, Allai kontai kiutu fiembaitaio deretawanai na buku fininai wei kontai ki, amani wiro sobu katai we minohi na bendari mi rarebana foi kaha, tuti dang aibongno manei dani mani wedayari minohi darang we numainufoi kaha foi.

²⁰ Mano medurai we kaiwo ninai kiai mani kaiwo tarai fine foi deyo, "Yo! Wiro yemang ahang kahai mae, ira

Yemang ahang kahai mae, ira

Seng Yesuse, ro ahera ma!

²¹ Kadono Seng Yesusi dohong ne bengfo arora we Allai ne inontarainesa kiai! Antu!